


Ooratha Caaquwa  
Goofatho



New Testament in Gofa (ET:gof:Gofa)

# **Ooratha Caaquwa Goofatho**

## **New Testament in Gofa (ET:gof:Gofa)**

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

---

PDF generated using Haiola and XeLaTeX on 11 Nov 2022 from source files dated 30 Dec 2021

8695a6a5-d671-5199-996c-6069adce0ebd

## Contents

Maatoosa . . . . .	1
Marqqaosa . . . . .	38
Luuqaasa . . . . .	62
Yohaannisa . . . . .	98
Hawaareta Oosuwa . . . . .	125
Roome . . . . .	158
1 Qorontoosa . . . . .	174
2 Qorontoosa . . . . .	188
Galaatiya . . . . .	197
Efesoona . . . . .	202
Filphisiyuusa . . . . .	207
Qolaasiyasa . . . . .	211
1 Teselonqe . . . . .	215
2 Teselonqe . . . . .	219
1 Ximotiyooosa . . . . .	221
2 Ximotiyooosa . . . . .	226
Tito . . . . .	230
Filmmoona . . . . .	232
Ibraawe . . . . .	233
Yayqooba . . . . .	245
1 Phexiroosa . . . . .	249
2 Phexiroosa . . . . .	253
1 Yohaannisa . . . . .	256
2 Yohaannisa . . . . .	260
3 Yohaannisa . . . . .	261
Yihuda . . . . .	262
Yohaannisa Qonccethaa . . . . .	264

## Maatoosi Xaafida Yesuus Kiristtoosa Wonggelaa Gaatha Qofaa

Maatoosa Wonggelay, yaana geettidi ufayssan naagettiya ashsheyssi Yesuusa gideyssanne Xoossay gal77a caaawan ba asaas immida ufayssa qaalaa poliday iya baggara gideyssha odiya Wonggelaa. Ha Wonggelay Yesuusi entta giddon yelettidi diccida Ayhudeta xalaalas gidonnashin kumetha alamiya ubbaassa.

Maatoosa Wonggelay, daro naagetetida xaafettida maxaafa. Maatoosi ba maxaafaa Yesuusa yeletethan doomidi, iya xammaqetethaanne iya paacetethaa odi simmidi, Galililan I sabbakidabaa, tamaarssidabaanne harganchchota pathidabaa odee. Hessafe kaallidi, Yesuusi Galilappe Yerusalemme bidayssanne I ha sa7an de7ida wode wursethaa saaminttan hanidabata qonccisees. Hessika iya kaqetethaa, iya hayquwanne iya dendduwa oykkees.

Ha Wonggelay, Yesuusi Xoossa higgiya birshshanaw maati de7eyssanne Xoossa kawotethaabaa tamaarssiyaa gitaa asttamaare oothidi shiishees. Iya timirttiyafe dariya baggay dumma dumma maaran gigettida ichhashu kifletan shaakettees.

1. Xoossa kawotethan de7iya asaa hanotethaa, oosuwa, maatanne wursethaa qaadaa odiya Deriya Bolla Timiritti (Shem 5-7).

2. Tammanne nam77u tamaareti Wonggelaa sabbakanaw bida wode enttaw imettida kaalesuwa (Shem 10).

3. Xoossa kawotethabaa tamaarssanaw shiiqida dumma dumma leemisota (Shem 13).

4. Iya tamaare gidobaa birshshethaa odiya timirttiya (Shem 18).

5. Ha77i alamiya wursethaanee Xoossa kawotethaa yuussabaa odiya timirttiya (Shem 24-25).

### **Maatoosa Wonggelaa ayfe qofata**

Yesuus Kiristtoosa yeletethaa susaanee iya yeletethaa *1:1-2:23*

Xammaqiya Yohaannisa oosuwa *3:1-12*

Yesuusa xinqqatiyanne paacetethaa *3:13-4:11*

Yesuusi Galililan ba oosuwa oykkidayssa *4:12-18:35*

Galilappe Yerusalemme gakkanaw *19:1-20:34*

Wursethaa saaminta Yerusalemme heeran *21:1-27:66*

Godaa hayqoppe dendduwanne qonccethaa *28:1-20*

*Yesuusa yeletethaa susaa*

*(Luuqa 3:23-38)*

<sup>1</sup> Hayssafe kaallidi xaafetidayssi Dawite na7a Abrahame na7a gidida Yesuus Kiristtoosa yeletethaa.

<sup>2</sup> Abrahamey Yisaqaq yelis;

Yisaaqi Yayqooba yelis;

Yayqoobi Yihudanne iya ishata yelis;

<sup>3</sup> Yihudi Ti7imaariippe Faaresenne Zaara yelis;

Faaresi Asroome yelis;

Asroomey Raame yelis;

<sup>4</sup> Raamey Aminaadabe yelis;

Aminaadabey Na7asoona yelis;

Na7asooney Salmoona yelis;

<sup>5</sup> Salmooney Ra7abippe Boo7eza yelis;

Boo7ezi Uruutippe Iyobeede yelis;

Iyobeedi Isseyye yelis;

<sup>6</sup> Isseyyey kawuwa Dawite yelis;

Dawitey Ooriyo machcheefe Solomone yelis;

<sup>7</sup> Solomoney Robi7aama yelis;

Robi7aamey Abiya yelis;

Abiye Asaafe yelis;

<sup>8</sup> Asaafi Iyosaafexe yelis;

Iyosaafexey Iyoraame yelis;

Iyoraamey Ooziyane yelis;

<sup>9</sup> Ooziyaney Iyo7ataame yelis;

Iyo7ataamey Akkaza yelis;

Akkazi Hiziqiyasa yelis;  
 10 Hiziqiyasi Minaase yelis;  
 Minaasey Amoona yelis;  
 Amooni Iyosiyaasa yelis;  
 11 Isra7eele asay di7ettidi Baabiloone biittaa bida wode Iyosiyaasi Ikoniyaananne iya  
 ishata yelis.  
 12 Baabiloone biitta Isra7eele asay di7ettidi bidaappe guye Ikoniyaani Salatiyaale yelis.  
 Salatiyaaley Zerubaabela yelis;  
 13 Zerubaabeli Abdiyu yelis;  
 Abdiuy Eliyaaqeme yelis;  
 Eliyaaqemey Azaara yelis;  
 14 Azaari Sadooqe yelis;  
 Sadooqey Akiime yelis;  
 Akiimey Eliyuuda yelis;  
 15 Eliyuudi Alaazara yelis;  
 Alaazari Maatane yelis;  
 Maataney Yayqooba yelis;  
 16 Yayqoobi Yoosefa yelis;  
 Yoosefi Kiristtoosa giya Yesuusa yelida Mayraami azina.

<sup>17</sup> Hiza, yeletethay Abrahameppe Dawite gakkanaw tammanne oydda. Dawiteppe bidi Baabiloone di7uwa gakkanaw tammanne oydda. Baabiloone di7uwappe bidi Kiristtoosa gakkanaw tammanne oyduu yeletethi gidees.

*Yesuus Kiristtoosa yeletethaa  
(Luuqa 2:1-7)*

<sup>18</sup> Yesuus Kiristtoosa yeletethaa taarikey hayssafe kaalleyssa. Iya aaya Mayraama Yoosefas oyshetta de7ashe Yoosefara gahettonna Geeshsha Ayyanaappe qanthatasu. <sup>19</sup> Yoosefi Xillo asi gidida gisho iyo asan kessanaw koyibeenna. Yaaniya gisho qosan iyo agganaw qoppis. <sup>20</sup> I he qofan de7ishin Xoossaaka kiitanchchoy amuhon qonccidi, “Dawite na7aw, Yoosefa, Mayraama qanthatiday Geeshsha Ayyanaappe gidiya gisho iyo ekkanaaw yayyofa” yaagis. <sup>21</sup> Iya adde na7a yelana, I ba deriya entta nagaraappe ashshiya gisho iya sunthaa ne Yesuusa gada xeegana.

<sup>22</sup> Goday nabiya Isayaasa doonan, <sup>23</sup> “Hekko geela7iya qanthatana; adde na7akka yelana; iya sunthay Ammanu7eela geetettana” goyssi poettana mela ha ubbay hanis. Ammanu7eela geyssas birshshethay “Xoossay nuura de7ees” guussu.

<sup>24</sup> Yoosefi dhiskkofe barkkidi Godaa kiitanchchoy kiittidayssa mela Mayraamo ba soo efis. <sup>25</sup> Shin ba bayra na7a yelana gakkanaw iyo bochchibeeenna;\* yelettida na7akka Yesuusa gidi xeegis.

## 2

*Dolohappe yida asata*

<sup>1</sup> Kawanwa Heroodisa woden Yesuusi Yihuda biittan Beeteleme kataman yelettidayssafe guye xoolinttu taybiya asati dolohappe Yerusalaame yidi, <sup>2</sup> “Yelettida Ayhude kawoy awun de7ii? Nuuni doloha baggara keyida iya xoolinttuwa be7idi iyaw goynnanaaw yida” yaagidi oychchidosona. <sup>3</sup> Kawoy Heroodisi hessa si7ida wode dagammis. Yerusalaamen de7iya asay ubbayka dagammidosona. <sup>4</sup> Heroodisi kahine halaqatanne higge asttamaareta baakkoo xeegidi, “Kiristtoosi awun yelettanddeshsha?” yaagidi entta oychchis.

<sup>5</sup> Enttika, “Yihuda Beetelemena; nabey,

<sup>6</sup> Yihudan de7iya Beeteleme,

Yihudan de7iya gooba katamatappe,  
 neeni aybinkka guuxaka.

Ta deriya Isra7eele aysanayssi,  
 neeppe keyana’ gidi xaafis”

yaagidosona.

<sup>7</sup> Hessafe guye, Heroodisi dolohappe yida asata geeman xeegidi, xoolinttuwa entti be7ida wodiya enttafe geeshshidi eris. <sup>8</sup> I enttana Beeteleme yeddishes, “Bidi yelettida na7aa minthidi koyite; iya hintte demmida wode takka bada iyaw goynnana mela simmidi yishe taw odite” yaagis. <sup>9</sup> Enttika kawoy Heroodisi gidayssa si7idi bidosona. Entti doloha baggara be7ida xoolinttoy enttana kaailethishe na7ay de7iyasuwa gakkanaw efis.

<sup>10</sup> Entti he xoolinttuwa be7ida wode gita ufayssi ufayttidosona. <sup>11</sup> Soo gelidi na7aa ba aaye Mayraamira de7eyssa be7idosona. Iyaw gulbatidi goynnidosona. Bantta saaxiniya dooyidi worqqa, ixaanenne karbbe iyaw immidosona. <sup>12</sup> Entti Heroodisakko guye simmona mela Xoossay amuhon enttaw odin, hara ogera bantta biittaa simmidosona.

### Gibxxe baqatuwa

<sup>13</sup> Doloha baggafe yida asati bidaappe guye, Godaa kiitanchchoy Yoosefas amuhon qonccidi, “Heroodisi na7aa wodhanaw koyaa gisho dendda; ellesada na7aanne na7aa aayiw ekkada Gibxxe biittaa ba. Ne simmana wodiya ta new odana gakkanaw yan gam77a” yaagis.

<sup>14</sup> Hessa gisho, Yoosefi he qamman denddidi, na7aanne na7aa aayiw ekkidi Gibxxe bis. <sup>15</sup> Nabiya doonan Xoossay, “Taani, ta na7aa, Gibxxe biittafe xeegas” geettetida qaalay polettana mela Heroodisi hayqqana gakkanaw I yan de7is.

<sup>16</sup> Hessafe guye, doloha baggafe yida asati iya cimmidayssa erida wode daro yilotis. I kase enttafe si7idayssada Beetelemeninne he heeran de7iya nam77u laythi kumidayssatanne nam77u laythafe garssan de7iya adde nayta ubbaa ba wotaddareta yeddidi wodhisis.

<sup>17-18</sup> Nabiya Ermmiyasa doonan,  
“Yeehoynne zeelssi,

Raama kataman si7ettis.  
Raahela ba naytas yeekkawusu;  
entti hayqqida gisho  
minettanaw dandda7abuukku”  
gidi odidayssi polettis.

### Naazirete simuwa

<sup>19</sup> Heroodisi hayqqidaappe guye Gibxxen Godaa kiitanchchoy Yoosefas amuhon qoncidi, <sup>20</sup> “Na7aa wodhanaw koyaa asati hayqqida gisho denddada na7aanne na7aa aayiw ekkada Isra7eele biittaa simma” yaagis.

<sup>21</sup> Yoosefi denddidi na7aanne na7aa aayiw ekkidi Isra7eele biittaa simmis. <sup>22</sup> Shin Arkkeliyosi Yihudan ba awaa Heroodisa bessan kawotidayssa si7ida wode yaa baanaw yayyis. Xoossay amuhon iyaw qonccisin Galiila biittaa bis. <sup>23</sup> Nabetta doonan, “Naazirete asi geettetana” gidi odettidayssi polettana mela Naazirete katamaa bidi yan de7is.

## 3

### Xammaqiya Yohaannisa timirttiya

(Mar 1:1-8; Luuqa 3:1-17; Yoha 1:19-28)

<sup>1-2</sup> He wode Xammaqiya Yohaannisi, “Xoossa kawotethay matattida gisho hintte nagaraappe simmitem” yaagidi sabbakishe Yihuda bazzo biittaa bis. <sup>3</sup> Nabiya Isayaasi Yohaannisabaa odidayssa mela,

“Bazzo biittan,  
issoy ba qaala dhoquu oothidi,  
‘Godaa ogiya giigisite.  
Iya horogaa piddi oothite’ gis”  
yaagettiday iyassa yaagis.

<sup>4</sup> Yohaannisi gimale ikiseppe oosettida afila ma77ees. Ba xeessan dafo danccees. I miya kathayka boolenne degera eesi. <sup>5</sup> Asay he wode Yerusalaame katamaappe, Yihuda biitta ubbaafenne Yorddaanose Shaafaa heerappe iyaakkoo yoosona. <sup>6</sup> Bantta nagaraa paaxidi Yorddaanose Shaafan Yohaannisa kushen xammaqettosona.

<sup>7</sup> Yohaannisi, daro Farisaawetinne Saduqaaweti xammaqettanaw baakko yeysata be7idi, enttako, “Ha iita shooshatoo, yaana Xoossa hanquwafe baqatanwa mela hintte oone zoriday? <sup>8</sup> Hiza, hinttee, hintte nagaraappe simmidayssa erisiyabaa oothite. <sup>9</sup> Hinttee, hintte wozanan, ‘Abrahamey, nu aaway de7ees’ gidi qoppofite. Loythi si7itel Xoossay ha shuchchatappe Abrahames na7a kessanaw dandda7ees. <sup>10</sup> Beexey mithaa xaphuwan giigidi uttis; lo77o ayfe ayfonna mitha ubbay qanxettidi taman yegettana.

<sup>11</sup> “Hinttee, hintte nagaraappe simmidayssa erisanaw taani hinttena haathan xammaqays. Shin taappe guyera yeysi hinttena Geeshsha Ayyaananine taman xammaqana. I taappe daro wolqqaamees; taani hari attoshin iya caammaa tookkanawukka bessike. <sup>12</sup> Kathaa geeshshiya pithey iya kushen de7ees. Kathaa loythi geeshshees; gistiya ba shaaliyan qolana, shin punuwa to7onna taman xuuggana” yaagis.

*Yesuusa xammaqetethaa  
(Mar 1:9-11; Luuqa 3:21-22)*

<sup>13</sup> He wode Yesuusi Yohaannisa kushen xammaqettanaw Galilappe Yorddaanose Shaafaa bis. <sup>14</sup> Shin Yohaannisi iya digganaw koyid, “Taani nenan xammaqettanaw koshshishin neeni taakko yay?” yaagis. <sup>15</sup> Shin Yesuusi zaaridi, “Xoossay nuuppe koyabaa ubbaa nu polanaw bessiya gisho ha77i taw ero ga” yaagis. Yohaannisi iyaw ero gidi ekkis. <sup>16</sup> Yesuusi xammaqettida mela haathaafe keyis. Iirakka saloy dooyettin Xoossaay Ayyaanay holleda yishin qassi ba bolla wol77ammidi wodhdhishin be7is. <sup>17</sup> He wode “Ta dosiya, iyan tana ufayssiya ta na7ay hayssa” yaagiya qaalay saloppe yis.

## 4

*Yesuusa paacetethaa  
(Mar 1:12-13; Luuqa 4:1-13)*

<sup>1</sup> Hessafe guye, Xalahey Yesuusa paaccana mela Geeshsha Ayyaanay Yesuusa bazzo biittaa efis. <sup>2</sup> Oytamu qammanne oytamu gallas xoomidaappe guye koshattis. <sup>3</sup> Xalahey Yesusakkko yidi “Neeni Xoossaay na7a gidikko, ane ha shuchchati uythi gidana mela kiitta” yaagis.

<sup>4</sup> Yesuusi zaaridi, “ ‘Asi Xoossaay doonappe keyaa qaala ubban daanappe attin uyttha xalaalan de7enna’ geetettidi Xoossaay qaalan xaafettis” yaagis.

<sup>5</sup> Kaallidikka, Xalahey Yesuusa geeshsha katamaa efidi, Xoossaay keetha huu7iya kessidi, <sup>6</sup> “Neeni Xoossaay na7a gidikko, ane duge sa7an kundda. Ays giikko,

‘Ne tohoy shuchchan dhubetti deshettonna mela,  
bantta kushiyan nena denthana mela,

Xoossaay ba kiitanchchota ne gisho kiittana’  
geetettidi Xoossaay qaalan xaafettis” yaagis.

<sup>7</sup> Yesuusi iyaakkko, ‘Qassika, ‘Xoossaay qaalan ne Godaa, ne Xoossaay paaccofa’ yaagettidi xaafettis” gidi zaaris.

<sup>8</sup> Wursethan Xalahey Yesuusa issi wolqqaama deriya huu7e kessidi alamiya ka-wotethata entta bonchchuwara issife bessidi, <sup>9</sup> “Ne taw kunddada goynniko ta new ha ubbaa immana” yaagis.

<sup>10</sup> Yesuusi zaaridi, “Ha Xalahiyaw, taappe haakka! ‘Ne Godaa, ne Xoossaay goynna, iya xalaala haggaza’ geetettidi Xoossaay qaalan xaafettis” yaagis.

<sup>11</sup> Hessafe guye, Xalahey aggidi bis; kiitanchchoti yidi iya haggazidosona.

*Yesuusa timirttiya  
(Mar 1:14-15; Luuqa 4:14-15)*

<sup>12</sup> Yesuusi, Yohaannisi qashettoysa si7ida wode Galiila biittaa bis. <sup>13</sup> Naazirete katamaa aggidi Zaabiloonanin Niftaaleme heeran, abbaa matan de7iya Qifirnahome katamaa bidi yan de7is. <sup>14</sup> Hessi haniday nabiya Isayaasa doonan,

<sup>15</sup> “Zaabiloone biittan, Niftaaleme biittan,

Yorddaanose Shaafappe hefinthan,  
abbaa ogiya gaxan de7iya,  
Ayhude gidonna derey de7iya Galiilan,

<sup>16</sup> dhuman de7iya derey,  
wolqqaama poo7o be7is.

Hayqo kuya biittan,  
de7eyssatas poo7oy keyis”

yaagidi odettida qaalay polettana melassa.

<sup>17</sup> He wodepppe doomidi Yesuusi, “Xoossaay kawotethay matattida gisho hintte na-garaappe simmitem” yaagidi qaala sabbakees.

*Koyro tamaareta xegetethaa  
(Mar 1:16-20; Luuqa 5:1-11)*

<sup>18</sup> Yesuusi Galiila Abbaa matara aadhdhishe nam77u ishata, Phexiroosa geetettiya Simumonanne iya ishaa Inddiriyasa be7is. Entti molo oykkeyssata gidida gisho bantta gitiya abban yegoosona. <sup>19</sup> Yesuusi enttana, “Haa yiite; tana kaallite! Molo oythi attoshin, ta hinttena ase oythi tamaarssana” yaagis. <sup>20</sup> Enttika, ellesidi bantta gitiya yeggi aggidi Yesuusa kaallidosona.

<sup>21</sup> Yesuusi yaappe burroo gede sinthe aadhdhishe hara nam77u ishata, Zabdiyoosa nayta, Yayqoobanne Yohaannisa be7is. Bantta aawa Zabdiyoosara issife wogoluwa giddon bantta gitiya giigiseyssata xeegis. <sup>22</sup> Enttika, ellesidi bantta wogoluwanne bantta aawa aggidi Yesuusa kaallidosona.

*Yesuusi hargganchchota pathis  
(Luuqa 6:17-19)*

<sup>23</sup> Yesuusi Ayhude Woosa Keethatan tamaarssishe, salo kawotethaa Wonggelaa odishenne dumma dumma harggiyafe asaa pathishe Galiila biitta ubban yuuyis.

<sup>24</sup> Hessafe denddoysan iya sunthay Sooriya biitta ubban keyis. Dumma dumma harggen oykettidayssatanne waayetteyssata, tuna ayyaan an oykettidayssata, shoci yegiha harggen oykettidayssatanne, gunddata iyaakko ehidosona; ikka enttana pathis.

<sup>25</sup> Asay Galilappe, Tammu Katamatappe, Yerusalaameppe, Yihudappenne Yorddaanose Shaafaa hefinthan de7iya biittaafe yida daro asay iya kaallidosona.

## 5

*Yesuusi deriya bolla tamaarssida timirittiya*

<sup>1</sup> Daro derey shiiqidayssa Yesuusi be7ida wode deriya bolla keyidi uttis. Iya tamaareti iyaakko shiiqin, <sup>2</sup> hayssada yaagidi tamaarssis:

*Tuma ufayssaa  
(Luuqa 6:2-23)*

<sup>3</sup> "Bantta ayyaan manqoti anjettidayssata,  
salo kawotethay enttassa.

<sup>4</sup> Yeekkeyssati anjettidayssata,  
entti minthetho demmania.

<sup>5</sup> Bantta wozanan ashkketi anjettidayssata,  
entti sa7aa laattana.

<sup>6</sup> Xillobaa oothanaw koshatteyssatinne saamotteyssati anjettidayssata,  
entti kallana.

<sup>7</sup> Maareyssati anjettidayssata,  
entti maarotethi demmania.

<sup>8</sup> Wozana geeshshati anjettidayssata,  
entti Xoossaas be7ana.

<sup>9</sup> Sigetheyssati anjettidayssata,  
entti Xoossaas nayta geetetti xeegettana.

<sup>10</sup> Xillobaa oothiya gisho gidi,  
goodetteyssati anjettidayssata,  
salo kawotethay enttassa.

<sup>11</sup> "Asay hinttena ta gisho gidi cayaa wode gooddiya wodenne hintte bolla iitabaa ubbaa worddon odisiya wode hintte anjettidayssata. <sup>12</sup> Hintte woytoy salon gita gidiya gisho ufayttie, hashshu giite. Hinttefe kase de7iya nabeta hessada goodidosona.

*Maxinenne poo7o*

<sup>13</sup> "Hintte biittaas maxine; maxiney ba maxinetethaa aggiko, ba mal77otethaa waati zaari demmanee? Kare holin asan yedhdhettanaappe attin aybiskka maaddenna.

<sup>14</sup> "Hintte biittaas poo7o; dere bolla de7iya katamiya qosettanaw dandda7ukku.

<sup>15</sup> Xomppe oythidi son de7iya asa ubbaas poo7ana mela dhoqqa son wotheesippe attin daallo gidon wothey baawa. <sup>16</sup> Hessa mela asay hintte lo77o oosuwa be7idi, salon de7iya hintte aawa bonchchhana mela hintte poo7oy asa sinthan poo7o.

*Muse higgiya*

<sup>17</sup> "Taani Muse higgiyanne nabeta qaala shaaranaw yida hinttew daanoppo. Taani, entti odidayssi tuma gideyssa qonccisanaw yasippe attin shaaranaw yabiikke. <sup>18</sup> Ta hinttew tuma odays; saloynne sa7ay aadhdhanna gakkanaw higge ubbay polettanaappe attin higgiyafe issi qaalay woykko pidaaley aadhdhenna. <sup>19</sup> Hessa gisho, ha kiitatappe guuxiya issi kiitaa menthiya oonikka qassi harata hessatho oothana mela tamaarssey oonikka salo kawotethan ubbaafe guutha gidana. Shin ha kiitaa poleysinne haratakka polana mela tamaarssey salo kawotethan gita gidana. <sup>20</sup> Ta hinttew odays; hintte xillotethay

Farisaaweta xillotethaafenne higge asttamaareta xillotethaafe aadhdhonna ixxiko, salo kawotethaa geleketa.

### *Wodhobaa*

<sup>21</sup> “Hintte mayzatas, ‘Wodhoppite; shemppo wodhida oonikka pirdettana’ geetettoysa si7ideta. <sup>22</sup> Shin ta hinttew odays; ba ishaa hanqettiya ubbay pirdettana. Ba ishaa cayaa oonikka daynna sinthi pirddas shiiqana. Ba ishaakko, ‘Eeyay’ giya oonikka qassi gaannname taman pirdettana.

<sup>23</sup> “Hessa gisho, neeni ne yarshshuwa yarshshiya wode ne ishaa qohidabay new akeeketiko, <sup>24</sup> ne yarshshuwa he bessan aggada ba; koyrota bada ne ishaara giiga; yaata simmada, ne yarshshuwa Xoossaas yarshsha.

<sup>25</sup> “Nena mooteysara pirdda keethi bashe oge bolla iyara giiga. Hessi atto giikkio nena daynna sinthi efana. Daynnay nena qachcheysas aathi immanta; I nena woynen yeggana. <sup>26</sup> Ta tuma odays; ne bolla pirdettida accuwa issi santimey attonna cigga ongana gakkanaaw qasho keethafe keyakka.

### *Laymatethabaa*

<sup>27</sup> “Hayssafe kase, ‘Laymatoppite’ geetettoysa si7ideta. <sup>28</sup> Shin ta hinttew odays, maccas xeellidi, amottida ubbay ba wozanan iira laymates. <sup>29</sup> Ne ushachcha ayfey new nagaras gaaso gidikko, kessa hola. Ne asatethay kumethi gaannname taman wodhdhanaappe ne asatethaafe issoy dhayikkko new lo77o. <sup>30</sup> Ne ushachcha kushey new nagaras gaaso gidikko, iya qanax hola. Ne asatethay kumethi gaannname taman wodhdhanaappe ne asatethaafe issoy dhayikkko, new lo77o.

### *Machchi azina bilethabaa*

(*Maato 19:9; Mar 10:11-12; Luuqa 16:18*)

<sup>31</sup> “Ba machchiw yeddiya oonikka anjo warqqatiya immo’ geetettis. <sup>32</sup> Shin ta hinttew odays; ba machchiya laymatonna de7ishin billiya oonikka iya laymatana mela oothees. Hessadakka, anjjettida maccasiw ubbay laymates.

### *Caaqobaa*

<sup>33</sup> “Hintte mayzatakkko, ‘Worddon caaqqofite; hintte Xoossaas sinthan caaqqidayssa polite’ geetettidayssa si7ideta. <sup>34</sup> Shin ta hinttew odays; ubbarakka caaqqofite. Xoossay uttiya araata gidiya gisho salon caaqqofite. <sup>35</sup> Iya tohoy yedhdhiya soo gidiya gisho sa7ankka caaqqofite. Gita kawuwa katama gidiya gisho Yerusalamenkka caaqqofite. <sup>36</sup> Hintte binaanappe issuwaka boothi woykko kareethi oothanaw dandda7onna gisho hinttee hintte huu7enkka caaqqofite. <sup>37</sup> Hessa gisho, hintte qaalay, ‘Ee’ woykko ‘Akkay’ gido. Hessafe kare keyey Xalaheppye yees.

### *Halo keyanaw koshshenna*

<sup>38</sup> “Ayfe gisho ayfe; achcha gisho achche’ geetettidayssa si7ideta. <sup>39</sup> Shin ta hinttew odays; hintte bolla iitabaa oothiya uraara eqettofite. Oonikka ne ushachcha shakalaab baqqiko ne haddirssa shakalaakkka bessa. <sup>40</sup> Issi asi ne shaamiziya ekkanaw nena mootikko, ne kootiya gujjada imma. <sup>41</sup> Issi asi nena wolqqan babaa toossidi issi saate oge baara baana mela nena un77ethiko, iyara nam77u saate oge ba. <sup>42</sup> Woossiya ooddeskka imma; neeppe tal77anaw koyaa oonakka diggofa.

### *Ne morkketa siqa*

(*Luuqa 6:27-28,32-36*)

<sup>43</sup> “Nena doseyssa dosa; nena ixxeyssa ixxa’ geetettoysa si7ideta. <sup>44</sup> Shin ta hinttew odays; hintte morkketa dosite; hinttena qoheyssatas woossite. <sup>45</sup> Hessatho hintte oothiko, salon de7iya hintte aawas hintte nayta gidana. I iitatasinne lo77otas awa kessees; xillotasinne nagaranchchotas ba iraa bukisees. <sup>46</sup> Hinttena dosiya asaa xalaala hintte dosikko, hinttew ay woytoy de7ii? Hari attoshin, qaraxa qanxiseyssatikka hessa ooothosona. <sup>47</sup> Hinttee, hintte ishata xalaala sarothiko, haratappe ay hara aadhdiyabaa oothidetii? Hari attoshin, Xoossaas ammanonna asaykka hessa ooothosona. <sup>48</sup> Hiza, salon de7iya hintte aaway polo gidoysada hintteka polo gidite.

## 6

### *Manqotas imobaa*

<sup>1</sup> "Asi be7o gidi hintte lo77o oosuwa asa sinthan oothonnaada naagettite. Hessatho hanonna ixxiko salon de7iya hintte Aawappe woyto demmeketa.

<sup>2</sup> "Hinttee mangotas immiya wode asa sinthan bonchchettanaw gidi cubboti ogiya doonanine Ayhude Woosa Keethatan ootheysada asi be7o gidi oothofite. Ta hinttew tuma odays; entti bantta kumetha woytuwa ekkidosona. <sup>3</sup> Shin hinttee mangotas immiya wode hintte ushachcha kushey ootheysa hintte haddirssa kushey eroppo; <sup>4</sup> hintte imoy geeman gido. Geeman ootheysa be7iya hintte aaway hinttew woytuwa qonccen immana.

### Wooسابا (Luuqa 11:2-4)

<sup>5</sup> "Woosa woossishe cubbotatho hanoppite. Entti, banttana asi be7o gidi Ayhude Woosa Keethanine ogiya doonan eqqidi wooseyssa dososona. Ta hinttew tuma odays; entti bantta kumetha woytuwa ekkidosona. <sup>6</sup> Shin neeni woossiya wode ne soo gela, wulaa gorddada geeman de7iya ne Aawakko woossa; geeman oosettidayssa be7iya ne aaway new woytuwa immana. <sup>7</sup> Hintte woossiya wode ammanonna asaatho coo qaala darssidi woosofite. Entti adussi woossin Xoossay si7ees gidi qoppoosona. <sup>8</sup> Hessa gisho, enttayssada hanoppite. Ays giikko, hintte aaway hinttew ay koshshiyako hintte woossanaappe synthattidi erees.

<sup>9</sup> "Hiza, hintte yaagidi woossite:

'Salon de7iya nu aaway,  
ne geeshsha sunthay anjetto.

<sup>10</sup> Ne kawotethay yo,  
ne sheney salon hanidayssada  
sa7ankka hano.

<sup>11</sup> Gallasa kathaah hachchi hachchi nuus imma.

<sup>12</sup> Nuuni nuna qohidayssata, atto geyssada,  
nuuskka nu qohuwa atto ga.

<sup>13</sup> Nuna iitappe ashshafe attin  
paacen gelsofa.  
[Kawotethay, wolqqaynne bonchchoy  
merinaw neessa. Amin77i.]'

<sup>14</sup> "Hintte hinttena qohidayssata atto giikko, salon de7iya hintte Aaway hintte qohuwakka atto gaana. <sup>15</sup> Shin hintte hara asa nagara atto goonna ixxiko hintte Aaway hintte nagara atto geenna.

### Xoomabaa

<sup>16</sup> "Hintte xoomiya wode cubbotatho kayottofite. Ays giikko, entti xoomeyssa asi erana mela bantta som77uwa qitayoosona. Ta tuma odays; entti bantta woytuwa ekkidosona.

<sup>17</sup> "Shin neeni xoomiya wode ne som77uwa meecca, ne huu7iya tiyetta. <sup>18</sup> Hessada ne oothiko ne xoomiya xoomay asappe geemmidayssa, shin geeman de7iya ne Aaway eriya xooma gidana. Geeman oosettidayssa be7iya ne Aaway new woytuwa immana.

### Salon shalo shiisho

<sup>19</sup> "Bili miyason, biraati shi7iyason, kaysoy bookkidi ekkiyason, ha sa7an, hinttew shalo shiishoppite. <sup>20</sup> Shin bili moonason, biraati shi7onnason, kaysoy bookkidi ekkonnason salon hinttew shalo shiishite. <sup>21</sup> Ne shaloy de7iyaswan ne wozanay de7ana.

<sup>22</sup> "Ayfey asatethas xomppe. Hessa gisho, ne ayfey paxa gidikko ne kumetha asatethay poo7o gidees. <sup>23</sup> Ne ayfey harganchcho gidikko ne kumetha asatethay dhuma gidees. Hiza, nenan de7iya poo7oy dhuma gidikko, dhumay ay mela aadhdhidi dhumanddeshsha!

<sup>24</sup> "Issi asi nam77u godas haarettanaw dandda7enna. Issuwa dosikko hankkuwa ixxees; woykko issuwa bonchchiko hankkuwa kadhees. Xoossasinne miishes haarettanaw dandda7ekketa.

### Un77ettofite

#### (Luuqa 12:22-31)

<sup>25</sup> "Hiza, si7ite! Hinttee de7on daanaw, 'Ay maanee? Ay uyanee? Ay ma77anee?' gidi un77ettofite; de7oy kathafe woykko ma7oppe aadhdhenee? <sup>26</sup> Salo kafota xeellite; entti zerokkona, buuccokona, shaalen yeggokona, shin hintte salo aaway entta muzees. Hintte entta keehi aadhdheketii? <sup>27</sup> Hintte giddofe daro un7ettidi ba laythaas bolla issi gallas guijanaw dandda7ey de7li?

<sup>28</sup> "Qassi hintte ma77iyabaas ays un7ettetii? Ane ciishshata be7ite, ooson daaburokkona woykko suqqokona. <sup>29</sup> Si7ite! Hari attoshin, kawuwa Solomoney ba bonchcho ubban

ha ciishshatappe issuwa melakka ma77ibeenna. <sup>30</sup> Hinttenoo, ammanoy paccidayssato, Xoossay hachchi benttidi wontto taman wodhdhanaw de7iya maata yaatidi mayziyabaa gidikko, hinttena enttafe aathidi waati mayzennee? <sup>31</sup> Hessa gisho, ‘Ay maanee? Ay uyanee? Ay ma77anee?’ gidi un77etfite. <sup>32</sup> He ubbaa Xoossaam ammanonna asay darssidi demmanaw un77ettoosona. Hintte salo aaway he ubbay hinttew koshsheyssa erees. <sup>33</sup> Shin ubbaafe sinthe Xoossaakawotethaanne iya xillotethaa koyite; he ubbay hinttew gujji imettana. <sup>34</sup> Hessa gisho, wonttos oppishe un77etfite. Wonttoysi wonttos aqo; issi issi gallasay baw gidiya metora de7ees.

## 7

*Harata bolla pirdofite  
(Luuqa 6:37-42)*

<sup>1</sup> “Hintte bolla pirddettonna mela harata bolla pirdofite. <sup>2</sup> Ays giikko, harata bolla hintte pirddeyssada hintte bolla pirddettana; hintte haratas makkidaban hinttew zaari makettana. <sup>3</sup> Ne ayfen de7iya tuussu daaneyssa be7onna ne ishaa ayfen de7iya buuriya ays be7ay? <sup>4</sup> Ne ayfen tuussu de7ishin ne ishaa ayfen de7iya buuriya kesso gaanaw waana dandda7ay? <sup>5</sup> Neno cubbuuwak, koyrottada ne ayfen de7iya tuussi daaneyssa kessa. Iyappe guye, ne ishaa ayfen de7iya buuriya kessanaw ne geeshsha xeellana.

<sup>6</sup> “Guye simmidi hinttena saxxonna mela geeshhabaa kanatas yeggofite. Bantta tohuwan yedhdhidi iiissonna mela hintte al77o inquwa gedunthota sinthan yeggofite.

*Woossite, koyite, xeegite  
(Luuqa 11:9-13)*

<sup>7</sup> “Woossite hinttew imettana, koyite hintte demmana, kare yidi xeegite hinttew dooyet-tana. <sup>8</sup> Woossiya oddeskka imettana, koyaa oddeskka benttana, kare yidi xeegiya oddeskka dooyettana.

<sup>9</sup> “Hintte giddofe ba na7i uythi woossiko shuchchi immey oonee? <sup>10</sup> Woykko molo woossiko shooshi immey de7ii? <sup>11</sup> Yaatin hintte iita gidishe hinttew naytas lo77obaa imo erikko, hintte salo aaway bana wosseyssatas lo77obaa waati darssidi immenee? <sup>12</sup> Harati hinttew oothana mela hintte koyabaa ubbaa hinttaka haratas oothite. Ays giikko, Muse higgeynne nabeti tamaarssey hayssa.

<sup>13</sup> “Xuuntha wulara gelite; ays giikko, dhayos efiya ogey wogga, wulaykka dalgga. Iyara geliya asaykka doro. <sup>14</sup> Shin de7uwakko efiya ogeynne wulay xuunthu; yaa geliya asaykka guutha.

*Mithi ba ayfen erettes  
(Luuqa 6:43-44)*

<sup>15</sup> “Bolla baggara dorsse daanidi bantta gaathan suudhume gididi hintte giddo geliya worddanchcho nabettape nagettite. <sup>16</sup> Hintte entta, entta ayfifyaappe erana; agunthafe woyney, kinchchoteppe laadey maxettenna. <sup>17</sup> Hessa mela lo77o mithi ubbay lo77o ayfe ayfees; iita mithi iita ayfe ayfees. <sup>18</sup> Lo77o mithi iita ayfe ayfenna, qassi iita mithi lo77o ayfe ayfanaw dandda7enna. <sup>19</sup> Lo77o ayfe ayfonna mithi ubbay qanxettidi taman xuugettana. <sup>20</sup> Hessa gisho, hintte entta, entta ayfayaan erana.

<sup>21</sup> “Salon de7iya ta aawa sheniya oothiya uray salo kawotethi gelanaappe attin coo tana ‘Godaw, Godaw’ giya ubbay salo kawotethi gelenna. <sup>22</sup> Pirddo gallas daroti, ‘Godaw, Godaw, ne sunthan tinbbite odibookko? Ne sunthan tuna ayyaanata kessibookko? Ne sunthan malaatata oothibookkoo?’ yaagana. <sup>23</sup> He wode taani, ‘Ta hinttena ubbarakka erikke, hinttee iita ootheyssati taappe haakkite’ yaagana.

<sup>24</sup> “Hiza, ha ta qaala si7idi oothiya oonikka ba keethaa shuchcha bolla keexida wozanaama asa mela. <sup>25</sup> Iray bukkis, di7oy di77is, carkkoyka carkkidi he keethaa sugis. Shin keethay shuchcha baaso bolla keexettida gisho kunddibeenna. <sup>26</sup> Ha ta qaala si7idi ooothonna oonikka ba keethaa shafe bolla keexida eeya uraa mela. <sup>27</sup> Iray bukkidi, di7oy di77idi, carkkoyka carkkidi, he keethaa sugin, he keethay kunddis; iya kunddethaykka wolqqaama” yaagis.

<sup>28-29</sup> Yesuusi ba oda onggida wode iya timirttey higge asttamaareta mela gidonna maataara gidiya gisho asay iya timirttiyan malaalettidosona.

## 8

*Yesuusi baro hargganchchuwa pathis  
(Mar 1:40-45; Luuqa 5:12-16)*

<sup>1</sup> Yesuusi deriyappe wodhdhiya wode daro asay iya kaallidosona. <sup>2</sup> Hekko issi baro hargganchchoy iyaakko shiiqidi, iya sinthan gulbatidi, “Godaw, ne shene gidikko tana geeshshada pathanaw dandda7aasa” yaagis. <sup>3</sup> Yesuusi ba kushiya yeddidi iya bochchidi, “Ee, ta shene, paxa” yaagis. Uray iirakka geeyi aggis. <sup>4</sup> Yesuusi iyaakko, “Ne paxuwa ooddeskka odoppa. Shin bada ne geeyada paxoyssa kahine bessa. Ne paxuwas markka gidana mela bada Musey kiittida yarshshuwa yarshsha” yaagis.

#### *Mato halqaam ammanuwa*

<sup>5</sup> Yesuusi Qifirnaahome katama gakkida wode issi mato halqaay iyaakko shiiqidi, <sup>6</sup> “Godaw, ta aylley asatethay gunddin daro harggettidi, son zin77idi de7ees” yaagidi woossis.

<sup>7</sup> Yesuusi zaaridi, “Taani bada iya pathana” yaagis.

<sup>8</sup> Shin mato halqaay zaaridi, “Godaw, ne ta soo gelanaw bessiya asi gidikke, shin ne han uttada qaala xalaala oda, ta aylley paxana. <sup>9</sup> Ays giikko, taappe bollara ta kiitettiya asati de7oosona, qassi taappe garssara taw kiitteteeyssati de7oosona. Enttafe issuwa, ‘Ba’ giyade bees; hankkuwa qassi ‘Haaya!’ giyade yees. Ta ayllya, ‘Hayssa ootha’ giyade oothees” yaagis.

<sup>10</sup> Yesuusi hessa si7ida wode malaalettidi, bana kaalliya asaakko, “Ta hinttew tuma odays; taani hayssa mela ammano Isra7eele asankka be7abiikk. <sup>11</sup> Ta hinttew odays; daroti dolohappenne wulohappe yidi, salo kawotethan Abrahamera, Yisaaqaranne Yayqoobara issife imato bolla uttana. <sup>12</sup> Shin salo kawotethaa laattanaw bessishin attidaysati kare dhuman holettana. Yan enttaw yeehonne achcha garccethi gidana” yaagis.

<sup>13</sup> Yesuusi mato halqaakkoo, “Ne soo ba, ne ammanuwatho new hano” yaagis. Iya aylley sohuwara paxi aggis.

#### *Yesuusi dero hargganchchota pathis*

(Mar 1:29-34; Luuqa 4:38-41)

<sup>14</sup> Yesuusi Phexiroosa soo geliya wode Phexiroosa machche aayyaa qoxo misha harggen sakettada zin77idaaro be7is. <sup>15</sup> Yesuusi I kushiya bochchida wode qoxoynne mishay aggis. Paxa denddada iya mokkasu.

<sup>16</sup> He wode omarssi tuna ayyaanan oykettida daro asata, asay Yesuusakko ehidosona. Ikka tuna ayyaanata ba qaalan kessis, hargganchchota ubbaa pathis. <sup>17</sup> Hessankka nabiya Isayaasi,

“I nu harggiya baw ekkis,  
i nu harggiya tookkis”  
gida qaalay polettis.

#### *Yesuusa kaaloy cigisiya gatiya*

(Luuqa 9:57-62)

<sup>18</sup> Yesuusi dero asay iya yuushuwan eqqidaysssa be7idi, abbaafe hefinthi pinnana mela ba tamaaretaa kiittis. <sup>19</sup> Higge asttamaaretappe issoy, “Asttamaariyaw, ne biyaso ubbaa ta kaallana” yaagis.

<sup>20</sup> Yesuusi iyaakko “Workkanatas olli de7ees, salo kafotas keethi de7ees. Shin Asa Na7aas ba huu7iya shemppisiya bessi baawa” yaagis.

<sup>21</sup> Yesuusa kaalliya asatappe issoy, “Godaw, taani sinthata bada ta aawa moogada yaana” yaagis.

<sup>22</sup> Shin Yesuusi, “Hayqqidayssati bantta hayqota moogo; neeni tana kaalla” yaagis.

#### *Yesuusi hobbya si77i oothis*

(Mar 4:35-41; Luuqa 8:22-25)

<sup>23</sup> Yesuusi baanaw wogoluwan gelida wode iya tamaaretkka iyara baanaw gelidosona.

<sup>24</sup> Entti qopponna de7ishin, wolqqaama hobbey haatha bolla denddin wogoloy mitetanaw gakkis. Shin Yesuusi dhiskkis. <sup>25</sup> Iya tamaareti iyaakko shiiqidi iya barkkethidi, “Godaw, nu dhayos nuna ashsharkki” yaagidosona.

<sup>26</sup> Yesuusi enttako, “Hinttenoo, ammanoy paccidayssato, ays yayyetii?” yaagis. Denddidi, hobbyianne gotiya essis. Ellesidi ubbabay si77i gis.

<sup>27</sup> Iya tamaareti malaalettidi, “Hayssi, hari attoshin, hobbeynne goteey kiitteteysi waanida asee?” yaagidosona.

#### *Tuna ayyaanay oykkida nam77u asata*

(Mar 5:1-20; Luuqa 8:26-39)

<sup>28</sup> Yesuusi abbaafe hefinthan de7iya Gerggesoone giya biittaa gakkida wode tuna ayyaanay oykkida nam77u asati duufoppe keyidi iyara gahe ttidosona. Entti daro iitanne

yashshiya asata gidiya gisho asi he bessaara aadhdhanaw dandda7enna. <sup>29</sup> Enttika, "Xoossaa Na7aw, nunanne nena aybe gathey? Wodey gakkonna de7ishin nuna pirddanaw yadii?" gidi waassidosona.

<sup>30</sup> Enttafe daro haakkonna guduntho wudey heemettes. <sup>31</sup> Tuna ayyaanati Yesuusa, "Ne nuna kessanabaa gidikko, hini guduntho wudiya giddo yeddarkkii" yaagidi woossidosona.

<sup>32</sup> Yesuusi, "Biite" yaagis. Tuna ayyaanati asatappé keyidi gudunthotan gelidosona. Gudunthotu ubbay aafó doonara dirggidi bidi abban mitettidi hayqqidosona.

<sup>33</sup> Guduntho wudiya heemmeyessi baqatidi katama bidi, hanidabaanne tuna ayyaanay oykkida asata bolla oosettidaba ubbaa odidosona. <sup>34</sup> Yaatin, kataman de7iya asa ubbay Yesuusa be7anaw keyidosona. Entti Yesuusa be7ida wode bantta biittaafe keyidi baana mela woossidosona.

## 9

### *Gundda uraa paxuwa (Mar 2:1-12; Luuqa 5:17-26)*

<sup>1</sup> Hessafe guye, Yesuusi wogoluwan gelidi, abbaa pinnidi ba katamaa bis. <sup>2</sup> Hanida guutha asati issi gundda uraa algara tookkidi Yesuusakko ehidosona. Yesuusi entta ammanuwa be7idi, gundda uraa, "Ta na7aw, yayyofa! Ne nagaray atto geetettis" yaagis.

<sup>3</sup> He saatiyan, Ayhude higge asttamaaretappe issoti issoti, "Hayssi Xoossaa cashshe gidennee" yaagidi bantta wozanan qoppidosona.

<sup>4</sup> Yesuusi entta qofaa eridi, "Litabaa hintte wozanan ays qoppeetii? <sup>5</sup> Hanoshin, 'Ne nagaray atto geetettis' geyssafenne Dendda eqqada ba' geyssafe awussi kawuyii? <sup>6</sup> Shin sa7a bolla nagara atto gaanaw Asa Na7aas maati de7eyssa ta hinttena erisana" yaagidi, gundda addiyako, "Dendda eqqa, ne alggaa tookkada, ne soo ba" yaagis.

<sup>7</sup> Gundda uray denddidi ba soo bis. <sup>8</sup> Derey hessa be7idi malaalettidosona. Hessa mela maata asas immida Xoossaa galatidosona.

### *Maatoosa xegetethaa (Mar 2:13-17; Luuqa 5:27-32)*

<sup>9</sup> Yesuusi yaappe denddidi bishe Maatoosa geyssa qaraxa qanxisiya bessan uttidashin be7idi, "Tana kaalla" yaagis.

Ikka denddidi kaallis.

<sup>10</sup> Yesuusi Maatoosa son gayta bolla uttidashin, qaraxa qanxisiya daro asatinne na garanchhoti yidi iyaranne iya tamaaretara issife maanaw uttidosona. <sup>11</sup> Issi issi Farisaaweti hessa be7idi, Yesuusa tamaareta, "Hintte asttamaarey qaraxa qanxiseyssataranne nagaranchhotara ays mii?" yaagidosona.

<sup>12</sup> Yesuusi hessa si7idi, "Dhale koshshay haragganchhotassafe attin paxatassa gidenne. <sup>13</sup> Shin hintte bidi, "Taani hintte yarshshuwa gidonnashin hintte harata maaranma mela koyays" geettididi xaafetidayssi woy guusseeko erite. Ays giikko, taani nagaranchhotu xeeeganaw yasippe attin xillota xeeeganaw yabiikk" yaagis.

### *Yesuusi xoomabaa oyshetts (Mar 2:18-22; Luuqa 5:33-39)*

<sup>14</sup> He wode Yohaannisa tamaareti Yesuusakko shiiqidi, "Nunne Farisaaweti xoomos, shin ne tamaareti ays xoomokkonaa?" yaagidi oychchidosona.

<sup>15</sup> Yesuusi zaaridi enttako, "Mushuray enttara de7ishin xegettidi yida asay kayottanaw dandda7oona? Mushuray entta matappé ekettana wodey yaana, entti he wode xoomana.

<sup>16</sup> "Ooratha ma7oppe peedhidi gal77a ma70 bolla sikkey oonikka baawa. Hessatho oothiko oorathay gal77aa peedhees. Peedhethayka gujji dalggees. <sup>17</sup> Ooratha woyne gal77a ogoron qoliya oonikka baawa. Hessatho oothiko ooratha woyney gal77a ogoruwa dhusees woyneykka gukkees; ogoroykka nam77antho maaddonnabaa gidees. Shin ooratha woyney ooratha ogoron qoletanaw bessees. Hessatho oosettiko nam77ayka ittonna naagettoosona" yaagis.

### *Hayqqida na7iwunne Yesuusa afilaa bochchida maccasiw (Mar 5:21-43; Luuqa 8:40-56)*

<sup>18</sup> Yesuusi hessa odo bolla de7ishin, Ayhude halaqatappé issoy iyaakko yidi, iya sinthan gulbbatidi, "Ta na7iya ha77i hayqqasu, shin iya paxana mela neenii yada ne kushiya I bolla wotharkkii" gidi woossis. <sup>19</sup> Yesuusi denddidi iyara bis; iya tamaaretikka kaallidosona.

<sup>20</sup> I bishin tammanne nam77u laythi kumethi suuthi goggidi waaysiya issi maccasiyaya guyera shiiqada Yesuusa afilaa macaraa bochchasu. <sup>21</sup> Iya ba wozanan, "Ta iya afilaa macaraa xalaala bochchiyakkoo paxana" yaagada qoppasu.

<sup>22</sup> Yesuusi guye simmi iyo xeellidi, “Ta naatte, yayyofa! Nena ne ammanoy pathis” yaagis. Maccaasiya sohuwara paxa aggasu.

<sup>23</sup> Yesuusi Ayhude halaqaa soo gakkiya wode zaye punneyssatanne yeekeyssata be7idi, <sup>24</sup> “Ane kichchite; guutha na7iya dhiskkasuppe attin hayqqabuukku” yaagis. Shin asay iya bolla miicidosona. <sup>25</sup> Asaa kare kessidaappe guye soo gelidi, na7ee kushiya oykkis, na7iya dendda eqqasu. <sup>26</sup> He worey he biitta ubbaa gakkis.

#### *Yesuusi nam77u qooqeta xeelisis*

<sup>27</sup> Yesuusi yaappe dendddidi gede sinthe biya wode nam77u qooqeti bantta qaala dhoqqu oothidi, “Dawite na7aw, nuna maararkii” yaagishe iya kaallidosona.

<sup>28</sup> Yesuusi soo gelida wode qooqeti iya kaalldi yidosona. Yesuusi enttako, “Taani hessa oothanaw dandda7eyssa hintte ammanetii?” yaagis.

Enttika, “Ee, Godaw” yaagidi zaaridosona.

<sup>29</sup> Hessafe guye, Yesuusi entta ayfiyaa bochchidi enttako, “Hinttew, hintte ammanuwatho hano” yaagis. <sup>30</sup> Entta ayfeykka dooyettis. Yesuusi enttako, “Hayssa ood-deskka odoppite” yaagidi minthi odis. <sup>31</sup> Shin asati bidi Yesuusabaa he biitta ubban odidosona.

<sup>32</sup> Entti yaappe keyaa wode asay tuna ayyaanay oykkidi muumisida issi asi Yesuusakko ehidosona. <sup>33</sup> Tuna ayyaanay keyidaappe guye muume uray odettis. Dereykka malaaleet-tidi, “Hayssa mela oorathabay Isra7eele biittan hanibeenna” yaagidosona.

<sup>34</sup> Shin Farisaaweti, “Tuna ayyaanata halaqan tuna ayyaanata kessees” yaagidosona.

#### *Yesuusi asaas qadhattis*

<sup>35</sup> Yesuusi Ayhude Woosa Keethatan tamaarssishe, salo kawotethaa Wonggelaa sabbakishe, asaa hargge ubbaafe pathishe katamatinanne guta ubban yuuyis. <sup>36</sup> Daro derey, heemmiya asi baynna dorssada enttana be7iya asi dhayin un77ettidi de7eyssata be7idi enttaw qadhattis. <sup>37</sup> Ba tamaaretakko, “Shiiqana kathay daro, shin kathaa shiishiya asay guutha.” <sup>38</sup> Hessa gisho, Goday kathaa shiishiya oosanchchota yeddana mela woossite” yaagis.

## 10

### *Yesuusi kiittida tammanne nam77u hawaareta*

(Mar 3:13-19; Luuqa 6:12-16)

<sup>1</sup> Yesuusi tammanne nam77u tamaareta baakko xeegidi, tuna ayyaanata kessana melanne hargge ubbaa pathana mela enttaw maata immis.

<sup>2</sup> Yesuusi kiittida tammanne nam77u hawaareta sunthay: koyroy Phexiroosa giya Simoonanne iya ishaa Inddiriyasa, Zabdiyoosa na7aa Yayqoobanne iya ishaa Yohaannisa,

<sup>3</sup> Filpoosanne Bartolomiyosa, Toomasanne qaraxa qanxisiya Maatoosa, Ilfiyoosa na7aa Yayqooba, Taadiyosa, <sup>4</sup> ba biittaas mishettiya Simoonanne Yesuusa aathi immida Asqo-roota Yihuda.

<sup>5</sup> He tammanne nam77ata Yesuusi kiittidi yeddishe, “Ayhude gidonna deriyakko boopite, qassi Samaareta katamakka geloppite. <sup>6</sup> Shin Isra7eele keethaafe gidida hini dhayida dorssatakko biite. <sup>7</sup> Yaa bidi, ‘Salo kawotethay matattis’ gidi odite. <sup>8</sup> Hargganchchota pathite, hayqqidayssata hayqoppe denthite, baro hargganchchota geeshshi pathite, tuna ayyaanata kessite. Hintte coo ekkidayssaa coo immitte. <sup>9</sup> Hintte kiiisen worqqa, woykko bira santime oykkofite. <sup>10</sup> Hintte ogiyas karxiito, nam77u afila, woykko caamma woykko xam77a oykkofite; oosanchchuwas gallasa kathi koshshees.

<sup>11</sup> “Hintte issi katamaa woykko gutaa geliya wode hinttena mokkidi ekkaw ufayttiya uraa koyidi iya son shemppite; hintte baana gakkawan yan gam77ite. <sup>12</sup> Qassi oddde sookka gelishe sarothite. <sup>13</sup> He keethay hinttena mokkiko hintte sarothida saroy enttana gakk, shin entti mokkonna ixixiko hintte sarothida saroy hinttew guye simmo. <sup>14</sup> Oonika hinttena mokkonnanne hintte odyiabaa si7onna ixixiko he keethaafe woykko he kata-maappe keyishe hintte tohuwan de7iya baana pittidi keyite. <sup>15</sup> Ta hinttew tuma odays; Xoossa pirdda gallasan he katamaappe Soodomesinne Gamoora katamatas pirdday kawuyana.

<sup>16</sup> “Ta hinttena dorssatada suudhumeta giddo yeddana. Hessa gisho, shooshada cinc-cata, holleda aadata gidite. <sup>17</sup> Asay hinttena pirdda daynnatas aathi immana, qassi Ayhude Woosa Keethan hinttena garaafana. Hessa gisho, enttafe naagettite. <sup>18</sup> Ta gisho gidi

hinttena deriya haareyssata sinthenne kawota sinthe efana. Entta sinthaninne Ayhude gidonna deriya sinthan eqqidi hintte tabaa markkattana.<sup>19</sup> Shin hinttena pirddas aathi immiya wode woygidi zaarino gidi un77etofite; he saatiyan hintte gaanabaa Xoossay hinttew immana.<sup>20</sup> Ays giikko, hinttenan haasayey hintte Aawa Geeshsha Ayyaanaappe attin hinttena gidekketa.

<sup>21</sup> “Ishay ba ishaa, aaway ba na7aa, hayqos aathi immana, nayti banttana yelidayssata bolla denddidi enttana wodhisana.<sup>22</sup> Ta gisho gidi asa ubbay hinttena ixxana, shin wursethi gakkanaw minniday attana.<sup>23</sup> Issi heerappe hinttena entti gooddiko hara katama baqatite. Taani hinttew tuma odays; Asa Na7ay yaana gakkanaw, hintte Isra7eele katama ubbaa kantheketa.

<sup>24</sup> “Tamaarey ba asttamaariyappe, aylley ba godaappe aadhdhenna.<sup>25</sup> Tamaarey ba asttamaariya, aylley ba godaa daanikko iyaw gidana. Keethaawa Bi7elzebuula giikko iya soo asaa waanidi iissidi xeegenne?

<sup>26</sup> “Hiza, asas yayyofite. Kamettidabay qonconna, qosettidabay geeshshi keyonna attenna.<sup>27</sup> Taani hinttew dhuman odiyabaa hintte poo7on odite; ta hinttew haythan kalkkashidabaa dabaaban awaajjite.<sup>28</sup> Ashoppe attin shemppu wodhanaw dandda7onnayssatas yayyofite. Shin shemppuwanne ashuwa gaannamen dhayssanaw dandda7iya Xoossaas yayyite.<sup>29</sup> Nam77u buubbetti issi santimen bayzettokonaayye? Hanoppe attin, enttafe issinnaka hintte Xoossay goonna de7ishin sa7an wodhdhuku.<sup>30</sup> Hari attoshin, hintte huu7e binaanaykka paydettidi de7ees.<sup>31</sup> Hiza, daro buubbetappe hintte aadhdihiya gisho yayyofite.

<sup>32</sup> “Asa sinthan taw markkattiya ubbaas taanikka saluwan de7iya ta aawa sinthan markkattana.<sup>33</sup> Shin asa sinthan tana kaddeyssa taanikka salon de7iya ta aawa sinthan kaddana.

<sup>34</sup> “Taani sa7an saro elhanaw yida hinttew daanoppo. Taani toorappe attin sarotethi elhanaw yabiikke.<sup>35</sup> Taani yiday,

‘Na7aa aawappe

macca na7iw aayeppe

na7aa machchiw azina aayeppe shaakkanaassa.

<sup>36</sup> Asas morkketi iya soo asata gidana.’

<sup>37</sup> “Taappe aathidi ba aawa woykko ba aayiw dosey, tabaa gidanaw bessenna. Ba adde na7a woykko ba macca na7iw taappe aathidi dosey, tabaa gidanaw bessenna.<sup>38</sup> Ba masqaliya tookkidi tana kaallonna oonikka tabaa gidanaw bessenna.<sup>39</sup> Ba shemppuwa ashshanaw koyey dhayssana, shin ba shemppuwa ta gisho aathi immey ashshana.

<sup>40</sup> “Hinttena mokkey tana mokkees, tana mokkey qassi tana kiittidayssa mokkees.

<sup>41</sup> Nabiya nabe sunthan mokkey, nabiyatho woytettana; qassi xilluwa xillo sunthan mokkey, xilluwatho woytettana.<sup>42</sup> Ta hinttew tuma odays; ha ta tamaaretappe guuxiya is-suwas tana kaalliya gisho hari attoshin guutha irxxa haathi immiko iya woytoy dhayenna” yaagis.

## 11

*Xammaqiya Yohaannisi kiittida asata  
(Luuqa 7:18-35)*

<sup>1</sup> Yesuusi tammanne nam77u tamaareta kiitaa onggidaappe guye yaappe denddidi tamaarssanawunne sabbakanaw Galiila katamata bis.

<sup>2</sup> Yohaannisi qasho keethan de7ishe Kiristtoosi oothiyabata si7idi, ba tamaaretappe iyaakkoo kiittidi,<sup>3</sup> “Yaana geetettiday neneyye? Woykko nuuni haraa naaginoo?” yaagidi oychchis.

<sup>4</sup> Yesuusi enttako zaaridi, “Bidi hintte si7iyabaanne hintte be7iyabaa Yohaannisas odite.

<sup>5</sup> Qooqeti xellosona, wobbeti hamuttoosona, baro hargganchchoti paxoosona, tulleti si7osona, hayqqidayssati hayqoppe denddoosona; manqotas Wonggelay sabbakettees.

<sup>6</sup> “Tanan dhubetonay anjjettidayssa” yaagis.

<sup>7</sup> Yohaannisa tamaareti guye simmudi bin, Yesuusi deriyas Yohaannisabaa odishe, “Ha bazzuwa ay be7anaw keyidetii? Carkkoy qaathiya maqqaa be7anaw yidetiyye?<sup>8</sup> Yaatin, ay be7anaw keyidetii? Kitte ma7o ma77ida ase be7anaaseyye? Kitte ma7o ma77idayssati

kawota keethan de7oosona. <sup>9</sup> Yaatin, ay be7anaw keyidetii? Nabe be7anaaseyye? Hekko, hintte nabeppekka aadhdeyssa be7eeta.

<sup>10</sup> “Ne ogiya ne sinthan giigisiya

ta kiitanchchuwa neeppe sinthe kiittana”

geetettidi xaafettiday iyassa.

<sup>11</sup> Ta hinttew tuma odays; maccasappe yelettidayssata giddofe Yohaannisappe aadhdey oonikka baawa; salo kawotethan ubbaafe guuxey I, iyappe aadhdehna. <sup>12</sup> Xammaqiya Yohaannisa wodiyappe doomidi hachchi gakkanaw salo kawotethay daro naaqettees, minnida asati wolqqan yaa gelana. <sup>13</sup> Nabeti ubbayne Muse higgey Yohaannisa wode gakkanaw salo kawotethaabaa tinbbite odidosona. <sup>14</sup> Hiza, hintte entta kiitaa ammanana gidikko, yaana geetettida Eliyaasi, I Yohaannisa. <sup>15</sup> Hiza, si7iya haythi de7ey si7o.

<sup>16</sup> “Hiza, ha wodiya yeletethaa aybira daaniso? Giya giddon uttidi woli xeegidi,

<sup>17</sup> Nu hinttew suusul7e punnin;

hintte yexxeleta.

Nu sabbidi zeleelin;

hintte yeekeketa’

yaagiya nayta daanosona. <sup>18</sup> Xammaqiya Yohaannisi moonnanne uyonna yin, ‘Tuna ayyaani de7ees’ yaagideta. <sup>19</sup> Asa Na7ay mishenne uyiishe yin, ‘Yarambbanne ushshanchcho, qaraxa qanaxiseyssatanne nagaaranchchota dabbo’ yaagideta. Hiza, cincateethaa tumatethay iya oosuwan qonckees’ yaagis.

### *Ammanonna ixxida katamata*

(*Luuqa 10:13-15*)

<sup>20</sup> Hessafe guye, Yesuusi daro malaatata oothida katamatana de7iya asati bantta nagaarappe simmdi maarotan gelonna ixxida gisho enttana, <sup>21</sup> “Ayye Koraaziine katamataw, ayye Beetesayda katamataw, ays giikko, hintte giddon oosettida malaatati Xiroosaninne Sidoonan oosettida gidiyakko, entti beni bido tiyyetidi, kalle ma77idi bantta nagaraappe simmi aggana. <sup>22</sup> Shin ta hinttew odays; pirdda gallas hinttete aathidi Xiroosasinne Sidoonas pirdday kawuyana. <sup>23</sup> Qassi, Qifirnahoomie, neeni pude salo keyanaw koyay? Hanenna! Neeni Si7oolen yegettana. Ays giikko, ne giddon oosettida malaatati Soodomen oosettidabaa gidiyakko, Soodomey hachchi gakkanaw de7anashin. <sup>24</sup> Shin ta new odays; pirdda gallas neeppe aathidi Soodomes pirdday kawuyana” yaagidi hanqettis.

### *Kristtoosan de7iya shemppo*

(*Luuqa 10:21-22*)

<sup>25</sup> He wode Yesuusi, “Aawaw, saluwanne sa7aa Godaw, neeni hayssa eranchchotapenne cincatappene genthada naytas qonccisida gisho nena galatays. <sup>26</sup> Ee, ta Aawaw, hayssi ne lo77o sheniyada hanis.

<sup>27</sup> “Ubbay taw ta Aawappe imettis. Aawappe hari Na7aa erey baawa, Na7aappenne I enttaw qonccisanaw koyeyssatappene hari Aawa eranaw dandda7ey baawa.

<sup>28</sup> “Hinttenoo, daaburanchchoto, toohoy deexida ubbay taakko haa yiite; taani hinttene shemppisana. <sup>29</sup> Taani ta wozanan ashkkenne aada gidiya gisho ta qambbaran gelite, taappe tamaarite; hinttee, hintte shemppuwash shemppo demmania. <sup>30</sup> Ta qambbaray liiqo, qassi ta toohoykka kawushshe” yaagis.

## 12

### *Sambbaata bonchchanaw bessii?*

(*Mar 2:23-28; Luuqa 6:1-5*)

<sup>1</sup> Hessafe guye, Sambbaata gallas, Yesuusi gade giddora aadhdees. Yesuusa tamaareti koshattida gisho tiya bangga shirikidi moosona. <sup>2</sup> Shin Farisaaweti hessa be7idi Yesuusakkoo, “Hekko, ne tamaareti Sambbaata gallas oothanaw bessonabaa ooothosona” yaagidosona.

<sup>3</sup> Yesuusi enttako zaaridi, “Dawitey koshattida wode Iyara de7eyssatara ay oothidaakkoo nabbabibekketii? <sup>4</sup> Dawitey Xoossa keethi gelidi kahineta xalaalappe attin inne iyara de7eyssatara bessonabaa geeshsha daabbuwa mis. <sup>5</sup> Woykko kahineti Sambbaata wogaa shaaridi Xoossa Keethan Sambbaata gallas ooso oothikoo enttaw bala gidonnayssa Muse higgiyan nabbabibekketii? <sup>6</sup> Shin si7ite! Xoossa Keethaafe aadhdey hayssan de7ees. <sup>7</sup> Taani hintte yarshshuwa gidonnashin hintte harata maarana mela koyays’ giya qaalay

woy guusseeko hintte eridaakko xillo asa bolla pirddeketa. <sup>8</sup> Asa Na7ay Sambbaata Godaa” yaagis.

<sup>9</sup> Yesuusi yaappe bidi Ayhude Woosa Keethi gelis. <sup>10</sup> Yan kushey gunndida issi uray de7ees. Yesusa mootanaw gaaso koyaa asati, “Sambbaata gallas pathanaw bessi bessen-ne?” yaagidi oychchidosona.

<sup>11</sup> I enttako, “Hintte giddofe issuwash dorssi Sambbaata gallas aafon wulliko, goochchidi kessonny oonee? <sup>12</sup> Yaatin asi dorssafe waanidi daro aadhdhenee? Hessa gisho, Sambbaata gallas lo77obaa oosoy bessees” yaagis.

<sup>13</sup> Hessafe guye, Yesuusi addiyako, “Ne kushiya piddi ootha” yaagin, uray piddi oothis. Iya kushey paxidi hankko kushiyada hanis. <sup>14</sup> Shin Farisaaweti yaappe kare keyidi, Yesuusa waati wodhanekko maqettidosona.

### *Xoossay doorida ayllyi*

<sup>15</sup> Yesuusi entta qofaa eridi he bessaa aggidi hara soo bis. Daro asay iya kaallidi bidosona, hargganchchota ubbaa pathis. <sup>16</sup> Yesuusi, “Tabaa hara ooddeskka odoppite” yaagidi minthi odis. <sup>17</sup> Hessika nabiya Isayaasi,

<sup>18</sup> “Hekko ta doorida aylley,

ta doseyssi, tana ufaysseyssi,

taani ta ayyaanaa, iya bolla shemppisana;

I, Ayhude gidonna deriyas suure pirdabaa awaajjana.

<sup>19</sup> I palamenna woykko kaccenna;

ba qaalakka denbban coo sissenna.

<sup>20</sup> Suure pirdan xoono demmana gakkanaw,

dincettida maqqaa menthenna,

cuyiya muqaadaa toysenna.

<sup>21</sup> Ayhude gidonna derey ubbay iyan ufayssi wothana”

yaagidi xaafidayssi polettana melassa.

### *Yesuusanne Bi7elzebuula*

(Mar 3:20-30; Luuqa 11:14-23)

<sup>22</sup> Hessafe guye, tuna ayyaanan oykettida qooqenne muume ase de7eyssa iyaakko ehidosona. Yesuusi uraa pathin, uray be7isinne odettis. <sup>23</sup> Asa ubbay malaalettidi, “Hayssi Dawite Na7aa gidanddeshshaa?” yaagidosona.

<sup>24</sup> Shin Farisaaweti hessa si7idi, “Ha uray tuna ayyaanata kessey tuna ayyaanata halaqaa Bi7elzebuula wolqqaana” yaagidosona.

<sup>25</sup> Yesuusi entta qofaa eridi, “Woli giddon shaakettiya kawotetha ubbay kunddana; qassi woli giddon shaakettiya katamay woykko keethay minnidi eqqenna. <sup>26</sup> Xalahey Xalahey kessiyabaa gidikko ba giddon shaakettis guussu. Hessatho haniyabaa gidikko iya kawotethay waanidi minnidi eqqanaw dandda7ii? <sup>27</sup> Taani tuna ayyaanaa kessey Bi7elzebuula wolqqaan gidikko hinttena kaalliya asati oodde wolqqaan kessannee? Hessa gisho, hinttena kaalliya asati hinttena pirddana. <sup>28</sup> Shin taani tuna ayyaanata kessey Xoossaas Ayyaanan gidikko, Xoossaas kawotethay hintteko yis.

<sup>29</sup> “Woykko issi asi wolqqaama asa soo gelidi iya shaluwa bonqanaw koykko koyrot-tidi he uraa qachchonna ixxiko waattidi dandda7ii? Yaatikko iya shaluwa bonqanaw dandda7ees.

<sup>30</sup> “Taara gidonnay oonikka taara ejettees; qassi taara issife shiishonna ubbay laallees.

31 Hessa gisho, si7ite; asay oothiya ay nagarinne cashsha qaali ubbay atto geetettana, shin Geeshsha Ayyaana cayaa ooddeskka iya nagaray atto geetettenna. <sup>32</sup> Oonikka Asa Na7a bolla iitabaa odettiko iyaw atto geetettana, shin Geeshsha Ayyaana bolla iitabaa odettiya ooddeskka ha sa7an gidin yaana alamiyan iya nagaray atto geetettenna.

<sup>33</sup> “Lo77o mithay lo77o ayfe ayfees; qassi iita mithay iita ayfees. Hiza, mithay erettey ba ayfyaana. <sup>34</sup> Hintteno, shoosha nayto, hintte iita gidishe waanidi lo77obaa odettanaw dandda7etii? Asi ba wozanan kumidabaappe doonan odettees. <sup>35</sup> Lo77o asi ba wozanan wothida lo77obaappe, lo77obaa kessees; iita asi ba wozanan wothida iitabaappe, iitabaa kessees. <sup>36</sup> Shin si7ite, asay odettiya coo oda ubbaas pirdda gallas zaaro immana. <sup>37</sup> Ays gikkoo, ne odettiya ne qaalan xillana; ne odettiya ne qaalay ne bolla pirddana” yaagis.

### *Malaata be7anaw shiiqida oyshaa*

(Mar 8:11-12; Luuqa 11:29-32)

<sup>38</sup> Hessafe guye, issi issi Farisaawetinne higge asttamaareti Yesusakkko, "Astta-maariyaw, neeni malaata oothada nuna bessa" yaagidososona.

<sup>39</sup> Shin Yesuusi zaaridi, "Ammanettonnanne iita yeletethay malaata koyees. Shin nabiya Yoonasa malaatapppe hara malaati iyaw imettene. <sup>40</sup> Yoonasi gita molo ulon heedzu gallasinne heedzu qamma gam77idayssa mela Asa Na7ay heedzu gallasinne heedzu qamma biitta garssan gam77ana. <sup>41</sup> Nanawe asay pirdda gallas dendddidi ha yeletethaa bolla pirddana; ays giikko, entti Yoonasa sibkkatiya si7idi bantta nagaraappe simmidosona. Hekko, Yoonasappe aadhdheyssi hayssan de7ees. <sup>42</sup> Pirdda gallas dugeha kawiya denddada ha yeletethaa bolla pirddana; ays giikko, iya Solomone cinccateethaa si7anaw biittaa gaxappe yasu. Hekko, Solomonepppe aadhdhey hayssan de7ees.

<sup>43</sup> "Tuna ayyaanay asappe keyidaappe guye baw shemppiyaso koyidi haathi baynna mela bessan daaburees, shin ba koyaa shemppuwa demmenna. <sup>44</sup> Yaanin, 'Ta agga keyida keetha simmada baana' yaagees. I simmiya wode keethay kaysi gideyssanne pitettidi giigi uttidaysssa demmee. <sup>45</sup> Hiza, simmi bidi, baappe iitya hara laappun iita ayyaanata ekkidi yees; enttika uraa giddo gelidi de7oosona. He uraas kaseyssafe guyeyssi daro iitees. Ha iita yeletethaa bolla hessa mela banana" yaagis.

*Yesiusa aayiwunne iya ishata  
(Mar 3:31-35; Luuqa 8:19-21)*

<sup>46</sup> Yesuusi deriyas oda bolla de7ishin iya aayyaanne iya ishati iya odisanaw koyidi karen eqqidosona. <sup>47</sup> Issi asi iyaakko, "Ne aayyaanne ne ishati nena odisanaw koyidi karen eqqidosona" yaagis.

<sup>48</sup> Yesuusi zaaridi, "Ta aayya oonee? Ta ishatikka oonantee?" yaagis. <sup>49</sup> Ba kushiyara tamaareta mallishe, "Be7ite, ta aayanne ta ishati hayssata. <sup>50</sup> Salon de7iya ta Aawa sheniya oothiya ubbay ta isha, ta michchonne ta aayo" yaagis.

## 13

*Zerethi zeriya uraa leemiso  
(Mar 4:1-9; Luuqa 8:4-8)*

<sup>1</sup> He gallas Yesuusi sooppe keyidi abbaa gaxan uttis. <sup>2</sup> Daro derey iya yuushuwan shiiqin asaa abbaa gaxan aggaagidi wogolon gelidi uttis. <sup>3</sup> Asaas darobaa leemison yaagidi odis:

"Issi goshshanchchoy zerethi zeranaw keyis. <sup>4</sup> I zeriya wode issi issi zerethati oge gaxan wodhdhidosona; enttaka kafoti yidi maxi midosona. <sup>5</sup> Issi issi zerethati garssan shaalloy de7iya biitta bolla wodhdhidosona. Daro biitti baynna gisho ellesidi dolis. <sup>6</sup> Shin away keyin shullis; xaphoy baynna gisho melis. <sup>7</sup> Issi issi zerethay aguntha giddon wodhdhis; agunthay diccidii he dolaa cuullis. <sup>8</sup> Harati qassi aradda biitta bolla wodhdhis; dolidi ayfe ayfis. Issoy xeeta, issoy usuppun tamma, issoy qassi hasttama ayfis. <sup>9</sup> Si7iya haythi de7iya uray si7o" yaagis.

<sup>10</sup> Yesuusa tamaareti iyaakko shiiqidi, "Ays neeni deriyas leemison oday?" yaagidi oychchidosona.

<sup>11</sup> I zaaridi, "Hinttew salo kawotethaa xuuraa eray imettis, shin enttaw imettibeenna. <sup>12</sup> De7iya ubbaas guzhettana, iyaw darana, shin baynnayssafe hari attoshin iyaw de7iyarakka ekettana. <sup>13</sup> Hessa gisho, taani entti, xeellishe demmonna mela, si7ishe si7onna mela woykko akeekonna mela enttaw leemison odays.

<sup>14</sup> "Isayaasi ba maxaafan odidayssi entta bolla polettis. I odishe,  
'Hintte sissaa si7eeta, shin akeekkekta;  
hintte xeelleta, shin be7ekketa.'

<sup>15</sup> Ays giikko, ha asaa wozanay zel77umis;  
bantta haythaa erishe tullisidosona,  
bantta ayfiyaa goozidosona.

Hessi baynneeko entti bantta ayfiyan be7idi,  
bantta haythan si7idi,  
bantta wozanan akeekidi,  
taakko simmana,  
takka entta pathanashin' yaagis.

<sup>16</sup> "Shin hintte ayfeti be7iya gishonne hintte haythati si7iya gisho hintte anjettidayssata.  
<sup>17</sup> Ta hinttew tuma odays; daro nabentinne xillo asati hintte be7eyssa be7anawunne hintte si7eyssa si7anaw amottidosona, shin enttaw hanibeenna.

<sup>18</sup> "Hiza, ha zerethaa zeriya uraa leemisuwa si7ite. <sup>19</sup> Oge gaxan wodhdhida zerethaa leemisoy hayssa: salo kawotethaa qaala si7idi akeekonna uraa wozanappe Xalahey yidi iya wozanan de7iya zerethaa maxi digees. <sup>20</sup> Shaalloy garssan de7iya biitta bolla zeretti-dayssi qaala si7idi ellesidi ufaysan ekkeyssata. <sup>21</sup> Shin xapho yeddawan danda7onna gisho daro gam77okona. Qaala gaason metoy woykko goodetethi yaa wode ellesи dhabet-toosona. <sup>22</sup> Aguntha gaathan zerettidayssi qaala si7is, shin ha alamiya duussaa hirrgaynne duretetha qofaq qaala cuulliya gisho ayfe ayfonna attees. <sup>23</sup> Shin aradda biittan zerettida zerethay akeekan qaala si7iya uraa. I ayfe ayfees; issyo xeeta, issyo usuppin tamma issyo qassi hastama ayfees" yaagis.

#### *Leeshshuwa leemiso*

<sup>24</sup> Yesuusi enttaw hara leemiso odis, "Xoossa kawotethay ba goshshan lo77o zerethi zerida uraa daanees. <sup>25</sup> Shin asi ubbay dhiskkin iya morkkey yidi gistiya giddon leeshsho zeridi bis. <sup>26</sup> Gisttey diccidi ayfiyya wode leeshshoy iya giddon benttis.

<sup>27</sup> "Gadiya godaa aylleti godaakkoo bidi, 'Godaw, ne goshshan ne lo77o zerethi zerabikkishsho? Yaatin, leeshshoy awuppe yidee?' yaagidosona.

<sup>28</sup> "I enttako, 'Hessa morkkey oothis' yaagis.

"Aylleti godaakkoo, 'Nu bidi leeshshuwa shoddana mela koyay?' yaagidosona.

<sup>29</sup> "Shin I, 'Atto bochhofite; hintte leeshshuwa shoddays gishin gistiye shodettana. Bochhofite; caka wodey gakkanaw issife dicco. He wode cakkiya asata leeshshuwa sinthattidi maxidi taman xuugganaw mirqen mirqen qachchite. Shin gistiya shiishidi ta shaaliyan qolite' yaagana" yaagis.

#### *Guutha mithee leemiso*

(Mar 4:30-32; Luuqa 13:18-19)

<sup>31</sup> Qassi hara leemiso yaagidi odis; "Salo kawotethay issi asi ba goshshan bakkida guutha mithee ayfe daanees. <sup>32</sup> He mithee ayfey hara mitha ayfetappe guutha, shin iya dolaa diccida hara mithata ubbaafe aadhdha gitatawusu. I tashiyan kafoti keexidi uttana gakkanaw wolqqaama mithi gidawusu" yaagis.

#### *Irshsho leemiso*

(Luuqa 13:20-21)

<sup>33</sup> Kaallidikka, Yesuusi hara leemiso odis; "Salo kawotethay issi maccasi heedzu gabate dhiile ekka munuqada, munuqay denddana mela iyan gujjida irshsho daanees" yaagis.

<sup>34</sup> Yesuusi deriyas he leemisuwa ubbaa odis. Leemisoy baynna issibaakka odibeenna. <sup>35</sup> Nabey ba maxaafan,

"Taani ta doona, leemison dooyana;  
saloyne sa7ay medhettosappe,  
geemmidayssa odays"  
yaagidi odidayssi hessian polettis.

#### *Leeshsho leemisuwa birshethaa*

<sup>36</sup> Yesuusi deriya moyzidi soo gelis. Iya tamaareti iyaakkko shiiqidi, "Goshshan de7iya leeshshuwa birshethaa nuus oda" yaagidosona.

<sup>37</sup> I zaaridi, "Lo77o zerethaa zeriday Asa Na7a, <sup>38</sup> Goshshay ha alamiya. Lo77o zerethay salo kawotethaa nayta. Leeshshoy Xalahe nayta. <sup>39</sup> Leeshshuwa zeriday morkkiya Xalahe. Caka wodey, wodiya wursettha. Cakkeyssati kiitanchchota.

<sup>40</sup> "Leeshshoy maxettidi taman xuuggetteyssa mela wodiya wursethan hessada hanana. <sup>41</sup> Asa Na7ay ba kiitanchchota kiittana. Entti nagaras gaaso gideyssatanne iita oothiya ubbaa maxidi iya kawotethaafe kessana. <sup>42</sup> Maxi shiishidi yeehoynne achcha garccethi de7iya to7onna taman yeggana. <sup>43</sup> He wode xilloti bantta Aawa kawotethan awada poo7ana. Si7iya haythi de7ey si7o!

<sup>44</sup> "Xoossa kawotethay goshshan moogettida miishe daanees. Issi asi he miishiya demmidi zaari moogis. Daro ufayttidi bidi baw de7iyaba ubbaa bayzidi he goshsha gadiya shammis.

<sup>45</sup> "Hessadakka, qassi salo kawotethay inqo giya al77o shuchchata koyaa zal77anchcho daanees. <sup>46</sup> Daro al77o inquwa demmidi bidi baw de7iyaba ubbaa bayzidi iya shammis.

#### *Molo oykkiya gite leemiso*

<sup>47</sup> "Qassi Xoossa kawotethay abban yegettida dumma dumma qommo molo oykkiya gitija daanees. <sup>48</sup> Molo oykkiya asati moloy gitijan kumin abbaafe gaxa kessidosona. Yan uttidi lo77uwa qori qori daachchon yeggidosona, shin iita molota wora holidosona.

<sup>49</sup> Wodiya wurssethan hessatho hanana. Kuitanchchoti yidi nagaranchchota xillotappe shaakkidi,<sup>50</sup> yeehoynne achcha garccethi de7iya to7onna taman yeggana.

<sup>51</sup> “Ha ubbay hinttew gelidee?” yaagidi entta oychchis.

Entti zaaridi, “Ee” yaagidosona.

<sup>52</sup> Yesuusi, “Hiza, salo kawotethaa eraa ekkidi higgiya tamaarssya ubbay, ba minjjida shaluwappe oorathaanne gal77a kessiya ase daanees” yaagis.

*Yesuusi Naazireten ixettis*

(Mar 6:1-6; Luuqa 4:16-30)

<sup>53</sup> Yesuusi ha leemisuwa odi wurssidaappe guye yaappe denddidi bis. <sup>54</sup> Ba yelettida biittaa bidi Ayhude Woosa Keethan deriya tamaarssis. Entti malaalettidi, “Ha uray ha cincattheaanne ha malaataata oothiya wolqqaa awuppe ekkidree? <sup>55</sup> Hayssi anaaxiya na7aa gidenneyye? Iya aaye sunthay Mayraamo gidennee? Iya ishati Yayqooba, Yoosefa, Simoonanne Yihuda gidokkonaayye? <sup>56</sup> Iya michcheti nuura de7oosona gidokkonaa? Yaatin, ha uray ha ubbaa awuppe ekkidree?” yaagidosona. <sup>57</sup> Hessa gisho, I giyabaa ekkonna ixxidosona.

Shin Yesuusi, “Nabey ba yelettida biittaninne ba soo asaa matan bonchchettenna” yaagis.<sup>58</sup> Entti ammanonna ixxida gisho daro malaatata he bessan oothibeenna.

## 14

*Xammaqiya Yohaannisa hayquwa*

(Mar 6:14-29; Luuqa 9:7-9)

<sup>1</sup> He wode Galila aysiya Heroodisi\* Yesuuusabaa si7is. <sup>2</sup> Ba aylletakko, “Hayssi Xammaqiya Yohaannisa; I hayqoppe denddis. Yaanida gisho ha ubbaa malaatata I oothees” yaagis.

<sup>3</sup> I hessa giday Heroodisi ba ishaa Filphoosa machche Heroodiyadi gaason Yohaannisa qasho keethi gelssida gishossa. <sup>4</sup> Yohaannisi Heroodisa, “Ne iyo ekkanaw woga gidenne” yaagis. <sup>5</sup> Heroodisi Yohaannisa wodhanaw koyis, shin derey Yohaannisa nabe oothidi be7iya gisho yashettis.

<sup>6</sup> Heroodisi ba yelettida gallasa bonchchiya wode Heroodiyada na7iya asaa sinthan yethan durada iya ufayssas. <sup>7</sup> Yaatin, I, “Iya koyaba ubbaa immana gidi” caaqqis.

<sup>8</sup> Na7iya ba aaye zoriya si7ada Heroodisakko, “Xammaqiya Yohaannisa huu7iya keren wothada taw imma” yaagasu. <sup>9</sup> Iya yaagin kawoy qirottis, shin ba caaqua gishonne baara de7iya imathata gisho gidi I oyshay polettana mela kiittis. <sup>10</sup> Kawoy ase kiittidi Yohaannisi qasho keethan de7ishin iya qoodhiya goyrisis. <sup>11</sup> Huu7iya keren wothi ehidi na7ees immidosona; na7iyakka ekkada ba aayes efasu. <sup>12</sup> Yohaannisa tamaareti yidi iya aaha efidi moogidosona. Iyappe guye hanidabaa ubbaa bidi Yesuuusas odidosonaa.

*Yesuusi ichhashu mukulu asaa muzis*

(Mar 6:30-44; Luuqa 9:10-17; Yoha 6:1-14)

<sup>13</sup> Yesuusi hanidabaa si7ida wode wogoluwan gelidi he bessaafe issi geemmiya soo barkka bis. Asay hessa si7idi katamatappé denddidi tohon iya kaallidosona. <sup>14</sup> Yesuuusi wogoluwappe wodhdhidi daro asaa be7idi enttaw qadhattis. Entta giddon de7iya hargganchchota pathis.

<sup>15</sup> Sa7ay omarsisse biya wode Yesuusa tamaareti iyaakkoo shiiqidi, “Ha bessay asi baynna bessi, sa7aykka qammis. Yaaniya gisho, heeran de7iya gutata bidi bantaw shammiidi maana mela deriya yedda” yaagidosona.

<sup>16</sup> Shin Yesuusi enttako, “Derey moonna baanaw koshshenna; entti maanabaa hintte immite” yaagis.

<sup>17</sup> Entti zaaridi, “Nuus hayssan ichhashu uythaafenne nam77u moloppe hari baawa” yaagidosona.

<sup>18</sup> Ikka, “Ane entta haa ehite” yaagis. <sup>19</sup> Kaallidikka, derey maatan uttana mela odis. Ichhashu uythaanne nam77u molota ekkidi, salo xeellidi galati simmidi, uytha menthidi ba tamaarets immis; entti qassi deriyas immidosona. <sup>20</sup> Ubbay midi kallidosona. Yesuusa tamaareti mishin attidayssa tammanne nam77u gayta denthidosona. <sup>21</sup> Kathaa mida asay maccasayne nayti attin ichhashu mukulu gidees.

*Yesuusi abbaa bollara hamuttis*

(Mar 6:45-52; Yoha 6:15-21)

<sup>13:57</sup> Yoha 4:43      \* <sup>14:1</sup> Heroodisi: Hayssi kawuwa Heroodis Antiphaasa. I Yihudanne Peeriya Kiristtoosi yelettanaappe sinthe 4-39 M.L. gakkaw haaris. I Kawuwa Heroodisas na7a.      <sup>14:4</sup> Luuqa 3:19-20; Leewe 18:16; 20:21

<sup>22</sup> Yesuusi ba tamaareti wogoluwan gelidi baappe sinthattidi abbaafe he finthi pinnana mela kiittidi baw deriya moyzanaw guye attis. <sup>23</sup> Deriya moyzi simmidi barkka woosanaw issi deriya bolla keyis. Sa7ay qamminkka I barkka yan gam77is. <sup>24</sup> He wode wogoloy abbaa bolla bishin sintha baggara carkkoy denddin hobbey wogoluwa un77ethis.

<sup>25</sup> Wontimaatha bolla Yesuusi abbaa bolla hamuttishe ba tamaaretakko yis. <sup>26</sup> Iya tamaareti, I abbaa bolla hamuttishe banttako yeysa be7idi yayyidosona. Enttika, "Hayssi moytille" gidi yayyidi waassisodosona.

<sup>27</sup> Shin Yesuusi ellessidi, "Aykoy baawa! Yayyofite! Tanabay" yaagis.

<sup>28</sup> Phexiroosi iyaakkko, "Godaw, nena gidikko, taani haatha bollara hamuttada neekko baana mela tana kiiita" yaagis.

<sup>29</sup> Yesuusi Phexiroosakkko, "Haaya" yaagis.

Phexiroosi wogoluwappe wodhdhidi haatha bollara hamuttishe Yesuusakkko buussu oykkis. <sup>30</sup> Shin wolqqaama carkkuwa be7idi yayyis. Haathan mitetethi oykkida wode "Godaw, tana ashsharkkii" yaagidi waassis.

<sup>31</sup> Yesuusi ellessidi ba kushiya yeddi iya oykkidi, "Neno, ammanoy paccidayss ays sidhay" yaagis.

<sup>32</sup> Yesuusaranne Phexiroosara wogoluwan gelida wode carkkoy si77i gis. <sup>33</sup> Wogoluwa giddon de7iya iya tamaareti, "Neeni tumakka Xoossaa Na7a" gidi goynnidosona.

<sup>34</sup> Entti abbaa pinnidi Gensareexe biittaa gakkidosona. <sup>35</sup> He biittan de7iya asay Yesuusa erida wode bantta heeran de7iya guta ubbaa kiita yedidosona. Asay hargganchchota ubbaa iyaakkko ehidosona. <sup>36</sup> Hargganchchoti iya afila macaraa xalaala bochchana mela woossidosona. Bochchida ubbayka paxidosona.

## 15

### *Aawata wogabaa* (Mar 7:1-13)

<sup>1</sup> Hessafe guye, issi issi Farisaawetinne higge asttamaareti Yerusalamepppe Yesuusakkko yidi, <sup>2</sup> "Ne tamaareti ays nu aawata wogaa menthonaa? Entti kathi maanappe sinthe bantta kushiya meecettokona" yaagidi oychchidosona.

<sup>3</sup> Yesuusi zaaridi, "Hintte, hintte wogaa gisho Xoossaa kiitaa poleyssa ays ixxeeti? <sup>4</sup> Ays giikko, Xoossay, 'Ne aawanne ne aayiw bonchcha. I ba aawa woykko ba aayiw cayeyssi hayqo gibeennee?' yaagis. <sup>5</sup> Shin hintte, issi asi ba aawa woykko ba aayiw maaddanabay de7ishin, 'Hayssa ta Xoossas yarshshas giikko, <sup>6</sup> ba aawa woykko ba aayiw bonchchanaw bessenna' yaageeta. Yaatidi hinttee, hintte wogaa polanaw Xoossaa qaala mentheeta. <sup>7</sup> Hinttenoo, cubboto, Isayaasi hinttebaa likke odis,

<sup>8</sup> "Ha asay tana bantta doonan bonchchees,  
shin entta wozanay taappe haahon de7ees.

<sup>9</sup> Asay tana coo goynnosona;  
entti asi medhdhida kiitaa  
Xoossaa higge daanisidi tamaarssoosona' gis" yaagis.

### *Ase tunisiyabata* (Mar 7:14-23)

<sup>10</sup> Yesuusi daro asaa baakko xeegidi, "Si7ite! Akekite! <sup>11</sup> Ase tunisiyabata doonara gelyiaba gidonnashin doonapape keyaabaa" yaagis.

<sup>12</sup> Hessafe guye, Yesuusa tamaareti iyaakkko yidi, "Farisaaweti neeni gidayssa si7idi dhubettidayssa akekay?" yaagidosona.

<sup>13</sup> Shin Yesuusi enttaw zaaridi, "Saluwan de7iya ta aaway tokkiboonna mithay ubbay shodettana. <sup>14</sup> Enttabaa hirggofite; entti qooqe kaalethiya qooqeta. Qooqey qooqe kaalethiko, nam77ayka ollan kunddana" yaagis.

<sup>15</sup> Phexiroosi zaaridi, "Ha leemisuua birshshethaa nuus odarkkii" yaagis.

<sup>16</sup> Yesuusi enttako, "Hinttewuka ha77i gakkanaa gelibeennee? <sup>17</sup> Doonara gelyabaa ubbay ulo gelidi kare keyeyssa erakketii? <sup>18</sup> Shin doonara keyaabay wozanappe keyees. Ase tunisiyabati hessata. <sup>19</sup> Enttika asa wozana giddofe keyaa iita qofa, wodho, laymatethi, iita ooso, kayso, worddo markkatethi, cashshe. <sup>20</sup> Hessa daaniyabati ase tuniseesippe attin meecettonna kushera meyssi tunisenna" yaagis.

### *Issi maccase ammanuwa* (Mar 7:24-30)

<sup>21</sup> Hessafe guye, Yesuusi yaappe keyidi Xiroosanne Sidoona katamati de7iya biittaa bis. <sup>22</sup> Issi Kanaane biitta maccas Yesuusakko yada, ba qaalaa dhoqqu oothada, “Godaw, Dawite na7aw, taw qadhattarkii; ta na7iw tuna ayyaanay oykkidi iita waayses” yaagasu.

<sup>23</sup> Shin Yesuusi issi qaalakka zaaronna si77i gis. Yesuusa tamaareti iyaakkko yidi, “Ha maccasiya nu geedo kaalla kaallada, woossawusu. Hessa gisho, neeni iyo moyzarkkii” yaagidi woossidosona.

<sup>24</sup> Yesuusi zaaridi, “Taani wudeppe dhayida dorssada Isra7eele keethaafe dhayida asata xalaalas kiittetas” yaagis.

<sup>25</sup> Shin iya, iya sinthan kunddada, “Godaw, tana maaddarkii?” yaagasu.

<sup>26</sup> I zaaridi, “Nayta kathi ekkidi kanatas yeggeyssi lo77o gidenna” yaagis.

<sup>27</sup> Maccasiyakka, “Godaw, hessi tuma, shin hari attoshin kanati bantta godati mishin, gaytappe wodhdhiya tiifya moosona” yaagasu.

<sup>28</sup> Yesuusi zaaridi, “Ha maccasete, ne ammanoy gita; ne koyidayssada new hano” yaagis. I na7iya iirakka paxa aggasu.

#### *Yesuusi dero hargganchchota pathis*

<sup>29</sup> Yesuusi yaappe denddidi Galiila Abbaa mati bis. Issi dere bolla keyidi, yan uttis. <sup>30</sup> Daro asay banttara, wobbeta, qooqeta, kuunata, doona muumetanne, hara daro hargganchchota ekkidi, iyaakkko ehidi iya sinthan wothidosona. Yesuusi enttana pathis.

<sup>31</sup> Hessa gisho, muumeti odettishin, kuunati piddi gishin, wobbeti hamuttishin, qooqeti xeellishin asay be7idi malaalettidi, Isra7eele Xoossa galatidosona.

#### *Yesuusi oyddu mukulu asaa muzis*

(Mar 8:1-10)

<sup>32</sup> Yesuusi ba tamaareta baakko xeegidi, “Ha daro asay taara heedzu gallas gam77ida gishonne enttaw ha77i miyabay baynna gisho taani enttaw qadhattays. Entti ogen daaburidi kunddonna mela aykko muzonna entta mela yeddanaw koyikke” yaagis.

<sup>33</sup> Iya tamaareti zaaridi, “Nuuni ha bazzuwani hayssa keena asaas gidiya kathi awuppe demmanee?” yaagidosona.

<sup>34</sup> Yesuusi enttako, “Hinttew aappun uythi de7ii?” yaagidi oychchis.

Entti zaaridi, “Laappun uythinne laafa molotappe guuthi de7ees” yaagidosona.

<sup>35</sup> Yesuusi deriya sa7an uttite yaagidi kiittis. <sup>36</sup> Hessafe guye, he laappun uytthaanne moluwa ekkidi Xoossa galatis. Menthidi ba tamaaretas immis. Iya tamaareti asaas gishidosona.

<sup>37</sup> Asay ubbay midi kallidosona. Iya tamaareti, mishin attida tiifya laappun gita gayta kumethi denthidosona. <sup>38</sup> Mida asay maccasinne na7a paydonna adde xalaali oyddu mukulu. <sup>39</sup> Yesuusi deriya yeddidaappe guye wogoluwan gelidi Magedoona giya biittaa bis.

## 16

#### *Saloppe malla be7anaw oyochchida oysha*

(Mar 8:11-13; Luuqa 12:54-56)

<sup>1</sup> Farisaawetinne Saduqaaweti Yesuusakko yidosona. Iya paaccanaw koyidi, banttana saloppe malaata besso gidi oyochchidosona. <sup>2</sup> Shin I enttako, ‘Sa7i omarssiya wode ‘Saloy zo77ida gisho wontto booqallana’ yaageta. <sup>3</sup> Wonttiya wode, ‘Saloy zo77idi shaaratida gisho iray bukkana’ yaageta. Yaatin hintte salo mallaa be7idi ereeta, shin wodiya malla eranaw dandda7ibekketa. <sup>4</sup> Iitanne ammanonna yeletethay malaata koyees. Shin iyaw Yoonasa malaatappe hara malaati imettenna” yaagis. Hessafe guye, enttana yan aggidi hara soo bis.

#### *Farisaawetanne Saduqaaweta irshshuwaa*

(Mar 8:14-21)

<sup>5</sup> Entti abbaafe hefinthi pinnida wode daabbo ekkidi yaanayssa dogidosona. <sup>6</sup> Yesuusi enttako, “Farisaawetappenne Saduqaaweta irshshuwaafe naagettite” yaagis. <sup>7</sup> Enttika bantta garssan, “I hessa giday nu daabbo ekkidi yoonna gishossa gidana” yaagidosona.

<sup>8</sup> Yesuus entta qofaa eridi, “Hinttenoo, ammanoy paccidayssat! Daabbo ekkonna yida gisho woli gidon ays odetteetii? <sup>9</sup> Ha77ika hintte akeeketii? Ichchashu mukulu asaas ichchashu uythaa gishidayssanne entti midi kallin hintte aappun gayta kumethi denthi-daakko dogidetii? <sup>10</sup> Hessadakka, laappun uythaa oyddu mukulu asaas gishidayssanne entti midi kallin, hintte aappun gita gayta kumethi denthidaakko akeeketketii? <sup>11</sup> Hiza, taani Farisaawetanne Saduqaaweta irshshuwaafe naagettite gada odeyssi daabbobaa

gidonnyayssa akeekkekketii?” yaagis. <sup>12</sup> Yaatin, iya tamaareti Yesuusi odehy munuqa denthalanaw yegettiya irshshobaa gidonnnashin Farisaawetanne Saduquaaweta timirrtiyafe naagettanayssa gideyssa akeekidosona.

*Phexiroosi Yesuuusabaa odis*  
(Mar 8:27-30; Luuqa 9:18-21)

<sup>13</sup> Yesuusi Qisaariya Filphoosa biittaa gakkida wode ba tamaaretakko, “Asay, Asa Na7aa oona goona?” yaagidi oychchis.

<sup>14</sup> Enttika, “Issoti issoti Xammaaqiya Yohaannisa, harati Eliyaasa qassi hankkoti Ermmiyasa woykko nabetaappe issuwa goosona” yaagidosona.

<sup>15</sup> Yesuusi zaaridi, “Yaatin, hintte tana oona geeti” gidi entta oychchis.

<sup>16</sup> Simoona Phexiroosi zaaridi, “Neeni Kiristtoosa, de7o Xoossaa na7a” yaagis.

<sup>17</sup> Yesuusi Phexiroosakko, “Yoona na7aa Simoona, neeni anjjettidayssa! Hayssa new qonccisiday saluwan de7iya ta aawappe attin ase gidenna. <sup>18</sup> Ta new odays Phexiroosa, neeni zaalla! Taani ha zaalla bolla ta woosa keethaa keexana. Hayqo wolqqatikka iyo xoonokkona. <sup>19</sup> Salo kawotethaa qulppeta ta new immana. Sa7an neeni diggiyabay ubbay salon Xoossaa matan diggettidaabaa gidana. Sa7an neeni hano giyabay ubbay salon Xoossaa matan hanidabaa gidana” yaagis.

<sup>20</sup> Hessafe guye, I, Kiristtoosa gideyssa ooddeskka odonna mela ba tamaareta minthidi kiittis.

*Yesuusi bana gakkana waaya odis*

<sup>21</sup> He wodiyappe doomidi Yesuusi ba tamaareta, “Taani Yerusalemme baanaw bessees. Yan deriya cimatan, kahine halaqatanne higge asttamaareta kushen waaye ekkanaw bessees. Entti tana wodhana, shin taani heedzanthro gallas hayqoppe denddana” yaagidi qonccis.

<sup>22</sup> Phexiroosi Yesuusa gaxa kessidi, “Godaw, hessi hanenna! Hessa melabay nena ubbarakka gakkofo!” yaagidi hanqettis.

<sup>23</sup> Yesuusi Phexiroosakko guye simmidi, “Ha Xalahiyaw, taappe haakka! Neeni asa qofa coppasappe attin Xoossaa qofa qopponna gisho taw dhube gidaasa” yaagis.

<sup>24</sup> Hessafe guye, Yesuusi ba tamaaretakko, “Oonikka tana kaallanaw koyabaa gidikko bana kaddo, ba masqaliya tookkidi tana kaallo. <sup>25</sup> Ba de7uwa ashshanaw koyaa ubbay dhayssees. Shin ba de7uwa ta gisho gidi aathi immeyssi ashshees. <sup>26</sup> Asi alame kumethaa babaa oothidi, gidoshin ba shemppuwa dhayssikko iya ay maaddii? Woykko asi ba shemppuwa laame ay immanaw dandda7ii? <sup>27</sup> Asa na7ay ba aawa bonchchuwan ba kiitanchchotara yaana. He wode issi issi uraas iya oosuwada immana. <sup>28</sup> Ta tuma odays; asa Na7ay kawo gididi simmeyssa be7ana gakkana hayssan eqqida asaappe hayqonnayssati de7oosona” yaagis.

## 17

*Yesuusa malay laamettis*  
(Mar 9:2-13; Luuqa 9:28-36)

<sup>1</sup> Usupun gallasappe guye Yesuusi, Phexiroosa, Yayqoobanne iya ishaa Yohaannisa baara ekkidi banttarkka gidanaw deriya bolla keyis. <sup>2</sup> Yan entta sinthan Yesuusa malay kumethi laamettis; iya som77oyka awada xolqqis. Iya ma7oykka daro booxis. <sup>3</sup> Hekko, Museynne Eliyaasi iyara odettishin be7idosona. <sup>4</sup> Phexiroosi Yesuusakko, “Nuuni hayssa hashshu yida. Ne koykki issino new, issino Muses, issino Eliyaasas hayssan heedzu shaqara shaqarana” yaagis. <sup>5</sup> Phexiroosi hessa burroo odishin bootha shaaray enttana kammis. Shaara giddora, “Tana ufayssya, ta dosiya na7ay hayssa, iya si7ite!” yaagiya qaalay yis. <sup>6</sup> Yesuusa tamaareti hessa si7ida wode dagammidi bantta som77uwara sa7an kunddidosona. <sup>7</sup> Shin Yesuusi enttako shiqidi entta bochchidi, “Denddite, yayyofite!” yaagis. <sup>8</sup> Entti dhoqqu gidi be7iya wode Yesuusappe hara oonakka be7ibookkona.

<sup>9</sup> Entti deriyappe wodhdhishin Yesuusi enttako, “Asa Na7ay hayqoppe denddana gakkana ha hintte be7idabaa ooddeskka odoppite” gidi kiittis. <sup>10</sup> Yesuusa tamaareti, “Yaatin, higge asttamaareti Eliyaasi Kiristtoosappe kasetidi yaana giday aybissee?” yaagidi oychchidosona.

<sup>11</sup> Yesuusi zaaridi, "Ee! Eliyaasi kaseti yidi ubbabaa giigisana. <sup>12</sup> Shin ta hinttew tuma odays; Eliyaasi kasetidi yis. Enttika iya bolla koyidabaa oothidosonappe attin iya shaakki eribookkona. Hessada Asa Na7ay entta kushen waayettana" yaagis.

<sup>13</sup> He wode Yesuusi giday Xammaqiya Yohaannisabaa akeekidosona.

*Yesuusi tuna ayyaanay oykkida na7aa pathis  
(Mar 9:14-29; Luuqa 9:37-43)*

<sup>14</sup> Entti deriyappe asaakko simmiya wode issi asi Yesuusa sinthan gulbbatidi, <sup>15</sup> "Godaw, hayyana ta na7as qadhetarkii; iya shocidi yeggiya harggey dero un77ethidi tamaninne haathan yeggees. <sup>16</sup> Ne tamaaretakko ehas, shin entti pathanaw dandda7ibookkona" yaagis.

<sup>17</sup> Yesuusi zaaridi, "Hinttenoo, ammanonna geella yeletethaw awude gakkanaw ta hinttera daane? Awude gakkanaw ta hinttena dandda7anee? Ane na7aa haa ekki yiite" yaagis. <sup>18</sup> Yesuusi tuna ayyaanaa hanqin, tuna ayyaanay na7aappe keyis; he saatenkka na7ay paxis. <sup>19</sup> Hessafe guye, Yesuusa tamaareti banttarkka iyaakko shiiqidi, "Nuuni tuna ayyaanaa kessanaw dandda7iboonnay aybis?" yaagidi oychchidosona. <sup>20</sup> I enttako, "Hinttew ammanoy laafida gishossa. Ta hinttew tuma odays; gaashe ayfe mela ammanoy hinttew de7ikko 'Ha deriya hayssafe deenddada gede aadhhdha' giilko hinttew kiitttana. Hinttew dandda7ettonabay deenna. <sup>21</sup> [Shin hessa melay woosappenne xoomappe attin haran keyennal]" yaagis.\*

*Yesuusi ba hayquwaba zaari odis  
(Mar 9:30-32; Luuqa 9:43-45)*

<sup>22</sup> Yesuusa tamaareti Galiilan shiiqidi de7ishin Yesuusi enttako, "Asa Na7ay asa kushen aadhhdidi imettana. <sup>23</sup> Entti iya wodhana, shin I heedzanthro gallas hayqoppe denddana" yaagis.

Iya tamaaretikka daro qiriottidosona.

*Xoossa Keetha giira*

<sup>24</sup> Yesuusaranne iya tamaaretara Qifirnahoome katama gakkida wode Xoossa Keetha giira qanxiseyssati Phexiroosakko yidi, "Hintte asttamaarey Xoossa Keetha giira giirii?" yaagidi oychchidosona.

<sup>25</sup> Phexiroosi zaaridi, "Giirees" yaagis. Phexiroosi soo geliya wode Yesuusi kasetidi, "Phexiroosa, new ay daanii? Ha sa7aa kawotethati qaraxanne giira oppe ekkonaa? Gade asappeyye woykko asa gade asappe?"† yaagidi oychchis.

<sup>26</sup> Phexiroosi "Asa gade asappe" gidi zaaris.

Yesuusi zaaridi, "Gade asay giira giirkkona guussu. <sup>27</sup> Shin entti dhabettonna mela abbaa bada moluwa oykkiya manxxaqa yegga. Koyro ne oykkiya moluwa doona dooyada giiras gidiya miishiya ne gishonne ta gisho efada giira" yaagis.

## 18

*Ubbaafe aadhhdhey oonee?  
(Mar 9:33-37; Luuqa 9:46-48)*

<sup>1</sup> He wode Yesuusa tamaareti yidi, "Salo kawotethan ubbaafe aadhhdhey oonee?" yaagidi oychchidosona. <sup>2</sup> Yesuusi issi guutha na7a xeegidi entta giddon essidi hayssada yaagis. <sup>3</sup> "Taani hinttew tuma odays; hintte laamettonanne guutha naytada hanonna iixiko salo kawotethaa ubbarakka gelanaw dandda7ekketa. <sup>4</sup> Hiza, ha guutha na7aada bana kawushshiya oonikka salo kawotethan ubbaafe aadhhdheyssa gidana. <sup>5</sup> Hayssa mela na7a ta sunthan mokkiya oonikka tana mokkees.

<sup>6</sup> "Shin tanan ammanniyyaa ha guuthatappe issuwa naagara oothana mela dhube gidiya oonikka gita gaachcha woxa ba qodhen qachchidi ciimmo abban mitettiko iyaw lo77o. <sup>7</sup> Alamen asay nagara oothana mela oothiyabati de7iya gisho alamiya ayye. Hessa melabati yoonna attenna, shin dhubey iya gaason yaa uraa ayye.

<sup>8</sup> "Ne kushey woykko ne tohoy nena bailethikkoo neeppe qanxa yegga. Neeni nam77u kushera woykko nam77u tohora merinaa taman yeggettanaxsafe kushe woykko toho duuxa gidada merinaa de7o demmeysi new lo77o. <sup>9</sup> Qassi ne ayfey nena bailethikkoo iyo wooca kessada wora hola. Neeni nam77u ayfera gaannname taman yeggetteyssafe issi ayfera merinaa de7uwa geleyssi new lo77o.

<sup>17:12</sup> Maato 11:14    <sup>17:21</sup> Maato 21:21; Mar 11:23; 1Qoro 13:2    \* <sup>17:21</sup> Issi issi beni maxaafatan paydo 21 deenna.

<sup>17:24</sup> Kessa 30:13    † <sup>17:25</sup> Gade asappeyye woykko asa gade asappe? He wode kawotethati bantta gade asappe giira ekkonka.    <sup>18:1</sup> Luuqa 22:24    <sup>18:3</sup> Mar 10:15; Luuqa 18:17    <sup>18:8</sup> Maato 5:30    <sup>18:9</sup> Maato 5:29

<sup>10</sup> “Ta hinttew odays; salon de7iya entta naagiya kiitanchchotii ubba wode salon de7iya ta Aawa sinthan de7iya gisho hintte ha guuthatappi issuwaka kadhonna mela naagettite.  
<sup>11</sup> Asa Na7ay dhaydayssata ashshanaw yis”\* yaagis.

*Dhayida dorssaa leemiso  
(Luuqa 15:3-7)*

<sup>12</sup> Qassi Yesuusi, “Hinttew ay daanii? Issi uraas xeetu dorssati de7eyssatappi issoy dhayikko uddufun tammanne uddufunata deriya bolla yeggi aggidi he dhayidayssa koyanaw beenne? <sup>13</sup> Ta tuma odays; I demmida wode uddufun tammanne uddufunatappi aathidi dhayidi benttida issi dorssan ufayttees. <sup>14</sup> Hessadakka, salon de7iya hintte aaway ha guuthatappi issoy dhayana mela koyenna.

*Qohida asi waatanee?*

<sup>15</sup> “Ne ishay nena qohikko nerkaa iyaakko bada iya balaa iyaw oda. I nena si7ikko ne ishawa new isha ootha. <sup>16</sup> Shin I nena si7onna ixxiko, nam77u woykko heedzu asa markkan mootoy lasettiy gisho issi woykko nam77u asi ekkada iyaakko ba. <sup>17</sup> I enttana si7onna ixxiko, woosa keethas oda. Woosa keethi giyabaa si7onna ixxiko ammanonna asada woykko qaraxa qanxisiya asada iya payda.

<sup>18</sup> “Ta hinttew tuma odays; sa7an hintte diggiyabati ubbay salon Xoossaa matan digetidaba gidana. Sa7an hintte hano giyabati ubbay salon Xoossaa matan hanidabaa gidana.

<sup>19</sup> “Qassika ta hinttew odays; sa7an hinttefe nam77ay bantta woossiyabas issi wozanan gididi Xoossaa woossiyabaa gidikko salon de7iya ta Aaway hinttew oothana. <sup>20</sup> Tana kaaleyssatappi nam77a woykko heedza gididi shiqliya bessan taani entta giddon benttana” yaagis.

*Atto guussabaa*

<sup>21</sup> He wode Phexiroosi Yesuusakkoo yidi, “Godaw, ta ishay tana qohikko aappun toho taani atto gaanaw bessii? Laappun toho gakkanaaseyye?” gidi oychchis.

<sup>22</sup> Yesuusi zaaridi, “Gidenna, laappun tammu toho laappunappe attin laappun toho gidenna.

<sup>23</sup> “Hessa gisho, Xoossaa kawotethay ba oosanchchotara ba miishey paccidaakkonne palahidaakkoo be7anaw qoppida kawuwa daanees. <sup>24</sup> He kawoy miishey paccidaakkonne palahidaakkoo be7iya wode daro giinddigindda acoy de7iya issi uraa iyaakko ehdidosaa. <sup>25</sup> Shin he aylley acuwa qanxanaw xoonettin iyara, iya machcheera, iya naytinne iyaw de7iyabay ubbay bayzettidi acoy cigettana mela iya goday kiittis. <sup>26</sup> Yaatin aylley ba godaa tohuwa bolla gulbbatidi, ‘Ta godaw, hayvana guutha wode takkarkki, ta acuwa ubbaa ta ciggana’ yaagidi woossis. <sup>27</sup> Kawoy iyaw qadhetidi, yeddi aggis; iya acuwa maaris.

<sup>28</sup> “Shin he aylley keyi bidi ba lagge oosanchchotappi issoy baappe daro guutha miishe tal77idayssa, ‘Ne bolla de7iya ta miishiya taw cigga’ gidi qoodhe oykkis.

<sup>29</sup> “He iya lagge aylley iya sinthan gulbbatidi, ‘Hayvana guutha wode takkarkki taani ta acuwa ubbaa ciggana’ yaagidi woossis.

<sup>30</sup> “Shin ixxidi ekki efidi ba lagge acuwa qanxana gakkanaw qasho keethi gelssis. <sup>31</sup> Hessa gisho, hara lagge oosanchchotii hessa be7ida wode daro yilotidi, bidi bantta godaaas I oothidabaa ubbaa odidosona.

<sup>32</sup> “Yaatin kawoy he ayllyia xeegisidi, ‘Ha iita ayllyaw, neeni tana woossida gisho ta ne acuwa ubbaa new maaras. <sup>33</sup> Yaatin, taani ne acuwa maariidayssada neeni ne lagge ayllyia acuwa maaranaw new bessennee?’ yaagis. <sup>34</sup> Hessa gisho, kawoy daro yilotidi, Iba acuwa ubbaa ciggana gakkanaw paxa kaa7ettana mela qasho keethan yeggis.

<sup>35</sup> “Hessadakka, hintte issoy issoy hintte ishaha wozanappe maaronna ixxiko salon de7iya ta Aaway hinttena hessada oothana” yaagis.

## 19

*Eko gelobaa  
(Mar 10:1-12)*

<sup>1</sup> Yesuusi hessa odi onggidaappe guye Galilappe denddidi Yorddaanose Shaafappe hefinthan de7iya Yihuda biittaa bis. <sup>2</sup> Daro asay iya kaallidi bin entta giddofe hargganchchota pathis.

<sup>3</sup> Farisaaweti iya paaccanaw koyidi iyaakko yidi, “Issi asi ay gaasonkka ba machchiw yeddanaaw bessii?” yaagidi oychchidosona.

<sup>18:10</sup> Luuqa 19:10    \* <sup>18:11</sup> Asa Na7ay dhaydayssata ashshanaw yis: Issi issi beni maxaafati paydo 11 guijoosona.

<sup>18:15</sup> Luuqa 17:3    <sup>18:16</sup> Zaare 19:15    <sup>18:18</sup> Maato 16:19; Yoha 20:23    <sup>18:21</sup> Luuqa 17:3-4    <sup>18:22</sup> Medhe

<sup>4</sup> Yesuusi zaaridi, "Xoossay koyro addenne maccas oothi medhdhidayssa hintte nababibekketii? <sup>5</sup> Hessa gisho, Issi asi ba aawanne ba aayiw aggidi ba machcheera issino gidees, nam77ayka issi asho gidoosona." <sup>6</sup> Hessa gisho, entti issi asho gidoosonappe attin nam77a gidokkona. Hiza, Xoossi qachchidayssa asi shaakkofo" yaagis.

<sup>7</sup> Farisaaweti, "Yaatin, Musey issi asi anjo worqqate immidi yeddana mela ays kiittidee?" yaagidi oychchidosona.

<sup>8</sup> Yesuusi zaaridi, "Hinttee, hintte machcheta yeddana mela Musey hinttena kiittiday, hintte wozanaa minutethaa gishoppe attin koyroppe hessa mela gidenna. <sup>9</sup> Ta hinttew odays; ba machchiya laymatonna de7ishin yeddidi hara ekkiya oonikka laammees" yaagis.

<sup>10</sup> Iya tamaareti iyaakko, "Azinabaynne machchibay hessa mela gidikko ekko geloy attiko lo77o" yaagidosona.

<sup>11</sup> Yesuusi zaaridi, "Hessa mela timirttey Xoossay dandda7a immidayssatassafe attin asa ubbaassa gidenna. <sup>12</sup> Hiza, yelettishe shuufa gididi yelettidayssati de7oosona, qassi asi qaaratidayssati de7oosona, qassi salo kawotethaa gisho gidi banttana shuufaydayssati de7oosona. Hessa gisho, hayssa ekkanaw dandda7iya oonikka ekko" yaagis.

*Yesuusi guutha nayta anjjis  
(Mar 10:13-16; Luuqa 18:15-17)*

<sup>13</sup> Yesuusi ba kushiya guutha nayta bolla wothidi enttaw woossana mela issi issi asay nayta iyaakko ehidosona. Shin iya tamaareti asaa hanqettidosona. <sup>14</sup> Shin Yesuusi, "Xoossaafattin hari lo77oy baawa. Shin neeni merinaa de7uwa ekkanaw koykko kiitata naaga" yaagis.

<sup>15</sup> Ba kushiya entta bolla wothidaappe guye he bessaafe aggidi bis.

*Na7atetha dure uraa  
(Mar 10:17-31; Luuqa 18:18-30)*

<sup>16</sup> Issi gallas issi uray Yesuusakkoy idi, "Asttamaariyaw, taani merinaa de7o demmanaw ay lo77obaa oootho?" yaagis. <sup>17</sup> Yesuusi iyaakko, "Lo77obaa ne tana ays oychchay? Issi Xoossaafattin hari lo77oy baawa. Shin neeni merinaa de7uwa ekkanaw koykko kiitata naaga" yaagis.

<sup>18</sup> Uray zaaridi, "Awussa kiitata" yaagidi oychchis.

Yesuusi zaaridi, "Wodhoppa, laymatoppa, kaysotoppa, worddo markkattofa, <sup>19</sup> ne aawanne ne aayiyi bonchcha, ne shooruwa ne huu7iyatho dosa" yaagis.

<sup>20</sup> He na7atethay, "Taani hayssata ubbaa na7atethafe doomada naagas. Yaatin, hari taw pacciayabay aybee?" yaagidi oychchis.

<sup>21</sup> Yesuusi zaaridi, "Neeni polo gidanaw koykko bada new de7iyabaa bayzada mangotas imma; neeni salon duretana. Yaata simma yada tana kaalla" yaagis.

<sup>22</sup> Shin he naatetha uray duro gidiya gisho hessa si7ida wode azzanishe aggidi bis.

<sup>23</sup> Hessafe guye, Yesuusi ba tamaareta, "Taani hinttew tuma odays; durey salo kawotethi gelanayssi duro meto. <sup>24</sup> Dure asi Xoossaafattin hari lo77oy baawa. Shin neeni merinaa de7uwa ekkanaw koykko kiitata naaga" yaagis.

<sup>25</sup> Yesuusa tamaareti hessa si7idi malaalettidi, "Yaatin, ooni attanaw dandda7ii?" yaagidi oychchidosona.

<sup>26</sup> Yesuusi entta caddi xeellidi, "Hayssi asas dandda7ettenna, shin Xoossas ubbay dandda7ettees" yaagis.

<sup>27</sup> Phexiroosi zaaridi, "Nuuni ubbabaa aggidi nena kaallida. Yaatin, nuuni ay demanee?" yaagis. <sup>28</sup> Yesuusi enttako hayssada yaagis: "Taani hinttew tuma odays; Asa Na7ay yaana alamiyan ba bonchcho araanattu uttiya wode hintte tammanne nam77ati, tana kaallidayssati, tammanne nam77u araanattu tammanne nam77u Isra7eele zerethata bolla pirddana. <sup>29</sup> Ta suntha gisho keethe woykko ishata woykko michcheta woykko awaa woykko aayiw woykko nayta woykko gadiya aggiday oonikka xeetu kushe ekkana. Qassi merinaa de7uwakka ekkana. <sup>30</sup> Shin daroti ha77i dethan sinthe gididayssati guye gidana, qassi guye gididayssati sinthe gidana" yaagis.

## 20

*Woyniya giddon oothiya oosanchchota leemiso*

<sup>1</sup> "Xoossaafattin hari lo77oy ba woyniya giddon oosanchchota kera oosisanaw wontta guura keyida keethaawa daanees. <sup>2</sup> I he oosanchchotas hachchi hachchi issi dinaare\* qanxanaw

**19:4** Medhe 1:27; 5:1    **19:5** Medhe 2:24    **19:7** Medhe 24:1    **19:9** Maato 5:32; 1Qoro 7:10    **19:18** Kessa 20:13-16; Zaare 5:17-20    **19:19** Kessa 20:12; Zaare 5:16; Leewe 19:18    **19:28** Maato 25:31; Luuqa 22:30    **19:30** Maato 20:16; Luuqa 13:30    \* 20:2 Issi dinaare: Issi asi issi gallas oothi pee7idi ekkya miishe.

enttara giigidi, entta ba woyniya giddo yeddus.

<sup>3</sup> "Qassi wonttafe heedzu saate gidishin keyidi ooso dhayidi giya bolla eqida hara asata demmis. <sup>4</sup> I enttako, 'Hintteka ta woyniya giddo bidi oothite, taani hinttew bessiya gatiya qanxana' yaagis. <sup>5</sup> Enttika bidosona. Qassika I usuppun saateninne uddufun saaten keyidi hessada oothis. <sup>6</sup> Tammanne issi saate gidishin I keyaa wode harati yan eqqidayssata demmisi, 'Hintte ooso oothonna gallas kumethi hayssan ays eqqidi pee7idetii?' yaagis.

<sup>7</sup> "Entti zaaridi, 'Nuna kera oosisiya asi dhayida gishossa' yaagidosona.

"Ikka, 'Hintteka ta woyniya giddo bidi oothite' yaagis.

<sup>8</sup> "Sa7i omarssin, woyniya goday oosanchchota halaqaakkko, 'Oosanchchota xeegada wurssethan ooso gelidayssatappe doomada koyro gelidayssata gakkanaw entta gatiya qanxa' yaagis. <sup>9</sup> Tammanne issi saaten ooso oykkidayssati yidi, huu7en huu7en issi issi dinaare ekkidosona. <sup>10</sup> Koyro ooso oykkidayssati yidi, banntaw daro imettana gidi qoppidosona. Shin enttika huu7en huu7en issi issi dinaare ekkidosona. <sup>11</sup> Bantta miishiya ekki simmidi keethaawa bolla zuuzummidosona. <sup>12</sup> 'Hayssati guyeppe yidi issi saate xalaala oothidosona. Shin gallas kumethi awa suulan daaburidi pee7ida nuura entti waanidi issino gidoona' yaagidosona.

<sup>13</sup> "Woyniya keethaaway oosanchchotappe issuwako, 'Ta ishaw, taani nena qohabikke; ne taara giigiday issi dinaressa gidennee? <sup>14</sup> Ne miishiya ekkada ne soo ba. Ta omarssi yidayssaskka neyssa mela immanaw koyays. <sup>15</sup> Taani ta miishiyan koyidabaa oothanaw taw maati baawe? Woykko taani keeha gidida gisho neeni qanaatay?' yaagis.

<sup>16</sup> "Hessada ha77i dethan guye gididayssati sinthatana, sinthattidayssati qassi guyetana" yaagis.

*Yesuusi ba hayquwaba heedzanthro odis*

(Mar 10:32-34; Luuqa 18:31-34)

<sup>17</sup> Yesuusi Yerusalame bishe, tammanne nam77u tamaareta dumma gaxa kessidi enttako yaagis: <sup>18</sup> "Hekko, nuuni ha77i Yerusalame buussa bolla de7oos. Yan Asa Na7ay kahine halaqatasinne higge asttamaretas aadhdhi imettana. Enttika iya bolla hayqo pirdda pirddana. <sup>19</sup> Iya Ayhude gidonna deriyas aathi immana. Entti iya kawushshana, garaafana, yaatidi iya masqaliya bolla kaqqana. Shin I heedzanthro gallas hayqoppe denddana" yaagis.

*Zabdiyoosa nayta aaye woosaa*

(Mar 10:35-45)

<sup>20</sup> He wode Zabdiyoosa machchiya ba nam77u adde naytara Yesuusakko yada, iya sinthan gulbubatada issibaa iya woossasu.

<sup>21</sup> Yesuusi iikko, "Ne ay koyay?" yaagis.

Iya zaarada, "Ne kawotethan ha ta nam77u nayti issoy ne ushachchan issoy ne hadirssan utto garkkii!" yaagasu.

<sup>22</sup> Shin Yesuusi naytakko zaaridi, "Hintte ay woossiyako erekketa; taani uyanaw de7iya waaye xuu7aa uyanaw dandda7etii?" yaagis.

Enttika, "Ee dandda7os" yaagidosona.

<sup>23</sup> Yesuusi, "Tumakka taani uyanaw de7iya xuu7appe hintte uyana. Shin ta ushachchaninne haddirssan uttanayssata doorey tana gidikke. He bessay imetey, ta aaway immanaw giigisida asatassa" yaagis.

<sup>24</sup> Attida tammu iya tamaareti hessa si7ida wode nam77u ishata bolla hangettidosona.

<sup>25</sup> Shin Yesuusi entta ubbaa xeegidi hayssada yaagis. "Ayhude gidonna asaa haareyssati bantta asaa bolla godateyssanne entta kaaletheyssat wolqan haareyssa hintte ereeta.

<sup>26</sup> Shin hintte giddon hessada gidoppo. Hinttete gitatananow koyaa oonikka hinttew ayle gido. <sup>27</sup> Hintte giddon ubbaafe bolla gidanaw koyaa oonikka hinttew ayle gidanaw bessees. <sup>28</sup> Hessadakka, Asa Na7ay ase haggazanawunne daro asaa wozanaw ba shemp-puwa immanaw yisippe attin asan haggazetanaw yibeenna" yaagis.

*Yesuusi nam77u qooqeta pathis*

(Mar 10:46-52; Luuqa 18:35-43)

<sup>29</sup> Hessafe guye, Yesuusi ba tamaaretara Iyaarkkofe keyidi bishin, daro asay enttana kaallidosona. <sup>30</sup> Oge gaxan uttida nam77u qooqeti Yesuusi yaara aadhdeyssa si7idi, "Godaw, Dawite Na7aw, nuus qadhattarkii" yaagidi waassisodosona. <sup>31</sup> Daro asay enttana, "Hayzite" yaagidi kaccidosona. Shin entti, "Godaw, Dawite na7aw, nuus qadhattarkii" gidi gujji waassisodosona.

<sup>32</sup> Yesuusi eqqidi, entta xeegidi, "Ta hinttew ay oothana mela koyetii?" yaagidi oychchis.

<sup>33</sup> Enttika, “Godaw, nu ayfey xeellana mela koyoos” yaagidosona. <sup>34</sup> Yesuusi enttaw qadhattidi, entta ayfiyaa bochchis. Ellesidi entta ayfey xeellis; entti iya kaallidi bidosona.

## 21

*Yesuusi gita bonchchon Yerusalaame gelis  
(Mar 11:1-11; Luuqa 19:28-40; Yoha 12:12-19)*

<sup>1</sup> Yesuusaranne iya tamaaretara Yerusalaame matidi, Shamaho Deriya bolla de7iya Beetefaaage giya gutaa gakkishe, Yesuusi ba tamaaretappe nam77ata baappe sinthe yaagidi kiittis: <sup>2</sup> “Hinttefe sinthan de7iya guta biite. Yan issi harey qashon de7iyaro I maarara hintte sohuwara demmana. Entta billidi haa ekki yiite. <sup>3</sup> Oonikka hinttena oychchiko, ‘Goday enttana koyees’ yaagite. I enttana iirakka yeddi aggana” yaagis.

<sup>4</sup> Hessika nabey,

<sup>5</sup> “Xiyoone katamaas,

‘Hekko, ne kawoy ashkke gididi, hare bollanne  
hare mara bolla uttidi, neekko yees’ yaagite’

yaagidi xaafidayssi polettana mela hessi hanis.

<sup>6</sup> Iya tamaareti bidi Yesuusi entta kiittidayssada oothidosona. <sup>7</sup> Hariwunne hare maraa ehidi bollara ma77ida bantta ma7uwa entta zokkon yeggidosona. Yesuusi ma7ota bolla uttis. <sup>8</sup> Daro asay bantta ma7uwa ogiyan hiixidosona. Harati boncco tashidi ogiya bolla yeggidosona. <sup>9</sup> Yesuuusappe sinthara hamutteyssatinne iyappe guyera kaalliya daro asay, “Hosaana! \* Dawite na7ay galatetto!

Godaa sunthan yeysyi anjettidayssa!

Bonchchoy Ubbaafe Dhoqqa Saluwan Xoossaas gido!”  
yaagidi waassidosona.

<sup>10</sup> Yesuusi Yerusalaame katamaa gelida wode he kataman de7iya asa ubbay, “Hayssi oonee?” yaagidi yarkkidosona.

<sup>11</sup> Asay, “Hayssi Galiilan de7iya Naazirete katamaappe yida nabiya Yesuusa” yaagidosona.

*Yesuusi Xoossa Keethi gelis*

*(Mar 11:15-19; Luuqa 19:45-48; Yoha 2:13-22)*

<sup>12</sup> Yesuusi Xoossa Keethi gelidi, yan bayzeyssatanne shammeystata ubbaa kare goodis. Miishe laammeystata xarpheezatanne holleta bayziya oydetta shiri yeggis. <sup>13</sup> Ikka enttako, ‘Xoossaa qaalan, ‘Ta keethay Xoossaa woossiya keethi geettetana’ geetetti xaafettis. Shin hintte panggati qosettiya gonggolo oothideta” yaagis.

<sup>14</sup> Yesuusi Xoossa Keethan de7ishin qooqetinne gunddati iyaakkko yin entta pathis.

<sup>15</sup> Shin kahine halaqatinne higge asttamaareti Yesuusi oothida malaalisiyabata be7idayssasinne guutha nayti Xoossa Keethan, “Dawite na7ay, galatetto” yaagidi waasseysa si7idi hanqettidosona. <sup>16</sup> Entti Yesuusakko, “Hayssati geyssa ne si7ay?” yaagidosona.

Yesuusi, “Ee si7ays, Xoossaa qaalan, ‘Guutha nayta doonaninne dhammiya nayta doonan galata wothadasa’ geettetidi xaafettidayssa hintte nabbabibekketii?” yaagis.

<sup>17</sup> Enttana yan aggidi Bitaaniya katamaa bidi aqis.

*Goday baaddida balase mithiw*

*(Mar 11:12-14,20-24)*

<sup>18</sup> Yesuusi wontta guura katama simmidi yishe koshattis. <sup>19</sup> Oge gaxan issi balase mithi be7idi iikko bis. Shin haythafe attin hara aykkoka demmibeenna. Hessa gisho, iyo, “Hizappe nam77antho ayfe ayfoppa!” yaagis. He balase mithiya ellesada mela aggasu.

<sup>20</sup> Iya tamaareti hessa be7idi, “Ha balasiya waanada ellesa meladee?” yaagidi malaalettidosona.

<sup>21</sup> Yesuusi zaaridi, “Taani hinttew tuma odays; hinttew ammanoy de7ikkoo, qassi hintte sidhonna ixxiko balase bolla taani oothidayssa mela xalaala ootheketa, shin ‘Ha deriya shodettada abban wodhdha’ yaagikko banana. <sup>22</sup> Ammanidi hintte woossiyabaa aybibaa gidikkoka hintte ekkana” yaagis.

*Yesuusa maatay oyshettis*

*(Mar 11:27-33; Luuqa 20:1-8)*

---

<sup>21:5</sup> Zakka 9:9    \*    <sup>21:9</sup> Hosaana: Ibraysxe doonan hissa “Nuna ashsha guussu. Qassi asay Xoossaa galatanaw go7ettiya qaala.    <sup>21:9</sup> Maz 11:8:25    <sup>21:13</sup> Isa 56:7; Er 7:11    <sup>21:21</sup> Maato 17:20; 1Qoro 13:2

<sup>23</sup> Yesuusi Xoossa Keetha gelidi tamaarssishin, kahine halaqatinne Ayhude cimati iyaakkko yidi, "Neeni hayssa oothana mela new ay maati de7ii? New ha maata immiday oonee?" yaagidi oychchidosona.

<sup>24</sup> Yesuusi enttako, "Taanikka hinttene issibaa oychchays; hintte taw hessa zaarikko, taani ay maatan oothiyako hinttew odana. <sup>25</sup> Yohaannisi xammaqana mela maatay awuppe imettidee? Xoossafeeyye asappe?" yaagis.

Entti bantta giddon zorettidi, "Nuuni, 'Xoossafe' giikko, I nuna, 'Yaatin ays ammanibeekketi?' yaagana. <sup>26</sup> Nuuni, 'Asappe' giikko, asa ubbay Yohaannisa nabe oothi xeelliya gisho asaa yayyoos" yaagidosona. <sup>27</sup> Hessa gisho, "Nuuni erokko" yaagidi zaaridosona.

Ikka, "Hiza, taanikka hayssa ay maatan oothiyako hinttew odikke" yaagis.

#### *Nam77u nayta leemiso*

<sup>28</sup> "Yesuusi kaallidikka hayssada yaagis: Nam77u adde nayti de7iya issi uray de7ees. He uray bayra na7aakko bidi, 'Ta na7aw, hachchi woyniya giddo bada ootha' yaagis. <sup>29</sup> Na7ay zaaridi, 'Atto biikke' yaagis. Shin guyeppe ba wozanan qoppi ekkidi oothanab bis. <sup>30</sup> Aaway ba kaalo na7aakko bidi, ba bayra na7aakko gidayssada kiittis. Ikka, 'Ero, ta aawaw' yaagis. Shin bibeennma. <sup>31</sup> Ha nam77u naytappe ba aawas kiittidayssi awussee?" yaagis.

Enttika, "Bayra" yaagidosona.

Yesuusi enttako, "Ta hinttew tuma odays; qaraxa qanxiseyssatinne laymateysati hinttefe sinthattidi Xoossaa kawotethaa gelana. <sup>32</sup> Xammaqiya Yohaannisi suure ogiya tamaarssishe yin I geyssa ammanibeekketa. Shin qaraxa qanxiseyssatinne laymateysati ammanidosona. Hintte hari attoshin, entta be7idikka hintte nagaraappe simmidi ammanibeekketa" yaagis.

#### *Woyniya giddon oothiya goshshanchchota leemiso*

(Mar 12:1-12; Luuqa 20:9-19)

<sup>33</sup> Qassika Yesuusi hayssada yaagis; "Hara leemiso si7ite, woyne tokkida issi uray de7ees. He woyniya yuushuwa diris. Woyniya gum77iya olaaka bookkis. Woyniya naaganan shakkoka shaakkis. Hesssa guye, gadiya kothe immidi hara biitta bis. <sup>34</sup> Woyne ayfiyaa maxiya wodey gakki bana gakkiya baggaa ekkidi yaana mela ba aylleta enttako yeddis. <sup>35</sup> Kothe aawati iya aylleta oykkidi issuwa wadhdhidosona, hankuwa wodhidosona qassi attidayssa shuchchan caddidosona. <sup>36</sup> Woyne atakiltiya goday kaseyssatappe dariya hara aylleta kiittis. Kothe aawati entta bollaka hankoyssata bolla oothidayssada oothidosona. <sup>37</sup> Wurssethan I, 'Ta na7aa entti bonchchana!' yaagidi ba na7aa enttako kiittis.

<sup>38</sup> "Shin kothe aawati na7aa be7idi bantta giddon 'Gadiya laattanayssi hayssa, iya wodhidhi gadiya nuuni laattoos!' yaagidosona. <sup>39</sup> Na7aa oykkidi woyniya giddofe gaxa kissidi wodhidosona.

<sup>40</sup> "Hiza, woyne atakiltiya goday yaa wode he kothe aawata waatanee?" yaagidi oychchis.

<sup>41</sup> Entti zaaridi, "I he iita asata iita wodho wodhidhi, woyney ayfiyaa wode iya gakkiya baggaa woden woden immiya hara kothe aawatas immana" yaagidosona.

<sup>42</sup> Yesuusi zaaridi enttako, Xoossaa qaalan,

"Gimbeyssati boridi ixxida shuchchay,  
godaa xaphuwa minthi, ubbaafe aadhdiya shuchchaa gidis.

Hayssi Goday oothidabaa;

nu ayfiyas malaalisiyabaa'

geetettiidi xaaftidayssa nabbabieekketii?

<sup>43</sup> "Hessa gisho, taani hinttew odays; Xoossaa kawotethay hinttefe ekettidi lo77o ayfe ayfiyaa asatas imettana. <sup>44</sup> [Ha shuchchaa bolla kunddiya ubbay megerettana. Qassi he shuchchay iya bolla wodhdhiya uraykka gaacettana]† yaagis.

<sup>45</sup> Kahine halaqatinne Farisaaweti Yesuusi odida leemisuwan bantana odidayssa eridosona. <sup>46</sup> Entti Yesuusa oykkanaaw koyidosona, shin asay Yesuusa nabe oothidi xeelliya gisho asas yayyidosona.

## 22

#### *Yaagano xeessaa leemiso*

(Luuqa 14:15-24)

<sup>1</sup> Yesuusi asaas zaaridi hayssada yaagidi leemiso odis. <sup>2</sup> "Xoossa kawotethay ba na7aas yaagano giigisida kawuwa daanees. <sup>3</sup> He kawoy yaagano yaana mela odi wothida asata xeeganaw ba aylleta kiittis. Shin asati yaanaw koyibookkona. <sup>4</sup> Qassi hara aylleta xeegidi, xeegettida asatakko bidi, 'Taani ta sanggatanne modhdhida gatarmenthota shukkas; ubbabay giigis. Ta yaaganuwa haa yiite yaagite' yaagidi kiittis. <sup>5</sup> Shin xeegettidayssati xeessaa ixxidi, bannta oosos oosos bidosona. Issoy ba goshshaas, hankkoy ba zal77iyas bis.

<sup>6</sup> Harati qassi kawuwa aylleta oykkidi, kawushshi wadhdhidi wodhidosona.

<sup>7</sup> "Kawoy daro yilotti, ba wotaaddareta yeddihi shemppo wodhidayssata wodhisis, entta katamakka xuuggis. <sup>8</sup> Hessafe guye, ba aylletakko, 'Yaaganoy giigis, shin xeegettidayssati yaaganuwas bessiya asi gidokkona. <sup>9</sup> Hessa gisho, wogga ogeta bidi, demmida asi ubbaa yaaganuwa yaana mela xeegite' yaagis. <sup>10</sup> Aylleti ogiya bolla bidi bannta demmida asi ubbaa lo77otanne iitata ehidi yaagano shaqara gelssidi kunthidosona.

<sup>11</sup> "Shin kawoy kathaa maanaw uttida asaa be7anaw gelida wode yaagano ma70 ma77iboonna issi asi demmis. <sup>12</sup> Iyaakk, 'Laa, ne yaagano ma70 ma77onna waanada hayssa geladii' yaagis. Shin uray si77i gis.

<sup>13</sup> "Kawoy ba aylletakko, 'Ha uraa kushiyanne tohuwa qachchidi, kare dhuma kessi yeggite. Yan iyaw yeehonne achcha garccethi gidana' yaagis.

<sup>14</sup> "Hessadakka, Xoossa kawotethaa xeegettidayssati daro shin doorettidayssati guutha" yaagis.

### *Girabaa*

(Mar 12:13-17; Luuqa 20:20-26)

<sup>15</sup> Hessafe guye, Farisaaweti bidi, Yesuusa waati odan oykkaneekko zorettidosona. <sup>16</sup> Bannta tamaaretanne Heroodisa baggatapppe issota kiittidosona. Enttika, "Astta-maariyaw, ne tuma odeyssa nu eroos. Neeni asappe ase shaakkaka, asa woyganddes gada aykkoka oothaka, Xoossa ogiya tumateethan tamaarssasa. <sup>17</sup> Ane nius oda, nuuni Roome Kawuwas giira giiranaw bessi bessennee?" yaagidosona.

<sup>18</sup> Shin Yesuusi entta iita qofaa eridi, "Ha cubboto, tana ays paacetii? <sup>19</sup> Giira giiriya miishiya tana bessite" yaagis. Enttika iyaw santime ehdidosona. <sup>20</sup>I, "Ha sunthaynne malay ooddebaye?" yaagis.

<sup>21</sup> Entti, "Roome Kauwayyissa" yaagidosona.

Yaatin Yesuusi enttako, "Hiza, Kawuwas besseyssa kawuwas, Xoossas besseyssa Xoossas immite" yaagis.

<sup>22</sup> Entti hessa si7ida wode malaalettidi iya matappe aggidi bidosona.

### *Hayqoppe denddobaan*

(Mar 12:18-27; Luuqa 20:27-40)

<sup>23</sup> He gallas hayqoppe denddoy baawa yaagiya Saduqaaweti Yesuusakko yidi, yaagidi iya oyochchidosona. <sup>24</sup>"Asttamaariyaw, 'Musey, issi asi na7a yelonna hayqqiko, he hayqqidayssha ishay iya machchiw ekkidi, ba ishaas na7a yelo' yaagidi kiittis. <sup>25</sup>Nu eriya laappun ishati de7oosona. Bayray machcho ekkidi na7a yelonna hayqqis. Iya machchiw iya kaalo ishay ekkis. <sup>26</sup>Hessadakka, he maccasiw ekkida nam7anthoyka, heedzanthoyka, bidi laappunati wurana gakkaw ubbay hayqqidosona. <sup>27</sup>Ubbaafe guye he maccasiya hayqqas. <sup>28</sup>Yaatin, laappunati ubbay iyo ekkida gisho hayqoppe denddiya gallas, he maccasiya laappunatapppe awussas machcho gidanee?" yaagidosona.

<sup>29</sup> Yesuusi zaaridi, "Hintte Xoossa qaalay tamaarssiyabaa woykko iya wolqqaa eronna gisho baleeta. <sup>30</sup>Asay hayqoppe denddiya wode salon de7iya kiitanchchota mela gi-danaappe attin ekkokona gelokkona. <sup>31</sup>Qassi hayqqida asati hayqoppe denddanabaa Xoossay hinttew odidayssha nabbabibeekketi? <sup>32</sup>Xoossay, 'Taani Abrahame Xoossaa, Yisaqa Xoossaa, Yayqooba Xoossaa' yaagis. Hessa gisho, Xoossay paxa de7eyssata Xoossaafe attin hayqqidayssata Xoossa gidenna" yaagis.

<sup>33</sup>Daro asay hessa si7idi, iya timirrtiyan malaalettidosona.

### *Ubbaafe bayratiya kiitaa*

(Mar 12:28-34; Luuqa 10:25-28)

<sup>34</sup> Yesuusi Saduqaawetas gaanabaa dhayssidayssa Farisaaweti si7ida wode issife shiqidosona. <sup>35</sup>Entta giddofe issi higge asttamaarey Yesuusa paace oysho oyochchis.

<sup>36</sup>"Asttamaariyaw, higge ubbaafe aadhdheyssi awussee?" yaagidi oyochchis.

<sup>37</sup> Yesuusi zaaridi, "Ne Godaa, ne Xoossaa, ne kumetha wozanappe, ne kumetha shemppuwafe, ne kumetha qofaappe dosa. <sup>38</sup>Ubbaafe aadhdheyssinne bayra kiiay

<sup>22:13</sup> Maato 8:12; 25:30; Luuqa 13:28    <sup>22:23</sup> Ha.O 23:8    <sup>22:24</sup> Zaare 25:5    \* <sup>22:32</sup> Xoossay paxa de7eyssata

Xoossaafe attin hayqqidayssata Xoossa gidenna: Yesuusi ha bessan odey Xoossay ha hayqqida heedzatas Xoosse gidikko entti de7on de7oosona yaageyssa.    <sup>22:32</sup> Kessa 3:6    <sup>22:37</sup> Zaare 6:5

hayssa.<sup>39</sup> Nam77antho ubbaafe aadhdhiya kiitay, ase ubbaa ne huu7iya ne doseyssada dosa' yaageyssa.<sup>40</sup> Muse higgeynne nabeta timirttey ubbay ha kiitata bolla katoosona" yaagis.

*Kiristtoosabaa oychchida oysha  
(Mar 12:35-37; Luuqa 20:41-44)*

<sup>41</sup> Farisaaweti issi bolla shiiqidi de7ishin, Yesuusi enttana,<sup>42</sup> "Kiristtoosabaa hintte woyletii? I oodde na7ee?" yaagidi oychchis.

Entti, "I Kawuwa Dawite na7a" yaagidi zaardosona.

<sup>43</sup> Yesuusi enttako, "Yaatin, Dawitey Geeshsha Ayyaanan gididi waattidi Kiristtoosa, 'Goda' gidi xeegii? Dawitey gishe,

<sup>44</sup> 'Godaan Xoossay, ta Godaakkoo,<sup>†</sup>

ne morkketa ne tohoy yedhdhiyaso oothana gakkanaw,

hayssan taappe ushachcha baggan<sup>‡</sup> utta' gis.

<sup>45</sup> Hiza, Dawitey Kiristtoosa Godaa gidi xeegikko, waanidi Kiristtoosi Dawite na7a gidi?" yaagis.

<sup>46</sup> Yesuusas issi qaala zaaranaw dandda7ida asi oonikka baawa. Qassi he gallasappe doomidi hara oysha oychchanaw oonikka dandda7ibeenna.

## 23

*Higge asttamaaretanne Farisaaweta iitatethaa  
(Mar 12:38-39; Luuqa 11:43-46; 20:45-46)*

<sup>1</sup> Hessafe guye, Yesuusi shiiqida asaasinne ba tamaaretas hayssada yaagis.<sup>2</sup> "Higge asttamaaretine Farisaaweti Muse higgiya billanaw maatara de7oosona.<sup>3</sup> Hessaa gisho, entti hinttena kiittiya ubbaa oothitenne naagite. Shin entti ootheysada oothofite. Ays giikko, entti ooddeyssada oothokona.<sup>4</sup> Entti tookkanaw dandda7ettona tooho qachchidi asaa toosoosona. Shin banttau hari attoshin, he toohuwa asay tookkiya wode biradhde xeeran bochchanaw koyokkona.

<sup>5</sup> "Shin entti bantta ooso ubbaa asi be7ana mela ooothosona. Bantta som77oninne qesen qachchiya maxaafaa xiqisey de7iya kitaafe dalggisosona, bantta ma7uwa macaraakkka adussoosona."<sup>6</sup> Mokettiya bessan bonchcho bessinne Ayhude Woosa Keethatan daro lo77iya oyde dosoosona.<sup>7</sup> Asay giyan enttana bonchchon sarothanayssanne 'Asttamaariyaw' gidi xeeganayssa koyoosona.

<sup>8</sup> "Shin hintte asttamaarey issuwa xalaala gidida gishonne hintte ubbay ishata gidda gisho 'Asttamaariyaw' geetettidi xeegettofite.<sup>9</sup> Hinttew salon issi aawa xalaali de7iya gisho ha sa7an oonakka 'Aawaw' gidi xeegoppite.<sup>10</sup> Hinttew issi Goday Kiristtoosa xalaali de7iya gisho 'Godaw' geetetti xeegettofite.<sup>11</sup> Hintte giddon bayratey hintte aylle gido.<sup>12</sup> Bana gitayaa oonikka kawuyana; bana kawushshiya oonikka gitatana.

*Higge asttamaaretine Farisaaweti borettidosona  
(Mar 12:40; Luuqa 11:39-42,44,52; 20:47)*

<sup>13</sup> "Hinttenoo, cubboto, higge asttamaarettonne Farisaaweto, asa sinthan salo ka-wotethaa gorddeyssato hinttena ayye. Hinttee, hintte huu7en gelekcka qassi haratakka gelssekka.

<sup>14</sup> ["Hinttenoo cubboto, higge asttamaarettonne, Farisaaweto, am77eta keetha hintte bonqishe, asi be7o gidi woosa adusseeta. Hessa gisho, hinttena ayye. Ubbaafe aadhdhiya pirdday hinttena naagees.]<sup>†</sup>

<sup>15</sup> "Hinttenoo, cubboto, higge asttamaarettonne Farisaaweto, hintte issi uraa amman-thanaw abbaranne sa7ara yyuyeta. Shin hintte iya ammanthida wode he uraa hinttete aathidi Gaannames giigettidayssa oothiya gisho hinttena ayye.

<sup>16</sup> "Oonikka Xoossa Keethan caaqqiko aykkoyka baawa. Shin Xoossa Keethan de7iya worqqan caaqqiko, he caaqoy iya gomana giya qooqeto, hinttew qooqidi harata kaaletheyssato, hinttena ayye.<sup>17</sup> Hinttenoo, eeyato, qooqeto, worqqay aadhdhiyye? Worqqiya Xoossaas dummayaa Xoossa Keethay aadhdhii?<sup>18</sup> Qassi 'Oonikka yarshsho yarshshiya bessan caaqqiko, aykkoyka baawa. Shin oonikka iya bolla de7iya yarshshuwan caaqqiko, he caaqoy iya gomana' yaagidi tamaarsseta.<sup>19</sup> Hinttenoo,

22:39 Leewe 19:18    22:40 Luuqa 10:25-28    † 22:44 Ta Godaakkoo: Ha bessan Dawitey ta Godaa gidi xeegey Kiristtoosa.    22:44 Maz 11:01    ‡ 22:44 Ushachcha baggan: Maatanne bonchcho bessi.    22:44 Maz 11:01 \* 23:5 Som77oninne qesen qachchiya maxaafaa... ma7uwa maccara adussoosona: Hessa entti oothey Xoossaas ta imettas giya malla bessanaassa (Tay 15:37-41).    23:5 Maato 6:1; Zaare 6:8; Tay 15:38    23:11 Maato 20:26    23:12 Luuqa 14:11; 18:14    † 23:14 Issi issi beni maxaafati paydo 14 gujoosona.

qooqeto, yarshshoy aadhdhiyye? Yarshshuwa Xoossaas dummayaa bessay aadhdhi?  
<sup>20</sup>Hessa gisho, yarshsho bessan caaqqiya uray, he yarshsho bessaaninne iya bolla de7iya ubbaban caaqqeess. <sup>21</sup>Xoossa Keethan caaqqiya uray, he Xoossa Keethaninne iyan de7iya Xoossan caaqqeess. <sup>22</sup>Salon caaqqiya uray Xoossaa araataninne he araata bolla uttiya Xoossan caaqqeess.

<sup>23</sup>“Hinttenoo, cubboto, higge asttamaaretonne Farisaaweto, hinttena ayye. Hintte kaaretha sawoppe, naatiroppenne okasheppe asraata kesseta. Shin higgiyan de7iya aadhdhi koshsheyssata aggideta. Hessika suure pirdda, qadhetethinne ubbaban ammanetethi. Haratakka aggonnashin hayssata hintte oothanaw bessees. <sup>24</sup>Hinttew qooqidi hara asi kaaletheyssata, hintte ushshaafe udunxe kessidi gimale mitteeta.

<sup>25</sup>“Hinttenoo, cubboto, higge asttamaaretonne Farisaaweto, hinttena ayye. Hintte shaatiyasinne keriyas bolla bagga geeshsheeta. Shin entaw garssan bonqeynne uiuzetethi kumi utis. <sup>26</sup>Neno qooqe Farisaawiyaw, shaatiyasinne keriyas garssaa kasetada geeshsha. Hessasa guye, bolla baggaya geeshshi gidana.

<sup>27</sup>“Hinttenoo, cubboto, higge asttamaaretonne Farisaaweto, hinttena ayye. Kare bagara qalame tiyettidi lo77idi, giddon meqethinne wooqidabay kumida duufota daaneta. <sup>28</sup>Hessadakka, bolla baggara asas lo77o daaneta. Shin hintte garssan cubbotethinne iitatethi kumis.

<sup>29</sup>“Hintteno, cubboto, higge asttamaaretonne Farisaaweto, hinttena ayye. Hintte nabetas duufo keexeta, qassi xillota duufuwakka loytheeta. <sup>30</sup>Qassi hintte, ‘Niuni beni nu aawata wode de7idabaa gidiyakko, enttara issife nabeta suuthaa guussokoshin’ yaageeta. <sup>31</sup>Hessa gisho, hintte nabeta wodhida asaa nayta gideyssa hinttee hintte huu7en markkateeta. <sup>32</sup>Hiza, hintte aawati doomidayssa hintte polite.

<sup>33</sup>“Ha shooshatoo, shoosha nayto, hintte Gaanname pirddaafe waanidi attanee? <sup>34</sup>Hessa gisho, ta odehyssa si7ite; taani nabeta, cincca asatanne asttamaareta hintteko kiittana. Enttafe issota issota hintte wodhananne masqaliya bolla kaqqana. Baggata Ayhude Woosa Keethathan lisson garaafananne katamaappe katama gooddana. <sup>35</sup>Hessa gisho, xilluwaa Aabela wodhida wodiyappe doomidi, Xoossa Keethasinne yarshsho bessaafe giddon hintte wodhida Barakiya na7aa Zakkariyaasa wode gakkanaw hayqqida xillo asa ubbaa gisho hintte seerettana. <sup>36</sup>Taani hinttew tuma odays; hinttenne hintte aawati oothida balaas ha pirdda ubbay ha yeletethaa bolla gakkana.

*Yesuusi Yerusalaames yekkis  
(Luuqa 13:34-35)*

<sup>37</sup>“Yerusalaame, Yerusalaame, nabeta wodhiyare! Xoossay neekko kiittidayssata shuchchan caddiyare! Kuttoy ba nayta ba qefen haphpheyssada taani ne asaa ta qesiyan gechchanaw aappun toho koyadina! Shin tana diggadasa. <sup>38</sup>Hiza, hintte Xoossaa keethay kaysi gidana. <sup>39</sup>Taani hinttew odays; ‘Godaa sunthan yeysi anjjettidayssa’ hintte gaana gakkanaw nam77antho tana be7ekketa” yaagis.

## 24

*Yesuusi Xoossa Keethay laalettanayssa kasetidi odis  
(Mar 13:1-2; Luuqa 21:5-6)*

<sup>1</sup>Yesuusi Xoossa Keethafe keyidi bishin, iya tamaareti iyaakkko yidi, malaalettidi Xoossa Keetha gimbbyia bessidosona. <sup>2</sup>Yesuusi enttako zaaridi, “Ee! Hayssa ubbaa be7etii? Taani hinttew tumaa odays; shuchchi shuchcha bolla gimbettida mela laalettonna attenna” yaagis.

*Sinthafe hananabata  
(Mar 13:3-13; Luuqa 21:7-19)*

<sup>3</sup>Yesuusi Shamaho Deriya bolla uttidashin, iya tamaareti bantarkka iyaakkko yidi, “Hessi awude hananeekko nuus oda. Qassi ne yuussasinne wodiya wurssethaas malaatay abyee?” yaagidi oychchidosona.

<sup>4</sup>Yesuusi zaaridi, “Hinttena oonikka balethonna mela naagettite! <sup>5</sup>Ays giikko, daro asati ta sunthan, ‘Taani Kiristtoosa, Xoossay asaa ashshanaw kiittidayssa’ yaagishe yidi daro asaa balethana. <sup>6</sup>Matan de7iya ola girssaa, haahon de7iya ola wore si7anaw de7eeta. Hessa melabay hananaw bessiya gisho hirggofite. Shin wurssethay buroona. <sup>7</sup>Derey deriyya, issi kawotethay hara kawotethaara olettana. Koshaynne biittaa qaaxoy ubba bessan banana. <sup>8</sup>Hessi ubbay yelo iqethas zooke mela.

<sup>9</sup> “He wode asay hinttena waayes aathi immana, qachchananne wodhana. Ta sunthaa gisho asa ubbay hinttena ixxana. <sup>10</sup> He wode daroti ammano aggana. Bantta giddon issoy issuwa aathidi immana, issoy issuwa ixxana. <sup>11</sup> Qassi daro worddo nabeti denddidi darota balethana. <sup>12</sup> Geellatethi dariya gisho daro asaa siiqoy irxxana. <sup>13</sup> Shin wurssethi gakkanaw gencciya uray attana. <sup>14</sup> Asa ubbaas markka gidana mela Xoossaa kawotethaa Wonggelay biitta ubban odettana. Hessafe guye, wurssethay yaana.

### *Tuna bashshaa*

(Mar 13:14-23; Luuqa 21:20-24)

<sup>15</sup> “Hessa gisho, nabiya Daaneli odida bashshaa tunatethay geeshsha bessan eqqidayssa hintte be7ana. (Akeekiso: Hessi woy guusseeko nabbabeyssi akeeko!) <sup>16</sup> He wode Yihuda biittan de7eyssati deriyakko baqato. <sup>17</sup> Keetha huu7en de7iya uray ba son de7iyabaa ekkanaw soo gelonna baqato. <sup>18</sup> Gaden de7eyssi ba ma7uwa ekkanaaw guye simmofo. <sup>19</sup> He wode qantha maccasatasinne dhanthiya maccasatas daro un77a gidana. <sup>20</sup> Balggon woykko Sambbaatan hintte baqatoy gidonna mela Xoossaa woossite. <sup>21</sup> Ays giikko, sa7i medhettosappe hachchi gakkanaw hanonnabay, qassi sinthafekka ubbarakka hanonna waayey he wode hanana. <sup>22</sup> Xoossay he gallasata taybuwa guuthonnaako ase gidida oonikka attenna. Shin I ba doorida asata gisho he gallasata taybuwa guuthana.

<sup>23</sup> “He wode oonikka hinttena, ‘Hekko, Kiristtoosi hayssan’ woykko ‘Hinin de7ees’ yaagikko ammanoppite. <sup>24</sup> Ays giikko, worddo Kiristtoosatinne worddo nabeti dend-dana. Enttaw dandda7ettiko, hari attoshin Xoossay dooridayssatakka balethanaw gita malaatatanne malaalisiyabata oothana. <sup>25</sup> Akeekite, taani hinttew hayssa kasetada odas.

<sup>26</sup> “Hessa gisho, asay hintteko, ‘Hekko, Kiristtoosi bazzon de7ees’ giikko, yaa booppite. Woykko hintteko, ‘Hekko, qol77an de7ees’ giikko, enttabaa ammanoppite. <sup>27</sup> Ays giikko, wol77anthi salon wol77ammidi, dolohappe wuloha gakkanaw bentteyssada, Asa Na7aa yuussay hessada hanana.

<sup>28</sup> “Bawuti de7iyson ankktoti shiiqana.

### *Kiristtoosi nam77antho yaana*

(Mar 13:24-27; Luuqa 21:25-28)

<sup>29</sup> “He wode he waaye gallasatappé guye, sohuwara away dhumania, ageenay ba poo7uwa diggana.

Xoolinttoti saloppe wodhdhanna, gassi salon de7iya wolqqati buqettana.

<sup>30</sup> He wode Asa Na7aa yuussaa mallay saluwa bolla benttana. Sa7an de7iya asi ubbay yeekkana. Qassi Asa Na7ay, wolqqaranne gita bonchchuwara saluwa shaara giddora yishin entti be7ana. <sup>31</sup> I ba kiitanchchota gita punniya moyzera kiittana. Entti sa7aa oyddu bagga bidi, ha gaxappe ya gaxa gakkanaw de7iya iyaw doorettidayssata shiishana.

### *Goday yaana gallasaa mallata*

(Mar 13:28-31; Luuqa 21:29-33)

<sup>32</sup> “Balase mithaafe tamaarite. I aacidi hayxiya wode torchchey matattidayssa hintte ereeta. <sup>33</sup> Hessadakka, hintte ha ubbabaa be7iya wode Yesuusi matidi penggen de7eyssa erite. <sup>34</sup> Taani hinttew tuma odays; ha ubbabay polettana gakkanaw, ha yeletethay aadhhdhenna. <sup>35</sup> Saloynne sa7ay aadhhdhanna, shin ta qaalay ubbaka aadhhdhenna.

### *Goday yaana gallasaa oonikka erenna*

(Mar 13:32-37; Luuqa 17:26-30,34-36)

<sup>36</sup> “He gallasaanne he saatiya salon de7iya ta aawappe attin hari salo kiitanchchota gidin woykko Na7aa gidin oonikka erenna. <sup>37</sup> Asa Na7aa yuussay, Nohe wode hanidayssa mela gidana. <sup>38</sup> He wode dhayo haathay yaanappé sinthe Nohey markkabiyan gelida gallasa gakkanaw, asay mishenne uysishe, ekkishenne gelishe gam77is. <sup>39</sup> Bashsha haathay yidi, entta ubbaa dhayssana gakkanaw akeekibookkona. Asa Na7aa yuussayka hessada hanana.

<sup>40</sup> “He wode nam77u asati gaden oothana. Enttafe issoy ekettana, hankkoy attana. <sup>41</sup> Nam77u maccasati issife gaaccana. Enttafe issiniya ekettana hankkiya attana.

<sup>42</sup> “Hiza, hintte Goday ay gallas yaanekko hintte eronna gisho minnidhi naagite. <sup>43</sup> Shin kaysoy qammafe ay saaten yaanekko keethaaway eriyakko, ba keethay bookettonna mela

barkkidi naaganashin. <sup>44</sup> Hessadakka, Asa Na7ay hintte qopponna saaten yaana gisho hintteka giigidi de7ite.

*Itanne lo77o aylleta leemiso  
(Luuqa 12:41-48)*

<sup>45</sup> "Yaatin, ba soo asaas kathaa koshshiya wodiyen immana mela iya goday doorida ammantheysinne wozanaama aylley oonee? <sup>46</sup> I ba goday kiittidayssa oothishin iya goday yidi demmiya aylley anjettidayssa. <sup>47</sup> Taani hinttew tuma odays; goday he aylliya babaa ubbaa bolla shuumana. <sup>48</sup> Shin he aylley iita gidlikko, 'Ta goday gam77idi yaana' yaagidi ba wozanan qoppidi, <sup>49</sup> ba lagge oosanchchota wadho doomikko, mathotteyssatara miikkonne uyikko, <sup>50</sup> he aylliya goday I qopponna gallasinne I eronna saaten, <sup>51</sup> yidi iya qanxerethana. Iya qaadaa cubbotara oothana. He bessan iyaw yeehonne achche garccethi gidana.

## 25

*Tammu geela7ota leemiso*

<sup>1</sup> "He wode salo kawotethay bantta kuraaziya oykkidi, machcho ehanaw bida addiya mokkanaw keyida tammu geela7ota daanees. <sup>2</sup> Entafe ichchashati eeya, qassi ichchashati cincca. <sup>3</sup> Eeyati kuraaze oykkidosona, shin hara lambba oykkibookkona. <sup>4</sup> Shin cinccati bantta kuraaziyanne hara guzha lambba oykkidosona. <sup>5</sup> Machchiw ekkeyssi gam77in, he geela7oti banttana dhiskkoy oykkkin dhiskkidosona.

<sup>6</sup> "Giddi biluhe gidiya wode 'Hekko, machchiw eheyssi gakkis, iya mokkanaw keyite' yaagiya gita cabboy si7ettis.

<sup>7</sup> "He wode he geela7oti ubbay barkkidi, bantta kuraaziya giigisidosona. <sup>8</sup> Eeyati cincatakkko, 'Nu kuraazey to7ana haniya gisho hintte lambbaafe nuus immerkketi' yaagidosona.

<sup>9</sup> "Shin cinccati enttako zaaridi, 'Akkay, nuusinne hinttes gidiya lambbi baawa. Hessa gisho, hinttew bidi shammidi ekkite' yaagidosona. <sup>10</sup> Eeya geela7oti lambba shammanaw bin, machchiw ekkeyssi puttu gis. Giigeti uttida ichhashu geela7oti iyara issife yaagano keethaa gelidosona; kareykka gorddetti aggis.

<sup>11</sup> "Guyeppe hankko geela7oti yidi, 'Godaw, godaw, nuus dooyarkii' yaagidosona.

<sup>12</sup> "Shin I enttako zaaridi, 'Taani hinttew tuma odays; ta hinttena erikke!'

<sup>13</sup> "Hiza, Asa Na7ay yaana gallasaa woykko saatiya hintte eronna gisho barkkidi naagite.

*Heedzu oosanchchota leemiso  
(Luuqa 19:11-27)*

<sup>14</sup> "Xoossaa kawotethay ba oosanchchota xeegidi baw de7iyabaa enttaw sheedhdhidi oge baanaw keyida uraa daanees. <sup>15</sup> Enttaw huu7en huu7en entta wolqqaa mela issuwash ichhashu karxiite bira, issuwash nam77u karxiite bira qassi issuwash issi karxiite bira immidi ba ogiya bis. <sup>16</sup> Ichhashu karxiite bira ekkida aylley sohuwara bidi zal77idi, hara ichhashu karxiite bira wodhisis. <sup>17</sup> Hessadakka, qassi nam77u karxiite bira ekkida aylley hara nam77u karxiite bira wodhisis. <sup>18</sup> Shin issi karxiite bira ekkidayssi bidi, olla bookkidi, ba godaa miishiya moogis.

<sup>19</sup> "Daro wodeppe guye he aylleta goday yidi, ba miishiya enttara salla77is. <sup>20</sup> Ichhashu karxiite bira ekkida aylley yidi, hara ichhashu karxiite bira ehidi, 'Ta godaw, neeni taw ichhashu karxiite bira immadasa. Shin taani hara ichhashu karxiite bira wodhisis' yaagis. <sup>21</sup> Iya goday, 'Zambboy! Neeni lo77onne ammanthiya aylle; neeni guuthaban ammanettadasa. Taani nena darobaa bolla shuumana; haa gelada ne godaara ufaytta' yaagis.

<sup>22</sup> "Qassi nam77u karxiite bira ekkidayssi yidi, 'Ta godaw, neeni taw nam77u karxiite bira immadasa. Shin taani hara nam77u karxiite bira wodhisis' yaagis. <sup>23</sup> Iya goday, 'Zambboy! Neeni lo77onne ammanthiya aylle; neeni guuthaban ammanettadasa. Taani nena darobaa bolla shuumana; haa gelada ne godaara ufaytta' yaagis.

<sup>24</sup> "Qassi issi karxiite bira ekkidayssi yidi, 'Ta godaw, neeni zeronna bessafe cakkeyssanne dharconna bessafe maxiya asi gideyssa eradasa. <sup>25</sup> Hessadakka, neeni ta miishiya bankken wothidabaa gidiyakko, taani simmiya wode ta miishiya wodhera ekkayanassa diggadasa.

<sup>26</sup> Hessadakka, neeni ta miishiya bankken wothidabaa gidiyakko, taani simmiya wode ta miishiya wodhera ekkayanassa diggadasa. <sup>27</sup> Yaatin, neeni ta miishiya bankken wothidabaa gidiyakko, taani simmiya wode ta miishiya wodhera ekkayanassa diggadasa. <sup>28</sup> Hessadakka, neeni ta miishiya bankken wothidabaa gidiyakko, taani simmiya wode ta miishiya wodhera ekkayanassa diggadasa. <sup>29</sup> Ays giikko, de7iya ubbaas guzhettananne darana. Shin baynnayssafe hari attoshin, he iyaw de7iya

guuthiyaka ekettana. <sup>30</sup> Ha maaddonna aylliya kare dhuma kessi yeggite. Yan iyaw yeehonne achche garccethi gidana' yaagis.

*Wodiya wurssethan hanana pirdaa*

<sup>31</sup> "Asa Na7ay, kiitanchcho ubbatara, ba bonchchuwara yaa wode I ba bonchcho kawota araata bolla uttana. <sup>32</sup> Biittan de7iya asi ubbay iya sinthe shiiqana. Henthanchchoy dorssata deeshatapp shaakkkeyssada I he asaa nam77an shaakkana. <sup>33</sup> Qassi dorssata ushachcha baggara deeshata haddirssa baggara essana.

<sup>34</sup> "Hessafe guye, kawoy ushachcha baggara de7eyssatakko hayssada yaagana: 'Ta Aaway anjjidayssato, ha a yidi sa7ay medhettiya wode hinttew giigida kawotethaa laattite. <sup>35</sup> Ays giikko, taani koshattin muzideta, saamottin ushshideta, erettona imatha asi gidada bin mokkideta, <sup>36</sup> kallottin mayzideta, harggettin harggisideta, qashettin tana oychchideta' yaagana.

<sup>37</sup> "Hessafe guye, xilloti zaaridi, 'Godaw, neeni koshattin awude be7idi muzidoo? Woykko neeni saamottin awude be7idi ushshidoo? <sup>38</sup> Neeni imathe gidada yin awude be7idi mokkidoo? Woykko neeni kallottin awude mayzidoo? <sup>39</sup> Neeni harggin woykko qashettin neekko bidi nena awude oychchidoo?' yaagana. <sup>40</sup> Kawoy zaaridi, 'Taani hinttew tuma odays; hintte tana kaalliya ha ubbaafe guuxeyssas oothidayssa taw oothideta' yaagana.

<sup>41</sup> "He wode haddirssa baggara de7eyssatakko, 'Ha qanggettidayssato, ta matappe haakkite. Xalahesinne iya kiitanchchotatas giigida merinaa taman biite. <sup>42</sup> Ays giikko, koshattin tana muzibeekketa; saamottin ushshibeekketa. <sup>43</sup> Taani imathe gidada bin tana mokkibeekketa, kallottin mayzibeekketa, harggininne qashettin tana oychchibeekketa' yaagana.

<sup>44</sup> "He wode entti, 'Godaw, neeni koshattin woykko saamottin woykko imathe gidada bin woykko kallottin woykko harggin woykko qashettin be7idi nena awude maaddonna ixido?' yaagidi zaarana.

<sup>45</sup> "He wode kawoy zaaridi enttako, 'Taani hinttew tuma odays; hintte tana kaalliya ha ubbaafe guuxeyssas maaddonna ixxidayssi, tana maaddonna ixxidayssa' yaagana. <sup>46</sup> Hessa gisho, he asati merinaa pirddas qassi xilloti merinaa de7uwas baana" yaagis.

## 26

*Yesuusa bolla maqettidosona*

(Mar 14:1-2; Luuqa 22:1-2; Yoha 11:45-53)

<sup>1</sup> Yesuusi ha timirrtiya ubbaa wurssida wode ba tamaaretakko, <sup>2</sup> "Nam77u gallasappe guye, Paasika Baale bonchchiya gallas gideyssa ereeta. He gallas Asa Na7ay masqaliya bolla kaqettanaw asa kushen aadhdhi imettana" yaagis.

<sup>3</sup> He wode kahine halaqatinne cimati, Qayyaafa giya kahine halaqaa keethan shiiqidi, <sup>4</sup> asi eronna Yesuusa oykkidi, wodhanaw maqettidosona. <sup>5</sup> Shin entti, "Asay ooshshi kessonna mela gidi, Paasika bonchchiya gallas hessa oothoko" yaagidosona.

*Issi maccasiya Yesuusa shitto tiyasu*

(Mar 14:3-9; Yoha 12:1-8)

<sup>6</sup> Yesuusi Bitaaniya kataman baro harggida Simoona son de7ees. <sup>7</sup> Yesuusi imatuwa bolla de7ishin issi maccasiya albasxirose philqqaaxe kumetha daro al77o shitto ekka yada Yesuusa huu7en tigasu. <sup>8</sup> Shin Yesuusa tamaareti hessa be7idi hanqettidi, "Ha shittoy coo iiftey aybissee? <sup>9</sup> Ha shittoy al77o gaten bayzettidi, muishey manqotas imettanaw dandda7ettees" yaagidosona.

<sup>10</sup> Yesuusi entti geyyesa eridi, enttako, "Ha maccasiw ays waaysetii? Iya taw lo77obaa oothasu. <sup>11</sup> Manqoti ubba wode hinttera daana. Shin taani hinttera ubba wode de7ikke. <sup>12</sup> Iya ha shiittuwa ta bolla tigidayssi tana mooganaw giigisanaassa. <sup>13</sup> Taani hinttew tuma odays; biitta ubban ha Wonggelay sabbakettiya bessan awunkka, asay iyo hassayana mela iya oothidayssi odettana" yaagis.

*Yihudi Yesuusa aathidi immanaw giigettis*

(Mar 14:10-11; Luuqa 22:3-6)

<sup>14</sup> He wode tammanne nam77u Yesuusa tamaaretappe issov, Asqoroota Yihuda geetetteyssi kahine halaqatakko, <sup>15</sup> bidi, "Taani hinttew Yesuusa aatha immiko, hintte

taw ay immanee?” yaagidi entta oychchis. Entti zorettidi hasttamtu bira santime\*† immidosona.<sup>16</sup> Hessafe guye, Yihudi Yesuusa aathidi immanaw injjetiya wode wochchees.

*Yesuusi Paasika kahuwa ba hawaaretara mis  
(Mar 14:12-21; Luuqa 22:7-14,21-23; Yoha 13:21-30)*

<sup>17</sup> Uytha Baale bonchchiya koyro gallas, Yesuusa tamaareti iyaakko yidi, “Paasika bonchchiya gallas neeni maana kathi nuuni awun giigisino?” yaagidosona.

<sup>18</sup> Yesuusi enttako, “Kataman de7iya addiyako bidi, ‘Asttamaarey, taw wodey gakkida gisho ta tamaaretara Paasika bonchchiya gallasa ne son aathana yaagees’ yaagite” yaagis.

<sup>19</sup> Iya tamaareti Yesuusi banttanä kiittidayssada oothidi, Paasika Baale gallas maana kathaa giigisodosona.

<sup>20</sup> Sa7ay omarssiya wode Yesuusi tammanne nam77u hawaaretara kathi maanaw uttis.

<sup>21</sup> Entti miishin, Yesuusi enttako, “Taani hinttew tuma odays; hinttefe issi uray tana aathidi immana” yaagis.

<sup>22</sup> Entti daro dagammidi, huu7en huu7en, “Godaw, tuma taneshsha?” gidi iya oychchidosona.

<sup>23</sup> Yesuusi zaaridi, “Ba kushiya taara issife shaatiyan yeddeyssi I tana aathidi immana.

<sup>24</sup> Asa Na7ay, Xoossaa qaalan iyaw xaafetidayssada hayqqana. Shin Asa Na7aa aathidi immiya uraa ayye; he uray yelettonna attidaakkö iyaw lo77oshin” yaagis.

<sup>25</sup> Iya aathi immanaw de7iya Yihudi zaaridi, “Asttamaariyaw, neeni gey taneyye?” yaagis.

Yesuusi zaaridi, “Neeni ne huu7en gadasa” yaagis.

*Godaa kahuwa  
(Mar 14:22-26; Luuqa 22:15-20; 1Qoro 11:23-25)*

<sup>26</sup> Entti mishin, Yesuusi uytha ekkidi Xoossaa galatis. He uytha menthidi ba tamaaretas immidi, “He7ite, miite, hayssi ta ashuwa” yaagis.

<sup>27</sup> Xuu7aa ekkidi, Xoossaa galatis. Enttaw immidi, “Ubbay hayssafe uyite. <sup>28</sup> Hayssi daro asaa nagaray atto geetettana mela guukkiya ta suuthaa. Ha suuthay Xoossay hinttera geliya caaquwa mintheysa. <sup>29</sup> Shin taani hinttew odays; taani ta Aawa kawotethan ooratha woyne ushshaa hinttera uyana gallasa gakkanaw nam77antho ha woyne ushshaa uyikke” yaagis.

<sup>30</sup> Galata mazmure yexxidayssafe guye Shamaho Deriya bidosona.

*Yesuusi Phexiroosi kaddanayssa koyrottidi odis  
(Mar 14:27-31; Luuqa 22:31-34; Yoha 13:36-38)*

<sup>31</sup> He wode Yesuusi enttako,

“Xoossay henthanchchuwa shocana  
dorsatsatikka laalettana”

geetettidi Xoossa qaalan xaafetidayssa mela hachchi qamma hintte ubbay tana aggidi baqatana. <sup>32</sup> Shin taani hayqoppe denddidaappe guye hinttefe sinthatada Galiila baana” yaagis.

<sup>33</sup> Phexiroosi zaaridi, “Entti ubbay nena aggidi baqatikkoka, taani nena aggike” yaagis.

<sup>34</sup> Yesuusi Phexiroosakkö, “Taani new tuma odays; hachchi qamma kuttoy waas-sanaappe sinthe neeni tana heedzu toho kaddana” yaagis.

<sup>35</sup> Phexiroosi zaaridi, “Taani neera issife hayqoppe attin nena ubbaka kaddike” yaagis.

Hankko iya tamaareti ubbayka hessada gidosona.

*Yesuusi Geetesemaanen woossis  
(Mar 14:32-42; Luuqa 22:39-46)*

<sup>36</sup> Yaatidi, Yesuusi ba tamaaretara Geetesemaane giya bessaa bidi, enttako, “Taani hini bada Xoossa woossashhana, hintte hayssan uttite” yaagis. <sup>37</sup> Phexiroosanne Zabdiyoosa nayta nam77ata baara ekki bidi daro azzanonne un77etethi doomis. <sup>38</sup> Qassika enttako, “Taani hayqos gathiya un77a un77ettas. Hayssan taara gam77itenne minnidi naagite” yaagis.

<sup>39</sup> Guuthi sinthe bidi biittan gufannidi, “Ta Aawaw, dandda7etti yaba gidikko ha waaye xuu7aa taappe digga. Shin ne sheney hanoppe attin ta sheney hanoppo” yaagidi Xoossaa woossis.

<sup>40</sup> Yesuusi ba tamaaretakkö simmi yidi entti dhiskkidakshin demmis. Phexiroosakkö, “Hintte issi saatekkonne dhiskkonna taara minnanaw dandda7ibeekketii?” <sup>41</sup> Paacen

<sup>26:15</sup> Zakka 11:12 \* <sup>26:15</sup> Bira santime: Aykkoyka guzhettiboonna geeshsha bira guussu. † <sup>26:15</sup> Hasttamtu bira santime: Hasttamtu bira santimey Isra7eele biittan ayolley shamettiyanne bayzettiya gate. <sup>26:23</sup> Maz 41:9 <sup>26:28</sup>

hintte gelonna mela barkkidi naagitenne Xoossa woossite. Hinttew lo77o amoy de7ees, shin hintte daaburanchcho asi” yaagis.

<sup>42</sup> Yesuusi qassi nam77antho bidi, “Ta Aawaw, taani ha waaye xuu7appe uyonna de7ishe aadhahanaw dandda7ettonnabaa gidikko ne sheney hano” yaagidi Xoossa woossis.

<sup>43</sup> Qassika simmi yaa wode iya tamaareta ayfiyaa dhiskkoy goozin, zin77idashin demmis.

<sup>44</sup> Qassika entta aggi bidi, kase qaala zaari heedzanthe woossis. <sup>45</sup> Hessafe guye, ba tamaaretakko yidi, “Ha77i gakkanaan dhiskkeetinne shemppetii? Hekko, Asa Na7ay, nagaranchchota kushen aadhdhi imettiya saatey gakkis. <sup>46</sup> Denddidi yedhdhite, tana aathidi immeysi haysshish gakkis” yaagis.

*Yesuusi ba morkketan oykettis*

(Mar 14:43-50; Luuqa 22:47-53; Yoha 18:3-12)

<sup>47</sup> Yesuusi buroo hessa haasayishin, tammanne nam77u tamaaretappe issyo, Yihudi gakkki wodhdhis. Kahine halaqatinne deriya cimati kiitida daro asati mashshenne xam77a oykkidi iyara issife yidosona. <sup>48</sup> Yesuusa aathi immiya Yihudi he daro asaakkko, “Taani yeereyssi hintte koyeyssi iya, iya oykkite” yaagidi malla immi wothis.

<sup>49</sup> Iirakka Yesuusakko shiiqidi, “Asttamaariyaw, saro de7ay” yaagidi iya yeeris.

<sup>50</sup> Yesuusi iyakko, “Ta laggiyaw, neeni oothanabaa ootha agga”<sup>‡</sup> yaagis.

Hessafe guye, shiiqidi, Yesuusa oykkidosona. <sup>51</sup> Yesuusara de7eyssatappe issyo ba mashsha shoddidi kahine halqaay aylliya shocidi, iya haythaa qanxidi yeggis. <sup>52</sup> Shin Yesuusi, “Ne mashshaa guye shoohuwan zaara. Ays giikko, mashsha shoddiya ubbay mashshan hayqqana. <sup>53</sup> Ta, Aawa woosiyako daro mulukun taybettiya kiitanchchota yeddanaw dandda7onnabaa new daanii? <sup>54</sup> Yaatin, Xoossa qaalan hessada hananaw bessees geetettidayssi waanidi polettanae?” yaagis.

<sup>55</sup> He saatiyan, Yesuusi he shiiqida daro asaakkko, “Tana pangga oothidi oykkanaaw mashshenne xam77a oykkidi yidetii? Taani Xoossa Keethan gallas gallas tamaarssashe hintteri de7iya wode tana oykkibeekekta. <sup>56</sup> Shin hayssi ubbay hanidayssi nabeti Xoossa qaalan xaafidayssi polettana melassa” yaagis.

He wode iya tamaareti ubbay iya aggidi baqatidosona.

*Yesuusi pirdda Shanggo sinthe shiiqis*

(Mar 14:53-65; Luuqa 22:54-55,63-71; Yoha 18:13-14,19-24)

<sup>57</sup> Yesuusa oykkidayssati kahine halaqaa Qayyaafakkoo iya efidosona. Yan higge astta-maaretinne biutta cimati shiiqidi de7oosona. <sup>58</sup> Shin Phexiroosi kahine halaqaa zabbaa gakkanaaw haahon iya kaallis. Iya wurssethay shaakettana gakkanaaw zabbaa gelidi naageyssatara uttis.

<sup>59</sup> Kahine halaqatinne shiiqida asa ubbay Yesuusa wodhanaw iya bolla worddo markka koyidosona. <sup>60</sup> Daroti yidi iya bolla worddo markka markkattidosona, shin aykkoka demmibookkona. Guyeppe nam77u asati yidi, <sup>61</sup> “Ha uray, ‘Taani Xoossa Keetha laallada heedzu gallasan zaara keexanaw dandda7ays’ yaagis” yaagidosona.

<sup>62</sup> Kähineta halaqay denddi eqqidi Yesuusakko, “Hayssati nena mootiya mootowas neeni zaariyabay baawe?” yaagis. <sup>63</sup> Shin Yesuusi si77i gis. Qassika kahine halaqay, “Taani nena de7o Xoossa sunthan oykkays; neeni Xoossa Na7aa Kiristtoosa gidikko nuus oda” yaagis.

<sup>64</sup> Yesuusi zaaridi, “Neeni he huu7enkka gadasa. Shin taani hinttew odays; hizappe guye, Asa Na7ay wolqqaama Xoossa ushachcha baggan uttidashin, qassi salo shaarara yishin hintte be7ana” yaagis.

<sup>65</sup> He wode kahine halaqay daro yilotidi ba ma7uwa peedhidi, “Hayssa be7ite Xoossa cayis! Nuna hara markka ay koshshii? I ha77i cayidayssa hintte si7ideta. <sup>66</sup> Hintte qofay aybee?” yaagis.

Enttika, “Iyaw haygo bessees” yaagidi zaaridosona.

<sup>67</sup> Yaatin, entti iya som77on cuttidi dechchidosona. Harati iya baqqidi, <sup>68</sup> “Kiristtoosaa! Nena dechchiday oonee? Ane nuus oda” yaagidosona.

*Phexiroosi Yesuusa kaddis*

(Mar 14:66-72; Luuqa 22:56-62; Yoha 18:15-18,25-27)

<sup>69</sup> Phexiroosi zabban uttidashin, issi aylliya iyaakko yada, “Neenikka Galiila Yesuusara isife de7aasa” yaagasuu.

<sup>70</sup> Shin I entta ubbaa sinthan he aylleko, “Neeni giyabay aybeekko taani erikke” yaagidi kaddis.

<sup>‡</sup> **26:50** Ta laggiyaw, neeni oothanabaa ootha agga: woykko hara birshethay ta laggiyaw, ne hayssan ay oothay?

<sup>71</sup> Qassi bidi dirssaa penggeko gakkishin hara aylliya iya be7ada, yan de7iya asaakkoo, "Ha uray Naazirete Yesuusara de7ees" yaagasu.

<sup>72</sup> Phexiroosi nam77antho caaqqidi, "Taani he uraa erikke!" yaagis.

<sup>73</sup> Guuthu gam77ishin, yan eqqida asati Phexiroosakko yidi, "Nekka tuma enttara issife de7aasa; neeni ne haasayan erettasa" yaagidosona.

<sup>74</sup> Hessafe guye, Phexiroosi, "Taani he uraa erikkel!" yaagidi, bana qanggethinne caaquo doomis.

He wode iirakka kuttoy waassi aggis. <sup>75</sup> Yesuusi iyakko, "Neeni kuttoy waassanaappe sinthe tana heedzu toho kaddana" gidayssa Phexiroosi akekidi, kare keyidi iita yeeho yeekkis.

## 27

### *Yihudi bana sullis*

(Mar 15:1; Luuqa 23:1-3; Yoha 18:28-32)

<sup>1</sup> Wontta guura kahine halaqatinne biitta cimati ubbay Yesuusa wodhisanaaw maqettidosona. <sup>2</sup> Entti Yesuusa qachchi efidi deriya haariya Philaaxoosas aathidi immidosona.

<sup>3</sup> He wode Yesuusa oythida Yihudi, Philaaxoosi Yesuusa bola pirdidaysa be7idi, qiriottidi, he hastamu biraas sanctimiya kahine halaqatasinne deriya cimatas guye zaaris.

<sup>4</sup> "Taani xillo asi hayqos aatha immada nagara oothas" yaagis.

Shin entti, "Hessi nu meto gidenna ne meto" yaagidosona.

<sup>5</sup> Yihudi miishiya Xoossaa Keethan yeggi aggidi entta matappe bidi, sulleti hayqqis.

<sup>6</sup> Kahine halaqati miishiya ekkidi, "Ha miishey suutha miishe gidiya gisho nuuni Xoossa Keethaa miishiyyara gatheyyssi woga gidenna" yaagidosona. <sup>7</sup> Hessafe guye, issife zorettidi, bete asi mooganaw mana biitta shammidosona. <sup>8</sup> Hessa gisho, he gadey hachchi gakkanaw suutha biitta geetetti xeegettees.

<sup>9</sup> Nabiya Ermmyasi, "Isra7eеле asay iyaw qanxanaw gammattida hasttam u bira sanctime ekkidosona. <sup>10</sup> Goday tana kiittidayssada mana biitta shammanaw immidosona" gidayssi he wode polettis.

### *Yesuusi Philaaxoosa sinthan*

(Mar 15:2-5; Luuqa 23:3-5; Yoha 18:33-38)

<sup>11</sup> Yesuusi deriya haariya Philaaxoosa sinthe shiiqin, Philaaxoosi iyaakkoo, "Neeni Ay-hude kawo?" yaagidi oychchis.

Yesuusi zaaridi, "Ne gadasa" yaagis.

<sup>12</sup> Kahine halaqatinne biitta cimati iya mootiya wode enttaw aybi zaarokka im-mibeenna.

<sup>13</sup> He wode Philaaxoosi Yesuusakko, "Hayssati nena mootiya mootuwa ubbaa si7ikkii?" yaagis.

<sup>14</sup> Yesuusi hari attoshin, issi qaalakka zaaronna ixxin, deriya haareyssi daro malaalettis.

### *Yesuusa bolla hayqo pirddettis*

(Mar 15:6-15; Luuqa 23:13-25; Yoha 18:39-40; 19:1-16)

<sup>15</sup> Deriya haareyssi laythan laythan Paasika Baale bonchchiya gallasan, asay koyaa issi asi qashoppe birshshiya wogi de7ees. <sup>16</sup> He wode issi Barbaana Yesuusa giya daro erettida iita asi qasho keethan de7ees. <sup>17</sup> Hessa gisho, daro asay shiiqidi de7ishin Philaaxoosi, "Taani hinttew Barbaana Yesuusa birshshoyye, woykko Yesuusa giya Kiristtoosa birshsho?" yaagidi asaa oychchis. <sup>18</sup> I hessa giday entti qanaattidi Yesuusa oythidayssa eriya gishossa.

<sup>19</sup> Philaaxoosi pirdda keethan uttidashin, iya machchiya, "Taani hachchi qamma amuhon iyabaa daro waayettashe aqida gisho he xillo uraa bolla aybibaaakka oothofa" yaagada kiittasuu.

<sup>20</sup> Shin kahine halaqatinne deriya cimati Philaaxoosi Barbaana birshshidi, Yesuusa wodhana mela, asay iya woossana mela, asaa cimmidosona.

<sup>21</sup> Philaaxoosi zaaridi enttako, "Taani entta nam77aafe hinttew oona billana mela koyeeti?" yaagidi oychchis.

Entti, "Barbaana billana mela koyoos" yaagidosona.

<sup>22</sup> Philaaxoosi, "Yaatin, Yesuusa giya Kiristtoosa waato?" yaagidi entta oychchis.

Ubbay zaaridi, "Masqaliya bolla iya kaqqqa" yaagidosona.

<sup>23</sup> Philaaxoosi asaakkoo, "Ays? I ay iitabaa oothidee?" yaagidi oychchis.

Shin asay kaseyssafe aathidi, "Masqaliya bolla iya kaqqqa" gidi waassidosona.

<sup>24</sup> Ooshshi denthethofe hara aybibaakkha oothanaw dandda7ettonayssa Philaaxoosi be7idi, haathe ekkidi, "Ha uraa hayquwan taani de7ikke. Hessa oothey hinttena" yaagidi asaa sinthan ba kushiya meecettis.

<sup>25</sup> Asa ubbay zaaridi, "Iya suuthaa gomey nunanne nu nayta gakko" yaagidosona.

<sup>26</sup> Yaatin, Philaaxoosi Barbbaana enttaw billidi, Yesuusa lisson garaafidi, masqaliya bolla kagettidi hayqqana mela enttaw aathidi immis.

## *Wotaaddareti Yesuusa gelqisidosona*

(Mar 15:16-20; Yohg 19:2-3)

<sup>27</sup> Hessafe guye, Philaaxoosa wotaaddareti Yesuusa deriya haareyssa soo ekki efin, wotaaddareti ubbay iya yuushuwan eqqidosona. <sup>28</sup> Iya afilaa qaari ekkidi zo7o afila\* mayzidosona. <sup>29</sup> Qassi aguntha kalachcha giigisidi, iya huu7en wothidosona. Iya ushachcha kushiyan mayre xam77a oythidi, iya sinthan gulbatidi, “Ayhude kawaw, mukulu laythi kawota!” yaagidi, iya bolla qelqisidosona. <sup>30</sup> Iya bolla cuttidosona. He mayre xam77aa ekkidi, iya huu7en shocidosona. <sup>31</sup> Entti iya bolla qelqisidayssafe guye zo7o afilaa iyappe qaari ekkidi, iya afilaa iya mayzidosona. Masqaliya bolla iya kaqqanaw ekki efidosona.

Yesuusa kagetethaa

(Mar 15:21-32; Luuqa 23:25-43; Yohq 19:17-27)

<sup>32</sup> Entti kare keyidi, issi Simoona giya Qereena biitta asi demmidi, Yesuusa masqaliya wolqqan toossidosona. <sup>33</sup> Golggotta giya bessi gakkidosona. "Golggotta" guussay "Guugge bessi" guussa. <sup>34</sup> Hessian entti cikiye walakettida woyne ushshaa uyo gidi iyaw immidosuna. Shin I hessa ganxi ekkidi, uyonna ixxis.

<sup>35</sup> Entti masqaliya bolla iya kaqqidaysafe guye iya afilaa shaakkidi, saama yeggidi ekkidosona. <sup>36</sup> Hessafe guye, yan uttidi iya naagidosona. <sup>37</sup> Qassi, "Hayssi Ayhude Kauwua Yesuuusa" yaagiya mooto xuufiya iya huu7e son wothidosona. <sup>38</sup> Yesusara he wode nam77u panggata issuu ipappe ushachcha baggan, hankkuwa ipappe haddirissa baggara, masqaliya bolla kaqqidosona.

<sup>39</sup> Ogiyara aadhdhiya asay Yesuusa boridi, iya bolla cuttishe,<sup>40</sup> "Xoossa Keethaa laal-lada heedzu gallasa giddon keekeyssو, nena ashsha. Neeni Xoossaa Na7a gidikko, ane masqaliya bollafe wodhdha" yaagidosona.

<sup>41</sup> Hessadakka, kahine halaqati, higge asttamaaretinne biitta cimati issife Yesuusa bolla qelqisidosona. Hayssada yaagidosona: <sup>42</sup> "Harata ashshis, shin bana ashshanaw dandda 7ibeenna. I Isra7elee kawo gidikko, ane masqaliya bollafe ha77i wodho, nukka iya ammanana. <sup>43</sup> Xoossan I ammanettes, Xoossay iya ashshanaw koykko ane ashsho. Ays giikko, I bana, "Taani Xoossa Na7a' gees" vaagidosona.

44 Qassi hari attoshin, iyara masqaliya bolla kaqettida panggatika hessada gidi iya bolla gelqisidosona.

### *Yesuusa havaguwa*

(Mar 15:33-41; Luuqa 23:44-49; Yoha 19:28-30)

<sup>45</sup> Usuppun saateppe bidi, uddufun saate gakkanaan biitta ubbay dhumi. <sup>46</sup> Uddufun saate gidiya wode Yesuusi, "Elohee, Elohee, lama sabaqitani?" gidi gitaa waaso waassis. "Elohee, Elohee, lama sabaqitani?" geyssa birshethay "Ta Xoossaw, ta Xoossaw, tana ays aggadi?" guussu.

<sup>47</sup> Hessan eqqida asaappe issoti issoti hessa si7idi, "Ha uray Eliyaasa xeegees" yaagidosona. <sup>48</sup> Iira enttafe issoy woxxi bidi, ispponjje ekkidi, caala woyne ushshaa kunthis. Hessa mayre xam77a xeeran wothidi ushshanaw iya doonakkoo shiishis. <sup>49</sup> Shin han-kkoti, "Naaga, Eliyaasi iya ashshanaw yaanekko ane be7eoos" yaagidosona. <sup>50</sup> Yesuuu nam77antho gita waaso waassidi, hayqqi aggis.

<sup>51</sup> He saaten Xoossa Keethan kagettida magaraajjoy qommofe duge gakkanaw nam77u keyidi, peedheti wodhdhis. Biittay qaaxxis, zaallayka phalqqtettis. <sup>52</sup> Duufoti dooyettin Xoossaa asatappe daroti hayqoppe denddidosona. <sup>53</sup> Entti duufoppe keyidi, Yesuusi hayqoppe denddidayssafe guye geeshsha katamaa bidosona; yan entti daro asaas bent-tidosona.

<sup>54</sup> Mato halaqaynne iyara Yesuusa naagiya wotaaddareti biittay qaaxxidayssanne hes-san hanidhaa he7ida wode daro yaywidii “Tuma hayssi Xoosaa Na7aa” yaagidosona.

**27:24** Zaare 21:6 \* **27:28** zo7o afila: Beni wode kawoti bollara ma77iya afila. **27:34** Maz 69:21 **27:35** Maz  
22:18 **27:39** Maz 22:7; 109:25 **27:40** Maato 26:61; Yoha 2:19 **27:43** Maz 22:8 **27:46** Maz 22:1 **27:48**  
Maz 69:21 **27:51** Kessa 26:31

<sup>55</sup> Hessian daro maccasati, Galiilappe doomidi Yesuusa haggaaazishe kaallidayssati haahon eqqidi xeellosona. <sup>56</sup> Entta giddon Magdela Mayraama,<sup>†</sup> Yayqoobanne Yoosefa aayyaa Mayraamanne Zabdiyoosa machchiya de7oosona.

*Yesuusa moogetethaa*

(Mar 15:42-47; Luuqa 23:50-56; Yoha 19:38-42)

<sup>57</sup> Sa7ay omarssiya wode Yoosefa giya issi dure uray, Armmatiyasa katamaappe yis. I ba huu7enkka Yesuusa kaalliya asi. <sup>58</sup> Yoosefi Philaaxoosakko bidi, Yesuusa ahaa ekkanaaw woossis. Philaaxoosi ahay Yoosefas imettana mela kiittis. <sup>59</sup> Yesuusa ahaa ekkidi, geeshsha moogo afilan xaxis. <sup>60</sup> Baw moogettanaw shuchchafe woocida ooratha gonggolon iya ahaa wothis. Qassi he gonggoluwa doonan gitu shuchchaa gond dorssi wothidi aggi bis. <sup>61</sup> Magdela Mayraamanne hankko Mayraama he gonggoluwakko simmidi uttidosona.

<sup>62</sup> Wontetie Sambbaata gallas, kahine halaqatinne Farisaaweti Philaaxoosakko yidi, hayssada yaagidosona: <sup>63</sup> “Godaw, ha worddanchchoy paxa de7ishe, ‘Taani heedzu gallas-appe guye hayqoppe denddanna’ yaagidayssi nuus hassayettis. <sup>64</sup> Hessa gisho, I moogettida gonggoluwa heedzu gallas gakkanaaw, minthi naagana mela kiittarkki. Hessi hanonna ixxiko, iya tamaareti bidi iya ahaa kaysi dhayssi, ‘Hayqoppe denddis’ yaagidi asaas odikko nam77antho balesoy koyroyssafe ubba haa iitana” yaagidosona.

<sup>65</sup> Philaaxoosi enttako, “Hinttew naageyssati de7oosona; bidi hinttew dandda7ettida mela naagisite” yaagis.

<sup>66</sup> Hessa gisho, entti bidi duufoy boshettonna mela shuchchaa bolla maatame wothidi wotaaddaretan naagisidosona.

## 28

*Yesuusa hayqoppe dendduwu*

(Mar 16:1-10; Luuqa 24:1-12; Yoha 20:1-10)

<sup>1</sup> Sambbaati aadhdhin Wogga wode wontta guura, Magdela Mayraamanne hankko Mayraama Yesuusi moogettida gonggoluwa be7anaw bidosona. <sup>2</sup> Qopponna wolqqaama biitta qaaxoy hanis. Godaa kiitanchchoy saloppe wodhdhidi duufuwa doonan de7iya shuchchaa gond dorssi iya bolla uttis. <sup>3</sup> Iya malay wol77anthi daanees. Iya ma7oykka shachchada boothi. <sup>4</sup> Naageyssati kiitanchchuwa be7idi, yashshan kokkoridi, hayqqida asada hanidosona.

<sup>5</sup> Kiitanchchoy maccasatakko, “Hintte masqaliya bolla kagettida Yesuusa koyeyssa taani eriya gisho yayyofite. <sup>6</sup> I kase odidayssa mela hayqoppe denddis; hayssan deenna. Haa yidi iya zin77isida bessaa be7ite. <sup>7</sup> Hintte ha77i ellessi bidi, iya tamaareta, ‘Yesuusi hayqoppe denddis. Qassi I hinttfe sinthattidi Galila baana; hintte iya yan be7ana’ yaagidi odite. Taani hinttew hayssa odanaw yas” yaagis.

<sup>8</sup> Entti yayyishenne daro ufayttishe, duufuwa matappe ellessidi bidi, iya tamaareta odanaw woxxidosona.

<sup>9</sup> Qopponna Yesuusi enttara gahettidi enttako, “Saroy hinttew gido” yaagis. Entti iyaakkoo shiiqidi, iya tohuu oykkidi iyaw goynnidosona. <sup>10</sup> He wode Yesuusi enttako, “Yayyofite; bidi ta tamaareti Galila baana mela enttaw odite. Entti yan tana be7ana” yaagis.

<sup>11</sup> He maccasati bishin, duufuwa naagiya wotaaddaretappe baggati katamaa bidi, hanidabaa ubbaa kahine halaqatas odidosona. <sup>12</sup> Kahine halaqatinne cimati shiiqidi zorettidi, wotaaddaretas daro miishe immidi, <sup>13</sup> “Nuuni dhiskidashin iya tamaareti qamma yidi, iya ahaa kaysidosona” yaagite. <sup>14</sup> Ha odaa deriya haareyssi si7ikkoo, hessi hintte bala gidonnayssaa nuuni iya odi ammanthana. Hinttene aybikka hirrgisoppo” yaagidosona.

<sup>15</sup> Wotaaddareti miishiya ekkidi, kiitettidayssada oothidosona. Ha oday Ayhude matan hachchi gakkanaw odettishe de7ees.

*Yesuusi ba tamaaretas qonccis*

(Mar 16:14-18; Luuqa 24:36-49; Yoha 20:19-23; Ha.O 1:6-8; 1Qoro 15:3-8)

<sup>16</sup> Tammanne issi iya tamaareti Yesuusi banttana biite gida Galilaa Deriya bolla bidosona. <sup>17</sup> Yan entti iya be7ida wode iyaw goynnidosona, shin enttafe issoti issoti sidhidodosona.

<sup>18</sup> Yesuusi enttako shiiqidi, “Saloninne sa7an maati ubbay taw imettis. <sup>19</sup> Hiza, hintte ubba bessi bidi, Aawa, Na7aa, Geeshsha Ayyaana sunthan ase ubbaa xammaqidi tana kaalleyssata oothite. <sup>20</sup> Taani hinttene kiittidaba ubbaa entti naagana mela entta tamaarssite. Taani wodiya wurssethaa gakkanaw ubba wode hinttera de7ays” yaagis.

## Marqqaosi Xaafida Yesuusa Kiristtoosa Wonggelaa Gaatha Qofaa

Marqqaosa Wonggelay, "Hayssi Xoossaa na7aa Yesuus Kiristtoosa Wonggelaa doomethaa" gishe koyro doomes. Ha Wonggelan Yesuusi ooso asinne maata aawa gididi shiiqis. Iya maatay iya timirttiyan, tuna ayyaanaa bolla de7iya wolqqaaninne asaa nagaraappe maareyssan qonccis. Yesuusi, "Taani, asaa nagara aylletethaafe kessanaw ta de7uwa aathada immanaw yida Asa Na7aa" yaagidi ba doonan haasayis.

Marqqaosi Yesuusa taarikiya suure ogeninne wolqqi kumida ogen odis. Marqqaosi Yesuusa qaalanne timirttiya gidonnashin I oothida malaalisyia oosota bayrayidi oodees. Marqqaosi Xammaqiya Yohaannisa taarikiya, Yesuusa xinqqatiyanne iya paacetethaa qanthan odi simmidi, Yesuusa timirttiyanne iya pasuwa daalggisidi oodees. Aqi aqi bishin Yesuusa tamaareti Yesuusa loythidi eri eri bidosona, shin Yesuusa ixxeysatti aathidi ixxishe ixxishe bidosona. Wursetha shemppoti Yesuusa de7or wursetha saaminttan pollettida oosotabaa odoosona. Hessatikka iya kaqetethaanne iya dendduwabaa odoosona.

### **Marqqaosa Wonggelaa ayfe qofata**

Wonggelaa doomethaa 1:1-13

Yesuusi Galilan ba oosuwa oykkidayssa 1:14-9:5

Yesuusi Yerusalamen oothida oosuwa 10:1-52

Wursetha saaminta Yerusalame heeran 11:1-15:47

Yesuusa hayqoppe dendduwa 16:1-8

Hayqoppe denddida Godaa qoncethaanne salo kessaa 16:9-20

*Xammaqiya Yohaannisi oge giigisees*

*(Maato 3:1-12; Luuqa 3:1-18; Yoha 1:19-28)*

<sup>1</sup> Hayssi Xoossaa Na7aa Yesuus Kiristtoosa Wonggelaa doomethaa. <sup>2</sup> Nabiya Isayaasi xaafida maxxaafan Xoossay,

"Hekko, taani ta kaitanchchuwa  
neeppe sinthe yeddana.  
I ne ogiya giigisana.

<sup>3</sup> Issoy bazzo gidon ba qaala dhoqqu oothidi,  
'Godaa ogiya giigisite;

I hamuttana horogaa  
iyaw suurisite gis'  
yaagees.

<sup>4</sup> Xammaqiya Yohaannisi asaa xammaqishe, "Hintte nagaraappe simmidi xammaqetite; Xoossay hintte nagaraa atto gaana" yaagidi qaala odishe bazzo biittafe yis. <sup>5</sup> Yihuda biittan de7iya asay ubbaynne Yerusalame katamaa asa ubbay Yohaannisakko yoonsona. Bantta nagara paaxin, Yohaannisi entta Yorddaanose Shaafan xammaqeess.

<sup>6</sup> Yohaannisi gimale ikiseppe dadettida afila ma77ees. Ba xeessan dafo danccees; qassi booleanne degera eessi mees. <sup>7</sup> Yohaannisi qaala odishe, "Taappe guyera daro minneyssi yees. Hari attoshin, taani iya caammaa wodoruwa hokkada billanaw bessike. <sup>8</sup> Taani hinttena haathan xammaqays, shin I hinttena Geeshsha Ayyaanen xammaqana" yaagis.

*Yesuusa paacetethaa*

*(Maato 3:13-17; 4:1-11; Luuqa 3:21-22; 4:1-13)*

<sup>9</sup> Yesuusi he wode Galila biittan de7iya Naazirete katamaappe yin, Yohaannisi Yorddaanose Shaafan iya xammaqis. <sup>10</sup> Yesuusi haathaafe keyaa wode saloy dooyettin, Geeshsha Ayyaanay ba bolla holeda wodhdhishin be7is. <sup>11</sup> Qassi saloppe, "Taani dosiya ta na7ay nena; ta nenan ufayttays" yaagiya qaalay yis.

<sup>12</sup> Iira Geeshsha Ayyaanay Yesuusa bazzo biutta efis. <sup>13</sup> Yesuusi bazzo biittan Xalahen paacettishe oytamu gallas gam77is. Do7atara de7is, shin kiitanchchoti yidi iya maaddidosa.

*Yesuusi molo oykkiya oyddy asata xeegis*

*(Maato 4:12-22; Luuqa 4:14-15; 5:1-11)*

<sup>14</sup> Yohaannisi qashettidaappe guye Yesuusi Xoossaa kawotethaa Wonggelaa odishe Galiila biittaa bis. <sup>15</sup> Yan, "Wodey gakkis; Xoossaa kawotethay matattis. Hintte nagaraappe simmidi, Wonggelan ammanite" yaagis.

<sup>16</sup> Yesuusi Galila Abbaa matara aadhhdhishe, molo oykkiya, Simoonanne iya ishaa Inddiriyasa, bantta gitiya abban yeggeyssata be7is. <sup>17</sup> Enttako, "Tana kaallite; taani hinttena ase oythu tamaarssana" yaagis. <sup>18</sup> Entti sohuwara bantta gitiya yeggi aggidi Yesuusa kaallidosona.

<sup>19</sup> Yesuusi guuthi sinthe bidi, nam77u ishata Zabdiyoosa nayta, Yayqoobanne Yohaannisa wogoluwa giddon bantta gitiya giigiseyssata be7is. <sup>20</sup> I entta be7ida mela xeegis. Entti bantta aawa Zabdiyoosa, iya oosanchchotara wogoluwa giddon yeggi aggidi Yesuusa kaallidi bidosona.

*Tuna ayyaanay oykkida uray paxis  
(Luuqa 4:31-37)*

<sup>21</sup> Entti Qifirnaahomee katamaa gelidosona. Sambbaati gelida mela Yesuusi ellesidi Ayhude Woosa Keethi gelidi tamaarssso oykkis. <sup>22</sup> Maataara de7iya asada tamaarssesippe attin higge asttamaaretatho tamaarssonna gisho asay iya timirttian malaalettidosona.

<sup>23</sup> He wode tuna ayyaanay oykkida issi uray Ayhude Woosa Keethi gelidi ba qaala dhoqqu oothidi, <sup>24</sup> "Naazirete Yesuusa, neeni nuuppe ay koyay? Nuna dhayssanaw yadi? Neeni ooneekko ta erays; neeni Xoossaa Geeshshaa gidikkii?" yaagis.

<sup>25</sup> Yesuusi he tuna ayyaanaa, "Hayza, ha addiyafe keya" gidi kiittis.

<sup>26</sup> Tuna ayyaanay uraa daferethidi, waassidi iyappe keyis. <sup>27</sup> Asay ubbay malaalettidi, "Hayssi aybee? Ha uray ba maataan hari attoshin tuna ayyaanatakka kiittees. Entti iyaw kitettosona; hayssi aybi ooratha timirtte?" gidi, bantta giddon issoy issuwa oychchidosona.

<sup>28</sup> Yesuusa sunthay ellesidi Galiila biittan de7iya heera ubban keyis.

*Yesuusi daro hargganchchota pathis  
(Maato 8:14-17; Luuqa 4:38-41)*

<sup>29</sup> Yesuusi Ayhude Woosa Keethafe keyidi, Yayqoobaranne Yohaannisara Simoona soonne Inddiriyasa soo bis. <sup>30</sup> Simoona machche aayyaa qoxo misha harggada zin77idaaro Yesuusi yaa gakkiya wode iyaw odidosona. <sup>31</sup> I iikko shiiqidi, I kushiya oykkidi, iyo denthi essis. Qoxoynne mishay aggin iya entta mokkasu.

<sup>32</sup> Harggida asa ubbaanne tuna ayyaanati oykkida asa ubbaa omarssi away wullidaappe guye iyaakkoo ehidosona. <sup>33</sup> Kataman de7iya asa ubbay he keetha kare shiiqidosona.

<sup>34</sup> Yesuusi dumma dumma harggen oykettida daro asaa pathidi, daro tuna ayyaanata kessis. I ooneekko tuna ayyaanati erida gisho entta odisonna diggis.

*Yesuusi Galilaa tamaarssis  
(Luuqa 4:42-44)*

<sup>35</sup> Yesuusi wontta guura denddidi, asi baynna bessi bidi, yan Xoossaa woossis. <sup>36</sup> Simooninne iyara de7eyssati iya koyishe bidosona. <sup>37</sup> Entti iya demmidi, "Asay ubbay nena koyees" yaagidosona.

<sup>38</sup> Yesuusi qassi entta, "He heeran de7iya hara katamata yedhdhite. Taani yiday Wonggelaa odanaw gidiya gisho yankka qaala odanaw bessees" yaagis. <sup>39</sup> Ayhude Woosa Keethatan qaala odishenne tuna ayyaanata kessishe, Galiila biitta ubban yuuvis.

*Yesuusi baro hargganchchuwa pathis  
(Maato 8:1-4; Luuqa 5:12-17)*

<sup>40</sup> Baroy oykkida issi uray Yesuusakkoo yidi, iya sinthan gulbbatidi, "Neeni koykko tana geeshshanaw dandda7aasa" yaagidi woossis.

<sup>41</sup> Yesuusi iyaw qadhetidi, ba kushiya yeddidi iya bochchidi, "Taani koyays, geeya" yaagis. <sup>42</sup> Sohuwara baroy uraa yeddin uray paxis. <sup>43</sup> Yesuusi uraa minthi naagisidi kessi yeddis. <sup>44</sup> Yesuusi iya, "Nena era, hayssa ooddeskka odoppa. Shin bada ne asatethaa kahine bessa. Neeni ha77i geeshshi gididayssa asaa erisanaw, Musey kiittida yarshshuwa yarshsha" yaagis.

<sup>45</sup> Shin uray bidi, guta ubban asa ubbaas odis. Hessa gisho, Yesuusi qoncce keyidi, katama gelanaw dandda7ibeenna. Shin asi baynnason gaxan de7is; qassi asay ubba bessafe iyaakkoo yoosona.

## 2

*Yesuusi gundda uraa pathis  
(Maato 9:1-8; Luuqa 5:17-26)*

<sup>1</sup> Guutha gallasappe guye Yesuusi Qifirnahoomme simmidi, son de7ees giya oday si7ettis. <sup>2</sup> Asaa keethay ekkonna ixxin, hari attoshin kareykka xuummana gakkanaw daro asay shiiqin, Yesuusi qaala tamaarssis. <sup>3</sup> Oyddu asati issi Gundda uraa tookkidi iyaakkko ehidosona. <sup>4</sup> Asay darida gisho uraa Yesuusakkko shiishanaw enttaw dandda7ettona ixxin, Yesuusi de7iya ginaara keetha qaaridi, kaara qawuxidi uraa I zin77ida algara duge yeddi Yesuusa sinthan wodhisodosona. <sup>5</sup> Yesuusi entta ammanuwa be7idi, he Gundda uraa, “Ta na7aw, ne nagaray atto geetettis” yaagis.

<sup>6</sup> Higge astamaatapape he bessan uttida issoti issoti bantta wozanan, <sup>7</sup> “La ha uray hayssa mela iitabaa Xoossa bolla ays odeti? Xoossa xalaalappe attin hari ooni nagara atto gaanaw dandda7ii?” gidi qoppidadosona.

<sup>8</sup> Entti bantta wozanan hessada qoppidayssa Yesuusi sohuwara ba ayyaan eridi, enttako, “Hintee hintte wozanan ays hessada qoppeeti? <sup>9</sup> Gundda uraa, ‘Ne nagaray atto geetettis’ geyssi mateyye? Woykko, ‘Dendda eqqada ne algaa tookkada ba’ geyssi matee? <sup>10</sup> Shin taw, Asa Na7aas, sa7a bolla nagara atto gaanaw maati de7eyssa hintte erana mela” gidi he Gundda uraakkko, <sup>11</sup> “Nena gays, dendda eqqada ne algaa tookkada ne soo ba” yaagis.

<sup>12</sup> Uray ellesi denddi eqqidi, ba algaa tookkidi asa ubbay be7ishin bis. Asay ubbay malaalettidi, “Nuuni hayssa mela malaalisiyabaa be7i erokko” yaagidi Xoossa galatisosona.

*Yesuusa Leewe xeegis  
(Maato 9:9-13; Luuqa 5:27-32)*

<sup>13</sup> Yesuusi qassi Galiila Abbaa doona simmi bidi, baakko yida asa ubbaa tamaarssis. <sup>14</sup> Yaara aadhdishe, Ilfiyoosa na7aa Leewe geetetteyssi qaraxa qanxisiya bessan uttidayssa be7idi, “Tana kaalla” yaagis. Leewey denddi eqqidi iya kaallis.

<sup>15</sup> Yesuusi kathi maanaw Leewe son uttis. Iya kaalliya asay daro gidiya gisho qaraxa qanxisiya daro asaynnagaranchchotii iyaranne iya tamaaretara issife uttidosona. <sup>16</sup> Higge astamaare gidida issi issi Farisaaweti Yesuusi nagaranchchotaranne qaraxa qanxiseyssatara kathi mishin be7idi, “I ays nagaranchchotaranne qaraxa qanxiseyssatara kathi mi?” yaagidi, iya tamaareta oychchidosona.

<sup>17</sup> Yesuusi entti geysa si7idi, “Hargganchhotapape attin paxatas aakime koshshenna. Taani nagaranchchota xeeganaw yasippe attin xillota xeeganaw yabiikke” yaagidi enttaw zaaris.

*Xoomabaa eranaw shiiqida oysha  
(Maato 9:14-17; Luuqa 5:33-39)*

<sup>18</sup> Xammaaqiyo Yohaannisa tamaaretinne Farisaaweti xoomosona. Issi issi asati Yesuusakkko yidi, “Yohaannisa tamaaretinne Farisaaweta tamaareti xoomosona, shin ne tamaareti ays xoomokkona?” yaagidosona.

<sup>19</sup> Yesuusi enttako, “Yaaganuwa yida asati machchiw ekkeyssi enttara de7ishin, xoomanaw dandda7onaa? Machchiw ekkeyssi enttara de7ishin, xoomanaw dandda7okkona. <sup>20</sup> Shin machchiw ekkeyssi entta matapape ekettana wodey yaana, entti he wode xoomana.

<sup>21</sup> “Ceega ma7o bolla ooratha wothidi sikkya asi baawa. Wothidi sikkiko, oorathay ceega ma7uwa daakkees; daakethaykka kaseyssafe darees. <sup>22</sup> Qassi mal77antto woyne ceega ogoron qoliya asi baawa. Shin qolikko, he woyney ogoruwa daakkees, bawukka gukkees, ogoroykka iitees. Shin mal77antto woyney ooratha ogoron qolettes” yaagis.

*Sambbaatabaa eranaw shiiqida oysha  
(Maato 12:1-8; Luuqa 6:1-5)*

<sup>23</sup> Yesuusi issi Sambbaata gallas bangga gade giddora aadhdisheen, iya tamaareti iyara bishe bangga tiya shirkidi moosona. <sup>24</sup> Farisaaweti Yesuusakkko, “Hekko, ne tamaareti Sambbaata gallas woga gidonnabaa ays oothonna?” yaagidosona.

<sup>25</sup> Yesuusi enttako, “Dawitey koshattidi, miyabaa koyida wode baara de7eyssatara oothidayssa nabbabibeeekketii? <sup>26</sup> Abiyaatari kahine halqa gididi de7iya wode Dawitey Xoossa keethi gelidi, kahineta xalaali maanapppe attin oonikka maanaw woga gidonnayssa Godaa sinthan wothida daabbuwa mis, baara de7eysstaskka immis” yaagis.

<sup>27</sup> Qassika Yesuusi enttako, “Sambbaati asa na7a go77as medhettisippe attin asi Sambbaatas medhettibeenna. <sup>28</sup> Hessa gisho, Asa Na7ay, hari attoshin Sambbaataskka Goda” yaagis.

**3**

*Yesuusi kushe gundda uraa pathis  
(Maato 12:9-14; Luuqa 6:6-11)*

<sup>1</sup> Yesuusi Ayhude Woosa Keethi simmi gelis. Yan kushey gunddida issi uray de7ees. <sup>2</sup> Issi issi asay Yesuusa mootanaw koyidi, kushey gunddida uraa Sambbaata gallas I pathikonne aggiko be7anaw koyidi minthidi naagoosona. <sup>3</sup> Yesuusi kushey gunddida uraa, “Dendda eqqada haa sinthe ya” yaagis. <sup>4</sup> Hessafe guye, asaakko, “Sambbaata gallas lo77obaa ootheyssi wogeyye iitabaa ootheyssi wogee? Asa shemppo ashoyye woykko wodho?” yaagidi oychchis.

Shin asay si77i gis. <sup>5</sup> Yesuusi hangettidi, entta yuushshi aathi xeelliidi, entti odin si7onnayssata gidiya gisho entta bolla daro azzanis. He addiyako, “Ne kushiya piddi ootha” yaagis. Uray piddi oothin iya kushey paxis. <sup>6</sup> Ellesidi Farisaaweti Ayhude Woosa Keethafe kare keyidi, Yesuusa waati wodhanekko maqettanaw Heroodisa baggatara issi soo shiiqidosona.

*Asay Yesuusakko shiiqidosona*

<sup>7</sup> Yesuusi ba tamaaretara Galiila Abbaako bis. Galiilappenne Yihudappe yida daro asay iya kaallidosona. <sup>8</sup> Qassika Yerusalamaeppe, Idumiyasappe, Yorddaanose Shaafa pinthafe, Xiroosa katamaappenne Sidoona katamaappe Yesuusi oothidabaa si7idi, daro asay iyaakko yidosona. <sup>9</sup> Asaa darotethaafe dendoyssan iya un77ethonna mela iya tamaareti wogolo iyaw giigisana mela kittis. <sup>10</sup> Daro asaa I pathida gisho harggiya asa ubbay iya bochchanaw sugettoosona. <sup>11</sup> Tuna ayyaanay oykkida asati iya be7ida wode iya sinthan kunddidi, bantta qaala dhoqqu oothidi, “Neeni Xoossaa Na7aa gidikkii?” yaagosona.

<sup>12</sup> Yesuusi he tuna ayyaanati banatethaa ooddeskka Qonccisonna mela entta minthidi hangettis.

*Yesuusi tammanne nam77u hawaareta dooris*

*(Maato 10:1-4; Luuqa 6:12-16)*

<sup>13</sup> Yesuusi deriya bolla keyidi, ba koyida asata baakko xeegis; enttika iyaakko bidosona.

<sup>14</sup> Entti baara daana melanne qaala tamaarssana mela tammanne nam77ata dooridi, entta, “Hawaareta”\* gidi sunthis. <sup>15</sup> Tuna ayyaanatakka kessana mela enttaw maata immis.

<sup>16</sup> I doorida tammanne nam77ati hayssata: Phexiroosa yaagidi sunthida Simoonaa, <sup>17</sup> Bo7anergges (Dada daaniya asata) yaagidi sunthidayssata, Zabdiyoosa nayta Yayqoobanne Yayqooba ishaa Yohaannisa, <sup>18</sup> Inddiriyasa, Filphoosa, Bartolomiyoosa, Maatoosa, Toomasa, Ilfiyoosa na7a Yayqooba, Taadiyosa, ba biittaas mishettiya Simoonanne, <sup>19</sup> Yesuusa aathi immida Asqoroota Yihuda.

*Yesuusanne Bi7elzebuula*

*(Maato 12:22-32; Luuqa 11:14-23; 12:10)*

<sup>20</sup> Hessafe guye, Yesuusi soo bis. Qassi daro asay shiiqin, inne iya tamaareti hari attoshin kathi maanawukka dandda7ibookkona. <sup>21</sup> Asay iya, “Gooyees” giya gisho iya dabboti hessa si7idi iya ekkanaw bidosona.

<sup>22</sup> Higge asttamaaretapape issoti issoti Yerusalamaeppe yidi, “Iya bolla Bi7elzebuuli de7ees”, I, “Xalahey wolqqan tuna ayyaanata kessees” yaagidi odettidosona.

<sup>23</sup> Yesuusi asaa baakko xeegidi leemiso odis. “Xalahey Xalahe waati kessanaw dandda7ii? <sup>24</sup> Issi kawotethay ba giddon shaakettiko he kawotethay eqqanaw dandda7enna. <sup>25</sup> Hessadakk, issi keetha asay bantta giddon shaakettiko dhayanaappe attin daanaw dandda7okkona. <sup>26</sup> Hiza, Xalahey baara kacettidi shaakettiko dhayoppe attin daanaw dandda7enna.

<sup>27</sup> Shin koyrottidi wolqqama uraa qachchonna de7ishe iya keetha gelidi, iya miishiya bonqanaw dandda7iya asi baawa. Qachchi simmidi iya keetha bonqanaw dandda7ees.

<sup>28</sup> “Taani hinttew tuma odays; Xoossay asa naytas nagara ubbaanne entti cayaa cashshe ubbaa atto gaana. <sup>29</sup> Shin Geeshsha Ayyaana bolla iitabaa odettiya ooddeskka merinaa nagara gidanaappe attin Xoossay ubbarakka iya maarenna” yaagis. <sup>30</sup> Yesuusi hessa giday, issi issi asati, “Iya bolla tuna ayyaanay de7ees” yaagida gishossa.

*Yesuusa aayiwunne iya ishata*

*(Maato 12:46-50; Luuqa 8:19-21)*

<sup>3:9</sup> Mar 4:1; Luuqa 5:1-3

\* <sup>3:14</sup> 3:14 Hawaare: Havaare guussay kiitettidayssa guussu.

<sup>3:22</sup> Maato 9:34; 10:25

<sup>3:29</sup> Luuqa 12:10

<sup>31</sup> Iya aayyaanne iya ishati yidi karen eqqidi, iyaakko ase kiittidi iya xeegidosona. <sup>32</sup> Iya matan uttida daro asati, “Hekko, ne aayeranne ne ishatara karen eqqidi nena koyoosona” yaagidosona.

<sup>33</sup> Yesuusi zaaridi, “Ta aayyaan oonee? Qassi ta ishati oonantee?” yaagis. <sup>34</sup> Ba matan uttida asa yuushshi aathi xeellidi, “Hekko, ta aayyaanne ta ishati hayssata. <sup>35</sup> Xoossay sheniya oothiya ubbay ta isha, ta michchonne ta aayo” yaagis.

## 4

### *Zerethi zeriya uraa leemiso (Maato 13:1-9; Luuqa 8:4-8)*

<sup>1</sup> Yesuusi zaaridi Galiil Abbaa matan tamaarssees. Daro asay iya yuushwan shiiqin, abban de7iya wogoluwa giddo gelidi uttis, asa ubbay Abbaa matan de7ees. <sup>2</sup> I entta darobaa leemison tamaarssis. Tamaarssishe hayssada yaagis:

<sup>3</sup> “Si7ite! Issi uray zerethi zeranaw keyis. <sup>4</sup> I zerishin, issi issi zerethay oge gaxan wodhdhis; kafoti yidi midosona. <sup>5</sup> Issi issi zerethay garssan shaalloy de7iya biitta bolla wodhdhis. Daro biitti baynna gisho he zerethay ellesdi dolis. <sup>6</sup> Shin awi keyida wode shullis. Loythidi xapho yeddiboonna gisho ellesdi melis. <sup>7</sup> Issi issi zerethay aguntha giddon wodhdhis. Dolidayssa agunthay diccidci cuullida gisho ayfe ayfonna attis. <sup>8</sup> Issi issi zerethay aradda biittan wodhdhidi dolis. Diccidci issyo hasttama, issyo usuppun tamma issyo xeeta ayfis” yaagis. <sup>9</sup> “Si7iya haythi de7iya oonikka si7o” yaagis.

### *Yesuusi leemison odida gaasuwa (Maato 13:10-17; Luuqa 8:9-10)*

<sup>10</sup> Yesuusi odidayssa si7ida issi issi asatinne tammanne nam77u tamaareti Yesuusi barkka de7ishin, iyaakko shiiqidi he leemisuwa birshshethaa oychchidosona. <sup>11</sup> Yesuusi enttako hayssada yaagis: “Hinttew Xoossaa kawotethaa xuuraa eroy imettis. Shin haratas kawotethaafe karen de7eyssatas ubbabay leemison odettees. <sup>12</sup> Gaasoykka, ‘Entti xellosona, shin demmokona. Si7oosona, shin akeekokkona. Entti demmiyakkonne akeekiyakk, Xoossaakko simmana ikka entta maaranashin’” yaagis.

### *Zerethaa leemisuwa birshshethaa (Maato 13:18-23; Luuqa 8:11-15)*

<sup>13</sup> Yesuusi enttako, “Ha leemiso hinttew gelennee? Yaatin, leemiso ubbaa hintte waati akeekanee? <sup>14</sup> Zereyssi Xoossaa qaala zerees. <sup>15</sup> Qaalay zerettiya wode oge gaxan wodhdhidayssati qaala si7idayssata. Shin Xalahey sohuwara yidi, entta wozanan zerettida qaala maxi digees. <sup>16</sup> Hessadakka, garssan shaalloy de7iya biittan zerettidayssi qaala si7idi, ellesidi ufayssan ekkeyssa. <sup>17</sup> Shin enttaw mino xaphoy baynna gisho ha77issafe attin gam77okona. Guutha wodeppee guye qaala gaason waayey woykko goodi gakkiya wode ellesidi dhubbettoosona. <sup>18</sup> Aguntha giddon zerettidayssi qaala si7eyssata. <sup>19</sup> Shin ha sa7a de7uwas hirggoy, duretethaa dosoygne harabaa amotteyssi iya wozanan gelidi qaala cuulliya gisho ayfe ayfonna attis. <sup>20</sup> Shin aradda biittan zerettidayssati qaala si7idi ekkeyssata. Entti issyo hasttama, issyo usuppun tamma issyo xeeta ayfis” yaagis.

### *Geeman de7iya xomppe (Luuqa 8:16-18)*

<sup>21</sup> Yesuusi gujjidi, “Xomppe ekkidi, daachchofe woykko alggafe garssan wothiya asi de7il? Dhoqqa bessan wotheneyye? <sup>22</sup> Hiza, qosettidabay ubbay qoncce keyana; geommidabay ubbay erettonna attenna. <sup>23</sup> Si7iya haythi de7iya oonikka si7o” yaagis.

<sup>24</sup> Qassi enttako, “Hintte si7iyabaa akeekidi si7ite! Xoossaa qaala hintte si7eyssa mela I hinttew akeeka immana. Ubbaka hinttew darssidi immana. <sup>25</sup> Issibay de7iya uraas gujji imettana, baynnaysafe hari attoshin, iyaw de7iya he guuthiyaka ekettana” yaagis.

### *Dicciya zerethaa leemiso*

<sup>26</sup> Yesuusi zaaridi, “Xoossaa kawotethay ba gaden zerethi zeriya asa mela. <sup>27</sup> He uray qamma dhiskkees; wonta denddees. I ba huu7en waaniyakko eronna de7ishin he zerethay doleesinne diccees. <sup>28</sup> Biittay kathi barkka immees. Koyro dolidi diccees, kaallidi

ayfanaw gambbuxees, wurssethan kumetha ayfe ayfees. <sup>29</sup>Shin kathay gakkia wode uray sohuwara baacara geli aggees” yaagis.

*Ayfe guutha mithaa leemiso  
(Maato 13:31-34; Luuqa 13:18-19)*

<sup>30</sup>Yesuusi, “Nuuni Xoossa kawotethaa ay daanees gaanee? Woykko aybira leemisanee? <sup>31</sup>Xoossa kawotethay ayfe guutha mithi daanees. He mithaa ayfiyaa zeriya wode sa7an de7iya mitha ayfe ubbaafe guuxees. <sup>32</sup>Zerin dolidi atakiltte ubbaafe gitatees; daro daashshi daayees. Kafoti iya tashiya bolla keexidi uttana gakkaw dayees” yaagis.

<sup>33</sup>Yesuusi hayssa mela daro leemison asay akeekanaw dandda7eyssa mela qaala odis.

<sup>34</sup>Asaas leemisoy baynna odenna. Shin Yesuusi ba tamaareta xalaalara de7iya wode enttaw ubbabaa birshshidi odis.

*Yesuusi hobbyya si77i oothis  
(Maato 8:23-27; Luuqa 8:22-25)*

<sup>35</sup>He gallas sa7ay omarssin, Yesuusi ba tamaaretakko, “Abbaafe hefinti pinnoos” yaagis. <sup>36</sup>Iya tamaareti daro asa yeggi aggidi, Yesuusi kase geli uttida wogoluwan gelidi Yesuusa banttara efidosona. Hara wogolotikka yan de7oosona. <sup>37</sup>Wolqqaama gotey denddidi, hobbey wogoluwa shocin, kumana gakkanaw wogoluwa giddo haathi gelis. <sup>38</sup>He wode Yesuusi wogoluwan guye baggara borkkottidi dhiskkis. Iya tamaareti iya denthidi, “Asttamaariyaw, nuuni dhayaa wode ne si77i gada xeellay?” yaagidosona.

<sup>39</sup>Yaatin, I barkkidi gotiya, “Si7i ga” gidi, abbaaka, “Woppu ga” gis. Goteykka si77i gin ubbabay woppu gis. <sup>40</sup>Yesuusi ba tamaaretakko, “Ays hayssada babbetii? Hintew ammanio waanidi dhayide?” yaagis.

<sup>41</sup>Entti daro babbidi bantta giddon, “Hayssi hari attoshin, goteynne abbay kiitteteysi oonee?” yaagidosona.

## 5

*Tuna ayyaani oykkida uray paxis  
(Maato 8:28-34; Luuqa 8:26-39)*

<sup>1</sup>Yesuusinne iya tamaareti abbaa pinnidi, Gerggesoone giya biittaa gakkidosona.

<sup>2</sup>Yesuusi wogoluwappe wodhdhiya wode tuna ayyaanay oykkida issi uray duufoppe keyidi iyara gahettis. <sup>3</sup>He uray duufowan aqi pee7idi de7ees. Iya oonikka santhalaatan qachchanaw dandda7enna. <sup>4</sup>I daro toho duthaninnee santhalaatan qashettidi de7ees. Shin santhalaataa duuserthees, duthaa mentherethees. Iya teqqanaw dandda7iya oonikka baawa. <sup>5</sup>I qammanne gallas he duufowaninnee dere bolla waasses, ba bollaaka shuchchan gaarees.

<sup>6</sup>Yesuusa haahon be7ida wode woxxi bidi iya sinthan gulbbatis. <sup>7</sup>He uray ba qaala dhoqqu oothidi, “Ubbaafe Bolla Xoossa Na7aw Yesuusa, nenanne tana aybe gathey? Tana dhayssonaa mela taani nena Xoossa sunthan woossays” yaagis. <sup>8</sup>I hessa giday Yesuusi iya, “La ha tuna ayyaanaw, ha addiyafe keya” yaagida gishossa.

<sup>9</sup>Yesuusi iyaakkoo, “Ne sunthay oonee?” yaagidi oychchis.

I, “Nuuni daro gidiya gisho ta sunthay Leegiyona” yaagis. <sup>10</sup>Tuna ayyaanati bantana he biittaafe kessi yeddonna mela Yesuusa minthidi woossidosona.

<sup>11</sup>He deriya bolla daro gudunthro wudey hamuttees. <sup>12</sup>Tuna ayyaanati Yesuusakkoo, “Nuna hini gudunthro wudiyakko yeddarkki, enttan bidi geloos” yaagidi woossidosona. <sup>13</sup>Yesuusi enttako, “Biite” yaagis. Yaatin tuna ayyaanati addiyafe keyidi gudunthotan gelidosona. Nam77u mukulu gidiya gudunthro wudey aafio doonara dirggidi bidi abban gelidi mitettidosona.

<sup>14</sup>Gudunthro wudiya heemmeyssati baqati bidi hanidabaa katamaaninme gaxariyan odidosona. Yaatin asay hanidabaa be7anaw keyidosona. <sup>15</sup>Asay Yesuusakkoo yaa wode tuna ayyaanan oykettida uraa be7idosona. I ba wozanaakkoo simmidi, ma7o ma77idi, yan uttidayssa be7ida wode ubbay yayyidosona. <sup>16</sup>Hessa be7ida asati tuna ayyaanati oykkida uraa bollanne gudunthota bolla hanidabaa ubbaa asaas odidosona. <sup>17</sup>Hessa gisho, asay bantta biittaafe Yesuusi baana mela woossidosona.

<sup>18</sup>Yesuusi wogoluwan geliya wode kase tuna ayyaanay oykkidi yeddida uray, Yesuusa kaallanaw iya woossi. <sup>19</sup>Shin Yesuusi ixxidi iyaakkoo, “Ne soo simmada, Goday new ay mela gitabaa oothidakkonne new ay mela keehidakko ne soo asaas oda” yaagis. <sup>20</sup>Uray bidi Tammu Katamaa giyason yuyyidi, Yesuusi baw ay mela gitabaa oothidaakkoo odis. I odidayssa si7ida asa ubbay malaalettidosona.

*Hayqida na7iwinne Yesuusa ma7uwa bochchida maccasiw  
(Maato 9:18-26; Luuqa 8:40-56)*

<sup>21</sup> Yesuusi simmidi, wogoluwan gelidi, abbaa pinnidaappe guye daro asay abbaa gaxan iya yuushuwan shiiqidosona. <sup>22</sup> Iyaroosa giya Ayhude Woosa Keetha halaqatapppe issoy, Yesuusa be7ida wode iyaakkko yidi iya tohuwa bolla <sup>23</sup> kunddidi, “Ta na7iya harggada hayqqana hanawsu. Iya paxada de7ana mela yada ne kushiya I bolla wotharkkii” yaagidi Yesuusa minthid woossis.

<sup>24</sup> Yesuusi Iyaroosara bis. I bishin daro asay iya kaallidi un77ethidosona.

<sup>25</sup> Tammanne nam77u laythi I bollaafe suuthi goggiya issi maccasiya de7awusu. <sup>26</sup> Daro aakimet iyo aakimidosona, shin iya paxa kaa7ettasu. Iya ba miishiya ubbaa wurssinkka iw haa iitisppe attin aykkoka maaddibeenna. <sup>27</sup> He maccasiya Yesusabaa si7ada, asaa kanthada Yesuusa guyera yada iya ma7uwa bochchasu. <sup>28</sup> Iya, “Taani hari attoshin iya ma7uwa bochchiyakko paxana” gada qoppasu.

<sup>29</sup> Lippe goggiya suuthay sohuwara eqi aggis. Iya ba waayappe paxidayssa ba asatethan erasu. <sup>30</sup> Yesuusi baappe wolqqi keyidayssa ba huu7en eridi, ellesidi daro asa giddon guye simmidi, “Ta ma7uwa bochchiday oonee?” yaagis.

<sup>31</sup> Iya tamaareti, “Asay nena sugeyssa be7ashe, ‘Woygada tana oone bochchiday yaagay?’” yaagidosona.

<sup>32</sup> Yesuusi hessa ooni oothidaakkko be7anaw yuushshi aathi xeellis. <sup>33</sup> Shin maccasiya baw hanidabaa erada, yashshan kokkorashe yada Yesuusa sinthan gufannas; qassi hanidabaa ubbaa tumaa iyaw odasu. <sup>34</sup> Yaanin, Yesuusi iikko, “Ta naatte, nena ne ammanoy pathis, saron ba, ne waayappekka paxa” yaagis.

<sup>35</sup> Yesuusi buroo hessa odishin, Ayhude Woosa Keetha halaqaa sooppe kiittida asati yidi, “Ne na7iya hayqqasu, asttamaariya ays daaburissay?” yaagidosona.

<sup>36</sup> Shin Yesuusi entti geyssa si7idi, Ayhude Woosa Keetha halaqaakkko, “Ammano xalaala ammanappe attin babbfa” yaagis. <sup>37</sup> Yesuusi Phexiroosappe, Yayqoobappenne Yayqooba ishhaa Yohaannisappe hari oonikka bana kaallonna mela diggis. <sup>38</sup> Entti Ayhude Woosa Keetha halaqaa soo gakiya wode Yesuusi asay kaha dhayidi yeekkeyssanne zeeleleyssa be7is. <sup>39</sup> Gelidi asaakkko, “Ays kaha dhayidi yeekketii? Na7iya dhiskkasuppe attin hayqqabuukku” yaagis.

<sup>40</sup> Asay iya bolla miiccis. Shin asa ubbaa kare vessidi, na7ee aawa, aayyiwinne heedzu tamaareta baara ekkidi na7iya de7iyasuwa gelis. <sup>41</sup> Yesuusi na7ee kushiya oykkidi, “Xaalita, quumi” (Guutha naatte, nena gays dendda) yaagis.

<sup>42</sup> Na7iya sohuwara dendda eqqada hamuttasu. Iya tammanne nam77u laytha na7a. Hessian asay daro malaalettidosona. <sup>43</sup> Yesuusi hessa entti ooddeskka odonna mela entta minthi kiittis. Entti iw miyabaa immana mela odis.

## 6

*Yesuusi Naazireten ixetts  
(Maato 13:53-58; Luuqa 4:16-30)*

<sup>1</sup> Yesuusi yaappe keyidi, ba tamaareta kaaletihidi, ba katama Naazirete bis. <sup>2</sup> Sambbaata gallas Ayhude Woosa Keethan tamaarsso oykkis. I tamaarsseyssa si7ida daro asay malaalettidi, “Hayssi ha ubbaa awuppe demmide? Ha cincatethaa I awuppe ekkidee? Ha malaatata oothiya maata I awuppe demmide? <sup>3</sup> Hayssi anaaxiya gidenneye? Mayraami na7a, Yayqooba, Yoosa, Yihudanne Simoona ishhaa gidenneye? Iya michcheti nuura hayssan de7okkonayye?” yaagidi, I giyabaa ekkonna ixxidosona.

<sup>4</sup> Yesuusi he asaakkko, “Nabey ba biittan, ba dabbotaninne ba soo asan bonchchettenafe attin harata matan bonchchettees” yaagis. <sup>5</sup> I he bessan ba kushiya guutha asaa bolla wothidi pathidayssafe attin hara malaatata oothanaw dandda7ibeenna. <sup>6</sup> Asay ammaniboonna gisho daro malaalettis.

*Yesuusi tammanne nam77u hawaareta kiittis  
(Maato 10:5-15; Luuqa 9:1-6)*

Hessafe guye, Yesuusi he heeran de7iya gutatan asaa tamaarssees. <sup>7</sup> Yesuusi tammanne nam77u tamaareta baakko xeegidi, nam77aa nam77aa gathidi kiittis. Enttaw tuna ayyaanata vessiya wolqqaa immis. <sup>8</sup> Entta, “Oge xam77afe attin kathi, karxiita, hintte kiisen miishe aybibaakkka oykkofite. <sup>9</sup> Hintte tohuwan caamma aathite, shin nam77u afila oykkofite” yaagis. <sup>10</sup> Qassika, “Hinttena asi mokkida soo awunkka gidin he bessaa yeddidi baana gakkanaw he keethan gam77ite. <sup>11</sup> Hinttena asi mokkonnasuwa woykko hintte odiyabaa si7onnasuwa awun gidikkoka, he biittan de7iya asaas hessi naagiso markka gidana mela he bessaafe keyishe, hintte tohuwappe baana pittite” yaagis.

<sup>12</sup> Tammanne nam77u tamaareti bidi, asay bantta nagaraappe simmanaada qaala odidosona. <sup>13</sup> Entti asappe daro tuna Ayyaanata kessidosona. Daro hargganchchota zayte tiyidi pathidosona.

*Xammaqiya Yohaannisa hayquwa*  
(Maato 14:1-12; Luuqa 9:7-9)

<sup>14</sup> Yesuusa sunthay ubba bessan keyida gisho Kawoy Heroodisi iyabaa si7is. Issi issi asay, “Xammaqiya Yohaannisi hayqoppe denddis, hessa gisho ha malaatata oothey iya” yaagidosona.

<sup>15</sup> Baggati, “Hayssi Eliyaasa gidennee?” yaagidosona.

Harati qassi, “Hayssi beni wode nabettapp issuwa gidonna aggenna” yaagidosona.

<sup>16</sup> Shin Heroodisi hessa si7ida wode “Hayssi taani goodhiya qanxisida Xammaqiya Yohaannisa gidennee? I hayqoppe denddis” yaagis.

<sup>17</sup> Heroodisi ba ishaa Filphoosa machchiwi Heroodiyada ekkida gisho I gaason Yohaannisa oythidi qashisis. <sup>18</sup> Yohaannisi Heroodisa, “Neeni ne ishaa machchiw ekkanaaw bessenna” yaagis.

<sup>19</sup> Heroodiyada Yohaannisa ba ulon morkkada iya wodhisanaw koyasu, shin dandda7abukku. <sup>20</sup> Yohaannisi xillonne geeshsha asi gididayssa Heroodisi erida gisho iyaw babbidi loythi naagisees. Heroodisi Yohaannisi giyabaa si7anaw dosikkoka I giyabaa si7iya wode daro dagammees.

<sup>21</sup> Heroodisi ba yelettida gallasa bonchchanaw deriya haareyssatas, shaalaqtasinne Galiilan de7iya gita asaas imato giigisis. Hessi Heroodiyadas injje gallas gidis.

<sup>22</sup> Heroodiyada na7iya imathay mokettiya bessaa gela durada, Heroodisanne iya imathata ufayssasu. Kawoy na7iw, “Ne koyabaa aybaa gidikkoka tana oychcha, taani new immana” yaagis. <sup>23</sup> Qassi iw caaqqidi, “Neeni oychchiyabaa aybaa gidikkoka, taani new immana. Hari attoshin, ta kawotethaa bagga gidikkoka taani new immana” yaagis.

<sup>24</sup> Na7iya kare keyada ba aayeekko, “Ay imma go?” gada oychchasu.

I aayya, “Xammaqiya Yohaannisa huu7iya imma ga” yaagas.

<sup>25</sup> Na7iya ellasada kauwakkko bada, “Xammaqiya Yohaannisa huu7iya saanen wothada ha77i taw immana mela koyays” yaagas.

<sup>26</sup> Yaanin Kawoy duro qirrottis, shin ba imathata gisho iw caaqqida ba caaqua men-thanaw koyibeenna. <sup>27</sup> Hessi gisho, ellesidi naageyssa Yohaannisa huu7iya ehana mela kiiitis. Naageyssi qasho keethi bidi Yohaannisa goodhiya qanxis. <sup>28</sup> He qanxettida huu7iya saanen wothi ehidi na7ees immis. Na7iya qassi ba aayes immas. <sup>29</sup> Yohaannisa tamaareti hessa si7ida wode bidi iya ahaa ekki efidi moogidosona.

*Yeuusi ichhashu mukulu asaa muzi*  
(Maato 14:13-21; Luuqa 9:10-17; Yoha 6:1-14)

<sup>30</sup> Tammanne nam77u hawaareti simmi yidi entti oothidabaanne tamaarssidabaa ubbaa Yesuusas odidosona. <sup>31</sup> Enttako yaa asaynne biya asay darida gisho Yesuusaranne iya tamaaretara, hari attoshin kathi maanawukka entta gathonna ixxis. Yaanin, Yesuusi enttako, “Nurkka guuthi shemppi ekkanaaw asi baynna bessi yedhdhite” yaagis. <sup>32</sup> Hessi gisho, entti bantarkka wogolun gelidi asi baynna bessi bidosona.

<sup>33</sup> Entti bishin daro asay entta be7idi eridosona. Yaatin, katama ubbaafe asay tohora woxxi bidi entti biyasuwa enttafe sinthe gakkidosona. <sup>34</sup> Yesuusi wogoluwappe wodhdhidi daro asaa be7is. Asay heemmiya asi baynna dorssa mela gididayssa be7idi enttaw qadhattidi entta darobaa tamaarssis.

<sup>35</sup> Sa7ay omarsiya wode Yesuusa tamaareti iyaakko yidi, “Hayssi bessay asi baynna bessi; ha77i sa7aykka qammis. <sup>36</sup> Asay gutatanne katamata bidi banttar miyabaa shammana mela asa yedda” yaagidosona.

<sup>37</sup> Shin Yesuusi zaaridi enttako, “Asaas miyabaa hintte immite” yaagis.

Entti, “Nuuni bidi nam77u xeetu dinaaren uythu shammidi asaa muzana mela koyay?” yaagidi oychchidosona.

<sup>38</sup> Yesuusi enttako, “Hinttew aappun uythi de7ii? Ane bidi be7ite” yaagis.

Entti be7idi, “Ichhashu uythunne nam77u molo” yaagidosona.

<sup>39</sup> Yesuusi ba tamaareta asa ubbaa cugan cugan shaakkidi maatan utisana mela kiiitis. <sup>40</sup> Asay baggay xeeta, baggay ishatama gididi cugan cugan shaakettidi uttidosona.

<sup>41</sup> Yesuusi ichhashu uythaanne nam77u molota ekkidi, pude salo xeellidi Xoossa galatis. Uythaan menthidi asaas gishana mela ba tamaaretaa immis. Qassi nam77u molota entta ubbaas shaakkis. <sup>42</sup> Asa ubbay midi kallidosona. <sup>43</sup> Attida uytha tiiflyanne molota tiifya,

iya tamaareti tammanne nam77u gayta kumethi denthidosona. <sup>44</sup> Uythaan mida adde asaa tayboy ichchashu mukulu.

*Yesuusi abbaa bollara hamuttis  
(Maato 14:22-33; Yoha 6:15-21)*

<sup>45</sup> Ellesidi Yesuusi ba tamaareti wogoluwan gelidi, abbaafe hefinthan de7iya Beetesayda baappe sinthattidi baana mela kiittis. Shin baw asaa moyzanaw guye attis. <sup>46</sup> Asaa moyzidaappe guye Xoossa woossanaw deriya bolla keyis.

<sup>47</sup> Sa7ay qammiya wode wogoloy abbaa giddon de7ees, shin Yesuusi abbaafe gaxan barkka de7ees. <sup>48</sup> Carkkoy iya tamaaretakko carkkiya gisho abbaa pidhoy waayseyssa Yesuusi be7is. Wonttimaathe sa7ay geeyana haniya wode I abbaa bolla hamuttishe enttako yidi, entta yeggidy aadhdhanan koyis. <sup>49</sup> Shin I abbaa bolla hamuttishin, entti be7idi, enttaw moyttille daanin waassidosona. <sup>50</sup> Entti ubbay iya be7idi, yashshan kokkoridosona.

Shin Yesuusi ellesidi enttako, “Tana, aykkoy baawa; yayyofite” yaagis. <sup>51</sup> Yesuusi wogoluwan gelidi enttara issife uttin carkkoy woppu gis. Entti daro malaalettidosona. <sup>52</sup> Entta wozanay zel77umida gisho entti uythabaa akeekibookkona.

*Yesuusi Gensareexen hargganchota pathis  
(Maato 14:34-36)*

<sup>53</sup> Entti abbaa pinnidi, Gensareexe biitta gakkidi, wogoluwa gaxa shiishidi qachchidosona. <sup>54</sup> Entti wogoluwappe wodhdhiya wode asay ellesidi Yesuusa eridosona. <sup>55</sup> Entti heeran de7iya biitta ubban woxerettidi hargganchchota halan tookkidi, “Yesuusi de7ees” gin si7ida bessaa ehidosona. <sup>56</sup> Asay I bida soo ubban, gaxariyan gidin, kataman, de7iya hargganchchota dabaaba efoosona. Hargganchchoti iya afila macaraa gidikkoka bochchana mela asay iya woossidosona. Bochchida ubbay paxis.

## 7

*Beni aawata wogaa  
(Maato 15:1-9)*

<sup>1</sup> Yerusalamepppe yida guutha Farisaawetinne higge asttamaareti Yesuusa matan shiqidosona. <sup>2</sup> Yesuusa tamaaretappe issoti issoti geeyonna kushiyani, hessika kushe meecettonna kathi meyssata be7idosona.

<sup>3</sup> Farisaawetinne Ayhude asa ubbay bantta aawata wogaatho bantta kushiya meecettonna mokkonna. <sup>4</sup> Hessadakka, entti giyappe shamettidabaa meeconna de7ishe mokkonna. Qassi entti bantta aawatapppe ekkida hara daro wogi de7ees: Hessika siniya, keriya, biraata miishtanne arssaa meecciya wogaa naageyssa.

<sup>5</sup> Farisaawetinne higge asttamaareti Yesuusa, “Ne tamaareti ays aawata wogaa menthidi bantta kushiya meecettonna kathi moonna?” yaagidi oychchidosona.

<sup>6</sup> Yesuusi enttako, “Isayaasi hinttena cubbota,  
‘Hayssi asay tana ba inxarssa xalaalan bonchchees,  
shin entta wozanay taappe haahon de7ees.

<sup>7</sup> Asi medhdhida wogaa Xoossa higge daanisidi tamaarssija gisho  
entti tana mela goynnosona”

gidi xaafidayssi tuma.

<sup>8</sup> “Hintte Xoossa kiitaa aggidi asa wogaa minthidi naageeta” yaagis.

<sup>9</sup> Qassika Yesuusi, “Hinttee hintte wogaa naagidi Xoossa kiitaa yeggi agganaw lo77o oge demmideta. <sup>10</sup> Musey, ‘Ne aawanne ne aayiw bonchcha’, qassi ‘Ba aawanne ba aayiw cayeyssi hayqqanaw bessees’ yaagis. <sup>11</sup> Shin issi asi ba aawa woykko ba aayiw maaddanayssa aggidi, ‘Hessi Xoossa yarshsho’ giikko, <sup>12</sup> I ba aawa woykko ba aayiw maaddonna mela ootheeta. <sup>13</sup> Hessadakka, hintte harata tamaarssida hintte wogan Xoossa qaala kadhideta. Hessa mela hara darobaa ootheeta” yaagis.

*Ase tunisiyabata  
(Maato 15:10-20)*

<sup>14</sup> Yesuusi daro asaa qassika baakko xeegidi, “Ubbay taani odeyssa si7itenne akeekite. <sup>15</sup> Asa wozanapppe keyaaboy ase tuniseesippe attin kareppe asa ulo gelidi ase tunisiyaboy aybikkha baawa. <sup>16</sup> Si7iya haythi de7iya oonikka si7o” yaagis.

<sup>17</sup> Yesuusi daro asaa yeggi aggidi suo gelin iya tamaareti he leemisuwabaa iya oychchidosona. <sup>18</sup> I enttako, “Hinttewuka qassi gelibeennee? Kareppe asa wozanan gelyabay aybikkha ase tunisanaw dandda7onnayssa akeeketii? <sup>19</sup> Ays giikko, kathi asa ulo giddo

gelidi kanthidi aadhdeesippe attin asa wozana giddo gelenna” yaagis. Hessian Yesuusi kathi ubbay geeshshi gideyssa erisis.

<sup>20</sup> Kaallidikka, Yesuusi, “Asa tunisiyabay asa wozana giddofe keyaabaa. <sup>21</sup> Asa wozana giddofe keyaabay iita qofa, laymatethi, kayso, ase wodho, laame,<sup>22</sup> iita amo, iitatethi, gene, qayxe, cimo, qanaate, cashshe, otoronne boozatethi. <sup>23</sup> Ha iitabay ubbayka asa wozana giddofe keyidi ase tunisees” yaagis.

*Issi maccase ammanuwa*

(Maato 15:21-28)

<sup>24</sup> Yesuusi yaappe keyidi, Xiroosa katama matan de7iya biittaa bis. I issi keethi gelidi yan de7eyssa onikka erana mela koyibeenna. Shin qosettidi gam77anaw dandda7ibeenna.

<sup>25</sup> Shin I guutha na7iw tuna ayyaanay oykkida issi maccasi Yesuusabaa si7ada ellesa iyaakko yada iya tohuwa bolla kunddasu. <sup>26</sup> Iya Ayhude maccasi gidukku; iya yelettiday Siroofinqe giya biittana. Iya, ba na7eeppe tuna ayyaanaa kessana mela Yesuusa woossasu.

<sup>27</sup> Shin Yesuusi zaaridi, “Nayti koyrottidi kathaa kallo; nayta kathaa ekkidi kanatas yeggeyssi lo77o gidenna” yaagis.

<sup>28</sup> Maccasiya zaarada, “Ta Godaw hessi tuma, shin gaytaa matan de7iya kanati naytappe wodhdhiya tiifiya moosona” yaagas.

<sup>29</sup> Yesuusi qassi iikko, “Ha ne qaala gisho ne soo ba; tuna ayyaanay ne na7eeppe keys” yaagis.

<sup>30</sup> Maccasiya ba soo biya wode tuna ayyaanay iippe keyin hiixan zin77idaaro demmasu.

*Yesuusi tullenne muume uraa pathis*

<sup>31</sup> Yesuusi Xiroosa katamaappe keyidi, Sidoonaranne Tammu Katamata giya biittaara kanthidi Galiila Abbaako bis. <sup>32</sup> Asay tullenne waayidi odettiya asi Yesuusakko ehidi, ba kushiya iya bolla wothana mela iya woossidosona. <sup>33</sup> Yesuusi barkka he uraa daro asappe gaxa kessidi, ba biradhdhiya iya haythan yeddis. Qassi cuchchi cuttidi iya inxarssaa bochchis. <sup>34</sup> Salo pude xeellidi, tooki shemppidi, “Eftah” gis. Birshshethaykka “Dooyetta” guussu. <sup>35</sup> Uraa haythay ellesidi dooyettis, qashettida inxarssaykka birshshettis, uray geeshshidi odettis.

<sup>36</sup> Yesuusi asaakkko, “Hayssa ooddeskka odoppite” yaagis. Shin I daro minthidi odoppite gin, asay odaa yaa darssis. <sup>37</sup> Hessa si7ida asa ubbay daro malaalettidi, “Ubbabaa I løythi ootees. Hari attoshin, tulliya sissees, muumiya odisees” yaagidosona.

## 8

*Yesuusi oyddu mukulu asaa muzis*

(Maato 15:32-39)

<sup>1</sup> Guutha wodekke guye, daro asay Yesuusakko shiiqidosona. Asaas miyabay dhayin Yesuusi ba tamaareta baakko xeegidi,<sup>2</sup> “Ha asay taara heedzu gallas gakkaw gam77idi, aykkoka miyabaa demmiboonna gisho tana asay qadhethées.” <sup>3</sup> Taani asaa koshara soo yeddko asay bishe ogen daaburidi kunddana, bagga asay haahosoppe yidosona” yaagis.

<sup>4</sup> Yesuusa tamaareti zaaridi, “Ha bazzo biittan ha asa ubbaa muzanaw gidiya kathi demmanaw dandda7ey oonee?” yaagidosona.

<sup>5</sup> Yesuusi enttako, “Hinttew aappun uythi de7ii?” yaagidi oychchis.

Entti zaaridi, “Laappun uythi de7ees” yaagidosona.

<sup>6</sup> Yesuusi asay sa7an uttana mela kiittis. Yaatidi, laappun uythaa ekkidi Xoossa galati simmidi he uythaan menthidi, asaas gishana mela ba tamaaretaa immis. Iya tamaareti asaas gishidosona. <sup>7</sup> Enttaw qassi guutha laafa moloti de7oosona. Yesuusi he molota gisho Xoossa galatidi, asaas gishana mela ba tamaaretaa kiittis. <sup>8</sup> Asay ubbay midi kallidosona. Iya tamaareti attida tiifiya laappun gayta kumethi denthidosona. <sup>9</sup> Kathaa mida asaa tayboy oyddu mukulu gidana. Hessafe guye, Yesuusi asa yeddis. <sup>10</sup> I qassi ba tamaaretaa ellesi wogolon gelidi Dalmanuuta giya biittaa bis.

*Malaati oosettana mela oychchidosona*

(Maato 16:1-4)

<sup>11</sup> Farisaaweti yidi Yesuusa paaccanaw koyidi, saloppe banttana malaata bessana mela Yesuusabaa palama oykkidosona.

<sup>12</sup> Yesuusi tookki shemppidi, “Ha wodiya asay ays malaata koyii? Taani hinttew tuma odays; ha wodiya asaas ay malaatikka imettenna” yaagis. <sup>13</sup> I entta yan yeggi aggidi zaari wogolon gelidi abbaafe hefinthi pinnis.

*Farisaawetanne Heroodisa irshshuwaa  
(Maato 16:5-12)*

<sup>14</sup> Iya tamaareti kathi efanayssa dogidosona; enttaw wogoluwa giddon issi uythaafe hari baawa. <sup>15</sup> Yesuusi enttako, “Hinttena erite. Farisaaweta irshshuwafenne Heroodisa irshshuwaafe naagettite” yaagidi kiittis.

<sup>16</sup> Entti bantta giddon, “I hayssa gey nuus uythi baynna gishossa” yaagidosona.

<sup>17</sup> Yesuusi entti geyssa eridi enttako, “Hinttew uythi baynna gisho ays odetteetii? Ha77ika erekketii? Woykko akeekketii? Hintte wozanay doccidee? <sup>18</sup> Hinttew ayfey de7ishin be7ekketi? Haythi de7ishin si7ekketii? Hintte akeekketii? <sup>19</sup> Taani ichchashu uytha ichchashu mukulu asaas bathida wode aappun gayta kumethi tiife denthidetii?” yaagis.

Enttika, “Tammante nam77u gayta kumethi” yaagidosona.

<sup>20</sup> “Hessadakka, taani laappun uytha oyddu mukulu asaas bathida wode aappun gayta kumethi tiife denthidetii?” yaagis.

Entti, “Laappun gayta kumethi denthida” yaagidosona.

<sup>21</sup> Yaatin, “Ha77ika akeekibekketii?” yaagis.

*Yesuusi Beetesaydan issi qooqiya pathis*

<sup>22</sup> Entti Beetesayda katamaa bidosona. Guutha asati qooqe uraa Yesuusakko ehidi he uraa bochchana mela iya woossidosona. <sup>23</sup> Yesuusi qooqe uraa kushiya oykkidi katamaappe gaxa kessis. Iya ayfiyaan cuttidi ba kushiya iya bolla wothidi, “New aykkoy bentii?” yaagidi oychchis.

<sup>24</sup> Uray dhoqqu gidi xeellidi, “Taw asay benttees, shin asay hamuttishe mithi daanees” yaagis.

<sup>25</sup> Hessafe guye, Yesuusi zaaridi, uraa ayfiyaan ba kushiya wothis. Uray loythi xeellis, iya ayfey paxis, ubbabaa geeshshidi be7is. <sup>26</sup> Yesuusi addiyako, “Ne soo ba, shin gutaa geloppa” yaagidi kiittis.

*Phexiroosa ammanuwanne markkatethaa*

*(Maato 16:13-20; Luuqa 9:18-21)*

<sup>27</sup> Yesuusi ba tamaaretara Qisaariya Filphoosa matan de7iya gutaa bis. Entti bishin oge bolla Yesuusi, “Tana asay oona goonaa?” yaagidi ba tamaareta oychchis.

<sup>28</sup> Iya tamaareti, “Issi issi asay nena, ‘Xammaqa Yohaannisa’ goosona; harati, ‘Eliyaasa goosona’ qassi harati, ‘Nabetappe issuwa’ goosona” yaagidosona.

<sup>29</sup> Yesuusi enttako, “Yaatin hintte tana oona geeti?” yaagidi oychchis.

Phexiroosi, “Neeni Kiristtoosa” yaagidi zaaris.

<sup>30</sup> Yesuusi, “Tabaa ooddeskka odoppite” yaagidi entta kiittis.

*Yesuusi bana gakkana metuwanne waaya odis*

*(Maato 16:21-28; Luuqa 9:22-27)*

<sup>31</sup> Yesuusi ba tamaaretakko, “Asa Na7ay, daro meto ekkanaw bessees; cimati, kahine halaqatinne higge asttamaareti iya ixxanaw bessees. Entti iya wodhanawunne heedzu gallasappe guye, I hayqoppe denddanaw bessees” yaagidi entta tamaarssis. <sup>32</sup> I hessa enttaw geeshshidi odis. Phexiroosi iya issi bagga zaaridi hanqqis.

<sup>33</sup> Shin Yesuusi guye simmidi, ba tamaareta xeellidi, Phexiroosa hangettidi, “Ha Xalahiyaw, taappe haakka. Neeni asi dosiyabaa qoppasappe attin Xoossay dosiyabaa oppaka” yaagis.

*Yesuusa kaaloy bana kado oychchees*

*(Maato 10:38-39; 16:24-28; Luuqa 9:23-27; 14:26-27)*

<sup>34</sup> Qassika Yesuusi daro asaanne ba tamaareta baakko xeegidi, “Tana kaallanaw koyaa oonikka bana kaddo; ba masqaliya tookkidi tana kaalo. <sup>35</sup> Ba shemppuwa ashshanaw koyaa uray dhayssana. Shin ta gishonne Wonggelaa gisho ba shemppuwa dhayssiya uray ashshana. <sup>36</sup> Issi asi sa7an de7iya ubbabaa baw shiishidi, ba shemppuwa dhayssikko iya ay maaddanee? <sup>37</sup> Issi asi ba shemppuwa wozanaw ay immanaw dandda7ii? <sup>38</sup> Xoossaa ammanonna ha iita yeletethan, issi asi tananinne ta qaalan yeellatikko, Asa Na7ay, qassi ba Aawa bonchchon geeshsha kaitanchchotara yaa wode iyan yeellatana” yaagis.

**9**

*Yesuusa malay laamettis*

*(Maato 17:1-13; Luuqa 9:28-36)*

<sup>1</sup> Yesuusi enttako, “Taani hinttew tuma odays; Xoossa kawotethay wolqqara yeysa be7onna hayqqonna issi issi asati hayssan de7oosona” yaagis.

<sup>2</sup> Yesuusi usuppun gallasappe guye, baara Phexiroosa, Yayqoobanne Yohaannisa ekkidi, entta xalaala gita deriya bolla kessidi entta sinthan laamettis. <sup>3</sup> Iya ma7oykka phoolis; sa7an ma7o meecciya oonikka geeshshanaw dandda7onnayssa mela daro booxis. <sup>4</sup> He heedzu tamaareti, Eliyaasinne Musey Yesuusara odettishin be7idosona.

<sup>5</sup> Phexiroosi Yesuusa, “Astattamaariyaw, nuuni hayssan de7eyssi nuus lo77o; nu heedzu shaqarata issuwa new, issuwa Muses, qassi issuwa Eliyaasas shaqarana” yaagis.

<sup>6</sup> Iyaranne hankkotara daro yayyida gisho I ay giyakkoka eribeenna.

<sup>7</sup> Hessafe guye, shaaray yidi entta kammin shaarappe, “Hayss ta dosiya, ta Na7aa, I geyssa si7ite” giya qaalay yis. <sup>8</sup> Ellesidi entti yuushshi aathi xeelliya wode Yesuusappe attin haraa oonakka bantta matan be7ibookkona.

<sup>9</sup> Entti deriyappe wodhdhishin, Yesuusi enttako, “Asa Na7ay, hayqoppe denddana gakkanaw, hintte be7idabaa ooddeskka odoppite” yaagidi kiittis.

<sup>10</sup> I kiittidayssa entti, “Ero” gidi, “Ha hayqoppe denddo geysyi woygusee” gidi, bantta giddon odettidosona.

<sup>11</sup> Entti zaaridi, “Higge asttamaareti, ‘Eliyaasi koyrottidi yaanaw bessees’ ays goonaa?” yaagidi oychchidosona.

<sup>12</sup> Yesuusi zaaridi “Eliyaasi koyrottidi yidi, ubbabaa giigisees; yaatin, ays Geeshsha Maxaafay, ‘Asa Na7ay daro waayettana ixettana’ yaagi gidi oychchis. <sup>13</sup> Shin taani hinttew odays; Eliyaasi yis; qassi iyabay Geeshsha Maxaafan xaafettidayssada, asay iya bolla bantta koyidabaa oothidosona” yaagis.

*Yesuusi tuna ayyaanay oykkida na7a pathis  
(Maato 17:14-21; Luuqa 9:37-43)*

<sup>14</sup> Yesuusi, Phexiroosi, Yayqoobinne Yohaannisi hankko iya tamaaretakko simmidi yaa wode daro asay entta yuushwan eqqidaysatanne higge asttamaare gidida guutha asati enttara palameyssa be7idosona. <sup>15</sup> He daro asay Yesuusa be7ida wode malaalettidi, ellesidi iyaakko woxxi yidi, iya sarothidosona. <sup>16</sup> Yesuusi ba tamaaretakko, “Enttara ay palameetii?” yaagidi oychchis.

<sup>17</sup> He daro asa giddofe issi uray zaaridi, “Asttamaariyaw, ta na7aa bolla odetethi diggiya tuna ayyaanay de7iya gisho iya neekko ekkada yas. <sup>18</sup> Ha tuna ayyaanay iya oykkiya wode ubban, iya shocci yeggees; iya doonara gopponttoy yees; qassi achche garccisees; asatethaaka minnees. Iyappe ha tuna ayyaanana kessana mela, ne tamaretas odas, shin kessanaw dandda7ibookkona” yaagis.

<sup>19</sup> Yesuusi zaaridi enttako, “Ammanonna ha wodiya asaw! Taani hinttera awude gakkanaw daane? Qassi hinttena awude gakkanaw dandda7anee? Na7aa taakko haa ekki yiite” yaagis. <sup>20</sup> Entti na7aa iyaakko ehdidosona; he tuna ayyaanay Yesuusa be7ida mela na7aa kokkorssis; na7ay sa7an kunddidi, doonara gopponttoy toofu gishin gonddoretis. <sup>21</sup> Yesuusi he na7aa aawakko, “Hayssi ne na7aa oykkoossappe ay mela wode gidanee?” yaagidi oychchis.

Na7aa aaway, “I guuthan de7ishin oykkis. <sup>22</sup> Iya wodhanaw daro wode tamaninne haathan yeggees, shin ne dandda7ikkoo, nuus qadhattarkii, nuna maaddarkii” yaagis.

<sup>23</sup> Yesuusi iya, “ ‘Neeni dandda7ikkoo gay?’ Ammaniya ooddeskka ubbabay dandda7ettees” yaagis.

<sup>24</sup> Ellesidi na7aa aaway ba qaala dhoqqu oothidi, “Taani ammanays, shin guija ammananaada tana maaddarkii” yaagis.

<sup>25</sup> Yesuusi asay dari dari beyssa be7idi, tuna ayyaanana, “Ha tullenne muume ayyaanaw, ha na7aappe keya gada nena ta kiittays; qassi nam77antho iyan geloppa” yaagis.

<sup>26</sup> He tuna ayyaanay waassidi, na7aa daro kokkorssidi, iyappe keyis. Na7ay hayqqidaa din, daro asay, “Na7ay hayqqis” yaagidosona. <sup>27</sup> Shin Yesuusi na7aa kushiya oykkidi denthin, na7ay denddi eqqis.

<sup>28</sup> Yesuusi soo gelidayssafe guye iya tamaareti, “Nuuni he tuna ayyaanana kessanaw ays dandda7ibookko?” yaagidi Yesuusa dumma oychchidosona.

<sup>29</sup> Yesuusi zaaridi, “Hessa melay woosappenne xoomappe attin haraban keyanaw dandda7enna” yaagis.

*Yesuusi bana gakkana metuwa zaari odis  
(Maato 17:22-23; Luuqa 9:43-45)*

<sup>30</sup> Entti he bessaafe denddidi, Galilala aadhdhidi bidosona; Yesuusi ba de7iyasuwa oonikka erana mela koyibeenna. <sup>31</sup> I ba tamaaretakko, “Asa Na7aa, asi asas aathi immananne wodhana; I heedzu gallasappe guye, hayqoppe denddana” yaagidi tamaarssees.

<sup>32</sup> Shin enttaw I geyssi gelibeenna; qassi iya oychchanawukka yayyidosona.

*Ubbaafe aadhdhey oonee?*

(Maato 18:1-5; Luuqa 9:46-48)

<sup>33</sup> Entti Qifirnahoome katamaa bidi soo gelidayssafe guye Yesuusi enttako, “Ogen ay odetteetii?” yaagidi oychchis. <sup>34</sup> Shin entti, “Nu giddon ubbaafe aadhdhanay oonee?” yaagidi palamida gisho si77i gidosona. <sup>35</sup> Yesuusi uttidi, tammanne nam77u tamaareta xeegidi, “Oonikka sinthe aadhdhanaw koykko, ubbaafe guye aadhdhidi, ubbaas aylle gidanaw bessees” yaagis.

<sup>36</sup> Issi guutha na7aa ekkidi, entta giddon essis; he guutha na7aa idimmidi enttako, <sup>37</sup> “Hayssa mela guutha naytappe issuwa ta sunthan mokkiya oonikka tana mokkees; qassi tana mokkiya oonikka tana kiittadaysaka mokkeesippe attin ta xalaala mokkenna” yaagis.

*Nuna ixonna uray nu bagga*

(Luuqa 9:49-50)

<sup>38</sup> Yohaannisi, “Asttamaariyaw, issi asi ne sunthan tuna Ayyaanata kessishin nuuni be7idi, nu bagga gidonna gisho iya diggida” yaagis.

<sup>39</sup> Shin Yesuusi, “Oonikka ta sunthan Xoossay oothiya malaatata oothidi, ellesidi ta bolla iitabaa odettanaw danda7ey baynna gisho diggofite. <sup>40</sup> Nubaa ixonna uray nu bagga.

<sup>41</sup> Taani hiinttew tuma odays; hiintte tayssata gidiya gisho oonikka hiinttew ta sunthan halo haathi uyanaw immikokka, ba woytuwa ekkana.

*Nagaran paacetethi*

(Maato 18:6-9; Luuqa 17:1-2)

<sup>42</sup> “Tana ammanniayaah guuthatappate issuwa baletiha oonikka, gaachcha woggaa woxa ba qodhen qachchidi, abban wulliyako iyaw lo77o. <sup>43-44</sup> Ne kushey nena baletikkko, qanxa hola. Neeni nam77u kushera to7onna gaannname taman yegetteyssafe, duuxa kushera de7uwa geloy new lo77o. <sup>45-46</sup> Ne tohoy nena baletikkko, qanxa hola. Neeni nam77u tohuwara gaannname taman yegetteyssafe, wobbe gidada de7uwa geleyssi new lo77o. <sup>47</sup> Ne ayfey nena baletikkko, wooca kessa hola. Neeni nam77u ayfiyaara gaannname taman yegetteyssafe, issi ayfiyaara Xoossaakawotethaa geleyssi new lo77o. <sup>48</sup> Yan entta miya guxuney hayqqenna, tamaykka to7enna.

<sup>49</sup> “Yarshshoy maxinen geeyeyssa mela asi ubbay taman harqettana. <sup>50</sup> Maxiney lo77o, shin I mal77onna ixxiko, zaaridi waati mal77ethanee? Hinttenan maxiney de7o. Yaanidi issoy issuwara sarotethaan de7ite” yaagis.

## 10

*Machcho yeddanaw bessenna*

(Maato 19:1-2; Luuqa 16:18)

<sup>1</sup> Yesuusi hessafe denddidi, Yihuda biittaa bidi Yorddaanose Shaafaa pinnis. Daro asay zaaridi iyaakko shiiqin, kaseyssadakka he asaa tamaarssis.

<sup>2</sup> Issi issi Farisaaweti paaccanaw koyidi Yesuusa, “Issi asi ba machchiw yeddana mela Muse higgey kiiiti?” yaagidi iya oychchidosona.

<sup>3</sup> I zaaridi, “Musey hiinttene woygidi kii tidee?” yaagis.

<sup>4</sup> Entti, “Musey, ‘Issi asi ba machchees anjo worrqate immidi yeddo’ gis” yaagidosona.

<sup>5</sup> Yesuusi zaaridi, entta “Hintte odin si7onnayssata gidiya gisho Musey ha kiiata hiinttew xaafis. <sup>6</sup> Shin Xoossay koyro medhdhiya wode addenne macca oothidi, entta medhdhis.

<sup>7</sup> Hessa gisho, issi asi ba aawanne ba aayiw aggidi, ba machcheera issife de7ees. <sup>8</sup> Entti nam77ay issi ase gidoosona; hizappe, entti issi ase gidoosonappe attin nam77u asi gi-dokkona. <sup>9</sup> Hessa gisho, Xoossay issife qachchidayssha asi shaakkofo” yaagis.

<sup>10</sup> Entti soo simmida wode iya tamaareti ha odabaa Yesuusa nam77antho oychchidosona. <sup>11</sup> Yesuusi enttako, “Ba machchiw yeddidi hara ekkiya oonikka laymatees. <sup>12</sup> Qassi maccasiyakka ba azinaappe keyada hara azina gelikko laymatawusu” yaagis.

*Yesuusi guutha nayta anjisis*

(Maato 19:13-15; Luuqa 18:15-17)

<sup>13</sup> Yesuusi guutha nayta bochchana mela, issi issi asay nayta iyaakko ehoosona, shin iya tamaareti he asa hanqettidosona. <sup>14</sup> Yesuusi hessa be7idi, ba tamaareta hanqettidi; enttako, “Guutha nayti taakko yeysa diggofite; Xoossaa kawotethay hayssata melassa. <sup>15</sup> Taani hinttew tuma odays; Xoossaa kawotethaa guutha na7ada ekkonna uray oonikka he kawotethaa ubbarakka gelenna” yaagis. <sup>16</sup> Guutha nayta idimmidi, ba kushiya entta issuwa issuwa bolla wothidi anjjis.

*Miishe siiqoy ehiya metuwa  
(Maato 19:16-30; Luuqa 18:18-30)*

<sup>17</sup> Yesuusi baanaw keyida wode issi uray woxxi yidi, iya sinthan gulbatidi, “Keeha asttamaariyaw, merinaa de7uwa laattanwan taani ay oootho?” yaagidi oychchis.

<sup>18</sup> Yesuusi, “Ays tana keehaw gada xeegay? Xoossaa xalaalappe attin hari keehi oonikka baawa. <sup>19</sup> Xoossaa kiitaa, wodhoppa; laymatoppa; kaysotoppa; worddo markkattofa; inxarssan cimmofa; ne aawanne ne aayiw bonchcha yaageyssa eraasa” yaagis.

<sup>20</sup> Uray, “Asttamaariyaw, taani hessa ubbaa na7atethafe doomada ha77i gakkanaa naagays” yaagis.

<sup>21</sup> Yesuusi uraa tishshi oothi xeellidi dosis; “New issibay paccees; bada new de7iyaba ubbaa bayzada, he miishiya manqotas imma; neeni salon duretana. Yaata simmada tana kaalla” yaagis. <sup>22</sup> Shin uray hessa si7idi, I daro dure gidiya gisho ba som77uwa kaarethis, ufayttuna aggidi bis.

<sup>23</sup> Yesuusi ba tamaareta yuushshi aathi xeellidi, “Dure asi Xoossaa kawotethaa gelanayssi waanidi metanddeeshsha!” yaagis.

<sup>24</sup> Iya tamaareti iya timirttiya si7idi malaalettidosona. Shin Yesuusi qassika enttako, “Nayto, Xoossaa kawotethaa gelanayssi waanidi metanddeeshsha! <sup>25</sup> Dure asi Xoossaa kawotethaa gelanayssafe, gimaley narppe luhora aadhdheyssi kawuyeess” yaagis.

<sup>26</sup> Iya tamaareti malaalettidi, “Yaatin, ooni attanee?” yaagidi, issy issuwa oychchidsona.

<sup>27</sup> Yesuusi entta tishshi oothi xeellidi, “Hayssi Xoossas dandda7eteesppe attin asas dandda7ettenna; Xoossas ubbabay dandda7ettees” yaagis.

<sup>28</sup> Phexiroosi Yesuusakkko, “Hekko; nuuni nubaa ubbaa aggidi, nena kaallida” yaagis.

<sup>29</sup> Yesuusi “Taani hinttew tuma odays; ta gishonne Wonggelaa gisho keetha woykko ishata woykko michcheta woykko aawa woykko aayiw woykko machchiw woykko nayta woykko gadiya aggiday oonikka, <sup>30</sup> ha77i ha wodiyan xeetu kushe keetha, ishata, michcheta, aayeta, nayta, gadiya, goodetethara issife ekkana. Sinthafe yaana wodiyankka merinaa de7uwa ekkana. <sup>31</sup> Shin daroti ha77i dethan sinthe gididayssati guye gidana, qassi daroti ha77i guye gididayssati sinthe gidana” yaagis.

*Yesuusi bana gakkana metuwa heedzanho odis  
(Maato 20:17-19; Luuqa 18:31-34)*

<sup>32</sup> Yesuusaranne iya tamaaretara Yerusalame bishin, Yesuusi ba tamaareta sinthan hamuttees. Entti malaalettidosona. Iya kaalleyssatikka yayyidosona. Nam77antho, tammanne nam77u tamaareta gaxa kessidi, bana gakkanaabaa dumma enttaw hayssada yaagidi odis. <sup>33</sup> “Hekko, nuuni Yerusalame ha77i keyoos. Yan Asa Na7ay, kahine halaqtasinne higge asttamaaretas aathi imettana. Entti iya bolla hayqo pirddaa pird-dana; qassi Ayhude gidonna deriyas iya aathi immana. <sup>34</sup> He Ayhude gidonna derey iya toochchana, iya bolla cuttana, lisson garaafananne wodhvana. I heedzu gallasappe guye, hayqoppe dendedana” yaagis.

*Yayqoobinne Yohaannisi woossida woosaa  
(Maato 20:20-28)*

<sup>35</sup> Zabdiyoosa nayti Yayqoobinne Yohaannisi Yesuusakkko yidi, “Asttamaariyaw, nuuni nena woossiya issibaa nuus ootharkkii” yaagidosona.

<sup>36</sup> Yesuusi enttako, “Taani hinttew ay oootho?” yaagis.

<sup>37</sup> Entti, “Neeni ne bonchcho kawotethan uttiya wode nuuppe issuwa ushachcha baggara qassi issuwa haddirssa baggara uttisarkki” yaagidosona.

<sup>38</sup> Shin Yesuusi enttako, “Hintte ay woossiyako erekketa, ta uyanaw de7iya xuu7aa uyanaw dandda7etii? Qassi taani xammaqettanaw de7iya xinqqatiya xammaqettanaw dandda7etii?” yaagis.

<sup>39</sup> Entti zaaridi, “Ee dandda7os” yaagidosona.

Yesuusi qassi, “Tumakka ta uyanaw de7iya xuu7aa hintte uyana, taani xammaqettanaw de7iya xinqqatiya hintte xammaqettana. <sup>40</sup> Shin taappe ushachcha baggaranne haddirssa

baggara uttanayssata dooranaw taw maati baawa, shin he bessay Xoossay immanaw giigisi wothidayssatassa” yaagis.

<sup>41</sup> Hankko tammu tamaareti hessa si7ida wode Yayqoobanne Yohaannisa hangettidosona. <sup>42</sup> Yesuusi entta ubbaa baakkoo xeegidi, “Ayhude gidonna asaa halaqati deriya haareyssata geetettidi xeegideteyssanne haareyssatas deriya bolla maati de7eyssa hintte ereeta. <sup>43</sup> Shin hintte giddon hessa mela gidenna; hintte giddon gitatanaw koyey oonikka hinttew aylle gidanaw bessees. <sup>44</sup> Qassi hintte giddon ubbaafe bolla gidanaw koyey oonikka hintte ubbaas aylle gidanaw bessees. <sup>45</sup> Hari attoshin, Asa Na7aykka, asaas oothanawunne darota wozanaw ba shemppuwa aathi immanaw yisippe attin asi iyaw oothana mela yibeenna” yaagis.

*Yesuusi qooqiya Barximoosa ayfiyaa pathis  
(Maato 20:29-34; Luuqa 18:35-43)*

<sup>46</sup> Entti Iyaarkko katama bidosona. Yesuusi ba tamaaretaranne daro asaara Iyaarkkofe keyishin, Ximoosa na7ay, qooqey, Barximoosa geetetteyssi, oge gaxan woossishe uttis.

<sup>47</sup> Barximoosi, yaara aadhdhey Naazirete Yesuusa gidiidayssa si7ida wode ba qaala dhoqqu oothidi, “Dawite na7aa Yesuusa, tana maararkii!” yaagusu oykkis.

<sup>48</sup> Daro asay iya, “Hayza!” gidi hangettidosona.

Shin, I ba qaala kaseyssafe daro dhoqqu oothidi, “Dawite na7aw, tana maararkii!” yaagis.

<sup>49</sup> Yesuusi eqqidi, “Iya haa xeegite” yaagis.

Entti qooqiyakko, “Aylkoy baawa, dendda eqqqa, nena xeegees” yaagidosona. <sup>50</sup> Qooqey ba ma7uwa holi yeggidi, guppi denddi eqqidi, Yesuusakkobis.

<sup>51</sup> Yesuusi, “Taani new ay oothana mela koyay?” yaagis.

Qooqey, “Asttamaariyaw, ta xeellanaw koyays” yaagis.

<sup>52</sup> Yesuusi iya, “Ba, ne ammanoy nena pathis” yaagis. Sohuwarakka iya ayfey xeellin, Yesuusa kaallis.

## 11

*Yesuusi gita bonchchon Yerusalame gelis  
(Maato 21:1-11; Luuqa 19:28-40; Yoha 12:12-19)*

<sup>1</sup> Entti Yerusalame matishe, Shamaho Deriya matan de7iya Beetefaagenne Bitaaniya katamata gakkidosona. Yesuusi ba tamaaretapte nam77ata sinthe kiittidi, <sup>2</sup> “Hinttfe sinthan de7iya gutaa biite; yaa gelida mela oonikka toggiboonna qashon de7iya hare mari hintte demmanna, iya billidi, haa ekki yiite. <sup>3</sup> Oonikka hinttena, ‘Hayssa ays ootheetii?’ yaagidi oychchiko, ‘Goday iya koyees, ellesidi haa yeddana’ yaagite” yaagis.

<sup>4</sup> Entti bidi, hare mari kare bolla oge matan qashettidi de7eyssa demmidi billidosona.

<sup>5</sup> He bessan eqqida issi issi asati enttako, “Hare maraa waataanaw billeeti?” yaagidosona.

<sup>6</sup> Iya tamaareti Yesuusi banttana kiittidayssa odin, asati yeddi aggidosona. <sup>7</sup> Entti hare maraa Yesuusakkobis, bantta ma7uwa iya zokkon hiixin Yesuusi he hare maraa toggis.

<sup>8</sup> Daro asay bantta ma7uwa ogiyan hiiidoresona; qassi harati mitha tashe tashidi, ogen hiiidoresona. <sup>9</sup> Yesuusappe sinthara hamuttiya asaynne iya kaalliya asay bantta qaala dhoqqu oothidi,

“Hosaana!\* Xoossay galatetto!

Godaa sunthan yeysse anjjettidayssa.

<sup>10</sup> Godaa sunthan yaa nu aawa

Dawite kawotethay anjjettidayssa.

Ubbaafe Bolla Saluwan

de7iya Xoossay galatetto”

yaagidosona.

<sup>11</sup> Yesuusi Yerusalame bidi, Xoossa Keetha gelis. Qassi ubbabaa yuuyi xeellidaappe guye, sa7ay qammiya gisho tammanne nam77u tamaaretara Bitaaniya katama bis.

*Yesuusi qanggida balase mithiw  
(Maato 21:18-19)*

<sup>12</sup> Wonttetha gallas entti Bitaaniyappe keyidi bishin, Yesuusi koshattis. <sup>13</sup> Haahon issi balase mithiw haytha xalaala ma77a uttidaaro be7idi, I bolla ayfey beetiko gidi, be7anaw iikko bis, shin iikko I biya wode haytha xalaalappate attin issi ayfekka demmibeenna; ays giikko, balasey ayfiyaa wodey gakkibeenna. <sup>14</sup> Yesuusi he balasiw, “Hiza, neeppe merinaw asi ayfe mooppo” yaagis. Iya tamaareti I geyssa si7idosona.

*Yesuusi Xoossa Keethan zal77eyssata kessis  
(Maato 21:12-17; Luuqa 19:45-48; Yoha 2:13-22)*

<sup>15</sup> Entti Yerusalaame bidosona; Yesuusi Xoossa Keetha gelidi, yan bayzeysatanne sham-meyssata kare goodo oykkis; qassi miishe laammeyssata xarpheezanne holle bayzeysatanne oydiya aathi yeggidi, <sup>16</sup> asi aybibaakka tookkidi, Xoossa Keetha giddora aadhdhonna mela diggis. <sup>17</sup> Yesuusi asaa hayssada yaagidi tamaarssis: “Geeshsha Maxaafan, ‘Ta keethay asi ubbay Xoossaa woossiya keethi gidana’ geettidti xaafettis. Shin hintte iya panggati qosetti gonggolo oothideta” yaagis.

<sup>18</sup> Kahine halaqatinne higge asttamaareti hessa si7idi, iya wodhanaw oge koshshi oykkidosona. Shin daro asay iya timirrtiyen malaalettiya gisho iyaw yayyidosona.

<sup>19</sup> Sa7ay omarssiya wode Yesuusinne iya tamaareti katamaappe gaxa keyidosona.

*Balase mithiya melasu  
(Maato 21:20-22)*

<sup>20</sup> Entti wonttetha gallas he ogiyara aadhdhishe, he balasiya xaphora melidaaro be7idosona. <sup>21</sup> Phexiroosi akeekidi, “Asttamaariyaw, hekko, neeni qanggida balasiya melasu” yaagis.

<sup>22</sup> Yesuusi zaaridi, “Xoossaa ammanite. <sup>23</sup> Taani hinttew tuma odays; oonikka ba wozaanan sidhonna gidabay hananayssa ammanidi, ha deriya, ‘Denddada abban kundda’ yaagikko iyaw hanana. <sup>24</sup> Hessa gisho, taani hinttew odays; Xoossaa hintte woossiyabaanne oychchiyabaa aybaa gidikkoka ekkidaada ammanite, hintte ekkana.

<sup>25</sup> Xoossaa woossanaw hintte eqqiya wode salon de7iya hintte Aaway hintte nagara atto gaana mela, oonikka hinttena naaqidabay de7ikko, iyaw atto giite. <sup>26</sup> Shin asa nagara hintte atto goonna ixxiko, salon de7iya hintte Aawaykka hintte nagaraa hinttew atto geenna” yaagis.

*Yesuusi aybi maatan oothiyako oyshettis  
(Maato 21:23-27; Luuqa 20:1-8)*

<sup>27</sup> Entti zaaridi Yerusalaame bidosona. Yesuusi Xoossa Keethan hamuttishin, kahine halaqati, higge asttamaaretinne cimati iyaakkko yidi, <sup>28</sup> “Neeni hayssaa oothanaw new ay maati de7ii? Woykko new ha maata immiday oonee?” yaagidosona.

<sup>29</sup> Yesuusi zaaridi enttako, “Ta hinttena issibaa oychchana, taw odite. Ta qassi hayssa ay maatan oothiyako, hinttew odana. <sup>30</sup> Yohaannisa xinqqatey Xoossafeyye woykko asappe? Taw odite” yaagis.

<sup>31</sup> Entti bantta giddon palama doomidi, “Nuuni, ‘Xoossafe’ giikko, I nuukko, ‘Yaatin, Yohaannisi odidayssa ays ammanibekketii’” yaagana. <sup>32</sup> ‘Asappe giikko’ asa ubbay Yohaannisi nabe gideyssa eroosona.” Yaani gisho asaas yayyidosona. <sup>33</sup> Hessa gisho, entti Yesuusakkko, “Nuuni erokko” yaagidi zaaridosona;

Yesuusi, “Taaniika hayssa ay maatan oothiyako, hinttew odikke” yaagis.

## 12

*Woyne tokkiya goshshanchchota leemiso  
(Maato 21:33-46; Luuqa 20:9-19)*

<sup>1</sup> Yesuusi enttaw leemison yaagidi odis; “Issi uray woyne atakiltte tokkidi, yuushshi aathidi dirssi diris. Qassi he woyniya gum77iya olaaka bookkis. Iya naaganaw adussa shakko shakkis. Hessafe guye, kothe oothiya asaas immidi, hara biitta bis. <sup>2</sup> Woyne ayfiyaa maxiya wodey gakkin, bana gakkeyssa ekkidi yaana mela, issi ba aylliya kothe aawatakko kiittis. <sup>3</sup> Kothe aawati iya aylliya oykkidi wadhdhidi, mela kushe yeddidosona. <sup>4</sup> Nam77antho hara aylle enttako kiittin, entti he aylliyan huu7iya qoo7idi kawushshidi yeddidosona. <sup>5</sup> Woyne atakilttiya goday qassika hara aylle kiittis. He aylliya wodhidosona, qassi hara darota hessada oothidosona, issota issota wadhdhidi, harata wodhidosona.

<sup>6</sup> “Woyne atakilttiya godaa kiittanaw ubbaafe wurssethan I daro dosiya ba na7aa xalaali attis. I, “Entti ta na7aa bonchchonna aggokona” gidi, ba na7aa enttako kiittis.

<sup>7</sup> “Shin kothe aawati bantta giddon, ‘Laattanayssi hayssa; yedhdhite iya wodhoos; iya laatay nubaa gidana?’ yaagidosona. <sup>8</sup> Na7aa oykkidi wodhidi, iya ahaa woyne atakilttiya giddofe gaxa kessi holdosona.

<sup>9</sup> “Hiza, woyne atakilttiya goday waatanee? Yidi he kothe aawata wodhi onggidi, woyniyo kothe oothiya hara asas immana.

<sup>10-11</sup> ‘Gimbbeysatti boridi ixxida shuchchay  
godaa xaphuwa minthiya,  
ubbaafe aadhdhiya shuchchu gidis.

*Hayssi Goday oothidabaa;*

qassi nu ayfiyaaskka malaalisiyabaa'

yaageyssa Geeshsha Maxaafaappe nabbabibekketii?" yaagis.

<sup>12</sup> Kahine halaqati, higge asttamaaretinne cimati Yesuusi he leemisuwa bantta bolla leemisidayssa erida gisho iya oykkanaaw koyidosona, shin asaas yayyidi, aggi bidosona.

### *Giira giirobabaa*

(Maato 22:15-22; Luuqa 20:20-26)

<sup>13</sup> Qassi iya odaappe bala demmidi, iya oykkana mela, Farisaawetappenne Heroodisa baggataappe guutha asata iyaakko kiittidosona. <sup>14</sup> Entti iyaakko yidi, "Asttamaariyav, neeni tuma odetteyssanne asappe ase shaakkonnayssaa nuuni eroos. Neeni ase dummayakka; qassi Xoossaa ogiya tumatethan tamaarsaasa. Nuuni Roome biittaa Kauwu Qeesares giira giireyssi wogeyye woga gidennet?" Giira giiranee agganee?" yaagidosona.

<sup>15</sup> Shin entta cubbotethaa Yesuusi eridi, "Tana ays paacetii? Ane issi santime tana bessite" yaagis. <sup>16</sup> Entti iyaw ehdosona, "Ha malaynne sunthay ooddeysee?" yaagidi entta oychchis.

Entti, "Roome Kauwu Qeesareyssa" yaagidosona.

<sup>17</sup> Yesuusi zaaridi, "Yaatikko, Qeesareyssa Qeesares, Xoossayssa Xoossaas immitte" yaa-gin entti iyabaa malalettidosona.

### *Hayqoppe denddobaa*

(Maato 22:23-33; Luuqa 20:27-40)

<sup>18</sup> Hayqqida asi denddenna giya Saduquaawetappe issi issi asati Yesuusakko yidi, hayssada yaagidi, iya oychchidosona. <sup>19</sup> "Asttamaariyaw, Musey nuus higgiya xaafishe, 'Machcho ekkida asi na7a yelonna hayqqiko, he hayqqidayssa ishay iya machchiw ekkidi, ba ishaas na7a yelanaw bessees' yaageyssa xaafis. <sup>20</sup> Beni wode laappun ishati de7eyssatappe bayray machcho ekkidi, na7a yelonna hayqqis. <sup>21</sup> Nam77anthoy iyo ekkis, ikka na7a yelonna hayqqis. Heedzanthoyka hessada hanis. <sup>22</sup> Laappunatikka hessatho iyo ekkidi, na7a yelonna hayqqidosona. Ubbaafe guye, qassi he maccasiya hayqqas. <sup>23</sup> Yaatin, laappunati iyo ekkida gisho hayqqida asay hayqoppe denddiya gallas, iya enttafe awussass machcho gidanee?" yaagidosona.

<sup>24</sup> Yesuusi zaaridi, "Hintte baley, Geeshsha Maxaafata woykko Xoossaas wolqqaa eronna gishossa! <sup>25</sup> Hayqqida asay hayqoppe denddiya gallas, salon de7iya kiitanchchota mela gidanaappe attin adde asay ekkokona; macca asay gelekkona. <sup>26</sup> Shin hayqqidayssata dendduwabaa gidikko, Muse maxaafan xaaftedita xuugettiya buuriyabaa odiya bessan, Xoossay Musekko, 'Taani, Abrahame Xoossa, Yisaqa Xoossa, Yayqooba Xoossa' gi-dayssa nabbabibekketii? <sup>27</sup> Hessa gisho, I, paxa de7eyssata Xoossaafe attin hayqqidayssata Xoosse gidenna. Hintte daro balideta" yaagis.

### *Ubbaafe aadhdhiya kiitaa*

(Maato 22:34-40; Luuqa 10:25-28)

<sup>28</sup> Higge asttamaaretapet issoy entti palameyssa shiiqidi si7is. Qassi Yesuusi enttaw loythi zaaridayssa si7idi, "Kiita ubbaafe aadhdhiya kiitay awussee?" yaagidi Yesuusa oychchis.

<sup>29</sup> Yesuusi zaaridi, iya hayssada yaagis: "Kiita ubbaafe aadhdhiya kiitaa si7ite; 'Isra7eele asaw, Goday nu Xoossay issi Godaa. <sup>30</sup> Ne Godaa ne Xoossaas ne kumetha wozanappe, ne kumetha shemppuwafe, ne kumetha qofaappe, ne kumetha wolqqaafe dose' yaagees. <sup>31</sup> Qassi kiita ubbaafe aadhdhiya nam77antho kiitay hayssa; 'Ase ubbaa ne huu7iyada dose'a' yaageyssa; hayssatappe aadhdhiya hara kiiti baawa" yaagis.

<sup>32</sup> Higge asttamaarey Yesuusakko, "Asttamaariyaw, tuma gadasa; neeni 'Xoossay issi Xoossaas xalaala. Iyappe attin hari baawa' gidayssi tuma. <sup>33</sup> Xoossaas kumetha wozanappe, kumetha qofaappenne kumetha wolqqaafe doseysinne qassi ase ubbaa ba huu7iyada doseysi, xuuggiya yarshshuwafenne hara yarshsho ubbaafe aadhdhees" yaagis.

<sup>34</sup> Yesuusi higge asttamaariya zaaroy aadhdhida eranchcho asa zaaro gididayssa be7idi, "Neeni Xoossaas kawotethaafe haakkabaakka" yaagis; hessafe guye, Yesuusa harabaa oychchanaw oonikka minnibeenna.

### *Kiristtoosi oodde na7ee*

(Maato 22:41-46; Luuqa 20:41-46)

<sup>35</sup> Yesuusi Xoossa Keethan tamaarssishe, hayssada yaagis: "Higge asttamaareti Kirist-toosa woygidi Dawite na7a goonaa? <sup>36</sup> Dawitey Geeshsha Ayyaan kumidi,

'Goday, ta Godaa, "Taani ne morkketa  
ne tohoy yedhdhiyaso oothana gakkanaaw,  
hayssan taappe ushachcha baggara utta" gis'  
yaagis. <sup>37</sup> Dawitey ba huu7en Kiristtoosa, 'Godaa' gidi xeegikko, yaatin, Kiristtoosi  
waanidi, Dawite na7a gidi" yaagis.

Daro asay Yesusi geyssa ufayssan si7idosona.

*Yesuusi higge asttamaaretanne Farisaaweta boris  
(Maato 23:1-36; Luuqa 20:45-47)*

<sup>38</sup> Yesuusi tamaarssishe, hayssada yaagis: "Higge asttamaaretappe naagettite; entti  
adussa ma7o ma77idi yuuyeyssanne giyankka asay entta bonchchidi sarotheysa  
dosoosona. <sup>39</sup> Entti Ayhude Woosa Keethatan daro lo77o oyde dosoosona; qassi asi  
banttana mokkiya bessan bonchcho bessi dosoosona. <sup>40</sup> Entti am77eta keethaa bonqidi,  
banttaw lo77o daananaw woosa adussoosona; entti ubbaafe aadhdiya pirdaa ekkana"  
yaagis.

*Am77ee muxaata  
(Luuqa 21:1-4)*

<sup>41</sup> Yesuusi Xoossa Keethan muxaata yeggiya saaxiniya matan uttidi, asay ba miishiya  
he saaxiniyan yeggeyssa be7is; daro dure asay daro miishiya he saaxiniyan yegoosona.  
<sup>42</sup> Issi manqo am77iya yada, nam77u bakkannata he saaxiniyan yeggasu. <sup>43</sup> Yesuusi ba  
tamaareta xeegidi, "Taani hinttew tuma odays; muxaata saaxiniyan yeggida asa ubbaafe  
ha mango am77iya darssada yeggasu. <sup>44</sup> Ays giilkko, harati ubbay banittaw palahida  
miishiyappe yeggidosona. Shin iya ba pacciyaafe, baw de7iya aquwaa kumethi immasu"  
yaagis.

## 13

*Yesuusi Xoossa Keethay laalettanayssa koyrottidi odis  
(Maato 24:1-2; Luuqa 21:5-6)*

<sup>1</sup> Yesuusi Xoossa Keethafe keyishin, iya tamaaretappe issoy, "Asttamaariyaw, ha lo77o  
shuchchaanne ha lo77o shuchcha keethaa be7ay!" yaagis.

<sup>2</sup> Yesuusi zaaridi, "Ha gita shuchcha keethaa be7ay? Ha keethay shuchchi shuchcha bolla  
gimbettida mela laalettonna attenna; issi shuchchika attonna ubbay laalettana" yaagis.

*Goday yaanappe koyrottidi gakkana goodaanne waaya  
(Maato 24:3-14; Luuqa 21:7-19)*

<sup>3</sup> Yesuusi Xoossa keethafe hini baggara Shamaho Deriya bolla uttidashin, Phexiroosi,  
Yayqoobi, Yohaannisinne Inddiriyasi banttarkka iyaakko yidi, <sup>4</sup> "Hayssi awude hananeekko,  
nuus oda; ha ubbay polettana wodiya erisiya malaatay aybee?" yaagidi oychchidosaona.

<sup>5</sup> Yesuusi qassi enttaw hayssada yaagidi odis: "Hinttene oonikka balethonna mela  
naagettite. <sup>6</sup> Daro asati ta sunthan, 'Taani Kiristtoosa' yaagidi tamaarssishe yidi, daro asaa  
balethana. <sup>7</sup> Matan de7iya olaanne haahon de7iya ola wore hintte si7iya wode hirggofite.  
Hessa melabay hananaw bessees, shin wurssethay buroona. <sup>8</sup> Issi biittaa asay hara biitta  
asaara olettana; qassi issi kawotethay hara kawotethatara olettana; biittaa qaaxoy ubba  
bessan banana; koshay daana, shin hessi ubbay yelo iqethas zooke mela.

<sup>9</sup> "Shin hinttee, hintte huu7en naagettite. Ays giilkko, asi hinttene oykkidi, pirdaa  
keethas aathi immana; qassi Ayhude Woosa Keethatankka hinttene lisson garaafana;  
deriya haareyssata sinthaniine kawota sinthan ta gisho hintte markkattanaw eqqana.  
<sup>10</sup> Wurssethay gakkanaappe sinthe Wonggelay koyro dere ubbaas odettanaw bessees.  
<sup>11</sup> Entti hinttene pirdaa keethi ehiya wodenne aathi immiya wode woygidi odaneekko  
koyro hirggofite; he saatiyan Xoossay hinttew immiyabaa odite. Hintteneen Geeshsha  
Ayyaanay odetteesippe attin hinttene gidekketa.

<sup>12</sup> "Ishay ba ishhaa, aaway ba na7aa wodhisana. Nayti banttana yelidayssata bolla  
dendddidi, entta wodhisana. <sup>13</sup> Asay ubbay hinttene ta sunthaan gisho ixxana, shin wurssethi  
gakkanaaw minniday attana.

*Yerusalame gakkana iita metuwa  
(Maato 24:15-28; Luuqa 21:20-24)*

<sup>14</sup> "Shin bashshaan tunatethay eqqanaw bessonaa bessan eqqidashin hintte be7ana."  
(Akekiso: Hessi woy guusseeko nabbabeyssi akekko!) "Yihuda biittan he wode de7eyssati  
deriyakko baqato. <sup>15</sup> Keetha huu7en de7iya uraykka issibaa ekkanaw duge wodhdhidi, ba

soo geloppo.<sup>16</sup> Gaden de7eyssi ba ma7uwa ekkanaaw guye simmofo.<sup>17</sup> He wode qanthatida maccasatasinne dhanthiya maccasatas daro un77a gidana.<sup>18</sup> Shin hayssi ubbay haniya wodey balggo gidonna mela, Xoossaa woossite.<sup>19</sup> Ays giikko, Xoossay alamiya medhdhida wodiyappe doomidi, ha77i gakkanaaw hanibonna metoyenne sinthafekka hanonna metoy asa bolla he wode hanana.<sup>20</sup> Goday he gallasata taybuwa guuthonaako, ase gididay oonikka attenna. Shin I ba doorida asa gisho he gallasata taybuwa guuthees.

<sup>21</sup> “He wode oonikka hinttena, ‘Hekko, Kiristtoosi hayssan de7ees woykko Kiristtoosi hinin de7ees’ yaagikko, hessa ammanoppite.<sup>22</sup> Worddanchcho Kiristtoosatinne worddo nabeti denddidi banntaw dandda7ettiiko, hari attoshin Xoossay dooridayssatakka balethanaw malaatatanne malaalisiyabata bessana.<sup>23</sup> Shin hintte naagetite; taani hinttew ubbabaa kasetada odas.

*Kiristtoosa nam77antho yuussaa  
(Maato 24:29-31; Luuqa 21:25-28)*

<sup>24</sup> “Shin he wode he waayappe guye,  
away dhumana;  
ageenay poo7uwa aggana;  
<sup>25</sup> xoolinttoti saloppe kunddana;  
qassi salon de7iya wolqqatikka qaaxxana.

<sup>26</sup> He wode Asa Na7ay, gita wolqqaranne bonchchuwara shaara giddora yishin entti be7ana.<sup>27</sup> He wode taani kiitanchchota sa7a oyddu bagga kiittana; sa7a gaxappe saluwa gaxa gakkanaw, Xoossay doorida asaa shiishana.

*Wodey gakkidayssa erisiya balase mithiw  
(Maato 24:32-35; Luuqa 21:29-33)*

<sup>28</sup> “Leemisuwa balase mithaafe akeekite; balasiya aaciya wodenne I haythay cil77iya wode torchchey matattidayssa hintte ereeta.<sup>29</sup> Hessadakka, hintte he ubbabay haneysa be7iya wode I matidi pengge gakkidayssa erite.<sup>30</sup> Taani hinttew tuma odays; ha ubbabay banana gakkanaw hayssan de7iya asa ubbay hayqqenna.<sup>31</sup> Saloynne sa7ay aadhhdhana, shin ta qaalay ubbarakka aadhhdhenna.

*Goday yaana gallasaanne saatiya oonikka erenna  
(Maato 24:36-44)*

<sup>32</sup> “Shin he gallasaanne he saatiya Aawa xalaalappe attin hari attoshin salon de7iya kiitanchchota gidin woykko Na7aa gidin oonikka erey baawa.<sup>33</sup> He wodey awude gidaneekko, hintte eronna gisho naagetittenne minnite.<sup>34</sup> Ta yuussay ba keetha aggidi, oge biya uraa mela. Uray ba aylleta huu7en huu7en oosuwa immidi entta ba oosuwas aawa oothis; qassi naageysika minthidi naagana mela kiittis.

<sup>35</sup> “Hessa gisho, minnite. Ays giikko, keethaaway omarssi gidin woykko giddi bilahe gidin woykko kutto waaso gidin woykko wontta guura gidin awude yaanekko, hintte erekketa.<sup>36</sup> Hintte akeekonna I yidi hinttena dhiskkidi de7ishin demmonna mela minnite.<sup>37</sup> Taani hinttew odehyssa asa ubbaas odays; minnite” yaagis.

## 14

*Kiristtoosa bolla maqettidosona  
(Maato 26:1-5; Luuqa 22:1-2; Yoha 11:45-53)*

<sup>1</sup> Paasika Baale bonchchiya gallasaynne Uytha Baale bonchchiya gallasay gakkanaw nam77u gallasi attis. Kahine halaqatinne higge asttamaareti asi eronna Yesuusa oykkidi wodhdhiya oge koyoosona.<sup>2</sup> “Asay ooshshi kessonna mela Paasika bonchchiya gallasan hessa oothoko” yaagidosona.

*Yesuusa shittuwa tiyida maccasiw  
(Maato 26:6-13; Yoha 12:1-8)*

<sup>3</sup> Yesuusi Bitaaniya kataman baro hargganchchuwa Simoona son gibira bolla uttidashin, issi maccasiya albasxiroose giya shuchchafe oosettida philqqaaxe kumetha narddoose giya daro a177o shitto ekkada yasu. He philqqaaxiya menthada shittuwa Yesuusa huu7iyan tigas. <sup>4</sup> He bessan de7iya asappe issov issov hanqettidi, “Ha shittoy mela coo iitey aybisce? <sup>5</sup> Ha shittuwa heedzu xeetu dinaaren\* bayzidi, miishiya manqotas

**13:15** Luuqa 17:31    **13:19** Zaare 12:1; Yo.Qo 7:14    **13:24** Isa 13:10; Er 2:10    **13:25** Isa 34:4; Yo.Qo 6:13; Er 2:10  
**13:26** Zaare 7:13; Yo.Qo 1:7    **13:32** Maato 24:36    **13:34** Luuqa 12:36    **14:1** Kessa 12:1    **14:3** Luuqa 7:37

\* **14:5** heedzu xeetu dinaare: Issi asas laythan cigettila lo77o daamozeppe bolla gidiya miishe.

immanaw dandda7ettees” yaagidi bantta giddon odettidosona. Yaatidi, he maccasiw daro boridosona.

<sup>6</sup> Shin Yesuusi “Ha maccasiw aykkoka gooppite; iyo ays waaysetii? Iya taw lo77obaa oothasu. <sup>7</sup> Manqoti ubba wode hinttera de7oosona. Hintte koyida wode awudekka hintte entta maaddanaw dandda7eeta, shin taani ubba wode hinttera de7ikke. <sup>8</sup> Iya ba dandda7idayssa oothasu; qassi tana moogos giigisanaw kasetada shitto tiyasu. <sup>9</sup> Taani hinttew tuma odays; sa7a ubban Wonggelaa odiyason awunkka, asay iyo akeekana mela ha iya oothidayssi odettانا” yaagis.

*Yihudi Yesuusa aathidi immanaw zorettis  
(Maato 26:14-16; Luuqa 22:3-6)*

<sup>10</sup> Tammanne nam77u tamaaretappe issoy Asqoroota Yihuda geetetteyssi Yesuusa kahine halaqatas aathi immanaw enttako bis. <sup>11</sup> Entti hessa si7ida wode ufayttidi, “Niuni new miishe immana” yaagidosona; Yihudi Yesuusa aathi immanaw injje wode koyees.

*Yesuusi ba tamaaretara Paasika mis  
(Maato 26:17-25; Luuqa 22:7-14,21-23; Yoha 13:21-30)*

<sup>12</sup> Uythaa Baaley bonchchettiya koyro gallas, Paasika kathaa maanaw maraze shukkiya wode Yesuusa tamaareti iyakko, “Paasika bonchchiya gallas neeni maana kathaa nuuni aw bidi giigisino?” gidi oyachchidosona.

<sup>13</sup> Yesuusi ba tamaaretappe nam77ata hayssada yaagidi kiittis: “Katamaa biite; hintte bishin, otora haathe tookkida issi uray hinttera gahettana; iya kaallite. <sup>14</sup> I bidi geliya keethaawa, ‘Asttamaarey neekko, ‘Taani ta tamaaretara Paasika maanaw imatha kifley awunee?’ yaagees’ yaagite. <sup>15</sup> Keethaaway hinttena pooqiyi bolla de7iya giigi uttida dalgga kifile bessana; hessian giigisite” yaagis.

<sup>16</sup> He nam77u tamaareti keyidi, katama bidosona; Yesuusi enttaw odidayssada demmidi, Paasika kathaa giigisidosona.

<sup>17</sup> Sa7ay omarssiya wode Yesuusi tammanne nam77u tamaaretara yaa bis. <sup>18</sup> Entti uttidi kathi mishin, Yesuusi enttako, “Taani hinttew tuma odays; hinttete issoy taara meyssi, tana aathi immana” yaagis.

<sup>19</sup> Iya tamaareti dagammidi, bantta huu7en huu7en, “Tuma taneshsha?” yaagidi iya oyachchidosona.

<sup>20</sup> Yesuusi zaaridi, “He uray hintte tammanne nam77atapppe issuwa; I taara issife tushanaw ba uythaa shaatiyan yeddeyssa. <sup>21</sup> Asa Na7ay, Geeshsha Maxaafay hayqqana gidayssada hayqqana, shin Asa Na7aa, aathi immiya uraa ayye. He uray yelettonna attidaakkoo iyaw lo77oshin” yaagis.

*Godaa kahuwa  
(Maato 26:26-30; Luuqa 22:14-20; 1Qoro 11:23-25)*

<sup>22</sup> Entti miishin, Yesuusi uythaa ekkidi, Xoossa galatis; he uythaa menthidi, ba tamaaretsas immisce, “He7ite, hayssy ta ashawa” yaagis.

<sup>23</sup> Xuu7aa ekkidi, Xoossa galatidi, enttaw immin ubbayka he xuu7appe uyidosona.

<sup>24</sup> Yesuusi, “Hayssy ooratha caaqwanan daro asaa gisho guukkiya ta suuthaa. <sup>25</sup> Taani hinttew tuma odays; taani Xoossaakawotethan ooratha woyniya uyana gallasay gakkanaaw zaarada ha woyniyappe uykike” yaagis.

<sup>26</sup> Mazmure yexxidaappe guye Shamaho Deriya bolla bidosona.

*Phexiroosi kaddanayssa Yesuusi koyrottidi odis  
(Maato 26:31-35; Luuqa 22:31-34; Yoha 13:36-38)*

<sup>27</sup> Yesuusi enttako, “Hintte ubbay tana yeggi aggidi baqtatana; Geeshsha Maxaafay, Xoossay dorssa heemmeyeessa wodhana, dorssati ubbay lalettana”

yaagees. <sup>28</sup> Shin taani hayqoppe denddidaappe guye hinttete kasetada Galiila baana” yaagis.

<sup>29</sup> Phexiroosi zaaridi, “Entti ubbay nena yeggi aggidi baqtikkoka, ta nena aggike” yaagis.

<sup>30</sup> Yesuusi Phexiroosakko, “Taani new tuma odays; hachchi qamma kuttoy nam77u toho waassanaappe sinthe neeni tana heedzu toho kaddana” yaagis.

<sup>31</sup> Shin Phexiroosi kaseyssafe minthidi, “Taani hari attoshin, neera issife hayqqiyakokka, nena kaddike” yaagis. Qassi harati ubbatikka hessada gidosona.

*Yesuusi Geetesemaanen woossis  
(Maato 26:36-46; Luuqa 22:39-46)*

<sup>32</sup> Geetesemaane giya bessaa bidosona; Yesuusi ba tamaaretakko, "Taani Xoossa woosada simmana gakkanaw hintte hayssan uttishite" yaagis.

<sup>33</sup> Yesuusi Phexiroosa, Yayqoobanne Yohaannisa baara ekkidi bis; daro waayettisinne un77ettis. <sup>34</sup> Qassi enttako, "Taani hayqqana gakkanaw azzanas, hayssan gam77ishite; dhiskkofite" yaagis.

<sup>35</sup> Guuthi sinthe shiiqidi, sa7an gufannidi, dandda7ettiabaa gidikko, he waaya saatey baappe aadhdhana mela, Xoossa woossis. <sup>36</sup> Qassi, "Abbaa, ta Aawaw, ubbabay new dandda7ettees, ha waaye xuu7aa taappe digga. Shin ne sheney hanoppe attin ta sheney hanoppo" yaagis.

<sup>37</sup> Yesuusi ba tamaaretakko simmi yidi, entti dhiskkidashin demmidi, Phexiroosakkko, "Simoona, dhikkadii? Neeni issi saatekka barkkada naaganaw dandda7abiikkii?

<sup>38</sup> Paacen hintte gelonna mela barkkidi naagittenne Xoossa woossite. Hinttew lo77o amoy de7ees, shin hintte daaburanchcho asi" yaagis.

<sup>39</sup> Qassika bidi kaseyssadakka Xoossa woossis. <sup>40</sup> Ba tamaaretakko guye simmidi yaa wode dhiskkidashin demmis. Entta ayfiyaa dhiskkoy goozi wothida gisho iyaakkko ay odettiyyakokka erokkona.

<sup>41</sup> Heedzanthro enttako yidi, "Ha77i gakkanawukka dhiskkeetinne shemppetii? Hiza, gidana; saatey gakkis; be7ite! Asa Na7ay, nagaranchcho asatas aadhdi imettana wodey gakkis. <sup>42</sup> Denddidi yedhdhite; be7ite, tana aathi immanayssi gakkis" yaagis.

*Yesuusi ba morkketa kushen oykettis*

(Maato 26:47-56; Luuqa 22:47-53; Yoha 18:3-12)

<sup>43</sup> Yesuusi hessa buroo odishin, tammanne nam77u iya tamaaretappe issov, Yihudi, ellesiti gakki wodhdhis. Qassi kahine halaqati, higge asttamaaretinne cimati kiittin, mashshenne xam77a oykkida daro asay iyara issife yidosona. <sup>44</sup> Yesuusa aathi immanayssi he daro asas, "Taani yeerey iya; iya oykkidi, loythi naagidi, ekki efite" yaagidi malla odi wothis.

<sup>45</sup> Yihudi gakki wodhdhida mela Yesuusakkko shiiqidi, "Asttamaariyaw" yaagidi Yesuusa yeeri ekkis. <sup>46</sup> He daro asay Yesuusa oykkidosona. <sup>47</sup> Shin matan eqqidayssatappé issov ba mashshaa shoddidi kahine halaqaa aylliya shocidi, iya haytha qanxidi holis.

<sup>48</sup> Yesuusi zaaridi, he shiiqida daro asaakkoo, "Tana pangga kessidi, pangga oykkeyssada oykkanaaw mashshenne xam77a oykkidi yidetii? <sup>49</sup> Taani Xoossa Keethan tamaarssashe, gallas gallas hinttera de7iya wode tana oykkibeeekketa, shin Geeshsha Maxaafay gidayssi polettanaw bessees" yaagis.

<sup>50</sup> Iya tamaareti ubbay iya yeggi aggidi baqatidosona.

<sup>51</sup> Laxana xalaala ma77ida issi naatetha uray Yesuusa kaalleyssa asay oykkis. <sup>52</sup> Shin he uray laxana yeggi aggidi, xire kallo baqatis.

*Yesuusa pirdda Shanggo sinthe efidosona*

(Maato 26:57-68; Luuqa 22:54-55,63-71; Yoha 18:13-14,19-24)

<sup>53</sup> Asay Yesuusa kahine halaqaa soo efidosona. Yan kahine halaqati, cimatinne higge asttamaareti shiiqidi de7oosona. <sup>54</sup> Phexiroosi kahine halaqaa zabbaa gakkanaw haahon iya kaalli bidi yan naageyssatara uttidi tama kayees.

<sup>55</sup> Kahine halaqatinne shiiqida asa ubbay Yesuusa wodhanaw iya bolla markka koyidosona, shin aykkoka demmibookkona. <sup>56</sup> Daro asati iya bolla worddo markkattidosona, shin entta markkatehay issino giden.

<sup>57-58</sup> Issi issi asati denddi eqqidi Yesuusa bolla, "I, 'Taani asi keexida ha Xoossa Keetha laallada, asa kushen keexettiboonna hara Xoossa Keetha heedzu gallasa giddon keexana' gishin nuuni si7ida" yaagidi worddo markkattidosona. <sup>59</sup> Gidoshin, entta markkatehay hessankka issino giden.

<sup>60</sup> Kahine halaqay asa ubbaa sinthan denddi eqqidi, "Hayssati nena mootiya mootuwas ne zaariyab aybawe?" yaagidi Yesuusa oychchis. <sup>61</sup> Shin Yesuusi si77i gis; aykkoka zaariebenna. Kahine halaqay, "Anjettida Xoossa Na7ay, Kiristtoosi neneyye?" yaagidi zaari oychchis.

<sup>62</sup> Yesuusi zaaridi, "Ee tana, hintte Asa Na7ay, wolqqaama Xoossaafe ushachcha baggara uttidashin qassi saluwa shaarara yishin be7ana" yaagis.

<sup>63</sup> Kahine halaqay ba ma7uwa peedhidi, "Nuna hara markka ay koshshii? <sup>64</sup> Hintte iya cashshaa si7ideta; hintte qofay aybee?" yaagis. Entti ubbay, "I hayqqanaw bessees" yaagidi iya bolla pirddidosona.

<sup>65</sup> Enttafe issoti issoti iya bolla cutethi oykkidosona. Iya ayfiyaa goozidi baqqishe, "Nena dechchiday oonee? Ane nuus oda!" yaagidosona. Naageyssati iya ekki efidi garaafidosona.

*Phexiroosi Yesuusa kaddis**(Maato 26:69-75; Luuqa 22:56-62; Yoha 18:15-18,25-27)*

<sup>66</sup> Phexiroosi kahine halaqaa zabban garssa baggara de7ishin, kahine halaqaa macca aylletappe issinniya yaa yasu. <sup>67</sup> Phexiroosi tama kayeyssa be7ada, tishshi ootha xeellada, “Neenikka Naazirete Yesusara de7aasa” yaagasu.

<sup>68</sup> Shin Phexiroosi, “Ne geyssi aybeekko ta erikke, taw akekettenna” yaagidi kaddis. Yaagi simmidi zago keyyaa wode sohuwara kuttooy waassis.

<sup>69</sup> He aylliya Phexiroosa be7ada, iya matan eqqida asatakkoo, “Ha uraykka enttara de7ees” gada zaara odasu. <sup>70</sup> Shin Phexiroosi qassika kaddis.

Guuthi gam77ishin, matan eqqida asati nam77antho Phexiroosakko, “Neeni Galiila biitta asi gidiya gisho tuma enttara de7aasa” yaagidosona.

<sup>71</sup> Shin Phexiroosi, “Taani hintte giya uraa erikke!” yaagidi bana qanggethinne caaqp oykkis.

<sup>72</sup> Sohuwara kuttooy nam77antho waassi aggis. Phexiroosi Yesuusi iyaakkoo, “Neeni kuttooy nam77u toho waassanaappe sinthe heedzu toho tana kaddana” iyaakkoo gidayssa akekidi daro yekkis.

**15***Yesuusa Philaaxoosakko efidosona**(Maato 27:1-2,11-14; Luuqa 23:1-5; Yoha 18:28-38)*

<sup>1</sup> Wonttaguura ellesidi kahine halaqati, cimati, higge asttamaaretinne Ayhude shanggoti ubbay shiiqidi maqtetidosona. Entti Yesuusa qachchi efidi Philaaxoosas aathi immidosona.

<sup>2</sup> Philaaxoosi iyakko, “Neeni Ayhudeta kawo?” yaagidi oychchis.

Yesuusi zaaridi, “Ne gadasa” yaagis.

<sup>3</sup> Kahine halaqati Yesuusa daroban mootidosona. <sup>4</sup> Shin Philaaxoosi zaaridi Yesuusakko, “New zaariyabay baawe? Entti ne bolla ay mela mootuwa ehiyakko be7ikki?” yaagis.

<sup>5</sup> Shin Yesuusi harabaa zaaronna ixxin, Philaaxoosi malaaleettis.

*Yesuusa hayqo gidi pirddidosona**(Maato 27:15-26; Luuqa 23:13-25; Yoha 18:39-40; 19:1-16)*

<sup>6</sup> Philaaxoosas Paasika Baale bonchchiya gallasan asay koyaa issi uraa qashoppe billiya meezeiy de7ees. <sup>7</sup> He wode issi Barbaana giya uray ooshshu kessidi shemppo wodhida asatarra issife qasho keethan de7ees. <sup>8</sup> Shiiqida daro asay Philaaxoosi kaseyssada oothana mela iya oychchidosona. <sup>9</sup> Philaaxoosi asa zaaridi, “Taani hinttew Ayhudeta kawuwa billanayssa koyeetii?” yaagidi oychchis. <sup>10</sup> Hessa I giday, kahine halaqati Yesuusa qanaattidi aathi immidayssa eriya gishossa.

<sup>11</sup> Shin kahine halaqati Yesuusa gisho Barbaana billanaada, he shiiqida asay Philaaxoosa woossana mela asa maqqidosona. <sup>12</sup> Philaaxoosi zaaridi, “Yaatin, ha hintte Ayhude kawo geysya waato?” yaagis.

<sup>13</sup> Asay Philaaxoosa bolla waassidi, “Masqaliya bolla iya kaqqqa” yaagidosona.

<sup>14</sup> Philaaxoosi asaakkoo, “Ays? I ay iittaba oothidee?” yaagis.

Shin asay kaseyssafe gujji waassidi, “Masqaliya bolla iya kaqqqa” yaagidosona.

<sup>15</sup> Philaaxoosi asaa ufayssanaw koyidi, Barbaana asaas billis; yaatidi lisson Yesuusa garaafidi, masqaliya bolla kaqqana mela enttaw aathi immis.

*Wotaaddareti Yesuusa toochchidosona**(Maato 27:27-31; Yoha 19:2-3)*

<sup>16</sup> Hessafe guye, wotaaddareti Yesuusa deriya haareyssa ooso keetha ekki efidi, hara wotaaddareta ubbaa issife xeegidosona. <sup>17</sup> Qassi zo7o afilaa iya mayzidosona; aguntha kalachcha giigisidi, iya huu7en wothidosona. <sup>18</sup> Hessafe guye, iyakko, “Ayhudeta kawuwaw mirinaw kawota” yaagidi, iyaw ziggidosona. <sup>19</sup> Iya huu7iya xam77an shocidosona; qassi iya bolla cuttidosona; gulbatidi iyaw goynnidosona. <sup>20</sup> Iya toochchidayssafe guye zo7o afilaa iyappe qaari ekkidi, iya afilaa iya mayzidi masqaliya bolla iya kaqqanaw ekki efidosona.

*Yesuusa kaqqidosona**(Maato 27:32-44; Luuqa 23:26-43; Yoha 19:17-27)*

<sup>21</sup> Entti bishe, Iskkinddirenn Rufoosa awaa, Simoona giya Qereena biitta asi, gaxareppe katama yeysara gahettidi, Yesuusa masqaliya wolqqan toossidosona. <sup>22</sup> Yaatidi Golggotta giya bessaa Yesuusa efidosona. “Golggotta” guussay “Huu7e guugge” guussu. <sup>23</sup> Sakoy si7ettonna mela karbbe giya dhaley walakettida woyne uyo gidi iyaw immidosona. Shin

I uyonna ixxis.<sup>24</sup> Entti masqaliya bolla iya kaqqidosona. Oona aybi gakkaneekko gidi iya afilaa shaakkidi saama yeggidosona.

<sup>25</sup> Entti masqaliya bolla iya kaqqiya wode wonttafe heedzu saate. <sup>26</sup> Entti, "Ayhudeta kawuwa" yaagidi iya mootiya xuufe xaafidi wothidosona. <sup>27</sup> Yesuusara nam77u pangata issuwa iyappe ushachcha baggara hankkuwa iyappe haddirssa baggara masqaliya bolla kaqqidosona. <sup>28</sup> Geeshsha Maxaafay, "Iitabaa oothida asatara I paydettis" geetettidayssi polettis.

<sup>29</sup> Ogiyara aadhdhiya asay Yesuusa kadhidi, bantta huu7iya qaathiddi cayidosona; "Hekko! Xoossa Keetha laallada heedzu gallasa giddon keexeyss, ne huu7iya ashsha; 30 ane masqaliya bollafe wodhdha" yaagidosona.

<sup>31</sup> Hessadakka, kahine halaqati higgiya tamaarsseyssatarra issife Yesuusa toochchidi, "Harata ashshis, shin bana ashshanaw dandda7enna; <sup>32</sup> nuuni be7idi ammanana mela Kiristtoosi, Isra7eele Kawoy, ane masqaliya bollafe ha77i wodhdho" yaagidosona. Qassi hari attoshin, iyara masqaliya bolla kaqettidayssatikka iya toochchidosa.

### *Yesuusi hayqqis*

(Maato 27:45-56; Luuqa 23:44-49; Yoha 19:28-30)

<sup>33</sup> Usuppuun saatepppe doomidi, uddufun saate gakkanaw biitta ubbay dhumi. <sup>34</sup> Uddufun saatiyan Yesuusi ba qaala dhoqqu oothidi, "Elohee, Elohee, laama sabaqtani?" yaagis. Hessa guussay, "Ta Xoossaw, ta Xoossaw, tana ays aggadi?" guussu.

<sup>35</sup> Hessian eqqida asappe issoy issoy hessa si7idi, "Hekko, Eliyaasa xeegees" yaagis. <sup>36</sup> He asappe issoy woxxidi, ispponjen caala woyne kunthis; hessa xam77a xeeran wothidi, "Naagite; Eliyaasi masqaliyappe iya wodhisanaw yaanekko ane be7oos" yaagidi Yesuusa doonaakkoo ushshanaw shiishis.

<sup>37</sup> Yesuusi ba qaala dhoqqu oothi waassidi, hayqqis.

<sup>38</sup> Xoossa Keethan kaqettida magaraajjoy qommofe duge gakkanaw, nam77u keyidi daaketi wodhdhis. <sup>39</sup> Masqaliyappe sintha baggara yan eqqida issi mato halaqay, Yesuusi waanidi hayqqidaakkoo be7ida wode "Ha uray tuma Xoossaa Na7a" yaagis.

<sup>40</sup> Hessa haahon eqqidi be7iya guutha maccasati de7oosona. Entta giddon Magdela Mayraama, kaaluwa Yaygoobanne Yoosa aayyaa Mayraamanne Salooma de7oosona. <sup>41</sup> He macca asati Yesuusi Galiihan de7iya wode iya kaallidayssatanne iya mokkidayssata qassi Yesuusara issife Yerusalame bida hara daro macca asati yan de7oosona.

### *Yesuusi moogettis*

(Maato 27:57-61; Luuqa 23:50-56; Yoha 19:38-42)

<sup>42-43</sup> Sa7ay omarssida wode shiqida asan bonchchettida Ayhude shanggotappe issoy, Yoosefa giya uray, Xoossaa kawotethay yaanayssa naagishe de7eyssi, Armmatiyasa katama asi de7eyssi yis. Wonttethe Sambbaatas giigettiya gallas gidida gisho Yoosefi minnidi Philaaxoosakko bidi, Yesuusa ahaa ekkanaw woossis. <sup>44</sup> Philaaxoosi Yesuusi hayqqidayssa si7ida wode malalettis; mato halaqaa xeegid, "I hayqqidi gam77idee?" yaagidi oychchis. <sup>45</sup> Philaaxoosi Yesuusi hayqqidayssa mato halaqaappe si7idi iya ahaa Yoosefas immis. <sup>46</sup> Yoosefi moogo afila shammis; Yesuusa ahaa masqaliyappe wothidi, afilan xaaxidi, shuchchafe woocettida duufo giddon iya aha moogis. Qassi he duufuwa doonan gita shuchchu gondedorssidi wothis. <sup>47</sup> Magdela Mayraamanne Yoosa aayyaa Mayraama Yesuusa ahaa entti awun wothiyako be7oosona.

## 16

### *Yesuusi hayqoppe denddis*

(Maato 28:1-8; Luuqa 24:1-12; Yoha 20:1-10)

<sup>1</sup> Sambbaatay aadhdhidaappe guye Magdela Mayraama, Yaygooba aayyaa Mayraamanne Salooma bidi, Yesuusa ahaa tiyanaw shitto shammidosona. <sup>2</sup> Wogga wode wonttaa daru guura xalqeey caarshin, duufuwa bidosona. <sup>3</sup> Entti bantta giddon issoy issuwaru, "Duufuwa doonappe nuus shuchchaa oonee gondedorssidi digganay?" yaagidi odettidosona.

<sup>4</sup> Entti xeelliya wode he daro gita shuchchay gonddorettidi kichchidayssa be7idosona. <sup>5</sup> Yesuusi moogettida duufuwa giddo geliya wode issi pantha addey boootha ma7o ma77idi, ushachcha baggara uttidayssa be7idi dagammidosona.

<sup>6</sup> Shin I enttako, "Dagammodfite; masqaliya bolla kaqettida, Naazirete Yesuusa hintte koyeyssa taani erays. I hayssan deenna, hayqoppe denddis. Entti iya moogida bessaa hayssa be7ite. <sup>7</sup> Ha77i bidi Yesuusa tamaaretasinne Phexiroosas, 'Yesuusa hinttefie sinthattiidi Galiila bees. I hinttew odidayssada hintte iya yan be7ana' yaagidi odite' yaagis.

<sup>8</sup> Maccasati yashshan kokkorishe duufuwappe keyidi baqatidosona. Qassi entti yayyida gisho hessa ooddeskka aykkoka odibookkona.\*

*Yesuusi Magdela Mayraamis benttis  
(Maato 28:9-10; Yoha 20:11-18)*

<sup>9</sup> Yesuusi hayqoppe denddidaappe guye woggaga gallas wontta, laappun tuna ayyaanata kessida Magdela Mayraamis koyrottidi benttis.<sup>10</sup> Iya bada kase iyara de7eyssatas, entti azzanishenne yeekkishe de7ishin odasu. <sup>11</sup> Shin Yesuusi paxa de7eyssanne iw benttidayssa entti si7ida wode iya geysa ammanibookkona.

*Yesuusi nam77u ba tamaaretas benttis  
(Luuqa 24:13-35)*

<sup>12</sup> Hessafe guye, enttafe nam77ati katamaappe keyidi bishin, oge bolla Yesuusi kaseyssafe dummatidi enttaw benttis. <sup>13</sup> Entti guye simmidi, haratas odidosona, shin haratikka entta odaa tuma gibookkona.

*Yesuusi tammanne issi ba tamaaretas benttis  
(Maato 28:16-20; Luuqa 24:36-49; Yoha 20:19-23; Ha.O 1:6-8)*

<sup>14</sup> Guyeppe tammanne issi iya tamaareti kathi miishin, Yesuusi enttaw benttis. Enttaw ammanoy baynna gishonne hayqoppe I denddidayssa be7ida asay odin entti ammanonna ixxida gisho I entta boris.

<sup>15</sup> I enttako, "Biiitta ubbaa bidi asa ubbaas Wonggelaa odite. <sup>16</sup> Ammaneyynne xam-maqetey attana, shin ammanonnay pirddettana. <sup>17</sup> Ammaneyssatas ha malaatati imet-tana. Entti ta sunthan tuna ayyaanata kessana, ooratha doonan odettana. <sup>18</sup> Entti shoooshu oykkikokka woykko wodhiyabaa uyikkoka entta qohenna. Qassi entti bantta kushiya hargganchchota bolla wothidi entta pathana" yaagis.

*Yesuusi pude salo keyis  
(Luuqa 24:50-53; Ha.O 1:9-11)*

<sup>19</sup> Goday Yesuusi tamaaretara odettidaappe guye pude salo keyis; Xoossaafe ushachcha baggara uttis. <sup>20</sup> Iya tamaareti bidaso ubban qaala odidosona. Godaykka enttara issife oothees. Entti odiya qaalay tuma gididayssa Xoossay enttaw immiya malaatatan erisis.

---

\* **16:8** Issi issi beni maxaafati Marqquoosa Wonggelaa paydo 8 bolla essoosona. Qassi issi issi maxaafati paydo 9-20 gakkanaw de7iya qofaa gujjokona. Gidoshin, paydo 8 kaallidi de7iya gujjoosona. Hessika [Maccasati bidi, kiitanch-choy odidabaa ubbaa Phexiroosasinne iyara de7eyssatas qanthan odidosona. Hessafe guye, Yesuusi ba tamaareta geeshshinne merinaa atotethaa Wonggelaa kiitaa dolohappe wuloha gakkanaw kiittis.] **16:15** Ha.O 1:8      **16:19** Ha.O 1:9

## Luuqaasi Xaafida

### Yesuus Kiristtoosa Wonggelaa

### Gaatha Qofaa

Yesuusi doorida tammanne nam77u hawaareta giddon Luuqaasi deenna. Luuqaasa Wonggelay, Yesuusi koyro nabeta doonan yaana geetettidi odettidayssa, Isra7eeleti kasepppe naagishe de7ida "Kiristtoosa" gideyssanne asa zerethi ubbaa ashsheyssa gideyssa qonccisees. Luuqaasi, ba maaxafan Yesuusi, "Manqotas Wonggelaa sabbakanaw" ba aawappe kiietidayssa gideyssanne he Wonggelay asas de7iya dumma dumma metuwappe kesseyssa gideyssa odee. Luuqaasa Wonggelaa giddon, Yesuusa yuussabaa odiya koyro shemppotanine Yesuusi pude salo keyidayssa odiya wurssetha shemppotan qonccidi odettiday ufayssabaa. Yesuusi salo keyidaappe guye ammanoy waanidi dicci-dakkonne dalggidaakk odiya taarikiya ha Wonggelaa xaafey hawaareta ooso maxaafan xaafis.

Kiitanchchota mazmuriyabaa, Yesuusi yelettiida wode henthachchoti bidi be7idayssa odiya taarikay, Yesuusi na7atethan Xoossa Keethi bidayssa, qadhetiya Samaare ad-diyyabaanne dhayidi benttida na7abaa odiya taarikay, Luuqaasa Wonggelaa xalaalan benttiya taarike. Luuqaasa Wonggelan gaxappe gaxa gakkanaw de7iya waanna qofati woosabaa, Geeshsha Ayyaanabaa, Yesuusa oosuwa giddon maccasatas de7iya bessaanne Xoossay nagara maareyssa.

#### **Luuqaasa Wonggelaa ayfe qofata**

Gelo qofaa 1:1-4

Xammaqiya Yohaannisanne Yesuusa yeletethaa 1:5-2:52

Xammaqiya Yohaannisa oosuwa 3:1-20

Yesuusa xinqqatiyanne paacetethaa 3:21-4:13

Yesuusi Galililan oothida oosuwa 4:14-9:50

Galiilappe Yerusalemme gakkanaw 9:51-19:27

Wurssetha saaminta Yerusalemme heeran 19:28-23:56

Hayqoppe denddo, qonccethaanne salo kessaa 24:1-53

<sup>1</sup> Bonchcho Tewofiloosa, nu giddon polettidabas daroti, banttaw dandda7ettida mela xaafidosona. <sup>2</sup> He taarikiya entti xaafiday koyroppe doomidi ayfe markkatinne qaala haggazeysatti nius odidayssa. <sup>3</sup> Takka ta baggara koyroppe akeeka xeellidaappe guye he taarikiya hanotaa maarayada new xaafoy taw lo77o gidi benttis. <sup>4</sup> Hessika, ne tamaaridabay tuma gideyssa erisanaassa.

#### *Xammaqiya Yohaannisa yeletethaa*

<sup>5</sup> Yihuda kawuwa Heroodisa wode Abiya yaraappe gidida Zakkariyaasa giya Ayhude kahiney de7ees. Iya machchiyaka Aarona sheeshaappe. I sunthaykka Elssabeeexo. <sup>6</sup> Nam77ayka Godaa wogaanne kiita ubbaa naagidi borey baynna Xoossaa sinthan xilotethan de7idosona. <sup>7</sup> Hanoppe attin Elssabeeexa maynthi gidida gisho enttaw na7ibaawa. Nam77ayka qassi cimidosona.

<sup>8</sup> Issi gallas Zakkariyaasi ba gishuwa maaran Xoossaa sinthan kahinetethan haggazees.

<sup>9</sup> Kahinetetha wogan Xoossa Keethi gelidi ixaane cuyisanaw iya saami gakkis. <sup>10</sup> Ixaaney cuya wode asay karen woosees.

<sup>11</sup> Godaa kiitanchchoy yarshshiya bessaafe ushachcha baggara eqqidi benttis. <sup>12</sup> Zakkariyaasi iya be7ida wode dagammidi daro yayyis. <sup>13</sup> Shin kiitanchchoy iyaakk, "Zakkariyaasa yayyofo; ne woosay si7ettis. Ne machchiya Elssabeeexa adde na7a yelana, iya Yohaannisa gada ne sunthana. <sup>14</sup> I new injjenne ufayssi gidana; daroti iya yeletethan ufayttana. <sup>15</sup> Godaa sinthan I gita gidana; woyne ushshaa gidin hara mathoya ushshaa uyenna. Ba aaye ulon de7ishe Geeshsha Ayyaan kumana. <sup>16</sup> Isra7eele asatappe daroto bantta Godaa, Xoossaakk zaarana. <sup>17</sup> Aawata wozana naytakko zaarana, kiitettonayssata xillota cincatethaako zaarana mela, Godaa bessiya dere giigisanaw Eliyasa ayyaaninanne wolqqan Godaa sinthan baana" yaagis.

<sup>18</sup> Zakkariyaasi kiitanchchuwako, "Ta hessa aybin eranee? Taaranne ta machcheera cimida" yaagis.

<sup>19</sup> Kuitanchchoy zaaridi, "Taani Xoossa sinthan eqqiya Gabreele. Ha mishirachchuwa new odanaw Xoossaafe kiietetas. <sup>20</sup> Hekko, wodiya naagidi polettiya ta qaala ne ammanonna ixxida gisho hayssi polettana gakkaw neeni muume gidana, odettanawukka dandda7akka" yaagis.

<sup>21</sup> He wode Zakkariyaasi Xoossa Keethi gelidi gam77ida gisho aybi hanide gidi asay karen naagishe gam77is. <sup>22</sup> I kare keyidi enttana odisanaw dandda7ibeenna. Malli besoppe attin odettanaw dandda7onayssa be7ida wode qonccethi be7idayssa eridosona.

<sup>23</sup> Zakkariyaasi haggazo wodiya polidi ba soo simmis. <sup>24</sup> Hessafe guye, iya machchiya Elssabeeexa qanthatasu. Ichchashu ageena kumethi bana geenthada gam77asuu. <sup>25</sup> Iya, "Goday ba maarotan ta boriya asaa giddofe digganaw be7idi ha wodiyen hayssa oothis" yaagis.

#### *Yesuusa yeletethay koyrottidi odetti*

<sup>26</sup> Elssabeeexa qanthatin usupuntha ageenan, Xoossay kiitanchchuwa Gabreele Galila biittan de7iya Naazirete katamaa kiiitis. <sup>27</sup> Kauwu Dawite sheeshaaappe gidida Yoosefa giya uraas oyshettida geela7eekko kiiitis. He geela7iya Mayraamo geetettawusu. <sup>28</sup> Kiitanchchoy iikko bidi, "Daro dosettidare, saroy new gido, Xoossay neera de7ees" yaagis.

<sup>29</sup> Mayraama iya odan daro dagammada, "Hayssi aybi sarothro" gada heetasu. <sup>30</sup> Kuitanchchoy zaaridi, "Mayraame, babbofa; neeni Xoossa sinthan saba demmadasa.

<sup>31</sup> Hekko neeni qanthatana adde na7a yelana, iya sunthaaka Yesuusa gada sunthana.

<sup>32</sup> I gitu gidana, Ubbaafe Bolla Xoossa na7aa geetetti xeegettana. Godaa Xoossay iya aawa Dawite araata iyaw immana. <sup>33</sup> I Yayqooba sheeshaa bolla merinaw kawotana; iya kawotethaas zawi baawa" yaagis.

<sup>34</sup> Mayraama kuitanchchuwako, "Hessi waanidi hananee? Ta adde erikke" yaagisu.

<sup>35</sup> Kuitanchchoy zaaridi, "Geeshsha Ayyaanay ne bolla wodhdhana, Ubbaafe Bolla Xoossa wolqqay ne bolla kuyattana. Hessa gisho, yelettiya geeshsha na7ay Xoossa Na7aa geetettana. <sup>36</sup> Hekko, ne dabbija Elssabeeexa ba cimatetha laythan adde na7a qanthatasu. Iya maynhi geetettidaaro, shin ha77i usupuntha ageena oykkasu. <sup>37</sup> Xoossa xooniyabay baawa" yaagis.

<sup>38</sup> Mayraama, "Hekko, taani Godaa aylliw, ne qaalada taw hano" yaagisu. Hessafe guye, kuitanchchoy ippe shaakettis.

<sup>39</sup> Mayraama he saaminttan denddada Yihuda biittan de7iya issi geze katama basu.

<sup>40</sup> Zakkariyaasa soo gelada Elssabeeexo sarothusu. <sup>41</sup> Elssabeeexa Mayraami sarothusu si7ida wode I uluwan de7iya na7ay ufayssan guppis. Elssabeeexa Geeshsha Ayyaanay kumada, <sup>42</sup> ba qaala dhoqqu oothada, "Neeni maccasaa giddofe anjjettidaaro, ne qanthatida na7aykka anjjettidayssa. <sup>43</sup> Hanoshin, ta Godaa aaye, neeni taakko yaana mela taani oonee? <sup>44</sup> Hekko ne sarothusu ta si7ida wode ta uluwan de7iya na7ay ufayssan guppis.

<sup>45</sup> Goday polana gidi immida qaala ammanidaara, iya anjjettidaaro" yaagisu.

#### *Mayraami mazmuriya*

<sup>46</sup> Mayraama hayssada yaagisu:

"Ta shemppiya Godaa bonchchawusu,

<sup>47</sup> ta Ayyaanay dhaliya Xoossan ufayttees.

<sup>48</sup> I ba aylle kawushshatethaa be7is.

Hachchife doomidi yeletethi ubbay tana anjjettidaaro gaana.

<sup>49</sup> Ays giukko, wolqqaama gidida I, taw gitabaa oothis.

Iya sunthay Geeshshaa.

<sup>50</sup> Iya bonchcheysata bolla,

    iya maarotethay merinaappe merinaa gakkanaassa.

<sup>51</sup> Ba gesiyian minobaa oothis,

    bantta wozanan otortteyssata laallis.

<sup>52</sup> Wolqqaama kawota araataappe kawushshis;

    bantana kawushshidayssata kabboys.

<sup>53</sup> Koshattidayssata lo77oban kalssis,

    shin dureta mela kushe yeddiss.

<sup>54</sup> Ba maarota qoppidi,

    Ba aylliya Isra7eеле maaddis.

<sup>55</sup> Hessika nu aawatas odida qaala,

    Abrahamesinne iya sheeshas gidayssa merinaw polanaassa"

yaagasu.

<sup>56</sup> Mayraama Elssabeexi matan heedzu ageena mela gam77ada ba soo simmasu.

### Xammaqiyā Yohaannisa yeletethaa

<sup>57</sup> Elssabeexis yelo qammay gakkin adde na7a yelasu. <sup>58</sup> I shoorotinne I dabboti Goday gitā maarota oothidayssa si7idi, iira issife ufayttidosona. <sup>59</sup> Hosppuntha gallasan yooga na7aa qaxxaranaw yidosona. Iya aawa sunthan Zakkariyaasa gidi sunthanaw koyidosona. <sup>60</sup> Shin aayyaa, "Akkay, Yohaannisa geetettanaw bessees" yaagasu. <sup>61</sup> Enttika, "Ne dabbottape ha sunthan xeegettiday oonikka baawa" yaagidosona. <sup>62</sup> Iya aaway oona gidi sunthaneekko eranaw koyidi iya malla oychchidosona. <sup>63</sup> Ixaafiyabaa oychchi ekkidi, "Iya sunthay Yohaannisa" gidi xaafis. Ubbay I xaafidayssa be7idi malaalettidosona. <sup>64</sup> Iira Zakkariyaasa inxarssay biletts, Xoossaa galatishe odetethi oykkis. <sup>65</sup> Shooroti ubbay yashshan kumidosona. Ha hanidabay geze Yihuda biittan odettis. <sup>66</sup> Hessa si7ida ubbay, "Ha na7ay ay hananddeshsha" gidi bantta giddon odettidosona. Godaa kushey iyara de7ees.

### Zakkariyaasa mazmuriya

<sup>67</sup> Yohaannisa aaway Zakkariyaasi Geeshsha Ayyaanān kumidi hayssada yaagidi tinbbite odis.

<sup>68</sup> "Isra7eeliya Goday galatetto,  
yidi ba asaa wozis.

<sup>69</sup> Ba aylliya Dawite keethan  
atotethaa kaciya denthis.

<sup>70</sup> Hessika beni wode geeshsha nabeta doonan odettidayssa mela,

<sup>71</sup> Iya ashoy nu morkketappenne  
nuura eqettiya ubbaa kushiyappe.

<sup>72</sup> Hessa I oothiday nu awatas ba maarota bessanaasinne,  
ba geeshsha caaqua wa naaganaassa.

<sup>73</sup> Nu aawa Abrahames caaqqida  
caaqua qoppanasinne

<sup>74</sup> nu morkketa kusheppē kessidi  
yashshi baynna iya haggaazana melassa.

<sup>75</sup> Nu laytha ubban geeshshatethaninne xillotethan  
ba sinthan nuna essanaassa.

<sup>76</sup> Qassi laa na7aw, neeni Ubbaafe Bolla Xoossaa nabe geetettana.  
Godaa ogiya loythanaw ne iya sinthan baana.

<sup>77</sup> Entta nagaray qushettin,  
entti atotethi demmanayssa ne Godaa deriyas odana.

<sup>78</sup> Nu Xoossaa lo77o maarotethaafe denddoysan  
wontta xalqey nuus saluwappe keyis.

<sup>79</sup> Hessika dhumaninne,  
hayqo kuya garssan de7eyssatas poo7isanaassa,  
nu tohuwakka saro ogiyakko zaaranāaassa"

yaagis.

<sup>80</sup> Na7ay diccis, Ayyaanān minnis, Isra7eeli asaas qonccana gakkaw bazzo biittan de7is.

## 2

### Yesuusa yeletethaa

(Maato 1:18-25)

<sup>1</sup> He wode Roome biittan de7iya asa ubbay taybettana melanne sunthay xaafettana mela kawoy Awugisxoosi kiittis. <sup>2</sup> Hessika Qerenooxi Soore biittaa aysiya wode oosettida koyro taybuwa. <sup>3</sup> Hessa gisho, issi issi asi ba sunthaa xaafettanaw ba yelettida biittaa bis.

<sup>4</sup> Yoosefikka Dawite keethafenne yaraappe gidida gisho Galila Naazirete katamaappe denddidi Dawite katama gidida Yihuda Beetoleme bis. <sup>5</sup> Bishe, yelanaw wodey wurida I oychchi wothida, Mayraamira wolla xaafettanaw bis. <sup>6</sup> Entti yan de7ishin iw yelo wodey gakkis. <sup>7</sup> Ba bayra na7aa yelasu. Curqqara xaaxada imathi aqiyason bessi dhayida gisho daran mehe muziya gonggen zin77isasu.

### Henthanchhotanne kiitanchchota

<sup>8</sup> He gadiyan qamma dorssa wudiya naagishe karen aqiya henthanchchoti de7oosona. <sup>9</sup> Godaa kiitanchchoy hassayonna yidi entta matan eqqis. Godaa bonchchoy entta yuushuwan poo7is; enttika wolqqaama yashshi yayyidosona. <sup>10</sup> Shin kiitanchchoy, “Yayyofite! Hekko, asaa ubbaas gidiya gita ufayssaa mishirachchuwa ekkada yas. <sup>11</sup> Hessika, Dawite kataman ashsheyssi hinttew hachchi yelettis. I Godaa Kiristtoosa. <sup>12</sup> Zogale na7ay curqqara xaaxettidi gonggen zin77idayssa hintte demmana; hessika hinttew malla gido” yaagis.

<sup>13</sup> Opponna daro salo kiitanchchoti kiitanchchuwura issife qonccidi,

<sup>14</sup> “Bonchchoy Xoossaas dhoqqa saluwan,  
saroy biitta bolla Xoossay dosiya asaas gido”  
yaagidi galatidosona.

<sup>15</sup> Kiitanchchoti enttafe shaakettidi saluwa keyidaappe guye henthanchchoti, “Ane Goday nuus qonccisidaabaanne hanidabaa be7anaw Beeteleme boos” yaagidosona.

<sup>16</sup> Enttika ellesidi bidosona. Mayraamo, Yoosefanne zoqale na7aa gonggen zin77idayssa be7idosona. <sup>17</sup> Be7i simmidi na7abaa enttaw odettoysa, qonccisidi he bessan de7iya asaas markkattidosona. <sup>18</sup> Hessa si7ida ubbay henthanchchoti odidayssan malalettidosona. <sup>19</sup> Mayraama hanidabaa ubbaas ba wozanan qoppashe de7asu. <sup>20</sup> Henthanchchoti enttaw odettidayssada hanin be7idosona. Hessa gisho, bantta si7idabaasinne be7idaba ubbaas Xoossaas bonchchishenne galatishe simmidosona.

### Yesuusa Xoossa Keethi efidosona

<sup>21</sup> Hosppuntha qamman, qaxxaro wodey gakkin, I qanthatanaappe sinthe kiitanchchoy wothida sunthan Yesuusa geetettis. <sup>22</sup> Muse woga mela entta geeshshatetha wodey polettiadappe guye Yoosefaranne Mayraamira yooga na7aa bantta Godaaas immanaw Yerusalemme bidosona. <sup>23</sup> Hessika, Godaa wogan, “Adde gidida bayra na7i ubbay Godaaas dummattidayssa gido” geetettidi xaafettidayssa polanaassa. <sup>24</sup> Qassi Godaa wogan, nam77u kuraachcho woykko holle yarshshanaw efidosona. <sup>25</sup> He wode geeshshinne ammanora mino gidida Simoonia geetettija asi Yerusalemmen de7ees. <sup>26</sup> I Isra7eeleta atotethaa naagishe de7ees. Geeshsha Ayyaanaykka iya bolla de7ees. <sup>27</sup> Qassi Kiristtoosa be7onna hayqqonnayssa Geeshsha Ayyaanay iyaw qonccisin eridi de7ees. <sup>28</sup> I he gallas Ayyaanay kaaletchin Xoossa Keethi bis. Na7aa aayeranne aawara wogaa polanaw yooga na7aa Yesuusa ekkidi gelida wode <sup>29</sup> Simooni mokki ekkidi na7aa idimmidi,

<sup>29</sup> “Godaw ne taw gelida qaala mela,  
ha77i ne aylliya saron moyza.

<sup>30</sup> Ta ayfey asaa ubbaa sinthan ne giigisida,  
31 ne ashuwa be7is.

<sup>32</sup> Hessika kawotethata ubbaas,  
Xoossaas ogiya qonccisiya poo7o,  
ne asaa Isra7eeleskka bonchcho”

yaagidi Xoossaas galatis.

<sup>33</sup> Yoosefaranne Mayraamira iyaw odettidaban malalettidosona. <sup>34</sup> Simooni entta anjjis. Aaye Mayraamikko, “Hekko daro asaa wozanaa qofay qonccana mela, Isra7eeleen de7iya darotas entta kunddethaasinne dendduwas Xoossaan dooretis. <sup>35</sup> Qassi eqetteyssatas malla gidana. Ne shemppuwarakka qassi mashshi aadhhdhana” yaagis. <sup>36</sup> Qassi Aseere yaraappe gidida Faanu7ela na7iya Haanna geetettija nabey de7awusu. Iya daro cimasu; iya ba koyro azinara laappun laythi de7asu. <sup>37</sup> I azinay hayqqin hospunn tammanne oyddu laythi gidana gakkanaw qammanne gallas pacey baynna woosaninne xooman Xoossa Keethan haggazasu. <sup>38</sup> Iya he saatiyan bada Xoossaas galatasu; Yerusalemme wozetethaa naagiyta ubbaas yooga na7abaa markkattasu. <sup>39</sup> Yoosefaranne Mayraamira Godaa higgiyan kiittida woga ubbaas polidaappe guye Galila biittan de7iya bantta katama Naazirete simmidosona. <sup>40</sup> Na7ay diccishenner minnishe bis. Cincatethan kumis; Xoossaas aadho keehatethay iya bolla de7ees.

### Yesuusi Xoossa Keethi bis

<sup>41</sup> Yoosefaranne Mayraamira Faasilka Baale bonchchanaw laythan laythan Yerusalemme boosona. <sup>42</sup> Yesuusas tammanne nam77u laythi gidiya wode kase meezeetidayssada baaliya bonchchanaw bidosona. <sup>43</sup> Baaliya bonchchidaappe guye soo simmiya wode na7ay Yesuusi Yerusalemmen attis. Shin Yoosefaranne Mayraamira I Yerusalemmen attoyssa eribookkona. <sup>44</sup> I soo simmiya asaara wollu de7iya daanin entti

issi gallasa oge bidosona. I baynnayssa eridaappe guye banitta dabbotanne laggeta matan koyidosona.<sup>45</sup> Iyan dhayin koyishe guye Yerusalaame gakkanaw bidosona.

<sup>46</sup> Heedzu gallasappe guye Xoossa Keethan asttamaareta giddon uttidi enttabaa si7ishenne entta oychchishe de7ishin demmidosona.<sup>47</sup> Iya si7iya ubbay iya akeekaninne zaaruwan malaalettidosona.

<sup>48</sup> Soo asay iya demmida wode malaalettidosona. Iya aayyaakkka, “Ta na7aw, ays nuna hayssada oothadii? Ne aawaranne taara nena koyishe un77ettida” yaagisu.

<sup>49</sup> Yesuusi enttako, “Tana ays koyeeti? Ta, ta aawa keethan daanaw besseyssa erekketii” yaagis.<sup>50</sup> Shin I enttako gidabaa entti akeekibookkona.

<sup>51</sup> Hessafe guye, enttara ississe Naazirete katama bis. Enttaw kiiettishe de7is. Iya aayyaa he ubbaa ba wozanan wothada naagisu.<sup>52</sup> Yesuusi, cincatethan, geesaninne teeman Xoossaa sinthaninne asa sinthan diccis.

### 3

*Xammaqiya Yohaannisa timirttiya  
(Maato 3:1-12; Mar 1:1-8; Yoha 1:19-28)*

<sup>1</sup> Kawoy Xibaaryoosi Roome biittan kawotin, tammanne ichchashantho laythan, Phenxe Philaaxoosi Yihuda haariya wode Heroodisi Galiila haariya wode iya ishha Filphoosi Ixuuriyasanne Xirakkonddoosa haariya wode Lisaniyoosi Ablaanisa haariya wode<sup>2</sup> Haannaranne Qayyaafara kahine halaqa gidi de7ishin, Xoossaa qaalay Zakkariyaasa na7aa Yohaannisakkko bazzo biittaa yis.<sup>3</sup> Yohaannisi, “Hintte nagaraappe simmitenne xammaqetite. Xoossay hintte nagaraa atto gaana” yaagidi tamaarssishe Yorddaanose Shaafaa heeran de7iya biitta ubbaa bis.<sup>4</sup> Hessika nabey Isayaasi ba maxaafan, “Bazzo giddon ba qaala dhoqqu oothidi,

waassiya uraa qaalay,

‘Godaa ogiya giigisite,  
horogaakka piddi oothite.

<sup>5</sup> Aafo ubbay kumana,  
zumayne derey ziqqi gaana.

Wobbe ogey luulana,  
gigonna horogay qinxii gaana.

<sup>6</sup> Asho ma77ida ubbay,  
Xoossaa ashwu be7ana’ ”

gidi xaafidayssada hanis.

<sup>7</sup> Yohaannisi, ba kushen xammaqettanaw yida asaakkko, “Hinttenoo, shoosha nayto yaanaw de7iya hanquwafe attana mela hinttena zoriday oonee?<sup>8</sup> Hiza, hintte simuwa qonccisiya lo77o ooso oothite, hintte wozanan, ‘Nuus, nu aaway Abrahamey de7ees gidi ceeqettofite.’ Haa si7ite, ha shuchchatappe Xoossay Abrahames na7a kessanaw dandda7ees.<sup>9</sup> Hekko, beekey mithaa xaphon de7ees. Hiza, lo77o ayfe ayfonna mitha ubbay qanxettidi taman yegettana” yaagis.

<sup>10</sup> Asay, “Yaatin nuuni ay oothinoo?” yaagidi oychchidosona.

<sup>11</sup> Yohaannisi zaaridi, “Nam77u afili de7iya asi baynnayssas immo. Kathi de7eyssi baynnayssas immo” yaagis.

<sup>12</sup> Qaraxa qanxiseyssati xammaqettanaw yidi, “Asttamaariyaw, nuuni ay oothinoo?” yaagidosona.

<sup>13</sup> I zaaridi, “Hintte qanxisanaw kiitettoysafe aathidi ekkofite” yaagis.<sup>14</sup> Qassi wotaad-dareti yidi, “Nuuni ay oothinoo” yaagidi oychchidosona.

Yohaannisi, “Ooddebaakkka wolqqan dafidi ekkofite, oonakka worddon mootoppite, hintte damoozey hinttew gido; ufayttidi de7ite” yaagis.

<sup>15</sup> Asay Kiristtoosa naagishe de7iya gisho Yohaannisa, “I Kiristtoosa gidanddeshshaa?” gidi qoppidosona.<sup>16</sup> Yohaannisi ubbaas zaaridi, “Taani hinttena haathan xammaqays, shin taappe aadhhdhidi wolqqaameysi yaana. Taani iya caammaa wodoruwa billanaw bessonaa asi. I hinttena Geeshsha Ayyaaninaninne taman xammaqana.<sup>17</sup> Wudumman de7iya kathaa polo geeshshanaw pithey iya kushen de7ees. Geeshsha kathaa ba shaaliyan qolana; kaliya dhayonna taman xuuggana” yaagis.

<sup>18</sup> Qassi Yohaannisi asaa daro zore zoridi Wonggelaa \* odis.

2:52 1Saamu 2:26; Leemi 3:4      3:4 Isa 40:3-5      3:7 Maato 12:34; 23:33      3:8 Yoha 8:33      3:9 Maato

7:19      3:12 Luuqa 7:29      \* 3:18 Wonggelaa: Girike doonan Wonggelaa giya qaalay daro ufayssya oda woykko mishiraachcho guussu. He mishirachchoyka Kiristtoosi asa zerethi ubbaa merinaa pirddaafe ashshanaw kiiettidi yida gitu ufayssaa (Luuqa 1:19; 2:10).

<sup>19</sup> Shin Yohaannisi Heroodisi ba ishaa machchiw, Heroodiyada, ekkida gishonne haraa iita oosota gisho kaccida wode <sup>20</sup> Heroodisi kaseyssa bolla haraba ubbaa gujjidi Yohaan-nisa woynie gelssis.

*Yesuusa xammaqetethaa*

(*Maato 1:1-17; 3:13-17; Mar 1:9-11*)

<sup>21</sup> Yohaannisi qashettanaappe sinthe asaa ubbaa xammaqidi simmin, Yesuusikka qassi xammaqettis. I woossishin saloy dooyettis. <sup>22</sup> Geeshsha Ayyaanay holleda benttishe iya bolla uttis. Saloppe “Taani dosiya na7ay nena; ne tana ufayssaasa yaagiya” qaalay yis.

<sup>23</sup> Yesuusi tamaarssso oykkiya wode iyaw hasttamu laythi gidishin, asay iya Yoosefa na7a gidi qoppis.

Yoosefi Eele na7a, <sup>24</sup> Eeley Maate na7a,  
Maatey Leewe na7a, Leewey Malkka na7a,  
Malkkey Yoona na7a, Yoomi Yoosefa na7a,

<sup>25</sup> Yoosefi Mataate na7a, Mataatey Amoxe na7a,  
Amoxey Nahoomme na7a, Nahoomey Asiliime na7a,  
Asiliimey Naage na7a, <sup>26</sup> Naagey Ma7aate na7a,

Ma7aatey Mataatiye na7a, Mataatiyey Samaye na7a,  
<sup>27</sup> Samayey Yihuda na7a, Yihudi Yoonane na7a, Yoonaney Rase na7a,  
Rasey Zerubaabela na7a, Zerubaabeley Salatiyaale na7a,

Salatiyaaley Neere na7a, <sup>28</sup> Neerey Malkka na7a,  
Malkkey Haade na7a, Haadey Qoosame na7a,

Qoosamey Elmodaane na7a, Elmodaaney Eere na7a,  
<sup>29</sup> Eerey Yoose7e na7a, Yoose7ey Alaazara na7a,

Alaazari Yoorme na7a, Yoormey Maate na7a,  
Maatey Leewe na7a, <sup>30</sup> Leewey Simoona na7a,

Simooni Yihuda na7a, Yihudi Yoosefa na7a,  
Yoosefi Yoonane na7a, Yoonaney Eliyaaqeme na7a,

<sup>31</sup> Eliyaaqemey Maliyye na7a, Maliyyey Maynaane na7a,  
Maynaaney Maate na7a, Maatey Naatane na7a,

Naataney Dawitey Isseyye na7a,  
Isseyye伊约比德耶 na7a, Iyobeedey Boo7eza na7a,

Boo7ezi Salmoona na7a, Salmooney Na7asoona na7a,

<sup>33</sup> Na7asooney Aminaadabe na7a, Aminaadabey Raame na7a, Raamey Arnne na7a,  
Arnney Asroome na7a, <sup>34</sup> Asroomey Faarese na7a,

Faaresey Yihuda na7a,  
Yihudi Yayqooba na7a,

Yayqoobi Yisaqa na7a, Yisaqaqi Abrahame na7a,  
Abrahamey Taara na7a, <sup>35</sup> Taari Naakkore na7a,

Naakkorey Saruuqe na7a, Saruugey Rehu na7a,  
Rehuy Faaleqe na7a, Faaleqey Ebeera na7a,

Ebeeroj Seela na7a, <sup>36</sup> Seeli Qaynaame na7a,  
Qaynaamey Arfakisaada na7a, Arfakisaadey Seeme na7a,

Seemey Nohe na7a, Nohey Laamehe na7a,  
<sup>37</sup> Laamehey Matusaala na7a, Matusali Heenoke na7a,

Heenokey Yaarede na7a, Yaaredey Malaal77ela na7a,  
Malaal77eli Qaynaane na7a, <sup>38</sup> Qaynaaney Heenosa na7a,

Heenosey Seeta na7a, Seetey Addaame na7a,  
Addaamey Xoossa na7a.

## 4

*Yesuusi paacettis*

(*Maato 4:1-11; Mar 1:12-13*)

<sup>1</sup> Yesuusi Geeshsha Ayyaanan kumidi Yorddaanose Shaafappe simmida mela Ayyaanay iya bazzo efis. <sup>2</sup> Yan oyattamu gallasinne qamma xalahen paacettis. He gallasatan aykkoka moonna gam77ida gisho wursethan koshattis.

<sup>3</sup> Xalahey iyaakkoo, “Neeni Xoossa na7a gidikko ane hayssi shuchchay uythu gido gada kiutta” yaagis.

<sup>4</sup> Yesuusi zaaridi, “Asi uytha xalaalan deenna geetettidi xaafettis” yaagis.

<sup>5</sup> Hessafe guye, Xalahey Yesuusa adussa dere bolla kessidi ha alamiya kawotethata ayfe qiphi zaaranaw bessis. <sup>6</sup> Xalahey, "Ha ubbaas maataynne bonchchoy taw imettis. Taani dosida ooddeskka immiya gisho new immana. <sup>7</sup> Hessa gisho, neeni taw goynniko ubbay new gidana" yaagis.

<sup>8</sup> Yesuusi zaaridi, "Ne Godaa, ne Xoossa, iya xalaala goynna geetettidi xaafettis" yaagis.

<sup>9</sup> Wurssethan Xalahey Yesuusa Yerusalame efidi Xoossa Keethas huu7iya bolla essidi, "Neeni Xoossa na7a gidikko ane duge sa7an nena yegga. <sup>10</sup> Ays giikko, Nena naagiya Kiitanchchota

Xoossay ne gisho kiittana.

<sup>11</sup> Entti ne tohoy shuchchan dhubettonna mela, bantta kushiyen dhoqqu oothidi nena denthana' geetettidi xaafettis" yaagis.

<sup>12</sup> Yesuusi zaaridi, "Ne Godaa Xoossa paaccifa geetettidi xaafettis" yaagis.

<sup>13</sup> Xalahey Yesuusa paaciya wurssidaappe guye hara injje wode demmanna gakkanaw iyappe shaakketis.

*Yesuusi Galililan tamaarssso oykkis*

(Maato 4:12-17; Mar 1:14-15)

<sup>14</sup> Yesuusi Ayyaanaa wolqqan kumidi Galiila simmis. Iya sunthay heeran de7iya biitta ubban keyis. <sup>15</sup> I Ayhude Woosa Keethi gelidi tamaarssis; asa ubbay iya galatidosona.

<sup>16</sup> Yaappe I diccida katamaa Naazirete yis. Kase meezeetidayssada Sambbaata gallas Ayhude Woosa Keethi gelis. Nabbabanawukka denddi eqqis. <sup>17</sup> Nabiya Isayaasa maxaafay iyaw imettin, dooyidi, hayssada yaagidi xaafetidayssa demmis:

<sup>18</sup> "Godaa Ayyaanay ta bolla de7ees,  
manqotas Wonggelaa odana mela  
Xoossay tana dooris.

Qashettidayssatas biletethi,  
qooqidayssata xeelisanaasinne  
un77etidayssata birshhana mela,

<sup>19</sup> Xoossay keehanaw qoppida laythaa odana mela tana kiittis"  
yaagis.

<sup>20</sup> Hessafe guye, maxaafaa xaaxidi haggazeeyssas immidi tamaarssanaw uttis. Ayhude Woosa Keethan de7iya asati ubbay caddi xeelosona. <sup>21</sup> I, "Hayssi hintte haythan hintte si7iya ha maxaafaa qaalaq hachchi polettis" yaagis.

<sup>22</sup> Ubbay iyabaa darssidi odetoosona. Qassi iya doonappe keyaa aadho keehatethan kumida qaalan malaalettishe, "Hayssi Yoosefa na7aa gidenneyye?" yaagidosona.

<sup>23</sup> I, "Neno dhale aawaw nena ashsha, Qifirnahoomen ne oothidabaa nu si77oyssa qassi hayssan ne kataman ootha" yaagiya leemisuwan hintte tana gaanayssas sidhey baawa" yaagis. <sup>24</sup> Qassi, "Tuma odays; nabey ba yelettida biittan bonchchettena.

<sup>25</sup> "Ta hinttew tuna odays; saloy heedzu laythinne bagga gordettin mino koshi biitta ubban de7iya Eliyaasa wode daro am77eti Isra7eelen de7oosona. <sup>26</sup> Eliyaasi enttafe issinnekokka kiittibeenna. Shin Sarapttan de7iya am77eekko kiittis. <sup>27</sup> Nabiya Elssa7e wode Isra7eelen daro baro hargganchchoti de7oosona. Shin Soore uraa Ni7imaaneppe attin oonikka paxibeenna" yaagis.

<sup>28</sup> Ayhude Woosa Keethan de7iya asa ubbay hessa si7ida wode daro yilotidosona.

<sup>29</sup> Bantta uttida bessaafe denddidi zuma bolla keexettida katamaappe gaxa kessidi sugi yeddanaw aafu doona efidosona. <sup>30</sup> Shin I entta giddora kanthidi aadhhdhis.

*Yesuusi tuna ayyaanaa kessis*

(Mar 1:21-28)

<sup>31</sup> Yaappe Galilila biittan de7iya Qifirnahome katamaa bis. Yan Sambbaata gallas asaa tamaarssis. <sup>32</sup> I tamaarssey maatara gidiya gisho ubbay iya timirttiany malaalettidosona.

<sup>33</sup> Ayhude Woosa Keethan tuna ayyaanay oykkida uray de7ees. <sup>34</sup> I, "Naazirete Yesuusa nuna ays waaysay nuuppe haakka; neeni yiday nuna dhayssanaaseyye? Neeni ooneekko taani erays. Neeni Xoossaafe yida Geeshsha" yaagidi waassis.

<sup>35</sup> Yesuusi tuna ayyaanakko, "Si7i gada ha uraappe keya" yaagidi hanqis. Tuna ayyaanay uraa asaa ubbaa sinthan holi yeggidi aykkoka qohonna yeddidi keyis.

<sup>36</sup> Asa ubbay malaalettidosona. Wolikko, "Hanos, hayssi aybi timirtte? Tuna ayyaanata maataninnee wolqqan kiittees; enttika keyosona" yaagidosona. <sup>37</sup> Iya sunthay heera ubban keyis.

*Yesuusi daro hargganchchota pathis  
(Maato 8:14-17; Mar 1:29-34)*

<sup>38</sup> Hessafe guye, Yesuusi Ayhude Woosa Keethafe keyidi Simoona soo gelis. Simoona machche aayyaa mino qoxo misha harggen sakettasu. Iyo pathana mela Yesuusa woosidosona. <sup>39</sup> I hiixaakkoo shiiqi hokkidi I harggiya hanqis. Mishay aggin ellesa denddada entta mokkasu.

<sup>40</sup> Away wullana hanishin dumma dumma harggiyan oykettida asaa iyaakko ehidosona. I issuwa issuwa bolla ba kushiya wothidi pathis. <sup>41</sup> Tuna ayyaanati qassi, “Neeni, Xoossaan na7aa” gidi waassishe daro asaappe keyidosona. Shin I enttana hanqis. I Kiristtooosa gideyssa entti eriya gisho issibaakka odettonna mela diggis.

<sup>42</sup> Burroo wonttiya wode Yesuusi issi geema bessi bis. Asay koyishe I de7iya bessaa yidosona. Enttafe Ishaaketti boonna mela butetidosona. <sup>43</sup> Shin I, “Taani hara katamata bada Xoossaan kawotethaa Wonggelaa markkattanaw bessees. Ta kiittetiday hessassa” yaagis. <sup>44</sup> Yihuda biittan de7iya Ayhude Woosa Keethan sabbakis.

## 5

*Yesuusi doorida koyro tamaareta  
(Maato 4:18-22; Mar 1:16-20)*

<sup>1</sup> Issi gallas Yesuusi Gensareexe Abbaa matan eqqidashin daro asay iya yuushuwa un77ethidi, I tamaarssiyaa Xoossaan qaala si7oosona. <sup>2</sup> Yan haatha gaxan de7iya nam77u wogolota be7is. Molo oykkiya asati wogolotappe wodhdhidi bantta gitiya meeccosona.

<sup>3</sup> He wogolotappe Simoonayssan gelidi biittaaf e guuthi giddo shiishana mela oychchis. Yaatidi, he wogoluwa bolla uttidi asaa tamaarssis.

<sup>4</sup> Ba tamaarssuwa onggidaappe guye Simoonakko, “Gede ciimmuwako shiishada moluwa oykkanaaw hintte gitiya yeggite” yaagis.

<sup>5</sup> Simooni zaaridi, “Asttamaariyaw, gamma kumethaa daaburishe aqidi aykkoka oykkibookko, shin ne giikko gitiya yeggana” yaagis.

<sup>6</sup> Entti gitiya yeggida wode gitey daakettana gakkanaw daro molo oykkidosona. <sup>7</sup> Hara wogoluwan de7iya bantta laggetti yidi, banttana maaddana mela wuttidi xeegidosona. Entti yidi nam77u wogolota, haathan mitettana gakkanaw molon kunthidosona.

<sup>8</sup> Simoon Phexiroosi hessa be7ida wode Yesuusa sinthan kunddidi, “Godaw, taani nagaranchcho asi gidiya gisho taappe shaaketta” yaagis. <sup>9</sup> Hessa I giday inne iyara de7eyssati oykkida moluwa darotethan malaalettida gishossa. <sup>10</sup> Qassi Simoona lagge gidida Zabdiyoosa nayti Yayqoobaranne Yohaannisara malaalettidosona. Yesuusi Simoonakko, “Babbofa! Hizappe neeni ase oykkiya asi gidana” yaagis. <sup>11</sup> Entti wogolota gaxa shiishidaappe guye ubbaa aggidi Yesuusa kaallidosona.

*Yesuusi baro hargganchchuwa pathis  
(Maato 8:1-4; Mar 1:40-45)*

<sup>12</sup> Yesuusi katamatapape issuwan de7ishin issi baro harggen\* oykettida asi he kataman de7ees. He uray Yesuusa be7idi iya sinthan gufannidi, “Godaw, ne shene gidiikko tana geeshshanaw dandda7aasa” gidi woossis.

<sup>13</sup> Yesuusi ba kushiya yeddi bochchidi, “Ee, ta shene; geeya” yaagis. Iira baro hargghey uraappe kichchis.

<sup>14</sup> Yesuusi, “Hayssa oddeskka odoppa, shin bada nenatethaa Ayhude kahiniya bessa. Ne geeyidayssas markka gidana mela Musey kiittida yarshshuwa yarshsha” gidi kiittis.

<sup>15</sup> Gidoshin, iya sunthay kaseppe aadhdhidi dalggishe bis. Daro asay I odiyabaan si7anawunne bantta harggiyafe paxanaw yoosona. <sup>16</sup> Shin Yesuusi daro wode geema bessi bidi woossees.

*Yesuusi gunddaa pathis  
(Maato 9:1-8; Mar 2:1-12)*

<sup>17</sup> Issi gallas Yesuusi tamaarssishin Galilappenne Yihuda heera ubbaafe qassi Yerusalameppelka yida Farisaawetinne higge asttamaareti yan uttidosona. Asaa pathiya Godaa wolqqayka iyara de7ees. <sup>18</sup> He wode asay issi gundda asi halara tookkidi ehidosona. Soo gelssidi iya sinthan wothanaw qoppidosona. <sup>19</sup> Shin asaa darotethaafe denddoyssan soo gelssanaw xoonettidi keethaa bolla keyidi, kaara qawuxidi, hargganchchuwa halara asaa shaakkidi Yesuusa sinthan yeggidosona.

<sup>20</sup> Yesuusi entta ammanuwa be7idi, “La addiyaw, ne nagaray qushettis” yaagis.

**5:1** Maato 13:1-2; Mar 3:9-10; 4:1      **5:5** Yoha 21:3      **5:6** Yoha 21:6      \* **5:12** Baro harge: Baro hargghey asa galbba bolla keyaa hargge. Isra7eele biittan baro hargganchhoti hara asaappe dummattidi de7oosonappe attin asaara gaheettokona.      **5:14** Leewe 14:1-32

<sup>21</sup> Higge asttamaaretinne Farisaaweti, "Hayssi Xoossa bolla yaagidi odettey oonee? Issi Xoossaafe attin hari nagara quchchanaw dandda7ey oonee?" yaagidi qoppidosona.

<sup>22</sup> Yesuusi entta qofaa erida gisho enttako, "Hintte wozanan hessatho ays qoppeetii? <sup>23</sup> Ne nagaray qushettis geyssafenne denddada ba geysafe awussi kawuyii?" <sup>24</sup> Shin ta hessa giday Asa Na7ay sa7a bolla nagara quchchanaw maati de7eyssa hintte erana melassa." Hessafe kaalidi, gundda uraakkko, "Dendda; ne algaa tookkada ne soo ba" yaagis. <sup>25</sup> I ellesi dendddi entta sinthan eqqis; I tookettidi yida algaa tookkidi Xoossa galatishe ba suo his. <sup>26</sup> He wode ubbakya malalettidosona. Xoossa galatishe, "Hachchi gita malaata be7ida" yaagidi yashettidosona.

*Yesuusi Leewe xeegis  
(Maato 9:9-13; Mar 2:13-17)*

<sup>27</sup> Hessafe guye, Yesuusi yaappe keyidi bis. Leewe geetettiya issi qaraxa qanxiseyssi qaraxa qanxisiya bessan uttidayssa be7idi, "Tana kaalla" yaagis. <sup>28</sup> I ubbabaa aggi dendddi iya kaallis.

<sup>29</sup> He Leewey ba son gita gibira giigisis. Daro qaraxa qanxiseyssatinne hara asati katha maanaw uttidosona. <sup>30</sup> Farisaawetinne higge asttamaareti, "Qaraxa qanxeysataranne nagaranchhotara ays meetinne ueyetii?" yaagidi Yesuusa tamaareta bolla zuuzummidosona.

<sup>31</sup> Yesuusi enttako, "Hargganchchotassafe attin paxatas aakime koshshenna. <sup>32</sup> Taani na garanchchota maarotaakko zaaranaassafe attin geeshshata xeeganaw yabiikke" yaagidi zaaris.

<sup>33</sup> Entti Yesuusakkko, "Yohaannisa tamaareti daro wode xoomosona, woossosona; qassi Farisaaweta tamaaretikka hessatho ooothosona. Shin neyssati ubba wode moosonanne uyoosona" yaagidosona.

<sup>34</sup> Yesuusi enttako, "Mushuray enttara de7ishin xeegettida asay xoomana mela oothanaw dandda7etii? <sup>35</sup> Shin mushuray enttafe shaakettana gallasay yaana, he wode entti xoomana."

<sup>36</sup> Qassi yaagidi leemiso odis; "Ooratha ma7oppe peedhidi gal77a ma7o bolla sikkey oonikka baawa. Hessatho oothiko ooratha ma7uwa peedhees, oorathay gal77aas giigenna.

<sup>37</sup> Mal77antto woyniya gal77a ogoron qoliya oonikka baawa. Hessa oothiko, ooratha woyney gal77a ogoruwa dhusees; woyney gukkees ogoroykka maaddonabaa gidees.

<sup>38</sup> Hessa gisho, ooratha woyney oratha ogoron qolettanaw bessees. <sup>39</sup> Hiza, caalay lo77o giya gisho caala woyne uyi simmidi mal77antto koyey oonikka baawa" yaagis.

## 6

*Yesuusi Sambaatabaa oyshettis  
(Maato 12:1-8; Mar 2:23-28)*

<sup>1</sup> Issi Sambaata gallas Yesuusi giste gade giddora aadhdhees. Yesuusa tamaareti tiya bangga duuthidi bantta kushen shirkkidi moosona. <sup>2</sup> Shin Farisaaweta giddofe issoti issoti, "Sambaata gallas oothanaw bessonabaa ays ootheetii?" yaagidosona.

<sup>3</sup> Yesuusi enttako zaaridi, "Dawitey koshattida wode baara de7eyssatara issife oothoyssa nabbabibekketii? <sup>4</sup> Xoossa Keethi gelidi Ayhude kahineta xalaalas bessiya daabbuwa mis; baara de7eyssataskka immis" yaagis. <sup>5</sup> Qassi Yesuusi, "Asa Na7ay Sambaata Goda" yaagis.

<sup>6</sup> Hara Sambaata gallas Yesuusi Ayhude Woosa Keethi gelidi tamaarssees. He bessan ushachcha kushey gunddida issi asi de7ees. <sup>7</sup> Higge asttamaaretinne Farisaaweti iya mootanaw gaaso koyidi Sambaata gallas pathiko be7ana gidi naagoosona. <sup>8</sup> Shin Yesuusi entta qofaa eridi kushey gunddida uraakkko, "Denddada asaa gidduwaa eqqa" yaagis. Uraykka denddi eqqis.

<sup>9</sup> Yesuusi, "Ane ta hinttena issibaa oychchays; Sambaata gallas oothanaw bessey lo77obayye iitabay? Shemppo ashoyye woykko dhayss?" yaagis.

<sup>10</sup> Qassi Yesuusi iya yuushwan de7iya asaa yuushshi xeellidi uraakkko, "Ne kushiya piddi ootha" yaagis. Uraykka I gidayssada oothin kushey paxis. <sup>11</sup> Shin higge asttamaaretinne Farisaaweti daro yilotidosona. Yesuusa bolla ay oothinoo gidi bantta giddon magettidosona.

*Yesuusi tammanne nam77u hawaareta dooris  
(Maato 10:1-4; Mar 3:13-19)*

<sup>12</sup> He wode gallasatapape issuwan Yesuusi woossanaw deriya bolla keyis. Qamma kumethaa Xoossa woossishe aqis. <sup>13</sup> Wonttethe ba tamaareta xeegidi entta giddofe tammanne nam77ata dooridi, enttana, "Hawaareta" gidi sunthis. <sup>14</sup> Enttika, Phexiroosa

gidi sunthida Simoona, iya ishaa Inddiriyasa, Yayqooba, Yohaannisa, Filphoosa, Bartolomiyoosa,<sup>15</sup> Maatoosa, Toomasa, Ilfiyoosa na7aa Yayqooba, ba biittaas mishettiya Simoona,<sup>16</sup> Yayqooba na7aa Yihudanne Yesuusa aathi immida Asqoroota Yihuda.

<sup>17</sup> Yesuusi enttara issife deriyappe wodhdhidi denbba bessan eqqis. Iya tamaaretapte daroti he bessan de7osona Yihuda biitta ubbaafe Yerusalaamepppe, Xiroosapenne Sidoona abbaa gaxappe yida daro asay de7ees.<sup>18</sup> Entti yiday I tamaarssiyabaa si7anawunne bantta harggiyafe paxanaassa. Tuna ayyaanan waayettiya asatikka paxidosona.<sup>19</sup> Wolqqay iyappe keyidi asa ubbaa pathiya gisho asay iya bochchanaw koyosona.

<sup>20</sup> Ba tamaaretakko xeellidi hayssada yaagis:  
“Hinttenoo, manqoto, hintte anjjettidayssata;  
Xoossa kawotethay hinttessa.

<sup>21</sup> Hintte ha77i koshatteyssati anjjettidayssata,  
hintte kallana.  
Hintte ha77i yeekeyssati anjjettidayssata  
hintte miicana.

<sup>22</sup> Asay hinttena Asa Na7aa gisho  
ixxiya wode  
hinttena hiliya wode  
hinttena entti toochchiya wodenne,  
ita sunthi entti hinttew immiya wode  
hintte anjjettidayssata.

<sup>23</sup> “Hekko, hintte woytoy salon gita gidiya gisho he wode ufayssan guppite. Ays giikko, beni entta aawati nabeta bolla hessada oothidosona.”

<sup>24</sup> “Shin dureto hinttena ayye;  
hintte ha77i lo77o duussaa ekkideta.

<sup>25</sup> Ha77i kallidayssato hinttena ayye;  
hintte koshattana.

Ha77i miiceyssato hinttenoshsho  
hintte kayottananne yeykkana.

<sup>26</sup> Asi ubbay hintte lo77otethaa xalaala odiya wode hinttena ayye.  
Entta aawati beni worddanchcho nabeta bolla hessada oothidosona.

*Hintte morkketa siiqite*  
(Maato 5:38-48; 7:12)

<sup>27</sup> “Shin tana si7iya hinttes ta odays; hintte morkketa siiqite; hinttena ixkeyssatas lo77obaa oothite.”<sup>28</sup> Hinttena qanggeyssata anjjiite, hinttena naaqqeeyssatas woossite.

<sup>29</sup> Issi bagga shakalaa baqqeyssas hankko baggaaka bessa. Ne laxana ekkana geysass ne shaamiziakka gujjada imma.<sup>30</sup> Nena woossiya ubbaas imma; neeppe ekkida oonakka zaaro gada oychchofa.<sup>31</sup> Asay hinttew oothana mela hintte koyabaa ubbaa hintteka asaas oothite.

<sup>32</sup> “Hintte hinttena dosiya asata xalaala dosikko, ay galati hinttew de7ii? Hari attoshin, nagaranchhotikka bantana siiqeyssata siiqosona.”<sup>33</sup> Hinttew lo77obaa ootheyssata xalaalas lo77obaa oothiko hinttew ay galati de7ii? Nagaranchhotikka hes-sada ooothosona.<sup>34</sup> Tal77e zaarana asa xalaalas hintte tal77iko ay dumma galatetteetii? Nagaranchhotikka guye zaarana asi be7idi tal77osona.”

*Harata bolla pirddofite*

<sup>35</sup> “Shin hintte morkketa siiqite; enttaw lo77obaa oothite. Guye ekkanaaw qopponna tal77ite. Hessian hintte ekkana woytoy gita gidana. Hintte Ubbaafe Bolla Xoossa nayta gidana. I bana galatonnayssatasinne itatas keeha.”<sup>36</sup> Hintte aaway keeha gidoysada hintteka keeha gidite.

<sup>37</sup> “Asa bolla pirddofite; hintte bolla pirddettena. Hintte boretonna mela oonakka boroppite. Atto giite; Xoossay hinttew atto gaana.”<sup>38</sup> Immite; hinttew imettana. Hintte makkidaban hinttew zaari makettana, ubbarakka lo77o makkiyaban baqqidi, suuddi kunthidi, laalettana gakkanaaw hinttew maketi imettana” yaagis.

<sup>39</sup> Qassika Yesuusi yaagidi enttaw leemiso odis; “Qooqey qooqie kaalethanaw dandda7ii? Kaalethiko nam77ayka woli ekkidi aafon wullokonyayye?”<sup>40</sup> Tamaarey asttamaarepppe aadhhdhenna. Shin loythi tamaarida uray ba asttamaariyatho hanees.

<sup>41</sup> “Ne ishaa ayfyaan de7iya buuriya ays be7ay? Ne ayfyaan de7iya tuussi daaneyssa ays be7ikki?”<sup>42</sup> Ne ayfyaan de7iya tuussi daaneyssa be7onna ne ishaakkoo, ‘Ta ishaw ne

ayfiyaan de7iya buuriya kesso' gaanaw waana dandda7ay? Neno cubbuwaw, koyrottada ne ayfiyaan de7iya tuussi daaneyssa kessa. Hessafe guye, ne ishaa ayfiyaan de7iya buuriya kessanaw geeshshada xeellana.

### *Mithaanne iya ayfiya*

<sup>43</sup> "Lo77o mithi iita ayfe ayfenna; hessadakka iita mithi lo77o ayfe ayfena. <sup>44</sup> Ayfe ayfiyaan mithi ubbay ba ayfiyaan erettees. Agunthafe balase mitha ayfey maxettenna qassi laadeppe woyne ayfey maxettena. <sup>45</sup> Lo77o asi ba wozanan kumida lo77obaappe lo77obaa kessees. Iita asi ba wozanan kumida iitabaappe iitabaappe kessees. Asi ba wozanan kumidi palahidabaappe ba doonan haasayees.

### *Keethe keexiya nam77u asata (Maato 7:24-27)*

<sup>46</sup> "Ta geyssa ootheketa, shin yaatin ays tana, 'Godaw, Godaw, geeti?' <sup>47</sup> Taakkko yeynne ta qaala si7idi poliya ubbay oona daaniyakko ta hinttene bessana. <sup>48</sup> I keethe keexanaw ziqqi oothi, olla bookkidi, garssan de7iya zaalla bolla keethaa essida cincca uraa daanees. Di7oy di77idi he keethaa sugis, shin minthidi keexida gisho qaaxxanaw dandda7ibeenna. <sup>49</sup> Shin ta qaala si7idi oothonay ba keethaa shafe biitta bolla keexida uraa daanees. Di7oy di77idi he keethaa sugida wode ellesidi kunddis. He keethay wolqqaama kunddethi kunddis" yaagis.

## 7

### *Mato halqaam ammanuwa (Maato 8:5-13; Yoha 4:43-54)*

<sup>1</sup> Yesuusi hessa ubbaa asaa sinthan tamaarssidi onggidaappe guye, Qifirnahoomme kata-maa bis. <sup>2</sup> He bessan issi mato halqaay de7ees. I daro dosiya aylley hargettidi hayqos gakkis. <sup>3</sup> I Yesusabaa si7ida wode ba aylliya pathana mela iya woosso gidi issi issi Ayhude cimata Yesusakkoo kiittis. <sup>4</sup> Kiittetidayssati, Yesusakkoo bidi, "Ne iyaw hayssa oothanaw bessees. <sup>5</sup> Ays giikko, ha uray nu asaa dosees, Ayhude Woosa Keethaka keexxis" gidi minthi woossidosona <sup>6</sup> Yesususikka enttarra bis.

Mato halqaam sookko matiya wode ba laggeta iyaakkoo kiittidi, "Godaw, ta kaarappe garssan ne gelanaw ta bessonna gisho daaburoppa. <sup>7</sup> Takka tana ne sinthe shiiqanaw bessiya asi gada qoppike. Shin ne issi qaala oda; ta aylley paxana. <sup>8</sup> Taw taappe bollara halaqay de7ees, taappe garssan ta kiittiya wotaaddareti de7oosona. Issuwa, 'Ba' giikko bees, hankkuwa, 'Haaya' giikko yees. Ta aylliyakko, 'Hanno ootha' giikko ootees" yaagis.

<sup>9</sup> Yesuusi hessa si7ida wode malaaleettis. Guye simmidi baara yaa asaakkoo, "Taani hinttew tuma odays; hari attoshin Isra7eelenkka hayssa mela gitaa ammano demmabiikke" yaagis. <sup>10</sup> Kiittetidayssati soo simmiya wode aylley paxin demmidosona.

### *Am77ee na7aa*

<sup>11</sup> Guutha wodeppe guye Yesuusi Nayne katamaa bis. Iya tamaaretaranne hara daro asati iyara bidosona. <sup>12</sup> Ikatamaa gelana haniya wode aha tookkida daro asati katamaappe keysona. Hayqqida na7ay ba aayes issuwa, iyakka am77o gidada da7awusu. Katama asaappe daroti iira de7oosona. <sup>13</sup> Goday iyo be7ida wode qadhettti, "Yeekkofa" yaagis.

<sup>14</sup> Shiiqidi halaa bochchin tookkida asati eqqidosona. Yesuusi, "La, yalagaw dendda" yaagis. <sup>15</sup> Hayqqidayssi denddi uttidi oda oykkis. Yesuusi na7aa ekkidi aayes immis.

<sup>16</sup> Asa ubbay yashettidi, "Gita nabey nu giddon denddis; Xoossay ba asaa be7is" yaagidi Xoossa galatidosona. <sup>17</sup> Iya sunthay Yihudanine he heeran de7iya biitta ubban si7ettis.

### *Yesuusanne Xammaqiya Yohaannisa*

<sup>18</sup> Xammaqiya Yohaannisa tamaareti hessa ubbaa Yohaannisas odidosona. I entta giddofe nam77ata xeejadi, <sup>19</sup> "Yaana geetettiday neneyye? Woykko haraa naaginoo?" yaagidi oychchite gidi Godaakkoo kiittis.

<sup>20</sup> Asati Yesusakkoo bidi, Xammaqiya Yohaannisi, "Yaana geetettiday neneyye? Woykko haraa naaginoo?" giite gidi nuna neekko kiittis yaagidosona.

<sup>21</sup> He saatenka Yesuusi daro asaa harggiyafe pathis. Tuna ayyaanata kessis, qooqida ayfiyakka xeelisis. <sup>22</sup> Yohaannisa matappe kiittetti idayssatakko, "Bidi hintte be7idayssanne si7idayssa Yohaannisas odite. Ayfe qooqeti xeellosona, gunddati birshshet-tidi hamuttoosona, baro hargganchchotii geeyosona, tulletti si7oosona, hayqqidayssati hayoppe denddoosona, manqotas Wonggelay sabbakettees. <sup>23</sup> Tanan dhabettonna oonikkka anjettidayssa."

<sup>24</sup> Yohaannisi kiittidayssati bidaappe guye Yesuusi asaas Yohaannisabaa yaagidi odis: "Hinte ay be7anaw bazzo biitta keyidetii? Carkkoy qaathiya maata be7anaaseye? <sup>25</sup> Yaatin, ay be7anaw keyidetii? Koyse ma7o ma77ida asaa be7anaaseye? Koyse ma7o ma77idayssatinne sa7i injetida asay kawo keethan de7oosona. <sup>26</sup> Yaatin, ay be7anaw keyidetii? Nabiya be7anaaseye? Ee, ta yaagays: hintte be7anaw keyiday nabeppe aadhdheyssa.

<sup>27</sup> 'Ne ogiya ne sinthan giigisiya

ta kuitanchchuwa neeppe sinthe ta kiittana'  
geetetidi xaaftetiday iyassa. <sup>28</sup> Ta hinttew odays; maccasappe yeettidayssata giddofe Yohaannisappe aadhdhey baawa. Xoossaa kawotethan ubbaafe guuxeyssi, I ubbaafe gita gidana" yaagis.

<sup>29</sup> Hari attoshin, Yesuusa qaala si7ida qaraxa qanxiseyssati ubbay Yohaannisa kushen xammaqettidi Xoossay xillo gideyssa qonccisidosona. <sup>30</sup> Shin Farisaawetinne higge astmaaretti Yohaannisa kushen xammaqetttonna ixxidi Xoossaa zoriya leqisidosona.

<sup>31</sup> Yesuusi kaallidi hayssada yaagis: "Hiza, ha wodiya yeletethaa aybira daaniso? Enttika oona daanoona? <sup>32</sup> Giya giddon uttidi woli xeegidi, 'Nu hinttew suusul77e punnin, hintte yexxeketa. Nu sabbidi zeleelin, hintte yeekeketa' yaagiya nayta daanosona. <sup>33</sup> Xammaqiya Yohaannisi moonnanne uyonna yin, 'Tita ayyaanara de7ees gideta.' <sup>34</sup> Asa Na7ay mishenne uysishe yin, 'Yarambbanne ushshanchcho, qaraxa qanxiseyssatanne nagaranchchota dabbo' gideta. <sup>35</sup> Hiza, cincatethaa tumatethay iya nayta ubbaa matan erettis" yaagis.

### *Issi maccasiya Yesuusa shitto tiyasu*

<sup>36</sup> Issi Farisaawey Yesuusa kathi muzanaw ba soo xeegis. I Farisaawiya soo bidi gayta bolla uttis. <sup>37</sup> He kataman issi nagaranchcho maccasi de7iyara Yesuusi Farisaawiya son gibira bolla de7eyssa si7ida wode daro al77o philqqaaxe shitto ekkada yasu. <sup>38</sup> Yesuusas guye baggara, iya tohuwa matan eqqada yekkashe iya tohuwa ba afuthaara laakethawsu. Ba binaanara iya tohuwa quchchashenne yeerashe shitto tiyasu.

<sup>39</sup> Gibira giigisida Farisaawey hessa be7ida wode ba wozanan, "Hayssi nabe gidiyakkoo ha maccasiya iya bochchiyara ooneekko qassi iya nagaranchcho gideyssakka I eranashin" yaagis.

<sup>40</sup> Yesuusi, "Simoonaa, ta new odiyabay de7ees" yaagis.

I, "Asttamaariyaw, taw oda" yaagis.

<sup>41</sup> Yesuusi iyaakko, "Nam77u asati issi uraappe miishe tal77idosona. Issoy ichchashu xeetu bira hankkoy qassi ishatamu bira tal77idosona. <sup>42</sup> Nam77ayka tal77iya cigganaw xoonettin, nam77ataskka tal77iya maaris. Hiza, ha nam77atappae he uraa daro dosanay new awussa daanii" yaagis.

<sup>43</sup> Simooni, "Daro acoy maarettida uray daro dosana daanees" yaagis. Yesuusi, "Ne tuma pirdedadada" yaagis. <sup>44</sup> Hessafe guye, Yesuusi maccaseekko simmi xeellidi, Simoonakko, "Hanno maccasvi be7ay? Taani ne soo gelin hari attin ne taw toho haathe immabaaka, shin iya ta tohuwa ba afuthan laakothada ba binaanara quchchasu. <sup>45</sup> Neeni tana yeera ekkabaakka, shin iya ta ne soo geloodeppe doomada ta tohuwa yeero aggabukku. <sup>46</sup> Neeni ta huu7iyan zayte tiyabaka, shin iya ta tohuwa shitto tiyawusu. <sup>47</sup> Iya tana daro dosida gisho I daro nagaray atto geetettis. Iya guutha nagaray atto geetettiday guuthara dosees."

<sup>48</sup> Yesuusi maccaseekko, "Ne nagaray atto geetettis" yaagis.

<sup>49</sup> Iyara issife gaytan uttidi miya imathati, "Nagara atto yaagey, I hayssi oonee?" yaagidi bantta wozanan goppidosona.

<sup>50</sup> Yesuusi maccaseekko, "Ne ammanoy nena ashshis; saro ba" yaagis.

## 8

### *Yesuusa mokkida maccasata*

<sup>1</sup> Hessafe guye, Yesuusi Xoossaa kawotethaa Wonggelaa sabbakishe katamaaranne gutaara aadhdhis. He wode tammanne nam77u hawaareti iyara de7oosona. <sup>2</sup> Qassi tuna ayyaanaappenne dumma dumma harggiyafe paxida issi issi maccasati iyara de7oosona. Enttika, laappun tuna ayyaanati keyida Magdela Mayraamo, <sup>3</sup> Heroodisa shuumaa Kuuza machchiw Yohaanna, Soosinnaranne qassi hara daroti enttana miishen maaddeyssati de7oosona.

<sup>4</sup> Daro asay dumma dumma katamaappe iyaakko shiiqin leemison enttaw odis. <sup>5</sup> "Issi goshshanchchoy zerethi zeranaw keyis. I zerishin issi issi zerethay oge gaxan wodhdhidi

yedhdhettis, salo kafoti maxidosona. <sup>6</sup> Harati shaalloy garssan de7iya biitta bolla wodhdhidoosona. Buroo dolida mela biittan laahoy baynna gisho miccidosona. <sup>7</sup> Hara zerethay qassi aguntha giddon wodhdhis. Agunthaara wolla diccida gisho agunthay cuullidi bessan ashshis. <sup>8</sup> Harati lo77o biitta bolla wodhdhidoosona. Dolida wode xeetu kushe ayfidosona.” Hessa odi onggidi, ba qaala dhoqqu oothidi, “Si7iya haythi de7iya ubbay si7o” yaagis.

<sup>9</sup> Iya tamaareti, “Ha leemisuwa birshshethay aybee?” yaagidi oychchidosona <sup>10</sup> I, “Xoossaa kawotethaa xuuraa erana mela hinttew imettis. Shin harati be7ishe demmonna mela, si7ishe akekonna mela leemison odays.

<sup>11</sup> “Hiza, ha leemisuwa birshshethay hayssa: zerethi yaaggettiday Xoossaa qaala. <sup>12</sup> Oge gaxan wodhdhida zerethay qaala si7eyssata. Gidoshin, entti ammanidi attonna mela Xalahey qaala entta wozanaappe maxi digees. <sup>13</sup> Shaalloy garssan de7iya biitta bolla wodhdhida zerethay qaala si7idi ufayssan ekkeyssata. Entti ha77is ammanooonappe attin xaphoy baynna gisho paaceg gakkia wode ellesidi kaddoosona. <sup>14</sup> Aguntha giddon zerettidayssati qaala si7eyssata. Enttika alamiya qofan, duretethaaninne sa7aa duussaa miikkotethaa cuulettidi besseyssada ayfibookkona. <sup>15</sup> Lo77o biittan wodhdhida zerethay lo77o wozanan qaala si7idi naageyssatanne dandda7an minnidi ayfe ayfeyssata.

<sup>16</sup> “Xomppe xomppidi, daachcho kammeey woykko arssafe garssan wothey deenna. Geliya asi be7ana mela dhoqqa bessan wothees.

<sup>17</sup> “Hessa gisho, qoncce keyonna qosettidi attiyaabay, erettonna geemmidi attiyaabay deenna.

<sup>18</sup> “Hiza, hintte qaala waati si7iyakko akeekite. De7iya ubbaas guzhetidi imettana, baynnayssas hari attoshin iyaw de7iya guuthiyaka iyappe ekettana” yaagis.

*Yesuusa aayeranne ishatara*

(Maato 12:46-50; Mar 3:31-35)

<sup>19</sup> Yesuusa aayeranne ishatara iyaakko yidosona. Shin asaa darotethaafe denddoysan iya demmanaw dandda7ibookkona. <sup>20</sup> Issi asi Yesuusakkko, “Ne aayeranne ne ishatara nena koyidi karen naagoosona” yaagis.

<sup>21</sup> Yesuusi zaaridi, “Xoossaa qaala si7idi ooson peeshsheyssati ubbay taw aayonne taw isha” yaagis.

*Yesuusi haathaa zulya seeris*

(Maato 8:23-27; Mar 4:35-41)

<sup>22</sup> Issi gallas Yesuusaranne iya tamaaretara issife wogolon gelidi, “Abbaa pinnoos” yaagis. Enttika baanaw denddidosona. <sup>23</sup> Abbaa bollara entti pinnanaw bishin Yesuusi dhiskkis. Qopponna mino carkkoy abbaa bolla denddis. Haathay wogoluwan gelin wogoloy mitetethi oykkhya wode ubbay babbidosona.

<sup>24</sup> Iya tamaareti iyaakko shiiqidi, “Nu Godaw, nu Godaw, nu dhayos yaagidi” Yesuusa denthidosona.

Yesuusi dendddi carkkuwanne gotiya seeris. Ellesidi carkkoynne gotey woppu gis. Sarotethayka simmis. <sup>25</sup> Yesuusi ba tamaaretakko, “Hintte ammanoy awunee” yaagis. Enttika, yayyishenne malaalettishe issoy issuwako, “Carkkoynne haathay kiitetteyssi, I hayssi oonee” yaagidosona.

*Tuna ayyaanaappe yedettida uraa*

(Maato 8:28-34; Mar 5:1-20)

<sup>26</sup> Abbaa pinnidi Galila baggara de7iya Gerggesoone biittaa gakkidosona. <sup>27</sup> Yesuusi wogoluwappe keyidi sa7an wodhdhishin tuna ayyaanana oykettida uray katamaappe keyidi iyara gahettis. Daro laythi afili ma77onna kallo duufon de7eesippe attin soo gelenna. <sup>28</sup> Yesuusa be7ida wode iya sinthun gafannidi, ba qaala dhoqqu oothidi, “Ubbaafe Bolla Xoossaana na7aw Yesuusa neera taw aybi issifetethi de7ii? Hayyana tana ha77i un77ethofarkki” yaagis. <sup>29</sup> Hessa I giday, tuna ayyaanay uraappe keyana mela Yesuusi hangettida gishossa. Daro wode tuna ayyaanay iya haarida gisho santhalaaatinne toho qachchiya biraatan qashettidi naagettees. Shin qashuwa duuthidi tuna ayyaanan laagettidi bazzo gelis.

<sup>30</sup> Yesuusi, “Ne sunthay oonee” yaagidi oychchis.

I, daro tuna ayyaanati iya oykkidi gisho bana, “Leegiyona” gis. <sup>31</sup> Tuna ayyaanati banttana Si7oole kiiitonna mela woossidosona.

<sup>32</sup> He bessan zooze bolla miya gudunthro wudey hamuttees. Hini gudunthotan gelino gidi woossidosona, ikka “Gelite” gis. <sup>33</sup> Tuna ayyaanati uraappe keyidi gudunthotan gelidosona. Wudey deriyappe duge gurgguxidi abban gelis.

<sup>34</sup> Henthanchchoti hanidayssa be7ida wode woxxi bidi, katamaninne guta ubban odidosona. <sup>35</sup> Asay hanidabaa be7anaw keyidi Yesuusakko yidosona. Tuna ayyaanay keyida uray ma7o ma77idi, iya wozanay simmin, Yesuusa toho matan uttidayssa demmidi yayyidosona. <sup>36</sup> Iya be7ida asay tuna ayyaanay oykettida uray waanidi paxidaakko odidosona. <sup>37</sup> Gerggesoone yuushuwan de7iya asay gita yashshi yashettidi Yesuusi bantta matappe baana mela woossidosona. I wogoluwani gelidi guye simmis.

<sup>38</sup> Tuna ayyaanay keyida uray Yesuusara daanaw woossis. <sup>39</sup> Shin Yesuusi iyaakkko, “Ne soo simma, Xoossay ay mela gitabaa new oothidaakkoo oda” yaagidi mooyzis. Uraykka Yesuusi ay mela gitabaa iyaw oothidaakkoo katama ubban markkattishe bis.

*Hayqqida na7iwunne Yesuusa ma7uwa bochchida maccasiw  
(Maato 9:18-26; Mar 5:21-43)*

<sup>40</sup> Asay naagidi gam77ida gisho Yesuusi simmiya wode mokki ekkidosona. <sup>41</sup> Ayhude Woosa Keetha halaqa gidida Iyaroosa giya uray ba soo yaana mela Yesuusa tohuwa bolla wodhdhidi woossis. <sup>42</sup> Iyaw tammanne nam77u laythi gidida macca na7a de7iyara saket-tada hayqos gakkada de7awusu. Yesuusi biya wode asay iya un77ethees. <sup>43</sup> Tammanne nam77u laythi suuthi goggishe gam77ida maccasi de7iyara de7awusu. Iya baw de7iya miishiyi aakimetas immada onggasu. Shin paxanaw dandda7abukku. <sup>44</sup> Iya Yesuusas guye baggara shiiqada, iya afilaa macaraa bochchasu, sohuwara goggiya suuthay eqqi aggis.

<sup>45</sup> Yesuusi, “Tana bochchiday oonee?” yaagis. Ubbay “Nu bochchibookko” yaagin, Phexiroosi, “Asttamaariyaw, daro asay kaallishininne un77ethishin be7ashe waanada, ‘Tana bochchiday oonee?’ gay” yaagis.

<sup>46</sup> Shin Yesuusi, “Issi asi tana bochchis; ays giikko, wolqqi taappe keyoyssi taw erettis” yaagis.

<sup>47</sup> Maccasiya, ibay qonccidayssa erida wode kokkorashe yada Yesuusa tohuwa bolla kunddasu. Ays bochchidaakkonne waanada ellesada paxidaakko asaa ubbaa sinthan markkattas. <sup>48</sup> I, “Ta naatte, ne ammanoy nena pathis; saron ba” yaagis.

<sup>49</sup> Yesuusi oda onggonna de7ishin, Ayhude Woosa Keetha halaqaa, Iyaroosa sooppe issi asi yidi, “Iyaroosa, ne na7iya hayqqasuu; asttamaariya mela daaburissofa” yaagis.

<sup>50</sup> Shin Yesuusi hessa si7idi Iyaroosakkoo, “Babbfo! Ammana, ne na7iya paxana” yaagis.

<sup>51</sup> Yesuusi Iyaroosa soo gakkida wode Phexiroosapape, Yohaannisapape, Yayqoobappe, na7ee aawappenne aayeppe attin hari gelana mela koyibeenna. <sup>52</sup> He bessan de7iya asa ubbay na7ees mishettidi yekkishin, Yesuusi, “Yekkofite! Na7iya dhiskkasuppe attin hayqqabuukku” yaagis.

<sup>53</sup> Asay na7iya hayqqidayssa eriya gisho iya oda leqqidi miicidosona. <sup>54</sup> Shin Yesuusi na7ee kushiya oykidi, “Naatte dendda” yaagis. <sup>55</sup> Na7ees shemppoy simmin dendda eqqasu. Yesuusi enttako, “Iwu miyabaa immite” yaagis. <sup>56</sup> Na7ee aawaranne aayera malaalettidosona. Shin Yesuusi hayssa, “Ooddeskka odoppite” yaagis.

## 9

*Yesuusi tammanne nam77u hawaareta kiittis  
(Maato 10:5-15; Mar 6:7-13)*

<sup>1</sup> Yesuusi tammanne nam77u hawaareta baakko xeegidi, tuna ayyaanata kessana melanne hargge ubbaa pathana mela wolqanne maata immis. <sup>2</sup> Xoossa kawotethaabaa markkattanaadanne hargganchchota pathanaada kiittis. <sup>3</sup> I enttako, “Xam77a gidin ogoro gidin kathi gidin miishe gidin laammi ma77iya afila gidin oges gidi aykkoka oykkofite. <sup>4</sup> He katamaappe hintte keyana gakkanaaw imathatethan hintte gelidasuwan gam77ite. <sup>5</sup> Oonikka hinttena mokkonna ixxiko he katamaappe keyishe enttaw markka gidana mela hintte tohuwan de7iya baana pittidi keyite.” <sup>6</sup> Enttika kiittidayssada keyidi Wonggelaa odishenne dumma dumma gutatan hargganchchota pathishe aadhdhidosona.

<sup>7</sup> Galila biittaa haariya Heroodisi Yesuusi oothidabaa ubbaa si7ida wode dagammis. Ays giikko, issi issi asati Yohaannisi hayqoppe denddonna aggenna yaagosona. <sup>8</sup> Baggati, “Eeliyaasi qonccis” goosona; harati qassi, “Beni nabetaappe issoy hayqoppe denddis” yaagidi odettoosona. <sup>9</sup> Shin Heroodisi, “Yohaannisa qoodhiya ta qanxisada wodhas. Yaatin, hayssatho yaagettti iyabaa odettey, I oonee?” yaagidi ba ayfen be7anaw koyees.

*Yesuusi ichchashu mukulu asaa muzis  
(Maato 14:13-21; Mar 6:30-44; Yoha 6:1-14)*

<sup>10</sup> Tammanne nam77u hawaareti guye simmi yidi, entti oothidabaa ubbaa Yesuusas odidosona. I enttana ekkidi Beetesayda katamaappe gaxa efis. <sup>11</sup> Shin daro asay Yesuusa

gideyssa eridi iya kaallidosona. I entta mokki ekkidi Xoossa kawotethaabaa tamaarssis; paxanaw koyeyssatakka pathis.

<sup>12</sup> Sa7i omarssiya wode tammanne nam77u hawaareti iyaakko shiiqidi, “Nu de7ey bazzo biitta gidiya gisho asay dumma dumma gutatanne katamata bidi, kathinne aqiyaso koyana mela asaa moyza” yaagidosona.

<sup>13</sup> Shin I, “Enttaw miyabaa hintte immite” yaagis.

Entti, “Nuus de7ey ichhashu uythinne nam77u molo gidiya gisho ha asaas gidiya kathi nuuni bidi shammonna ixxiko gidenna” yaagidosona. <sup>14</sup> He bessan ichhashu mukulu gidiya addetti de7oosona.

Yesuusi ba tamaaretakko, “Ishataman ishataman shaakki shaakki asaa utisite” yaagis.

<sup>15</sup> Iya tamaareti, I kiittidayssada asaa utisidosona. <sup>16</sup> I ichhashu uythaanne nam77u molota ekkidi, salo xeellidi, Xoossa galatidi, meenthidi asaa ubbaa gathana mela ba tamaaretas immis. <sup>17</sup> Ubbay midi kallidosona. Enttafe attida tifey tammanne nam77u gayta kumethi gidis.

*Phexiroosi, Yesuusi ooneekko markkattis  
(Maato 16:13-19; Mar 8:27-29)*

<sup>18</sup> Yesuusi ba xalaala woossishin, iya tamaareti iyaakko yidosona. I, “Asay tana oona goonaa?” gidi oychchis.

<sup>19</sup> Entti zaaridi “Issoti issoti, ‘Xammaqiy Yohaannisa, baggati Eliyaasa, harati qassi, beni nabetappe issoy hayqoppe denddis’ yaagosona” yaagidosona.

<sup>20</sup> I zaaridi, “Yaatin hintte tana oona geeti” yaagis. Phexiroosi, “Neeni Xoossaafe kitettida Kiristtoosa” yaagidi zaaris.

<sup>21</sup> Yesuusi hayssa oddeskka odoppite gidi minthidi odis. <sup>22</sup> Qassika Yesuusi, “Asa Na7ay daro metuwa ekkana. Biitta cimatan, kahine halaqatan, higge asttamaaretan aadhdhi imettana. Entti iya wodhana, shin I heedzanthro gallas hayqoppe denddana” yaagis.

<sup>23</sup> Yesuusi asaa ubbaako, “Tana kaallanaw koyey oonikka de7ikko bana kaddo, ba masqaliya gallas gallas tookkidi tana kaallo. <sup>24</sup> Ba shemppi ashshanaw koya ubbay iyo dhayssees, ba shemppi ta gisho gidi dhayssiyaa oonikka iyo ashshees. <sup>25</sup> Asi alame ubbaa haaridi, gidoshin ba shemppi dhayssiyabaa woykko qohiyabaa gidikko iya ay maaddii? <sup>26</sup> Oonikka tananinna ta qaalan yeellatikko Asa Na7ay ba bonchchuwara hessadakka aawa bonchchuwaranne Geeshsha kitanchchota bonchchuwara yaa wode iyan yeellatana. <sup>27</sup> Ta hinttew tuma odays; hayssan eqqidayssata giddofe Xoossa kawotethaa be7onnashin hayqqonna asati de7oosona” yaagis.

*Yesuusa malay laamettis  
(Maato 17:1-8; Mar 9:2-8)*

<sup>28</sup> Yesuusi he oda odin, hosppun gallasappe guye Phexiroosa, Yayqoobanne Yohaannisa baara ekkidi woossanaw deriya bolla keyis. <sup>29</sup> I woosa bolla de7ishin iya ayfe karey laamettis; afilaykka awa mela phoolidi booxis. <sup>30</sup> Nam77u asati, enttika Museranne Eliyaasara bonchchon qonccidi, <sup>31</sup> Yerusalamen polettanaw de7iyabaa, hessika, I ha alamiyappe shaakettanabaa iyara odettoosona. <sup>32</sup> Phexiroosanne iyara de7eyssata dhiskkoy efin, entti dhiskkofe barkkiya wode iya bonchchuwanne iyara eqqida nam77u asata be7idosona. <sup>33</sup> Asati Yesuusappe shaakettidi baana hanishin, Phexiroosi Yesuusakkko, “Godaw, hayssan gideyssi nuus ay mela lo77o! Issino new, issino Muses, issino Eliyaasas oothidi heedzu shaqara shaqaroos” yaagis. Shin I ay gidaakko erenna.

<sup>34</sup> I yaagidi odettishin shaaray yidi enttana kammis. Entti he shaara giddo gelishe babbidosona. <sup>35</sup> Shaara giddofe, “Ta doorida na7ay hayssa iya si7ite” yaagiya qaalay si7ettis. <sup>36</sup> He qaalay si7ettidaappe guye Yesuusi barkka de7ishe benttis. He wode entti be7idabaa ooddeskka odonna, bantta wozanan oykkidi si77i gidosona.

*Yesuusi tuna ayyaanaa issi na7aappe kessis  
(Maato 17:14-18; Mar 9:14-27)*

<sup>37</sup> Wonttethe entti deriyappe wodhdhiya wode daro asay yidi iyara gahettidosona. <sup>38</sup> He wode asaa giddofe issi asi, “Asttamaariyaw, ta issi na7aa yada be7arkki. <sup>39</sup> Tuna ayyaanay qopponna oykkidi waasises; goppontto yegisidi qakerthees, asatethaa qohidi un77ethidi yeddees. <sup>40</sup> Ne tamaareti kessana mela woossas, shin entti dandda7ibookkona” yaagidi woossis.

<sup>41</sup> Yesuusi, “Ammanoy baynna geella yeletethato, awude gakkanaw ta hinttera daane, hinttena dandda7anee? Ne na7aa bada haa ekkaya” yaagis.

<sup>42</sup> Na7aa ekkidi yaa wode tuna ayyaanay sa7an holi yeggidi kokkorssis. Shin Yesuusi tuna ayyaanaa hanqidi na7aappe kessis. Na7aakkka na7aa aawas immis. <sup>43</sup> Asay ubbay Xoossaa gita wolqgan malaalettidosona. Entti I oothidaban malaalettishin, Yesuusi ba tamaaretakko, <sup>44</sup> “Hayssa ta hinttew odehyssa loythi si7ite; Asa Na7ay morkketa kushen aadhdi imettana” yaagis. <sup>45</sup> Shin I gidabay enttafe geemmida gisho akeekibookkona. Hessa gisho, zaaridi oychchanaw babbidosona.

*Ubbafe gita gidanay oonee?*

(Maato 18:1-5; Mar 9:33-37)

<sup>46</sup> Yesuusa tamaareti, “Nu giddon gita gidanay oonee?” gidi palama oykkidosona. <sup>47</sup> Yesuusi entta wozanaad qofaa eridi yooga na7aa ba matan essidi, <sup>48</sup> “Ha yooga na7aa ta sunthan mokkiya oonikka tana mokkees, tana mokkey tana kiittidayssa mokkees, hintte ubbaafe guuxeyssi, Igita gidana” yaagis.

<sup>49</sup> Yohaannisi, “Godaw, issi asi ne sunthan tuna ayyaanata kessimin be7idi I nuura gidonna gisho diggida” yaagis.

<sup>50</sup> Yesuusi zaaridi, “Hinttera ejettonnayssi, I hintte bagga. Hessa gisho, iya diggofite” yaagis.

*Samaare asay Yesuusa ixxidosona*

<sup>51</sup> Yesuusi salo biya wodey matattida gisho Yerusalaame baanaw qanxidi denddis.

<sup>52</sup> Samaare biittan de7iya issi gutaa bidi, ubbabaa iyaw giigisana mela ase yaa kiittis.

<sup>53</sup> Shin I bey Yerusalaame gidiya gisho entti iya mokki ekkibookkona. <sup>54</sup> Yesuusa tamaareti Yayqoobaranne Yohaannisara hessa be7idi, “Godaw, saloppe tami wodhdhidi entta mo gaana mela ne koyay” yaagidosona. <sup>55</sup> Shin Yesuusi guye simmi entta hangettidi, “Hintte garssan aybi ayyaani de7iyakko hintte erekketa. Asa Na7ay ase ashshanaw yisippe attin dhayssanaassa gidenna” yaagis. <sup>56</sup> Yaappe denddidi hara guta bidosona.

*Yesuusa kaaloy cigisiya gatiya*

(Maato 8:19-22)

<sup>57</sup> Entti ogiyara bishin, issi asi, “Ne biyaso ubbaa ta kaallana” yaagis.

<sup>58</sup> Yesuusi zaaridi, “Workkanatas olli, salo kafotas keethi de7ees, shin Asa Na7ay ba huu7iya shemppisiyasoy baawa” yaagis.

<sup>59</sup> Hankkuwako, “Neeni tana kaalla” yaagis. Shin uray, “Godaw, koyrottada ta aawa moogada yaana” yaagis.

<sup>60</sup> Shin Yesuusi, “Hayqqidayssati hayqqidayssata moogana mela enttaw aggaaga; neeni bada Xoossaakawotethaa sabbaka” yaagis.

<sup>61</sup> Qassi hara asi, “Godaw, ta nena kaallana, shin koyrottada ta soo asa sarothada yaana” yaagis.

<sup>62</sup> Yesuusi zaaridi, “Koxe oykkidi guye xeelliya oonikka Xoossaakawotethaa bessenna” yaagis.

## 10

*Yesuusi laappun tammanne nam77u tamaareta kiittis*

<sup>1</sup> Hessafe guye, Goday haraa laappun tammanne nam77u\* asata dooris. I baanaw qoppida katamaanne guta ubbaa sinthattidi baanada nam77a nam77a oothidi kiittis. <sup>2</sup> Yesuusi enttako, “Hekko shiiqana kathay daro shin oosanchchoti guutha. Yaaniya gisho, katha goday oosanchchota kiittana mela woossite. <sup>3</sup> Hiza, biite, dorssatada suudhumeta giddo hinttena taani yeddana. <sup>4</sup> Hintte biya ogiyas aykkofite, miishe gidin kathi gidin caamma oykkofite. Oge bolla onnakka sarothofite <sup>5</sup> Hintte geliya keethaa ubbaa koyrottidi, ‘Saroy ha keethaas gido’ yaagite. <sup>6</sup> Saro dosiya asi he bessan de7ikko, hintte saroy yan shemppana; ixxas giilkko hintte saroy hinttew simmanna. <sup>7</sup> Oosanchchos damooze bessiya gisho hintte gelida keethan hinttew shiishidaba ubbaa mishenne uyishe yan gam77ite. Issuwa sooppe issuwa soo yuuyoppite. <sup>8</sup> Ay katamakka hintte geliya wode asay hinttena mokkidi, hinttew shiishidaba ubbaa miite. <sup>9</sup> He kataman de7iya hargganchchota pathishe, ‘Xoossaakawotethay hintteko matis’ yaagidi odite. <sup>10</sup> Shin issi katamaa geliya wode asay hinttena mokkonna ixxiko dabaaba keyidi hayssada giite: <sup>11</sup> ‘Nu tohuwa bolla de7iya hintte katamaa baana pittoos, shin Xoossaakawotethay hintteko matattidayssa erite.’

12 Pirdda gallasan ha katamaappe Soodome katamaas pirdday kawushshe gidanayssa ta hinttew odays” yaagis.

*Ammanonra gisho borettida katamata  
(Maato 11:20-24)*

13 Kaallidikka, Yesuusi, “Neno Koraaziine, neno Beetesayda, ayye, hinttenan oosettida malaatati Xiroosaninne Sidoonan oosettidaakko yan de7iya asay kalle ma77idi, bidintha bolla uttidi beni maarotan geli agganashin. 14 Hessa gisho, hinttefe aathidi Xiroosasinne Sidoonas Xoossa pirdday kawuyana. 15 Nekka Qifirnahoome, salo gakkanaw nena dhoqqu oothanaw koyay? Ne duge Si7oole holettana” yaagis.

16 Qassika Yesuusi ba tamaaretakko, “Hinttena si7ey tana si7ees, hinttena ekkonnay tana ekkena, tana ekkonnay tana kiittidayssa ekkenna” yaagis.

*Laappun tammanne nam77ati simmidosona*

17 Laappun tammanne nam77u tamaareti kiitettida bessaafe keehi ufayttishe simmidosona. Yesusakkoo shiiqidi, “Godaw, ne sunthan tuna ayaanatikka nuus kiitettidosona” yaagidosona.

18 Yesuusi enttako, “Xalahey saloppe wol77anthada wodhdhishin ta be7as. 19 Hekko, shooshaanne kornne yedhdhana melanne morkkiya wolqqaa zaarana mela maata hinttew immas. Hinttena qohanabay aykkoysa deenna. 20 Gidoshin, hintte sunthay salo mazggaban xaafettida gisho ufayttipee attin tuna ayaanati kiitettida gisho ufayttofite” yaagis.

*Yesuusi ba ufayssaa qonccisis  
(Maato 11:25-27; 13:16-17)*

21 He wode Yesuusi Geeshsha Ayaanan ufayttidi, “Saluwa sa7aa Godaw, hayssa cincat-appenne eranchhotappe geenthada yalagatas qonccisida gisho galatetta. Ee ta aawaw, hessa ne oothanaw lo77o shene gidis.

22 “Uubbabay ta aawappe taw imettis. Na7ay ooneekko aawappe attin hari woykko na7ay qonccisanwan koyeyssafe hari oonikka aawa erey baawa” yaagis.

23 Kaallidikka, Yesuusi dumma ba tamaaretakko, “Hintte be7eyssa be7eyssati anjet-tidayssata. 24 Tuma daro nabettine kuitto hintte be7eyssanne si7eyssa be7anawunne si7anaw amottidosona, shin be7ibookkona, si7ibookkona” yaagis.

*Tuma siiqo*

25 Hekko, issi gallas Muse wogaa eriya issi uray denddidi Yesuusa yaagidi paace oysho oychchis. “Asttamaariyaw, merinaa de7uwa laattanaw taani ay oootho?” yaagis.

26 Yesuusi, “Muse maxxaafan xaafetiday woygii? Ne waata nabbabay?” yaagis.

27 Addey zaaridi, “Ne Godaa ne Xoossa, ne kumetha wozanappe, ne kumetha shemp-puwafe, ne kumetha wolqqafenner ne kumetha qofaappe dosa. Qassi ase ne shooruwa ne huu7iyada dosa’ yaagees” yaagis.

28 Yesuusi iyaakkko, “Neeni likke zaaradasa, nekka hessada ootha. Neeni merinaw de7on daana” yaagis.

29 Shin uray bana xillo oothanaw koyidi, “Hanos I ta shooroy oonee?” yaagis.

30 Iya oyshaas Yesuusi yaagidi zaaro immis, “Issi ase de7eyssi Yerusalaame katamaappe duge Iyaarkko katamaa bishin oge bolla panggati keyidi shocidosona. Iya ma7uwa qaari ekkidi haygoppenne paxapape giddon yeggidi bidosona. 31 Guyeppe, Ayhude kahine issoy he ogiyara ba buussu bishe uraa be7idi deshshi gidi aadhhdhis. 32 Qassi issi Leewe de7eyssi he bessaa gakkishe uraa be7idi harasoora aadhhdhidi bis. 33 Shin, issi Samaare biitta ase de7eyssi he ogiyara yishe uraa be7idi iyaw qadhattis 34 Iyaakkoo shiiqidi, iya madunthaa bolla zaytentte woyne tigidi qachchis. Ba hariya bolla utisidi imathi aqiya keethi efis. He bessan iyaw koshshiyaba ubbaa oothis. 35 Wonttethe nam77u dinaare kessidi imatha keethaawas immidi, ‘Hayyana ha uraa loytha xeella. Taani new immidayssafe bollara ne kessiyabaa ubbaa ta new ciggana’ yaagis.

36 “Hiza, ha heedzu asatappae panggati shocida uraas shoorotey new oona daanii?”

37 Uray zaaridi, “Iyaw qadhattidayssaka” yaagis.

Yesuusi, “Nekka bada hessada ootha” yaagis.

*Yesuusi Marttanee Mayraami son*

<sup>38</sup> Yesuusi ba tamaaretara oge bishe issi guta gakkis. Yan Martta geetettiya issi maccasiya iya ba son mokkasu. <sup>39</sup> Iwukka Mayraamo giya michchiya de7awusu, Mayraama qaala si7ashe Godaa tohuwa matan uttasu. <sup>40</sup> Shin Martta daro ooson un77ettada Yesuusakko shiiqada, "Godaw, ta michchiya oosuwa ta xalaalas yeggada utta aggin ta daaburiya wode neeni be7ashe si77i gay? Iya tana maaddana mela odikkii" yaagasu.

<sup>41</sup> Shin Goday hayssada gidi zaaris, "Martta, Martta, neeni daroban un77ettasaanne metootasa. <sup>42</sup> Gidoshin, koyettey issibaa xalaala. Mayraama lo77obaa doorasu, hessika ippe ekettenna" yaagis.

## 11

*Yesuusi woosabaa tamaarssis  
(Maato 6:9-13; 7:7-11)*

<sup>1</sup> Issi gallas Yesuusi issi bessan woossees. Woosaa wurssida wode iya tamaarettape issoy, "Godaw, Yohaannisi ba tamaareta woosa tamaarssida mela nekka nuna woosa tamaarssa" yaagis.

<sup>2</sup> Yesuusi, "Hayssada yaagidi woossite:

'Saluwan de7iya nu aawaw  
ne geeshsha sunthay anjetto;  
ne kawotethay yo.

<sup>3</sup> Nu gallasa kathaa hachchi hachchi nuus imma.

<sup>4</sup> Nuna qoheyssata nuuni atto geysada,  
nu nagara atto ga;  
paacen nuna gelssofa' yaagite' yaagis.

<sup>5</sup> Kaallidikka, Yesuusi ba tamaaretakko yaagis: "Leemisos hinttfe issuwash laggey de7ees. I giddi bilaahe ba laggija soo bidi, 'Ta laggiyaw, heedzu soollo taw tal77arkki. <sup>6</sup> Taw lagge giddida issi asi ogeppee yin, iyaw aathiyyabaa dhayas' yaagikko,

<sup>7</sup> "Iya laggey keethaa giddon gididi, 'Hayyana tana waaysoppa, wulay gorddettis. Ta nayttika taara arssa bolla zin77idosona. Yaaniya gisho, denddada ne koyabaa immanaw dandda7ikke' yaagiyye? <sup>8</sup> Ta hinttew odays; laggethaha gisho denddidi immanaw koyonna ixxikokka woosan salethida gisho denddidi koshshiyaba ubbaa immees.

<sup>9</sup> "Hessa gisho, taani hinttew odays; woossite hinttew imettana; koyite hintte demmana; kare yidi xeegite hinttew dooyettana. <sup>10</sup> Gaasokyka woossiya ubbay ekkees; koyey demmees; kare yidi xeegeyssas dooyettees.

<sup>11</sup> "Hinttenoo, aawato hintte giddofe na7i uythi woossin shuchchu immey oonee? Molo woossin shooshi immey oonee? <sup>12</sup> Woykko phuupphulle woossiko kornne immi? <sup>13</sup> Hintte iitata gidishe hintte naytas lo77obaa immo erikko, salon de7iya hintte aaway woosseyssatas Geeshha Ayyaana waati aathi immenne?" yaagis.

*Yesuusanne Bi7elzebuula*

<sup>14</sup> Issi gallas Yesuusi doona muumisida tuna ayyaanana issi uraappe kessis. Tuna ayyaanay keyida mela muume uray odettis. Asaykka malalettis. <sup>15</sup> Shin issoti issoti, "Tuna ayyaanana halaqaa, Bi7elzebuula wolqqan tuna ayyaanata kessees" yaagidosona. <sup>16</sup> Harati qassi paaces saloppe malla bessana mela koyidosona.

<sup>17</sup> Shin Yesuusi entta qofaa eridi enttako, "Woli giddon shaakettiya kawotethi ubbay dhayees; woli giddon shaakettiya keethi kunddees. <sup>18</sup> Xalahey woli giddon shaakettikko iya kawotethay waanidi minnidi eqqanee? Hintte tana, 'I tuna ayyaanata Bi7elzebuula wolqqan kessees' yaageta. <sup>19</sup> Hiza, taani tuna ayyaanana Bi7elzebuula wolqqan kessiyabaa gidikko hintte nayti oodde wolqqan kessonashaa? Hessa gisho, entti hintte bolla pirddeyssata gidaan. <sup>20</sup> Shin taani tuna ayyaanata Xoossa biradhdhen kessiyabaa gidikko hiza Xoossa kawotethay hintteko matidayssa erite.

<sup>21</sup> "Mino asi dancettidi ba keethaa naagiyabaa gidikko, iya shaloy boshettenna. <sup>22</sup> Hanoshin, iyappe aadhdhi mino gidida asi yidi, iya qohidi xoonikko ammanettidi danccida danccuwa bilisidi, iya shaluwa bonqqidi haraas shaakkees.

<sup>23</sup> "Taara gidonnayssi tana ixxees; taara shiishonnaysika laallees.

<sup>24</sup> "Tuna ayyaanay asappe keyida wode shemppiyaso koyidi haathi baynnasoora yuuyees. Shemppiyaso dhayida wode 'Ta keyidasuwa simmania' yaagees. <sup>25</sup> I simmiya wode keethay pitettidi lo77idi de7ishin demmis. <sup>26</sup> Hessafe guye, bidi iyappe aadhdhidhi iitida haraa laappun tuna ayyaanata ekkidi yees. Iyan gelidi duussu oykkees. He uraas koyroyssafe guyeyssi aadhdhidhi iita gidees" yaagis.

<sup>27</sup> Yesuusi hessa oda bolla de7ishin issi maccasi asaa gaathafe denddada, ba qaala dhoqqu oothada, "Nena tookkida uloygne neeni dhammadha dhanthati anjettidosona" yaagasu.

<sup>28</sup> Shin I, "Anjettidayssati Xoossaa qaala si7idi kiitteteyyssata" yaagis.

### *Yoonasa malla*

<sup>29</sup> Daro asay shiiqida wode Yesuusi, "Ha yeletethay iita; ooratha malla koyees. Shin Yoonasa malaatappe attin hari enttaw imettene. <sup>30</sup> Yoonasi Nanawe asaas malla gidida mela Asa Na7aykka ha yeletethaaas malla gidan. <sup>31</sup> Dugeha kawiya pirdda gallas ha yeletethaara denddada pirddana. Gaasoykka, iya Solomone cincatethaa si7anaw biitta gaxappe denddada yasu. Hekko Solomonepppe aadhdeyssi hayssan de7ees <sup>32</sup> Nanawe asati pirdda gallas ha yeletethaara denddidi entta bolla pirddana. Gaasoykka Yoonasa sibkkatiyan maaroa gelidosona. Hekko, Yoonasappe aadhdey hayssan de7ees" yaagis.

### *Asatethaa poo7o*

<sup>33</sup> "Xomppe xomppidi qosa bessan woykko oto giddon wothiya asi deenna. Asi poo7uwa be7ana mela dhoqqo bessan wothees. <sup>34</sup> Ne asatethaaas poo7oy ne ayfiyaa. Ne ayfey lo77o gidikko, ne kumetha asatethay poo7ees. Nena ayfey sakkiko ne asatethay ubbay dhumees. <sup>35</sup> Hessa gisho, ne garssan de7iya poo7oy dhumonna mela naageeta. <sup>36</sup> Hiza, ne kumetha asatethay poo7o gidikko, ne asatethankka hari dhuma bessi dhayikko, ne asatetha kumethay wolile poo7o mela gidees" yaagis.

### *Usuppun ayyeta*

(Maato 23:1-36; Mar 12:38-40)

<sup>37</sup> Yesuusi ba oda onggida mela issi Farisaawey baara kathi maana mela xeegis. I iyara issife gelidi gibira bolla uttis. <sup>38</sup> Farisaawey Yesuusi kathi maanappe sinthe kushe meeconayssa be7idi malaaleettis.

<sup>39</sup> Goday iyaakko, "Hintte Farisaaweti quiliyanne shaatiya bolla bagga meecetta. Shin hintte gaathay uuzetethaninne iitatethan kumis. <sup>40</sup> Hinttenoo, eeyato, kare baggaa medhdhidayssi gaatha medhdhiday iya gidenneyye? <sup>41</sup> Shin quiliyaninne shaatiyan de7eyssa manqotas immite. He wode hinttew ubbabay geeshshi gidan.

<sup>42</sup> "Farisaaweto hinttena ayye, sawoppe, xalooteppe, hessa melabaappe asraata keseta. Shin xillotethinne Xoossaas dosoy hinttenan baawa. Harata aggonna hayssatakka oothanaw bessees, shin aggideta.

<sup>43</sup> "Farisaaweto hinttena ayye, Ayhude Woosa Keethan bonchcho oyde, giya giddon bonchcho sarotho doseeta.

<sup>44</sup> "Malay dhayin asay eronna bollara biya duufo daaneyssato hinttena ayye" yaagis.

<sup>45</sup> Higge asttamaarey zaaridi, "Asttamaariyaw, ne hessa gashe nuna cayaasa" yaagis.

<sup>46</sup> Yesuusi, "Hinttenoo, higge asttamaareto, hinttenakka ayye, asay tookkanaw dandda7onna deexo tooho toosseeta, shin hinttee hintte huu7es hari attoshin biradhdhe xeerankka bochcheketa.

<sup>47</sup> "Hintte aawati wodhida nabeta duufuwa hintte giigisiya gisho hinttena ayye. <sup>48</sup> Hiza, hintte aawata oosuwa minthanaw entti wodhida nabeta duufuwa hintte loythiya gisho entta iita oosuwas hintte markka. <sup>49</sup> Hessa gisho, Xoossay ba cincatethan, 'Nabetanne hawaareta ta hinttew kiittana, shin hintte baggata wodhana; harata gooddana' yaagis. <sup>50</sup> Hessa gisho, ha yeletethay alamey medhettoosappe hanno gakkana gukkida nabeta ubbaa suuthas oyshettana. <sup>51</sup> Aabelappe doomidi yarshsho bessaasinne Xoossa Keethaafe gidduwan gukkida Zakkariyaasa suutha gisho ha yeletethay oyshettana.

<sup>52</sup> "Higge asttamaareto, hinttena ayye, eratetha qulppiya hintte kushen oykkideta, shin hinttew gelekketa haratakkaka gelsseketa." yaagis.

<sup>53</sup> Yesuusi yaappe baanaw keyaa wode higge asttamaaretinne Farisaaweti iyara eqettidi oyshon waaysosona. <sup>54</sup> Iya doonappe keyaa qaalan iya oykkanaw koyidi hessa oothidosona.

## 12

### *Ayyaana minthetho*

(Maato 10:26-27)

<sup>1</sup> He wode daro mukulun taybettiya asay woli bolla yedhdhettana gakkanaw asi asa bolla shiiqidi de7ishin, Yesuusi ba tamaaretakko, "Farisaaweta irshshuwaafe naagetite. Hessika entta cubbotethaa. <sup>2</sup> Qoncconna qosettidi, erettonna geemmidi attiyaabay aykkoyka baawa. <sup>3</sup> Hiza, hintte dhuman odidabay ubbay poo7on si7ettana, qol77a gaathan kalkkashidabay dabaaban odettana.

<sup>4</sup> "Ta baggato, ta odehyssa si7ite; ashuwa wodhoosonappe attin haraa aykkoka oothanaw dandda7onnayssatas babbofite. <sup>5</sup> Hanoshin, hintte babbanaw besseyssa ta hinttew qoncisisana. Hessika wodhidaappe guye Gaannamen yegganaw wolqqay de7eyssas iyaw babbite. Ee, tuma gays; iyaw babbite. <sup>6</sup> Ichhashu buubbetti issi santimes bayzettokonaayye? Hanoppe attin enttafe issinnaka Xoossa sinthan dogetuku. <sup>7</sup> Hari attoshin, hintte huu7e binaanaykka paydettidi de7ees. Hiza, babbofite; daro buubbetappe hintte aadhdheeta.

<sup>8</sup> "Ta odehyssa si7ite; asa sinthan taw markkattiya ubbaas Asa Na7ay Xoossa ka itanchchota sinthan markkattana. <sup>9</sup> Asa sinthan tana kaddeyssas Xoossa ka itanchchota sinthan ta iya kaddana. <sup>10</sup> Asa Na7a bolla kadhe qaala haasayaa ubbay maarota demmana, shin Geeshsha Ayyaana bolla kadhe qaala odetteyssi maaretenna.

<sup>11</sup> "Asi hinttena oykkidi Ayhude Woosa Keethan, daynnata sinthaninne kawota sinthan gooshechchiya wode ay odaneeekkonne woygi zaaraneekko hirggofite. <sup>12</sup> He wode hintte odanabaa Geeshsha Ayyaanay hinttena tamaarssana" yaagis.

#### Dure uraa eeyatethaa

<sup>13</sup> Asaa giddofe issi asi Yesuusakko yidi, "Ta ishay taw nu aawa laatappe shaakkana mela iyaw oda" yaagis.

<sup>14</sup> Yesuusi zaaridi, "La addiyaw, hintte bolla tana daynnanne laata shaakkiya cima oothiday oonee?" yaagis. <sup>15</sup> Qassika Yesuusi, "Asa de7oy shalo darotethan gidonna gisho yaare aggidi minthidi hinttena naagite" yaagis.

<sup>16</sup> Kaallidikka leemison, "Gadey daro kathi immiya issi dure uray de7ees. <sup>17</sup> He uray, Ta kathaa taani shiishanaw bessi guuxida gisho ay oootho?" yaagidi ba wozanan qoppis. <sup>18</sup> Hizappe yaatana; kase de7iya shaalela laallada haraa dalgga shaalela keexana. Kathaanee taw de7iyaba ubbaa iyan yeggana. <sup>19</sup> Ba shemppeeko, 'Ta shemppe, daro laythas new gidiya shalo shiishas. Hiza, shempypada ma, uya, ufaytta' yaagana.

<sup>20</sup> "Shin Xoossay, 'La, eeya addiyaw, hachchi qamma ne shemppiya neeppe ekettawusu. Hiza, ne shiishidabay ooddees gidanee?' yaagis.

<sup>21</sup> "Hessa gisho, baw duretethi sa7an shiishiya asas, Xoossa matan dure gidonna asaas wurssethay ha urayssa mela" yaagis.

#### Un77ettofite

(Maato 6:25-34)

<sup>22</sup> Hessafe guye, Yesuusi ba tamaaretakko, "Hiza, ta odiyabaa si7ite, hintte shemppuwas ay mino hintte bollaas ay ma77ino yaagidi un77ettofite. <sup>23</sup> Shemppoy kathafe bolli aiflapple aadhdhees. <sup>24</sup> Kafota be7ite zerokkona, kiishokkona, eleykka shaaleykka baawa. Shin Xoossay enttana muzees. Hintte kafotappe daro aadhdheeta. <sup>25</sup> Hanoshin, hinttene un77ettidi ba laythaa bolla issi qamma guijjanaw dandda7ey oonee? <sup>26</sup> Hiza, ha guuthabaa oothanaw dandda7onna hintte harabaas ays un77etteetii? <sup>27</sup> Ane cishshati waanidi dicciyakko be7ite. Waayokkonanne suqqokona. Hari attoshin, Solomoney ba de7iya bonchcho ubban enttafe issiuwa melakka ma77ibeena. <sup>28</sup> Hinttenoo, ammanoy paccidayssato, hiza, Xoossay hachchi benttidi wontto taman yegettana cishshata hayssada mayzikko, hinttena waati aathi mayzennee? <sup>29</sup> Hessa gisho, ay miino woykko ay uyino gidi un77ettofite. <sup>30</sup> He ubbaas Xoossa ammanonna asati un77ettoosona. Shin hintte aaway Xoossay hessi ubbay hinttew koshsheyssa erees. <sup>31</sup> Ubbaafe aathidi Xoossa kawotethaa koyite hessi ubbay hinttew gujji imettana.

<sup>32</sup> Hinttenoo, guutha deretoo, yayyomite; hintte aawa Xoossay kawotethaa hinttew immanaw ufaytee. <sup>33</sup> Hinttew de7iyabaa bayzidi manqotas immite. Kaysoy ekkonnason, bili moonnason, cimonna karxiitan, wuronna shaluwa saluwan shiishite. <sup>34</sup> Hintte wozanay hintte shaloy de7iyasawan gidana.

#### Barkkidi naago

<sup>35</sup> "Qanthan danccidi giigettite; hintte xomppey poo7idayssa gido. <sup>36</sup> Bantta goday yaaganoppe simmana gakkanaw barkkidi naageyssatada, goday yidi xeegiya wode elle-sidi dooyanay giigida asata daanite. <sup>37</sup> Bantta goday simmiya wode dhiskkonna de7ishe naageyssati anjjettidayssata. Tuma gays; goday qanthan danccidi gayta yuushuwan utisidi

mokkees. <sup>38</sup> Goday laade gidin giddi bilahe gidin woykko wonttimaathe gidin yidi, hessa mela dhiskkonna naagishin demmiya he aylleti anjettidayssata. <sup>39</sup> Shin hayssa erite; kaysoy awude yaanekko keethaaway eriyakko keethay boketiya wode si77i gidi be7enna. <sup>40</sup> Hintteka giigidi naagite; Asa Na7ay hintte qopponna wode yaana” yaagis.

<sup>41</sup> Phexiroosikka, “Godaw ha leemisuwa nu xalaalas odayye woykko asa ubbaasee?” yaagis.

<sup>42</sup> Goday zaaridi, “Hiza, kathaa muzanaw bessiya wodiyen immana mela goday ba aylleta bolla shuumida ammantheysinne wozaanaama halaqay oonee? <sup>43</sup> Goday simmiya wode hessa mela oothishe benttiya aylley I anjettidayssa <sup>44</sup> Ta hinttew tuma odays; ba godaas de7iya shalo ubbaa bolla I shuumettana. <sup>45</sup> Shin he aylley, ‘Ta goday elle yeenna’ yaagidi ba wozanan qoppidi, macca aylletanne adde aylleta wadhdhiko, qassi baw koyida mela mishenne uyishe mathottiko, <sup>46</sup> he aylliya goday I qopponna gallasaninne hirggonna wode yaana. Yidi iya qanaxerethidi, iya qaada ammanonna asatara oothana.

<sup>47</sup> “Godaan sheniyada giigonnayssinne iya goday ay dosiyakko erishe oothonna aylley daro garaafettana. <sup>48</sup> Shin ba godaa sheniya eronna attidi garaafettanaw besseyssaa oothiday guuthara garaafettana. Gaasokyka daro imettidayssafe daro koyettees, daro hadara ekkidayssafeekka daro immana gidi naagettees.

*Sarotethas gidonnashin shaaketethassa  
(Maato 10:34-36)*

<sup>49</sup> “Taani yiday biitta bolla tama oythanaassa. Ha77i tamay oykkiyako tana waati ufayssanddeshsha! <sup>50</sup> Hanoshin, ta ha77i xammaqettiya xinqqatey de7ees. I polettana gakkanaaw ta daro un77ettays. <sup>51</sup> Sa7a bolla sarotethi elhanaw yida hinttew daanii? Gidenna, ta yiday shaakkanaassa. <sup>52</sup> Ha77ife doomidi woli giddon shaakettida ichchashu keethaa asati issife de7oonosa. Nam77ati heedzata bolla, heedzatikka nam77ata bolla, denddidi shaakettoosona. <sup>53</sup> Aaway na7aa bolla, na7aykka aawa bolla, aayyaa na7ee bolla, na7iya aaye bolla, azinnaa aayyaa na7aa machche bolla, na7aa machchiya azinnaa aaye bolla, denddidi shaakettana.”

*Laythata malo  
(Maato 16:2-3)*

<sup>54</sup> Qassika asaakkko, “Wuloha baggara saloy shaaratiya wode be7idi, ellesidi, ‘Iri yaana’ yaageta, hessadakka hanees. <sup>55</sup> Dugeha carkkoy carkkiya wode ‘Sa7ay awana’ yaageta, hessadakka hanees” yaagis. <sup>56</sup> Hinttenoo, cubboto, Salobaanne sa7abaa shaakki ereet-tashin wa wodiya shaakki eroy hinttira waanidi xoonidee?

<sup>57</sup> “Yaatin, hintte huu7es ays tuma pirddeketii? <sup>58</sup> Ne morkkiyara wolla daynna sinthan eqqanaw bashe oge bolla giiganaw koya. Ne giigonna ixxiko gooshechchidi daynna sinthi nena efana. Daynnay nena poolisees aathi immana. I nena woynen yeggana. <sup>59</sup> Si7ite, issi bakkani attonna cigga onggana gakkanaaw ne yaappe keyonnayssa era” yaagis.

## 13

*Nagarappe simo*

<sup>1</sup> He wode Yesuusakkko asay yidi Philaaxoosi wodhidi entta suuthaara entta yarshshuwa walakkida Galiila asaabaa odida asati he bessan de7oonosa. <sup>2</sup> I hayssada yaagidi zaaris; “Yaatin he Galiila asati he iita haygo hayqqida gisho Galililan de7iya asa ubbaafe aadhdida nagaranchcho daanoona? <sup>3</sup> Gidenna! Gidoshin, hintteka maaratotan simmona ixxiko, ubbay hessada dhayana. <sup>4</sup> Woykko qassi Salihoome giya bessan gibbey woddidi wodhida tammanne hosppun asay Yerusalamaen de7iya asa ubbaafe aadhdhida nagaranchcho daanoona? <sup>5</sup> Gidenna! Shin hintteka maaratotan simmona ixxiko ubbay hessada dhayana.”

<sup>6</sup> Qassika Yesuusi hayssada gidi leemiso odis: “Issi uraas woynen gaden tokettida balase mithiya de7awusu. I ippe ayfe koyi yidi aykkoka demmibeeenna. <sup>7</sup> Gadiya goday woynen oosanchchuwakko, ‘Ayfe demmanwan koyada heedzu laythi simerettada aykkoka demmabiikkie. Hessa gisho, qanxa digga; ays biittaa melisay?’ yaagis.

<sup>8</sup> “Shin oosanchchoy, ‘Godaw, I yuushuwa oothada osha yeggana gakkanaaw ha laythas aggarkii. <sup>9</sup> Ha laythi ayflikko lo77o, ixxiko qanxa agga’” yaagidi zaaris.

*Zokko kuunida maccasiya paxasu*

<sup>10</sup> Yesuusi Sambaata gallas Ayhude Woosa Keethan tamaarssees. <sup>11</sup> He bessan tammanne hosppun laythi tuna ayyaani zokko kuunisida issi maccasiya de7awusu. Iya kuunappe denddoysan suure eqqanaw dandda 7ukku. <sup>12</sup> Yesuusi iyo be7ida wode xeegidi, “Ha maccasete, ne harggiyafe paxadasa” yaagis. <sup>13</sup> Ba kushiya I bolla wothin, iya sohuwara suurada eqqasu. Xoossaaka galatasu.

<sup>14</sup>Shin Ayhude Woosa Keetha halaqay yilotidi asaakko, “Ooso oothiya usuppun gallasati de7oosona. Hessa gisho, he gallasatan yidi paxiteppe attin Sambbaata gallas gidenna” yaagis.

<sup>15</sup>Goday, “Cubboto, hintte giddofe boori woykko hare Sambbaata gallas zadalope billidi haathe ushshanaw efonnay oonee? <sup>16</sup>Yaatin, ha maccasiya Abrahame na7aa gidashe xalahen qashettada tammanne hosppun laythi kumethi de7idaaris Sambbaata gallas birshshetethi koshshennee?” yaagidi oychchis.

<sup>17</sup>I hessa odida wode eqetteyssati ubbay yeellatidosona. Shin asa ubbay I oothida malaalisiya ooso ubban ufayttidosona.

<sup>18</sup>Hessafe guye, Yesuusi hayssada yaagis, “Xoossa kawotethay ay daanii? Iya aybira daaniso? <sup>19</sup>Xoossa kawotethay issi asi ba goshshan tokkida wola ayfe mela. I diccidi mithi gids. Salo kafoti iya tashiya bolla shemppidosona.

<sup>20</sup>Qassi, “Xoossa kawotethaa aybira daaniso? <sup>21</sup>Issi maccasiya daro dhiillera walakkada munuqida guutha irshsho daanees” yaagis.

### *Xuuntha wulaa*

<sup>22</sup>Hessafe guye, Yesuusi Yerusalaame bishe I kanthiya ogiyan de7iya katamataninne gutatan tamaarssisse aadhhdhis. <sup>23</sup>Issi asi Yesuusakko, “Godaw, attanay guutha asa xalaalee?” yaagidi oychchis.

Yesuusi enttako, <sup>24</sup>“Si7ite, xuuntha wulaara gelanaw baaxetite. Daroti gelanaw koyosona shin enttaw hanenna. <sup>25</sup>Keethaway denddidi wulaa gorddidaappe guye ‘Nuus dooyarkii’ yaagishe karen eqqidi xeessi oykkeeta. Shin I, ‘Hintte ooneekkonne awuppe yidaakko ta erike’ gidi zaarana. <sup>26</sup>He wode hintte, ‘Neera wolla mida, uyida, nu dabaabankka tamaarssadasa’ yaagana.

<sup>27</sup>I zaaridi, ‘Hintte ooneekkonne awuppe yidaakko erikke. Hinttenoo, geellato taappe haakkite’ yaagana. <sup>28</sup>Abrahame, Yisaqa, Yaygoobanne nabeta ubbaa Xoossa kawotethan be7ana, shin hintte karen wodhdhidi attiyaa wode hinttew yeehonnie achche garccethi gidana. <sup>29</sup>Asay dolohappe, wulohappe, pudehappenne dugehappe yidi Xoossa kawotethan gibira bolla uttana. <sup>30</sup>Hessa gisho, ha77i dethan guye gididayssatappe sinthe gidanayssati, sinthe gididayssatappe guye gidanayssati de7oosona” yaagis.

### *Yesuusi Yerusalaames yekkis*

(Maato 23:37-39)

<sup>31</sup>He wode Farisaawetappe issoti issoti yidi, “Heroodisi nena wodhanaw koyaa gisho ha bessafe denddada ba gidosona.

<sup>32</sup>I zaaridi, ‘Bidi, he workkanaas hekko, ‘Hachchinne wontto tuna ayyaanata kessana, hargganchchota pathana, heedzanthro gallasan kuushsha bolla gakkana’ yaagis giite.

<sup>33</sup>Hanoppe attin, nabey Yerusalaamepppe karen hayqqanaw bessenna. Hessa gisho, hachchi, wonttonne wontti pee7in he bessaa baanaw denddas.

<sup>34</sup>“Yerusalaame, Yerusalaame, nabeta wodhiyare, neekko kiitettidayssata shuchchan caddiyare, kuttoy ba nayta ba qefiyappe garssan shiishiyada ne nayta ta qesiyyappe garssan aappun toho shiishanaw koyadina, shin hintte ixxas gideta. <sup>35</sup>Ta hinttew odays; hintte keethay kaysattana. Godaa sunthan yeyssi anjettidayssa hintte gaana gakkanaaw tana demmeketa” yaagis.

## 14

### *Yesuusi Farisaawiya son*

<sup>1</sup>Issi Sambbaata gallas Yesuusi issi Farisaaweta halaqaa soo kathi maanaw geliya wode asay caddi xeellosona. <sup>2</sup>He bessan shawuhe harggen waayettiya issi asi iyaw sintha baggara zin77is. <sup>3</sup>Yesuusi Farisaawetakkonee higge asttamaaretakko, “Sambbaata gallas hargganchcho pasoy wogeye woga gidennee?” yaagidi oychchis. <sup>4</sup>Entti si77i gidosona. Yesuusi harggettiya uraa bochchi pathidi moyzis.

<sup>5</sup>“Qassika hinttefe issuwas na7i woykko boori Sambbaata gallas aafon wulliko ellesidi kessonny oonee?” yaagidi oychchis. <sup>6</sup>Entti issibaakka zaaranaw dandda7ibookkona.

<sup>7</sup>Yesuusi imatuwas xeegettidayssati bonchcho bessi doorishin be7idi, ha leemisuwa odis: <sup>8</sup>“Issi asi nena yaagano xeegilko bonchcho bessan uttifa. Neepppe aadhhdhi bonchchettiya asi xeegettawan dandda7ees. <sup>9</sup>Hinttena nam77atakka xeegidayssi yidi, ‘Ne bessaa ha imathaas yedda’ yaagiya wode neeni yeellatashe ziqqa bessi wodhdhaasa. <sup>10</sup>Gidoshin, ne xeegettida wode koyrottada ziqqa bessi be7ada utta. Xeegeyossi yidi, ‘Ta laggiyaw, ha bonchcho bessan utta’ yaagana. He wode neera issife xeegettida asa ubbaa

sinthan ne bonchchettana. <sup>11</sup> Bana dhoqqu dhoqqu oothiya ubbay kawuyana; bana ziqqi ziqqi oothiya ubbay dhoqqu dhoqqu gaana.”

<sup>12</sup>Qassi Yesuusi iya mokkida keethaa aawakko, “Quma woykko kaho imato xeegiya wode neeni kushe zaaro xeegonna mela ne laggeta woykko ne ishata woykko ne dabbota woykko ne dure shoorota imato xeegoppa. <sup>13</sup>Gidoshin, ne imato giigisida wode manqota, wobbeta, gunddatanne qooqeta xeega; neeni anjettana. <sup>14</sup>Hayssati kushe zaaranaw dandda7onna gisho kushe zaaroy geeshshata denddo gallasan new simmmana” yaagis.

### *Gita imatuwa*

(Maato 22:1-10)

<sup>15</sup> Yesuusar wollaa imato bolla uttoyssata giddofe issoy hessa si7idi, “Xoossaa kawotethan imato bolla utteyssi anjettidayssa” yaagis.

<sup>16</sup> Yesuusi, “Issi asi gita imato giigisidi daro asata xeegis. <sup>17</sup>Imatoy mokettiya saatey gakkiya wode xeegettida imathata, ‘Hekko ubbabay giigis, haa yiite’ yaagidi xeeganaada ba aylliya kiittis.

<sup>18</sup> “Shin ubbayka bantta gaaso gaaso medhdhidosona. Issoy, ‘Ha77i buroo gade sham-mida gisho bada be7anaw koshshees hayyana tana aggarkii yaaga’ yaagis. <sup>19</sup>Hankkoy, ‘Ichchashu waatha boori shammaas enttana waaxa be7ana gisho hayyana tana lanccofa’ yaagis. <sup>20</sup>Qassi haray, ‘Taani buroo meddan de7iya gisho yaanaw dandda7ikke’ yaagis.

<sup>21</sup> “Aylley simmi yidi he ubbaa ba godaas odis. He wode yaagano aaway hanqettidi aylliyo, ‘Ellesda kataman de7iya woggaa ogetanne daggalata bada, manqota, wobbeta, qooqetanne gunddata haa eha’ yaagis.

<sup>22</sup> “Aylley, ‘Ta godaw, ne kiittidayssi ubbay polettis, shin ha77ika bessi de7ees’ yaagis.

<sup>23</sup> “Goday aylliyo, ‘Horogata bollanne, gade giddo ogeta keya, ta keethay kumana gakkanaw demmida ubbaa yaana mela ootha. <sup>24</sup>Ta hinttew odays; imatotidayssatappe onikka ta gibiraappe moonnayssa erite’ gis” yaagis.

### *Godaa kaaloy yarshhisees*

<sup>25</sup> Daro asay iyara wollaa bishin Yesuusi enttako guye simmidi, <sup>26</sup>“Taakko yaa ubbay ba aawanne ba aayiw, ba machchiwunne ba nayta, ba ishatanne ba michcheta, hari attoshin ba de7uwa ixxonnay ta tamaare gidanaw dandda7enna. <sup>27</sup>Ba masqaliya tookkidi tana kaallonnay ta tamaare gidanaw dandda7enna.

<sup>28</sup> “Hinttefe issi asi shuchcha keethi keexanaw koykko, keethaa keexidi ongganaw ay mela muishe koshshiyako koyrottidi eranaw qoppi be7onnay oonee? <sup>29</sup>Hessa gidonna ixxiko, ha uray baaso shuchchaa hiixin qusttethi xoonikko, <sup>30</sup>be7iya ubbay, ‘Ha uray gimbbethi oykkin qusttanaw iya xoonis’ yaagidi boroosona.

<sup>31</sup> “Woykko issi kawoy hara kawora olettanaw denddishe laatamu mukulu olanch-chotta ekki yaa kawuwara tammu mukulu olanchchotara eqettanaw dandda7anayssanne dandda7onayssa uttidi zorettonnay oonee? <sup>32</sup>Egettaw dandda7ettonaba gidikk, he hara kawuwara haahon de7ishin giiganaw koyrottidi cima yeddidi oychchees. <sup>33</sup>Hessadakka, hinttefe oonikka baw de7iyaba ubbaa aggonna ixxiko ta tamaare gidanaw dandda7enna.

<sup>34</sup> “Maxiney lo77o, shin maxiney ba mal77uwa aggiko, waanidi maxine geetettanaw dandda7ii? <sup>35</sup>Biittatethaaskka araddatethaaskka maaddonabaa gidiya gisho wora yegetees. Hiza, si7iya haythi de7iya asi si7o” yaagis.

## 15

### *Dhayida dorssaa*

(Maato 18:12-14)

<sup>1</sup> Issi gallas qaraxa qanxeysatinne nagaranchchoti Yesuusa timirttiya si7anaw iya yuushuwan shiiqidosona. <sup>2</sup>Shin Farisaawetinne higge asttamaareti, “Hayssi uray na-garanchchota shiishidi ekkees, enttara issife mees” yaagidi zuuzummidosona.

<sup>3</sup> Yesuusi yaagidi hayssa leemiso enttaw odis: <sup>4</sup>“Hintte giddofe issuwash xeetu dorssati de7iyabaa gidiikko enttafe issoy dhayikko uddufun tammanne uddufunata bazzon aggidi dhayoyssa demmanna gakkanaw koyonnay oonee? <sup>5</sup>Demmida wode ufayttidi ba gannan tookkidi, <sup>6</sup>ba soo simmees. Ba laggettanee shoorota issife xeegidi, ‘Dhayida ta dorssaa demmas, taara issife ufayttite’ yaagees. <sup>7</sup>Hessadakka, maaroti koshshonna uddufun tammanne uddufun xillotappe aathidi maarotan geliya issi nagaranchchuwa gaason salon gitu ufayssi gidees.

<sup>8</sup> "Woykko tammu biri de7iya issi maccasiya tammaafe issiya dhayikko demmanna gakkanaw xomppe oythada keethaa pittada mintha koyonnara oonee? <sup>9</sup> Demmida wode ba laggettanne ba shoorota xeegada 'Dhayida ta issi bira demmida gisho taara ufayttite' yaagawusu. <sup>10</sup> Si7ite, hessa mela issi maaratethan geliya nagaranchchuwan Xoossaa kiitanchchota sinthan ufyassi gidees" yaagis.

### Dhayida na7aa

<sup>11</sup> Zaaridi Yesusi, "Issi uraas nam77u nayti de7oosona. <sup>12</sup> Enttafe kaalo na7ay ba aawakko, 'Ta aawaw, ne shaluwappe ta gishuwa taw imma' yaagis. Aaway ba shaluwa ba naytas shaakkis. <sup>13</sup> Guutta gallasappe guye kaalo na7ay ba gishuwa ubbaa qachchi ekkidi haaho biitta bis. Yan alttacan shaluwa toochchidi onggis. <sup>14</sup> I baw de7iyaba ubbaa wurssidaappe guye he biitta ubban mino koshi keyin metootis. <sup>15</sup> Hessa gisho, he biittaa asaappe issuwa soo gaata gelis. Uray iya guduntho heemmana mela ba moothaa yeddis. <sup>16</sup> Gudunthoti miya harquwafe maanaw amottis, shin iyokka iyaw immiya asi benttibeenna. <sup>17</sup> Wozani simmin, 'Aappun ta aawa aylletas kathi wora wodhdhin ta hayssan koshara hayqqanaw gakkadina?' <sup>18</sup> Denddada ta aawakko boda, 'Ta aawaw, salon Xoossaa, sa7an nena qohas. <sup>19</sup> Hizappe ne na7a geettada xeegettanaw taw bessonna gisho ne son de7iya aylletappe issuwada tana payda' yaagana" yaagis. <sup>20</sup> Hessa gisho, dednddi ba aawakko bis.

"Hanoshin, I burroo haahon de7ishin aaway qadhetidi, iyaakko woxxi bidi idimmidi yeeris. <sup>21</sup> Na7aykka, 'Ta aawaw salon Xoossaa, sa7an nena ta qohas. Hizappe ne na7a geettada xeegettanaw bessike' yaagis.

<sup>22</sup> "Iya aaway aylleta xeegidi, 'Ellesidi ubbaafe lo77o gidida ma7o ehidi iya mayzite; iya biradhdhen sagaayo, iya tohuwan caamma aathite. <sup>23</sup> Modhdho gatarmenthoo ehidi shukkite, moos, ufayttoo. <sup>24</sup> Ta na7ay hayssi hayqqis, shin ha77i paxis; dhays, shin benttis' yaagis. Hessafe guye, ufayetethi oykkidosona.

<sup>25</sup> "He wode bayra na7ay goshsha gaden de7ees. Yaappe yishe soo matishin yethinne gufa girssi si7is. <sup>26</sup> I, aylletappe issuwa xeegidi haniyabay aybeekko eranaw oychchis. <sup>27</sup> Aylley, 'Ne ishay saro yida gisho ne aaway modhdho gatarmenthoo iyaw shukkis' yaagis.

<sup>28</sup> "Bayra ishay yilotidi soo gelanawukka koyibeenna. Aaway kare keyidi soo gelana mela iya woossis. <sup>29</sup> Shin I ba aawakko, 'Hekko, hayssa mela laythi ta new aylletada ne kiitaappe issuwa pacisonna new kiiitetin ta la laggetara ufayttana mela hari attoshin issi laaqa deeshee immabaakka. <sup>30</sup> Hanoshin, hayssi ne na7ay ne shaluwa laymatara doomisidi yin modhdho gatarmenthoo shukkadasa" yaagis.

<sup>31</sup> "Aawaykka, 'Ta na7aw, neeni ubba wode taara de7aasa, tabay ubbay neessa. <sup>32</sup> Hayssi ne ishay hayqqis, shin paxis; dhays, shin benttis. Hessa gisho, daro ufayttanaw bessees' yaagana" yaagis.

## 16

### Ammanettonna shuumaa leemiso

<sup>1</sup> Yesuusi ba tamaaretakko, "Issi dure uraas iyappe garssara issi shuumay de7ees. He shuumay ba godaa shaluwa toochchees yaagiya worey keethaawa gakkis. <sup>2</sup> Keethaaway shuumaa xeegisidi, 'Taani woygiyabaa si7adinaa?' Hizappe neeni ta keethas shuumaa gidada oothanaw dandda7onna gisho ta shaluwa taw sheedhda' yaagis.

<sup>3</sup> "He shuumaykka ba wozanan hayssada yaagidi qoppis. 'Ta goday tana shuumatethaafe wothana hanees, goya aqanaw wolqqi baawa, woossa maanaw yeellayees; yaatin ta waano?' <sup>4</sup> Shuumatethaafe ta wodhdhiya wode asay tana mokkana mela oothanabaa ta erays' yaagis.

<sup>5</sup> "Hessa gisho, iya godaa acoy de7iya asaa issuwa issuwa xeegi ehidi koyro uraakko, 'Ne bolla ta godaa acoy ay meli de7ii?' yaagidi oychchis.

<sup>6</sup> "I, 'Laatumu barmeele zayte acoy de7ees' yaagis.

"Shuumay, 'Wule warqattiyha he7e, ellesada, tammu barmeele zayte acoy de7ees gada xaafa' yaagis.

<sup>7</sup> "Hessafe kaallidi nam77anthuwako, 'New aappuni de7ii?' yaagis.

<sup>8</sup> "I, '370 kunttaale giste acoy de7ees' yaagis.

"Shuumay, 'Ne wule warqattiyha he7e, ellesada, 296 kunttaale yaagada xaafa' yaagis.

<sup>9</sup> Keethaaway ammanettiboonna shuumaa iya bilaamatethaas nashshis. Ha alamiya nayti ase oythan poo7o naytappe aadhhdida wozanaamata.

<sup>10</sup> "Hessa gisho, ta hintew odays; ha alamiya miishey wuriya wode merinaa keethan mokettana mela ha miishiyara hintew laggeta shammite. <sup>11</sup> Ubbaafe guuthaban ammanettiday daroban ammanettidayssa gidees. Qassi ubbaafe guuthaban ammanettonnayssi daroban ammanettenna. <sup>12</sup> Hiza, ha alamiya miishen hintte ammanettonna ixxiko

tuma muishe hinttew ooni hadara immanee? <sup>12</sup> Hintte hara asa miishen ammanettonna ixxiko, hintte buzo muishe hinttew ooni immanee?

<sup>13</sup> “Issi aylley nam77u godatas haarettanaw dandda7enna. Issuwa ixxiko hankkuwa dosees woykko issuwako shiiqikko hankkuwa kadhees. Hessadakka, hintte Xoossasinne miishes haarettanaw dandda7ekketa.”

<sup>14</sup> Muishe dosiya Farisaaweti hessa si7ida wode Yesuusa qelqisidosona. <sup>15</sup> I, “Hinttee hinttene asa sinthan xilliseeta, shin Xoossay hintte wozanaa erees. Asa sinthan bonchchet-tidayssi Xoossaas sinthan borettidayssaa.

<sup>16</sup> “Muse higgeynne nabeta kuitay Yohaannisa gakkanaw hinttew odettishe gam77is. Hessafe guye, Xoossaas kawotethaa Wonggelay sabbakettishe gam77is. Asi ubbay yaa gelanaw dafettees. <sup>17</sup> Gidoshin, higgiyafe issi laafa pidale attanaappe saloynne sa7ay aadhdheyssi kawuyees.

<sup>18</sup> “Ba machchiw yeddidi haraa ekkiya ubbay laammees. Ba azinaappe anjettidaaro ekkeysika laammees” yaagis.

#### Dure uraanne Alaazara

<sup>19</sup> “Al77onne alleeqo afila ma77iya, sa7i injjetin gallas gallas ufayssan de7iya issi dure asi de7ees. <sup>20</sup> Hari qassi asatethay kumethi madunxida issi Alaazara geetettiya manqoy he dure uraa karen yetetidi attidayssi de7ees. <sup>21</sup> Koshappé denddoysan dure uraa gaytappe wodhdhiya tiifiya maanaw amottishe de7ees. Hari attoshin, kanati yidi iya madunthaa laacosona.

<sup>22</sup> “He manqoy hayqqis; kiitanchhoti iya Abrahame ki7uwa efidosona. Qassi dure uraykka hayqqidi moogettis. <sup>23</sup> Si7oolem un77ettidi de7ishe dhoqqu gidi haahon Abrahamenne iya ki7on de7iya Alaazara be7is. <sup>24</sup> I, ‘Aawaw Abrahame, taw qadhattarkii; ha laco taman un77ettada de7iya gisho Alaazari ba biradhdhiya haathan yeddidi ta inxarssaa laakothana mela hayyana iya yeddarkki’ yaagidi waassis.

<sup>25</sup> “Shin Abrahamey iyaakkoo, ‘Ta na7aw, ne sa7an de7iya wode lo77obaata ekkidayssa, qassi Alaazari iitabata ekkidayssa akeeka. Shin ha77i I hayssan ufayttees, qassi neeni waayettashe de7aasa’ yaagis. <sup>26</sup> Ha ubbaafe aadhdhidi, ‘Haappe hintteko, hinippe haa nuukko aadhdhanaw koyeyssati pinnonna mela nuusinne hinttes giddon gita aafoy de7ees’ yaagis.

<sup>27</sup> “Dure uray, ‘Aawaw, yaakko Alaazara ta aawa soo kiittana mela ta nena woossays. <sup>28</sup> Taw ichchashu ishati de7idosona, enttika ha waaye bessaa yoonna mela enttaw bidi markkatto’ yaagis.

<sup>29</sup> “Shin Abrahamey, ‘Enttaw Museranne nabetara de7oosona; entti odiyaba si7ona’ yaagis.

<sup>30</sup> “Dure uray, ‘Aawaw Abrahame, hessatho gidenna; issi asi hayqoppe denddidi biukko entti maaratotan gelana’ yaagis.

<sup>31</sup> “Abrahamey, ‘Musenne nabeta si7onna ixxiko, hari attoshin hayqoppe issi asi denddi odikkoka ammanokkona’ yaagis.”

## 17

#### Oyshisiya aawatethi

<sup>1</sup> Yesuusi ba tamaaretakko, “Ase dhubethidi nagaran gelssiyabay yoonna aggenna. Gidoshin, nagaran gelana mela oothiya uraa ayye” yaagis. <sup>2</sup> He uray kaalotappe issuwa baletethanaappe woxa ba qoodhen qachchidi abban wulliko iyaw lo77o. <sup>3</sup> Hessa gisho naagettite.

“Ne ishay nagara oothiko hanetta; qirotti maarotethan simmiko, iyaw atto yaaga. <sup>4</sup> Issi gallasan laappun toho qohidi, laappun toho, ‘Taani ta balaa eras tana maara’ yaagidi neekko yiikko iyaw atto ga.”

<sup>5</sup> Hawaareti Godaakkoo, “Ammano nuus gujjarkkii” yaagidosona.

<sup>6</sup> Goday, “Gaashe ayfe mela ammanoy hinttew de7ikko ‘Hayssa wolaa shodettada abbaa giddon toketta’ yaagikko hinttew kiiettana” yaagis.

<sup>7</sup> Gujjidikka Yesuusi, “Hintte giddofe issuwash goshshanchchoy woykko dorsse heemmiya aylley de7ikko ooso gadeppe woykko wudeppe soo simmiya wode ‘Elle haayada kathi maanaw utta’ yaagey de7ii? <sup>8</sup> Deenna, ‘Taw kaho gigisa; taani mada, uyada aggana gakkanaw eqqada muza. Hessafe guye, neeni qassi maasanne uyaasa’ yaagenneyye? <sup>9</sup> Hiza, goday, aylley kiiata polida gisho anjiyye? <sup>10</sup> Hessa gisho, hintteka kiiettoysa ubbaa polida wode ‘Nu pathonna aylleta; oothanaw bessiya oosuwa polida’ yaagite” yaagis.

*Baro harggiyafe geeyida tammu asata*

<sup>11</sup> Yesuusi Yerusalemme bishe Samaarisinne Galila biittaas giddora kanthidi aadhdhis.

<sup>12</sup> Issi gutaa geliya wode baro harggen oykettida tammu asati iya demmidosona. Entti haahon eqqidi,<sup>13</sup> “Godaa Yesusa, nuus qadhattarkii” yaagidi waassidosona.

<sup>14</sup> I entta be7ida wode “Bidi hinttenatethaa Ayhude kahine bessite” yaagis. Entti ogiya bolla bishe paxidosona.

<sup>15</sup> Enttafe issyo ba paxuwa be7ida wode dhoqqu gida qaalan Xoossa bonchchishe Yesuusakkoo simmis. <sup>16</sup> I Samaare biitta asi, shin Yesusa tohuwa bolla gufannidi iya galatis.

<sup>17</sup> Yesuusi, “Paxiday tammu asata gidokkonaayye? Yaatin, uddufunati aw bidonaa?<sup>18</sup> Ha allaga uraappe\* attin hari simmidi Xoossa galatey deenna guusseyye?” yaagidi oychchis. <sup>19</sup> Uraakko, “Ne ammanoy nena pathis; denddada ba” yaagis.

*Xoossa kawotethaa yuussaa*

(Maato 24:23-28,37-41)

<sup>20</sup> Farisaaweti, “Xoossa kawotethay awude yaanee?” gidi Yesusa oychchidosona. I, “Xoossa kawotethay benttiya mallan yeenna. <sup>21</sup> Qassika iyo, ‘Hannina woykko hinina yaaganaw dandda7enna. Ays giikko, Xoossa kawotethay hintte giddon de7ees’” yaagidi zaaris.

<sup>22</sup> Yesuusi ba tamaaretakko, “Asa Na7aa gallasatappi issuwa be7anaw hintte amottiya wodey yaana, shin hintte be7ekketa. <sup>23</sup> Asay, ‘I yan de7ees’ woykko, ‘Hayssan de7ees’ yaa-gana, shin enttana kaallidi booppite. <sup>24</sup> Wol77anthi wol77ammidi saluwa gaxappe gaxa poo7isiya mela Asa Na7aa yuussaa gallasay hessada hanana. <sup>25</sup> Shin hessi hananaappe sinthe Asa Na7ay daro waayanawunne ha yeletethan ixettanaw bessees. <sup>26</sup> Nohe wode hanidaysa mela Asa Na7aa wodiyankka hessada hanana. <sup>27</sup> Nohey Markkabiyan gelida qammaa gakkanaw asay mishenне uyishe, ekkishenne gelishe de7ishin dhayo haathay yidi ubbaa dhayssis. <sup>28</sup> Looxe laythankka hessatho hanis. Asay mishenне uyishe, shammishenне bayzishe, tokkishenне keexishe, gam77idosona. <sup>29</sup> Looxey Soodomeppi keyida gallas diinne geetettiya xuuggiyabay saloppe bukkidi ubbaa dhayssis. <sup>30</sup> Asa Na7ay qonciya wodekka hessada hanana.

<sup>31</sup> “He gallasan oonikka karen de7ey keethaa giddon de7iyabaa ekkanaw soo geloppo. Hessadakka, gaden de7iya asi aykkoska soo simmofo. <sup>32</sup> Looxe machchiw akeekite; <sup>33</sup> ba shemppi ashshanaw koyaa asi oonikka dhayssana; ba shemppi aathi immiya oonikka I ashshana. <sup>34</sup> Ta hinttew odays; he gallasan nam77u asati issi arssan zin77ana. Issyo ekettana, hankkoy attana. <sup>35</sup> Nam77u maccasati wolla gaaccishin issiya ekettana, hankkiya attana. <sup>36</sup> Nam77u asati wolla gaden goyeysatappi issyo ekettana, hankkoy attana”† yaagis.

<sup>37</sup> Entti, “Godaw aw ekettanee?” yaagidi oychchidosona.

I, “Bawuti de7iya bessan ankoti shiiqoosona” yaagis.

## 18

*Minnidi woossana mela tamaarssis*

<sup>1</sup> Yesuusi ba tamaareta azalonna ubba wode woossana mela tamaarssanaw koyidi yaagidi leemiso odis: <sup>2</sup> “Issi kataman Xoossaas yashettonna asaskka yeellatonna issi daynni de7ees <sup>3</sup> He kataman issi am77iya da7awusu. Iyakka, ‘Tawunne ta morkkiyas giddon de7iya mootuwa pirdda’ yaagada ubba wode he daynnaako simerettawusu. <sup>4</sup> Daynnay guutha wodes I odaa si7onna ixxis, shin guyeppe ba wozanan, ‘Taani Xoossaas yayyonna, asas yeellatonna ixxikokka, <sup>5</sup> ha am77iya tana waaysiya gisho iw pirddana; yaatonna ixxiko ubba wode yada tana salethana’ yaagidi qoppis” yaagis.

<sup>6</sup> Godaykka, “Geella daynnay gidayssa si7ideta; <sup>7</sup> Xoossay qammanne gallas iyaakkoo waassisya ba dooridayssatas pirddeneyye? Enttana maaddanaw gam77iyye? <sup>8</sup> Ta hinttew odehyssa si7ite, ellesidi pirddana. Gidoshin, Asa Na7ay yaa wode sa7a bolla ammano demandanddeshsha?” yaagis.

*Farisaawiyanne qaraxa qanxiseyssa*

<sup>9</sup> Qassi zaaridi, Yesuusi, banttana xillo asada oothidi ceeqetteyssatasinne harata kadeyssatas hayssada yaagidi leemiso odis: <sup>10</sup> “Nam77u asati woossanaw Xoossa Keethi bidosona. Isyo Farisaawe hankkoy qassi qaraxa qanxisiya asi. <sup>11</sup> Farisaawey eqqidi baw

<sup>\*</sup> 17:14 Leewe 14:1-32      17:18 Ha allaga uraappe: Baro harggiyafe paxida uray allaga geetettiay I Ayhude gidonna gishossa.      17:26 Medhe 6:5-8      17:27 Medhe 7:6-24      17:28 Medhe 18:20-19:25      17:31 Maato 24:17-18; Mar 13:15-16      17:32 Medhe 19:26      17:33 Maato 10:39; 16:25; Mar 8:35; Luuqa 9:24; Yoha 12:25

† 17:36 Issi issi maxaafatan paydo 36 deenna.

woossishe, 'Xoossaw taani harata mela bonqanchcho, geellanne laymatiya asi, aadhdhida qassi ha qaraxa qanxisiya uraa mela gidonna gisho nena galatays.<sup>12</sup> Saaminttafe nam77u toho xoomays, ta demmiyaba ubbaafe asiraata kessays' yaagis.

<sup>13</sup> "Shin qaraxa qanxiseyssi qassi haahon eqqidi hari attoshin salo dhoqqu gidi xeelanawukka yayyidi ba tira iccishe 'Xoossaw, tana nagaranchchuwa maararkii' gidi woossis. <sup>14</sup> Ta hinttew odehyssa si7ite; Farisaawiyappe hayssi qaraxa qanxiseyssi Xoossaa sinthan xillo gididi ba soo simmis. Ays giikko, bana dhoqqu dhoqqu oothiya asi kawuyana, bana kawushshiya asi dhoqqu dhoqqu gaana" yaagis.

#### *Yesuusanne yooga nayta*

(Maato 19:13-30; Mar 10:13-31)

<sup>15</sup> Yesuusi yooga nayta bolla ba kushiya wothidi anjana mela asay iyaakko ehoosona. Yesuusa tamaareti hessa be7idi ays Yesuusako eheeti yaagidi kaccidosona. <sup>16</sup> Shin Yesuusi nayta baakko xeegidi, "Yooga nayti taakko yaanayssa diggofite; yo giite. Ays giikko, Xoossaa kawotethay enttada hanidayssatassa. <sup>17</sup> Taani hinttew tuma odays; Xoossaa kawotethaa yooga naytatho ekkonnay oonikka yaa gelenna" yaagis.

#### *Dure uraa oysha*

(Maato 19:16-30; Mar 10:17-31)

<sup>18</sup> Ayhude halaqatappé issoy, "Keeha asttamaariyaw, merinaa de7uwa demmanaw ay oootho?" yaagidi oychchis.

<sup>19</sup> Yesuusi iyaakko, "Ays tana keehaw yaagada xeegay? Issi Xoossaafe attin hari keehi baawa. <sup>20</sup> Laammofa, wodhoppa, kaysotoppa, worddo markkattofa, ne aawanne ne aayiw bonchcha yaagiya kiitaa eray" yaagidi oychchis.

<sup>21</sup> Uraykka, "Hessata ubbaa taani na7atethafe doomada naagashe gam77as" yaagis.

<sup>22</sup> Yesuusi hessa si7ida wode "Hiza, new issibay paccees; new de7iyaba ubbaa bayzada manqotas imma; salon nena shaloy naagees. Yaata simmada tana kaalla" yaagis. <sup>23</sup> Shin uray hessa si7ida wode iyaw daro shaloy de7iya gisho daro qiriottis.

<sup>24</sup> Yesuusi uraa be7idi, "Dure asas Xoossaa kawotethaa geloy waanidi un77anddeshsha? <sup>25</sup> Durey Xoossaa kawotethaa gelanayssafe gimaley narppe luhora kantheyssi kawuyees" yaagis.

<sup>26</sup> Hessa si7ida asay, "Hessa gidikko ooni attanee?" yaagidosona.

<sup>27</sup> Yesuusi, "Asas dandda7ettonabay Xoossaas dandda7ettees" yaagis.

<sup>28</sup> Phexiroosi, "Hekko nuuni nubaa ubbaa aggidi nena kaallida" yaagis.

<sup>29</sup> "Yesuusi tuma ta hinttew odays; Xoossaa kawotethaa gidi ba keethaa woykko ba machchiw woykko ba ishata woykko ba aawanne ba aayiw woykko ba nayta aggiday; <sup>30</sup> ha wodiyen dakko daro, yaana alamiyan merinaa de7uwa ekkonnay oonikka baawa" yaagis.

#### *Yesuusi ba hayquwaaba zaari odis*

(Maato 20:17-19; Mar 10:32-34)

<sup>31</sup> Yesuusi tammanne nam77ata baakko xeegidi, "Ane Yerusalaame boos, nabeti Asa Na7aabaa xaaqidaba ubbay yan polettana. <sup>32</sup> I Ayhude gidonna asaas aadhdhidi imettana. Entti iya toochchana, cayananne iya bolla cuttana. <sup>33</sup> Iya garaafidaappe guye wodhana, shin heedzanthro gallasan I hayqoppe denddana" yaagis.

<sup>34</sup> Shin iya tamaareti hessa ubbaafe issibaakka akeekibookkona. Iya xuuray enttaw qosettida gisho I woygidaakkoo eribookkona.

#### *Qooqe uray xeellis*

(Maato 20:29-34; Mar 10:46-52)

<sup>35</sup> Yesuusi Iyaarkko matattiya wode issi qooqe uray oge gaxan uttidi woossees. <sup>36</sup> Qooqe uray asay he bessaara aadhdhishin si7idi, "I aybe?" gidi oychchis. <sup>37</sup> Entti, "Naazirete Yesuusi hayssara aadhdhees" yaagidosona.

<sup>38</sup> I, "Dawite na7aw, Yesuusa, tana maararkii" yaagidi waassis.

<sup>39</sup> Sinthe sinthe biya asati, "Si7i ga" gidi hangettidosona. Shin I, "Dawite na7aw, tana maara" yaagidi darssi waassis.

<sup>40</sup> Yesuusi eqqidi uraa baakko ehana mela kiittis. Uraykka, iyaakko shiiqin, <sup>41</sup> "Ta new ay oothana mela koyay?" yaagidi oychchis.

Qooqey, "Godaw ta xeellanaw koyays" yaagis.

<sup>42</sup> Yesuusi, "Xeella, ne ammanoy nena pathis" yaagis. <sup>43</sup> Uray sohuwara xeelli aggis. Xoossaa bonchchishe Yesuusa kaalis. Asa ubbay hessa be7idi Xoossaa galatidosona.

**19***Qaraxa qanxisiya Zakkijoosa*

<sup>1</sup> Yesuusi Iyaarkko gelidi aadhhees. <sup>2</sup> Yan Zakkijoosa geetettiya qaraxa qanxiseyssata halaqay de7ees. I daro dure. <sup>3</sup> I Yesuusi ooneekko be7anaw koyis. I qanthi gidiya gisho asaa darotethaafe denddoysan Yesuusa be7anaw dandda7ibeenna. <sup>4</sup> Yesuusa be7anaw koyidi I biya ogiyas sinthe thewoxxi bidi issi boobba mitha bolla keyis.

<sup>5</sup> Yesuusi he bessaa gakkishe dhoqqu gidi be7idi, “Zakkijoosa, hachchi ta ne son pee7anaw bessiya gisho elle wodhdha” yaagis. <sup>6</sup> I ellesи wodhdhidi ufayssan Yesuusa mokkis.

<sup>7</sup> He bessan de7iya asaa ubbay hessa be7idi, “Nagaranchchuwa soo gelidi mokettanw hanees” yaagidi zuuzummosona. <sup>8</sup> Gidoshin, Zakkijoosi eqqidi Godaakkko, “Godaw, hekko taw de7iya shalo ubbaafe bagga manqotas immana. Asappe aybaakkka worddon bailethada ekkidabaa giddiko oyduu kushe zaaran” yaagis.

<sup>9</sup> Yesuusi qassi, “Ha uray Abrahame na7a gidida gisho hachchi atotethay ha soo yis. <sup>10</sup> Asa Na7ay yiday dhayidayssa koyanasaanne ashshanaassa” yaagis.

*Tammu minaaneta leemisuwa  
(Maato 25:14-30)*

<sup>11</sup> Asay hessa si7iya wode Yesuusi Yerusalamee matattida gishonne Xoossa kawotethay ha77i matara qonccana daanida gisho enttaw leemiso odis. <sup>12</sup> Hessa gisho, Yesuusi, “Issi gitaa asi de7eyssi baw kawotethi ekkidi yaanaw hara biitta bis. <sup>13</sup> Iyaw oothiya aylletappe tammata xeegidi issuwashissuwash tammu minaanet\* immidi ‘Ta simmada yaana gakkanaw ha miishiyya zal77ite’ yaagis.

<sup>14</sup> “He biittaa asay iya ixxiya gisho ha uray nu bolla kawotana mela nu koyokko yaagidi ase iya guyera kiittidosona.

<sup>15</sup> “Gidoshin, he uray kawo gididi ba biittaa simmis. He tammu aylleti I immida miishiyyan ay mela zal77idi wodhisidaakkko eranaw koyidi enttana xeegisis.

<sup>16</sup> “Koyroyssi yidi, ‘Godaw, ne taw immida miishey haraa tamma wodhdhis’ yaagis.

<sup>17</sup> “Iya Goday, ‘Neno ammanettida ayllyiaw lo77o oothadasa. Neeni guuthaban ammanettida gisho new tammu katamata bolla maata immas’ yaagis.

<sup>18</sup> “Nam77anthoyka yidi, ‘Godaw, ne taw immida miishey haraa ichchasha wodhdhis’ yaagis.

<sup>19</sup> “Goday iyaakkko, ‘Newukka qassi ichhashu katamata bolla maata immas’ yaagis.

<sup>20</sup> “Hekko heedzanthoy yidi, ‘Godaw, ta curqqan xaaxada naagida ne miishiyya han-nashu. <sup>21</sup> Ays giilkko, neeni neebaa gidonnabaa ekkeyssanne ne zeronnabaa buucciya iita asi gidiya gisho new yayys’ yaagis.

<sup>22</sup> “Iya goday zaaridi, ‘Neno iita ayllyiaw ne doonatho ta nena pirddana. Ta wothonnabaa ekkeyssanne zeronnabaa buucciya asi gideyssa ne erikko, <sup>23</sup> ta yada ta miishiyya wodhera ekkana mela zal77iya asaas ays immabiikkii?’

<sup>24</sup> “Iya goday he bessan eqqidayssatakko, ‘Iyara de7iya miishiyya ekkidi tamma wodhisidayssas immite’ yaagis.

<sup>25</sup> “Entti, ‘Godaw, iyaw kasekka tammu minaaney de7ees’ yaagidosona.

<sup>26</sup> “Goday, ta hinttew odays; ‘De7iya ubbaas hari guzhetta, shin baynnayssafe haray atto iyaw de7iyarakka ekettana. <sup>27</sup> Gidoshin, ta entta bolla kawotonna mela koyidayssata he ta morkketa ha ta sinthe ehidi goyrite’ gis” yaagis.

*Yesuusi gitaa bonchchon Yerusalamee gelis  
(Maato 21:1-11; Mar 11:1-11; Yoha 12:12-19)*

<sup>28</sup> Yesuusi hessa odidayssafe guye enttafe sinthe aadhdi hamuttidi Yerusalamee bis.

<sup>29</sup> Shamaho Deriya<sup>†</sup> bolla de7iya Beetefagenne Bitaaniya matattida wode ba tamaare-tappe nam77ata yaagidi kiittis: <sup>30</sup> “Hintte sinthan de7iya gutaa biite, hintte yaa gakkia wode oonikka toggonna qashettidi de7iya hare mari demanna. Iya billidi haa ekki yiite.

<sup>31</sup> Oonikka, ‘Ays billeeti?’ gidi oychchiko, ‘Goday iya koyees’ yaagite” yaagis.

<sup>32</sup> Kiiittidayssati bidi I gidayssada hanin be7idosona. <sup>33</sup> Entti hare maraa billishin godati be7idi, “Hare maraa ays billeeti?” yaagidosona.

<sup>34</sup> Entti zaaridi, “Goday iya koyees” yaagidosona.

<sup>19:10</sup> Maato 18:10    <sup>19:11</sup> Maato 25:14-30    \* <sup>19:13</sup> minaaney: minaaney Girike doona. Issi minaaney issi gallasa osanchchos heedzu ageena damooze gidees.    <sup>19:26</sup> Maato 13:12; Mar 4:25; Luuqa 8:18    <sup>19:27</sup> Maato 25:14-30

<sup>†</sup> <sup>19:29</sup> Shamaho Deriya: Shamahoy daro doliya Dere guussu.

<sup>35</sup> Yaappe hare maraa Yesusakko ehidosona. Bantta ma7uwa hare maraa zokkon yeggidi Yesusa hare maraa bolla utisidosona. <sup>36</sup> Asaykka I biya ogiya bolla bantta ma7uwa hiixidosona.

<sup>37</sup> Shamaho Deriya dugethaa wodhisya ogiyakko matiya wode taybon keehi dero asay entti be7ida malaalisiyaban ufayttidi bantta qaala dhoqqu oothidi,

<sup>38</sup> "Godaa sunthan yaa kawoy anjettidayssa  
saluwan saroy

ubbaafe dhoqqa saluwan bonchchoy

Xoossaas gido."

yaagidi Xoossaa galatidosona.

<sup>39</sup> Asaa giddofe issi issi Farisaaweti Yesusakko, "Asttamaariyaw, ne tamaareta hayzite gada hangetta" yaagidosona.

<sup>40</sup> I enttako, "Entti si7'i giikko shuchchat waassana" yaagis.

<sup>41</sup> Yesuusi Yerusalamee matishe katamaa be7idi iyaw yeekkis. <sup>42</sup> "New saro gidanayssa hachchi ne eridabaa gidiyakkoshin, ha77i ne ayfiyaappe geemmis. <sup>43</sup> Ne morkketi ne yuushuwa diridi dumma dumma ogiyara nena teeqqidi un77ethiya wodey yaana. <sup>44</sup> Nenanne ne dirssaa garssan de7iya ne nayta dhayssana. Issi issi shuchchu denthidi laallana, ays giikko Xoossay nena ashshanaw yaa wodiya erabaakkha" yaagidi iw yeekkis.

<sup>45</sup> Hessafe guye, Yesuusi Xoossa Keethi gelidi zal77eyssata yaappe goodis. <sup>46</sup> Qassi, "Ta keethay Xoossaa woosiyi keethi gidana' gidi xaafettis, shin hintte ta keethaa panggata gonggolo oothideta" yaagis.

<sup>47</sup> Gallas gallas Xoossa Keethan tamaarssees. Kahiina halaqati, higge asttamaaretinne deriya cimati iya wodhanaw oge koyoosona. <sup>48</sup> Gidoshin, asa ubbay iya timirrtiya bantta wozana yeggidi si7i gisho enttaw oothanabay dhays.

## 20

### Yesuusa maatay Ayhudetas oysho gidis

(Maato 21:23-27; Mar 11:27-33)

<sup>1</sup> Issi gallas Yesuusi Xoossa Keethan asaa tamaarssishininne Wonggelaa markattishin, khahne halaqati, higge asttamaaretinne deriya cimati issife iyaakkoo yidi, <sup>2</sup> "Neeni hayssata aby maatan oothiyako nuus oda. Ha maata new immiday oonee?" yaagidi oychchidosona.

<sup>3</sup> I enttako, "Takkha hinttena issibaa oychchana, ane taw zaarite. <sup>4</sup> Xammaqiya Yohaannisa xinqqatey Xoossafeyye asappe?" yaagis.

<sup>5</sup> Entti woli giddon yaagidi zorettidosona: "Xoossafe giikko yaatin, ays ammanibeekketii?" yaagana.

<sup>6</sup> "Asappe giikko, asa ubbay Yohaannisi nabe gideyssa ammaniyya gisho nuna shuchchan caddana."

<sup>7</sup> Yaaniya gisho, "Awuppeeko nu erokko" yaagidi zaaridosona.

<sup>8</sup> Yesuusi zaaridi, "Hiza, takka ay maatan hayssata oothiyako hinttew odikke" yaagis.

### Goshshanchchota leemisuwa

(Maato 21:33-46; Mar 12:1-12)

<sup>9</sup> Hessafe guye, Yesuusi yaagidi ha leemisuwa asaas odis: "Issi asi woyne tokkis. Goshshanchchotas kera immidi daro wode gam77idi yaanaw hara biitta bis. <sup>10</sup> Woyne ayfiyaa maxiya wodey gakkin woyniya ayfiyaappe iyaw yeddana mela goshshanchchotakko ba aylliya kiittis. Shin goshshanchchoti he aylliya oykkidi wadhdhidi mela kushe yeddidosona. <sup>11</sup> Kaallidikka hara aylliya kiittis. Qassi goshshanchchoti iya wadhdhidi, kawushshidi mela kushe yeddidosona. <sup>12</sup> Ha77ika zaaridi heedzanthro aylliya kiittis. Goshshanchchotakko iyakka madunxisidi woyniya giddofe gaxa kessidi yeggidosona.

<sup>13</sup> "Woyniya goday, 'Yaatin ta ay oootho? An qassi ta dosiya ta na7aa yeddana; ooni eri entti iya bonchchonna aggokona' yaagis.

<sup>14</sup> "Shin goshshanchchoti uraa na7aa be7ida wode 'Hayssi iya laatteyssa, haa yiite iya wodhana, yaatikko laatay nuus gidana' yaagidi zorettidosona. <sup>15</sup> Woyniya giddofe gaxa kessidi wodhidosa.

"Yaatin, woyniya goday he asata waataanee? <sup>16</sup> Yidi he goshshanchchota dhayssana, woyniya bessaa hara asatas immana. Asay hessa si7ida wode 'Shinchchalle hessa melabaa ehoppo' yaagidosona.

<sup>17</sup> Yesuusi entta caddi xeellidi,

"Yaatin 'Gimbbe keexiya asati borida shuchchay,

keethaas malanne minotethi immiya ubbaafe aadhdiya shuchchi gidis'

geettidi xaafettidayssa birshshethay aybe? <sup>18</sup> He shuchchaa bolla kunddiya ubbay qoxettana, shuchchay iya bolla wodhdhiya ubbay liiqana” yaagis.

<sup>19</sup> Higge asttamaaretinne kahine halaqati ha leemisoy odettiday entta bolla gideyssa eridi he wode iya oykkanaaw koyidosona, shin asaas babbidosona.

### *Giirabaa*

(*Maato 22:15-22; Mar 12:13-17*)

<sup>20</sup> Hessa gisho, Yesuusa deriya haariya Roome kawuwa maatas aathi immanaw koyidi iya doonappe bala qaala naagoosona. Hessa polisanaw xillo daanidi cimmiya asata iyaakko kiitidosona. <sup>21</sup> Kiittidi bida asati, “Asttamaariyaw, neeni odeysinne tamaarsseyssi likke gideyssaa, qassi Xoossa ogiya tumatethan tamaarsseyssanne oonakka shaakkonnayssaa nu eroos. <sup>22</sup> Hanoshin, Roome kawuwashaa giira giiranaw bessi bessennee?” yaagidi iya oyckchidosona.

<sup>23</sup> Shin I entta wozanaa iiatethaa erida gisho <sup>24</sup> “Ane tana issi santime bessite, Iya bolla de7iya misileynne sunthay ooddebaye?” yaagis.

Entti zaaridi, “Roome Kawiwa Qeesareyssaa” yaagidosona.

<sup>25</sup> I zaaridi, “Yaatikko, Qeesareyssaa Qeesares, Xoossayssaa Xoossaas immite” yaagis.

<sup>26</sup> Hessa gisho, I zaarida zaaruwan asaa sinthan bala demmanaw dandda7ibookkona. Iya zaaruwan malalettidi si77i gidosona.

### *Hayqoppe denddobaan*

(*Maato 22:23-33; Mar 12:18-27*)

<sup>27</sup> Hayqoppe denddoy baawa yaagiya Saduqaawetappe issoti issoti Yesuusakko yidi,

<sup>28</sup> “Asttamaariyaw, issi asi machcho ekkidi na7a yelonna hayqqiko, iya ishay he maccasiw ekkidi nayta yelidi ba ishaas zerethi ashshana mela Musey xaafig. <sup>29</sup> Hekko laappun ishati de7oosona. Koyroyssi machcho ekkidi na7a yelonna hayqqis. <sup>30</sup> Nam77anthoy iyo ekkidi na7a yelonna hayqqis. <sup>31</sup> Heedzanthoyka hessatho hanis. Laappunati ubbay hessada hanidi iyo ekkidosona, shin na7a yelonna hayqqidosona. <sup>32</sup> Wurssethan maccasiya hayqqasuu. <sup>33</sup> Hiza, laappun addey iyo ekkida gisho hayqoppe denddiya wode iya oodde machcho gidanee?” yaagidi oyckchidosona.

<sup>34</sup> Yesuusi zaaridi, “Asay ha wodiyin ekoosonanne geloosona. <sup>35</sup> Shin hayqoppe denddidi yaana alamiyan daanaw besseyssati ekkokonanne gelokkona. <sup>36</sup> Entti kiitanchcho mela gidiya gisho sinthafe hayqqokona. Hayqoppe denddida gisho entti Xoossaas nayta. <sup>37</sup> Musey Godaa, ‘Abrahame Godaa, Yisaqa Godaa, Yayqooba Godaa’ gidi tushiya giddon xuugettiya tama taarikiya xaafidayssan hayqqida asay denddeyssaa bessees. <sup>38</sup> Ubbay iyaw de7on de7eyssata gidiya gisho I de7on de7eyssata Godaappe attin hayqqidayssata Goda gidenna” yaagidi zaaris.

<sup>39</sup> Higge asttamaaretappe issoti issoti, “Asttamaariyaw, lo77obaa odadasa” yaagidosona.

<sup>40</sup> Hessafe guye, hara oysho oyckchanaw yayyidosona.

### *Kiristtoosi oodde na7ee*

(*Maato 22:41-46; Mar 12:35-37*)

<sup>41</sup> Iyappe kaallidi Yesuusi enttako, “Asay Kiristtoosa waattidi Dawite na7a yaagonaa?

<sup>42-43</sup> Ays giikko, Dawitey ba huu7en ba maxaafan,

‘Xoossay ta Godaakkoo “Ta ne morkketa

ne tohoy yedhdhiyaso oothana gakkanaaw

taappe ushachcha baggan utta” gis’ yaagis.

<sup>44</sup> “Hiza, Dawitey Kiristtoosa, ‘Godaa gidi xeegishe iyaw na7a waanidi gidi?’” yaagis.

<sup>45</sup> Derey ubbay si7ishin ba tamaaretakko, <sup>46</sup> “Adussa ma70 ma77idi yuushshe doseyyssatappe, giyan bonchcho sarotho, Ayhude Woosa Keethan bonchcho oyde, mokettiya sonkka bonchcho bessi koyaa higge asttamaaretappe naaggettie. <sup>47</sup> Entti am77eta keethaa kalloy-oosona, xillo asi daanidi woosa adussoosona. Entti iita pirdda ekkana” yaagis.

## 21

### *Am77ee muxaata*

(*Mar 12:41-44*)

<sup>1</sup> Dure asay Xoossa Keethan muxaata saaxiniyan yeggishin Yesuusi dhoqqu gidi asaa be7is. <sup>2</sup> Qassi issi manqo am77iya nam77u sikkina yeggishin be7idi, <sup>3</sup> “Ta hinttew tuma odays; ha manqo am77iya ubbaafe aathada immasu. <sup>4</sup> Ays giikko, ha asa ubbay bantaw de7iyabaappe immidosona, shin iya ba pacciyaappe, baw de7iya aquwaa ubbaa immasu” yaagis.

*Wurssetha wodiya malaatata  
(Maato 24:3-14; Mar 13:3-23)*

<sup>5</sup> Yesuusa tamaaretappe issoti issoti Xoossa Keethay daro lo77iya shuchchaninne asay Xoossaas immida imotan lo77idayssa odettoosona. <sup>6</sup> Shin Yesuusi, “Ha hintte be7iyabay ubbay laalettonna, shuchchi shuchcha bolla gimbettida mela attonna wodey yaana” yaagis.

<sup>7</sup> Enttika, “Astattamaariyaw, ha ubbay hananay awude? Qassi hayssi hananayssas malaatay aybee?” yaagidi oychchidosona.

<sup>8</sup> Yesuusi yaagidi enttaw zaaro immis: “Balettonna mela naagettite. Daroti, ‘Taani Kirist-toosa, wodey matattis’ yaagishe ta sunthan yaana, shin hintte entta kaalofite. <sup>9</sup> Hintte olabaanne asaa geellateethaa si7iya wode dagammofite. Hessi sinthattidi hananayssi attonnabaa gido yaagidi wodiya wurssethay ellesidi yeenna” yaagis.

<sup>10</sup> Kaallidikka, “Derey deriya bolla, kawotethay kawotethaa bolla denddana. <sup>11</sup> Gita biitta qaaxoy hanana, koshaynne gadoy dumma bessan darana, yashshiyabaynne gita malaatati saloppe qonccana. <sup>12</sup> Shin ha ubbay hananappe sinthe ta sunthaa gisho gidi asay hinttena gooddananne oykkana. Ayhude Woosa Keethanine qasho keethan hinttena yeggana. Kawota sinthenne deriya haareyssata sinthe hinttena efana. <sup>13</sup> Hessika tabaa hintte enttaw markkattanaw lo77o oge gidana. <sup>14</sup> Hessa gisho, hintte oyshettiya wode woygidi zaaro immanee gidi hintte wozanan un77ettonna mela akeekite. <sup>15</sup> Ays giikko, hintte morkketi hintteria eggettawunne palamanaw dandda7onna doonanne cincatethi ta hinttew immana. <sup>16</sup> Hari attoshin, hinttena yelidaysati, hintte ishati, hintte dabbottine lagetti hinttina aathi immana. Hintte giddofe issota issota wodhana. <sup>17</sup> Ta sunthaa gisho asa ubbaa sinthan hintte ixettidayssata gidana. <sup>18</sup> Shin hari attoshin, hintte binaanappe issoykka dhayenna. <sup>19</sup> Polo dandda7an hintte, hintte shemppuwa ashshana.”

<sup>20</sup> “Yerusalamee katamay wotaaddaren direttidi uttidashin hintte be7ikkoo iyaw dhayoy matattidayssa erite. <sup>21</sup> He wode Yihudan de7iya ubbay deriyakko baqato, kataman de7eyssati yaappe keyo, gaxariyan de7eyssati katama geloppo. <sup>22</sup> Ays giikko, ha xaafetidab polettana mela hessi Xoossay kushe zaariya wode. <sup>23</sup> Sa7a bolla gita metoy yaana, hessankka asaa bolla Xoossaas hanqoy yaana. Hessa gisho, qanthatidayssatanne dhantheyssata ayye. <sup>24</sup> Entti mashshan hayqqana, asa ubbay allaga biitta di7ettana. Ayhude gidonna asaa wodey polettana gakkanaaw Yerusalamey enttanen yedhettidayssa gidana.

<sup>25</sup> “Awan, ageenaninne, xoolintotta bolla malaatati hanidi benttana. Abbaafenne zuliya deshuwapple denddoysan biittan de7iya asay un77ettananne yarkkana. <sup>26</sup> Saluwa wolqqatu bugettana gisho asay yashsharinne biitta bolla aybi hanandeshsha gidi naagon banttana balettana. <sup>27</sup> He wode Asa Na7ay wolqqaninne gita bonchchuwan shaarara yishin entti be7ana. <sup>28</sup> Hintte atotethay matattida gisho ha hanoti poletethi oykkiya wode giigeti eqqite, hintte huu7iya dhoqqu oothidi xeellite” yaagis.

<sup>29</sup> Kaallidikka, hayssada gidi leemiso odis: “Balase mithaanne hara mithata ubbaa be7ite. <sup>30</sup> Entti aaciya wode torchchey matattidayssa hintte ereeta. <sup>31</sup> Hessada ha hanoti polettishin hintte be7ikkoo Xoossaas kawotethay matattidayssa erite.

<sup>32</sup> “Ta hinttew tuma odays; ha ubbay polettana gakkanaaw ha yeletethay aadhdhenna. <sup>33</sup> Saloynne sa7ay aadhdhanna, shin ta qaalay aadhdhenna.

<sup>34</sup> “Hiza, dhassi baynna de7on, ushsha daroninne duussabaas un77etethan hintte wozanay oykettonna melanne he qammay akekonna xiheda hintte bolla gakkonna mela naagettite. <sup>35</sup> He qammay biitta kumethan de7iya ubbaa bolla gakkana. <sup>36</sup> Hessa gisho, yaa iitaappe attanawunne Asa Na7a sinthan eqqanaw dandda7ana mela ubba wode minnidi woossite” yaagis.

<sup>37</sup> Gallas gallas Yesuusi Xoossa Keethan tamaarssishe, qamma qamma Shamaho Deriya bolla keyidi aqees. <sup>38</sup> Asay ubbay iya si7anaw wontta guura iyaakko Xoossaas Keethi yoosona.

## 22

*Yihudi Yesuusa aathi immanaw magettis  
(Maato 26:1-5,14,16; Mar 14:1-2,10-11; Yoha 11:45-53)*

<sup>1</sup> He wode ‘Faasikka’ yaagiya Uytha Baaley matis. <sup>2</sup> Kahine halaqatinne higge astta-maareti asaas yayyida gisho waattdi Yesuusa bantha giddofe dhayssaneekko oge koyosona. <sup>3</sup> Xalahey tammanne nam77atappe issuwa gidida Asqoroota Yihuda geetteteysa gido gelis. <sup>4</sup> Yihudi kahine halaqatakonne Xoossa Keetha naageyssata halaqatakko bidi

Yesuusa waati aathi immaneekko enttara maqettis. <sup>5</sup> Enttika hessian ufayttidi miihe immanaw iyara zoretidosona. <sup>6</sup> Ikka zoretethan giigis. Aathi enttaw immanaw asi baynna injje wode naagishe de7ees.

### *Wurssetha kahuwa*

(*Maato 26:17-25; Mar 14:12-21; Yoha 13:21-30*)

<sup>7</sup> Hessafe guye, Faasikka dorssay shukettiya Uytha Baaley gakkis. <sup>8</sup> Yesuusi, "Faasikka kahuwa maana mela bidi nuus giigisite" yaagidi Phexiroosanne Yohaannisa kiittis. <sup>9</sup> Entti, "Nu awun giigisana mela ne koyay" yaagidi oychchidosona. <sup>10</sup> I enttako, "Hekko hintte katama gelishin haatha oto tookkida addey hinttera gaahettana. I bidi geliya keethaa iya kaallidi gelite. <sup>11</sup> Keethaawakko asttamaarey, 'Ta ta tamaaretara wolla Faasikka kahuwa maanaw imatha keethi awunee? yaagis' giite. <sup>12</sup> I pooqiya bolla hiixettidi giigis de7iya dalgga kifile hinttene bessana, yan giigisite" yaagis. <sup>13</sup> Entti bidi Yesuusi gidayssada hanin demmidosona. Faasikka baale kahuwa yan giigisidosona.

<sup>14</sup> Saateykka gakkida wode Yesuusi hawaaretara wolla kahuwa bolla uttis. <sup>15</sup> I enttako, "Ta waaye ekkanaappe sinthe ha kahuwa hinttera maanaw daro amottas. <sup>16</sup> Hiza, si7ite! Xoossaa kawotethan hayssas birshshethay polettana gakkanaw ha kahuwa zaarada miikke" yaagis. <sup>17</sup> Ushshaa ekkidi galati simmidi, "He7ite hayssa hintte giddon shaakettite. <sup>18</sup> Si7ite! Xoossaa kawotethay yaana gakkanaw hachchife doomada ha woyne ushshaafe zaarada uyikke" yaagis.

<sup>19</sup> Uytha ekkidi, galati simmidi, "Hayssi hinttew imettiya ta ashuwa. Hayssa oothishe tana qoppite" yaagidi meenthidi enttaw immis.

<sup>20</sup> Hessadakka, kahuwappe guye ushshaa ekkidi, "Ha ushshay hinttew gukkida ta suuthan gidiya ooratha caaqwuwa. <sup>21</sup> Gidoshin, tana aathi immana uraa kushey taara issife gaytaana. <sup>22</sup> Asa Na7ay iyaw geetettoysa mela hayqqanaw de7ees, shin iya aathi immiya uraa ayye" yaagis. <sup>23</sup> Entti bantta giddon, "Hayssa ooni oothanee" gidi woli oychchidosona.

<sup>24</sup> Qassi entta giddon gita gidanay oone giya palami medhettis. <sup>25</sup> Yesuusi enttako, "Deriya kawoti bantta asaa wolqqan haarosona; bantta deriya bolla godateyssataskka bantana, 'Lo77o ootheeyssata' yaagidi xeegosopo. <sup>26</sup> Shin hintte giddon hessa mela gidoppo. Hintte giddon bayratey kaaloda hano; kaaletheyssi kaalleyssada hano. <sup>27</sup> Hanoshin, mokkeyssafenne Moketteyssafe awussi aadhdi? Moketteysssa gidenneyye? Shin taani hintte giddon mokkeyssa mela.

<sup>28</sup> "Hintteka ta metuwan taappe shaakettonna taara minnidi eqqidayssata. <sup>29-30</sup> Hintte ta gaytappe maana mela, uyana melanne araatata bolla uttidi tammanne nam77u Isra7eele sheeshata bolla pirddana mela ta aaway tana shuumidayssada takka hinttena ta kawotethan shuumana" yaagis.

<sup>31</sup> Kaallidikka Yesuusi, "Simoona, Simoona, Xalahey hinttena gistteda harqqanaw woossis. <sup>32</sup> Shin taani ne ammanoy dhayonna mela new gaannatas. Nekka simmida wode ne ishata mintha" yaagis.

<sup>33</sup> Simooni, "Godaw, taani neera qashettanawunne hayqqanaw giigettas" yaagis.

<sup>34</sup> Yesuusi Phexiroosakkko, "Ta new odays; hachchi kuttoy waassanaappe sinthe ne tana heedzu toho kaddana" yaagis. <sup>35</sup> Kaallidikka, Yesuusi enttako, "Taani hinttena korojoy, karxiiteynne caammi baynna kiittida wode hinttew paccidabay de7ii?" yaagidi oychchis.

Entti zaaridi, "Aykkojka pacchineenna" yaagidosona.

<sup>36</sup> I enttako, "Ha77i korojoyynne karxiitey de7ey oykko; mashshi baynnay ba afilaab bayzidi mashsha shammo. <sup>37</sup> Haa si7ite! 'Geellataro taybettis' geetettidi xaafetidayssi tanan polettanaw bessees. Ee, ta gisho xaafetidaybab poletteyssi tumattis" yaagis.

<sup>38</sup> Iya tamaareti, "Godaw hayssan nam77u mashshi de7ees" yaagidosona.

I, "Gidana" yaagis.

### *Yesuusi Shamaho Deriya bolla woossis*

(*Maato 26:36-46; Mar 14:32-42*)

<sup>39</sup> Yesuusi kase meezeidayssada denddidi Shamaho Deriya bolla keyis. Iya tamaareti iya kaallidosona. <sup>40</sup> He bessaa gakkida wode "Paacen gelonna mela woossite" yaagis. <sup>41</sup> Enttafe shuchchi holin gakkiya soo mela haakkidi gulbbatidi woossis. <sup>42</sup> "Ta aawaw, ne shene gidikkha ha metuwa taappe aatha. Shin ta shene gidoppo ne sheney hano" yaagidi woossis. <sup>43</sup> Kiitanchchoy saloppe qonccidi minthis. <sup>44</sup> Daro un77ettidi minthidi woossees. Iya cawaykka suuhi xokkiyada sa7an xokkees.

<sup>45</sup> Yesuusi woosaa wurssidi ba tamaaretakko yis. Entti, azzaniyappe denddoysan daaburidi dhiskkidayshin demmidi, <sup>46</sup> "Ays dhiskkeetii? Paacen gelonna mela denddidi woossite" yaagis.

### *Yesuusi oykettis*

(*Maato 26:47-56; Mar 14:43-50; Yoha 18:3-11*)

<sup>47</sup> I buuro oda bolla de7ishin daro asati yidosona. Tammanne nam77atappe issoy Yihuda geetetteyssi enttana kaalethees. I Yesuusa yeeranaw mati shiiqis. <sup>48</sup> Shin Yesuusi, "Yihuda, Asa Na7aa yeerada aatha immanee?" yaagis.

<sup>49</sup> Yesuusa tamaareti he hanuwa be7idi, "Godaw mashshan shocino?" yaagidosona. <sup>50</sup> Entta giddofe issoy kahine halaqaa oosanchchuwa shocidi ushachcha haytha qanxidi yeggis.

<sup>51</sup> Shin Yesuusi, "Agga! Diggoosite" yaagis. Uraa haythaa bochchidi pathis.

<sup>52</sup> Hessafe guye, Yesuusi bana oykkidi kahine halaqataKKO, Xoossa Keetha naageyssata shuumatakonne cimataKKO, "Paanno oykkiya asada mashshenne xam77a oykkidi yidetii? <sup>53</sup> Ubba gallas Xoossa Keethan ta hinttera de7iya wode ta bolla kushe wothibeketa. Shin hayssi dhuma kawotethay haarida wodenne hintte wode" yaagis.

### *Phexiroosi Yesuusa kaddis*

(*Maato 26:57-58,67-75; Mar 14:53-54,66-72; Yoha 18:12-18,25-27*)

<sup>54</sup> Hessafe guye, Yesuusa oykkidi kahine halaqaa zabbaa efidosona. Phexiroosi haahon Yesuusa kaallees. <sup>55</sup> Asati kahine halaqaa zabban tama eethidi wolla uttidashin Phexiroosi enttara issife uttis. <sup>56</sup> Issi ayilliya Phexiroosi tama matan uttidayssa cadda xeellada, "Ha uray iyara de7ees" yaagasu.

<sup>57</sup> Shin Phexiroosi, "Ha maccasete ta he uraa erikke" yaagidi kaddis.

<sup>58</sup> Guutha wodeppe guye issi hara addey iya be7idi, "Nekka enttafe issuwa" yaagis.

Shin Phexiroosi, "Ha addiyaw tana gidikke" yaagis.

<sup>59</sup> Issi saate mela gam77idaappe guye issi hara addey tillisidi, "Ha uray Galilappe gidiya gisho sidhey baynna iyara de7ees" yaagis.

<sup>60</sup> Shin Phexiroosi, "Ha addiyaw, ne geyssa ta erikke" yaagis. I he oda onggonna de7ishin kuttoy waassis.

<sup>61</sup> Goday guye simmidi Phexiroosa xeellis. Phexiroosi, "Hachchi kuttoy waassanaappe sinthe ne tana heedzu toho kaddana" yaagidi, Goday odida qaala akekis. <sup>62</sup> Phexiroosi kare keyidi daro kokkoridi yeekkis.

<sup>63</sup> Yesuusa naagiya asati iya leqisonne deshethi oykkidosona. <sup>64</sup> Iya ayfiyaa goozi "Ane tinbbite oda; nena dechchiday oonee?" yaagidi oychchosona. <sup>65</sup> Hara daro cashshe cayidi kawushhosona.

### *Yesuusi Philaaxoosa sinthenne Heroodisa sinthe shiiqis*

(*Maato 26:59-66; Mar 14:55-64; Yoha 18:19-24*)

<sup>66</sup> Sa7i wonttiya wode Ayhude biitta cimati, kahine halagatinne higge asttamaareti shiiqid, Yesuusa bantta sinthe shiihidosona. <sup>67</sup> Entti, "Neeni Kiristtoosee? Ane nuus oda?" yaagidi oychchidosona.

Yesuusi, "Ta odiyakko ammanekketa. <sup>68</sup> Ta oychchiyako zaarekketa. <sup>69</sup> Shin Asa Na7ay hayssafe gede baggan wolqqaama Xoossaa ushachcha baggan uttana" yaagis.

<sup>70</sup> He wode ubbay, "Yaatin, neeni Xoossaa na7ee?" yaagidosona.

I, "Ta Xoossaa na7a gideyssa hintte gideta" yaagis.

<sup>71</sup> Entti, "Hiza, hara markka ay koshshii? I ba inxarssan odishin nu si7ida" yaagidosona.

## 23

### *Yesuusi Philaaxoosa sinthan*

(*Maato 27:1-2,11-14; Mar 15:1-5; Yoha 18:28-38*)

<sup>1</sup> He bessan shiiqida shanggoti ubbay denddidi Yesuusa Philaaxoosakkko efidosona. <sup>2</sup> "Ha uray nu asaa baletshin, kawuwas giira giironna mela diggishininne qassi, 'Taani Kiristtoosa hintte kawuwa' yaagishin demmida" yaagidi mootidosona.

<sup>3</sup> Philaaxoosi Yesuusa, "Neeni Ahyudeta kawoyye?" yaagidi oychchis.

Yesuusi, "Ee, ne gidayssa mela" yaagis.

\* <sup>22:51</sup> Agga! Diggoosite: Yesuusi ha bessan agga yaagiday iya ashshanaw gidi asati uraa haytha qanxoysa agga qanxofa gidayssanne, harati iya oykkanaw yidayssata diggoosite ha77i entta wode yaagidayssa nam77u qofata woli gathidi oykkis.

<sup>22:53</sup> Luuqaasa 19:47; 21:37

<sup>4</sup> Philaaxoosi kahine halaqatakkonne asaakkko, “Ha uraa bolla taani issi balakka demmabiikk” yaagis. <sup>5</sup> Shin entti, “Ha uray Galilappe doomidi hayssa gakkanaw Yihuda kumethaa iitabaas denthethées” yaagidi minthi odidosona.

<sup>6</sup> Philaaxoosi hessa si7ida wode Yesuusi Galila aseekko eranaw koyidi iya oychchis. <sup>7</sup> Yesuusi Heroodisa biittaafe yida asi gideyssa Philaaxoosi erida wode Heroodisi he wode Yerusalamaanen de7iya gisho iyaakkko yeddis.

<sup>8</sup> Heroodis Yesuusa be7anaw daro wodeppe koyishe de7iya gisho iya be7ida wode daro ufaytis. Ays giikko, iyabaa si7ida gisho malaalisyabaa oothin be7anaw amottishe de7ees.

<sup>9</sup> Heroodisi Yesuusa daro oyshota oychchis, shin I aykkoka zaaribeenna. <sup>10</sup> Kahineta halaqatinne higge asttamaareti yan eqqidi minthidi iya mootosona. <sup>11</sup> Heroodisaranne iya wotaaddaretara Yesuusa kadhidosonanne legisidosona. Bonchcho afilaa mayzidi Philaaxoosacco zaaridi yeddidosona. <sup>12</sup> Heroodisaranne Philaaxoosara kase morkkeshin he gallas wolla giigidosona.

<sup>13</sup> Philaaxoosi kahine halaqata, asaa haareyssatanne asaa xeegidi, <sup>14</sup> “Ha uray asaa geellathas denthethées” gidi taakko ehideta. Takka hintte sinthan pilggada hintte shiishida mootuwas aybi balakka demmabiikk. <sup>15</sup> Heroodisi, hessatho aybi balakka iya bolla demmibonna gisho nuukko yeddis. Tumakka ha uray hayqos gathiya aybi balakka oothibeenna. <sup>16</sup> Hessa gisho, iya garaafada billa yeddana” yaagis. <sup>17</sup> Hessa I giday Faasikka Baale wode issi asi enttaw billanayssi iyaw attonnabaa gidiya gishossa.

<sup>18</sup> Derey ubbay issi bolla, “Ha uraa gede digga, nuus Barbbaana billa” yaagidi waassisodosona. <sup>19</sup> Barbbaani katamaa giddon asaa iitabaas denthethidi ase wodhdhidi qashettida asi.

<sup>20</sup> Philaaxoosi Yesuusa billanaw koyidi asaas zaari odis. <sup>21</sup> Gidoshin, asay, “Kaqq! Kaqq!” yaagidi waassisodosona. <sup>22</sup> Philaaxoosi heedzanho, “Ha uray qohidabay aybe? Wodhos gathiya bala ta demmabiikk. Hessa gisho, garaafada yedda aggana” yaagis.

<sup>23</sup> Entti bantta qaala dhoqqu oothidi, “Kagettaw bessees” gidi minthi waassisodosona. Entta waasoykka xoonis. <sup>24</sup> Entta oysha gisho gidi Philaaxoosi iya bolla pirddis. <sup>25</sup> Asaa iitabaas denthetheyssanne ase wodhdhidi qashettidayssa billana mela woossida, he uraa enttaw billis. Shin Yesuusa entti koyidabaa oothana mela enttaw aathi immis.

### *Yesuusa kaqqidosona*

(Maato 27:31-44; Mar 15:21-32; Yoha 19:17-27)

<sup>26</sup> Yesuusa oykkidi efishin Simoona giya Qereena biitta addey gaxareppe yishin, demmidi masqaliya toossidi Yesuusa kaallidi baana mela un77ethidosona. <sup>27</sup> Daro asaynn bantta tiraaj iccisie yekkiya maccasati iya guyiyara kaaloosona.

<sup>28</sup> Shin Yesuusi enttako guye simmudi, “Hinttenoo, Yerusalaame maccasato, hintte huu7esinne hintte naytas yeekkiteppe attin taw yeekkofite. <sup>29</sup> ‘Hekko maynthati, yelonna utoitinne dhanthonna dhanthati anjettidosona’ hintte yaagana gallasay yaana. <sup>30</sup> He wode dereta, ‘Nu bolla kunddite’, zumatakka, ‘Nuna kammite’ yaagana. <sup>31</sup> Hiza, qaye mithaa hessatho oothiko mela mithaa waatanddeshsha?” yaagis.

<sup>32</sup> Iyara wodhanaw hara nam77u worandzota efidosona. <sup>33</sup> Queeraniyo\* geetettiya bessaa gathidi kaqqidosona. Worandzotappe issuwa ushachcha baggara hankkuwa haddirissa baggara kaqqidosona. <sup>34</sup> Yesuusi, “Ta aawaw, entti ay oothiyakoeronna gisho neeni enttaw atto yaaga” yaagis.

Entti iya afilaa bolla saama yeggidi shaakettidi ekkidosona.

<sup>35</sup> Asay eqqidi xellosona, shin deriya haareyssati, “Harata ashshis; Xoossay doorida Kiristtoosi iya gidikko ane bana ashsho” yaagidi legisidosona. <sup>36</sup> Wotaaddaret iyaakkoo shiiqidi, caala woyne ushshaa immidosona. <sup>37</sup> Yaatidi, “Neeni Ayhudeta kawo gidikko ne huu7iya ashsha” yaagidi legisidosona.

<sup>38</sup> Iyaw huu7e baggara, “Hayssi Ayhudeta kawo” yaagiya xuufey de7ees. <sup>39</sup> Kagettida worandzotappe issoy cashshe sa7ara goochchishe, “Ane neeni Kiristtoosa gidikko, ne-nakka nunakka ashsha” yaagis.

<sup>40</sup> Shin hankko worandzoy, “Neeni hayssa mela pirddan de7ashe hari attoshin, Xoossaas yayyikii? <sup>41</sup> Nuuni nu balaas bessiya pirdda ekoos, shin ha uray issi iitabaakka oothibeenna” yaagidi hanqettis.

<sup>42</sup> Qassika, “Yesuusa, ne ne kawotethaara yaa wode tana qoppa” yaagis.

<sup>43</sup> Yesuusi, “Ta new tuma odays; hachchi neeni taara gannaten gidana” yaagis.

<sup>23:30</sup> Hose 10:8; Yo:Qo 6:16

\* <sup>23:33</sup> Queeraniyo: Queeraniyo geyssi Girike doona. Aramayke doonan “Golgotta”

woyko “Huu7e guugge” guussu. Queeraniyo giya sunthay imettiday Yesuusi kaqettiday asa huu7e guugge daaniya bessan gidiya gishossa. He bessay Roome kawotethay worandzota kaqqiya bessi. (Maato 27:33; Mar 15:22; Yoha 19:17) <sup>23:34</sup>

<sup>44-45</sup> He gallas usuppun saateppe bidi uddufun saate gakkana away poo7uwa diggida gisho biipta ubbaa bolla dhuma gidis. Xoossa Keetha magaraajjoy daakettidi nam77an shaakettis. <sup>46</sup> Yesuusi, qaala dhoqqu oothidi, “Ta aawaw, ta ta shemppi ne kushen sheedhdhays” yaagidi hayqqis.

<sup>47</sup> Mato halaqay, hanidayssa be7idi, “Hayssi uray tumakka xillo” yaagidi Xoossaa galatis.

<sup>48</sup> Ha haniyabaa be7anaw he bessaa shiiqida asa ubbay hanidabaa be7ida wode bantta tiraicccishe bantta soo simmidosona. <sup>49</sup> Gidoshin, Yesuusa matan eriya asa ubbay, hessadakka Galilappe kaallidi yida maccasati hessa be7ishe haahon eqqidosona.

<sup>50-51</sup> Ayhude shanggotappe issyo, Yoosefa geetettiya uray de7ees. I Armmatiyasa geetettiya Yihuda katamaappe yis. Ilo77onne Xillo asi gidiya gisho Xoossaa kawotethaa yuussaa naagees. Shanggotappe issuwa gidishe entta zoretethaaninne oosusan deenna. <sup>52</sup> He uray Philaaxoosakko bidi, Yesuusa ahaa mooganaw taw imma gidi woossis. <sup>53</sup> Philaaxoosi ekka yaagin, Yesuusa ahaa wodhisidi afilara xaaxis. Zaallafe woocidi kessida hara asi moogettonna ooratha duufon wothis. <sup>54</sup> Sambbaati gelana haniya gisho he gallasay giagetetha qamma.

<sup>55</sup> Galilappe denddidi Yesuusa kaallidi yida maccasati Yoosefara bidi iya ahaa waati moogiyakko duufuwa akeekidi be7idosona. <sup>56</sup> Yaappe simmadi shittonne qibaatiya giqisidosona. Higgey kiitneyssa mela Sambbaata gallas shemppi pee7idosona.

## 24

### *Yesuusi hayqoppe denddis*

(Maato 28:1-10; Mar 16:1-8; Yoha 20:1-10)

<sup>1</sup> Saaminttafe koyro gallas, wogga wode wontta daro guura, maccasati bantta giigisida shittuwa ekkidi duufuwa bidosona. <sup>2</sup> Entti yaa gakkiya wode duufuwa doonan de7iya shuchchay gondderettidi kichchoysssa demmidosona. <sup>3</sup> Entti duufuwa gaathi gelidosona, shin Godaa Yesuusa ahaa demmibookkona. <sup>4</sup> Entti yan eqqidi aybi hanidee gidi qoppishin akeekonna daro phooliya afila ma77ida nam77u asati entta matan eqqidosona. <sup>5</sup> Maccasati yashettidi bantta huu7iya sa7an ziqqi oothidi de7ishin, asati enttako, “De7on de7eyssa hayqota giddon ays koyeeti? <sup>6-7</sup> Hayssan deenna; hayqoppe denddis, ‘Asa Na7ay nagaranchchota kushen aadhdi imettana; enttika iya kaqqana. I heedzanho qamman hayqoppe denddana’ yaagidi, I hinttera Galililan de7ishe hinttew odida qaala qoppite” yaagis.

<sup>8</sup> Maccasati he wode iya qaala qoppidosona.

<sup>9</sup> Maccasati duufuwapple simmadi hanidabaa ubbaa tammanne issotasinne haratasikka odidosona. <sup>10</sup> Hessa hawaaretas odiday Magdela Mayraamo, Yohaanna, Yayqooba aayiw Mayraamonne enttara de7iya hara maccasata. <sup>11</sup> Shin enttaw maccasati odidayssi elmmo daanin ammanibookkona. <sup>12</sup> Shin Phexiroosi denddi woxxidi duufo bis. He bessaa gakkidi hokki gaathi xeelliya wode moogo afilaa xalaala be7is. Hanidaban malaaleettishe ba soo simmis.

### *Emmahuuse ogiya bolla*

(Mar 16:12-13)

<sup>13</sup> He gallas kaalliya tamaaretappe nam77ati Yerusalamepppe tammanne issi kilo mitire haakkiya Emmahuuse gutaa boosona. <sup>14</sup> Entti wolla hanidabaa ubbaa odettoosona. <sup>15</sup> Entti he hanotabaa qoppishenne odettishe biya wode Yesuusi ba huu7en shiiqidi enttara bees. <sup>16</sup> Hanoshin, entti iya eronna mela entta ayfey oykettis.

<sup>17</sup> I, “Hintte wolla oge bolla de7ishe odetteyssi aybe?” yaagis.

Entti azzanidi si77i gidi eqqidosona. <sup>18</sup> Enttave issyo Qeliyoopha geetetteyssi, “Ha qammata giddon Yerusalamen hanidabaa eronnayssi, ne biittaas imatheyye?” yaagis.

<sup>19</sup> I zaaridi, “I hanidayssi aybee?” yaagidi oychchis.

Entti, “Xoossaa sinthaninne asa sinthan oosoninne odan mino nabe gidida Naazirete Yesuusabaa. <sup>20</sup> Iya kahine halaqatinne nuna haareyssati hayqo pirddas aathi immidi, kaqqidosona. <sup>21</sup> Nuuni Isra7eele asaa wozande gidi ufaytidi naagidashin hayssi hanin hachchi heedzanho qamma. <sup>22</sup> Qassi nu giddofe issi issi maccasati nuna malaalisidosona. Entti hachchi wontta guura duufuwa bidosona. <sup>23</sup> Iya ahaa dhayida wode simmi yidi, ‘I paxa de7ees’ yaagiga kiitanchchoti qonccin be7ida yaagidi odidosona. <sup>24</sup> Nu giddofekka issoti issoti duufuwa bidi maccasati odidayssatho hanin be7idosona, shin iya be7ibookkona” yaagis.

<sup>25</sup> I enttako, "Hinttenoo, akeekonna asaw, hintte wozanay nabeti odidabaa ubbaa ammananaw gam77eyssato, <sup>26</sup> Kiristtoosi ha metuwa ekkawunne ba bonchchuwan gelanaw bessennee?" yaagis. <sup>27</sup> Museppenne nabeta ubbaafe denddidi Geeshsha Max-aafan iyabay xaafetidayssa ubbaa enttaw qonccisis.

<sup>28</sup> Entti biya gutaakko matattida wode Yesuusi aadhdhidi haaho soo biya daanin, <sup>29</sup> Entti, "Sa7ay qammida gisho nuura aqa" yaagidi minthidi woossidosona. Hessa gisho, enttara aqanaw gelis.

<sup>30</sup> Enttara issife gayta bolla uttidi, uytha denthidi, meenthi anjjidi enttaw immis. <sup>31</sup> He wode entti erana mela entta ayfey dooyettis. Enttika eridosona. Shin I enttafe geemmis. <sup>32</sup> Entti, "Nu ogiya bolla de7ishin I nuus Geeshsha Maxaafaa birshshishininne nuna haasayisishin nu wozanay xuugettibeenne?" yaagidosona. <sup>33</sup> He wode denddidi guye Yerusalaa yidosona. Tammanne issotinne harati issi bolla shiiqidi de7ishin demmidosona. <sup>34</sup> Entti, "Goday tuma denddis; Simoonas qonccis" yaagidosona.

<sup>35</sup> He nam77u tamaareti Emmahuuse ogiya bolla de7ishin hanidayssanne uythaan meenthida wode waati iya eridaakko enttaw odidosona.

#### *Yesuusi ba tamaaretas qonccis*

(Maato 28:16-20; Mar 16:14-18; Yoha 20:19-23; Ha.O 1:6-8)

<sup>36</sup> Nam77u tamaareti hessa oda bolla de7ishin, Yesuusi entta giddon eqqidi, "Saroy hinttew gido" yaagis.

<sup>37</sup> Gidoshin, entti dagammidi, moytille be7ida daanin yayyidosona.

<sup>38</sup> I enttako, "Ays babbidetii? Ays sidhey hintte wozanan gelidee?" <sup>39</sup> Ta kushiyanne ta tohuwa be7ite; taani tana. Qassi oykkidi be7ite; tanan hintte be7eyssada, moytilles ashoyynne meqethi baawa" yaagis. <sup>40</sup> Yaagidi, ba tohuwanne ba kushiya entta bessis.

<sup>41</sup> Entti ufayssafe denddoysaan ammanonna malaletethan de7ishin, Yesuusi enttako, "Hayssan hinttew miyabay de7ii?" yaagis. <sup>42</sup> Entti issi caacettida molo iyaw immidosona. <sup>43</sup> I ekkidi entta sinthan mis.

<sup>44</sup> I, "Ta hinttera gam77ida wode ubban Muse maxaafatan, nabeta maxaafataninne Mazmure maxaafatan, ta gisho xaafetidabay ubbay polettanaw bessees yaagada ta hinttew odida qaalay hayssa" yaagis.

<sup>45</sup> He wode Geeshsha Maxaafata akeekana mela wozanaa entta dooyis. <sup>46</sup> Hessadakka, "Kiristtoosi waaye ekkana, heedzanthro qamman hayqoppe denddana yaagidi xaafetis. <sup>47</sup> Yerusalameppee denddidi asaa ubbaas nagaraappe maaroletaynnne atotethaynne iya sunthan markkattana. <sup>48</sup> Hintte hessas markkatta. <sup>49</sup> Hekko, takka ta aaway immida ufayssaa hinttew yeddana. Hintte saloppe wolqqa ma77ana gakkaw Yerusalame kataman gam77ite" yaagis.

#### *Yesuusi denddis*

(Mar 16:19-20; Ha.O 1:9-11)

<sup>50</sup> Hessafe guye, Bitaaniya katamaa enttana ekkidi bis. Ba kushiya denthidi anjis.

<sup>51</sup> Enttana anjishe enttafe shaakettidi pude salo ekettis. <sup>52</sup> Entti ziggi goynnidi daro ufayssan Yerusalame simmidosona. <sup>53</sup> Xoossa ubbaa wode galatisho Xoossa Keethan gam77idosona.

## Yohaannisi Xaafida Yesuus Kiristtoosa Wonggelaa Gaatha Qofaa

Yohaannisi Yesuusa, "Ase gididi asaa giddon benttida Xoossaa Qaala" yaagidi qoncisees. Ha Wonggelay xaafetiday, iya nabbabiya asay Yesuusi asaa ashshheyssa gididi yaana geetettida Xoossaa Na7aa gideyssa ammanana melanne iyan ammaneyssatas merinna de7oy de7eyssa entti erana melassa (20:31).

Wonggelaas koyro kifley merinabaa gidida Xoossaa qaalaynne Yesuusi isso gideyssa odi simmadi, Yesuusi ashshheyssa gididi yaana gida Xoossaa Na7aa gideyssa bessiya dumma dumma malaatata qonccisees. Xaafey, Yesuus Kiristtoosi ba huu7en tuma Xoossaa Na7anne Xoossaa aawara isso gideyssa (1:1) bolla qonccisis. Yesuusi ba huu7en ta Abrahameppe kase de7ays (8:58) yaagis. Wurssethan Toomasi, "Ta Godaw, ta Xoossaw" yaagidi xeegis (20:28). Hessafe kaallidi qassi ha malaatatappe benttida ayfiyaa odiya taariketi kaaloosona. Ha kifley issi issi asay Yesuusa ammanidi iya kaalleyssata gididayssa odee; qassi harati iyara waanidi eqettidaakkonne waanidi ammanonna ixvidaakkko odoosona. Shemppo 13-17 gakkanaaw Yesuusi oykettida omarssi iyaw, iya tamaaretara ay mela mino gahetethi de7iyakko, qassi wontteta gallas kagettanaappe sinthe giigetetha qaalanne minthetho qaala enttaw odidayssa qonccisees. Wurssetha shemppoti Yesuusi oykettidaabanne pirddas shiiqidabaa, iya kaqetethaanne iya dendduwa, hessadakka dendduwaafe guye ba tamaaretaas I qonccida qonccethabaa odoosona.

### **Yohaannisa Wonggelaa ayfe qofata**

Gelo qofaa 1:1-18

Xammaqiy Yohaannisanne Yesuusa koyro tamaareta 1:19-51

Yesuusi qonccen ooso oykkoysa 2:1-12:50

Wurssetha qammata Yerusalame heeran 13:1-19:42

Godaa dendduwanne qonccethaa 20:1-31

Kuushsha qofaa: Galilaa zaaridi ba tamaaretaas qonccoyssa 21:1-25

#### *De7o qaala*

<sup>1</sup> Qaalay koyro de7ees. Qaalaykka Xoossaara de7ees; he Qaalay Xoossaa. <sup>2</sup> Koyroppe Qaalay Xoossaara de7ees. <sup>3</sup> Xoossay ubbabaa Qaalaa baggara medhdhis. Medhettid-abappa issoykka iya baggara medhettonabay baawa. <sup>4</sup>Iyan de7oy de7ees; he de7oy asaas poo7o. <sup>5</sup>Poo7oy dhuman poo7ees; dhumay poo7uwa xoonibeenna.

<sup>6</sup> Xoossay kiittida, issi Yohaannisa giya asi de7ees. <sup>7</sup> Asa ubbay poo7uhan ammanana mela I poo7os markka gididi yis. <sup>8</sup>I poo7uwabaa markkattanaw yisippe attin ba huu7en poo7o gidenna. <sup>9</sup>Asa ubbaas poo7isiya tuma poo7oy alamiya yees.

<sup>10</sup>Qaalay alamen de7is. Xoossay Qaalaa alamiya medhdhis, shin alamey iya eribeenna. <sup>11</sup>I bayssatakko yis, shin iyayssati iya ekkibookkona. <sup>12</sup>Shin I bana ekkidayssatasinnee iya sunthan ammanidayssatas Xoossaa nayta gidana mela maata immis. <sup>13</sup>Entti Xoossafe yelettidosonappe attin asi yelettiya wogan woykko adde shenen woykko asa amon yeletti-bookkona. Xoossay I entta aawa.

<sup>14</sup>Qaalay ase gidis; aadho keehatethaanne tumaa kumidi nu giddon de7is. I aawas issi na7aa gididi ekkida iya bonchchuwa nuuni be7ida.

<sup>15</sup>Yohaannisi iyabaa markkattis. Ba qaalaa dhoqqu oothidi, "Taani, 'Taappe guyera yeissi taappe kase de7iya gisho taappe aadhhdhees' gada markkattidayssi hayssa" yaagis.

<sup>16</sup>Nuuni ubbay iya aadho keehatethaa kumethaafe anjjo bolla anjjo ekkida. <sup>17</sup>Xoossay higgiya Muse baggara immis, shin aadho keehatethaynne tumatethay Yesuus Kiristtoosa baggara yis. <sup>18</sup>Xoossaa be7ida asi oonikka baawa; ba Aawa matan de7iya issi Na7aa xalaali baw Xoosse gididayssi iya qonccisis.

#### *Xammaqiy Yohaannisa markkatethaa (Maato 3:1-12; Mar 1:1-8; Luuqa 3:1-8)*

<sup>19</sup>Yerusalamen de7iya Ayhude halaqati, kahinetanne Leeweta, "Neeni oonee?" gidi, Yohaannisa oychchana mela iyaakkoo kiittin, Yohaannisi enttaw markkattida markkatethay hayssa.

<sup>20</sup>Yohaannisi, "Taani Kiristtoosa gidikke" yaagidi, geeshshidi markkattisippe attin kaddibeenna.

<sup>21</sup>Entti, "Yaatin, neeni oonee? Neeni Eliyaaseyye?" yaagidi oychchidosona.

Yohaannisi, "Akkay gidikke" yaagis.

Qassi entti, "Neeni yaana geetettida nabiyayye?" yaagidi oychchidosona.

Yohaannisi, "Akkay" gidi zaaris.

<sup>22</sup> Yaatin, "Neeni oonee? Nuuni nuna kiittidayssatas odana mela neeni nena oona gay?" yaagidosona.

<sup>23</sup> Yohaannisi zaaridi, "Nabiya Isayaasi gidayssada,  
'Godaa ogiya suurisite!'

gidi bazzo biittan waassiya uraa qaalay tana"  
yaagis.

<sup>24</sup> Qassi Farisaaweti kiittida asati <sup>25</sup> Yohaannisakko, "Neeni Kiristtoosa woykko Eliyasaas woykko nabe gidonna ixxiko, yaatin ays xammaqay?" gidi oychchidosona.

<sup>26</sup> Yohaannisi zaaridi, "Taani haathan xammaqays, shin hintte eronna asi hintte giddon eqqis. <sup>27</sup> I taappe guyera yees. Taani hari attoshin iya caammaa wodoruwa billanaw bessike" yaagis.

<sup>28</sup> Hessi ubbay Yorddaanose Shaafappe hefinthan, Bitaaniya kataman, Yohaannisi xammaqiyi bessan hanis.

### Xoossaa Dorssaa

<sup>29</sup> Yohaannisi wonttetha gallas Yesuusi baakkko yishin be7idi, "Alamiya nagaraa quchchiya Xoossaa Dorssay hayssa! <sup>30</sup> Taani, 'Taappe guyera issi asi yaana. I taappe kase de7iya gisho taappe aadhdees' gada odidayssi hayssa. <sup>31</sup> I ooneekko taani erikke. Shin Isra7eeli asaas iya qonccisanaw haathan xammaqashe yas" yaagis.

<sup>32</sup> Yohaannisi hayssanda yaagidi markkattis: "Geeshsha Ayyaanay saloppe holeda wodhd-hishininne iyara de7ishin be7as. <sup>33</sup> Hessi hananaappe kase taani iya erikke. Shin haathan xammaqanaw tana kiittida Xoossay, 'Geeshsha Ayyaanay wodhdhidi iyara de7ishin neeni be7anaysinne Geeshsha Ayyaanan xammaqanayssi iya' yaagidi taw odis. <sup>34</sup> Taani hessi hanishin be7ada, I Xoossaa Na7aa gididayssa markkattays" yaagis.

### Yesuusa kaallida koyro tamaareta

<sup>35</sup> Qassi wonttetha gallas Yohaannisi ba tamaaretappe nam77atara issife eqqis.

<sup>36</sup> Yesuusi aadhishin Yohaannisi be7idi, "Xoossaa dorssay haysish!" yaagis.

<sup>37</sup> Nam77u Yohaannisa tamaareti Yohaannisi geyssa si7idi Yesuusa kaallidosona.

<sup>38</sup> Yesuusi bana kaalleyssata guye simmi be7idi, "Ay koyeetii?" yaagidi oychchis.

Entti zaaridi, "Asttamaariyaw, neeni awun de7ay?" yaagidosona.

<sup>39</sup> Yesuusi enttako, "Haa yidi be7ite" yaagis. Entti bidi I de7iyasuwa be7idosona. He gallas sa7ay tammu saate heera gido iya matan pee7idosona.

<sup>40</sup> Yohaannisi gidayssa si7idi, Yesuusa kaallida nam77u tamaaretappe issoy, Simoon Phexiroosa ishaa Inddiriyasa. <sup>41</sup> Inddiriyasi koyro ba ishaa Simumonara gahettidi, "Nuuni Kiristtoosa demmida" yaagis. <sup>42</sup> Inddiriyasi Simumona Yesuusakko ehis.

Yesuusi Simumona be7idi, "Neeni Yoona na7aa Simumona; ne sunthay Keefaa \* gidi xeeget-tana" yaagis.

### Yesuusi Filphoosanne Natina7eela xeegis

<sup>43</sup> Wonttetha gallas Yesuusi Galiila biittaa baanaw qofa qachchis. I Filphoosara gahettidi, "Tana kaalla!" yaagis. <sup>44</sup> Filphoosi, Inddiriyasinne Phexiroosi de7ida Beetesaya kata-maape yida ase.

<sup>45</sup> Filphoosi Natina7eelara gahettidi, "Musey higge maxaafan, qassi nabetikka iyabaa xaafida Yoosefa na7aa Naazirete Yesuusa nuuni demmida" yaagis.

<sup>46</sup> Natina7eeli zaaridi, "Naazirete katamaappe lo77obay keyanaw dandda7ii?" yaagis.

Filphoosi, "Yada be7a" yaagis.

<sup>47</sup> Natina7eeli baakkko yeysa Yesuusi be7idi, "Geney baynna tuma Isra7eeli asi hayssa!" yaagis.

<sup>48</sup> Natina7eeli Yesuusakko, "Neeni tana awun eray?" yaagis.

Yesuusi zaaridi, "Filphoosi nena xeehanaappe sinthe, neeni balase mithaa garssan de7ishin taani nena be7as" yaagis.

<sup>49</sup> Natina7eeli zaaridi, "Asttamaariyaw, neeni Xoossaa Na7aa! Neneen Isra7eeli kawo!" yaagis.

<sup>50</sup> Yesuusi iyaakkko, "Taani nena balase mithaa garssan be7as gida gisho ammanay? Neeni hayssafe aadhdiyabaa be7ana!" yaagis. <sup>51</sup> Qassi Yesuusi, "Taani hintew tuma odays; saloy dooyettin, Xoossaa kiitanchchoti Asa Na7aa bolla keyishininne wodhdhishin hintte be7ana" yaagis.

<sup>1:23</sup> Isa 40:3      \* <sup>1:42</sup> Keefaa: Giya qaalay Aramayke doona gidishin, Girike doonan birshshethay Phexiroosa woykko zaalla guussu.      <sup>1:51</sup> Medhe 28:12

**2***Yesuusi yaagano bessan*

<sup>1</sup> Heedzanthro gallas Galiila biittan Qaana kataman yaaganoy yaaganettis. Yesuusa aayyaa he yaaganuwan de7awusu. <sup>2</sup> Yesuusikka ba tamaaretara issife he yaaganuwa xeegettis. <sup>3</sup> Woyne ushshay wurin, Yesuusa aayyaa Yesusakko, “Enttaw woyne ushshay wuris” yaagasu.

<sup>4</sup> Yesuusi zaaridi, “Ta aaye, ne hayssan geloppa? Ta wodey burroo gakkibeenna” yaagis.

<sup>5</sup> Yesuusa aayyaa oosanchchotakko, “I hinttew odiyabaa aybibaa gidikkoka oothite” yaagasu.

<sup>6</sup> Ayhudeti bantta geesho wogaas go7ettiya usuppun shuchcha baathati he bessan de7oosona. Issi issi baathay nam77u woykko heedzu xugga oykkees. <sup>7</sup> Yesuusi oosanchchotakko, “Baathathan haathe kunthite” yaagis. Entti baathatas doona gakkanaw haathe kunthidosona. <sup>8</sup> Yesuusi enttako, “Ha77i duuqqidi yaaganuwa aawatethan poliseyssas immite” yaagis. Entti iyaw efidi immidosona.

<sup>9</sup> Yaaganuwa aawatethan poliseyssi woyne ushshi laamettida haathaa ganxi ekkidi awuppe yidaakko eribeenna, shin haatha kunthida oosanchchoti eroosona. Yaaganuwa aawatethan poliseyssi machchiw ekkeyssa xeegidi, <sup>10</sup> “Oonikka lo77o woyne ushshaa asaa koyrottidi ushshees. Yaatidi asay uyi kallidaappe guye qiraariya immees. Shin neeni lo77o woyne ushshaa hanno gakkanaw wotha aggadasa” yaagis.

<sup>11</sup> Yesuusi ha koyro malaataa Galiila biittan Qaana kataman oothis; hessan ba gitatethaa bessis. Iya tamaareti iya ammanidosona.

<sup>12</sup> Hessafe guye, Yesuusi ba aayera, ba ishataranne ba tamaaretara issife Qifirnahoomme katamaa bidi guutha gallas gam77is.

*Yesuusi Xoossa Keethafe zal77eyssata kessis*

(Maato 21:12-13; Mar 11:15-17; Luuqa 19:45-46)

<sup>13</sup> Ayhudeti bonchchiya Paasika Baale gallasay matatin Yesuusi Yerusalamee bis. <sup>14</sup> Bidi Xoossa Keethan boorata, miizata, dorssantanne holleta bayzeysatanne bantta oydiyan uttidi miishe laammeysattaa demmis. <sup>15</sup> I surqqafe dooqidi asaa ubbaa entta mehetara Xoossa Keethafe gooddidi kare kessis. Miishe laammeysattaa xarpheezatakka aathi yeggidi entta miishiya laallis. <sup>16</sup> Holle bayzeyssata, “Ha holleta hayssafe kessite; ta Aawa keetha giya oothofite” yaagis.

<sup>17</sup> Iya tamaareti Geeshsha Maxaafan, “Taani ne keethas mishettiya mishay tana tamada xuuggees” geetettidi xaafetidayssaa akeekidosona.

<sup>18</sup> Hessafe guye, Ayhudeti zaaridi, “Ne hayssaa oothanaw new maati de7eyssas nuna ay malaata oothada bessanee?” yaagidosona.

<sup>19</sup> Yesuusi, “Ha Xoossa Keetha laallite; taani heedzu gallasan zaarada keexana” yaagis.

<sup>20</sup> Qassika Ayhudeti, “Ha Xoossa Keetha keexanaw oytamanne usuppun laythi ekkis, shin neeni heedzu gallasan keexanee?” yaagidosona.

<sup>21</sup> Shin Yesuusi odiya Xoossa Keethay ba asatethaabaa. <sup>22</sup> Hessa gisho, Yesuusi hayqoppe dendiddaappe guye iya tamaareti I hessa gidayssa akeekidosona. Qassi entti Geeshsha maxaafan xaafetidayssanne Yesuusi odidayssa ammanidosona.

<sup>23</sup> Yesuusi Paasika bonchchiya bessan Yerusalamen de7ishin, I oothida malaatata be7idi daro asay iya ammanidosona. <sup>24</sup> Shin Yesuusi asaa ubbaa eriya gisho entta ammanibeenna. <sup>25</sup> Asa wozanan de7iyabaa I ba huu7en eriya gisho asabaa oonikka iyaw odana mela koshshireenna.

**3***Yesuusanne Niqodimoosa*

<sup>1</sup> Farisaaweta yaraappe gidida, Ayhudeta halaqay, Niqodimoosa giya issi addey de7ees.

<sup>2</sup> Niqodimoosi qamma Yesuusakko yidi, “Asttamaariyaw, neeni Xoossay kiittida asttamaare gideyssa nuuni eroos. Ays giikkoo, Xoossay iyara doonna ixxiko ha neeni oothiya malaata oothanaw dandda7iya asi baawa” yaagis.

<sup>3</sup> Yesuusi zaaridi, “Taani new tuma odays; oonikka zaari yelettonna ixxiko Xoossaa kawotethaa be7anaw dandda7enna” yaagis.

<sup>4</sup> Niqodimoosi, “Ceega asi waanidi zaari yelettanaw dandda7ii? Ba aaye ulo simmi gelidi zaari yelettanaw dandda7ii?” yaagis.

<sup>5</sup> Yesuusi zaaridi, “Taani new tuma odays; oonikka haathafenne Geeshsha Ayyaanaappe yelettonna ixxiko, Xoossaa kawotethaa gelanaw dandda7enna. <sup>6</sup> Asho na7atethi aawuppenne aayippe yees; Xoossaa na7atethi Geeshsha Ayyaanaappe imettees. <sup>7</sup> Taani, ‘Hintte

zaari yelettanaw bessees' gada hinttew odida gisho neeni malalettofa. <sup>8</sup> Carkkoy ba koyida bessi carkkees. Neeni iya kooshinchcha si7asappe attin I awuppe yaakko woykko aw biyakko erakka. Ayyaanaappe yelettida ubbay hessa mela" yaagis.

<sup>9</sup> Yaatin Niqodimoosi, "Hessi waanidi hananaw dandda7ii?" yaagidi oychchis.

<sup>10</sup> Yesuusi zaaridi, "Neeni Isra7eelata asttamaare gidashe hayssa erikki? <sup>11</sup> Taani new tuma odays; nu eriyabaa oodoosinne be7idabaa markkattoos, shin nu markkatethaa hintte ekkeketa. <sup>12</sup> Taani hinttew sa7abaa odin hintte ammanonnabaa gidikko salobaa odin waati ammananee? <sup>13</sup> Saloppe wodhdhida Asa Na7aappe attin salo keyiday oonikka baawa; [salon de7iya Asa Na7ay tana]"\* yaagis.

<sup>14-15</sup> Musey bazzo biittan biraata shooshi kaqqidayssada tana ammanida ubbay merinaa de7uwa ekkana mela Asa Na7ay dhoqqu gaanaw bessees.

<sup>16</sup> Xoossaa Na7aa ammaniyyaa ubbay merinaa de7uwa laattanaappe attin dhayonna mela Xoossay ha alamiya daro dosida gisho ba issi Na7aa immis. <sup>17</sup> Xoossay ba Na7aa ha alamiya kiittiday alamiya pirddanaw gidonnashin alamiya iya baggara ashshanaassa.

<sup>18</sup> Na7aa ammaniyyaa oonikka pirddetenna, shin Na7aa ammanonna oonikka issi Xoossaa Na7aa ammanibonna gisho ha77i pirddetts. <sup>19</sup> Pirddayka hayssa: poo7oy alamiya yis, shin asaa oosooy iita gidiya gisho asay poo7uwappe aathidi dhumaa dosees. <sup>20</sup> Itabaa oothiya oonikka poo7o ixxees. Ays giikko, ba oosooy qoncconna mela poo7uwakko yeenna. <sup>21</sup> Shin tuma oothiya oonikka Xoossay kiittidayssada I oothidayssa poo7oy qonccisana mela poo7uwakko yees.

### *Yesuusanne Xammaqiya Yohaannisa*

<sup>22</sup> Hessafe guye, Yesuusinne iya tamaareti Yihuda biitta bidosona. Yesuusi yan xammaqishe enttara guutha wode uttis.

<sup>23</sup> Qassi Yohaannisi Saleeme matan de7iya Henoona giyason gidiya haathi de7iya gisho asaa yan xammaqees. Asaykka yaa bidi xammaqettosona. <sup>24</sup> He wode Yohaannisi buroo qashettibeenna.

<sup>25</sup> Hessafe guye, Yohaannisa tamaaretinne issi Ayhude addey† geesho wogabaa palamidosona. <sup>26</sup> Entti Yohaannisakko bidi, "Asttamaariyaw, Yorddaanose Shaafappe hefinthan neera de7eyssi, neeni iyabaa markkattidayssi, hekko xammaqees. Asay ubbayka iyaakko boosona" yaagidosona.

<sup>27</sup> Yohaannisi zaaridi, "Xoossay immonna asi aybibaakkka ekkanaw dandda7enna.

<sup>28</sup> 'Taani Kiristtoosa gidikke, shin iyappe sinthe kiitetas' gidayssas hinttee, hintte huu7en taw markka. <sup>29</sup> Gelos giigidaara ekkeneaw giigidayssassa. Ekkeyssa laggey iya matan eqqidi I geyssa si7iya wode daro ufayttees. Hessaa gisho, hayssi ta ufayssay polettis. <sup>30</sup> I gitatanaw taani guuxanaw bessees" yaagis.

<sup>31</sup> Bollafe yeysi ubbaafe bolla. Sa7appe benttidayssi sa7abaa. I sa7abaa oodees. Saloppe yeysi ubbaafe bolla. <sup>32</sup> I ba be7idabaanne si7idabaa markkattees, shin iya markkatethaa ekkey baawa. <sup>33</sup> Iya markkatethaa ekkiya oonikka Xoossay tuma gideyssa qonccisees. <sup>34</sup> Xoossay ba geeshsha Ayyaana iyaw kumethi immiya gisho Xoossay kiittidayssi Xoossaa qaala oodees. <sup>35</sup> Awaway ba Na7aa dosida ubbabaa iya kushen wothis. <sup>36</sup> Na7aa ammaniyyaa uraas merinaa de7oy de7ees. Shin Na7aa ammanonnayssa bolla Xoossaa hanqoy de7eesippe attin I de7o demmenna.

## 4

### *Yesuusanne Samaare maccasiw*

<sup>1</sup> Yesuusi YohaannisaySAFE dariya kaalleyssata baakko shiisheyssanne xammaqeyssa Farisaaweti si7idosona. <sup>2</sup> Gidikkoka Yesuusa tamaareti xammaqidostonappe attin Yesuusi oonakka xammaqibeena. <sup>3</sup> Yesuusi asay iyabaa geyssa si7ida wode Yihudappe denddidi Galiila bis. <sup>4</sup> Galiila bishe Samamarera aadhhdhanayssi iyaw attonnabaa gidis.

<sup>5</sup> Hessaa gisho, Yayqoobi ba na7aa Yoosefas immida gadiya matan de7iya Sikaare giya Samaare katamaa bis. <sup>6</sup> He bessan Yayqooba haathee olay de7ees. Yesuusi hamuthan daaburidi he haathee olla matan uttis. He wode sa7ay usuppuun saate heera.

<sup>7</sup> Issi Samaare katamaa maccas he ollaafe haathee tikkawaw yasu. Yesuusi he macaseekko, "Tana haathe ushsharkkii" yaagis. <sup>8</sup> He wode Yesuusa tamaareti kathi shamanaw katama bidosonashin.

---

\* **3:13** Salon de7iya Asa Na7ay tana: Issi issi beni maxaafati guijoosona.   **3:14-15** Tay 21:9   **3:24** Maato 14:3;  
Mar 6:17; Luuqa 3:19-20   † **3:25** Issi Ayhude Addey: Issi issi maxaafati "Guutha Ayhude asati" yaagosona.   **3:28**  
Yoha 1:20   **3:35** Maato 11:27; Luuqa 10:22   **4:5** Medhe 33:19; Iya 24:32

<sup>9</sup> He maccasiya zaarada, “Neeni Ayhude ase gidashe, Samaare maccas gidiya tana waanada haathe ushsha gay?” yaagasu. Hessa iya giday Ayhudeti Samaaretara gahttonna gishossa.

<sup>10</sup> Yesuusi zaaridi, “Neeni Xoossaa imotaanne haathe tana ushsha geyssi ooneekko eridabaa gidiyakko iya ne woossana; ikka new de7o immiya haathi immanashin” yaagis.

<sup>11</sup> Maccasiya zaarada, “Godaw, new duuqqiyabaa baawa; ollayka ziqqa. Yaatin, de7o immiya haathi ne awuppe ekkane? <sup>12</sup> Nuus ha haathaa olla immida nu aawa Yayqoobappe neeni aadhhdhay? I, iya naytinne iya mehey ha ollaafe uydosona” yaagasu.

<sup>13</sup> Yesuusi, “Ha haathaafe uyida oonikka zaari saamottana. <sup>14</sup> Shin taani immana haathaa uyaa oonikka ubbakka saamottenna. Taani immana haathay iya giddon merinaa de7o immiya goggiya pulatto gidana” yaagis.

<sup>15</sup> Maccasiya zaarada, “Godaw, taani saamottonna melanne haathe tikkanaw ha bessaa yoonna mela taw he haathaa imma” yaagasu.

<sup>16</sup> Yesuusi iikko, “Bada ne azinnaa xeegada ya” yaagis.

<sup>17</sup> Maccasiya zaarada, “Taw azini baawa” yaagasu.

Yesuusi iikko, “Taw azini baawa guussan balabaakka. <sup>18</sup> New kase ichchashu azinati de7oosona. Ha77i neera de7iya addey ne azina gidenna. Neeni ha77i tuma odadasa” yaagis.

<sup>19</sup> Maccasiya zaarada, “Godaw, neeni nabe gideyssa taani eras. <sup>20</sup> Nu aawati ha deriya bolla Xoossaa goynnidosona. Shin hintte Ayhudeti asi Xoosse goynninanaw bessiya bessay Yerusalamenaa geeta” yaagasu.

<sup>21</sup> Yesuusi, “Ha maccasete tana ammanna; ha deriya bolla woykko Yerusalamenen Aawa hintte goynnona wodey yaana. <sup>22</sup> Hintte Samaareti eronnayssa goynneeta. Shin nuuni atotethay Ayhudeppe yaa gisho nu erezza goynninos. <sup>23</sup> Shin Aawa tuman goynneyssati Ayyaaninaninne tumatethan goynnana wodey matattis; ha77ika gakkis. Hiza, Aaway koyey hayssa mela ogiyan goynneyssata. <sup>24</sup> Xoossay Ayyaana; iyaw goynneyssati Ayyaaninaninne tumatethan goynnanaaw bessees” yaagis.

<sup>25</sup> Maccasiya zaarada, “Kirsttoosi yaanayssa taani erays. I yaa wode nuus ubbabaa odana” yaagasu.

<sup>26</sup> Yesuusi, “Ha neera odettetay taani iya” yaagis.

<sup>27</sup> Entti odettishin, Yesuusa tamaareti bida bessaafe simmidosona. Yesuusi maccasara odettishin entti be7idi daro malaalettidosona. Shin maccaseekko, “Ay koyay?” Woykko Yesuusakkko, “Iira ays odettay?” giday oonikka baawa.

<sup>28</sup> Hessafe guye, maccasiya ba haatha otuwa aggada guye katamaa bada asaakkko, <sup>29</sup> “Taani oothidabaa ubbaa taw odida addiya be7anaw yedhdhite. I Kiristtoosa gidand-deshhaa?” yaagasu. <sup>30</sup> Asay katamaappe keyidi Yesuusakkko bidosona.

<sup>31</sup> Hessi hanishin, iya tamaareti Yesuusakkko, “Guuthabaa markki” yaagidi woossidosona.

<sup>32</sup> Shin I, “Taw hintte eronna kathi ta meyssi de7ees” yaagis.

<sup>33</sup> Hessa gisho, iya tamaareti bantta giddon, “Iyaw miyabaa asi ehonna aggenna?” yaagidosona.

<sup>34</sup> Yesuusi enttako, “Ta kathay tana kiittidayssa sheniya oothanayssanne iya oosuwa polanayssa. <sup>35</sup> Hintte, ‘Oyddu ageenappe guye kathay cakettana’ geekketiyye? Shin taani hinttew odays; kathay kaxidi shiishoos gakkidayssha loyhti xeellite. <sup>36</sup> Zereyssine cakkeyssi issife ufayttana mela cakkeyssi damooze ekkees qassi kathaa merinaa de7os shiishees. <sup>37</sup> Hiza, ‘Issoy zerees; hankkoy qassi cakkies’ giya oday tuma. <sup>38</sup> Hintte daaburiboonayssa shiishhana mela taani hinttene kiittas. Harati oothi daaburidaswan gelidi hintte entta daaburaa ayfiyaa ekkideta” yaagis.

<sup>39</sup> Maccasiya, “I, taani oothida ubbabaa odis” gada markkattida gisho he kataman de7iya Samaare asaappe daroti Yesuusa ammanidosona. <sup>40</sup> Samaare asay Yesuusakkko yidi, bantta matan gam77ana mela Yesuusa woossin I yan nam77u gallas uttis.

<sup>41</sup> I odiya qaala gisho kaseyssafe daro asay ammanidosona. <sup>42</sup> Qassi entti maccaseekko, “Ha77i nu ammaney nu huu7en I geysa si7ida gishossafe attin neeni markkattida gishossa gidenna. Qassi I tuma ha alamiyu ashshayssa gideyssa nuuni erida” yaagidosona.

#### *Yesuusi issi shuumaa na7aa pathis*

<sup>43</sup> Nam77u gallasappe guye, Yesuusi yaappe keyidi Galiila biitta bis. <sup>44</sup> Yesuusi ba huu7en, “Nabey ba iihttan bonchchettena” yaagidi kasetidi odis. <sup>45</sup> Yesuusi Galiila gakkida wode Galiila asay iya mokkidosona. Ays giikko, Paasika Baale bonchchiya gallas entti Yerusalamen de7iya gisho I oothidabaa ubbaa be7idosona.

<sup>46</sup> Yesuusi haathaa woyne ushshi laammida bessaa, Galilaa de7iya Qaana katama bis. Qifirnahoomen kawo keethan oothiya issi shuumaa na7ay harggettis. <sup>47</sup> Yesuusi Yihudappe Galila yidayssa he shuumay si7idi iyaakko yis. Hayqqanaw matida ba na7aa bidi pathana mela Yesuusa woossis.

<sup>48</sup> Yesuusi shuumakkoo, "Xoossay oothiya malaatatanne oorathabata be7onna de7ishe hintte ubbarakkha ammanekketa" yaagis.

<sup>49</sup> Shuumay zaaridi, "Godaw, ta na7ay hayqqonna de7ishin taara yedhdharkki" yaagis.

<sup>50</sup> Yesuusi, "Ne soo ba; ne na7ay paxana" yaagis.

He shuumay Yesuusi gidayssa ammanidi ba soo bis. <sup>51</sup> I ba soo bishin iya aylleti iyaakko yishe iyara ogen gahtetti, "Ne na7ay paxis" gidosona.

<sup>52</sup> I ba aylleti ba na7aas ay saaten lo77idaakkoo oychchis. Entti zaaridi, "Zine laappun saaten mishay aggis" yaagidosona. <sup>53</sup> Na7aa aaway Yesuusi baakko, "Ne na7ay paxana" giday he saatiyan gideyssa akeekis. Hessa gisho, inne iya soo asa ubbay ammanidosona.

<sup>54</sup> Hessi Yesuusi Yihudappe Galila yidi oothida nam77antho malaataa.

## 5

### *Yesuusi issi gunnda addiya pathis*

<sup>1</sup> Hessafe guye, Yesuusi Ayhudeti bonchchiya baaliyas Yerusalameen bis. <sup>2</sup> Yerusalamen Dorssa Penggiya matan Ibraysxe doonan Beetesaya giya teqettida haathi de7ees. He teqeti uttida haathaa matan ichchashu shemppiya bessati de7oosona. <sup>3</sup> [Hessian haathay qaaxxanayssa naagiya] daro hargganchchot, qooqeti, wobbetinne gunddati zin77idosona. <sup>4</sup> [Ays giikko, issi issi toho Godaa kiitanchchoy teqettida haathan wodhdhidi haathaa qaathees. Haathay qaaxxiya wode koyro gelida uray bana oykkida ay harggefka paxees.]\* <sup>5</sup> He bessan hasttamanne hosppun laythi harggettida issi addey de7ees. <sup>6</sup> Yesuusi yan zin77ida addiya be7idi, qassi daro wode harggettidayssa eridi addiyako, "Paxanaw koyay?" yaagis.

<sup>7</sup> Hargganchchoy zaaridi, "Godaw, haathay qaaxxiya wode tana haathan yeggiya asi baawa. Taani gelana haniya wode haray taappe sinthattidi geli kichchees" yaagis.

<sup>8</sup> Yesuusi iyaakko, "Dendda eqqa; ne algaa tookkada ba" yaagis. <sup>9</sup> Addey sohuwarakka paxis; ba algaa tookkidi bis.

Hessi Sambbaata gallasan hanis. <sup>10</sup> Hessa gisho, Ayhudeti paxida addiyako, "Hachchi sa7ay Sambbaata; neeni ne algaa tookkeyssi woga gidenna" yaagidosona.

<sup>11</sup> Shin addey, "Tana pathidayssi, ne algaa tookkada ba gis" yaagidi zaaris.

<sup>12</sup> Entti iyaakko, "Nena, ne algaa tookkada ba giday I oonee?" yaagidi oychchidosona.

<sup>13</sup> Shin Yesuusi he bessan daro asaa giddora erisonna kanthidi bida gisho addey bana pathiday ooneekko erenna. <sup>14</sup> Yesuusi guyeppe he addiya Xoossa Keethan demmidi, "Hekko, neeni paxadasa; hayssafe iatabay nena gakkonna mela zaarada nagara oothofa" yaagis. <sup>15</sup> Hessafe guye, addey bida bana pathidayssi Yesuusa gididayssa Ayhudetas odis.

<sup>16</sup> Yesuusi hessa Sambbaata gallas oothida gisho Ayhudeti Yesuusa gooda oykkidosona. <sup>17</sup> Yesuusi zaaridi, "Ta Aaway ubba wode oothees; takka oothanaw bessees" yaagis.

<sup>18</sup> Yesuusi Sambbaata bonchchonna gisho xalaalas gidonnashin Xoossay ba Aawa gidi bana Xoossara giigisida gisho Ayhudeti iya wodhanaw kaseppe minthidi koyidosona.

### *Xoossa Na7aa maata*

<sup>19</sup> Yesuusi zaaridi, "Taani hinttew tuma odays; Na7ay barkka aykkoka oothanaw dandda7enna. I ba Aaway oothishin be7oyssa xalaala oothees. Aaway ootheyssa Na7aykka oothees. <sup>20</sup> Aaway ba Na7aa dosiya gisho I oothiya ooso ubbaa ba Na7aa bessees. Hintte malaalettana mela I hayqsafe aadhdiya ooso ba Na7aa bessana. <sup>21</sup> Aaway hayqqidayssata hayqoppe denthidi enttaw de7o immeysada Na7aykka ba koyeyssatas de7o immees. <sup>22</sup> Aaway Na7aas pirdda maata ubbaa immisppe attin I oonakka pird-denna. <sup>23</sup> Asay ubbay Aawa bonchcheyssada Na7aakka bonchchana. Na7aa bonchchonna oonikka Na7aa kiittida Aawakka bonchchenna.

<sup>24</sup> "Taani hinttew tuma odays; ta qaalaa si7eyssasinne tana kiittidayssa ammaneyssas merinaa de7oy de7ees. I hayqoppe de7on pinnida gisho pirddettena. <sup>25</sup> Taani hinttew tuma odays; hayqqida asay Xoossa Na7aa qaalaa si7iya wodey yaana; hessika ha77i. He qaalaa si7ey de7on daana. <sup>26</sup> Aaway de7os pultto gididayssada Na7aakka de7os pultto oothis. <sup>27</sup> Na7ay Asa Na7a gidiya gisho Aaway Na7aas pirdda maata immis.

<sup>28</sup> "Duufon de7eyssati iya qaala si7idi denddiya wodey yaana gisho hayssan malaatetofite. <sup>29</sup> Lo77o oothidayssati de7on daanaw qassi iita oothidayssati pirdda ekkanaw duufoppe denddana.

*Yesuusas markkattida asata*

<sup>30</sup> "Taani ta maatan aybibaakka oothanaw dandda7ikke. Xoossay taw odidayssada pirddays. Taani tana kiittidayssi koyabaa oothaysippe attin ta koyabaa oothonna gisho ta pirdday tuma.

<sup>31</sup> "Taani tabaa markkatiko ta markkatehay tuma gidenna. <sup>32</sup> Tabaa markkattiya hari de7ees; I tabaa markkateyssi tuma gideysa taani erays.

<sup>33</sup> "Hintte Yohaannisakko ase kiittin I tumaas markkattis. <sup>34</sup> Taani hessa hinttew odehy, hintte attana mela gadappe attin asa markkatehi taw koshshin gidenna. <sup>35</sup> Yohaannisi muqaadada eexishe poo7is. Hintte guutha wode iya poo7uwani ufayttideta.

<sup>36</sup> "Shin taw Yohaannisappe aadhdiya markki de7ees. Taani oothana mela ta Aaway taw immida oosoti tabaa markkattosona; Aaway tana kiittidayssa qonccisoosona.

<sup>37</sup> "Qassi tana kiittida Aawaykka ba huu7en tabaa markkatties. Hintte iya qaala ub-barakka si7ibekketa woykko iya malaa be7ibekketa. <sup>38</sup> I kiittidayssa hintte ammanonna gisho iya qaalay hintte wozanan baawa.

<sup>39</sup> "Geeshsha Maxaafatappe merinaa de7o demmanabaa hinttew daanin entta pilggeeta; entti tabaa markkattosona. <sup>40</sup> Shin hintte de7o demmanaw taakko yaanaw koyekketa.

<sup>41</sup> "Asappe taani bonchcho koyikke. <sup>42</sup> Shin taani hintte wozanan Xoossaai siiqoy baynayssa erays. <sup>43</sup> Taani ta Aawa maatan yas, shin tana mokkibekketa. Haray ba maatan yaa wode iya mokkeeta. <sup>44</sup> Hintte issyo issuwife bonchcho koyeyssati, issi Xoossaafe yaa galata ekkanaaw koyonnayssati, waanidi tana ammananaw dandda7etii?

<sup>45</sup> "Taani ta Aawa sinthant hinttena mootiyabaa hinttew daanoppo. Hinttena mootanay hintte ufayssan naagiya Muse. <sup>46</sup> Hintte Muse ammanidabaa gidiyakko I tabaa xaafida gisho tanakka ammananashin. <sup>47</sup> Shin hintte I xaafidayssa ammanonna ixxiko ta qaala waattidi ammananee?" yaagis.

## 6

*Yesuusi ichhashu mukulu asaa muzis*

(Maato 14:13-21; Mar 6:30-44; Luuqa 9:10-17)

<sup>1</sup> Hessafe guye, Yesuusi Xibaaryoosa giya Galila Abbaafe hefinti pinnis. <sup>2</sup> I harganch-chota pason oothida malaataa be7ida gisho daro asay iya kaallidosona. <sup>3</sup> Yesuusi deriya bolla keyidi, yan ba tamaaretara issife uttis. <sup>4</sup> Ayhudeti bonchchiya Paasika Baale gallasay gakkis. <sup>5</sup> Yesuusi daro asay baakko yeysa be7idi Filphoosakko, "Ha asaa ubbaa muzanaw gidiya kathi awuppe shamannee?" yaagis. <sup>6</sup> I hessa Filphoosa paaccanaw gisippe attin I ba huu7en ay oothaneekko erees.

<sup>7</sup> Filphoosi zaaridi Yesuusakko, "Hari attoshin, Huu7en huu7en, issi issi barssi gathanaw, nam77u xeetu dinaaren\* uythu shamminkka gidenna" yaagis.

<sup>8</sup> Qassi Yesuusa tamaaretappe issyo, Simoon Phexiroosa ishay Inddiriyasi, <sup>9</sup> "Ichhashu bangga soollonne nam77u molo oykkida issi na7ay hayssan de7ees, shin ha asa ubbaas hessi ay maaddanee?" yaagis.

<sup>10</sup> Yesuusi ba tamaaretakko, "Asaa utisite" yaagis. He bessan daro maati de7ees; asa ubbay uttis. Adde asaa tayboy ichhashu mukulu gidana. <sup>11</sup> Yesuusi uythaa ekkidi Xoossaai galati simmidi yan uttida asaas gishis. Moluwakka ekkidi hessada oothidi immin, asay ba koyidayssa mela mis. <sup>12</sup> Entti ubbay kallidaappe guye Yesuusi ba tamaaretakko, "Issibaykka iitonna mela attida tiifiya shiishite" yaagis. <sup>13</sup> Hessa gisho, entti ubbaa shiishidosona. Asay min attida bangga soollo tiifiya shiishidi tammanne nam77u gayta kunthidosona.

<sup>14</sup> Asay Yesuusi oothida malaatata be7ida wode "Hayssi tuma ha alamiya yaana geetet-tida nabiya" yaagidosona. <sup>15</sup> Yesuusi entti iya oykkidi wolqqan kawo oothanaw haneyssa eridi, barkka deriya bolla zaari keyis.

*Yesuusi abbaa bollara hamuttis*

(Maato 14:22-33; Mar 6:45-52)

<sup>16</sup> Sa7ay omarssida wode Yesuusa tamaareti abbaako wodhdhidosona. <sup>17</sup> Sa7ay qam-mida gishonne Yesuusi buroo enttako yiбоonna gisho iya tamaareti wogolon gelidi abbaa pinnidi Qifirnahome baanaw denddidosona. <sup>18</sup> Wolqqaama carkkoy carkkida gisho

5:29 Daane 12:2    5:33 Yoha 1:19-27; 3:27-30    5:37 Maato 3:17; Mar 1:11; Luuqa 3:22    \* 6:7 dinaare: Issi dinaarey issi asi issi gallas oothi pee7idi ekkiya miishe. Nam77u xeetu dinaarey issi asi laytha bagga oothidi ekkiya miishe keena. (Maato 20:2) xeellite.

abbay qaaxxes. <sup>19</sup> Ichchashu woykko usuppun kilo mitire gideyssa mela entti abbaa pidhidi bidaappe guye Yesuusi abbaa bollara hamuttishe yeysa be7idi yayyidosona. <sup>20</sup> Shin I, “Babbotite, tana” yaagis. <sup>21</sup> Entti ufayttidi iya wogoluwan gelssidosona; iirakka wogoloy entti biya abbaa gaxa gakkis.

*Yesuusi de7o uythaan*

<sup>22</sup> Wonttetha gallas abbaafe hefinthan attida daro asay issi wogolo xalaali de7eyssa be7idosona. Yesuusi ba tamaaretara wogoluwan gelidi, enttara boonnayssanne entti bantarkka bidayssa akeekidosona. <sup>23</sup> Shin Xibaaryoosappe hara wogoloti Yesuusi Xoossaa galatin, asay uythaan mida bessaa yidosona. <sup>24</sup> Asay Yesuusi woykko iya tamaareti yan baynnayssa be7idi, Yesuusa koyanaw wogolotan gelidi Qifirnahoomee bidosona.

<sup>25</sup> Asay Yesuusa abbaafe hefinthan demmida wode “Asttamaariyaw, haa awude yadi?” yaagis.

<sup>26</sup> Yesuusi zaaridi, “Taani hinttew tuma odays; hintte tana koyey uythi midi kallida gishossafe attin malaata be7ida gishossa gidenna. <sup>27</sup> Samiya kathas oothofite, shin merinaa de7o immiya kathas oothite. Xoossaa Aaway I oothana mela iyaw maata immida gisho he kathaa Asa Na7ay hinttew immana” yaagis.

<sup>28</sup> Yaatin entti, “Nuuni Xoossaa oosuwa oothanaw ay oothanee?” yaagidi Yesuusa oychchidosona.

<sup>29</sup> Yesuusi zaaridi, “Hintte oothana mela Xoossay koyaa oosoy hayssa: I kiittidayssa ammanite” yaagis.

<sup>30</sup> Entti zaaridi, “Nuuni be7idi, nena ammanana mela ay malaata ne bessanee? Ne ay oothanee? <sup>31</sup> Geeshsha Maxaafan, ‘Entti maana mela uythu saloppe immis’ geetetti xaafttidayssada nu aawati bazzo biittan manna midosona” yaagidosona.

<sup>32</sup> Yesuusi, “Taani hinttew tuma odays; hinttew saloppe tuma uythaan immiday ta Aawappe attin Muse gidenna. <sup>33</sup> Hiza, Xoossay immiya uythay saloppe wodhdhidayssi alamiyas de7o immeysa” yaagis.

<sup>34</sup> Entti zaaridi, “Godaw, nuus he uythaan ubba wode imma” yaagidosona.

<sup>35</sup> Yesuusi, “Taani de7o immiya uythaan; taakko yaa oonikka ubbaraka koshattenna. Qassi tana ammaniyaa uray ubbaraka saamottenna. <sup>36</sup> Shin taani hinttew odas; hintte tana be7ideta, shin ammanekketa. <sup>37</sup> Ta Aaway taw immiya ubeby taakko yaana; qassi taakko yaa oonakka kare yeddiike. <sup>38</sup> Taani ta koyabaa oothanaw gidonnashan tana kiittidayssi koyabaa oothanaw saloppe yas. <sup>39</sup> Tana kiittidayssi koyey hayssa: taani I taw immida ubbatakka wurssetha gallas hayqoppe denthana melappe attin issuwaka dhayssana mela koyenna. <sup>40</sup> Hiza, ta Aaway koyey hessa: Na7aa be7idi ammaniyaa ubeby merinaa de7uwa ekkana; taani he ubbaa wurssetha gallas merinaa de7os hayqoppe denthana” yaagis.

<sup>41</sup> Yesuusi, “Taani saloppe wodhdida uythaan” gida gisho Ayhudeti iya bolla zuuzum-midosona. <sup>42</sup> Entti, “Hayssi nuuni iya aawanne iya aayiw eriya Yoosefa Na7aa Yesuusa gidennee? Yaatin, I waanidi, ‘Taani saloppe wodhdhas’ gaanaw dandda7ii?” yaagidosona.

<sup>43</sup> Yesuusi zaaridi, “Issoy issuwara zuuzummeyssa aggitte. <sup>44</sup> Tana kiittida ta Aaway taakko ehiya asappe attin taakko yaanaw dandda7iya oonikka baawa. Taani wurssetha gallas iya merinaa de7os hayqoppe denthana. <sup>45</sup> Nabeti, ‘Xoossay asa ubbaa tamaarssana’ yaagidi xaafidosona. Aawa si7eyssinne iyappe tamaariya oonikka taakko yees. <sup>46</sup> Xoossaa matapape yidayssafe attin Aawa be7iday oonikka baawa; iya xalaali Aawa be7is.

<sup>47</sup> “Taani hinttew tuma odays; tana ammaniyaa ooddeskka merinaa de7oy de7ees.

<sup>48</sup> Taani de7o immiya uythaan. <sup>49</sup> Hintte aawati bazzon manna midosona, shin hayqqidosona. <sup>50</sup> Saloppe yaa uythay hayssa; he uythaan miya oonikka hayqqenna. <sup>51</sup> Saloppe yida de7o uythay tana. Oonikka ha uythaan miikko merinaw daana. Qassi ha alamey de7on daana mela taani hinttew immana uythay ta ashuwa” yaagis.

<sup>52</sup> Ayhudeti, “Ha addey ba ashuwa nu maana mela nuus waatidi immanaw dandda7ii?” yaagidi bantta giddon palamidosona.

<sup>53</sup> Hessa gisho, Yesuusi enttako, “Taani hinttew tuma odays; Asa Na7aa ashuwa, hintte moonna ixxiko, qassi iya suuthaa hintte uyonna ixxiko, hinttew de7oy baawa. <sup>54</sup> Ta ashuwa miya uraasinne ta suuthaa uyaa uraas merinaa de7oy de7ees. Taani wurssetha gallas iya hayqoppe denthana. <sup>55</sup> Ta ashoy tuma kathi; ta suuthaykka tuma ushshu. <sup>56</sup> Ta ashuwa miya uraynne ta suuthaa uyaa uray tanan de7ees; takka iyan de7ays. <sup>57</sup> De7o Aaway tana kiittin, taani iya baggara de7on de7eyssada, tana miya uraykka ta gaason de7on daana. <sup>58</sup> Saloppe wodhdida uythay hayssa: hintte aawati midi hayqqida manna mela gidenne; ha uythaan miya uray merinaw daana” yaagis.

<sup>59</sup> Yesuusi Qifirnahoomee kataman Ayhude Woosa Keethan hayssa tamaarssis.

*Merinaa de7o qaala*

<sup>60</sup> Yesuusa tamaaretappe dariya baggay hessa si7ida wode “Hayssi gelonna timirtte; hayssi ooddes gelii?” yaagidosona.

<sup>61</sup> Yesuusi ba tamaareti hessas zuuzummidayssa eridi, “Hayssi hinttena dhubbi?

<sup>62</sup> Yaatin, Asa Na7ay kase de7iyasuwa pude keyishin hintte be7idi woyganddeti?

<sup>63</sup> Geeshsha Ayyaanay de7o immees; aas wolqqi aykkoka maaddenna. Ta hinttew odiya

qaalay de7o immiya Geeshsha Ayyaanaappe yees. <sup>64</sup> Shin hintte giddon ammanonnayssati de7oosona” yaagis. Ammanonnayssati oonanteeko Yesuusi koyroppe doomidi erees. Qassi bana aathi immanay ooneekko erees. <sup>65</sup> Qassika Yesuusi, “Aaway ba goonna oonikka taakko yaanaw dandda7enna gada taani odiday hessa gishossa” yaagis.

<sup>66</sup> Hessa gaason, Yesuusa kaalleyssatappe daroti iya aggidi guye simmidosona; zaari iya kaallibookkona. <sup>67</sup> Yesuusi tammanne nam77u ba tamaareta, “Hinttaka aggidi baanaw koyeetii?” yaagidi oychchis.

<sup>68</sup> Simoon Phexiroosi zaaridi, “Godaw, nuuni ooddeko baanee? New merinaa de7o immiya qaalay de7ees. <sup>69</sup> Neeni Xoossaa Geeshshaa gideyssa nuuni ammanoosinne eroos” yaagis.

<sup>70</sup> Yesuusi enttako, “Taani hinttena tammanne nam77ata doorabiikkinaa? Shin hinttete issyo Xalahe” yaagis. <sup>71</sup> Yesuusi hessa giday Simoona Na7aa Asqoroota Yihudasa. Yihudi Yesuusa aathi immanaw de7iya tammanne nam77u tamaaretappe issuwa.

## 7

*Yesuusaranne iya ishatara*

<sup>1</sup> Hessafe guye, Ayhudeti Yesuusa wodhanaw koyaa gisho I Yihuda aggidi Galiilan simerettees. <sup>2</sup> Ayhudeti bonchchiya Shaqara Baaley bonchchettanaw matis. <sup>3</sup> Hesssa gisho, Yesuusa ishati, “Ne tamaareti neeni oothiya malaatata be7ana mela hayssafe denddada Yihuda biittaa ba. <sup>4</sup> Baw erettanaw koya asi oonikka ba oosuwa genthenna. Neeni hayssata oothada nebaa alamiya erisa” yaagidosona. <sup>5</sup> Iya ishati hessa giday iyan ammaniboonna gishossa.

<sup>6</sup> Yesuusi enttako, “Taw injje wodey gakkibeenna, shin hinttew ubba wodey injjetees.

<sup>7</sup> Alamey hinttena ixxanaw dandda7enna, shin taani alamiya oosoy iita gideyssa markkatiya gisho tana ixrees. <sup>8</sup> Hintte baaliya biite; ta wodey gakkiboonna gisho taani baaliya biikke” yaagis. <sup>9</sup> I hessa gidi Galiilan attis.

*Yesuusi baaliya bonchchanaw bis*

<sup>10</sup> Iya ishati baaliya bonchchanaw bidaappe guye Yesuusi oonakka erisonna qosan he bessaa bis. <sup>11</sup> Ayhudeti baaliya bonchchiya bessan, “Iawun de7ii?” yaagidi iya koyidosona.

<sup>12</sup> Asay kalkkashidi iyabaa odettoosona. Baggay, “I lo77o asi” giya wode harati qassi, “Akkay, I asaa baalethees” yaagosona. <sup>13</sup> Shin Ayhude halaqatas yayyida gisho oonikka iyabaa qoncen odettenna.

<sup>14</sup> Baaliya bonchchidi giddo gathiya wode Yesuusi Xoossa Keethi bidi tamaarsso oykkis.

<sup>15</sup> Ayhudeti, “Ha addey timirtte tamaaronna hayssa ubbaa waati eridee?” yaagidi malaalettidosona.

<sup>16</sup> Yesuusi zaaridi, “Ta tamaarssya timirttey tana kiittida Xoossaa matappe yaa timirttefe attin tabaa gidenma. <sup>17</sup> Xoossaa sheniya oothanaw koyaa oonikka ha timirttefe Xoossaa matappe yiyaakkonne woykko taani taappe odiyakko erana. <sup>18</sup> Babaa odiya oonikka ba huu7e bonchcho koyees. Shin bana kiittidayssa bonchchuwa koyaa oonikka I turmarchcho; iyan worddoy baawa. <sup>19</sup> Musey hinttew higgiya immis, shin hinttete oonikka higgiya naagibeenna. Yaatin ays tana wodhanaw koyeetii?” yaagis.

<sup>20</sup> Asay zaaridi, “Nena Xalahey oykkis; nena wodhanaw oonee koyey?” yaagidosona.

<sup>21</sup> Yesuusi, “Taani issi malaata oothin hintte ubbay malaalettideta. <sup>22</sup> Hinttee, hintte nayta qaxxarana mela Musey kiittis. Shin qaxxaro hintte mayzati doomidosonappe attin Muse gidenma. Hessa gisho, hintte Sambbaata gallas adde nayta qaxxareeta. <sup>23</sup> Muse higgey kiittida gisho hintte Sambbaata gallas qaxxariyabaa gidikko, taani issi asa kumetha asatethaa pathida gisho taara ays kacceetii? <sup>24</sup> Tuma pirdda pirddittepe attin asa som77o be7idi pirddfotie” yaagis.

*Yesuusi, I Kiristtoosee?*

<sup>25</sup> Yerusalamee asaappe issoti issoti, “Entti wodhanaw koyaa uray hayssa gidennee?

<sup>26</sup> Hekko, i qoncen oedees; entti iya aykkoka gookkona. I Kiristtoosa gideyssa Ayhude

halaqati tuma eridonaashsha? <sup>27</sup> Kiristtoosi yaa wode I awuppe yaakkoo oonikka erenna, shin i awuppe yidaakko nu eroos” yaagidosona.

<sup>28</sup> Yesuusi Xoossa Keethan tamaarssishe ba qaala dhoqqu oothidi, “Tuma hintte taani ooneekkonne ta awuppe yidaakko ereketa? Taani ta maatan yabiikke, shin tana kiittidayssi tumanchcho; hintte iya ereketa. <sup>29</sup> Shin taani I kiittin iya matappe yida gisho iya erays” yaagis.

<sup>30</sup> Hessa gisho, entti iya oykkanaaw koyidosona. Shin iya wodey burroo gakkiboonna gisho oonikka iya bolla kushe wothibeenna. <sup>31</sup> Shin daro asay Yesuusa ammanidi, “Kiristtoosi yaa wode ha uray oothida malaatatappo dariya malaata oothaneeyye?” yaagidosona.

#### *Yesuusa oykkanaaw wotaaddareti kiitettidosona*

<sup>32</sup> Farisaaweti daro asay Yesuusabaa kalkkasheyssa si7idosona. Kahine halaqatinne Farisaaweti iya oythidi qashisanaw Xoossa Keethi naageyssata kiitettidosona.

<sup>33</sup> Yesuusi, “Taani hinttera guutha wode gam77ana; hessafe guye tana kiittidayssako baana. <sup>34</sup> Hintte tana koyana, shin demmeketa. Taani de7iyasuwa hintte yaanaw dandda7ekketa” yaagis.

<sup>35</sup> Ayhudeti issyo issuwara, “Hayssi nuuni demmonnaso aw baana hanii? Girike kata-man de7iya Ayhudetakkoo bidi Giriketa tamaarssanaw haniyye? <sup>36</sup> ‘Hintte tana koyana, shin demmeketa’ qassi, ‘Taani de7iyasuwa hintte yaanaw dandda7ekketa’ guussay ay guussee?” yaagidosona.

#### *De7o haathaa*

<sup>37</sup> Baaliya bonchchiya gallasatappo wolqqaamanne wurssetha gallasan Yesuusi dend-didi, ba qaala dhoqqu oothidi, “Saamottida oonikka taakko yidi uyo. <sup>38</sup> Tana ammaniyya oonikka Geeshsha Maxaafay gidayssada de7o immiya pultto haathay iyappe goggana” yaagis. <sup>39</sup> I hessa giday iya ammanidayssati ekkanaaw de7iya Geeshsha Ayyaanabaa. Yesuusi burroo bonchchettiboonna gisho he wode Geeshsha Ayyaanay imettibeenna.

#### *Asaa giddon shaaketethi medhettis*

<sup>40</sup> He asaappe daroti I geysa si7idi, “Tuma hayssi nabiya”\* yaagidosona.

<sup>41</sup> Harati qassi, “Hayssi Kiristtoosa” yaagidosona.

Shin harati qassi, “Kiristtoosi Galiilappe waanidi keyi? <sup>42</sup> Geeshsha Maxaafay, ‘Kirist-toosi Dawite sheeshaappe Dawitey de7ida Beeteleme katamaappe yaana’ yaagenneyye?” yaagidosona. <sup>43</sup> Hessa gisho, Yesuusa gaason asay banitta giddon shaaketidosona. <sup>44</sup> He asaappe issoti issoti iya oykkanaaw koyidosona, shin oonikka iya bolla kushe wothibeenna.

#### *Ayhude halaqati ammanibookkona*

<sup>45</sup> Xoossa Keetha naageyssati kahine halaqatakkonne Farisaawetakkoo guye simmi yin entti, “Ays iya ehipeekketii?” yaagidi oychchidosona.

<sup>46</sup> Xoossa Keetha naageyssati enttako, “Ha addey odetteyssatho oonikka odettenna” yaagidi zaaridosona.

<sup>47</sup> Farisaaweti zaaridi, “I hinttenakka bailethidee? <sup>48</sup> Ayhude halaqatappo woykko Farisaaweteppe iya ammanida asi de7ii? <sup>49</sup> Muse higgiya eronna ha asay qanggettidaabaa” yaagidosona.

<sup>50</sup> Farisaawetappo issyo qamma Yesuusakko bida Niqodimoosi enttako, <sup>51</sup> “Issi asi giyabaa si7onna woykko I ay oothidaakko eronna de7ishe koyrottidi iya bolla pirddeyssi nu higgiyan de7ii?” yaagis.

<sup>52</sup> Entti zaaridi, “Neenikka qassi Galiila biitta ase? Galiila biittaafe nabey keyonnayssa Geeshsha Maxaafaappe pilggada demma” yaagidosona.

## 8

#### *Laymatethan oykettida maccasiw*

<sup>1</sup> Issyo issyo aggidi ba soo ba soo bis, shin Yesuusi Shamaho Deriya bolla bis. <sup>2</sup> Qassi wontetha gallas guura Xoossa Keethi simmis. Daro asay iyaakkoo yin uttidi entta tamaarssis. <sup>3</sup> Higge asttamaaretinne Farisaaweti laymatishin oykkida issi maccasiw iyaakkoo ehidosona. Entti asa ubbaa sinthan iyo essidi, <sup>4</sup> “Asttamaariyaw, ha maccasiya laymatishin nu oykkida. <sup>5</sup> Muse higgey hanni mela maccas shuchchan cadeetta hayqqana mela kitiess. Yaatin, neeni woygay?” yaagidosona.

<sup>6</sup> Entti hessa giday Yesuusa paaccidi iya mootiyabaa demmanaasa. Shin Yesuusi hokkidi ba biradhdhen biitta bolla xaaafis. <sup>7</sup> Entti iya zaari zaari oychchidi aggonna ixxin, pude

<sup>7:37</sup> Leewe 23:36    <sup>7:38</sup> Hiz 47:1; Zakka 14:8    \* <sup>7:40</sup> Nabiya: Ha bessan nabiya geetettiday yaana gidi entti naagiya nabiya qonccisees. (Yoha 1:21 xeellite.)    <sup>7:42</sup> 2Saamu 7:12; Mik 5:2    <sup>7:50</sup> Yoha 3:1,2    <sup>8:5</sup> Leewe 20:10; Zaare 22:22-24

dhoqqu gidi, "Hintte giddon nagara oothiboonna asi koyrottidi iyo shuchchan caddo" yaagis.<sup>8</sup> Qassika hokkidi biitta bolla xaafis.

<sup>9</sup> Entti hessa si7ida wode cimatappe doomidi issov issov keyishe wuridosona. Yesuusa xalaali he bessan eqqida maccaseera attis.<sup>10</sup> I pude dhoqqu gidi maccaseekko, "Maccasete, asati aw bidonaa? Ne bolla pirddiday oonikka baawee?" yaagis.

<sup>11</sup> Maccasiya, "Godaw, oonikka baawa" yaagis.

Yesuusi zaaridi, "Taanikka ne bolla pirddiike. Ba; zaarada nagara oothofa" yaagis.

#### *Yesuusi alamiyas poo7o*

<sup>12</sup> Qassika Yesuusi asaakko, "Taani alamiyas poo7o. Tana kaalliya oonikka de7o immiya poo7uwa ekkanaappe attin dhuman simerettene" yaagidi odis.

<sup>13</sup> Farisaaweti, "Ne nebaa markkattasa, shin ne markkatethay tuma gidenna" yaagidosa.

<sup>14</sup> Yesuusi zaaridi, "Taani tabaa markkattikokka ta markkatethay tuma. Ays giikko, taani awuppe yidaakko qassi aw biyakko erays, shin hintte erekketa.<sup>15</sup> Hintte asa qofan pirddeeta; taani issi asa bollaka pirddiike.<sup>16</sup> Taani pirddiyabaa gidikkoka ta pirdday tuma. Ays giikko, tana kiittida ta Aaway taara de7eesippe attin taani tarkka de7ikke.<sup>17</sup> Nam77u asa markkatethi tuma gideyssi hintte higgiyan xaafettis.<sup>18</sup> Taani tabaa ta huu7en markkattays; qassi tana kiittida ta Aawaykka tabaa markkattees" yaagis.

<sup>19</sup> Entti, "Ne aaway awun de7ii?" yaagidi iya oyochchidosona.

Yesuusi zaaridi, "Hintte tana woykko ta Aawa erekketa. Tana eridabaa gidiyakko, hintte ta Aawakka eranashin" yaagis.

<sup>20</sup> Yesuusi Xoossa Keethan muxaata miishiya yeggyi saaxiney de7iya bessan hessa tamaarssis. Iya qammay burroo gakkiboonna gisho oonikka iya oykkibeenna.

<sup>21</sup> Qassika Yesuusi enttako, "Taani baana; hintte tana koyana, shin hintte atotethi demmonna hintte nagaran hayqqana. Taani biyasuwa baanaw hintte dandda7ekketa" yaagis.

<sup>22</sup> Ayhude halaqati, "I, 'Taani biyasuwa hintte baanaw dandda7ekketa' yaagees. I bana barkka wodhaneyye?" yaagidosona.

<sup>23</sup> Yesuusi zaaridi, "Hintte garssafe; taani bollafe. Hintte ha alamiyappe, taani ha alamiyappe gidikke.<sup>24</sup> Hintte atotethi demmonna hintte nagaran hayqqana gada taani hinttew odiday hessassa. TAANI TANA GIDEYSSA hintte ammanonna ixxiko hintte atotethi demmonna hintte nagaran hayqqana" yaagis.

<sup>25</sup> Entti, "Neeni oonee?" yaagidi oyochchidosona.

Yesuusi zaaridi, "Taani, koyroppe hinttew odida tana.<sup>26</sup> Taani hinttebaa odada pirddiabay darobay de7ees. Shin tana kiittidayssi tumanchcho; qassi taani iyappe si7idayssa xalaala alamiyas odays" yaagis.

<sup>27</sup> Yesuusi ba Aawabaa odehyssa entti akeekibookkona.<sup>28</sup> Hessa gisho, Yesuusi enttako, "Hintte Asa Na7aa pude dhoqqu oothiya wode TAANI TANA GIDEYSSA hintte erana. Qassika taani ta maatan aykkoka othonayssanne ta Aaway tana tamaarssidayssa odehyssa hintte erana.<sup>29</sup> Tana kiittidayssi taara de7ees. Taani ubba wode iya ufayssiyabaa oothiya gisho I tana ta xalaala aggibeenna" yaagis.

<sup>30</sup> Yesuusi hessa odishin si7ida daro asay iya ammanidosona.

#### *Nagara aylletethafe kessi*

<sup>31</sup> Yesuusi bana ammanida asatakko, "Hintte ta timirttiyas kiitettiko tuma tana kaalleyssata.<sup>32</sup> Hintte tumaa erana; tumaykka hinttena aylletethafe kessana" yaagis.

<sup>33</sup> Entti zaaridi, "Nuuni Abrahame sheeshi; nuuni ooddeskka aylletibookko. Neeni woygada, 'Hintte aylletethafe keyana' gay?" yaagidosona.

<sup>34</sup> Yesuusi zaaridi, "Taani hinttew tuma odays; nagara oothiya oonikka nagara aylle.<sup>35</sup> Aylley merinaw soo asaara deenna, shin na7ay merinaw soo asaara de7ees.<sup>36</sup> Na7ay hinttena aylletethafe kessiko hintte aylletethafe tuma keyana.<sup>37</sup> Hintte Abrahame sheeshi gideyssa taani erays. Shin ta qaalay hintte wozayan baynna gisho tana wodhanaw koy-eeta.<sup>38</sup> Taani ta Aaway tana bessidayssa odays, shin hintteka hintte aawappe si7idayssa ootheeta" yaagis.

<sup>39</sup> Entti zaaridi, "Nu aaway Abrahame" yaagidosona.

Yesuusi enttako, "Hintte Abrahame nayta gidiyakko I oothidayssa oothana.<sup>40</sup> Shin Xoosafe si7ida tumaa odida tana hintte wodhanaw koyeeta. Abrahamey hessada oothibeenna.

<sup>41</sup> Hinttee, hintte aaway oothidayssa ootheeta" yaagis.

Entti zaaridi, "Nuuni tuma Xoossaa nayta; nuus issi Aaway Xoossaa xalaali de7ees" yaagidosona.

<sup>42</sup> Yesuusi enttako, "Xoossay tuma hintte aawa gidiyakko hintte tana dosana; ays giikko, taani Xoossa matapppe yada hayssan de7ays. Tana I kiittispppe attin taani ta maatan yabiikke. <sup>43</sup> Taani geyssa hintte si7anaw koyonna gisho ta giyabay hinttew gelenna. <sup>44</sup> Hinttee, hintte aawa Xalahe nayta. Qassi hinttee, hintte aaway amottiyabaa oothanaw koyeeta. I koyroppe doomidi shempppo wodheyssa. Tumi iyan baynna gisho I tumaa ixxes. Worddoy iyaw medho gidida gishonne I worddo aawa gidiya gisho worddo odettishe baappe odettees. <sup>45</sup> Taani tuma haasayays, shin hintte tana ammanekketa. <sup>46</sup> Hintte, 'Neeni nagara oothishin ta be7as' gaanaw dandda7ey oonee? Taani tuma odettiabaa gidikko tana ays ammanekketii?' <sup>47</sup> Xoossaasi asi Xoossay giyabaa si7ees. Hintte Xoossaasi gidonna gisho Xoossay giyabaa si7ekketa" yaagis.

### *Yesuusi Abrahameppe sinthe*

<sup>48</sup> Ahyudeti zaaridi, "Neeni Samaare asi; nenan tuna ayyaanay de7ees' gishe likke gidokko?" yaagidosona.

<sup>49</sup> Yesuusi enttako "Ta bolla tuna ayyaanay de7eyssa nuuni ha77i erida. Abrahamey hayqis; nabetikka hayqqidosona. Shin neeni, 'Ta qaala naagiya oonikka hayqqenna' yaagasa. <sup>50</sup> Neeni hayqqida nu aawa Abrahameppe aadhdhayye? Nabetikka qassi hayqqidosona. Neeni nena oona gada qoppay?" yaagidosona.

<sup>52</sup> Ahyudeti zaaridi, "Ne bolla tuna ayyaanay de7eyssa nuuni ha77i erida. Abrahamey hayqis; nabetikka hayqqidosona. Shin neeni, 'Ta qaala naagiya oonikka hayqqenna' yaagasa. <sup>53</sup> Neeni hayqqida nu aawa Abrahameppe aadhdhayye? Nabetikka qassi hayqqidosona. Neeni nena oona gada qoppay?" yaagidosona.

<sup>54</sup> Yesuusi, "Taani tana bonchchiko ta bonchchoy hada. Hintte, 'Nu Xoossa' giya ta Aaway I tana bonchchees. <sup>55</sup> Hintte iya eronna ixixiko taani iya erays. Taani iya Erikke giikko hintte mela worddotays. Shin taani iya erays; qassi iya qaalaakkha naagays. <sup>56</sup> Hintte aaway Abrahamey ta yuussaa gallasa be7idi ufayttanaw amottis; be7idikka ufayttis" yaagis.

<sup>57</sup> Ahyudeti zaaridi, "Hari attoshin, new ishatamu laythi kumibeennashin waanada Abrahame be7as gay?" yaagidosona.

<sup>58</sup> Yesuusi enttako, "Taani hinttew tuma odays; Abrahamey yelettanaappe kase TAANI TANA" yaagis.

<sup>59</sup> Hessa gisho, entti Yesuusa caddanaw shuchchi ekkidosona. Shin Yesuusi enttafe geemmidi Xoossa Keethafe keyidi bis.

## 9

### *Yesuusi qooqe gididi yelettida addiya pathis*

<sup>1</sup> Yesuusi bishe yelettoosappe qooqe gididi de7iya issi addiya be7is. <sup>2</sup> Iya tamaareti, "Astamaariyaw, ha addey qooqe gididi yelettana mela nagara oothiday oonee? I oothideyye woykko iya yelidayssati oothidonaa?" yaagidi oychchidosona.

<sup>3</sup> Yesuusi, "Xoossa oosoy iya bolla qonccana melappe attin I woykko iya yelidayssati nagara oothida gisho gidenna. <sup>4</sup> Sa7i gallas de7ishin tana kiittidayssa oosuwa nu oothanaw bessees. Oonikka oothanaw dandda7onna qammay yees. <sup>5</sup> Taani alamiyan de7ashe alamiyas poo7o" yaagis.

<sup>6</sup> Yesuusi hessa gidi sa7an cuttis. Ba cuchchan guutha biitta laakothidi he urqqan qooqe addiya ayfiyaa tiysi. <sup>7</sup> Yaatidi, "Bada Salihoom (Salihoom guussay Kiitettidayssa guussu) giya tegettida haathan ne ayfiyaa meeccetta" yaagis. Hessa gisho, addey bidi ba ayfiyaa meeccettidi xeellise simmis.

<sup>8</sup> Addiya shoorotinne addey kase woossishin be7ida asay, "Hayssi uttidi woossiya addiya gidenneyye?" yaagidosona.

<sup>9</sup> Issi issi asay, "Hayssi iya" yaagidosona.

Harati qassi, "Akkay, hayssi iya daaneesippe attin iya giden" yaagidosona.

Shin addey, "Ee, tana" yaagis.

<sup>10</sup> Entti iyaakkko, "Yaatin ne ayfey waanidi xeellide?" yaagidi oychchidosona.

<sup>11</sup> I zaaridi, "Yesuusa giya addey guutha urqqa laakothidi ta ayfiyaa tiyidi, 'Salihoom bada ne ayfiyaa meeccetta' yaagin, taani bada meeccettada xeella aggas" yaagis.

<sup>12</sup> Entti iyaakkko, "I awun de7il?" yaagidi oychchidosona.

Addey, "Taani Erikke" yaagis.

### *Farisaawetii hanidabaa eranaw koyidosona*

<sup>13</sup> Entti kase qooqe, shin ha77i xeellida addiya Farisaawetakkoo efidosona. <sup>14</sup> Yesuusi urqqa laakothidi addiya ayfiyaa pathida gallasay Sambbaata gallas. <sup>15</sup> Hessa gisho, addey

waanidi xeellidaakkko Farisaaweti iya zaari oychchidosona. Addey enttako, "I ta ayfiyaan guutha urqqa tiyis. Ta ayfiyaa meegettada ha77i xeellays" yaagis.

<sup>16</sup> Farisaawetappe issoti issoti, "Hayssa oothida addey Sambbaata higgiya naagonna gisho Xoossa matappe yibeenha" yaagidosona.

Shin harati, "Nagaranchcho asi hayssa mela malaata waati oothanaw dandda7ii?" yaagidi bantta giddon shaakettidosona.

<sup>17</sup> Hessa gisho, Farisaaweti addiyako, "I ne ayfiyaa xeelisida gisho ne iyabaa woygay?" yaagidosona.

Addey, "I nabe" yaagis.

<sup>18</sup> Ayhude halaqati, iya aayiwunne aawa xeegidi oychchana gakkanaw, addey kase qooqe gididayssanne ha77i I xeelleyssa ammanibookkona. <sup>19</sup> Entti iya aayiwunne iya aawakko, "Hintte 'Qooqe gididi yelettis' giya hintte na7ay hayssee? Yaatin, ha77i waanidi xeellide?" yaagidi oychchidosona.

<sup>20</sup> Iya yelidayssati, "Hayssi nu na7aa gididayssanne qooqe gididi I yelettidayssa nu eroos.

<sup>21</sup> Shin ha77i I waanidi xeellidaakkko qassi iya ayfiyaa ooni pathidaakkko nuuni erokko.

Iya oychchite. I bana erida asi gidiya gisho babaa odanaw dandda7ees" yaagidosona.

<sup>22</sup> Iya yelidayssati hessa giday Ayhudetas yayyida gishossa. Ays giikko, Ayhudeti, Yesuusi I Kiristtoosa yaagidi markkattiya asi de7ikkko he uraa Ayhude Woosa Keethafe hilanaw koyrottidi zore qachchidosona. <sup>23</sup> Iya yelidayssati, "I bana erida asi; iya oychchite" yaagiday hessassa.

<sup>24</sup> Hessa gisho, qooqe gididi yelettida addiya entti zaari xeegidi, "Tumaa odanaw Xoossan caaqqa; ha addey nagaranchcho gideyssa nu eroos" yaagidosona.

<sup>25</sup> Addey zaaridi, "I nagaranchcho gidin, gidonna ixxin ta erikke. Taani qooqe gideyssanne ha77i xeelleyssa he issiba erays" yaagis.

<sup>26</sup> Entti zaaridi, "I new ay oothidee? I ne ayfiyaa waati pathidee?" yaagidosona.

<sup>27</sup> Ienttako, "Taani hinttew odas, shin si7ibekketa. Ays zaari si7anaw koyeetii? Hintteka iya tamaare gidanaw koyeetiiye?" yaagis.

<sup>28</sup> Entti iya cayidi, "Ne he uraa tamaare gida; nuuni Muse tamaare. <sup>29</sup> Xoossay Muses odidayssa nuuni eroos, shin ha uray I awuppe yidaakkoka nu erokko" yaagidosona.

<sup>30</sup> Addey enttako, "I awuppe yidaakkko hintte eronayssi malaalisyabaa, shin I ta ayfiyaa pathis. <sup>31</sup> Xoossaan bonchcheyssanne I koyabaa oothiya uraa Xoossay si7eesippe attin nagaranchchota si7enna. <sup>32</sup> Saloy sa7i medhettosappe qooqe gididi yelettida asa ayfe pathiday oonikka baawa. <sup>33</sup> Ha addey Xoosafe kiitettiboonnabaa gidiyakko issibaakkka oothanaw dandda7enna" yaagis.

<sup>34</sup> Entti zaaridi, "Neeni nagaran yelettada diccidayssi nuna tamarssanaw koyay?" yaagidosona. Iya Ayhude Woosa Keethafe hilidosona.

### *Wozana qooqetethi*

<sup>35</sup> Yesuusi entti addiya kessidayssa si7ida wode iya demmidi, "Asa Na7aa ammanay?" yaagidi oychchis.

<sup>36</sup> Addey Yesuusakkko, "Godaw, taani iya ammanana mela I oonee? Taw odarkkii?" yaagis.

<sup>37</sup> Yesuusi addiyako, "Neeni iya be7adasa; ha neera odetteyssi iya" yaagis.

<sup>38</sup> Addey zaaridi, "Godaw, ammanays" yaagidi Yesuusas goynnis.

<sup>39</sup> Yesuusi, "Qooqeti xeellana melanne xeelleyssati qooqana mela taani pirddanaw ha alamiya yas" yaagis.

<sup>40</sup> Iyara de7iya guutha Farisaaweti hessa si7idi, "Nu qooqeyye?" yaagidi oychchidosona.

<sup>41</sup> Yesuusi, "Hintte qooqe gidiyakko hinttew nagara gidenna. Shin ha77i hintte xeellos giya gisho hinttee, hintte nagaran de7eeta" yaagis.

## 10

### *Yesuusi lo77o henthanchcho*

<sup>1</sup> Yesuusi, "Taani hinttew tuma odays; dorssa girbbe giddo penggera gidonna hara-soora geliya oonikka kaysonne pangga. <sup>2</sup> Shin penggera geleyssi dorssata heemmeyeissa.

<sup>3</sup> Penggiya naageyssi iyaw penggiya dooyees; dorssatikka iya qaala si7oosona. I ba dorssata entta sunthan sunthan xeegees; entta kaalethidi kare kessees. <sup>4</sup> I bayssata kare kessidaappe guye entta sinthan hamuttees. Entti iya qaala eriya gisho iya kaalloosona.

<sup>5</sup> Hara uraa qaala entti eronna gisho iyappe baqatoosonappe attin iya geedo kaallookona" yaagis.

<sup>6</sup> Yesuusi enttaw ha leemisuwa odis, shin I ay gidaakkko entti akeekibookkona.

<sup>7</sup> Zaaridi Yesuusi enttako, "Taani hinttew tuma odays; taani dorssatas pengge. <sup>8</sup> Taappe sinthe yida ubbay kaysonne pangga, shin dorssati entta si7ibookkona. <sup>9</sup> Penggely tana; ta

baggara geliya oonikka attana. I ta baggara gelananne keyana; lo77o heemettiya bessi demmania. <sup>10</sup> Kaysoy kaysotanaw, shukkanawunne dhayssanaw yeesippe attin harabaas yeenna. Taani enttaw de7oy daana melanne kumidi palahana mela yas.

<sup>11</sup> “Taani lo77o henthanchcho; lo77o henthanchchoy ba dorssata gisho ba shemppuwa aathi immees. <sup>12</sup> Kera heemmiya asi dorssata godanne henthanchcho gidonna gisho suud-humey yaa wode be7idi dorssata aggidi bees. Hessa gisho, suudhumey dorssata oykkidi laallees. <sup>13</sup> Kera heemmeyssi miishes heemmiya gishonne dorssatabay iya qofisonna gisho dorssata aggidi baqatees.

<sup>14-15</sup> “Taani lo77o henthanchcho. Ta Aaway tana ereyssada taanikka ta Aawa erays. Hessadakka, taani ta dorssata erays; ta dorssatikka tana eroosona. Taani ta dorssata gisho ta shemppuwa aatha immays. <sup>16</sup> Ha wudiyen baynna hara dorssati taw de7oosona. Taani enttaka ehanaw bessees. Entti ta qaala si7ana; entti issi wude gidana; henthanchchoykka issuwa.

<sup>17</sup> “Taani ta shemppuwa aatha immada zaara ekkija gisho ta Aaway tana dosees. <sup>18</sup> Ta dosada ta shemppuwa aatha immaysippe attin taappe oonikka ekkenna. Ta ta shemppuwa aatha immanawunne zaara ekkanaw maati taw de7ees. Taani oothana mela ta Aaway tana kiittidayssi hayssa” yaagis.

<sup>19</sup> Hessa I gida gisho Ayhudeta giddon qassika shaaketethi medhettis. <sup>20</sup> Enttafe dariya baggay, “Iyan tuna ayyaani de7ees! I gooyees! I giyabaa ays si7eteet?” yaagidosona.

<sup>21</sup> Harati qassi, “Xalahey oykkida asi hayssada odettenna. Tuna ayyaani qooqe ayfe xeelisanaw dandda7iyye?” yaagidosona.

### *Yesuusi Asa Na7aa*

<sup>22</sup> Yerusalamen Xoossa Keetha anjjisida gallasata bonchchiya baaley gakkis; he wode sa7i balggo. <sup>23</sup> Yesuusi Xoossa Keethan Solomone baaranddan simerettees. <sup>24</sup> Ayhudeti Yesuusa yuushon shiiqi eqqidi, “Neeni nuna awude gakkanaw sidhera wothanee? Neeni Kiristootsa gidlikko ane nuus geeshshada oda” yaagidosona.

<sup>25</sup> Yesuusi zaaridi enttako, “Taani hinttew odas; shin tana ammanekketa. Taani ta Aaway taw immida maatan oothiya oosoy tabaa markkattees. <sup>26</sup> Shin taani hinttew odidayssada hintte ta dorsse gidonna gisho ammanekketa. <sup>27</sup> Ta dorssati ta qaala si7oosona. Taani entta erays; entti tana kaalloosona. <sup>28</sup> Taani enttaw merinaa de7uwa immays; entti ubbarakka dhayokkona. Oonikka ta kusheppe entta bonqi ekkanaw dandda7enna. <sup>29</sup> Entta taw immida ta Aaway ubbaafe aadhhees\* Oonikka ta Aawa kusheppe entta bonqi ekkanaw dandda7enna. <sup>30</sup> Tanne ta Aaway issino” yaagis.

<sup>31</sup> Ayhudeti Yesuusa caddanaw qassika shuchchi denthidosona. <sup>32</sup> Yesuusi enttako, “Taani oothana mela ta Aaway taw immida daro lo77o oosota hinttena ootha bessas. Hessatappae awussa gisho tana shuchchan caddanaw koyeetii?” yaagis.

<sup>33</sup> Ayhudeti zaaridi, “Nuuni nena ne lo77o ooso gisho shuchchan caddanaw koyokko. Shin neeni Xoossaa cayaa gishonne ase gidashe ne nena Xoosse giya gishossa” yaagidosona.

<sup>34</sup> Yesuusi zaaridi, “Geeshsha Maxaafan Xoossay, ‘Hintte xoossata’ gidayssi xaaftibeennne? <sup>35</sup> Geeshsha Maxaafay merinaw laamettenna. Xoossay ba qaala immida asata, ‘xoossata’ gidi xeezikko, <sup>36</sup> Aaway dooridi ha alamiya kiittida tana Xoossa Na7aa waattidi ‘Xoossaa cayaasa’ yaageetti? <sup>37</sup> Taani ta Aaway ootheyssa oothonha ixxiko tana ammanop-pite. <sup>38</sup> Shin taani oothiyabaa gidlikko hintte tana ammanonna ixxikokka, ta Aaway tanan de7eyssanne takka ta Aawan de7eyssa hintte erana mela ta oosuwa ammanite” yaagis.

<sup>39</sup> Qassika entti iya oykkana koyidosona, shin I enttafe kessi ekkis.

<sup>40</sup> Yohaannisi kase xammaqa iya bessaa, Yorddaanose Shaafappe hefintithi Yesuusi pinnidi yan de7is. <sup>41</sup> Daro asay Yesusakkoy idi, “Yohaannisi malaata oothibeenha, shin I ha addiyabaa odidabay ubbay tuma” yaagidosona. <sup>42</sup> Yan daro asay Yesuusa ammanidosona.

## 11

### *Alaazara hayquwa*

<sup>1</sup> Bitaaniya gutan Alaazara giya issi addey harggettis. Bitaaney Mayraamanne I michchiya Martta de7iya guta. <sup>2</sup> Mayraama Godaa tohuwa shitto tiyada ba binaanan iya tohuwa quchchidaaro. Harggettiday I ishia Alaazara. <sup>3</sup> Hessa gisho, michcheti, “Godaw, ne doseyssi harggettis” gidi Yesusakkoy kiittidosona.

---

<sup>10:14-15</sup> Maato 11:27; Luuqa 10:22      \* <sup>10:29</sup> Ta Aaway ubbaafe aadhhees: Issi issi beni maxaafati, “Ta Aaway taw immida entti ubbaafe aadhhoosona” yaagidosona.      <sup>10:33</sup> Leewe 24:16      <sup>10:34</sup> Maz 82:6      <sup>10:40</sup> Yoha 1:28

<sup>4</sup> Yesuusi hessa si7ida wode “Ha harggey, Xoossaynne iya Na7ay bonchchettana melappe attin hayqos gathiya hargge gidenna” yaagis.

<sup>5</sup> Yesuusi Martta, I michchiwunne Alaazara dosees. <sup>6</sup> Shin Alaazari harggidayssa Yesuusi si7idi ba de7iya bessan nam77u gallas gam77is. <sup>7</sup> Hessafe guye, Yesuusi ba tamaaretakko, “Zaaridi Yihuða biittaa boos” yaagis.

<sup>8</sup> Iya tamaareti zaaridi, “Asttamaariyaw, guutha wodeppe kase Ayhudeti nena shuchchan caddidi wodhanan koyidosona; ha77ika yaa baanee?” yaagidosona.

<sup>9</sup> Yesuusi, “Issi gallasan tammanne nam77u saatey de7ees gidenneyye? Gallas hamuttiya asi ha alamiya poo7uwa be7iya gisho dhubetteenna. <sup>10</sup> Shin qamma hamuttiya oonikka poo7oy baynna gisho dhubettees” yaagis. <sup>11</sup> Yesuusi hessa gidaappe guye enttako, “Nu dosiya Alaazari dhiskkis, shin iya denthanaw taani baana” yaagis.

<sup>12</sup> Iya tamaareti zaaridi, “Godaw, I dhiskkidabaa gidikko iyaw lo77ana” yaagidosona.

<sup>13</sup> Yesuusi Alaazari hayqqidayssa odís, shin enttaw coo dhiskko daanis. <sup>14</sup> Hessa gisho, Yesuusi geeshshidi enttako, “Alaazari hayqqis. <sup>15</sup> Hintte ammanana mela taani he bessan de7onnayssas hintte gisho ufayttays. Ane yedhdhite; iyaakko boos” yaagis.

<sup>16</sup> Hessafe guye, Didimoosa\* geetettiya Toomasiba lagge tamaaretakko, “Asttamaariyara hayqqanaw nukka boos” yaagis.

#### *Yesuusi denddonne de7o*

<sup>17</sup> Yesuusi gakkiya wode Alaazari moogettin oyddu gallas gidis. <sup>18</sup> Bitaaney Yerusalamekke heedzu kilo mitire mela haakkees. <sup>19</sup> Daro Ayhudeti Marttanne Mayraamo entta ishay hayqqidayssas minthethanaw yidosona.

<sup>20</sup> Martta Yesuusi yidayssa si7ada iya mokkanaw keyasu, shin Mayraama son attasu.

<sup>21</sup> Martta Yesuusakkko, “Godaw, neeni hayssan de7idabaa gidiyakko ta ishay hayqqenna.

<sup>22</sup> Shin ha77i gidikkoka neeni woossiyabaa Xoossay new immanayssa taani erays” yaga-gasu.

<sup>23</sup> Yesuusi, “Ne ishay hayqoppe denddana” yaagis.

<sup>24</sup> Martta iyaakko, “Wurssetha gallas I hayqoppe denddanayssa erays” yaagasu.

<sup>25</sup> Yesuusi iikko, “Taani denddonne de7o; tana ammaniya oonikka hayqqikokka de7on daana. <sup>26</sup> Qassi de7on de7eynne tana ammaniyyaa oonikka hayqqenna. Hessa neeni ammanay?” yaagis.

<sup>27</sup> Martta zaarada, “Godaw, ee taani ammanays! Neeni Xoossa Na7aa, alamiya yaanaw de7iya Kiristoosa gideyssa taani ammanays” yaagasu.

<sup>28</sup> Martta hessa gidaappe guye, boda ba michchiw geeman xeegada, “Asttamaarey yidi nena koyees” yaagasu. <sup>29</sup> Mayraama hessa si7ida wode elesa dendda eqqada Yesuusakkko basu. <sup>30</sup> He wode Yesuusi Marttara gaheettida bessan de7ees; buroo gutaa gakkibeenna. <sup>31</sup> Mayraamo minthethishe iira son de7iya Ayhudeti, iya denda eqqada ellesada kare keyidayssa be7idi, duufo boda yeekkanaw haniya daanin iyo kaallidi keyidosona.

<sup>32</sup> Mayraama Yesuusi de7iyasluu boda iya be7ida wode iya tohuwa bolla kunddada, “Godaw, neeni hayssan de7idabaa gidiyakko ta ishay hayqqennashin” yaagasu.

<sup>33</sup> Yesuusi Mayraamanne iira de7iya, Ayhudeti yeekkeyssa be7idi, ba wozanan daro seellettidi, <sup>34</sup> “Awun moogidetii?” yaagidi oychchin, “Godaw, yada be7a” yaagidi zaaridosona.

<sup>35</sup> Yesuusi afuxis. <sup>36</sup> Hessafe guye, Ayhudeti, “I Alaazara ay mela dosiyakko be7ite” yaagidosona.

<sup>37</sup> Shin enttafe issoti issoti, “Hayssi qooqiya xeelisidayssi ha addey hayqqonna mela oothanaw dandda7eneshin?” yaagidosona.

#### *Yesuusi Alaazara hayqoppe denthis*

<sup>38</sup> Qassika Yesuusi seellettidi, Alaazari moogettida duufuwa bis. He duufoy shuchchan gorddettida gonggolo. <sup>39</sup> Yesuusi, “Shuchchaa denthite” yaagidi kiittis.

Martta, “Godaw, I hayqqosappe oyddu gallas gidida gisho ha77i xinqqana” yaagasu.

<sup>40</sup> Yesuusi Marttako, “Ne ammaniyyabaa gidikko Xoossa bonchchuwa be7anayssa taani new odabiikkinaa?” yaagis. <sup>41</sup> Entti shuchchaa denthin Yesuusi salo pude xeellidi, “Aawaw, tana ne si7ida gisho nena galatays. <sup>42</sup> Ne ubba wode tana si7eyssa taani erays. Shin hayssan eqqida asay neeni tana kiittidayssa ammanana mela taani entta gisho hayssa gays” yaagis. <sup>43</sup> Yesuusi hessa gidaappe guye, ba qaala dhoqqu oothidi, “Alaazara, haa keyal!” yaagis. <sup>44</sup> Hayqqida addey ziidhettida mela kusheynne tohoy shalon qashettidi de7ishin iya ayfe karey goozettida mela duufuwappe keyis. Yesuusi entta, “Birshhite! Bo giile!” yaagis.

\* **11:16** Didimoosa: Guussay mentte guussu.

*Kiristtoosa bolla magettidosona  
(Maato 26:1-5; Mar 14:1-2; Luuqa 22:1-2)*

<sup>45</sup> Hessa gisho, Mayraamikko yida Ayhudetappe daroti Yesuusi oothidayssa be7idi iya ammanidosona. <sup>46</sup> Shin enttafe issoti issoti Farisaawetakko bidi Yesuusi oothidayssa enttaw odidosona. <sup>47</sup> Hessafe guye, kahine halaqatinne Farisaaweti shangguwa shiishidi, "Ha addey daro malaatata oothiya gisho nu ay oothinoo? <sup>48</sup> Nuuni iya si77i gidi aggiko asa ubbay iya ammanana. Qassi Roome biittaa asati yidi nu Xoossa Keethanne nu deriya dhayssana" yaagidosona.

<sup>49</sup> Enttafe issoy Qayyaafa geyssi, he laythi kahine halaqa gididayssi, "Hintte aykkoka erekketa! <sup>50</sup> Asay ubbay dhayeyssafe asa ubbaa gisho issi asi hayqqeyssi lo77o gideysssa erekketii?" yaagis. <sup>51</sup> I hessa baappe gibeenna. Shin he laythi kahine halaqa gidiya gisho Yesuusi Ayhude asaa gisho hayqqanaw besseyssa tinbbite odis. <sup>52</sup> Qassi Yesuusi Ayhude asaa xalaalas gidonnashin laalettidi de7iya Xoossaa asa ubbaa issife shiishanawunne issi asi oothanaw hayqqana.

<sup>53</sup> He gallasappe doomidi entti iya wodhanaw magettidosona. <sup>54</sup> Hessa gisho, Yesuusi Ayhudeta giddon qoncen simerettibeenna. Shin bazzo biitta matan de7iya Efreme gutaa bis. Ba tamaaretara he bessan gam77is.

<sup>55</sup> Ayhudeti bonchchiya Paasika gallasay matis. Qassi daro asay banttana geeshshanaw Paasika bonchchiya gallasay gakkanaappe sinthe he biittaafe Yerusalaame bidosona. <sup>56</sup> Entti Xoossa Keethan eqqidi Yesuusa yuussaa naagiya gisho "Ay qoppeetii? Yesuusi baaliya bonchchanaw yeenne?" yaagidi issoy issuwa oyckhidosona. <sup>57</sup> Kahine halaqatinne Farisaaweti Yesuusa oykkaw, I de7iyasuwa eriya oonikkka banntaw odana mela kiittidosona.

## 12

*Yesuusa shitto tiyida maccasiw  
(Maato 26:6-13; Mar 14:3-9)*

<sup>1</sup> Paasika bonchchiya gallasappe usuppun gallas sinthattidi, Yesuusi hayqoppe denthida Alaazari de7iya gutaa, Bitaaniya bis. <sup>2</sup> He bessan entti iyaw kaho giigisidosona. Alaazari Yesuusa issife gayta bolla uttidashin Martta enttana mokkawusu. <sup>3</sup> Mayraama narddoose giya daro al77o geeshsha shitto ehada Yesuusa tohuwa tiyasu. Ba binaanan iya tohuwa quchchus; keetha ubbay shitto sawon tongu gis.

<sup>4</sup> Shin Yesuusa tamaaretappe issoy, Yesuusa aathi immanayssi, Asqoroota Yihudi, <sup>5</sup> "Ays ha shittoy heedzu xeetu dinaaren bayzettidi, miishey manqotas imettenne?" yaagis. <sup>6</sup> I kayso gidida gisho hessa gisippe attin manqotas qadhettidi gibeenna. I miishe karxiita oykkeyssa gidiya gisho ubba wode iyapple baw ekkees.

<sup>7</sup> Yesuusi, "Iya baw de7iyabaa ta moogo gallasaas minnjida gisho iyo aggaagite. <sup>8</sup> Manqoti ubba wode hintteraa daana, shin taani ubba wode hintteraa de7ikke" yaagis.

<sup>9</sup> He wode daro asay Yesuusi Bitaaniyan de7eyssa si7idi yaa bidosona. Entti Yesuusa xalaala gidonnashin I hayqoppe denthida Alaazarakka be7anaw bidosona. <sup>10</sup> Hessa gisho, kahine halaqati Alaazarakka qassi wodhanaw magettidosona. <sup>11</sup> Ays giikko, Alaazara gaason daro Ayhudeti enttana ixxidi Yesuusa ammanaoosona.

*Yesuusi bonchchon Yerusalaame gelis  
(Maato 21:1-11; Mar 11:1-11; Luuqa 19:28-40)*

<sup>12</sup> Wonttetha gallas Paasika bonchchiya bessaa yida daro asay Yesuusi Yerusalaame beyssa si7idi, <sup>13</sup> Zambba haythi ekkidi iya mokkanaw keyidosona. Bantta qaala dhoquu oothidi,

"Hosaana! Xoossay galatetto!

Godaa sunthan yeyssi anijetto!

Xoossay Isra7elee Kauwuwa anjjo!"

yaagidosona.

<sup>14-15</sup> Geeshsha Maxaafan,

"Xiyoone katamaw, babbofa!

Hekko, ne Kawoy hare mara bolla uttidi yees"

geetettidayssada Yesuusi hare mari demmadi iya toggis.

<sup>16</sup> Yesuusi tamaaretti hessa kase akekibookkona. Shin Yesuusi bonchchettidaappe guye entti hessa ubbaa akekidosona. Hessi ubbay Geeshsha Maxaafay gidayssada hanis.

<sup>17</sup> Yesuusi Alaazara duufoppe xeegidi, hayqoppe denthida wode iyara de7iya daro asay Yesuusabaa markkattidosona. <sup>18</sup> Daro asay iya mokkanaw keyiday, I he malaatata

oothidaysssa si7ida gishossa. <sup>19</sup> Hessa gisho, Farisaaweti issoy issuwako, “Nu aykkoka oothanaw dandda7onnayssa be7ite; dere ubbay iya kaalles” yaagidosona.

<sup>20</sup> Paasika bonchchiya gallas goynnanaaw Yerusalaame bidayssata giddon issi issi Girike asati de7oosona. <sup>21</sup> Entti Galiila biittan Beetesayda katamaappe yida Filphoosakko bidi, “Godaw, nuuni Yesuusa be7anaw koyoos” yaagidi woossidosona. <sup>22</sup> Filphoosi bidi Ind-diriyasas odin nam77ay bidi, Yesuusas odidosona.

<sup>23</sup> Yesuusi enttako, “Asa Na7ay, bonchchettiya wodey gakkis. <sup>24</sup> Taani hinttew tuma odays; issi giste ayfey biittan wodhdhidi wooqonna ixxiko barkka attees. Shin he giste ayfey wooqiko daro ayfe ayfes. <sup>25</sup> Ba shemppuwa dosiya oonikka dhaysses; ba shemppuwa ha alamiyan ixxiya oonikka merinnaa de7os ashshees. <sup>26</sup> Taani de7iyasawan taara daana mela taw oothanaw koyaa oonikka tana kaallanaw bessees. Taw oothiya oonakka ta Aaway bonchchana.

### *Yesuusi ba hayquwaba sinthattidi odis*

<sup>27</sup> “Ha77i ta shemppoy daro un7ettis; yaatin woygo? ‘Ta Aawaw, tana ha saateppe ashsharkki’ yaago? Akkay, taani yiday waaye ekkanaassa. <sup>28</sup> Ta Aawaw, ne sunthaa bonchcha” yaagis.

He wode saloppe, “Taani ta sunthaa bonchchas; zaaradakka bonchchana” yaagiya qaalay yis.

<sup>29</sup> He bessan eqqida daro asay he qaala si7idi, “Hessi dada” yaagidosona.

Harati qassi, “Kiitanchchoy iyaw odis” yaagidosona.

<sup>30</sup> Yesuusi zaaridi enttako, “Ha qaalay hintte gisho yisippe attin ta gisho gidenna. <sup>31</sup> Ha alamey pirddeytta wodey ha77i; ha alamiya haareyssi ha77i kare holettana. <sup>32</sup> Qassi taani sa7appe dhoqqu oosettida wode asa ubbaa taakko ehana” yaagis. <sup>33</sup> I hessa giday ay mela hayqo hayqqaneekko enttaw qonccisanassa.

<sup>34</sup> Daro asay zaaridi, “Nu higgey Kiristtoosi merinaw de7eyssa odee. Yaatin, neeni woygada, ‘Asa Na7ay dhoqqu gaanaw bessees’ gay? ‘I, Asa Na7ay oonee?’” yaagidosona.

<sup>35</sup> Yesuusi, “Poo7oy hinttera guutha wode gam77ana. Hinttew dhumonna mela poo7oy de7ishin, poo7uwam hamuttite. Dhuman hamuttiya asi aw biyakko erenna. <sup>36</sup> Poo7o nayta gidana mela poo7oy de7ishin poo7uwa ammanite” yaagis.

### *Ayhudeti ammanibookkona*

Yesuusi hessa odidaappe guye bidi enttafe geemmisi. <sup>37</sup> I hessa mela malaatata entta sinthan oothinkka ammanibookkona. <sup>38</sup> Nabiya Isayaasi,

“Godaw, nu markkatethaa ooni ammanidee?”

Goday ba wolqqa ooddes qonccisidee?”

Gidayssi tuma gidana mela entti iya ammanibookkona.

<sup>39-40</sup> Qassika Isayaasi,

“Entta ayfey xeellonna mela,

entta wozanay akekonna mela,

entti Xoossaakko simmin, I entta pathonha mela,

Xoossay entta ayfiyaa qooqisis.

Entta wozanaa minthis”

gida gisho entti ammananaw dandda7ibookkona.

<sup>41</sup> Isayaasi hessa giday, Yesuusa bonchchuwa be7ida gishonne iyabaa odida gishossa.

<sup>42</sup> Gidikkoka, Ayhudeta halaqatappekka daroti Yesuusa ammanidosona. Shin Farisaaweti banttana Ayhudeta Woosa Keethafe kessoosona gidi yayyida gisho ammanida gidi qoncen markkattibookkona. <sup>43</sup> Hessa entti oothiday, Xoossan erettanayssafe aathidi asan erettanaysssa dosida gishossa.

<sup>44</sup> Yesuusi ba qaala dhoqqu oothidi, “Tana ammankiyyaa oonikka tana kiiittidaysaka ammaneespe attin ta xalaala ammanenna. <sup>45</sup> Tana be7iya oonikka tana kiiittidaysaka be7ees. <sup>46</sup> Tana ammankiyyaa ubbay dhuman doonna mela taani poo7o gidada alamiya yas. <sup>47</sup> Ta qaala si7idi kietettonna oonakka taani pirddiike. Ays giikko, taani alamiya ashshanaw yasippe attin pirddanaw yabilikke. <sup>48</sup> Tana ixxyeyssanne ta qaala ekkonna oonakka pirddeyssi de7ees. Taani odida qaalay wurssetha gallas he uraa pirddana.

<sup>49</sup> Ays giikko, taani hessa taappe odikke, shin tana kiiittida ta Aaway taani gaanayssanne odanaysssa kiiittis. <sup>50</sup> Qassi iya kiiay merinnaa de7o gideyssa taani erays. Hessa gisho, taani odehyssi ta Aaway tana oda gidayssa” yaagis.

## 13

*Yesuusi ba tamaareta tohuwa meeccis*

<sup>1</sup> Paasika bonchchiya gallasay gakkanaappe sinthattidi ha alamiya aggidi Aawakkko biya wodey gakkidaysa Yesuusi eris. Ha alamiyan de7iya bayssata ubba wode dosis; wurssethi gakkanaawukka entta dosis.

<sup>2</sup> Yesuusaranne iya tamaaretara issife kaho moosona. Hessafe kase Xalahey Simoona na7aa Asqoroota Yihudi Yesuusa aathi immanaada iya wozanan iita qofa wothis. <sup>3</sup> Yesuusi Aaway ubbabaa iya kushen wothidayssa, IXoossa matapape yidayssanne simmidi iyaakko baanayssa eris. <sup>4</sup> Yesuusi gaytaa bollaate denddidi bolla bagga ma7uwa qaari wothidi, pooxa ekkidi ba xeessan marxxafis. <sup>5</sup> Hessafe guye, haathee meechcha miishen tigidi, ba tamaareta tohuwa meeccis; qassi ba xeessan dancilda poojan quchchis.

<sup>6</sup> Yesuusi Simoon Phexiroosakko yaa wode Phexiroosi, “Godaw, ne ta tohuwa meeccanee?” yaagis.

<sup>7</sup> Yesuusi zaaridi iyaakko, “Taani ootheyssa ne ha77i erakka, shin guyeppe akeekana” yaagis.

<sup>8</sup> Yaatin, Phexiroosi, “Ne ta tohuwa ubbarakka meeccka” yaagis.

Yesuusi iyaakko, “Taani ne tohuwa meeconna ixxiko newunne taw issifetethi baawa” yaagis.

<sup>9</sup> Phexiroosi Yesuusakko, “Godaw, yaatikko, ta tohuwa xalaala gidonnashin ta kushiyanne ta huu7iya meecca” yaagis.

<sup>10</sup> Yesuusi zaaridi, “Bolla meecettida oonikka tohoppe harabaa meecettanaw koshshenna; iyaw ubbasoy geeshshi. Hintte geeshshi, shin ubbay geeshshi gidekketa” yaagis. <sup>11</sup> Yesuusi bana aathi immana uray ooneekko eriya gisho “Hintte ubbay geeshshi gidekketa” yaagis.

<sup>12</sup> Entta tohuwa meecidaappe guye Yesuusi ba ma7uwa zaari ma77is. Simmi gaytaa bolla uttidi enttako, “Taani hinttew oothidayssa akeekeetii? <sup>13</sup> Hintte tana asttamaarenne Goda geeta; taani hintte geyssa gidiya gisho lo77o gideta. <sup>14</sup> Taani hinttew Godanne asttamaare gidashe hintte tohuwa meecikkio hintteka issoy issuwas hessada oothanaw bessees. <sup>15</sup> Hiza, taani hinttew oothidayssada hintteka oothana mela hinttew leemiso gidas. <sup>16</sup> Taani hinttew tuma odays; aylley ba godaappe, kiittidayssi kiittidayssafe aadhdhenna. <sup>17</sup> Hintte hessa eridi oothiyabaa gidiikko anjettidayssata.

<sup>18</sup> “Taani hinttena ubbaa giikke; taani dooridayssata erays. Shin Geeshsha Maxaafan, ‘Ta barssidayssi ta kushiya saxis’ geetettidayssi tuma gidanaw bessees. <sup>19</sup> TAANI TANA GIDEYSSA hintte ammanana mela hessi hananaappe sinthatada hinttew odays. <sup>20</sup> Taani hinttew tuma odays; taani kiittida oonakka mokkiya uray tana mokkees. Tana mokkiya oonikka tana kiittidaysssa mokkees” yaagis.

*Yesuusi bana aathi immanay ooneekko koyrottidi odis*

(*Maato 26:20-25; Mar 14:17-21; Luuqa 22:21-23*)

<sup>21</sup> Yesuusi hessa odidaappe guye ba wozanan daro un77ettidi, “Taani hinttew tuma odays; tana hinttew issoy aathi immana” gidi qoncicidi odis.

<sup>22</sup> I ooddeebaa odiyakko iya tamaaretas erettona ixxin issoy issuwa xeellidosona. <sup>23</sup> Iya tamaaretappe issoy, Yesuusi doseyssi, Yesuusa matan uttis. <sup>24</sup> Hessa gisho, Simoon Phexiroosi iya qam77ottidi, “I oona giyakko ane oychcha” yaagis.

<sup>25</sup> Hessa gisho, he tamaarey Yesuusakko shiiqidi haythan, “Godaw, I oonee?” yaagis.

<sup>26</sup> Yesuusi zaaridi, “Taani uythaan woxen tushada barsseyssa” yaagis. Qassi uythaan menthi ekkidi, woxen tushidi, Simoona na7aa Asqoroota Yihuda barssis. <sup>27</sup> Yihudi uythaan baaridaappe guye Xalahey sohuwara Yihudan gelis. Yesuusi iyaakko, “Neeni oothanaw qoppidabaa ellesada ootha” yaagis. <sup>28</sup> Shin gaytaa bolla uttidayssatappe oonikka Yesuusi hessa ays iyaakko gidaakko eribeenna. <sup>29</sup> Yihudi muishe oykkiya gisho iya tamaaretappe issoti issoti Yesuusi iya, “Paasika bonchchiya gallasaas banntaw koshshiyabaa shamma woykko manqotas muxaata imma gis” yaagidi qoppidosona.

<sup>30</sup> Yihudi uythaan baarida mela sohuwara kare keyis. He wode sa7i qamma.

*Oratha kiitaa*

<sup>31</sup> Yihudi kare keyidaappe guye, Yesuusi, “Ha77i Asa Na7ay bonchchettis; Xoossaykka iya baggara bonchchettis. <sup>32</sup> Xoossay iya baggara bonchchetiko I ba huu7en Asa Na7aa bonchchhana; qassi I hessa ellesidi oothana. <sup>33</sup> Ta nayto, taani hinttew daro wode gam77ike. Hintte tana koyana, shin taani Ayhudetas odidayssa mela, ‘Hintte taani biyasuwa baanaw dandda7ekketa.’ <sup>34</sup> Taani hinttew immiya oratha kiitay hayssa; issoy issuwa dosite.

Taani hinttena dosidayssada hintte issoy issuwa dosanaw bessees.<sup>35</sup> Hintte issoy issuwara dosettiko hintte ta tamaare gideyssa asa ubbay erana” yaagis.

*Phexiroosi kaddanayssa Yesuusi koyrottidi odis  
(Maato 26:31-35; Mar 14:27-31; Luuqa 22:31-34)*

<sup>36</sup> Simoon Phexiroosi Yesuusakko, “Godaw, neeni aw bay?” yaagis.

Yesuusi zaaridi, “Taani biyasuwa neeni ha77i kaallanaw dandda7akka, shin guyeppe tana kaallana” yaagis.

<sup>37</sup> Phexiroosi, “Godaw, taani nena ha77i kaallanaw ays dandda7ikkinaa? Taani ne gisho hayqqanawukka giiga uttas” yaagis.

<sup>38</sup> Yesuusi zaaridi, “Ta gisho hayqqanaw tuma giiga uttadii? Taani new tuma odays; kutttoy waassanaappe sinthe neeni tana heedzu toho kaddana” yaagis.

## 14

*Yesuusi Aawakko efiya oge*

<sup>1</sup> Yesuusi ba tamaaretakko, “Hintte wozanay un77ettofo, Xoossaam ammanite, tanakka ammanite. <sup>2</sup> Ta Aawa keethan daro bessi de7ees. Taani hinttew besse giigisanaw bays. Hessa gidonnaako taani hinttew odikkeshin. <sup>3</sup> Taani bada besse giigisidaappe guye taani de7iyaswan hintte daana mela simma yada hinttena taakko efana. <sup>4</sup> Hintte taani biyasuwa efya ogiya ereeta” yaagis.

<sup>5</sup> Yaatin, Toomasi, “Godaw, neeni biyasuwa nuuni erokko; ogiya waattidi eranaw dandda7anee” yaagis.

<sup>6</sup> Yesuusi zaaridi, “Ogey, tumaynne de7oy tana. Ta baggara gidonna ixxiko oonikka ta Aawakko baanaw dandda7enna. <sup>7</sup> Hintte tana eriyabaa gidiyakko, ta Aawakka erana. Shin hizappe doomidi hintte iya ereetanne iya be7ideta” yaagis.

<sup>8</sup> Filphoosi Yesuusakko, “Godaw, Aawa nuna bessa; hessi nuus gidana” yaagis.

<sup>9</sup> Yesuusi zaaridi, “Taani hayssa mela wode hintter de7inkka tana erikkii? Tana be7ida uray Aawakka be7is. Yaatin, neeni woygada, ‘Aawa nuna bessa’ gay? <sup>10</sup> Taani Aawara issino gideyssanne Aawaykka taara issino gideyssa neeni ammanikkiiye? Taani hinttew odiya qaala taani taappe odikke, shin tanan de7iya Aaway ba oosuwa oothees. <sup>11</sup> Taani Aawan de7eyssanne Aawaykka tahan de7eyssa ammanite. Hessa ammanonna ixxiko ta oothiyabatan tana ammanite.

<sup>12</sup> “Taani hinttew tuma odays; tana ammaniyyaa uray taani oothiya oosuwappe aadhdiya ooso oothana. Taani Aawakko biya gisho tana ammaniyyaa oonikka hayssafe aadhdiya ooso oothana. <sup>13</sup> Aaway Na7aa baggara bonchettana mela ta sunthan hintte woossiya ubbaa ta hinttew oothana. <sup>14</sup> Ta sunthan aybibaakka hintte oychchikoo ta hinttew oothana.

*Yesuusi Geeshsha Ayyaana immanaw qaala gelis*

<sup>15</sup> “Hintte tana dosikko ta kiitaa naagana. <sup>16</sup> Taani Aawa woossana; hintter merinaw daana mela minthetheyssa hinttew immana. <sup>17</sup> He Ayyaanay Xoossaumumaa qonccisees. Ha alamiya asay iya be7onna gishonne eronna gisho iya ekkanaw dandda7okkona. Shin I hintter de7iya gishonne hintte giddon daana gisho hintte iye ereeta.

<sup>18</sup> “Taani hinttena aaya aawu baynna na7ada hintte xalaala aggike; simmada hintteko yaana. <sup>19</sup> Guutha wodeuppe guye alamey tana zaari be7enna, shin hintte be7ana. Taani de7on de7iya gisho hintteka de7on de7ana. <sup>20</sup> Taani ta Aawan, hintte tanan, qassi taani hinttenan de7eyssa hintte he gallas erana.

<sup>21</sup> “Ta kiitaa ekkidi naagey tana dosees. Tana doseyssa ta Aawaykka dosees; taanikka iya dosays; taani iyaw qonccana” yaagis.

<sup>22</sup> Asqoroota Yihuda gidonna Yihudi Yesuusakko, “Godaw, neeni waatada alamiyas gidonnashin nuus nena qonccisanee?” yaagis.

<sup>23</sup> Yesuusi zaaridi, “Tana dosiya oonikka ta qaalas kiittettana. Ta Aaway iya dosana. Qassi ta Aawaynne taani iyaakkoo yidi iyara daana. <sup>24</sup> Tana dosonna oonikka ta qaalas kiittettenna. Hintte si7iya qaalay tana kiittida Aawabaape attin tabaa gidenna.

<sup>25</sup> “Taani hintter ha77i de7ashe hessa hinttew odas. <sup>26</sup> Shin Aaway ta sunthan kiittana minthethiya Geeshsha Ayyaanay, hinttena ubbabaa tamaarssana. Taani hinttew odida ubbaa I hinttena hassayisana.

<sup>27</sup> “Sarotethi hinttew immana. Taani ta sarotethaa hinttew immana. Ta immiya sarotethay alamey immiya sarotethaa mela gidenna. Hessa gisho, un77ettofite, yayyofite.

<sup>28</sup> ‘Taani baana, shin simmada hintteko yaana’ gidayssa si7ideta. Hintte tana tuma

dosiyabaa gidiyakko ta Aaway taappe aadhdhiya gisho taani iyaakkko beyssan hintte ufaytana. <sup>29</sup> Hessi haniya wode hintte ammanana mela hessi hanonna de7ishin sinthatada taani hinttew odas.

<sup>30</sup> “Ha alamiya haareyssi yaa gisho hizappe guye hintterta daro odettike. Tana I aykkoka oothanaw dandda7enna. <sup>31</sup> Shin taani Aawa doseyssa alamey erana mela ta Aaway tana kiittidayssa ubbaa oothays. Denddite; hayssafe boos.

## 15

### *Woyniya tuma ubbay Yesuusa*

<sup>1</sup> “Taani woyniya tuma ubbaa. Goshshanchchoy ta Aawa. <sup>2</sup> Ta bolla de7iya ayfe ayfonna tashiya ubbaa I karees. Ayfiyaa tashiya kaseyssafe aadhdhi ayfana mela he tashiya I giigisana. <sup>3</sup> Taani hinttew odida qaala gisho hintte geeshshi. <sup>4</sup> Tanan de7ite; taanikka hinttenan de7ana. Woyniya tashey ubbaara de7onna ixxiko he tashey barkka ayfe ayfanaw dandda7enna. Hessadakka, hintteka tanan de7onna ixxiko ayfe ayfanaw dandda7ekketa.

<sup>5</sup> “Taani woyniya ubbaa; hintte tasheta. Tanan de7eysinne taani iyan de7eyssi, I daro ayfe ayfana. Ta baynna hintte xalaala aykkoka oothanaw dandda7ekketa. <sup>6</sup> Tanan doonna uray tasheda karen yegittidi melana. Hessa mela tasheti shiiqidi taman yeggettana, xuugettana. <sup>7</sup> Hintte tanan de7ikkoo, ta qaalaykka hinttenan de7ikkoo, hintte koyabay aybaa gidikkoka woossite; hintte ekkana. <sup>8</sup> Hintte daro ayfe ayfiyaa ta tamaare gidikkoo, hessian ta Aaway bonchchettana. <sup>9</sup> Aaway tana doseyssada taanikka hinttena dosays; ta siiquwan de7ite. <sup>10</sup> Taani ta Aawa kitaa naagada iya siiquwan de7idayssada hintteka ta kiitaa naagikko ta siiquwan daana.

<sup>11</sup> “Ta ufayssay hinttenan gidana melanne hintte ufayssay polo gidana mela taani hinttew hessa odas. <sup>12</sup> Ta kiitay hayssa; taani hinttena dosidayssada hintteka issoy issuwa dosite. <sup>13</sup> Ba shemppuwa ba laggiyas aathidi immeyssafe aadhdhiya gita siiqoy baawa. <sup>14</sup> Taani hinttena kiittidaba ubbaa oothiko hintte dosettidayssata.

<sup>15</sup> “Aylley ba goday oothiyabaa eronna gisho taani hinttena hizappe guye aylleta giikke. Shin ta Aawappe si7ida ubbaa taani hinttew odida gisho hinttena dosettidayssata gas. <sup>16</sup> Taani hinttena doorasippe attin hintte tana dooribekketa. Hintte bidi dhayonna ayfe ayfana mela taani hinttew shuumas. Yaanikko ta Aaway hintte ta sunthan woossidaba ubbaa immana. <sup>17</sup> Ta kiitay hayssa: issoy issuwa dosite.

### *Yesuusi alamey ixxanayssa odis*

<sup>18</sup> “Alamey hinttena ixxiko koyrottidi tana ixxidayssa akekite. <sup>19</sup> Hintte alamiyabaa gidiyakko alamey babaada hinttina dosana. Shin taani hinttena alameppe doorida gishonne hintte alamiyabaa gidonna gisho alamey hinttena ixxees. <sup>20</sup> ‘Aylley ba godaappe aadhdhenna’ gada taani hinttew odidayssa akekite. Entti tana gooddidabaa gidikkoo hinttenakka gooddana. Entti ta qaala naagidabaa gidikkoo hintte qaalaakkka naagana. <sup>21</sup> Shin entti tana kiittidayssa eronna gisho ha ubbaa ta gaason hintte bolla oothana. <sup>22</sup> Taani yada odonnabaa gidiyakko enttaw nagara gidenna. Shin ha77i entti oothida nagaraas gaasoyabay baawa. <sup>23</sup> Tana ixxeyssi ta Aawakka ixxees. <sup>24</sup> Oonikka oothiboonna ooso ta entta giddon oothaboonnabaa gidiyakko enttaw nagara gidonna attana. Shin ha77i entti taani oothida oosuwa be7idi tanakka ta Aawakka ixxidosona. <sup>25</sup> Shin entta higgyan, ‘Tana coo ixxidosona’ geetettidi xaafettidayssi polettana mela hessi hanis.

<sup>26</sup> “Aawappe yaa tumaa qonccisiya Ayyaana ta hinttew kiittana. I hinttena minthethana, tabaa markkattana. <sup>27</sup> Hintteka koyroppe doomidi taara de7iya gisho tabaa markkattana.

## 16

<sup>1</sup> “Taani hessa hintte ammanoy dhayonna mela hinttew odas. <sup>2</sup> Entti hinttena Ayhude Woosa Keethatappé kessi yeddana. Hessadakka, hinttina wodhiya oonikka Xoossi koyabaa oothiya daaniya wodey yaana. <sup>3</sup> Entti hessa hintte bolla oothey tana woykko Aawa eronna gishossa. <sup>4</sup> Shin entti hessa hintte bolla oothiya wodey gakkiya wode taani hinttew odididayssa hintte akekana mela taani hinttew hayssaa odas.

### *Geeshsha Ayyaana oosuwa*

“Sinthatada taani hayssaa hinttew odonna gam77iday ta hintterta de7iya gishossa. <sup>5</sup> Shin ha77i taani tana kiittidayssaka bays; hintte oonikka, ‘Awu bay?’ gidi tana oychchey baawa. <sup>6</sup> Shin taani hessa odida gisho hintte wozanan daro azzanoy de7ees. <sup>7</sup> Shin taani hinttew tuma odays; taani biikkoo hinttew lo77o. Ays giikko, taani boonna ixxiko

minthetheyssi hintteko yeenna. Shin taani biikko iya hintteko yeddana. <sup>8</sup> Minthetheyssi yidi, nagarabaa, xillotethabaanne pirddabaa ha alamiya asaa erisana. <sup>9</sup> Nagarabay, asay tana ammanonna gishossa. <sup>10</sup> Xillotethabay, taani Aawakko biya gishonne hintte tana zaari be7onna gishossa. <sup>11</sup> Pirddabay, qassi alamiya haareyssi pirddettida gishossa.

<sup>12</sup> "Taani hinttew odiyabay darobay de7ees, shin ha77i hinttew gelenna. <sup>13</sup> Tuma Ayyaanay yaa wode hinttenu tumatetha ubbaako kaalethana. I si7idabaa odeesippe attin baappe aybibaakkha odenna. Qassi sinthafe yaanabaa hinttew I odana. <sup>14</sup> I taw de7eyssafe ekkidi hinttew odiya gisho I tana bonchhana. <sup>15</sup> Aawas de7iyaba ubbay tabaa; 'Minthetheyssi taw de7eyssafe ekkidi hinttew odana' taani giday hessassa.

### *Hintte azzanoy ufayssan laamettana*

<sup>16</sup> "Guutha wodeppe guye tana be7ekketa; qassi guutha wodeppe guye hintte tana be7ana" yaagis.

<sup>17</sup> Iya tamaaretappe issoti issoti bantta giddon, "Guutha wodeppe guye hintte tana be7ekketa; qassi guutha wodeppe guye hintte tana be7ana; qassika taani Aawakko bays guussay woy guussee?" yaagidosona. <sup>18</sup> "Guutha wodeppe guye geyssi woy guussee? I ay odettiya nuus erettenna" yaagidosona.

<sup>19</sup> Entti bana oychchanaw koyeyssa Yesuusi eridi, "Taani, 'Guutha wodeppe guye tana be7ekketa; qassi guutha wodeppe guye hintte tana be7ana' gidayssas hintte issyo issuu oychcheetii?" <sup>20</sup> Taani hinttew tuma odays; hintte yekkananne afuxana, shin ha alamey ufayttana. Ha77i hintte azzanana, shin hintte azzanoy ufayssan laamettana. <sup>21</sup> Issi maccasiya na7a yelana haniya wode ba yelo wodey gakkida gisho hirggawusu. Shin na7a yelidaappe guye na7i ha alamiyan yelettida ufayssaa gisho ba un77aa dogawusu. <sup>22</sup> Hessadakka, hintteka hintte wozanan azzaneeta, shin taani hinttenu zaarada be7ana. Hintte wozanay daro ufayttana; he ufayssaa oonikka hinttefe ekkenna.

<sup>23</sup> "He gallas hintte tana aybibaakkha woosseketa. Taani hinttew tuma odays; hintte ta sunthan woossiyabaa ubbaa Aaway hinttew immana. <sup>24</sup> Ha77i gakkanaw ta sunthan aybibaakkha woossibekketa. Hintte ufayssay polo gidana mela Xoossa woossite; hintte ekkana.

<sup>25</sup> "Taani ha77i gakkanaw hinttew leemison odas, hizappe taani leemison odonna wodey yaana. Shin Aawabaa taani hinttew qoncen odana. <sup>26</sup> He gallas hintte ta sunthan Aawa woossana; hintte gisho taani Aawa woossike. <sup>27</sup> Ays giikko, Aaway ba huu7en hinttenu dosees. Hintte tana dosiya gishonne taani Aawa matappe yidayssa ammanida gisho I hinttenu dosees. <sup>28</sup> Taani Aawa matappe ha alamiya yas; qassi alamiya aggada Aawakko baana" yaagis.

<sup>29</sup> Iya tamaaretai zaaridi, "Hekko, ha77i neeni qonccen odaasa; leemison aykkoka odakka. <sup>30</sup> Neeni ubbabaa ereyssa nuuni ha77i eroos; qassi nena oonikka oychchana mela neeni koyakka. Hessi nuna neeni Xoossafe kiiettidayssa ammanthees" yaagidosona.

<sup>31</sup> Yaatin, Yesuusi zaaridi enttako, "Ha77i ammaneeti?" <sup>32</sup> Hekko, hinttee, hintte soo hintte soo laalettiya wodeynne ta xalaala yeggi aggidi baqatiya wodey yaana; ha77ika yikichchis. Shin Aaway taara de7iya gisho ta ta xalaala gidikke. <sup>33</sup> Hintte taara de7ishe saroy hinttew daana mela taani hessa odas. Alamen de7ishe hintte waayettana. Shin minnite; taani alamiya xoonas" yaagis.

## 17

### *Yesuusa woosaa*

<sup>1</sup> Yesuusi hessa odidaappe guye pude salo xeellidi, hayssada yaagis: "Aawaw, saatey gakkis; ne Na7ay nena bonchhana mela neeni ne Na7aa bonchcha. <sup>2</sup> Neeni iyaw immida ubbaa I merinaa de7uwa immana mela asa ubbaa bolla iyaw maata immadasa. <sup>3</sup> Merinaa de7oy, nena, issi tuma Xoossaanne ne kiittida Yesuus Kiristtoosa ero. <sup>4</sup> Neeni ta oothana mela immida oosuwa polada nena sa7an bonchchas. <sup>5</sup> Ha77ika, Aawaw, alamey medhettanaappe sinthe ne matan taw de7iya bonchchwan tana bonchcha.

<sup>6</sup> "Alamiya asaappe neeni taw immidayssata nena erisas. Entti neyssata; neeni entta taw immidasa. Entti ne qaalaskka kiiettidosona. <sup>7</sup> Neeni taw immidida ubbabay neeppe yidayssa entti ha77i eroosona. <sup>8</sup> Neeni taw immidida qaalaa taani enttaw immas; enttika he qaala ekkidosona. Taani ne matappe yidayssi tuma gideyssa eridi neeni tana kiittdaysaka ammanidosona.

<sup>9</sup> "Taani enttaw woossays. Entti neyssata gidiya gisho neeni taw immidida asaas woossaysippe attin alamiyas woossike. <sup>10</sup> Taw de7iya ubbabay nebaa; new de7iya ubbayka tabaa. Taani entta baggara bonchchettas. <sup>11</sup> Taani hizappe guye alamen de7ikke; entti alamen de7oosona. Taani ha77i neekko bays. Geeshsha Aawaw, ha neeni taw immidayssati neeranne taara issino gididayssada entti issino gidaya mela entta ne taw immid

ne sunthan naaga. <sup>12</sup> Taani enttara sa7an de7ashe, ne taw immida ne sunthaa wolqqan entta naagas. Geeshsha Maxaafay gidayssi polettana mela dhayoy bessiya uraappe attin enttafe hari oonikka dhayibeenna.

<sup>13</sup> “Ha77i taani neekko bays. Ta ufyassay entta wozanan polo gidana mela hayssa taani alamen de7ashe odays. <sup>14</sup> Taani enttaw ne qaala immas. Taani alamepppe gidonnayssada, enttika alamepppe gidonna gisho alamey entta ixxis. <sup>15</sup> Neeni Xalahepppe entta naagana melapape attin alamepppe kessana mela woossike. <sup>16</sup> Taani alamepppe gidonnayssada enttika alamepppe gidokkona. <sup>17</sup> Neeni ne tumatethan entta nebaa ootha; ne qaalaykkka tuma. <sup>18</sup> Neeni tana alamiya kiittidayssada taanikka entta alamiya kiittas. <sup>19</sup> Qassi entti tuma nebaa gidana mela entta gisho taani ta huu7iya new immays.

<sup>20</sup> “Taani entta xalaalas gidonnashin entti qaala odin, tana ammananayssataskka woossays. <sup>21</sup> Entti ubbay issino gidana mela taani woossays. Aawaw, ne tanan de7eyssada, qassi ta nenan de7eyssada entti nunan daana mela woossays. He wode neeni tana kiittidayssa alamey ammanana. <sup>22</sup> Neeninne taani issino gideyssada, entti issino gidana mela, neeni tana bonchchidayssada, taanikka entta bonchchas. <sup>23</sup> Taani enttan, neeni tanan de7eyssada entti polo issino gidana mela nena woossays. Hessika, ne tana kiittidayssanne ne tana dosida dosuwan entta dosidayssa alamey eran melassa.

<sup>24</sup> “Aawaw, neeni taw immidayssati taani de7iyaswan taara daana mela koyays. Alamey medhettanaappe sinthe neeni tana dosida gisho taw immida ta bonchchuwa entti be7ana.

<sup>25</sup> “Geeshsha Aawaw, alamey nena erenna, shin taani erays. Qassi neeni tana kiittidayssa hayssati eroosona. <sup>26</sup> Neeni tana siiqida siiqoy enttanana daana mela, qassi taani enttanana gidana mela, taani ne sunthaa entta erisas; sinthaskka erisana” yaagis.

## 18

### *Yesuusa oyketethaa*

(Maato 26:47-56; Mar 14:43-50; Luuqa 22:47-53)

<sup>1</sup> Yesuusi woossaa onggidaappe guye ba tamaaretara Qediroona zanggaara pinnidi, he bessan de7iya atakilttiya giddo gelidosona. <sup>2</sup> Yesuusi ubba wode ba tamaaretara yan shiiqya gisho Yesuusa aathi immida Yihudi he bessaa erees. <sup>3</sup> Hessa gisho, Yihudi paanose, xompe, tooranne gondalla oykkida daro wotaaddaretta, kahine halaqatinne Farisaaweti kiittida Xoossa Keetha naagiya pooliseta kaalethi ekkidi, he bessaa bis.

<sup>4</sup> Yesuusi bana gakkana haniyabaa ubbaa eridi, gaxa keyidi, “Oona koyeetii?” yaagis.

<sup>5</sup> Entti zaaridi, “Naazirete Yesuusa koyoos” yaagidosona.

I zaaridi, “Taani Yesuusa” yaagis.

Yesuusa aathi immida Yihudi yan enttara eqqis. <sup>6</sup> I, “Taani Yesuusa” gida wode entti guye shiiqidi, sa7an kunddidosona. <sup>7</sup> Yesuusi qassika, “Oona koyeetii?” yaagidi oychchis.

Entti, “Naazirete Yesuusa koyoos” yaagidosona.

<sup>8</sup> I zaaridi, “Taani Yesuusa gideyssa hinttew odas. Hiza, hintte tana koyabaa gidikko hayssata yeddite” yaagis. <sup>9</sup> I hessa giday, “Aawaw, neeni taw immidayssatappae hari attoshin issuwaka dhayssabiikkie” gidayssi polettana melassa.

<sup>10</sup> Simoon Phexiroosas mashshi de7ees. I he mashshaa shoddidi kahine halaqaa aylliyan ushachcha haytha shocidi, qanxi yeggis. He aylliya sunthay Malkkoosa. <sup>11</sup> Yesuusi Phexiroosakk, “Ne mashshaa shoohuwan zaara. Ta Aaway taw immida xuu7appe taani uyonnabaa new daanii?” yaagis.

### *Yesuusi Haanna sinthe shiiqis*

(Maato 26:57-58; Mar 14:53-54; Luuqa 22:54)

<sup>12</sup> Roome wotaaddaretinne entta halaqay Xoossa Keetha naagiya poolisetara issife Yesuusa oykkidi qachchidosona. <sup>13</sup> Koyro Yesuusa Haannako efidosona. Haanni he laythi kahine halaqa gidiya Qayyaafa bollo. <sup>14</sup> Qayyaafi, “Asa ubbaa gisho issi asi hayqqiko lo77o” gidi kase Ayhudeta zoridayssa.

### *Phexiroosi Yesuusa kaddis*

(Maato 26:69-70; Mar 14:66-68; Luuqa 22:55-57)

<sup>15</sup> Simoon Phexiroosinne hara issi tamaarey Yesuusa kaallidi bidosona. Kahine halaqay he hara tamaariya loythi erees. Hessa gisho, I Yesuusara kahine halaqaa zabbaa gelis.

<sup>16</sup> Shin Phexiroosi karera dirssaa penggen eqqis. Kahine halaqay eriya hara tamaarey kare keyidi, penggiya naagiya na7ees odidi, Phexiroosa gaathii gelssis. <sup>17</sup> Penggiya naagiya na7iya Phexiroosakk, “Neeni, he addiya tamaaretappe issuwa gidikkii?” yaagasu.

Phexiroosi zaaridi, “Akkay, taani gidikke” yaagis.

<sup>18</sup> Sa7ay meeggiya gisho aylletinne naageyssati xiifa tama eethidi, yuu yi aadhdhi eqqidi kayosona. Phexiroosikka enttara eqqidi tama kayees.

*Kahine Halaqay Yesuusa oychchis  
(Maato 26:59-66; Mar 14:55-64; Luuqa 22:66-71)*

<sup>19</sup> Kahine halaqay Yesuusa, iya tamaaretabaanne iya timirrtiyabaa oychchis. <sup>20</sup> Yesuusi zaaridi, "Taani asa ubbaas qonccen odas. Taani Ayhude ubbay shiiqiya Ayhude Woosa Keethaninne Xoossa Keethan ubba wode tamaarssas. Geeman aykkoka odabiikk. <sup>21</sup> Yaatin, neeni tana ays oychchay? Ta odishin si7ida asaa oychcha. He asay taani odidayssa eroosona" yaagis.

<sup>22</sup> Yesuusi hessa gida wode he bessan eqqida wotaaddaretappe issoy Yesuusa baqqidi, "Kahine halaqaas hayssada zaaray?" yaagis.

<sup>23</sup> Yesuusi zaaridi, "Taani iitabaa odidabaa gidikko hayssan de7iya asa ubbaa sinthan oda. Shin taani tuma odidabaa gidikko tana ays baqqay?" yaagis.

<sup>24</sup> Hessa gisho, Haanni, Yesuusi qashettida mela kahine halaqaa Qayyaafakko yeddus.

*Phexiroosi Yesuusa zaari kaddis  
(Maato 26:71-75; Mar 14:69-72; Luuqa 22:58-62)*

<sup>25</sup> Phexiroosi yan eqqidi, tama kayishin, harati iyaakkko, "Neeni ha addiya tamaaretappe issuwa gidikkii?" yaagis.

Phexiroosi zaaridi, "Akkay, taani gidikke" yaagidi kaddis.

<sup>26</sup> Kahine halaqaa aylletappe issoy, Phexiroosi haythaa qanxida addiya dabboy, Phexiroosakko, "Taani nena iyara atakilttiya giddon be7abiikkina?" yaagidi oychchis.

<sup>27</sup> Phexiroosi qassika kaddis. Sohuwara kuttoy waassi aggis.

*Yesuusi Philaaxoosa sinthan  
(Maato 27:1-2,11-14; Mar 15:1-5; Luuqa 23:1-5)*

<sup>28</sup> Wontta guura, entti Yesuusa Qayyaafa sooppe deriya haareyssa ooso keethi efidosona. Ayhudeti Paasika Baale kathaa maanaw bantana tunisonna mela deriya haareyssa ooso keethaa gelibookkona. <sup>29</sup> Hessa gisho, Philaaxoosi enttako kare keyidi, "Ha addiya ays mooteetii?" yaagis.

<sup>30</sup> Entti, "I ita oothonnabaa gidiyakko nuuni iya neekko ehokko" yaagidosona.

<sup>31</sup> Philaaxoosi zaaridi, "Hintte iya ekki efidi, hintte higgey geyssada iya bolla pirddite" yaagis.

Ayhudeti, "Oonakka wodhiya maati nuus baawa" yaagidosona; <sup>32</sup> Hessi haniday Yesuusi ay mela hayqo hayqqaneekko erisanaw odidayssi polettanaassa.

<sup>33</sup> Philaaxoosi ba ooso keetha zaari gelidi, Yesuusa xeegidi, "Neeni Ayhude kawo?" yaagidi oychchis.

<sup>34</sup> Yesuusi Philaaxoosa, "Ha oysha neeni neeppe oychchayye woykko hara asi new tabaa odidee?" yaagis.

<sup>35</sup> Philaaxoosi zaaridi, "Ta Ayhude asee? Ne asaynne kahine halaqati nena taw aathi immidosona. Ne ay oothadii?" yaagis.

<sup>36</sup> Yesuusi, "Ta kawotethay ha alamiyana gidenna. I hayssan gidiyakko ta Ayhudeta halaqatas aadhda imettonna mela ta aylleti taw olettana. Shin ta kawotethay ha alamiyana gidenna" yaagis.

<sup>37</sup> Hessa gisho, Philaaxoosi Yesuusakko, "Yaatin, neeni kawoyye?" yaagidi oychchis.

Yesuusi zaaridi, "Tuma ta kawo gideyssa ne gadasa. Taani yelettidaynne ha alamiya yiday tumatethaa markkattanassa. Tumaa bagga gidida oonikka taani geyssaa si7ees" yaagis.

<sup>38</sup> Philaaxoosi, "Tumi aybee?" yaagis.

Philaaxoosi hessa gidaappe guye Ayhudetakkoo kare keyidi, "Taani iyappe ay iitakka demmabiikk. <sup>39</sup> Shin Paasika Baale gallas, issi ase hinttew qashoppe billiya meezye de7ees. Taani hinttew Ayhudeta kawuwaa billana mela koyeetii?" yaagis.

<sup>40</sup> Entti zaaridi, bantta qaalaal dhoqqu oothidi, "Barbbaana billafe attin iya gidenna" yaagidosona. Shin Barbbaani pangga.

## 19

*Wotaaddareti Yesuusa toochchidosona  
(Maato 27:27-32; Mar 15:15-21)*

<sup>1</sup> Hessafe guye, Philaaxoosi Yesuusa garaafisis. <sup>2</sup> Wotaaddareti aguntha kallachcha medhdhidi iya huu7en wothidosona. Qassi zo7o ma7o iya mayzidosona. <sup>3</sup> Iyaakkoo shiiqidi, "Ayhude kawuwaw, merinaw kawota" yaagidi iya baqqidosona.

<sup>4</sup> Philaaxoosi qassika kare keyidi, Ayhudetakko, "Hekko, taani iyappe ay iitakka demma-boonnayssa hintte erana mela iya hintteko kare kessana" yaagis. <sup>5</sup> Hessafe guye, Yesuusi aguntha kallachcha ba huu7en wothidi, zo7o ma7o ma77idi, kare keyis. Philaaxoosi Ayhudetakko, "Uraa hayssa be7ite" yaagis.

<sup>6</sup> Kahine halaqatinne Xoossa Keetha naageyssati iya be7ida wode bantta qaala dhoqqu oothidi, "Masqaliya bolla kaqqa! Kaqqal" yaagidosona.

Philaaxoosi enttako, "Hintte iya efidi, masqaliya bolla kaqqite. Taani iyappe ay iitakka demmabiikk" yaagis.

<sup>7</sup> Ayhudeti zaaridi, "Nuus higgey de7ees. I bana Xoossaa na7a oothida gisho nu higgiyatho I hayqqanaw bessees" yaagidosona.

<sup>8</sup> Philaaxoosi hessa si7ida wode kaseyssafe daro yayvis. <sup>9</sup> Qassika Philaaxoosi ba ooso keethi simmi gelidi Yesuusakko, "Neeni awuppe yadi?" yaagidi oychchis. Shin Yesuusi iyaw aykkoka zaaribeenna. <sup>10</sup> Hessa gisho, Philaaxoosi, "Taw odikkii? Nena billanaw woykko masqaliya bolla kaqqanaw taw maati de7eyssa erikkii?" yaagis.

<sup>11</sup> Yesuusi, "Xoossay new maata immiboonnabaa gidiyakko ta bolla maati new deen-nashin. Hessa gisho, tana new aathi immidays aadhdiya nagara oothis" yaagis.

### *Yesuusa bolla hayqo pirdididosona*

(Maato 27:15-31; Mar 15:6-20; Luuqa 23:13-25)

<sup>12</sup> Philaaxoosi hessa si7ida wode Yesuusa billanaw oge koyis. Shin Ayhudeti bantta qaala dhoqqu oothidi, "Neeni iya billyabaa gidikko Kauwuwa Qeesare bagga gidakka. Bana kawo giya oonikka Qeesare morkke" yaagidosona.

<sup>13</sup> Philaaxoosi hessa si7idi Yesuusa kare kessis. Yaatidi, "Lochche Shuchchi" giyason pirdda oydiyan uttis. Ibraysxe qaalan he bessay "Gabata" guussu. <sup>14</sup> He gallasay Paasika Baale bonchchanaw gigetetha gallas. He wode sa7i usuppun saate heera. Philaaxoosi Ayhudetakko, "Hintte kauwuwa hayssa be7ite" yaagis.

<sup>15</sup> Ayhudeti bantta qaala dhoqqu oothidi, "Digga! Digga! Masqaliya bolla kaqqa" yaagidosona.

Philaaxoosi zaaridi, "Hintte kauwuwa taani masqaliya bolla kaqqanayssa koyeetii?" yaagidi oychchis.

Kahine halaqati, "Qeesareppe hara kawoy nuus baawa" yaagidosona.

<sup>16</sup> Hessafe guye, entti Yesuusa masqaliya bolla kaqqana mela Philaaxoosi enttaw aathi immis.

### *Yesuusi kaqettis*

(Maato 27:32-44; Mar 15:21-32; Luuqa 23:26-43)

Entti Yesuusa oykkidi efidosona. <sup>17</sup> Yesuusi ba masqaliya tookkidi, "Huu7e guugge" giya bessaa bis. "Huu7e guugge" guussay Ibraysxe qaalan "Golggotta" guussu. <sup>18</sup> Entti he bessan masqaliya bolla Yesuusa kaqqidosona. Qassi iyara hara nam77u asata, issuua ya baggara hankkuwa ha baggara masqaliya bolla kaqqidosona. <sup>19</sup> Philaaxoosi, "Ayhudeta Kauwuwa, Naazirete Yesuusa" yaagiya xuufe xaafidi masqaliya bolla wothis. <sup>20</sup> Yesuusi masqaliya bolla kaqettida bessay katamaas matan de7iya gisho daro Ayhudeti he xuufiya nabbabidosona. Xuufey xaafetiday Ibraysxe doonan, Laatine doonaninne Girike doonana. <sup>21</sup> Hessa gisho, kahine halaqati Philaaxoosakko, "Ha addey bana Ayhude kawo yaagis' gada xaafappe attin 'Ayhude kawo' gada xaafoppa" yaagidosona.

<sup>22</sup> Yaatin, Philaaxoosi, "Ta xaafidayssa xaafas" yaagidi zaaris.

<sup>23</sup> Wotaaddaret masqaliya bolla iya kaqqidaappe guye iya ma7uwa ekkidi, oyduu bessan shaakkidi, isso isso ekkidosona. Yeda ma7ettiya iya adussa ma7uwa ekkidosona.

<sup>24</sup> Wotaaddaret, "Oona gakkaneekko, saama yegganaappe attin ma7uwa peedhokko" yaagidosona. Hessi haniday Geeshsha Maxaafan,

"Ta ma7uwa shaakki ekkidosona;

ta adussa ma7uwa bollaka saama yeggidosona"

geetetidayssi polettana melassa. Hessa gisho, wotaaddaret hessa oothidosona.

<sup>25</sup> Shin Yesuusa masqaliya matan iya aayyaa, iya aaye michchiya, Qeliyophe machchiya Mayraamanne Magdela Mayraama eqqidosona. <sup>26</sup> Yesuusi ba aayiwunne I dosiya tamarey yan eqqidayssata be7idi, ba aayeko, "Ta aaye, ne na7aa hayssa be7a" yaagis.

<sup>27</sup> Hessafe guye, he tamariyakko, "Ne aayiw hanno be7a" yaagis. He tamarey iyo he wodeppe doomidi baara daana mela soo efis.

### *Yesuusi hayqis*

(Maato 27:45-56; Mar 15:33-41; Luuqa 23:44-49)

<sup>28</sup> Hessafe guye, Yesuusi ubbay ha77i polettidayssa eridi, Geeshsha Maxaafan xaafetti-dayssi polettana mela “Tana saamees” yaagis.

<sup>29</sup> He bessan issi xugga kumetha caala woyney de7ees. Entti isponnje he woyniyan yeggidi, hisophe mitha xeeran wothidi, Yesusa doonaakko shiishidosona. <sup>30</sup> Yesuusi woyniya ganxi be7idi, “Polettis” yaagis.

Hessafe guye, ba huu7iya ziqqi oothidi ba shemppuwa immis.

#### *Yesuusa miya tooran caddidosona*

<sup>31</sup> He gallasay giigetetha gallas gidiya gishonne wonttetha gallasay bonchcho Sambbaata gidiya gisho asata ahay masqaliya bolla Sambbaata gallas pee7onna mela entta tohuwa menthidi, masqaliyappe wodhsiana mela Ayhudeti Philaaxoosa woossidosona. <sup>32</sup> Hessa gisho, wotaaddaretti bidi, Yesusara kagettida nam77u asata tohuwa menthidosona.

<sup>33</sup> Shin Yesusakkko yida wode I hayqqidayssa be7idi, iya tohuwa menthibookkona.

<sup>34</sup> Shin wotaaddaretappe issoy iya miya tooran caddin sohuwara suuthinne haathi goggis.

<sup>35</sup> Hintte ammanana mela hessa be7idayssi markkattis. Iya markkatethayka tuma. Qassi I odehyssi tuma gideyssa erees. <sup>36</sup> Hessi haniday Geeshsha Maxaafay, “Iya meqethatappe issoykka meqqenna” gidayssi polettana melassa. <sup>37</sup> Qassika Geeshsha Maxaafay hara bessan, “Entti bantta caddidayssa be7ana” yaagees.

#### *Yesuusi moogettis*

(Maato 27:57-61; Mar 15:42-47; Luuqa 23:50-56)

<sup>38</sup> Hessafe guye, Armmatiyasa katamaappe yida Yoosefi Yesuusa ahaa ekkanaw Philaax-oosa woossis. Yoosefi Ayhudetas yayyida gisho qosan Yesuusa kaalleyssa.

Philaaxoosi, “Ekka” yaagis. Hessa gisho, Yoosefi bidi Yesuusa ahaa ekkis. <sup>39</sup> Qassi Niqodimoosi, hayssafe kase Yesusakkko qamma yidayssi, karbbenne godare uuthara walakettida hasttamanne issi kilo giraame gidiya shitto ekkidi Yoosefara yis. <sup>40</sup> He nam77u asati Yesuusa ahaa ekkidi, Ayhudeti aha xaaxiya maaran, shittora, moogo afilan xaaxidosona. <sup>41</sup> Yesuusi masqaliya bolla kagettida bessan daro atakilttey de7ees. He atakilttiya giddon shuchchafe woocettidi oosettida buroo oonikka moogettibonna ororatha duufoy de7ees. <sup>42</sup> He gonggoloy matan de7iya gishonne Ayhudeti Sambbaatas giigettiya gallas gidiya gisho Yesuusa ahaa yan moogidosona.

## 20

#### *Yesuusi hayqoppe denddis*

(Maato 28:1-8; Mar 16:1-8; Luuqa 24:1-12)

<sup>1</sup> Wogga wode wonnta buroo geeyonna de7ishin, Magdela Mayraama, Yesuusi moogettida duufuwa bada shuchchay daa duufuwa doonappe denddidayssa be7asu. <sup>2</sup> Simeon Phexiroosakkonne Yesuusi dosiya hankko tamaariyakkwooxxa bada, “Duufuwappe Godaa efidosona; iya awun wothidaakkko nu erokko” yaagasu.

<sup>3</sup> Hessa gisho, Phexiroosinne hankko tamaarey keyidi duufuwa bidosona. <sup>4</sup> Nam77ayka issife woxxidosona, shin hankko tamaarey Phexiroosappe aadhdhidi sinthattidi duufuwa gakkis. <sup>5</sup> He tamaarey hokkidi, moogo afilaa be7is, shin duufowan wodhdhibeenna.

<sup>6</sup> Simeon Phexiroosi iya kaalli yidi, duufowan wodhdhidi moogo afilay yan de7eyssa be7is. <sup>7</sup> Qassi Yesuusa huu7enxaaxettida afilay xaaxettida mela dumma issi bessan de7eyssa be7is. He afilay dumma de7eesippe attin moogo afilaara issife deenna. <sup>8</sup> He wode sinthattidi duufuwa gakkida hankko tamaarey geli be7idi ammanis. <sup>9</sup> Yesuusi hayqoppe denddanaw besseyssa odiya Geeshsha maxaafaa qaala entti buroo akeekibookkona.

<sup>10</sup> Hessafe guye, iya tamaareti bannta soo simmidi bidosona.

#### *Yesuusi Magdela Mayraamis bentis*

(Maato 28:9-10; Mar 16:9-11)

<sup>11</sup> Shin Mayraama he duufuwa doonan eqqada yeekkashe hokkada duufuwa giddo xeellasu. <sup>12</sup> Bootha ma7o ma77ida nam77u kiitanchchoti Yesuusa ahay zin77idasuhan issoy huu7esoora hankkoy tohosoroa uttidashin be7asu. <sup>13</sup> Entti ikko, “Maccasete, ays yeekkay?” yaagidi oychchidosona.

Iya, “Entti ta Godaa efidosona; entti awun wothidaakkko taani erikke” yaagasu.

<sup>14</sup> Hessidaa gidaappe guye, iya guye simma xeelliya wode Yesuusi yan eqqidayssa be7asu. Shin I Yesuusa gidaysssa erabuukku. <sup>15</sup> Yesuusi iikko, “Maccasete, ays yeekkay? Oona koyay?” yaagidi oychchis.

Mayraama atakiltte oosanchchuwa daanin, “Godaw, ne ekkidabaa gidikko, iya awun wothidaakkko taw odarkkii. Taani iya ekkana” yaagasu.

<sup>16</sup> Yesuusi iikko, "Mayraame" yaagis.

Iya iyaakko simmada, Ibraysxe doonan "Rebuuni" yaagasu. Hessas birshshethay "Asttamaariyaw" guussu.

<sup>17</sup> Yesuusi iikko, "Taani buroo ta Aawakko boonna gisho tana oykkada ashshanaw koyoppa. Shin ta ishatakkoo bada, 'Taani ta Aawakkonne hintte Aawakko, ta Xoossaakonne hintte Xoossaako, simmana gis' gada enttaw oda" yaagis.

<sup>18</sup> Magdela Mayraama Godaa be7idayssanne iw hessa I odididayssa bada iya tamaaretas odasu.

#### *Yesuusi ba tamaaretas qonccis*

(Maato 28:16-20; Mar 16:14-18; Luuqa 24:36-49)

<sup>19</sup> Wogga wode omarssi, iya tamaareti Ayhudetas yayyidi kariya gorddidi shiiqi uttidashin, Yesuusi yidi, entta giddon eqqidi, "Saroy hinttew gido" yaagis. <sup>20</sup> Hessa gidi simmidi ba kushiyanne ba miya entta bessis. Iya tamaareti Godaa be7ida wode daro ufayttidosona. <sup>21</sup> Yesuusi zaaridi enttako, "Saroy hinttew gido; ta Aaway tana kiittidayssada taanikka hinttena kiiittays" yaagis. <sup>22</sup> Hessa gidaappe guye, entta bolla ufu gidi punnis. Qassi, "Geeshsha Ayyaana ekkite. <sup>23</sup> Hintte atto gida asaa nagaray atto geetettana. Hintte atto goonnayssata nagaray atto geetettenna" yaagis.

#### *Yesuusanne Toomasa*

<sup>24</sup> Shin tammanne nam77u tamaaretappe issov, Didimoosa\* geetettiya Toomasi, Yesuusi yida wode enttara deenna. <sup>25</sup> Hessa gisho, hankko iya tamaareti Toomasakko, "Nuuni Godaa be7ida" yaagidosona.

Shin Toomasi enttako, "Misimaren I cadettida iya kushiyan de7iya beeta be7onnanne he beeta ta biradhdhen bochchonna, qassi ta kushiya iya miyan yedda be7onna ammaniikke" yaagis.

<sup>26</sup> Saaminttafe guye, Yesusa tamaareti qassika son shiiqid uttidosona; Toomasikka enttara de7ees. Karey gordettidi de7ishin Yesuusi yidi, entta giddon eqqidi, "Saroy hinttew gido" yaagis. <sup>27</sup> Hessafe guye, Yesuusi Toomasakko, "Ta kushiya ne biradhdhiyan bochchada be7a. Qassi ne kushiya ta miyan yeddada be7a; sidhoppa, ammana" yaagis.

<sup>28</sup> Toomasi zaaridi, "Ta Godaw, ta Xoossaw" yaagis.

<sup>29</sup> Yaatin Yesuusi, "Neeni tana be7ida gisho ammanadasa, shin tana be7onna ammanidayssati anjjettidayssata" yaagis.

#### *Ha maxaafaa qofaa*

<sup>30</sup> Yesuusi ha maxaafan xaafettiboonna hara daro malaatata ba tamaareta sinthan oothis. <sup>31</sup> Shin Yesuusi I Kiristtoosa, Xoossa Na7aa gideyssa hintte ammanana melanne ammanidi iya sunthan de7o demmanna mela hessi xaafettis.

## 21

#### *Yesuusi laappun ba tamaaretas qonccis*

<sup>1</sup> Hessafe guye, Yesuusi Xibaaryoosa Abbaa matan ba tamaaretes zaari qonccis. I enttaw hayssafe kaallidi de7iya hanotan qonccis. <sup>2</sup> Simoon Phexiroosi, Mentre geetettiya Toomasi, Qaana Galiilapte yida Natina7eeli, Zabdiyoosa naytinne Yesusa tamaaretappe hara nam77ati issife de7oosona.

<sup>3</sup> Simoon Phexiroosi enttako, "Taani molo oykkanaw bays" yaagis.

Entti, "Nukka neera baana" yaagidi, wogoluwa giddo gelidosona. Shin entti he qamman aybi molokka oykkibookkona.

<sup>4</sup> Wontta guura xalqeys dolanaappe sinthe, Yesuusi abbaa gaxan eqqis, shin iya tamaareti Yesusa gididaysssa erbookkona. <sup>5</sup> Yesuusi enttako, "Ta laggeto, molo oykkibekketii?" yaagis.

Entti zaaridi, "Aykkoka oykkibookko" yaagidosona.

<sup>6</sup> I zaaridi, "Hintte gitiya wogoluwappe ushachcha baggara yeggite; guutha molo hintte oykkana" yaagis. Hessa gisho, gitiya ushachcha baggara yeggidosona. Moloy darida gisho goochchidi kessanwan xoonettidosona.

<sup>7</sup> Yesuusi dosiya tamaarey Phexiroosakkoo, "Hayssi Godaa!" yaagis. Simoon Phexiroosi I Godaa gididaysssa si7ida wode kallo de7iya gisho ba ma7uwa ma77idi abbaa giddo guppi gelis. <sup>8</sup> Shin wogoluwan attida hankko tamaareti moloy kumida gitiya goochchidi, abbaafe gaxa keyidosona. Entti abbaafe nam77u xeetu wadha mela haakkosona. <sup>9</sup> Entti abbaafe gaxa keyida wode xiifa bonqon moloy de7eyssanne uythi be7idosona.

<sup>10</sup> Yesuusi enttako, "Ha77i hintte oykkida moluwappe guuthara hammite" yaagis.

<sup>11</sup> Simoon Phexiroosi wogoluwan gelidi, xeetanne ishatammanne heedzu woggaa moloti kumida gitiya goochchidi abbaafe gaxa kessis. Moloy hessa mela daro gidin gitay daakettibeenna.

<sup>12</sup> Yesuusi enttako, “Haa yidi miite” yaagis. I Godaa gideyssa entti erida gisho iya tamaaretappe issokyka, “Neeni oonee?” gidi iya oychchanaw minniday baawa. <sup>13</sup> Yesuusi yidi, uythaan ekkidi enttaw immis; moluwakka hessada immis.

<sup>14</sup> Yesuusi hayqoppe denndidi ba tamaaretas qonccishin hayssi heedzanthro.

#### *Yesuusanne Phexiroosa*

<sup>15</sup> Entti midaappe guye, Yesuusi Simoon Phexiroosakkko, “Yoona\* na7aw Simoona, tana hayssatappe aathada dosay?” yaagis.

Simoon Phexiroosi, “Ee Godaw, taani nena doseyssa ne eraasa” yaagis.

Yesuusi iyaakko, “Ta dorssa marata heemma” yaagis.

<sup>16</sup> Yesuusi qassika, “Yoona na7aw Simoona, tana dosay?” yaagis.

Simoon Phexiroosi, “Ee Godaw, taani nena doseyssa ne eraasa” yaagis.

Yesuusi, “Ta dorssata heemma” yaagis.

<sup>17</sup> Yesuusi heedzanthro, “Yoona na7aw Simoona, tana dosay?” yaagis.

Yesuusi heedzanthro Simoon Phexiroosakkko, “Tana dosay?” yaagidi oychchida gisho Phexiroosi azzanidi, “Godaw, neeni ubbabaa eraasa; taani nena doseyssa ne eraasa” yaagis.

Yesuusi, “Ta dorssata heemma. <sup>18</sup> Taani new tuma odays; neeni na7atethan de7iya wode nerkaa dancettada, ne koyida soo baasa. Shin ne cimida wode ne kushiya micca bessana. Hari danccisana; ne dosonna soo efana” yaagis. <sup>19</sup> Yesuusi hessa Phexiroosi ay mela hayqo hayqqidi, Xoossaan bonchchisaneekko erisanaw gis. Hessa gidaappe guye, Yesuusi Phexiroosakkko, “Tana kaalla” yaagis.

#### *Yesuusanne hankko tamaariya*

<sup>20</sup> Phexiroosi guye simmudi, Yesuusi dosiya tamaarey baappe guyera yeysa be7is. He tamaarey, kaho miyason Yesuusakkko shiiqidi, “Godaw, nena aathi immanay oonee?” gidayssa. <sup>21</sup> Phexiroosi he tamaariya be7idi, “Godaw, ha addey qassi waananee?” yaagidi Yesuusa oychchis.

<sup>22</sup> Yesuusi iyaakko, “Taani yaana gakkanaw I daana mela taani koykko, hessi nena ay metidee? Neeni tana kaalla” yaagis.

<sup>23</sup> Hessa gisho, he tamaarey hayqqenna giya oday ishata ubbaa gakkis. Shin Yesuusi, “Taani yaana gakkanaw, I daana mela taani koykko nena ay metidee?” yaagisippe attin “Hayqqenna” gibeenna.

<sup>24</sup> Ha odabaa markkattidaynne hayssa xaafiday he tamaariya. Iya markkatehay tuma gideyssa nuuni eroos.

<sup>25</sup> Yesuusi oothida hara darobay de7ees. Ta qoppin, ubbabay huu7en huu7en xaafetti-daakko, xaafettiya maxaafatas kumetha alamey wothanw gidanabaa daanenna.

## Hawaareta Oosuwa Gaatha Qofaa

Hawaareta ooso maxaafay, Luuqaasa Wonggelaa kaallidi xaafettida maxaafaa. Maxaafas de7iya waanna qofay koyro Yesuusa kaallida asati Geeshsha Ayyaanay kaalethin, iyabaa odiya qaala, "Yerusalaamen, Yihuda biitta ubban, Samaaren, sa7aa gaxappe gaxa gakkanaw" (1:8) wonggelaa biitta ubbaa waati gathidaakkoo odanaassa. Maxaafay, ammanoy Ayhude asata giddon doomettidi, kumetha alamen de7iya asa ubbaa ammano gidana gakkanaw waanidi dalggidaakkoo odiya taarike. Ha maxaafaa xaafey, ammaniyaa asati Roome kawotethaa kunddisanaw garssara maqettiya asi gidonnayssanne ammanoy Ayhudeta haymaanote polo oothiyssa gideyssa erisanaw keehi daaburidi oothis.

Hawaareta ooso maxaafan Yesuusabaa odiya Wonggelay gakkiya bessay woden woden dalggi dalggi beyssanne woosa keethi eqqidayssa qonccisiya heedzu ayfe kifiletan shaakkhanaw dandda7ettees:

1. Ammanoy Yesuusi salo keyi simmin doomettidayssa.
2. Ammanoy Isra7eele biitta ubbaa gakkidayssa.
3. Roome gujjidi Meditiraane Abbaa yuushuwan de7iya biitta ubban dalggidayssa bessees.

Hawaareta ooso maxaafan aadhdhidi benttey Geeshsha Ayyanaa ooso gidishin, Phenx-eqosxe gallas Yerusalaamen de7iya ammaneyssata bolla wolqqara wodhdhidayssa oodees. Hessadakka, maxaafaa giddon qonccida oosota ubban benttidayssada Geeshsha Ayyaanay woosa keethaanne woosa keethaa ayseyssata kaalethidayssanne minthethidayssa gujjidi oodees. Beni wode imettiya ammano kiitay dumma dumma odettida qaalappe keson keson ekettis. Hawaareta oosuwa giddon oosettida oosota kiitay ammaniyaa asaa de7oninne woosa keetha issifetethan de7iya wolqqay ay mela giteekko bessees.

### **Hawaareta oosuwa ayfe qofata**

Markkatethas giigetethi 1:1-26

- 1) Yesuusa wurssetha kiitaanne immida ufayssaa 1:1-14
- 2) Yihuda bessan haraa dooruwa 1:15-26

Yerusalaamen markkatethi 2:1-8:3

Yihudanine Samaaren markkatethi 8:4-12:25

Phawuloosa hawaaretetha oosuwa 13:1-28:31

- 1) Koyro hawaaretetha buussaa 13:1-14:28
- 2) Yerusalaame shiiquwa 15:1-35
- 3) Nam77antho hawaaretetha buussaa 15:36-18:22
- 4) Heedzantho hawaaretetha buussaa 18:23-21:16
- 5) Phawuloosi Yerusalaamen, Qisaariyaninne Roomen qashetethaa 21:17-28:31

1-2 Tewofiloosa, Yesuusi ba oosuwa oykkida wodeppre salo bida gallasaa gakkanaw, oothidabaanne tamaarssidabaa ubbaa taani ta koyro maxaafan xaafas. Salo baanappe sinthe I ba doorida hawaareta Geeshsha Ayyaanan kiittis. <sup>3</sup>I ba waayappe guye hayqoppe danddidayssaa sidhey baynna qonccisidi enttaw bana bessis. Oytamu gallas enttaw qonccidi Xoossaa kawotethaabaa entta tamaarssis. <sup>4</sup> Issi wode enttara issife mishe entta hayssada yaagidi kiittis: "Ta hinttew odida, ta Aaway immana gida ufayssaa qaala naagiteppe attin Yerusalameppe keyoppite. <sup>5</sup>Ays giilkko, Yohaannisi haathan xammaqis, shin guutha wodeppre guye Geeshsha Ayyaanen hintte xammaqettana" yaagis.

<sup>6</sup> Hawaareti Yesuusara gahettida wode iyaakkoo, "Godaw, Isra7eeletas ne kawotethaa zaarana wodey hayssee?" yaagidi oychchidosona.

<sup>7</sup> Yesuusi enttako, "Ta Aaway ba maatan oothiya wodiyanne laythaa hintte eranaw dandda7ekketa. <sup>8</sup>Shin Geeshsha Ayyaanay hintte bolla wodhdhiya wode hintte wolqqan kumana. Yaani simmidi, Yerusalaamen, Yihuda biitta ubban, Samaareninne sa7aa gaxa gakkanaw taw markkatta gidana" yaagis.

<sup>9</sup> Hessa gidayssafe guye entti xeellishin, dhoqqu dhoqqu gidi, saluwa bin shaaraykka iya entta ayfilyaappe geenthis.

<sup>10</sup> Yesuusi biya wode entti salo tishshi oothidi xeellishin, bootha ma7o ma77ida nam77u asati akeekonna entta matan eqqidi, <sup>11</sup>"Galiila asaw, salo xeellishe, hintte ays eqqideti? Ha hintte be7ishin salo bida Yesuusi hessadakka simmidi yaana" yaagidosona.

*Yihuda bessan Maatiyasi doorettis  
(Maato 27:3-10)*

<sup>12</sup> Hessafe guye, hawaareti Shamaho Deriyappe Yerusalaame simmidosona. Shamaho Derey Yerusalamaes matan de7ees. <sup>13</sup> Entti Yerusalaame gelidi, bantta de7iya bessaa pooqiya bolla keyidosona. Enttika: Phexiroosa, Yohaannisa, Yayqooba, Inddiriyasa, Filphoosa, Toomasa, Bartolomiyosa, Maatoosa, Ilfyoosa na7aa Yayqooba, ba biittaas mischettiya Simumonanne Yayqooba na7aa Yihuda. <sup>14</sup> Hayssati ubbay maccasatarra, Yesuusa aaye Mayraamiranre Yesuusa ishatarra ubbay issi wozanaan gididi minthidi woossosona.

<sup>15</sup> He wode Phexiroosi xeetanne laatama gidiya ammaniyaa asay shiiqida bessan denddi eqqidi, hayssada yaagis: <sup>16</sup> “Asaw, Yesuusa oykkidayssata kaaletihida Yihudabaa Geeshsha Ayyaanay kase Dawite doonan odida Xoossa qaalay polettanaw bessees. <sup>17</sup> Yihudi nuura issife ha oosuwa oothanaw doorettida asi.”

<sup>18</sup> Shin Yihudi ba itta oosuwan demmida miishen gade shammis. I gufanndi kunddin, iya uloy daakkettis; iya maraacey ubbay kare keyis. <sup>19</sup> Yihuda bolla hanidabaa Yerusalamen de7iya asa ubbay si7is. Hessa gisho, he gadiya bantta qaalan Akelddaama (Suutha gade) gidi xeegidosona.

<sup>20</sup> “Hessika mazmure maxxaafan,  
Iya keethay kallo atto;  
onikka iyan de7oppo.

Qassi iya shuumatethaa hari ekko’ geetetti xaafettis.

<sup>21</sup> “Hessa gisho, Godaa Yesuusi nu giddon simerettida wode ubban nuura de7eyssatappe, <sup>22</sup> qassi Xammaqiya Yohaannisa wodiyappe doomidi Godaa Yesuusi salo bida gallas gakkanaw nuura de7eyssatappe issi asi iya dendduwas nuura markka gidanaw bessees” yaagis.

<sup>23</sup> Hessa gisho, asay dooruwas Yosxoosa giya Barssabaasa geetettiya Yoosefanne Maatiyasa nam77a shiishidosona. <sup>24</sup> Hessafe guye, Xoossa woossishe, “Asa ubbaa wozana eriya Godaw, ha nam77atappe ne oona dooridaakko nuna bessa. <sup>25</sup> Yihudi ba bessaa bidi, aggida oosuwanne hawaaretetha oosuwa ekkana mela hayssatappe nuus qonccisa” yaagidosona. <sup>26</sup> Entta bolla saama yeggidosona. Saamay Maatiyasa bolla wodhdhin Maatiyasi tammante issi hawaareta bolla guzhettis.

## 2

*Geeshsha ayyaanaa yuusaa*

<sup>1</sup> Phenxeqosxe giya gallasay gakkida wode ammaniyaa asa ubbay issife issi bessan shiqidi de7oosona. <sup>2</sup> Qopponna wolqqaama goteda guummiya guunthay akeekonna saloppe yidi entti de7iya keethaa kumis. <sup>3</sup> Qassi tama laco daaniya inxarssati enttaw benttishe, shaaketti shaaketti entta ubbaa bolla wodhdhidosa. <sup>4</sup> Entti ubbay Geeshsha Ayyaanan kumidi dumma dumma doonan odettana mela Geeshsha Ayyaanay entta dandda7isin haasaya doomidosona.

<sup>5</sup> He wode biitta ubbaafe yida Xoossa yayyaa Ayhudeti Yerusalamen de7oosona. <sup>6</sup> He guunthaa si7ida wode daro asay shiiqidosa. Ammaniya asay entta qaalan odettishin si7ida gisho <sup>7</sup> malaaleettidi, “Ha odettiya asa ubbay Galila ase gidokkonaayye? <sup>8</sup> Yaatin, nuuni, nu yelettida biittaa doonan entti odettishin waanidi si7anaw dandda7ido? <sup>9</sup> Nuuni Phar xen, Meedonan, Elaamen, nam77u shaafatappe giddon de7eyssati, Yihudan, Qaphadoeqiyani, Phanxoosan, Iisiyan, <sup>10</sup> Phirgen, Phinfilen, Gibxxen, Qaarena matan de7iya Liibyan de7eyssata. Nuuppe baggatikkha Roomeppe yida asata. <sup>11</sup> Ayhudetinne Ayhudetetha ammano gelida asati, Qarxeesanne Arabe asati, Xoossay oothida gita oosuwa nu qaalan odettishin si7oos” yaagidosona. <sup>12</sup> Ubbay malaaleettidi, gaanabaa dhayidi wolikko, “La hayssi ay guussee?” yaagidosona. <sup>13</sup> Shin harati, “Hayssati uyidi mathottidosona” yaagidi qelqisidosona.

*Phexiroosa haasaya*

<sup>14</sup> Shin Phexiroosi, tammante issi hawaaretara denddi eqqidi, ba qaala dhoqqu oothidi, enttaw hayssada yaagidi odis: “Ayhudetoo, Yerusalamen de7iya ubbatu, taani odehyssa si7ite. <sup>15</sup> Wonttafe heedzu saate gidiya gisho hintte qoppeyssada ha asati mathotti-bookkona; hessi hinttew eretto. <sup>16</sup> Shin hayssi haniday nabiya Iyyu7eeli odidayssi polettana melassa.

<sup>17</sup> “Xoossay, wodiya wursethan hayssada hanana yaagees:  
taani asa ubbaa bolla ta Ayyaanu gussana.

Hintte adde naytinne macca nayti,

tinbbite odana.

Hintte yalagati qonccethi be7ana;  
hintte cimati amuho amuhana.

<sup>18</sup> He gallasatan tana ammaniyaa adde aylleta bollanne macca aylleta bolla  
taani ta Ayyaana gussana;  
entti tinbbite odana.

<sup>19</sup> Qassi taani bolla saluwan oorathabaa,  
garssa sa7ankka malla bessana.

Suuthi, taminne wolqqaama caagani benttana.

<sup>20</sup> Gitanne bonchcho gidida Godaa gallasay  
gakkanaappe sinthe away dhumaana;  
ageenaykka suuthi daanana.

<sup>21</sup> He wode hessada hanana;  
Godaa sunthaa xeegiya oonikka attana' yaagis.

<sup>22</sup> "Isra7eele asaw, ha qaala si7ite. Naazirete Yesuusa oonatethay, Xoossay hintte giddon  
oothida wolqqaama oosuwaninne malaataatan hinttew qonccoysa hinttee, hintte huu7en  
ereeta. <sup>23</sup> Xoossa kase eraniinne iya sheniyen Yesuusi hinttew aadhdi imettis. Hintte iya  
nagaranchotii masqaliya bolla kaqqidi wodhana mela aathi immideta. <sup>24</sup> Shin Xoossay  
hayqo wolqqa diggidi iya denthis. Hessa gisho, hayqoy iya oykkanaaw dandda7ibeenna.

<sup>25</sup> Dawitey iyabaa odise,

'Taani yarkkonna mela,  
Goday ta ushachchan de7ees.  
Godaa ubba wode ta matan be7ays.

<sup>26</sup> Hessa gisho, ta wozanay ufayttis;  
ta inxarssan ufayssi kumis;  
hayqqiya ta asatethay uflyssan daana.

<sup>27</sup> Ays giikko, ta shemppuwa Si7oolen aggaka.  
Qassi ne Geeshsha Na7aa ahaa wooqisakka.

<sup>28</sup> Neeni tana de7o ogiya erisadasa.

Neeni taara de7eyssan ta ufayssay kumethi gidees' yaagis.

<sup>29</sup> Asaw, nu aawa Dawitebaa ta hinttew geeshshada odana. Dawitey hayqqidi mooget-  
tis; iya duufoy hachchi gakkanaaw nu matan de7ees. <sup>30</sup> Dawitey nabe gidida gisho Xoossay  
iya sheeshaaappe issuwa iya kawotethaa araata bolla utisanaw iyaw caaqqida caaqqua  
rees. <sup>31</sup> Hessa gisho, Kiristtoosa dendduu sinthe xeellidi, 'Iya shemppoy Si7oolen  
attibeena; iya asatethaykka woocibeenna' gidi odis.

<sup>32</sup> "Xoossay, ha Yesuusa hayquwapple denthidayssas nuuni ubbay markka. <sup>33</sup> Hessa  
gisho, Xoossay baara haarana mela baappe ushachcha baggara iya dhoqqu dhoqqu ooth-  
idi, iyaw immana geetettida Geeshsha Ayyaana ekkidi, hayssa hintte ha77i be7eyssanne  
si7eyssa nu bolla gussis. <sup>34-35</sup> Gaasoykka, Dawitey ba huu7en salo bibeennashin yaagis:  
'Goday, ta Godaa, "Taani ne morkketa

ne tohoy yedhdhiyaso oothana gakkanaaw  
hayssan taappe ushachcha baggan utta" gis'

yaagis.

<sup>36</sup> "Hessa gisho, ha hintte masqaliya bolla kaqqida Yesuusa, Xoossay Godanne Kiristtoosa  
oothidayssa Isra7eele asa ubbay turma ero" yaagis.

<sup>37</sup> Asay Phexiroosi gidayssa si7ida wode bantta wozanan boshettidi Phexiroosanne  
hankko hawaaretakko, "Ishato, yaatin nuuni ay oothinoo?" yaagidosona.

<sup>38</sup> Phexiroosi enttako, "Hintte nagaray atto geetettana mela nagaraappe simmidi, hintte  
issoy issoy Yesuusi Kiristtoosa sunthan xammaqtite. Xoossay immiya Geeshsha Ayyaana  
hintte ekkana. <sup>39</sup> Gaasoykka Xoossay immana gida ufayssa qaalay hinttes, hintte nay-  
tasinnee Goday nu Xoossay baakko xeegiya haahon de7iya ubbaassa" yaagis.

<sup>40</sup> Phexiroosi enttaw hara qaalakka gujji markkattidi, "Ha wodiya geella asaa bolla  
yaanaw de7iya pirddafe hintte huu7iya ashshite" yaagidi zoris. <sup>41</sup> Phexiroosi odidayssa  
ekkidayssati xammaqtidosona. He gallas heedzu mukulu gidiya asay ammanidosona.

<sup>42</sup> Entti hawaareta timirttian, issifetethan, uytha muusaninne Xoossaa woosan min-  
noosona.

### *Ammaniya asaa issifetetha de7uwa*

<sup>43</sup> Hawaareta kushen daro oorathabaynne malaati oo settiya gisho asa ubbay yayyidosa. <sup>44</sup> Ammanida ubbay issife de7oosona; bantaw de7iyaba ubbaa issife shaakettosona. <sup>45</sup> Entti bantaw de7iyabaa bayzidi miishiya issuwash mela koshshida mela shaakkosona. <sup>46</sup> Ubba gallas issi wozanaan gididi Xoossa Keethan shiiqosona. Bantta keethan issoy issuwa xeegidi ufayssaninne ashkke wozanaan katha moosona. <sup>47</sup> Xoossaa galatishe asa ubban sabettidosona. Goday atteyssata gallas entta bolla gujjees.

### 3

#### *Wobbe addey paxis*

<sup>1</sup> Issi gallas Phexiroosinne Yohaannisi Xoossaa woossanaw uddufun saaten Xoossa Keethi bidosona. <sup>2</sup> Yelettoosoppe doomidi wobbe gidida issi addey Xoossa Keethi geliya asaappe miishe woossana mela ubba wode lo77o giya Xoossa Keethaa penggiyan ehidi wothoosona. <sup>3</sup> He wobbe addey Phexiroosinne Yohaannisi Xoossa Keethi gelana hanishin be7idi entta miishe woossis.

<sup>4</sup> Enttika iya caddi xeellidi, “Nuukko haa xeella” yaagidosona. <sup>5</sup> Wobbe addey enttafe aykko ekkako daanin enttako xeellis. <sup>6</sup> Shin Phexiroosi iyaakko, “Taw miishey baawa, shin taw de7iyabaa taani new immana. Naazirete Yesuus Kiristtoosa sunthan denddada hamutta” yaagis.

<sup>7</sup> Hessafe guye, wobbe addiya ushachcha kushiya oykkidi denthis. Ellesidi iya tohoynne qinccafyle minni aggis. <sup>8</sup> Addey guppidi denddi eqqis. Gedenne ha hamuthi doomis. Hessafe guye, hamuttishe, guppishenue Xoossaa galatishe enttara issife Xoossa Keethi gelis.

<sup>9</sup> I hamuttishininne Xoossaa galatishin asa ubbay iya be7idosona. <sup>10</sup> Be7ida ubbay miishe woossanaw lo77o giya Xoossa Keetha penggen uttidayssi iya gididayssa eridosona; I hanidabaa be7idi malalettidosona.

#### *Phexiroosi Xoossa Keethan haasayida haasaya*

<sup>11</sup> Addey Phexiroosappenne Yohaannisappe duuxike gidi oykkidi de7ishin asa ubbay malaalettidi, Solomone barandda giyason issife enttako woxxidosona. <sup>12</sup> Phexiroosi asaa be7ida wode asaakkko, “Isra7eele asaw, ays hayssan malaaletteti? Woykko ays nuna caddi xeelletti? Nuuni nu wolqqan woykko nu xillotethan ha addiya hamuthidabaa hinttew daanil? <sup>13</sup> Abrahame, Yisaqaqa, Yayqooba Xoossay, nu aawata Xoossay, ba na7aa Yesuusa bonchchis. Shin hintte hayqos aathii immidayssa Philaaxoosi billanaw koyinkka hintte iya sinthan, ‘Nuuni iya erokko’ yaagideta. <sup>14</sup> Hintte geeshshaanne xilluwaa, ‘Nuuni iya erokko’ gidi, shemppo wodhidayssa hinttew billana mela Philaaxoosa woossideta. <sup>15</sup> De7uwa immeysa hintte wodhideta, shin Xoossay hayqoppe iya denthis. Hessas nuuni markka. <sup>16</sup> Ha hintte be7eysinne eriya addey paxidi minniday Yesuusa sunthan ammanidayssana. Ha hintte ubbaa sinthan iya hayssada pathiday I Yesuusa ammanida gishossa.

<sup>17</sup> “Ha77ika ta ishato, hinttaka hinttaka kaaletheyssatada, eronna oothidayssa taani erays. <sup>18</sup> Shin Xoossay beni nabeta ubbaa doonan, ‘Kiristtoosi waaye ekkanaw bessees’ yaagidayssi hayssada polettana mela oothis. <sup>19</sup> Hiza, Xoossay hintte nagara atto gaana mela Godaakkoo simmite. <sup>20</sup> Godaa matapape minthetho wodey hinttew yaana. Xoossay Kiristtoosa gidana mela sinthattidi doorida Yesuusa hinttew yeddana. <sup>21</sup> Xoossay ba geeshsha nabeta doonan beni odidayssa mela ubbabay ooraxiya wodey gakkanaw Yesuusi salon gam77anaw bessees. <sup>22</sup> Musey, ‘Godaa Xoossay tana denthidayssa mela hintte giddofe hinttew nabe denthana. Hintte I geyssa ubbaa si7ite. <sup>23</sup> He nabey odyessa si7onna asi oonikka asaa giddofe shaakettidi dhayo’ yaagis.

<sup>24</sup> “Qassi Saamu7eelappe doomidi de7iya nabeti ubbay ha wodiyaba odidosona. <sup>25</sup> Hintte nabeta nayta; qassi Xoossay Abrahames, ‘Sa7an de7iya asa ubbaa taani ne sheeshaa baggara anjana’ yaagidi nu awatas gelida qaala laattiya nayta. <sup>26</sup> Xoossay hinttenu ubbaa hintte iita ogiyappe zaaridi anjana mela ba na7aa denthidi hinttew koyer yeddis” yaagis.

### 4

#### *Phexiroosinne Yohaannisi Ayhude Shanggo sinthan*

<sup>1</sup> Phexiroosinne Yohaannisi asaas odishin kahine halaqati, Xoossa Keethaa naageyssata halqaaynne Saduqaaweti enttaka yidosona. <sup>2</sup> Entti Yesuusi hayqoppe denddoysanne iya gaason hayqoppe denddoy de7eyssa asaa tamarassida gisho yilotidosona. <sup>3</sup> Hessa gisho, entta oykkidi sa7ay omarssida gisho wonttana gakkanaw qasho keethi gelssidosona. <sup>4</sup> Shin

qaala si7idayssatappe daroti ammanidosona. Ammanida adde asaa tayboy ichchashu mukulukko bis.

<sup>5</sup> Wonttetha gallas deriya haareyssati, cimatinne, higge asttamaareti Yerusalaamen shi- iqidosona. <sup>6</sup> He asa giddon kahine halaqay Haanni, Qayyaafi, Yohaannisi, Iskkinddireynne kahine halaqaa soo asati ubbay de7oosona. <sup>7</sup> Hawaareta bantta sinthan essidi, “Aybi wolqqan woykko oodde sunthan hayssa hintte oothidetii?” yaagidi oychchidosona.

<sup>8</sup> He wode Phexiroosi Geeshsha Ayyaanen kumidi, “Deriya haareyssato, cimato, <sup>9</sup> hachchi ha wobbe addiyaas oosettida lo77o oosuwasinne I waanidi paxidaakko hintte nuna oychchiko, <sup>10</sup> masqaliya bolla hintte kaqqin, Xoossay hayqoppe denthida Naazirete Yesuuus Kiristtoosa sunthan ha addey paxidi hintte sinthan eqqidayssi hinttewunne Isra7eela asa ubbaas eretto.

<sup>11</sup> ‘Gimbeyssati boridi ixxida shuchchay,

godaaxaphuwa minthiya,  
ubbaafe aadhdhiya shuchchu gidis;

he shuchchay Yesuusa.’

<sup>12</sup> Hessa gisho, atotethi iya baggarappe attin hara oodde baggarakka baawa. Nuuni iya sunthan attana mela asa ubbaas Xoossay saloppe garssan immida hara sunthi baawa” yaagis.

<sup>13</sup> Shiiqida asay Phexiroosinne Yohaannisi minnida minotethaa be7ida wode entti tamaariboonna coo asi gidiidysa akeekidi malaalettidosona; entti Yesusara de7eyssa eridosona. <sup>14</sup> Qassi paxida addey Phexiroosaranne Yohaannisara eqqidayssa asay be7idi giyabaa dhayidosona. <sup>15</sup> Shin Phexiroosanne Yohaannisara keyana mela oothid bantta giddon, <sup>16</sup> “Ha asata nu ay oothinoo? Entta kushen oosettida gita malaatay Yerusalaamen de7iya ubbaas benttees. Nuuni hessa erokko gaanaw dandda7okko. <sup>17</sup> Shin ha oday asaa giddon laalettonna mela hizappe guye ha asati Yesuusa sunthan ooddeskka odonna mela minthidi naagisana” yaagidi zorettidosona.

<sup>18</sup> Entta xeegidi, Yesuusa sunthan hizappe odonna mela woykko tamaarssonna mela kiit- tidosona. <sup>19</sup> Shin Phexiroosinne Yohaannisi enttako zaaridi, “Xoossaas kiitetanayssafenne hinttew kiitetanayssafe Xoossaas sinthan awussi lo77oko ane hintte pirdrite. <sup>20</sup> Nuuni be7idabaanne si7idabaa odonna agganaw dandda7okko” yaagidosona.

<sup>21</sup> Biitta cimatinne deriya haareyssati kaseppe minthi naagisidi entta yeddi aggidosona. Asay hanidabaas Xoossaas galatiya gisho entta seeranaw dandda7ibookkona. <sup>22</sup> He malaatan harggiyafe pathida addiyaas laythay oytamappe aadhdhis.

#### *Ammaniya asaa woosaa*

<sup>23</sup> Phexiroosinne Yohaannisi birshshettidi bantta dabbottakki bidi, kahine halaqatinne cimati banttako gidabaa ubbaa enttaw odidosona. <sup>24</sup> Entti hessa si7ida wode issi wozanan gidiidi Xoossaas hayssada yaagidi woossidosona: “Ubbaa Haariya Godaw, saluwa, sa7aa, abbaanne entta giddon de7iya ubbabaa medhdhidiyasso, <sup>25</sup> Neeni ne aylliya, nu aawa Dawite doonan Geeshsha Ayyaanen, Derey ays yilotidonaa?

Asay ays coo maqettidonaa?

<sup>26</sup> Sa7aa kawotinne

deriya haareyssati issife Godaa bollanne  
Kirisittoosa bolla denddidosona’ yaagadasa.

<sup>27</sup> “Tumakka, Heroodisinen Phenxe Philaaxoosi Ayhude gidonna asaaranne Isra7eele asaara ne doorida ne geeshsha Na7aa Yesuusa bolla denddanaw ha kataman shiiqidosona. <sup>28</sup> Qassi neeni ne wolqqaninne ne sheniyano oothana gada qoppa uttidabaa ubbaa polidosona. <sup>29</sup> Ha77ika Godaw, entta manddethaa be7a; nuuni ne aylleti ne qaala kumetha wozanan odana mela nuna dandda7isa. <sup>30</sup> Ne geeshsha na7aa Yesuusa sunthan hargganchchota pathanaw, oorathabaynne malaatati oosettana mela ne kushiya micca” gidi woossidosona.

<sup>31</sup> Entti Xoossaas woossidaappe guye he entti shiiqidasyo qaaxxis. Entta ubban Geeshsha Ayyaani kumin Xoossaas qaala minotethan odidosona.

#### *Koyro ammanida asaa issifetethaa*

<sup>32</sup> Ammaneysati ubbay qofaninnee wozanan issino gidiidosona. Entti banttaw de7iyabaa tabaa goonnashin issife shaakettoosona. <sup>33</sup> Hawaarti Godaa Yesuusi hayqoppe denddiossaya gita wolqqan markkattosona. Xoossay entta ubbaas aadho keehatethaa darssidi immis. <sup>34</sup> Biitti woykko keethi de7eyssati ubbay bayzi ekkida miishiya ehiya gisho

ammaneyssata giddon metootanchchoy issoykka baawa.<sup>35</sup> Miishiya ehidi hawaaretas immoosona; he miishiya issuwashissuwashissuwas koshsheyssada shaakki shaakki immees.

<sup>36</sup> Qoophiroosa giya bessan yelettida Yoosefa giya Leewe sheeshaappe gidida issoy de7ees. Iya sunthaa hawaareti Barnnabaasa (Minthetho na7a) gidosona.<sup>37</sup> Barnnabaasi baw de7iya biittaa bayzidi miishiya ehidi hawaaretas immis.

## 5

### *Hananiyanne iya machchiw Saphphihiro*

<sup>1</sup> Issi Hananiya giya addey ba machche Saphphiirira gade bayzis. <sup>2</sup> He bayzida miishiyappe ba machchiya erishin baggaa ashshidi, attidayssa ehidi hawaaretas immis.

<sup>3</sup> Shin Phexiroosi Hananiyakkoo, “Neeni Geeshsha Ayyaana cimmana melanne gadiya bayzida miishiyappe shaakkada ashshana mela Xalahey ne wozanan ays gelidee?<sup>4</sup> Neeni bayzanaappe kase gadey nebaa gidenneyye? Qassi neeni bayza simminkka miishey nebaa gidenneyye? Yaatin, hessa melabaa oothanaw ays ne wozanan qoppadai? Neeni Xoossaa bolla worddotadasappe attin asa bolla worddotatabaakka” yaagis.

<sup>5</sup> Hananey he qaala si7ida mela kunddidi hayqqis; hessa si7ida ubbay daro yayyis.  
<sup>6</sup> Na7atetha asati soo gelidi iya ahaa xaxidi efidi moogidosona.

<sup>7</sup> Heedzu saateppe guye Hananiya machchiya hessa eronna de7ashe Phexiroosi de7iyasuwa gelasu.<sup>8</sup> Phexiroosi iikko, “Hintte gadiya hayssa mela miishes bayzidet? Ane taw oda” yaagis.

Iyakka, “Ee, hayssa mela miishes bayzida” yaagas.

<sup>9</sup> Phexiroosi maccasiw, “Neeranne ne azinaara Godaa Ayyaana paaccanaw ays zoretidetii? Hekko, ne azina moogida asati karen de7oosona; nenakka entti kare kessana” yaagis.

<sup>10</sup> Maccasiyi iirkakka Phexiroosa tohuwa matan kunddada hayqqa aggasu; na7atethati geliya wode hayqqidaaro demmidi kare kessidi, I azina matan moogidosona.<sup>11</sup> Kumetha woosa keethaynne hessa si7ida hara asa ubbay daro yayyidosona.

### *Oorathabatanne malaalisyiyabata*

<sup>12</sup> Hawaareti daro malaatatanne oorathabata asaa giddon ooothoosona. Ammaniya ubbay Solomone baaranddan issife shiqosona.<sup>13</sup> Hara asappe enttara gahettanaw issi asikka minnibeenna, shin asay entta bonchchees.<sup>14</sup> Ammaniya addetanne maccasata tayboy kaseyssafe darishe bis.<sup>15</sup> Hessa gisho, asay hargganchchota halanine alggan tookkidi Phexiroosi aadhdiya wode iya kuyay enttafe issota issota bolla shemppana mela oge doonan kessidi woothoosona.<sup>16</sup> Qassi daro asay Yerusalame matan de7iya katamatappe hargganchchotanne tuna ayyaani waaysiya asata ekkidi yoosona; ubbayka paxidosona.

### *Hawaareta bolla goodi denddis*

<sup>17</sup> Kahine halaqaynne iyara de7iya Saduqaaweti ubbay qanaaten kumidi hawaareta bolla denddidosona.<sup>18</sup> Hawaareta oykkidi deriya qasho keethan yeggidosona.<sup>19</sup> Shin Godaa kiitanchchoy qamma qasho keethaa penggiya dooyidi hawaareta kare kessidi,<sup>20</sup> “Bidi, Xoossa Keethan eqqidi ha oratha de7o qaala asa ubbaas odite” yaagis.<sup>21</sup> Hawaareti hessa si7ida wode wontta guura Xoossa Keethi gelidi tamaarsso doomidosona.

Kahineta halaqaynne iyara de7eyssati yidi, Isra7eele cimata ubbaa xeegi shiishidi hawaareta bantta sinthe ehana mela wotaaddareta qasho keethi kiittidosona.<sup>22</sup> Shin wotaaddareti qasho keethi bidi hawaareta demmibookkona. Guye simmi yidi deriyas,<sup>23</sup> “Nuuni biya wode qasho keetha penggey minthi gordettin, naageyssati penggen eqqidayssata demmida. Shin nuuni kariya dooyaa wode giddon hari attoshin issi asikka baawha” yaagidosona.<sup>24</sup> Hessa gisho, Xoossa Keethaa wotaaddareta kiitteyssine kahine halaqati hessa si7ida wode “Hawaareta bolla aybi haanide?” yaagidi hirggidosona.

<sup>25</sup> He wode issi addey enttako yidi, “Hekko, qasho keethi hintte gelssida asati Xoossa Keethan eqqidi asaa tamaarssoosona” yaagidi enttaw odis.<sup>26</sup> Xoossa Keethaa wotaaddareta kiitteyssii ba wotaaddaretara bidi hawaareta ehis. Shin entti bantana asay shuchchan caddana gidi yayyida gisho entta aaddashidi ehidosona.

<sup>27</sup> Entti hawaareta ehidi, shiiqida shangguwa sinthan essin kahine halaqay enttako,<sup>28</sup> “Hinttena nuuni he uraa sunthan tamaarssonna mela minthidi kiittibookko? Hekko, hintte timirtiya Yerusalame katamaa ubbaa gathideta. He uraa shemppuwas nuna oythananaw qoppeeti?” yaagidi oychchis.

<sup>29</sup> Phexiroosaranne hankko hawaaretarata enttaw zaarishe, “Nuuni asas kiittetanappe Xoossas kiittetanaw bessees.<sup>30</sup> Masqaliya bolla hintte kaqqidi wodhida Yesuusa nu

aawata Xoossay hayqoppe denthis. <sup>31</sup> Isra7eeleti nagaraappe simmana melanne entta nagaray atto geetettana mela Xoossay Yesuusa haareyssanne ashsheyssa oothidi bonch-chon baappe ushachcha baggan utisis. <sup>32</sup> Hessas nuuni markka; qassi Xoossay bana ammaneyssatas immida Geeshsha Ayyaanaykka markka” yaagidosona.

<sup>33</sup> Shiiqida asay hessa si7ida wode daro yilottidi, hawaareta wodhanaw qoppidosona. <sup>34</sup> Shin asa ubban daro bonchchettida, higge asttamaarey, Gamaaliyale giya issi Farisaawey denddi eqqidi hawaareta guutha wodes kare kessana mela kiittis. <sup>35</sup> Hessafe guye, shiiqida asaakkko, “Isra7eele asaw, ha asata bolla hintte oothanaw qoppiyabaappe naagettite. <sup>36</sup> Ays giikko, hayssafe kase Tewodaasi bana, ‘Taani git’ gidi denddin, oyddu xeetu gidiya asati iyara issifidosona. Shin iya wodhin iya kaallida ubbay laalettin pathonna asi gidiidi attidosona. <sup>37</sup> Hessafe guye, asay taybettiya wode Galila Yihudi dend-didi daro asa panggayidi kaalethis, shin iyakka wodhin iya kaallida asa ubbay laalettis. <sup>38</sup> Ha7tika ta hinttew odays, ha asatapppe shaakettite; entta bochchofite. Ays giikko, ha qofaanne ha oosuwa asi oothiyabaa gidikko dhayana. <sup>39</sup> Shin ha qofaynne ha oosoy Xoossaafe yidabaa gidikko, hintte entta dhayssanaw dandda7ekketa. Geellada yaanishe hintte Xoossaara kaccettana” yaagidi odis. Hessa gisho, shiiqida asay Gamaaliyale zoriya ekkidosona.

<sup>40</sup> Hawaareta soo xeegidi lisson garaafisis. Hessafe guye, enttako, “Yesuusa suntha nam77antho denthofite” gidi birshshi yeddisosona. <sup>41</sup> Yesuusa suntha gisho entti kawuyanayssi bessiyabaa gideyssa erida gisho shangguwa sinthafe ufayttishe keyidosona. <sup>42</sup> Entti ubba wode Xoossa keethaninne asaa son Yesuusi I Kiristtoosa gideyssa tamaarssonne sabbako aggibookona.

## 6

### *Laappun asata dooretethaa*

<sup>1</sup> He wode kaalleyssata tayboy dari dari bishin, Girike doona odettiya Ayhudeti Yi-hudan yelettidi de7iya Ayhudeta bolla zuuzummidosona. Ays giikko, Girike doona odettiya Ayhudeti, “Gallas gallas imettiya kathan nu am77eti naaqettosona” yaagidosona. <sup>2</sup> Tammanne nam77u hawaareti woosa keethaa asa ubbaa xeegidi, “Nuuni Xoossaa qaala odehyssa aggidi kathi gishanaw nuus bessenna. <sup>3</sup> Hiza, ishato, lo77o asata, Geeshsha Ayyaananine cincatethan kumida laappun asata hintte giddofe doorite; nuuni entta ha oosuwas shuumana. <sup>4</sup> Shin nuuni, nu kumetha wodiya Xoossaa woosaninne qaala tamaarsson peeshshana” yaagidosona.

<sup>5</sup> Hawaareti odida odays asa ubbaa ufayssis. Hessa gisho, ammanoyenne Geeshsha Ayyaani kumida Isxifaanose, Filphoosa, Phirokorooza, Niqaarone, Ximoona, Pharmeenanne Ayhude ammano geli simmida Anxookiya Niqolawoosa dooridosona. <sup>6</sup> Entta hawaareta sinthan essin, hawaareti entta bolla kushe wothidi Xoossaa woossidosona.

<sup>7</sup> Xoossaa qaalay dalggi dalggi bis. Yerusalemmen de7iya ammaneyssata tayboy dari dari bis; daro kahinetikka ammanidosona.

### *Isxifaanosey oykettis*

<sup>8</sup> Isxifaanosey aadho keehatethaaninne wolqqan kumidi asaa giddon oorathabatanne malaatata oothees. <sup>9</sup> Aylletethafe keyida Ayhude Woosa Keetha asay Qereenappenne Iskkinndiriyappe Kilqiyafenne Iisiyappe yida issi issi asati denddidi Isxifaanoserla palamidosona. <sup>10</sup> Shin Isxifaanosey Ayyana wolqqan odettiya cincatethaa entti eqettanaw dandda7ibookkona.

<sup>11</sup> He wode entti, “Musenne Xoossaa I cayishin si7ida” giya worddo asata shammidosona. <sup>12</sup> Hessada oothidi biitta cimatanne higge asttamaareta iya bolla denthidosona. Isxi-faanose oykkidi Shangguwa sinthe efidosona. <sup>13</sup> Iya bolla paydida worddo markkati, “Ha uray ha Xoossa Keethanne Muse higgiya zaari zaari cayees. <sup>14</sup> I, ‘Hayssi Naazirete Yesuusi, ha Xoossa Keethaa laallana; qassi Musey nuus immida higgiya laammana’ yaagishin nuuni si7ida” yaagidosona.

<sup>15</sup> Shango shiijon uttida asa ubbay Isxifaanose loythidi xeelliya wode iya som77oy kiitanchcho som77o daanees.

## 7

### *Isxifaanose haasaya*

<sup>1</sup> Kahieta halaqay Isxifaanosekko, “Hayssi tumee?” yaagidi oychchis.

<sup>2</sup> Isxifaanosey, “Ta ishato, ta aawato, si7ite! Nu aawa Abrahamey Kaaranen daanaw baanappe sinthe Masephexoomiyan de7ishin, bonchcho Xoossay iyaw qonccidi, <sup>3</sup> ‘Ne biittaafenne ne dabbottappe shaakettada taani nena bessiya biittaa ba’ yaagis. <sup>4</sup> He wode

Abrahamey Kalddaaaweta biittaafe keyidi Kaaranen daanaw bis. Iya aaway hayqqidaappe guye Xoossay iya ha biittaa ha77i hintte de7iya bessaa ehis. <sup>5</sup> I ha biittaafe hari attoshin tohoy yedhdhiya bessika Abrahames immibeenna. Shin na7i iyaw baynna wode Xoossay ha biittaa iyawunne iya sheeshaas laata oothidi immanayssa qaala gelis. <sup>6</sup> Xoossay Abrahamekko, 'Ne sheeshay hara biittan imathatethan daana; yan oyduu xeetu laythi entti aylletethan haarettana. <sup>7</sup> Shin taani ne sheeshaa haariya deriya bolla pirddana. Hessafe guye, entti he biittaafe keyidi hayssan taw goynnana' yaagis. <sup>8</sup> Xoossay Abrahame sheeshay qaxxarettaan mela iyara caaqqin, Yisaaci yelettida hosppuntha gallasan qaxxaris. Yisaaci Yayqooba qaxxaris; qassi Yayqoobi tammanne nam77u ba nayta, nu aawata mayzata qaxxaris.

<sup>9</sup> "Yayqooba nayti Yoosefa qanaattidi Gibxxe biittan aylletethas bayzidosona, shin Xoossay iyara de7ees. <sup>10</sup> Iya, iya waaye ubbaafe kessis. Gibxxe kawuwa sinthan sabanne cincatethi iyaw immis. Gibxxe kawoy Yoosefas Gibxxe biittaanne ba keetha ubbaaaysanaada halaqatethi immis.

<sup>11</sup> "Gibxxe biittaninne Kanaane biitta ubban koshi gelidi daro asaa un77ethis. He wode nu mayzati kathi demmanaw dandda7ibookkona. <sup>12</sup> Yayqoobi Gibxxe biittan kathi de7eyssa si7idi nu aawata koyro yaa yeddiss. <sup>13</sup> Nam77antho buussan Yoosefi ba ishatas banatethaa erisis. Gibxxe kawoykka Yoosefa sheeshaa eris. <sup>14</sup> Yoosefi ba aawa Yayqoobanne ba dabbo ubbaa, laappun tammanne ichchashu asaa baakko yaana mela kiittidi ehisis. <sup>15</sup> Yayqoobi Gibxxe biittaa wodhdhis; inne iya nayti yan hayqqidosona. <sup>16</sup> Entta ahay he bessaafe Seekeme biittaa tookettidi bidi, yan Abrahamey Hamoore naytappe daro biran shammida duufon moogettis.

<sup>17</sup> "Shin Xoossay Abrahames immana gidayssa poliya wodey gakkaw matida wode Gibxxe biittan de7iya nu asay dari dari bis. <sup>18</sup> Hessafe guye, Yoosefa eronna hara kawoy Gibxxe biittan kawotis. <sup>19</sup> He kawoy nu zerethaa genidi guutha nayti hayqqana mela entta kare kessi yeggana mela nu aawata un77ethis.

<sup>20</sup> "He wode Musey yelettis; I Xoossa sinthan daro lo77o na7a. Ba aawa keethan heedzu ageena gakkaw diccis. <sup>21</sup> Musey wora holettida wode Gibxxe kawuwa na7iya demma ekkada ba na7a oothada iya dichchasu. <sup>22</sup> Musey Gibxxeta cincatetha ubbaa tamaaridi odaninnee ooson mino asi gidis.

<sup>23</sup> "Muses laythay oytama kumida wode ba ishata, Isra7eeleta be7anaw ba wozanan qoppis. <sup>24</sup> Isra7eelatappi issuuwa Gibxxe issyo qohishin be7idi he Isra7eele uraa maaddidi, he qohida Gibxxe uraa wodhidi kushe zaaris. <sup>25</sup> Musey ba ishata ba baggara Xoossay ashshanaw haneysa entti akeekana gidi qoppis, shin entti akeekibookkona.

<sup>26</sup> "Wonttetha gallas nam77u Isra7eele asati issyo issuwara wadhattishin demmidi entta sigethanaw koyidi, 'Asato, hintte ishantta; ays issyo issuwa qohetii?' yaagis.

<sup>27</sup> "Shin ba laggiya qoheyssi Musekko, 'Nena nu bolla haareyssanne daynna oothiday oonee? <sup>28</sup> Neeni zine Gibxxe uraa wodhidayssada tana wodhanaw koyay?' yaagidi Muse sugi yeddiss. <sup>29</sup> Musey hessa si7ida wode Gibxxefe betidi Miidiyaame biittan bete asi gididi de7ishe nam77u adde nayta yelis.

<sup>30</sup> "Godaa kiianchchoy oytamu laythafe guye Siina Deriya matan de7iya bazzo tushiya giddon eexiya tama laco giddon Muses benttis. <sup>31</sup> Musey ba be7idayssan malalet-tidi, loythi be7anaw tushiya mati shiiqidi de7ishin, Godaa qaalay. <sup>32</sup> Taani ne aawata, Abrahame Xoossa, Yisaaci Xoossa, Yayqooba Xoossa' yaagishe Musekko yis. Musey yashshan kokkoridi xeellanaw dandda7ibeenan.

<sup>33</sup> "Goday Musekko, 'Neeni eqqida biittay geeshshi gidiya gisho ne tohuwan de7iya caammaa kessa. <sup>34</sup> Taani Gibxxen de7iya ta asaa un77etethaa be7as. Entta waasuwa si7ada entta ashshanaw wodhdhas. Ha77i haaya! Taani nena Gibxxe kiittana' yaagis.

<sup>35</sup> "Isra7eeleti Muse, 'Nena nuna haareyssanne daynna oothiday oonee?' yaagidi ixxidayssa tushiya giddon iyaw benttida kiianchchuwa baggara haareyssanne ashshayssa oothidi Xoossay kiittis. <sup>36</sup> Musey Isra7eeleta Gibxxefe kessidi malaalisiyabatanne oorathabata Gibxxe biittaninne Zo7o Abban oothidi entta oytamu laythi bazzo biittan kaalethis.

<sup>37</sup> "Isra7eele asaakko, 'Xoossay tana denthidayssada hintte sheeshaa giddofe ta mela nabe hinttew denthana' yaagiday he Muse. <sup>38</sup> Bazzo biittan shiiqida Isra7eele asaara

7:4 Medhe 11:31; 12:4	7:5 Medhe 12:7; 13:15; 15:18; 17:8	7:6 Medhe 15:13-14	7:7 Kessa 3:12	7:8
Medhe 17:10-14; 21:2-4; 25:26; 29:31-35	7:9 Medhe 37:11,28; 39:2,21	7:10 Medhe 41:39-41	7:11 Medhe 42:1-2	
7:13 Medhe 45:1,16	7:14 Medhe 45:9-10,17-18; 46:27	7:15 Medhe 46:1-7; 49:33	7:16 Medhe 23:3-16; 33:19;	
50:7-13; Iya 24:32	7:17 Kessa 1:7-8	7:19 Kessa 1:10-11,22	7:20 Kessa 2:2	7:21 Kessa 2:3-10
Kessa 2:11-15	7:29 Kessa 18:3-4	7:30 Kessa 3:1-10	7:35 Kessa 2:14	7:36 Kessa 7:5; 14:21; Tay 14:33
7:37 Zaare 18:15,18				

de7idayssi, nu aawataranne Siina Deriya bolla iyaw odida kiitanchchuwara de7ida Musey iya. Yaatidi, Xoossaa de7o qaala nuus immanaw ekkis.

<sup>39</sup> “Shin nu mayzati Muses kiitettanaw dosibookkona; iya ixxidi guye Gibxxe simmanaw amottidosona. <sup>40</sup> Qassi Aaronakko, ‘Nuna kaaletiha xoossata nuus ootha. Ays giikko, hayssi nuna Gibxxefe ehida Musey, waanidaakkoo nuuni erokko’ yaagidosona. <sup>41</sup> He wode mari daanisidi eega oothidosona. He eeqaas yarshsho yarshshidi bantta kushen oothida oosuwan ufayttidosona. <sup>42</sup> Shin Xoossay enttaw zokko zaaris. Entti salo xoolinttota goynnana mela entta yeggi aggis. Nabetta maxaafan,

‘Isra7eele asaw, oytamu laythi kumethi

bazzo biittan shukkida mehiyanne

yarshshida yarshshuwa taw yarshshidetii?

<sup>43</sup> Hinttee, hinttew goynnanaaw kessida eeqaanne Moloke dunkkaaniya

Refaana giya hintte xoossaa xoolintto misiliya tookkideta.

Taani hinttena Baabiloonepppe

hini bagga yeddana’ geetettidi xaafettis.

<sup>44</sup> “Nu aawatas bazzo biittan markka dunkkaaney de7ees. Iyakka Xoossay Muse kiittidayssadanee iya bessidayssada oothis. <sup>45</sup> Qassi nu aawati he dunkkaaniya bantta aawatappe ekkidi Xoossay kase yedethida Ayhude gidonna asaa biittaa oykkida wode Iyyasura yaa ekkidi gelidosona. He dunkkaaney Dawite wode gakkanawukka he bessan de7is. <sup>46</sup> Dawitey Xoossan sabbettis. Qassi Yayqooba Goday de7ana keethaa keexanaw Xoossaa woossis. <sup>47</sup> Shin iyaw keethaa keexiday Solomone.

<sup>48</sup> “Hanoshir, Ubbaafe Bolla Xoossay asi keexida keethan deenna. Nabey gidayssa mela,

<sup>49</sup> Saloy ta arataa,

sa7aykka ta tohoy yedhdhiyaso.

Yaatin, taw hintte ay mela keethi keexanee?

Woykko taani shemppiyasoy awunee? <sup>50</sup> Ha ubbaa ta kushiyan oothabiikkinaa? yaagees Goday.

<sup>51</sup> “Hintte waanida si7onna asee? Hintte wozanay Xoossaa qaala ekkanaw ays ixxide? Hintte haythay ays tullidee? Hinttee, hintte aawatatho ubba wode Geeshsha Ayyaanara egetteeta. <sup>52</sup> Nabetta giddofe hintte aawati gooddonnay oonee? Xoossaa Na7ay, Illoy yanaynassa kasetidi odidayssata wodhidosa. Ha77i hintte iya aathi immidi wodhidate. <sup>53</sup> Hintte kiitanchchuwa kusheppe Xoossaa higgiya ekkideta, shin kiitettibeekketa” yaagis.

### *Isxifaanosey shuchchan cadettis*

<sup>54</sup> Entti hessa si7ida wode bantta wozanan Isxifaanose bolla daro yilottidi, bantta metershshaa saxxidi manddidosona. <sup>55</sup> Shin Isxifaanose Geeshsha Ayyaanaran kumidi, salo pude xeellidi, Xoossaa bonchchuwanne Yesuusa Xoossaa ushachcha baggan eqqidayssa be7is. <sup>56</sup> “Hekko, taani saloy dooyettin, Asa Na7ay, Xoossaa ushachcha baggan eqqidayssa be7ays” yaagis.

<sup>57</sup> Qaalaa dhoqqu oothidi waassishe, bantta haythaa oykkidi issife iyaakko woxxidosona

<sup>58</sup> Iya katamaappe gaxa kessidi, shuchchan caddidosona. Markkati bantta ma7uwa issi Saa7ola giya na7atethaa matan wothidosona.

<sup>59</sup> Isxifaanosey, “Ta Godaa Yesuusaa, ta shemppuwa ekka” yaagidi xeegishin entti iya shuchchan caddoosona. <sup>60</sup> Gulbbatidi, ba qaala dhoqqu oothidi, “Ta Godaw, ha nagaraa enttaw atto ga” yaagis. Hessa yaagidi simmida mela hayqqi aggis.

## 8

### *Saa7oli ammaniyyaa asaa goodis*

<sup>1</sup> Saa7oli Isxifaanose hayquwan ufayttis. He gallas Yerusalamen de7iya woosa keethan gitä goodi denddis. Hawaareti attin ammaneyssati ubbay Yihuda biittaninne Samaare biittan laalettidosona. <sup>2</sup> Issi issi Xoossaa asati Isxifaanose moogidosona; qassi iyaw daro yeekkidosona. <sup>3</sup> Shin Saa7oli woosa keethaa dhayssanaw koyees. Soo soo yuuyi gelidi, ammaniyyaa addetanne maccasata goochchi goochchi kessidi qasho keethi gelssees.

### *Wonggelay Samaaren sabbakettis*

<sup>4</sup> Laalettida ammaneyssati bida bessa ubban qaala odidosona. <sup>5</sup> Filphoosi Samaare katamaa bidi Kiristtoosabaa asaas odis. <sup>6</sup> Daro asay Filphoosi gidayssa si7ida wodenne I oothiya malaatata be7ida wode iya akeekidi si7idosona. <sup>7</sup> Tuna ayyaanati waassidi daro

asaappe keyidosona; qassi daro gunddatinne wobbeti biletidosona. <sup>8</sup> He kataman de7iya asay daro ufayttidosona.

<sup>9</sup> Shin Simoomaa giya issi uray he kataman de7ees. I, ‘Bana gita’ gidi Samaare asaa marotethan malaalishe gam77is. <sup>10</sup> Guuthafe gita gakkaw de7iya asa ubbay, “Gita Xoossa wolqqay hayssa” gidi iyabaa si77oosona. <sup>11</sup> Daro wodeppe doomidi marotethan Samaare asaa malaalisa gisho asay iyabaa si77oosona. <sup>12</sup> Shin Filphoosi Xoossa ka-wotethabaanne Yesuuus Kiristtoosa sunthabaa addetasinne maccatas odin, entti iyabaa ammanidi xammaqettidosona. <sup>13</sup> Qassi Simoomikka ba huu7en ammanidi xammaqettis. Filphoosara issife bida bessa ubban oosettiya gita malaatafa be7idi malaaleettis.

<sup>14</sup> Yerusalaamen de7iya hawaareti Samaare asay Xoossa qaala ekkidayssa si7ida wode Phexiroosanne Yohaannisa enttako yeddidosona. <sup>15</sup> Phexiroosinne Yohaannisi bidi, am-maneyssati Geeshsha Ayyaana ekkana mela enttaw Xoossa woossidosona. <sup>16</sup> Ays giikko, Samaare asati Godaa Yesuusa sunthaa xalaalan xammaqettidosonappe attin enttafe is-suwa bollaka Geeshsha Ayyaani wodhdhibeenna. <sup>17</sup> He wode Phexiroosinne Yohaannisi bannta kushiya entta bolla wothin, entti Geeshsha Ayyaana ekkidosona.

<sup>18</sup> Hawaareti bannta kushiya entta bolla wothin, enttaw Geeshsha Ayyaanay imetti-dayssa Simooni be7ida wode Phexiroosasinne Yohaannisas miishe ehidi, <sup>19</sup> “Taaniikka ta kushiya wothiya ubbay Geeshsha Ayyaana ekkana mela ha maata tawukka immerkketi” yaagis.

<sup>20</sup> Shin Phexiroosi iyaakko, “Neeni Xoossa imotaa miishen shammanaw qoppida gisho ne miishey neera dhayo. <sup>21</sup> Ne wozanay Xoossa sinthan suure gidonna gisho new hayssan gishoy woykko qaadi baawa. <sup>22</sup> Hiza, ha ne wozanaa iiftatethaa gisho nagaraappe simma. Ne wozanan de7iya iita qofaa Xoossay atto gaana mela Xoossa woossa. <sup>23</sup> Gaasoykka, neeni iita qanaateninne nagara qashuwan de7eyssa taani be7ays” yaagis.

<sup>24</sup> Simooni zaaridi, “Hintte gidayssafe issoykka tana gakkonna mela taw Xoossa woosite” yaagis.

<sup>25</sup> Phexiroosinne Yohaannisi markkattidaappenne Godaa qaala odidaappe guye Yerusalaame simmidosona. Samaaren de7iya daro gutatan Wonggelaa odidosona.

### *Filphoosi Tophphiya moorinnaa xammaqis*

<sup>26</sup> Godaa kiiitanchchoy Filphoosakko, “Denddada Yerusalaamepppe Gaaza efiya bazzo bliitta ogiyakko ba. He ogey dugey baggara de7ees” yaagis. <sup>27</sup> Filphoosi denddidi bis. Hinddeke giya Tophphiya kawees I miishe ubbaa naagiya Tophphiya asi de7ees. Ikka goynnanaaw Yerusalaame bis. <sup>28</sup> Para gaariyan uttidi, Yerusalaamepppe ba biittaa simmishe nabiya Isayaasa maxaafaa nabbabees.

<sup>29</sup> Geeshsha Ayyaanay Filphoosakko, “He gaariyakko bada iya mati shiiqa” yaagis.

<sup>30</sup> Yaatin Filphoosi woxxi bidi gakkya wode moorinnay nabiya Isayaasa maxaafappe nabbabishin si7idi, “Ne nabbabeyassi new gelii?” yaagis.

<sup>31</sup> Moorinnay, “Taw odi gelssiya asi baynna waanidi gelanee?” yaagis. Baara gaariyan keyidi uttana mela Filphoosa woossi. <sup>32</sup> Moorinnay nabbabiya maxaafaa kifley,

“I dorssada shukettanaw laagettis;

Dorssa mari ba ikisiya meedeystassa sinthan si77i geyssada,  
ikka ba doona dooyibeena.

<sup>33</sup> I kawuyis; iyaw xillo pirddi dhays.

  iya de7oy ha sa7aappe qanxettida gisho  
  iya sheeshaabaa oone odanay?” yaagees.

<sup>34</sup> Moorinnay zaaridi Filphoosakko, “Nabey odebbaa odi? Babaa odiyye woykko hara asabaa odi? Taw odarkkii” yaagis. <sup>35</sup> Filphoosi zaaridi, Xoossa qaala he bessaafe doomidi, Yesuuusabaa odiya Wonggelaa iyaw odis.

<sup>36</sup> Entti bishe haathi de7iyaso gakkidosona. Moorinnay, “Haathe hayssa be7a; ta xammaqettonna mela aybi diggii?” yaagis.

<sup>37</sup> Filphoosi iyaakko, “Neeni ne kumetha wozanaappe ammanikko dandda7aasa” yaagis. I zaaridi, “Yesuuus Kiristtoosi Xoossa Na7aa gideyssa taani ammanays” yaagis.

<sup>38</sup> Gaarey eqgana mela moorinnay kiittin, nam77ay wodhdhidi haathan gelidosona; Filphoosi iya xammaqis. <sup>39</sup> Entti haathaafe gaxa keyida wode Godaa ayyaanay Filphoosa qopponna ekkis. Nam77antho moorinnay Filphoosa be7ibeenna, shin ba ogiya ufayttishe bis. <sup>40</sup> Filphoosi Azaaxonan bana demmis. Qassi Qisaariya yaana gakkanaw katamatian yuuyidi Wonggelaa markkattis.

*Saa7oli Kiristtoosa ammanis  
(Ha.O 22:6-16; 26:12-18)*

<sup>1</sup> He wode Saa7oli Godaa kaalleyssata wodhanaw manddidi kahine halaqaakkko bis.

<sup>2</sup> Godaa ogiya kaalliyaa addetanne maccata demmiko, qachchishe Yerusalaame ehanaw, Damasqqon de7iya Ayhude Woosa Keethatas dabddabbey xaaftettana mela iya woossis.

<sup>3</sup> I bidi, Damasqqo katamaa gakkanaw matishin, qopponna saloppe wolqqaama poo7oy iya yuushuwan poo7is. <sup>4</sup> I sa7an kunddidashin, “Saa7olaa, Saa7olaa, ays tana goodday?” giya qaala si7is.

<sup>5</sup> Saa7oli, “Godaw, neeni oonee?” yaagidi oychchis.

“Taani, neeni gooddiya Yesusa” yaagis.

<sup>6</sup> Shin Saa7oli kokkorishenner malaalettishe, “Godaw, taani ay oothana mela koyay?” yaagis.

Goday iyaakkko, “Denddada katamaa gela; neeni oothanaw bessiyabay yan new odettana” yaagis.

<sup>7</sup> Saa7olara ogiya biya asati aykkoka odettonna eqqi attidosona. Qaalaa si7oosona, shin oonakka be7ibookkona. <sup>8</sup> Saa7oli kunddida bessaafe denddidi xeelliya wode iya ayfey demmonna ixxis. Hessa gisho, entti iya kushiya oykkidi kaalethidi Damasqqo gelssidosona. <sup>9</sup> Heedzu gallas gakkanaw I xeellanaaw dandda7ibeenna; aykkoka mibeenna; uyibeenna.

<sup>10</sup> Damasqqon issi Hananiya giya Yesuusa tamaarey de7ees. Goday qonccethan, “Hananiya” yaagidi xeegis.

Hananey zaaridi, “Ta Godaw, hayssan de7ays” yaagis.

<sup>11</sup> Goday iyaakkko, “Denddada Suure geetettiya ogiya bada, Yihuda son Saa7ola giya teressepe yida uraa koya; Saa7oli woossees. <sup>12</sup> Qassi Hananey gelidi, Saa7oli nam77antho xeellana mela ba kushiya iya bolla wothishin qonccethan be7is” yaagis.

<sup>13</sup> Hananey zaaridi, “Godaw, Yerusalaamen ne geeshsha asaa bolla he uray ay mela iitabaa oothidaakkko taani daro asaappe si7as. <sup>14</sup> Qassi Damasqqon ne sunthaa xeegeyssata ubbaa qachchanaw, kahine halaqati iyaw maata immidosona” yaagis.

<sup>15</sup> Shin Goday iyaakkko, “Saa7oli Ayhude gidonna asaa sinthan, kawota sinthaninne Isra7eeli asaa sinthan, ta sunthaa erisanawunne taw oothanaw doorettida miishe gidiya gisho neeni iyaakkoo ba. <sup>16</sup> Ays giikko, ta sunthaa gisho I ay mela waaye ekkanaaw bessiyako taani iya bessana” yaagis.

<sup>17</sup> Hananey bidi, soo gelidi, ba kushiya Saa7ola bolla wothidi, “Ta ishaa Saa7ola, neeni yaa ogiyan new benttida Godaa Yesuusi, neeni xeellana melanne Geeshsha Ayyaanan kumana mela tana kiitts” yaagis. <sup>18</sup> Ellesidi, Saa7ola ayfiyappe issi poqo melabay wodhdhin, Saa7oli nam77antho xeellis. Qassi denndidi xammaqettis. <sup>19</sup> Kathi midi xaalidi, Damasqqon de7iya ammaneyssatara guutha gallas gam77is.

*Saa7oli Damasqqon tamaarssis*

<sup>20</sup> Ellesidi Saa7oli, “Yesuusi Xoossa Na7a” yaagidi Damasqqon de7iya Ayhude Woosa Keethatan qaala tamaarssis.

<sup>21</sup> Hessa si7ida ubbay malaaleettidi, “Hayssi Yerusalaamen Yesuusa sunthaa xeegeyssata qachcheyssa gidenneyye? Qassi haa yiday entta qachchidi, kahine halaqata sinthe efanaassa gidennee?” yaagidosona.

<sup>22</sup> Shin Saa7oli qaala odon minni minni bis. Yesuusi, I Kiristtoosa gideyssa qonccisidi odida gisho Damasqqon de7iya Ayhudeti iyaw zaariyaba dhayidosona.

<sup>23</sup> Daro gallasappe guye Ayhudeti shiiqidi, Saa7ola wodhanaw zorettidosona. <sup>24</sup> Shin Ayhudeti bana wodhanaw qoppidayssa Saa7oli si7is. Entti wodhanaw qammanne gallas katamaa penggiyan naagoosona. <sup>25</sup> Shin iya tamaareti iya qamma efidi, gimbbe dirssaa maskkotiyara daachchora wodhisidosona.

*Saa7oli Yerusalaamen tamaarssis*

<sup>26</sup> Saa7oli Yerusalaame gakkida wode ammaneyssatara gahettanaw koysis. Shin I Kiristtoosa ammanidayssi enttaw tuma daanonna ixxin iyaw yayyidosona. <sup>27</sup> Shin Barnnabaasi Saa7ola hawaaretakko efidi. Ogen Goday waanidi qonccidaakkonne haasayisidaakkko, qassi Saa7oli Damasqqon Yesuusa sunthan yayyonna waattidi qaala odidaakkko enttaw geeshshidi odis. <sup>28</sup> Saa7oli Yerusalaamen yuuyidi Godaa sunthan yayyonna qaala odishe, hawaaretara issife de7is. <sup>29</sup> Qassi Saa7oli Girike qaala haasayaay Ayhudetara odettishe palamees. Shin entti iya wodhanaw koyidosona. <sup>30</sup> Ammanniya asati hessa si7idi, Saa7ola Qisaariya efidi Terseese yeddidosona.

<sup>31</sup> Yihudan, Galilinaninne Samaare ubban de7iya woosa keethati sarotethaan de7idosona. Qassi minnidosona; Godaas yayyishe Geeshsha Ayyaana minthethuwan dari dari bidosona.

### *Phexiroosi Liidaninne Yoophen tamaarssis*

<sup>32</sup> Phexiroosi biitta ubbaa yuuyishe Liidan de7iya ammaniyaa asatakko gakkis. <sup>33</sup> Yan hosppun laythi kumethi gunddidi arssan zin77idi de7iya Eeniya giya addiya demmis.

<sup>34</sup> Phexiroosi, “Eeniya, Yesuus Kiristoosi nena pathana; denddada ne hiixa dentha” yaagis. Ikka ellesidi denddi eqqis. <sup>35</sup> Liidaninne Saaronan de7iya asa ubbay Eeniya be7idi, Godaakko simmidosona.

<sup>36</sup> Yoophe kataman issi Xaabito giya ammaniyaraa de7awusu. (Xaabito guussay gen77e guussu) Iya ba de7ida wode ubban lo77obaa oothashenue manqota maaddashe de7asu. <sup>37</sup> He wode iya harggada hayqqin, asay I ahaa meeccki, pooqiya bolla kessidi zin77isidosona. <sup>38</sup> Liidi Yoophes mata. Ammaneyssati Phexiroosi Liidan de7eyssa si7idi, “Hayyana nuukko ellessada ya” yaagiya kiitaa nam77u asata bolla iyaakkko kiittidosona.

<sup>39</sup> Hessa gisho, Phexiroosi dendddi, enttara bis. Yaa gakki, pooqiya bolla de7iya kifiliya iya gelssidosona. Am77eti Phexiroosa yuushuwan eqqidi yeekkishe Dorqqa enttara paxa de7ashe oothida qamisetanne afilata ubbaa Phexiroosa bessidosona. <sup>40</sup> Phexiroosi entta ubbaa kare kessidi, gulbatidi Xoossa woossis. Qassi ahaako simmidi, “Xaabite, dendda” yaagis. Xaabita ba ayfiyya dooyoda Phexiroosa be7ada, dendda uttasu. <sup>41</sup> Phexiroosi iyo ba kushiyani maaddidi denthi essis. Hessafe guye, ammaneyssatanne am77eta xeegidi, dendddidaaro entta sinthe shiishis.

<sup>42</sup> Ha oday Yoophe katama ubbaa gakkis. Daro asay Godaa ammanidosona. <sup>43</sup> Phexiroosi Yoophen Simoona giya galbba haasheyssa son daro gallas gam77is.

## 10

### *Phexiroosanne Qornneliyoosa*

<sup>1</sup> Qisaariyan, “Xaale ola asata” geetettiya olanchchota giddon issi Qornneliyoosa geetettiya mato halaqay de7ees. <sup>2</sup> Qornneliyoosi ba soo asaara Xoossa minthi ammaniyaa asinne Xoossa goynniya asi. Ayhude manqotakka daro maaddees, qassi Xoossa ubba wode woossees. <sup>3</sup> Issi gallas uddufun saate heeran Xoossa kaitanachchoy iyaakkko yidi, “Qornneliyoosaa” gidi xeegishin I qonccethan geeshshidi be7is.

<sup>4</sup> Qornneliyoosi dagammidi kaitanachchuwa tishshi oothi xeellidi, “Godaw, I aybee?” yaagis.

Kaitanachchoy zaaridi, “Ne woosaynne manqota ne maaddeyssi Xoossa sinthan has-sayettis. <sup>5</sup> Ha77i Yoophe ase kiittada, Phexiroosa giya Simoona ehisa. <sup>6</sup> Phexiroosi abbaa doonan galbba haashiya Simoona son imathatethi siiratis” yaagis.

<sup>7</sup> Qornneliyoosi baw odida kaitanachchoy bin, ba aylletappe nam77atanne Xoossa goynniya ba mata wotaaddaretappe issuwa xeegidi, <sup>8</sup> enttaw ubbabaaa odidi Yoophe kiittis.

<sup>9</sup> Wonttetha gallas entti bidi, Yoophe katama matishin usuppun saate heeran Xoossa woossanaw Phexiroosi pooqe bolla keys. <sup>10</sup> I koshattidi kathi maanaw koyis, shin kathi kaxishin I qonccethi be7is. <sup>11</sup> Saloy dooyettin, gita afila daaniyabay oyddu baggara oykettidi wodhdhishin I be7is. <sup>12</sup> Iyan oyddu tohora de7iya meheti, wora do7ati, ulora gooshetiyya medhetethatinne salo kafoti ubbay de7ees. <sup>13</sup> He wode “Phexiroosaa, dendda eqqada shukkada ma” giya qaali iyaakkko yis.

<sup>14</sup> Shin Phexiroosi, “Godaw, akkay! Ta tunabaa ubbarakka ma erikke” yaagis.

<sup>15</sup> Qassi, “Xoossay geeshshidayssa neeni tuna gooppa” giya qaali nam77antho iyaakkoo yis. <sup>16</sup> Hessika, heedzu toho hanidaappe guye he gita afila daaneysi ellesidi pude salo ekettis.

<sup>17</sup> Phexiroosi ba be7ida qonccethaa birshshethay, “Ay gidanddeshsha?” gidi ba wozanan oppishin, Qornneliyoosi kiittida asati Simoona soo oychchi demmidi karen eqqidosona.

<sup>18</sup> Bantta qaala dhoqqu oothidi, “Phexiroosa giya Simooni imathatethan de7ey hayssanee?” yaagidi oychchidosa.

<sup>19</sup> Phexiroosi qonccethan be7idabaa qofa bolla de7ishin, Geeshsha Ayyaani iyaakkko, “Hekko, heedzu asati nena koyoosona. <sup>20</sup> Denddada wodhdha, taani entta kiittida gisho sidhonna enttara ba” yaagis.

<sup>21</sup> Phexiroosi asatakko wodhdhidi, “Hintte koyey tana; ays yidetii?” yaagis.

<sup>22</sup> Entti zaaridi, “Nuna mato halaqay Qornneliyoosi kiittis. I xillo, Xoossa goynniya asinne Ayhude asa ubban daro bonchchettida asi. Qornneliyoosi, nena ba soo ehisidi qaala neeppe si7ana mela geeshsha kaitanachchoy iyaw odis” yaagidosona. <sup>23</sup> Phexiroosi asata soo gelssidi mokkis.

Wonttetha gallas, denddidi enttara bis. Yoophe kataman de7iya ammaneyssatappe is-soti issoti iyara issife bidosona.<sup>24</sup> Wonttetha gallas, Qisaariya gakkidosona. Qornneliyoosi ba dabbotanne ba mata laggeta issife xeegi shiishidi, Phexiroosa naagees.<sup>25</sup> Phexiroosi soo gelana hanishin, Qornneliyoosi iyara gahettidi iya sinthan kunddidi iyaw goynnaw koyis.<sup>26</sup> Shin Phexiroosi, “Dendda, takka ta huu7en ne mela ase” yaagidi iya denthis.

<sup>27</sup> Phexiroosi Qornneliyoosara odettishe soo geliya wode daro asay shiqidayssa demmis. <sup>28</sup> I asaakko, “Ayhude asi hara derera issifanaw woykko gahtetanaw woga gidonnayssha hintte ereeta. Shin taani oonakka tuna woykko geeshshi gidenna goonna mela Xoossay tana bessis.” <sup>29</sup> Hessa gisho, hintte taakko kiittin ixoy baynna yas. Ha77i tana ays xeegisidaakko taw odite” yaagis.

<sup>30</sup> Qornneliyoosi, “Taani hachchi oyddu gallasappe kase hanoode uddufun saate woosa woossishin, phooliya ma70 ma77ida asi ta sinthan eqqis.” <sup>31</sup> I taakko, “Qornneliyoosa, Xoossay ne woosaa si7is, neeni manqota maaddidayssaka hassays.” <sup>32</sup> Hiza, ase Yoophe kiittada, Simoon Phexiroosa geyssa xeegisa. I, Simoona giya galbba haashiya uraa son abbaa doonan siratis” yaagis. <sup>33</sup> Hessa gisho, taani neekko ellesada kiittas; ne lo77o yadasa. Hiza, Xoossay nena Kiittidaba ubbaa si7anaw ha77i nuuni ubbay hayssan Godaa sinthan de7oos” yaagis.

### *Phexiroosa haasaya*

<sup>34</sup> Kaallidikka, Phexiroosi, “Xoossay asa som77o be7idi ase asappe shaakkenna.” <sup>35</sup> Shin ase ubbaa oona gidikkoka baw yayyeysanne xillo ooso ootheyssan Xoossay ufaytteyssa taani tuma akeekas. <sup>36</sup> Xoossay, ubbaa Goda gidida Yesuus Kiristoosa baggara sarotethaa odishe ha Wonggela Isra7eela asaas kiittidayssa hintte ereeta.<sup>37</sup> Yohaannisi xinqqateebaa Galiljan sabbakida wodiyappe doomidi Yihuda biitta ubbaa gakkanaan hanidabaa hintte ereeta. <sup>38</sup> Xoossay Naazirete Yesuusas Geeshsha Ayyaananne wolqqaa immis. Xoossay iyara de7iya gisho lo77obaa I oothise Xalahe kushen haarettida ubbaa pathishe yuuyis.

<sup>39</sup> “Ayhude biittaninne Yerusalaamen I oothida ubbabaas nuuni markkatta. Entti masqaliya bolla kaqqidi iya wodhdidosona.” <sup>40</sup> Shin Xoossay heedzanthro gallasan hayqoppe iya denthidi asaas qonccana mela oothis. <sup>41</sup> He qoncethay Xoossay koyro doorida markkatassafe attin asa ubbaas gidenna. I hayqoppe denddidaappe guye iyara midanne uyida. <sup>42</sup> Nuuni Wonggela asaas odana melanne paxa de7eyssata bollanne hayqqidayssata bolla pirddanaw Xoossay shuumiday Yesuusa gideyssa markkattana mela nuna kiittis. <sup>43</sup> Xoossay iya ammaniyya ubbaa nagaray, iya sunthan atto geetetteyssa nabeti markkattoosona” yaagis.

### *Ayhude gidonna asati ammanidi Geeshsha Ayyaana ekkidosona*

<sup>44</sup> Phexiroosi burro he oda onggonnashin qaala si7iya ubbaa bolla Geeshsha Ayyaani wodhdhis. <sup>45</sup> Phexiroosara Yoophefe yida ammaniyya qaxxarettida Ayhude ubbay, Ayhude gidonnayssata bolla Geeshsha Ayyaani gukkida gisho malaattidosona. <sup>46</sup> Gaasoykka, entti dumma dumma doonan haasyishininne Xoossa gitatethaa sabbishin si7idosona.

He wode Phexiroosi zaaridi,<sup>47</sup> “Hayssati qassi nu mela Geeshsha Ayyaana ekkidayssati xammaqettonna mela haathe digganay oonee?” yaagis. <sup>48</sup> Entti Yesuus Kiristoosa sunthan xammaqettana mela entta kiittis. Hessafe guye, entti banttara guutha gallas uttana mela Phexiroosa woossidosona.

## 11

### *Phexiroosi ba oothidabaa Yerusalaame woosa keethaas odis*

<sup>1</sup> Hawaaretinne Yihuda ubban de7iya ammaneyssati, Ayhude gidonnayssatikka Xoossa qaala ekkidayssa si7idosona. <sup>2</sup> Phexiroosi Yerusalaame bida wode qaxxarettida ammaneyssati,<sup>3</sup> iyaakko, “Neeni qaxxarettiboonayssatakkko gelada enttara kathi ays madii?” yaagidosona.

<sup>4</sup> Shin Phexiroosi hanidabaa koyroppe doomidi maaran maaran odis: <sup>5</sup> “Taani Yoophe kataman Xoossa woossashe qonccethi be7as. Gita afila daaniyabay oyddu baggara oykettidi saloppe wodhdhishe taakko yis.” <sup>6</sup> Taani tishshi ootha iya giddo xeelliya wode oyddu tohora de7iya mehetu, wora do7ata, ulora gooshettiya medhetethatanne salo kafota be7as. <sup>7</sup> ‘Phexiroosaa, dendda, shukkada ma’ giya qaala si7as.

<sup>8</sup> “Shin taani, ‘Godaw, akkay, tunabay woykko geeyonnabay ubbaka ta doonaakko shiiqi erenna’ yaagas.

<sup>9</sup> “Xoossay geeshshidayssa neeni tuna gooppa” yaagiya qaali nam77antho saloppe yis.

<sup>10</sup> “Hessi heedzu toho hanin, wurssethan ubbabay salo pude ekettis.” <sup>11</sup> He saatenkka heedzu asati Qisaariyappe taakko kiittidi taani de7iya keetha gakki aggidosona.

<sup>12</sup> Sidhonna enttara baana mela Ayyaanai taw odis. Qassi ha usuppun ishati Yoophefe taara Qisaariya bidayssatara Qornneliyoosa soo gelida. <sup>13</sup> Kiitanchchoy iya son eqqidi, 'Yoophe kiittada Phexiroosa geetettiya Simoona xeegisa. <sup>14</sup> Nenanne ne soo asa ubbaa ashshiqa qala I new odana' gidayssaa Qornneliyoos nuus odis.

<sup>15</sup> "Taani haasaya doomiya wode Geeshsha Ayyaanay koyro nu bolla wodhdhidayssada entta bollaka wodhdhi aggis. <sup>16</sup> He wode 'Yohaannisi haathan xammaqis, shin hintte Geeshsha Ayyaanen xammaqettana' yaagida Godaa qaalay taw qofettis. <sup>17</sup> Xoossay nuus Godaa Yesuuu Kiristtoosa ammanidayssatas immida imotaa Ayhude gidonnayssataska immiko, yaatin Xoossa digganaw taani oonee?" yaagis.

<sup>18</sup> Entti hessa si7ida wode bantta palamaa aggidi, "Hesaa gidikko, Xoossay Ayhude gidonnayssatikka nagarappe simmidi de7on daanada qaada immis" yaagidi Xoossa galatidosona.

### Anxookiya woosa keethaa

<sup>19</sup> Isxifaanose hayqos gathida gooda gaason laalettida ammaneyssati qala Ayhudeta xalaalas odishe Siroofinqe, Qoophiroosanne Anxookiya gakkanaw yuuyidosona. <sup>20</sup> Shin Qoophiroosappenne Qereenaappe yida issi issi ammaniyaa asati Anxookiya bidi, Godaa Yesuusa Wonggelaan Girike asaaskka odidosona. <sup>21</sup> Godaa wolqqay enttara de7ees; qassi daro asay ammanidi Godaakkoo simmidosona.

<sup>22</sup> He odaa Yerusalamaanen de7iya woosa keethay si7ida gisho Barnnabaasa Anxookiya kiittis. <sup>23</sup> Barnnabaasi Anxookiya bida wode Xoossa aadho keehatethaa oosuwa be7idi ufayttis. Entti ubbay bantta kumetha wozanan Godan minnidi daana mela entta zoris. <sup>24</sup> Barnnabaasi Geeshsha Ayyaanayne ammanoy kumida lo77o asi gidiya gisho daro asay Godaa ammanidosona.

<sup>25</sup> Hessafe guye, Barnnabaasi Saa7ola koyanaw Terseese bis. <sup>26</sup> Yan Saa7ola demmida wode Anxookiya ekkidi yis. Barnnabaasinne Saa7oli woosa keetha asaara laythi kumethi uttidi daro asaa tamaarsidosona. Ammaneyssati Anxookiyan "Kiristtaane" geetettidi koyro xeegettidosona.

<sup>27</sup> He wode issi issi nabeti Yerusalamepppe Anxookiya wodhdhidosona. <sup>28</sup> Entta giddofe Agaboosa geyssi denddidi biitta ubban gita koshi keyanayssa Ayyaanayne wolqqan tinbbite odis. Hessi haniday Roome Kauwu Qalawudiyosa wodena. <sup>29</sup> Ammaneyssati huu7en huu7en bantta wolqqaa mela mishe kessidi Yihudan de7iya ammaneyssatas maade yeddawan qofa qachchidiosona. <sup>30</sup> Entti hessa oothidi, miishiya Barnnabaasa bollanne Saa7ola bolla woosa keethaa cimatas yeddidosona.

## 12

### Woosa keetha bolla wolqqaama goodi gakkis

<sup>1</sup> He wode Kawoy Heroodisi\* woosa keetha asaappe baggaa gooda doomis. <sup>2</sup> Yohaannisa ishaa Yayqooba mashshan wodhisis. <sup>3</sup> Hessi Ayhudeta ufayssidayssa be7idi, gujjidi Phexiroosakka oythis. Hessi haniday Paasika Baale bonchchiya gallasatana. <sup>4</sup> Phexiroosa oykkidi qachchis. Paasika bonchchiya gallasatappe guye deriya sinthe aathanaw qoppidi, oyddu oyddu wotaaddaretii iya naagana mela tammanne usuppun wotaaddaretas aathi immis. <sup>5</sup> Hessa gisho, Phexiroosi qasho keethan naagettees. Shin woosa keetha asay iyaw minthidi Xoossa woosososona.

### Kiitanchchoy Phexiroosa qasho keethafe kessis

<sup>6</sup> Heroodisi Phexiroosa asaa sinthe shiishanaappe kase gamma Phexiroosi nam77u baggara nam77u wotaaddaretara santhalataan qashettidi entta giddon dhiskkis. Naageyssati qasho keethaa penggetan eqqidi naagoosona. <sup>7</sup> Akekonna de7ishin Godaa kiitanchchoy qonccis. Qasho keethan poo7oy poo7is. Kiitanchchoy Phexiroosa miyaa bochchi barkkisidi, "Elle dendda" yaagis. Iirakka santhalataat iya kushiyappe wodhdhi aggis. <sup>8</sup> Kiitanchchoy iyaakkoo, "Ne ma7uwa ma77a, ne caammaaka aatha" yaagis. Phexiroosi hessada oothis; kiitanchchoy, "Ne laxana ma77ada tana kaalla" yaagis.

<sup>9</sup> Phexiroosi qasho keethafe keyidi kiitanchchuwa kaallis. Iyaw qonccethi be7iyabaa daanisippe attin kiitanchchoy oothiyabay tuma daanibeenna. <sup>10</sup> Kiitanchchoynne Phexiroosi koiyruwanne nam77antho wotaaddariya aadhdhidi katamaa efya biraata penggiyako gakkidosona. Penggey enttaw barkka dooyetti aggis. Entti keyidi issi ogiyara bishin kiitanchchoy akekonna Phexiroosappe shaaketti aggis.

<sup>11</sup> Phexiroosas wozani simmin, "Tana Goday ba kiitanchchuwa kiittidi, Heroodisa kusheppenne naagidi uttida Ayhude asa ubbaafe ashshidayssa ha77i tuma eras" yaagis.

<sup>12</sup> I hessa akekida wode daro asay issife shiiqidi Xoossa woossiya bessaa, Marqqaosa giya Yohaannisa aaye Mayraami soo bis. <sup>13</sup> Yan karen eqqidi xeegis. Issi Rooda giya oosanchchiya penggiya dooyanaw yasu. <sup>14</sup> Rooda Phexiroosa qaala gididayssa erida wode ufayssan kumada kariya dooyenna guye woxxa bada, "Phexiroosi karen eqqis" yaagada asaas odasu.

<sup>15</sup> Asay iikko, "Neeni gooyay!" yaagidosona. Rooda Phexiroosa gididayssa geeshshada odasu. Entti, "Hessi iya naagiya kiitanchchuwa" yaagidosona.

<sup>16</sup> Shin Phexiroosi karen eqqidi xeegidi aggonna ixxin asay kariya dooyidi iya be7idi malaalettidosona. <sup>17</sup> Shin entti si77i gaana mela Phexiroosi ba kushiyan mallidi Goday qasho keethafe iya waati kessidaakkko enttaw qonccisi odidi, "Hayssa Yayqoobasinne ammaniyaa asatas odite" gidi yaappe keyidi harasoo bis.

<sup>18</sup> Sa7i wonttiya wode "Phexiroosi aw bide" gidi wotaaddareti woli giddon daro kac-cidosona. <sup>19</sup> Heroodisi Phexiroosa koysin, I dhayida wode naageyssata qoridi, entta wodhana mela kiittis. Hessafe guye, Heroodisi Yihudappe Qisaariya wodhdhidi yan guutha wode uttis.

#### *Heroodisa hayquwa*

<sup>20</sup> Heroodisi Xiroosa asaa bollanne Sidoona asaa bolla daro hangettis. Entta biittay kathi Heroodisa biittaafe demmiya gisho entti issife gididi iya moorinnaa Bilasxoosa banttar cima oothidi giiganaw Heroodisakkko bidosona.

<sup>21</sup> Heroodisi sunthida gallasan ba kawotethaa afila ma77idi, araata bolla uttidi asaas odis. <sup>22</sup> Asay, "Hessi Xoossa qaala, asa qaala gidenna" yaagidi waassidosona. <sup>23</sup> Heroodisi Xoossa bonchchilboonna gisho iirakka Godaa kiitanchchoy iya dechchin guxunen meetet-tidi hayqqis.

<sup>24</sup> Shin Xoossa qaalay diccishenne dalggishe bees.

<sup>25</sup> Barnnabaasinne Saa7oli bantta oosuwa polidi Marqqaosa giya Yohaannisa banttar ekkidi Yerusalamaeppe simmidosona.

## 13

#### *Barnnabaasinne Saa7oli kiitettidosona*

<sup>1</sup> Anxookiyan de7iya woosa keethan nabetinne asttamaareti de7oosona. Entti Barnnabaasa, Kareethi geetettiya Simoona, Qereenaappe yida Luukiyosa, Kawuwa Heroodisara diccida Minaahenne Saa7ola. <sup>2</sup> Entti Godaa goynnishininne xoomishin Geeshsha Ayyaanay, "Taani xeegida oosuwas Barnnabaasanne Saa7ola taw dummayite" yaagis.

<sup>3</sup> Hessa gisho, entti xoomidaappenne woossidaappe guye bantta kushiya entta bolla wothidi yeddisosona.

#### *Barnnabaasinne Saa7oli Qoophiroosa bidosona*

<sup>4</sup> Hessa gisho, Geeshsha Ayyaani entta kiittis. Selewuqe bidosona; yaappe markkaben gelidi Qoophiroosa haathan teqettida biitta bidosona. <sup>5</sup> Entti Silmmaana gakkidi Ayhude Woosa Keethatan Xoossa qaala odidosona. Yohaannisi\* maaddishe enttara de7ees.

<sup>6</sup> Entti Qoophiroosa haathan teqettida biittaa kanthidi Phaafu gakkija wode issi word-danchcho nabiya Bar-Yesuusa giya Ayhude maruwa demmidosona. <sup>7</sup> He maroy deriya aysiya Sarggiyoos Phawuloosa giya akekanchcho addiyara de7ees. Sarggiyoos Phawuloosi Barnnabaasanne Saa7ola baakko xeegidi Xoossa qaala si7anaw koysis. <sup>8</sup> Shin Girike doonan maruwa sunthay "Elmmaasa" geetettees. I deriya haareyssi ammanonna mela digganaw koyidi Barnnabaasaranne Phawuloosara eqettis.

<sup>9</sup> Shin Phawuloosa giya Saa7oli Geeshsha Ayyaanen kumidi maruwa caddi xeellidi, <sup>10</sup> "La, Xalahe na7aw, iitatethi ubby kumidayso, xillotetha ubbaas morkkiyaw, suure Godaa ogiya mirqeysa aggikii? <sup>11</sup> Hekko, ha77i Godaa kushey ne bolla de7ees. Neeni qooqe gidana; guutha wodes awa poo7o be7akka" yaagis.

Iira caaganaynne dhumay iya ayfiyaa goozin, ba kushiya oykkidi kaaletihiya asi koysis heyyuis. <sup>12</sup> Deriya haareyssi hessa be7ida wode Godaaba tamaarsseysan malaalettidi ammanis.

#### *Barnnabaasinne Phawuloosi Phisidiya Anxookiya bidosona*

\* <sup>13:5</sup> Yohaannisi: Ha bessan xaafettida Yohaannisi, hawaariya Yohaannisa gidonnashin Yohaannisa Marqqaosa geetettiya Marqqaosa Wongelaa xaafidayssa.

<sup>13</sup> Phawuloosinne iyara de7eyssati Phaafuppe denddidi, Phinfiliyan de7iya Phergge markkabera bidosona. Yohaannisi enttafe shaakettidi Yerusalaame simmis. <sup>14</sup> Shin entti Pherggef aadhdhidi Phisidiyan de7iya Anxookiya gakkidosona. Sambbaata gallas Ayhude Woosa Keethi gelidi uttidosona. <sup>15</sup> Muse higgeynne nabeta maxaafay nabbabetti-daappe guye Ayhude Woosa Keetha halaqati, "Nu ishato, asaa minthethiya qaali hinttew de7iyakko asaas oderkketii" yaagidi enttako kiittidosona.

<sup>16</sup> Phawuloosi denddi eqqidi ba kushe mallidi, "Isra7eela asataw, qassi Xoossa goynniya Ayhude gidonna asaw, si7ite. <sup>17</sup> Ha Isra7eela asaa Xoossay, nu mayzata dooris. Gibxxe biittan imathatethan entti de7ishin, entta darssidi ba gita wolqqan Gibxxe biittaafe entta kessis. <sup>18</sup> Bazzo biittan oytamu laytha mela entta dandda7is. <sup>19</sup> Kanaane biittan Ayhude gidonna laappun kawotethata diggidi entta biittaa ba asaa laatis. <sup>20</sup> Hessafe guye, nabiya Saamu7eela wode gakkanaw oyddu xeetanne ishatamu laytha mela aysiya daynnata enttaw immis. <sup>21</sup> Hessafe guye, entti banittaw kawo immana mela woossin, Xoossay Biniyame sheeshhaappe Qiise na7aa, Saa7ola oytamu laythi kawotana mela enttaw immis. <sup>22</sup> Xoossay Saa7ola shaaridaappe guye entta bolla Dawite kawothis. Xoossay Dawitebaa markkattishe, 'Taani koyaa ubbaa ta wozanaa mela oothiya Isseyye na7aa Dawite demmas' yaagis.

<sup>23</sup> "Xoossay, 'Taani Dawite sheeshhaappe Isra7eela deriya ashsheyssa ehana' gidayssa mela Yesuusa ehis. <sup>24</sup> Yesuusi yaanappe sinthe Isra7eela asa ubbay bantta nagaraappe simmidi xammaqettana mela Yohaannisi qaala odis. <sup>25</sup> Qassi Yohaannisi ba oosuwa wurssana hanishe asaakko, 'Tana oona gidi qoppeeti? Taani hintte naagiya Kiristtoosa gidikke, shin taani iya caammaa birshshanaw taw bessonayssi taappe guyera yees' yaagis.

<sup>26</sup> "Ishato, Abrahame sheeshatoo, qassi hayssan Ayhude gidonnashin Xoosas yayyeysato, ha atotethaa qaalay nuus kiettis. <sup>27</sup> Ays giikko, Yerusalaamen de7iya asaynne entta halaqati Yesuusa eribookkona. Sambbaata ubban nabbabettiya nabeta qaala akeekiboonna gisho iya bolla pirddidi nabeti odida qaala polidosona. <sup>28</sup> Yesuusa wodhisanaw issi gaasoykka dhayin Philaaxoosi iya wodhana mela woossidosona. <sup>29</sup> Entti Yesuusabay Geeshsha Maxaafan xaafettidaba ubbaa polida wode masqaliyappe iya wodhisidi moogidosona. <sup>30</sup> Shin Xoossay hayqoppe Yesuusa denthis. <sup>31</sup> Hessafe guye, I baara Galilappe Yerusalaame yidayssatas daro toho benttis. Entti ha77i iyabaa asaas markkattoosona.

<sup>32</sup> "Xoossay nu aawatas immana gida Wonggelaa nuuni hinttew odoos. <sup>33</sup> Dawitey ba Mazmure Maxaafan nam77antho shemppuwan, 'Neeni, ta Na7a,

taani hachchi nena yelas'

geetettidi xaaftetida Yesuusa, Xoossay hayqoppe denthidi nu mayzatas immana gidayssa nuus entta naytas polis. <sup>34</sup> I wooqonna mela Xoossay hayqoppe iya denthon erisanaw, 'Taani Dawites immana gida ammanettida geeshsha anjuuwaa hinttew immana' yaagidi odis.

<sup>35</sup> Hessa gisho, Mazmure Maxaafan harason qassi,

Ne Geeshsha Na7aa ahaa woqisakka' yaagees.

<sup>36</sup> "Dawitey ba wode Xoossa qofaa polidaappe guye hayqqidi ba aawatara moogettidi wooqis. <sup>37</sup> Shin Xoossay hayqoppe denthidiwooqibeenna.

<sup>38</sup> "Hessa gisho, ta ishato, nagara atotethay Yesuusa baggara kasetidi hinttew odetti-dayssa erite. Muse higgey nagarappe xillisanaw dandda7enna. <sup>39</sup> Shin Yesuusa ammaniyaa ubbay nagarappe xillees. <sup>40</sup> Hessa gisho, nabeti gidayssi hintte bolla gakkonna mela naagettite.

<sup>41</sup> Xoossay gidabaa leeqiseyssato! Be7ite! Malalettite! Dhayite!

oonikka odin, hintte ammanonna oosuwa

taani hintte wodiyen oothaan" yaagis.

<sup>42</sup> Phawuloosinne Barnnabaasi Ayhude Woosa keethafe keyishin, kaalliya Sambbaatan hessa gujjidi odana mela asay enttana woossidosona. <sup>43</sup> Shiiqoy laalettidaappe guye daro Ayhudetinne Ayhudeta ammanuwan gelidi Xoossa goynniya daroti Phawuloosanne Barnnabaasa kaallidosona. Ammanidayssati Xoossa aadho keehatethan minnidi daana mela entta zoridosona.

<sup>44</sup> Kaalliya Sambbaatan kataman de7iya asaappe daroti Xoossa qaala si7anaw shiiqidosona. <sup>45</sup> Shin Ayhudeti daro asaa be7ida wode Phawuloosa qanaattidi iya haasaya ixxidi iya cayidosona.

<sup>46</sup> Phawuloosinne Barnnabaasi yayyonna, “Xoossa qaala koyrottidi hinttew odetanaw kosheshees. Shin hintte qala ixxidi merinaa de7uwa ekkanaw nuus bessenna hinttew, hintte huu7en pirdidda gisho hiza nuuni Ayhude gidonnayssatakkoo simmos.

<sup>47</sup> Gaasoykka Goday,

‘Alame kumethay ne baggara attana mela,

taani nena Ayhude gidonna deriyas poo7o oothas’ yaagidi nuna kiittis” yaagidosona.

<sup>48</sup> Ayhude gidonnayssati hessa si7ida wode ufayttidi Xoossa qaala bonchchidosona. Qassi merinaa de7uwas doorettida ubbay ammanidosona.

<sup>49</sup> Godaa qaala he biitta ubbaa gakkis. <sup>50</sup> Shin Ayhudeti, Ayhude gidonna Xoosse goyniya dure maccasatanne kataman de7iya gita asata Phawuloosa bollanne Barnnabaasa bolla denthethidosona. He asati entta gooda doomidi bantta biittaafе kessidosona. <sup>51</sup> Shin Phawuloosaranne Barnnabaasara ixxeyssatas malla gidana mela bantta tohuwappe baana pittidi Iqooniyone katama bidosona. <sup>52</sup> Qassi Anxookiyan de7iya ammaneyssati Geeshsha Ayyaaninanne ufayssan kumidosona.

## 14

### *Phawuloosinne Barnnabaasi Iqooniyone bidosona*

<sup>1</sup> Kaseyssadakka, Phawuloosinne Barnnabaasi Iqooniyonen Ayhudeta woosa keethi gelidi daro Ayhudetinne Ayhude gidonnayssati ammanana gakkanaan qaala odidosona. <sup>2</sup> Shin ammaniboonaa Ayhudeti, Ayhude gidonnayssata wozanaa laammedi ishata bolla denthethidosona. <sup>3</sup> Hawaareti yan daro wode gam77idosa. Entti yayyonna Godaabaa odidosona. Goday malaatatanne oorathabaa entti oothana mela enttaw maata immidi ba aadho keehatethaa qaala tuma gideyssa qonccisis. <sup>4</sup> Shin he katamaa asay shaakettidi, baggay Ayhudetara baggay qassi Hawaaretara gidis.

<sup>5</sup> Ayhude gidonnayssatinne Ayhudeti bantta halaqtara issife gididi hawaareta qohanawunne shuchchan caddanaw koyidosona. <sup>6</sup> Hawaareti hessa eridi, Lixiranne Darbbe giya Liqaa7oniya katamatanne entta heeran de7iya biittaa baqatidosona. <sup>7</sup> Yan Wonggelaa odidosona.

### *Phawuloosinne Barnnabaasi Lixiraninnae Darbben*

<sup>8</sup> Yelettoosappe doomidi nam77u tohoy wobbin hamuti eronna issi addey Lixiran de7ees. <sup>9</sup> He addye Phawuloosi odishin uttidi si7ees. Phawuloosi iya caddidi xeelliya wode paxanaw iyaw ammanoy de7eyssa be7idi, <sup>10</sup> ba qaala dhoqqu oothidi, “Sitti gada ne tohuwan eqqa” yaagis. Yaatin, guppi denddi eqqidi hamuthi doomis.

<sup>11</sup> Phawuloosi oothidayssa asay be7idi bantta qaala dhoqqu oothidi Liqaa7oniya doonan, “Xoossati ase daanidi nuukko wodhdhidosa” yaagidosona. <sup>12</sup> Barnnabaasa, “Diya” gidi, Phawuloosi haasayan waannatiya gisho iya, “Hermmeesa” gidi sunthidosona. <sup>13</sup> Katamaappe gaxan de7iya eeqaa Diya keethaa kahineynne asay kormmatanne alleeqo ciishshata hawaaretas yarshshanaw koyidi katamaa pengge ehidosona.

<sup>14</sup> Shin Barnnabaasinne Phawuloosi hessa si7ida wode entti oothanaw qoppidayssa ixxidi bantta ma7uwa peedhidosona. Asaa giddo woxxi gelidi, <sup>15</sup> bantta qaala dhoqqu oothidi, “Asaw, hayssa ays ooheetti? Nukka hintte mela ase. Ha pathonnabaappe saluwanne sa7aa, abbaanne entta giddon de7iya ubbabaa medhdhidha de7o Xoossaakkoo hintte simmana mela hinttew nuuni Wonggelaa odoos. <sup>16</sup> I beni asaa bantta ogiya baana mela yeddi aggis. <sup>17</sup> Shin iraa saluwapple bikusis, kathaaka woden woden immis, kathi immidi hinttene daro ufayssis, yaatidi hinttew lo77obaa oothidi baw markka dhayssi-beenна” yaagidosona. <sup>18</sup> Hawaareti hessa gidi banttaw asay yarshshonna mela waayidi diggidosona.

<sup>19</sup> Anxookiyappenne Iqooniyoneppe yida Ayhudeti, asaa bantta bagga zaaridi shuchchan Phawuloosa caddidosona. Enttaw I hayqqidabaa daanin katamaappe gaxa goochchi efidi yeggidosona. <sup>20</sup> Shin ammaneyssati yidi, iya yuushwan eqqidashin I denddi katamaa gelis. Wonttetha gallas Barnnabaasara issife Darbbe bis.

### *Phawuloosinne Barnnabaasi Sooriya Anxookiya simmidosona*

<sup>21</sup> Entti Darbbe kataman Wonggelaa odidi darota ammanthidaappe guye Lixira, Iqooniyonenne Phisiidiya Anxookiya simmidosona. <sup>22</sup> Yan ammaneyssata minthethishenue entti ammanon mimmidi de7ana mela zorishe, “Xoossa qaala kawotethaa gelanaw nuuni daro waaye ekkanaw bessees” yaagidi tamaarssidosona. <sup>23</sup> Qassi woosa

keethatas huu7en huu7en cimata dooridosona. Xoomidaappenne woossidaappe guye entti ammanida Godaas entta hadara immidosona.

<sup>24</sup> Phisidiya biittaa kanthidi aadhdhidi Phinfiliya bidosona. <sup>25</sup> Pherggen qaala odi-daappe guye Axaaliya bidosona. <sup>26</sup> Yaappe entti bantta polida oosuwas Xoossaas aadho keehatethaa entta hadara immida Anxookiya markkabera simmidosona.

<sup>27</sup> Anxookiya gakkida wode woosa keethaa asaa shiishidi Xoossay enttarra oothida oosuwa ubbaanne Ayhude gidonna asay ammanana mela enttaw waati pengge dooyidaako odidosona. <sup>28</sup> Hessian ammaneyssatara daro wode gam77idosona.

## 15

### *Yerusalaame shiiquwa*

<sup>1</sup> Issi issi asati Yihudappe Anxookiya bidi, "Muse wogaatho hintte qaxxarettonna ixxiko attanaw dandda7ekketa" gidi ammaneyssata tamaarssso doomidosona. <sup>2</sup> Hessi Phawuloosanne Barnnabaasa enttarra daro palamanaadanne kaccanaada oothis. Hessa gisho, Anxookiyani de7iya issi issi asati Phawuloosaranne Barnnabaasara Yerusalemme bida Hawaaretaranne cimata gahtetti he ooda billana mela qofa qachchidosona.

<sup>3</sup> Woosa keethay entta kiittin bidosona. Entti Siroofinqe Samarera aadhahishe Ayhude gidonnayssati Xoossako waanidi simmidaakko odidosona. Hessi ammaneyssata ubbaa daro ufayssis. <sup>4</sup> Entti Yerusalemme gakkida wode woosa keethay, Hawaaretinne cimati entta mokkidosona. Xoossay banttarra oothidabaa ubbaa odidosona. <sup>5</sup> Shin Farisaaweta baggafe ammanida issi issi asati denddi eqqidi, "Ayhude gidonnashin ammanida asati qaxxaretanawunne Muse higgiya naaganaw bessees" yaagidosona.

<sup>6</sup> Hawaaretinne cimati hessa zorettanaw shiiqidosa. <sup>7</sup> Daro haasayidaappe guye, Phexiroosi denddi eqqidi, "Ta ishato, Ayhude gidonnayssati Wongelaa qaala ta doonappe si7idi ammanana mela kasetidi tana Xoossay hintte giddofe dooridayssa hintte ereeta. <sup>8</sup> Asa wozana eriya Xoossay Geeshsha Ayyaanad nuus immidayssada enttawuka immidi tumays. <sup>9</sup> Ammanon entta wozanaa geeshshida gisho nu giddoninne entta giddon dummatethi wothibeenna. <sup>10</sup> Hessa gisho, nu awatfinne nuuni tookkanaw dandda7iboonna qambbara ammaneyssata morggen wothidi ha77i ays Xoossaas paacetii? <sup>11</sup> Godaa Yesuus Kiristtoosa aadho keehatethan entti attidayssada nukka attidayssaa ammanaoos" yaagis.

<sup>12</sup> Asay si77i gidi, Barnnabaasinne Phawuloosi Ayhude gidonna asaa giddon bantta baggara Xoossay oothida malaatatanne oorathabaa ubbaa odishin si7osoona.

<sup>13</sup> Entti haasaya onggidaappe guye Yayqoobi, "Ishato, ta geysssa si7ite. <sup>14</sup> Xoossay Ayhude gidonnayssata giddofe ba ase dooranaw koyidi enttana koyro waattidi qoppidaakko Simooni odis. <sup>15</sup> Nabetaa qaalay hayssara ginees. Geeshsha Maxaafan,

<sup>16</sup> 'Hayssafe guye, taani simmanna,

kunddida Dawite kawotethaa denthana.

Laalettida keethaaka zaara essana.

<sup>17</sup> Attida asa ubbay taakko yaana,

taani xeegida Ayhude gidonna asa ubbay tana koyana. <sup>18</sup> Benippe doomada hessi erettana mela oothida

Xoossay, taani yaagays' yaagees.

<sup>19</sup> "Hessa gisho, ta qofay Xoossako simmiya Ayhude gidonnayssata nuuni waaysonnaako lo77o. <sup>20</sup> Shin entti eeqas yarshshettidi tunidabaa moonna mela, laymatonna mela, bawuta moonna melanne suuthi uyonna mela enttaw nuuni dabddaabbe xaafanaw koshshees. <sup>21</sup> Muse higgey benippe doomidi Sambbaatan Sambbaatan Ayhude Woosa Keethatan nabbabettishe katama ubban sabbakettees" yaagis.

<sup>22</sup> Hessafe guye, hawaaretinne cimati woosa keethaa asa ubbaara issife bantta giddofe guutha asata dooridi Phawuloosaranne Barnnabaasara Anxookiya yeddanaw qofa qachchidosona. Entti daro bonchettida nam77u asata Barssabaasa geetettiya Yihudanne Sillaase dooridosona. <sup>23</sup> Hayssada geetetti xaafettida dabddaabiya entta bolla yedidosona: "Nuuni hawaaretinne cimati hintte ishati, Anxookiyani, Sooriyaninne Kilqiyani de7iya Ayhude gidonna ishatas nu sarothuwa kiuttoos.

<sup>24</sup> "Nuuni kiittonna asati nu giddofe bidi, 'Hintte qaxxaretanawunne higgiya naaganaw bessees' gidi, hinttena waaysidayssanne yiloyidayssa si7ida. <sup>25</sup> Nuuni dosiya Barnnabaasanne Phawuloosa dooretida asatara issife hintteki kiittanaw issi wozanan nu qofaa qachchida. <sup>26</sup> Entti nu Godaa Yesuus Kiristtoosa gisho bantta de7uwa aathi immidosona. <sup>27</sup> Hessa gisho, nuuni xaafidayssa entti bantta doonan gujjidi hinttew odana mela Yihudanne Sillaase kiittida.

<sup>28</sup> "Ha koshsheyssatappet attin hara tooho hinttena toossonna mela nunne Geeshsha Ayyaanay oda qachchida. <sup>29</sup> Eeqas yarshshettidi tunidabaa mooppite, suuthu uyoppite, bawuta mooppite, laymatoppite. Ha ubbaafe hinttee, hintte huu7iya naagikko lo77obaan ootheeta" yaagidosona.

<sup>30</sup> Hessa gisho, kiitettidayssati moyzettidi Anxookiya bidi ammaniyaa asaa shiishidi, dabddaabe immidosona. <sup>31</sup> Entti he minthethiya dabddaabbida nabbabida wode ufayttidosona. <sup>32</sup> Qassi Yihudinne Sillaasey bantta huu7en nabe gidiya gisho ammaneyssata loythi zoridi minthethidosona. <sup>33</sup> Entti Anxookiyan guutha gallas uttidaappe guye ishati lo77ora moyzin banttana kiittidayssatakko simmidosona. <sup>34</sup>\* [Shin Sillaasey yan attanaw koyis.]

<sup>35</sup> Qassi Phawuloosinne Barnnabaasi hara daro asatara issife Godaa qaalaatamaarssishenne Wonggelaa odishe Anxookiyan gam77idosona.

#### *Phawuloosinne Barnnabaasi shaakettidosona*

<sup>36</sup> Guutha gallasappe guye Phawuloosi Barnnabaasako, "Nuuni Godaa qaala odida katama ubban ammaneysati waanidi de7iyakko guye simmishe xomoosana" yaagis.

<sup>37</sup> Barnnabaasi Marqqaosa geetettiya Yohaannisa banttara efanaw koyis. <sup>38</sup> Shin Phawuloosi Marqqaosa banttara efanaw koyibeenna. Gaasoykka, I Phinfiliyan shaakettidi enttara oothanaw bibeenna. <sup>39</sup> Entta giddon iita ooshshi keyin issoy issuwafe shaakettidosona. Barnnabaasi Marqqaosa ekkidi markkabera Quophiroosa bis. <sup>40</sup> Shin Phawuloosi Sillaase dooris; ammaneysati Phawuloosa Xoossaa aadho keehatethaas hadara immidapape guye i keyidi bis. <sup>41</sup> Yaatidi, woosa keethata minthethishe Sooriyaranne Kilqiyara aadhahdis.

## 16

#### *Ximotyoosi Phawuloosaranne Sillaasera gahettis*

<sup>1</sup> Phawuloosi Darbbenne Lisxira bis. Yan Ximotyoosa giya ammaniyaa asi de7ees. Iya aayyaa ammaniyaa Ayhude maccas, iya aaway Girike asi. <sup>2</sup> Lisxiraninne Iqooniyenen de7iya ammaneysati Ximotyoosabaa loythidi markkattidosona. <sup>3</sup> Phawuloosi Ximotyoosa baara efanaw koyidi, iya aaway Girike asi gididayssa he bessan de7iya Ayhude ubbay eriya gisho iya qaxxaris. <sup>4</sup> Entti katamatara bishe Yerusalamen de7iya hawaaretinne cimati wothida higgiya ammaneyssati naagana mela enttaw odishe aadhahdosona. <sup>5</sup> Hessa gisho, woosa keethati ammanon minnishe, taybonkka gallas gallas dari dari bidosona.

#### *Phawuloosi Maqedooniya baanada xeegettis*

<sup>6</sup> Iisiyan qaala odonna mela Geeshsha Ayyaanay entta diggida gisho Phirggeranne Galaatiya biittaara aadhahdosona. <sup>7</sup> Entti Miisiya zawaal gakkida wode Bitiinya baanaw koyidosona. Shin Yesuusa Ayyaanay entta diggis. <sup>8</sup> Hessa gisho, entti Miisiya matara aadhahdis Xiro7aada wodhdhidosona. <sup>9</sup> Phawuloosi qamma qonccethan issi Maqedooniya asi baakko, "Maqedooniya pinnada nuna maaddarkii" yaagishe eqqidi woossishin be7is. <sup>10</sup> Qonccethaa I be7idaappe guye ellesidi nuuni Maqedooniya baanaw koyida. Hessika, Wonggelaa yan de7iya asaas odanaw Xoossaa nuna xeegidayssa erida gishossa.

#### *Lidiya Kiristtoosa ammanasu*

<sup>11</sup> Xiro7aadappe denddidi markkaben gelidi Samotiraage bida, wonttetha gallas Naaphule bida. <sup>12</sup> Yaappe denddidi Maqedooniya biittan de7iya Filphisiyuusa giya koyro katama bida. Qassi Filphisiyuusi Roome asay de7iya katama. Nuuni he kataman guutha gallas uttida.

<sup>13</sup> Sambbaata gallas katamaappe gaxan Shaafaa doonan Ayhudeti Xoossaa woossiya bessi de7eyssa eridi yaa bida. He bessan shuiqida maccasaas qaala odida.

<sup>14</sup> Nuna si7iya asaappe issi Liidiya geetettiya Tiyatiroona katamaappe yida, Xoossaa ammaniazo7o afila zal77iya, maccasiya de7awusu. Phawuloosi odehyssa iya si7ana mela Xoossay I wozanaa dooyis. <sup>15</sup> Liidiya ba soo asaara issife xammaqettidaappe guye nuukko, "Hintte tana Godaa tuma ammanasu giikko ta soo yedhdhite" gada miinthada woossasu.

#### *Phawuloosinne Sillaasi qashettidosona*

<sup>16</sup> Nuuni Xoossaa woossiya bessaa bishin iita ayyaani I bolla de7idi kaaysiya issi geela70 aylley nuura gahettasu. Iya kaayada daro miishe ba godatas ehawusu. <sup>17</sup> Phawuloosanne nuna kaallada, "Hayssati Ubbaafe Bolla Xoossaa aylleta! Entti hintte attana ogiya odehyssata" gada waassasu.

\* <sup>15:34</sup> Issi issi maaxafatan paydo 34 baawa.      <sup>15:38</sup> Ha.O 13:13

<sup>18</sup> Ubba gallas hessada gawusu. Shin Phawuloosi yilotidi guye simmidi, he ayyaanaa, "Yesuus Kiristtoosa sunthan iippe keya" gidi kiittis. Iirakka iita ayyaanay iippe keyi aggis.

<sup>19</sup> Shin I godati banttaw miishe demmiya ogey dhayidayssa be7idi, Phawuloosanne Sillaase oykkidi, dabaaba daynnata sinthe goochchi efidosona. <sup>20</sup> Daynnata sinthe entta efidi, "Hayssati Ayhude asi gidishe nu katamaa asaa daro waaysosona. <sup>21</sup> Nuuni Roome biitta asi gidishe ekkanawunne oothanaw woga gidonnabaa tamaarssosona" yaagidosona.

<sup>22</sup> Asay issi bagga gididi, Phawuloosa bollanne Sillaase bola denddidosona. Daynnati entta ma7uwa qaaridi xam77an entta shocana mela kiittidosona. <sup>23</sup> Entta daro wadhdidaappe guye qasho keethi gelssidosona. Qasho keethaa naageysi entta minthi naagana mela kiittidosona. <sup>24</sup> Qasho keethaa naageyssi he kiitaa ekkidi, Phawuloosanne Sillaase qasho keethas qol77a gelssis. Entta tohuwa duuxis

<sup>25</sup> Shin giddi bilahe gidiya wode Phawuloosaranne Sillaasera woossishenne mazmure yexxishe Xoossa galatoosona. Qasho keethan de7iya hara asatikka entti giyabaa si7oosona. <sup>26</sup> Qopponna qasho keethaa baasoy qaaxxana gakkanaw biitta qaaxoy hanis. He saatenka pengge ubbay dooyetti aggis; qashettida asa ubbaa santhalatalay birshsheti wodhdhis. <sup>27</sup> Qasho keethaa naageyssi dhiskofe barkida wode qasho keethaa pengge ubbay dooyettidayssa be7idi qasho asay kessi ekki bidabaa daanin bana wodhanaw mashshe ekkis. <sup>28</sup> Shin Phawuloosi qaala dhoqqu oothidi "Nu ubbay hayssan de7iya gisho neeni nena qohoppa" yaagis.

<sup>29</sup> Qasho keethaa naageyssi xomppe woossi ekkidi ellesidi gaathi woxxis. Kokkorishe Phawuloosa sinthaninnee Sillaase sinthan gufannis. <sup>30</sup> Entta kare kessidi, "Ta godato, taani attanaw ay oothanaw bessii" yaagis.

<sup>31</sup> Phawuloosaranne Sillaasera iyaakkko, "Godaa Yesuus Kiristtoosa ammana; neeranne ne soo asaara attana" yaagidosona. <sup>32</sup> Entti iyasinne iya son de7iya ubbaas Godaa qaala odidosona. <sup>33</sup> Qamma he saatenka qasho keethaa naageyssi entta efidi entta madunthaa meeccis. Ellesidi ba soo asa ubbaara xammagettis. <sup>34</sup> Phawuloosanne Sillaase ba soo efidi enttaw kathi aathis. I ba soo asa ubbaara Xoossa ammanida gisho ufayttis.

<sup>35</sup> Sa7ay wonttin daynnati, "He asata billa" yaagidi poolise halaqata iyaakkko kiittidosona. <sup>36</sup> Qasho keethaa naageyssi, "Hintte bilettana mela daynnati kiittidosona. Hiza, keyidi saro biite" yaagidi he kiitaa Phawuloosas odis.

<sup>37</sup> Shin Phawuloosi he poolise halaqatakko, "Nuuni Roome asi" \* gidishin entti nuna pirddi baynna asaa sinthan wadhdhidi, qasho keethan yeggidosona. Ha77i nuna geeman keyidi bo goonaa? Hanenna, entti bantta huu7en yidi nuna kesso" yaagis.

<sup>38</sup> Poolise halaqati daynnatas hessa odin, Phawuloosaranne Sillaasera Roome biitta asi gididayssa si7ida wode yayyidosona. <sup>39</sup> Hessa gisho, daynnati yidi enttako, "Nuuni hinttena qohida" gidosona. Qasho keethafe kare entta kessidi, katamaappe keyidi baana mela woossidosona. <sup>40</sup> Phawuloosaranne Sillaasera qasho keethafe keyidi Liidiya soo bidosona. Yan ammaneyssatara gahettidi entta minthethidi keyidi bidosona.

## 17

### *Phawuloosi Teselonqen tamaarssis*

<sup>1</sup> Phawuloosaranne Sillaasera Amfipholisaranne Apholoniyyara aadhhdidi Teselonqe bidosona. Yan Ayhude Woosa Keethi de7ees. <sup>2</sup> Phawuloosi kaseyssada yaa gelis. Yan heedzu saamintta Xoossa qaalappe asaas odis. <sup>3</sup> Kiristtoosi waaye ekkanawunne hayoppe dennddanaw besseyssa enttaw qonccisidi odishe, "Yesuusi ha taani hinttew odeyssi Kiristtoosa" yaagis. <sup>4</sup> Enttafe issoti issoti oday tuma gideyssa ma77idi Phawuloosaranne Sillaasera issifidosona. Hessadakka, Xoossa goynniya daro Girike asaynne daro bonchchettida maccasatikka enttara issifidosona.

<sup>5</sup> Shin Ayhudeti qanaattidi issi issi oo soy baynna iita asata ogeppe shiishidosona. Kata-man buqethi kessidosona; Phawuloosanne Sillaase asaas aathi immanaw koyidi Yaasona keethaa teqqidosona. <sup>6</sup> Phawuloosinnee Sillaasi enttaw benttonna iixin, Yaasonanne issi issi ammaneyssata katamaa halaqatakko goochchi efidi, "Hayssati biitta ubbaa buqeyssati ha77i nuukko yidosona. <sup>7</sup> Yaasoni entta ba son wothis. Hayssati, 'Yesuusa giya hara kawoy de7ees' gidi Qeesare kiitaa menthosona" yaagidi dhoqqu gida qaalan odidosona.

<sup>8</sup> Shiiqida asaynne katamaa halaqati hessa si7idi hananabaa dhayidosona. <sup>9</sup> Halaqati Yaasonanne harata waasen birshshidosona.

### *Phawuloosi Beeriyan tamaarssis*

\* <sup>16:37</sup> Roome asi: Phawuloosi Roome asi yaagidi bana xeegiday he wode Ayhude biittaa haarey Roome kawotethaa gidida gishossa. He wode Roome biittan de7iya asay pirddi baynna garaafetkokona.

<sup>10</sup> Ammaneysati Phawuloosanne Sillaase qammara Beeriya yeddisosona. Beeriya gakkidi, Ayhude Woosa Keethi gelidosona. <sup>11</sup> Beeriya asati Teselonqe asatappe aadhd-hida suureta. Entti qaala kumetha wozanaappe ekkidosona; Phawuloosi gidayssi tuma gideyssa shaakki eranaw gallas gallas Geeshsha Maxaafata xanna7oosona. <sup>12</sup> Hessa gisho, enttafe daroti, Giriketappeka bonchchettida daro maccasatinne daro addeti ammanidosona.

<sup>13</sup> Shin Teselonqen de7iya Ayhudeti Phawuloosi Xoossaa qaala Beeriyankka odidayssa si7ida wode Beeriyaa yidi asaa buqidosona. <sup>14</sup> Hessafe guye, ammaneyssati ellesidi Phawuloosa abbaa mati yeddisosona. Shin Sillaaseynne Ximotiyooi Beeriyen attidosona. <sup>15</sup> Phawuloosa moyzida asati Ateena gathidosona. He asati Sillaaseynne Ximotiyooi bantaw dandda7ettida mela ellesidi baakko yaana mela Phawuloosi kiittida kiitaa ekkidi Beeriya simmidosona.

#### *Phawuloosi Ateena bis*

<sup>16</sup> Phawuloosi Ateenan Sillaasenne Ximotiyooosa naagishe, kataman eeqi kumidayssa be7idi yilotis. <sup>17</sup> Hessa gisho, Ayhude Woosa Keethan Ayhudetaranne Xoossaa goynnya Ayhude gidonna asatara qassi baara gahtettiya asatara ubba wode palamees. <sup>18</sup> Ephiqoroosanne Isttoye geetettiya cugatapppe issi issi eranchchotii Phawuloosara palamidosona. Enttafe issoti issoti, "Ha yooyamay ay odanaw koyii?" yaagidosona.

Harati Phawuloosi Yesuusabaanne hayqoppe I dendddidayssa bantaw odida gisho "Ooratha xoossatabaa odiya daanees" yaagidosona.

<sup>19</sup> Phawuloosa oykkidi Aryoospaagosa giya shiiqo bessaa efidi, "Ha neeni tamaarssiya ororathabay aybeekko nuna erisikkii? <sup>20</sup> Ays giilkko, neeni nius oorathabaa odaasa; hiza hessi aybeekko nuuni eranaw koyoos" yaagidosona. <sup>21</sup> Ateena asa ubbaynne yan de7iya imathati oorathabaa edettonnanne si7onna pee7okkona.

<sup>22</sup> Phawuloosi Aryoospaagasan shiiqida asaa sinthan eqqidi, "Ateena asaw, hintte xoossatas ubbabana daro yayyeysa taani be7ays. <sup>23</sup> Taani hintte katamaara yuuyashe hintte goynniya bessata be7iya wode 'Erettonna Xoossas' geetetti xaafettida yarshsho bessaa demmas. Ha hintte eronnashin goynneyssa taani hinttew odays. <sup>24</sup> Sa7aanne sa7an de7iya ubbababaa medhdhida Xoossay, saluwanne sa7aa Goday, asi keexida keethan deenna. <sup>25</sup> I de7o, shempponne ubbababaa asa ubbaas immiya gisho paci de7iya asada asa maade koyenna. <sup>26</sup> Xoossay asa zerethi ubbaas issi addiyafe medhdhidi biutta ubban wothis. Yaatidi entti de7ana wodiyasinne bessasawa zawa immis. <sup>27</sup> I hessa oothiday asi iya koyaya melanne pilgiddi demmana melassa. Hanikkoka I nuuppe geemmibeenna. <sup>28</sup> Hinttefesse issi issi yexxeysatti, 'Nuuni iya nayta' gidayssada, 'Nuuni iyan paxa de7oos, qaaxoos.' <sup>29</sup> Hiza, nuuni Xoossaa nayta gidiya gisho 'Xoossay asa hiillatethaninne qofan worqqafe woykko birappe woykko shuchchafe oosettidaabaa daanees' yaagidi qoppaanaw bessenna. <sup>30</sup> Hessa gisho, Xoossay kase wode asay eronna oothidayssa aggidi aadhdhis, shin ha77i ubbaso de7iya asi ubbay nagarappe simmana mela kiietes. <sup>31</sup> Ays giilkko, Xoossay ba doorida addiyan sa7an de7iya asa ubbaa bolla xillo pirdda pirddanaw qamma giigisi wothis. Iya hayqoppe denthidi hessa asa ubbaas tumayis" yaagis.

<sup>32</sup> Enttafe issi issi asati hayqoppe denddbobaa Phawuloosappe si7idi, iya bolla qelqisidosona. Shin harati, "Nuuni hessa neeppe gujjidi si7anaw koyoos" yaagidosona.

<sup>33</sup> Hessa gisho, Phawuloosi entta giddofe keyis. <sup>34</sup> Shin issi issi addeti Phawuloosara gahtetti ammanidosona. Entta giddofe Aryoospaagasan shiiquwan de7iya Diyonasyoosa giya addey, Damarssso giya issi maccasiyanne harati de7oosona.

## 18

#### *Phawuloosi Qoronttoosa bis*

<sup>1</sup> Hessafe guye, Phawuloosi Ateenappe keyidi, Qoronttoosa bis. <sup>2</sup> Yan Aqiila giya Phanxoosan yelettida issi Ayhude asi demmis. Ayhude asa ubbay Roomeppe keyana mela kawoy Qalawudiyoosi kiittida gisho guutha wodeppe kase I ba machche Phirisqilara Xaaleppe yis. Phawuloosi enttara gahttanaw bis. <sup>3</sup> Iya oosoy enttayssada dunkkaane siko gidiya gisho enttara uttidi issife oothis. <sup>4</sup> Phawuloosi Sambaata ubban Ayhudetanne Giriketa ammanthanaw Ayhude Woosa Keethan palamees.

<sup>5</sup> Sillaaseynne Ximotiyooosi Magedooniyappe yida wode Phawuloosi ba kumetha wodiya immidi Ayhudetas Yesuusi I, Kiristtoosa gidi qaala odis. <sup>6</sup> Shin entti Phawuloosa ixxidi iya cayin Phawuloosi ba ma7uwappe baanaa qoqqofishe, "Hintte gomey hinttena oykko; taani hessian de7ikke. Hizappe guye, taani Ayhude gidonna asaakkobays" yaagis.

<sup>7</sup> Yaappe keyidi Xoossaa goynniya Titoos Yosxoosa giya uraa soo bis. Yosxoosa keethay Ayhude Woosa Keetha matan de7ees. <sup>8</sup> Ayhude Woosa Keetha halaqay Qarisphoosi ba soo

asa ubbaara Godaa ammanis. Qoronttoosa asatappeka daroti Xoossaa qaala si7ida wode ammanidi xammaqettidosona.

<sup>9</sup> Goday issi qamma Phawuloosas qonccidi, “Yayyofa; oda, si77i gooppa. <sup>10</sup> Taani neera de7ays. Taw ha kataman daro asi de7iya gisho nena qohidi iitaban yeggana asi oonikka baawa” yaagis. <sup>11</sup> Hessa gisho, Phawuloosi Xoossaa qaala asaa tamaarssishe issi laythinne usupun ageena enttara uttis.

<sup>12</sup> Gaaliyoosi Akkaya biittaa aysiya wode Ayhudeti issife Phawuloosa bolla denddidi pirdda keethi iya efidi, <sup>13</sup> “Ha addey higgiya ixxidi, asay Xoossaa goynnana mela oothees” yaagidosona.

<sup>14</sup> Phawuloosi haasayana hanishin, Gaaliyoosi Ayhudetakkoo, “Ayhudetoo, hessi iita ooso woykko naaqo gidiyakko taani hinttebaa dandda7ada si7anaw bessees. <sup>15</sup> Shin qaalas, sunthasinne hintte higgiyas hintte palamiyabaa gidlikko hinttee, hinttew billite; hessa taani pirddike” yaagis. <sup>16</sup> Yaatidi, entta pirdda keethafe kare kessis. <sup>17</sup> Hessafe guye, Girike asa ubbay Ayhude Woosa Keetha halaqaa Sostenisa oykkidi pirdda keethaa sinthan wadhdhidosona. Shin Gaaliyoosi hessa paxabaa gibeenna.

### *Phawuloosi Anxookiya bis*

<sup>18</sup> Phawuloosi daro gallas Qoronttoosan uttidaappe guye ammaniyyaa asaa sarothidi, Phirisqiliranne Aqilala markkabera Sooriya bis. Shin I baanappe sinthe baw gasoy de7iya gisho Kinkkiriya kataman ba huu7iya buluusetti. <sup>19</sup> Entti Efesoona gakkida wode Phawuloosi Phirisqilonne Aqila yan aggis. Shin baw Ayhude Woosa Keethi gelidi Ayhudetara odettis. <sup>20</sup> Entti banttara daro wode uttana mela Phawuloosa woossidosona shin I ixxis. <sup>21</sup> Enttafe shaakettishe, “Taani yaa baaliya Yerusalamen bonchchanaw bessees. Shin Xoossi giikko hintteko simmada yaana” yaagidi Efesoonaappe markkabera bis. <sup>22</sup> Qisaariya gakkida wode Yerusalaame bidi woosa keethaa asaa sarothidaappe guye Anxookiya bis.

<sup>23</sup> Yan guutha wode gam77idaappe guye ammaniyyaa asata ubbaa minthethishe Galaati-yaranne Phirggera aadhhdhis.

### *Aphiloosi Efesoonaaninne Qoronttoosan*

<sup>24</sup> Iskkinddiriyan yelettida issi Aphiloosa giya Ayhude asi Efesoona bis. I oda eriya asinne Xoossaa qaala daro eriya asi. <sup>25</sup> I Godaa ogiya tamaaridi, ayyaanan xugettidi Yesuusabaa suure tamaarssees. Gidoshin, Yohaannisa xinqatiya xalaala erees. <sup>26</sup> I Ayhude Woosa Keethan yayyonna tamaarssees. Phirisqilinne Aqili I odehyssa si7ida wode iya banttara soo efidi Xoossaa ogiya kaseyssafe geeshshidi iyaw odidosona.

<sup>27</sup> Aphiloosi Akkaya baanaw koyin Efesoonaan de7iya ammaniyyaa asay iya qofaa ekkidi Akkayan de7iya ammaneysatii iya mokkana mela enttaw dabddabbe xaafidosona. I yaa gakkida wode Xoossaa aadho keehatetha baggara Yesuu Kiristtoosa ammanidayssata daro maaddis. <sup>28</sup> Ays giikko, Yesuusi I Kiristtoosa gideyssa Ayhudetas Xoossaa qaalappe qonccisi deriya sinthan minthi odidi entta lathis.

## 19

### *Phawuloosi Efesoona bis*

<sup>1</sup> Aphiloosi Qoronttoosan de7ishin, Phawuloosi qommo baggara aadhhdidi Efesoona bis. Yan issi issi ammaniyyaa asata demmis. <sup>2</sup> Enttako, “Hintte ammanida wode Geeshsha Ayyaana ekkideti?” yaagidi oychchis.

Entti, “Akkay, ekkibookko; hari attoshin, Geeshsha Ayyaani de7iyabaakkha si7ibookko” yaagidosona.

<sup>3</sup> Phawuloosi enttako, “Yaatin, aybin xammaqettidetii?” yaagis.

Entti, “Nuuni Yohaannisa xinqatiyan xammaqettida” yaagidi zaaridosona.

<sup>4</sup> Phawuloosi, “Yohaannisi baappe guyera yaa Yesuu Kiristtoosan asay ammanana mela asaas odishe, nagarappe simo bessiya xinqatiyan xammaqais” yaagis.

<sup>5</sup> Entti hessa si7ida wode Godaa Yesuu Kiristtoosa tamaare gidanaw xammaqettidosona. <sup>6</sup> Phawuloosi ba kushiya entta bolla wothida wode Geeshsha Ayyaani entta bolla wodhdhin, dumma dumma doonan odettidosona; qassi tinbbite odidosona. <sup>7</sup> He bessan tammanne nam77a gidiya asati de7uosona.

<sup>8</sup> Phawuloosi Ayhude Woosa Keetha gelidi, Xoossaa kawotethaabaa yayyonna palamishenue loythi qonccisise enttara heedzu ageena gakkaw gam77is. <sup>9</sup> Shin enttafe issoti issoti dhube gididi daro asaa sinthan Godaa ogiya cayidi ammanonna ixxidosona. Phawuloosi ammaneyssata enttafe shaakki ekkidi Xiranoosa giya timirtkeethan ubba wode entta tamaarssis. <sup>10</sup> Phawuloosi nam77u laythi gakkaw qaala odis.

Hessa gisho, Iisiyan de7iya asa ubbay, Ayhudetinne Ayhude gidonnayssati Godaa qaala si7idosona.

*Xoossay Phawuloosa kushen oothida malaatata*

<sup>11</sup> Xoossay Phawuloosa kushen wolqqaama malaatata oothis. <sup>12</sup> Hessa gisho, asay iya bollaa bochchida maarabiya woykko ma7uwa hargganchchotas efoosona. Enttika paxoosona; tuna ayyaanatikka enttafe keyoosona.

<sup>13</sup> Tuna ayyaanata kessishe yuuyaa Ayhudetappe issoti issoti, "Phawuloosi sabbakiya Yesuusa sunthan keyite gidi hinttena kiitoos" yaagidi, tuna ayyaanati oykkida asata bolla Godaa Yesuusa sunthaa xeegidosona <sup>14</sup>Kahine halaqaa Asqeewe giya issi Ayhude addiyaas hessa oothiya laappun nayti de7oosona.

<sup>15</sup> Shin tuna ayyaanay enttako, "Taani Yesuusakka Phawuloosakka erays, shin hintte oonantee?" yaagis.

<sup>16</sup> Tuna ayyaanay oykkida addey entta bolla guppi wodhdhidi, entta madunxisidi, he keethaafe kallo baqatana gakkanaaw wolqqaamis. <sup>17</sup> Efesoonaan de7iya Ayhudetinne Ayhude gidonnayssati ubbay hessa si7idi daro yayyidosona. Godaa Yesuusa sunthay daro bonchchettis. <sup>18</sup> Ammaneyssatappe daroti bantha oothida ita oosuwa paaxishenne qoncen odishe yoosona. <sup>19</sup> Biteyssatappe daroti bantta maxaafata shiishidi asa ubbaa sinthan xuuggidosona. He maxaafata gatiya qooday ishatamu mukulu bira santime\* gidis. <sup>20</sup> Hessada hanidi Xoossaqa qaalay diccishenne dalggishe bis.

*Efesoona kataman ooshshi denddis*

<sup>21</sup> Hessi polettidapape guye Phawuloosi, "Taani Yerusalaame ba simmada Roomekka baanaw bessees" yaagidi Maqedooniyaranne Akkayara aadhdhidi Yerusalaame baanaw qofa qachchis. <sup>22</sup> Qassi bana maaddeyssatappe nam77ata Ximotiyooсане Erasxoosa Maqedooniya kiittidi, baw Iisiyan guutha wode gam77is.

<sup>23</sup> He wode Godaa ogiya gisho Efesoonaan wolqqaama kachchi keyis. <sup>24</sup> Issi biraas oothiya Dimexiroosa giya uray Arxemiisi eeqa keethaa misiliya birappe oothidi daro wodhe demmees. <sup>25</sup> Hessa gisho, hessa mela ooso ootheyssata issife shiishidi, "Asaw, nu duretethay ha oosuanen gideyssa hintte ereeta. <sup>26</sup> Hayssi Phawuloosi, 'Asa kushen oosetidayssati xoossata gidokkona' yaagidi, Efesoonaaninne guutha biittatappe attin kumetha Iisiya ubbar de7iya daro asaa odi ammanthidayssanne bailethidayssa hintte be7idetanne si7ideta. <sup>27</sup> Meto gididay, nu oosoy kadheteyssa xalaala gidonnashin Iisiyaninne biitta ubban de7iya asi goynniya gita xossee Arxemiisi keethay bonchchettonna atteyssanne Igitatethayka kunddanayssa" yaagis.

<sup>28</sup> Asay hessa si7ida wode shenen xugettidi, "Efesoona Arxemiisa gita" yaagidi waas-sidosona. <sup>29</sup> He waasoy katama ubbaa gakkis. Phawuloosara hamuttiya Maqedooniya asata, Gaayoosanne Arsxirokoosa oykkidi goochchishe kaassa bessaa woxxidosona. <sup>30</sup> Phawuloosikka asay shiiqidasuwa gelanaw koyis, shin ammaneysat iya diggidosona. <sup>31</sup> Iisiya biittaa halaqatappe Phawuloosa lagge gidiida issoti issoti Phawuloosakki kiittidi, "Kaassa bessaa qoncen keyada benttofa" gidi iya woossidosona.

<sup>32</sup> Shiiqida asaas hananabay dhays; dariya bagga asay hari attoshin ays shiiqidaakk eronna gisho issoy issibaas waassiya wode hankkoy harabaas waassees. <sup>33</sup> Ayhudeti Iskkinndire giya addiya aathi bessin, issi issi asay I gaanabaa odidi iya sinthe aathidosona. I asay si77i gaana mela ba kushian malli bessidi, asaas mootettanaw eqqis. <sup>34</sup> Shin Iskkinndirey Ayhude asi gididayssa asay erida wode nam77u saate gidanayssa mela ubbay issi qaalan, "Efesoona Arxemiisa gita" yaagidi waassidosona.

<sup>35</sup> Wursethan Katamaa xaafey asaa si77i oothidi, "Efesoona asaw! Efesoona kata-may gita Arxemiisi eeqa keethaanne saloppe wodhdhida, I shuchcha misiliya naageyssa gideyssa eronna asi baawa. <sup>36</sup> Hayssa kashi giya asi baynna gisho hintte si77i gaanawunne dirrgiddi aykko oothonna agganaw bessees. <sup>37</sup> Hintte ha asata, eeqa keetha miishe kaysotiboonnayssatanne nu Xoossata cayboonayssata ehideta. <sup>38</sup> Hessa gisho, Dimexiroosinne iyara de7iya oosanchchoti asaa mootanaw koykko, pirdda keethay dooya de7ees; daynatikka de7oosona; entti mootanaw dandda7osona. <sup>39</sup> Shin hintte hara oda koykko, Shango shiiqon oday be7etto. <sup>40</sup> Hessa gidonna ixxiko hachchi hanidabaas Roome kawotethay nuna oychchana. Ha buqethaas gaasoy baynna gisho nuuni gaaso odanaw dandda7okko" <sup>41</sup> yaagidi shiiquwa laallis.

<sup>1</sup> Waasoy decidaappe guye Phawuloosi ammanniyyaa asata xeegisidi entta zoridaappe guye sarothidi Maqedooniya baanaw keyis. <sup>2</sup> I aadhdhiya biittatan de7iya ammanniyyaa asaa qaala odidi minthethidaappe guye Girike biittaa bis. <sup>3</sup> I yan heedzu ageena uttidi, markkabera Sooriya baanaw qoppidi de7ishin, Ayhudeti bana wodhanaw koyeyssa eridi Maqedooniyara guye simmanaw koyis.

<sup>4</sup> Phawuloosa moyzidayssati Beeriyappe Pharhuusa na7aa Sophaxiroosa, Teselonqefo Arxsirookoosaa Sikondhuusa, Derbbe Gaayoosa, Iisiyappe Tikiqoosa, Xirofimoosanne Ximotiyooosa. <sup>5</sup> Hessati sinthe bidi nuna Xiro7aadan naagoosona. <sup>6</sup> Nuuni Uytha Baaliya bonchchidaappe guye Filphisiyuusappe markkabera denddidi, ichchashantho gallasan entta Xiro7aadan gakkidi yan laappun gallas gam77ida.

### *Phawuloosi Xiro7aadan*

<sup>7</sup> Saaminttafe koyro gallasan nuuni uythaa menthanaw shiiqidi de7ishin, Phawuloosi wonttethe baanaw qoppida gisho enttaw qaala odishe giddi biluhe gakkanaw odaa adussis. <sup>8</sup> Nuuni shiiqidi uttida pooqiyani daro poo7oy de7ees. <sup>9</sup> Ewuxikoosa giya issi na7atethay maskkoote bolla uttidi, baana dogidi dhiskkis. Phawuloosi oda adussida wode Ewuxikoosi dhiskko eeyidi heedzanthro pooqiyappe kunddidi hayqqidayssa asay denthis. <sup>10</sup> Shin Phawuloosi wodhdhidi, iya bolla gufannis. Iya idimmidi, “I hayqqibeenna, hirggofite” yaagis. <sup>11</sup> Hessafe guye, pude pooqiya bolla keyidi uythaa menthidi mis. Sa7i wonttana gakkanaw asaas odidaappe guye denddidi bis. <sup>12</sup> He paxida naatethaa soo efidi daro ufayttidosona.

### *Phawuloosi Xiro7aadappe Miliixe bis*

<sup>13</sup> Shin Phawuloosi bana yaappe mokkana mela nuus odida gisho kasetidi markkabiyyakko bidi, Asoosa baanaw denddida. Ays giikko, I tohon baanaw qoppida gisho nuna hessatho kiittis. <sup>14</sup> I nuura Asosan gahettin markkabiyan iya ekkidi Mixiliine bida. <sup>15</sup> Wonttetha gallas yaappe denddidi markkabera Kiyoosa sinthen de7iya bessaa gakkida; qassi wonttetha gallas Saamosa pinnidi kaalliyaa gallas Miliixe gakkida. <sup>16</sup> Phawuloosi Iisiyan daro gam77onna Efesoona matara aadhghanaw qoppis. Baw dandda7ettiko Phenxeqosxe Baaliya gallas Yerusalemme gakkanaw eesotees.

### *Phawuloosi Efesoona cimata zoris*

<sup>17</sup> Phawuloosi Miliixeppe Efesoona kiittidi woosa keethaa cimata xeegisis. <sup>18</sup> Woosa keetha cimati iyaakkoo yin, enttako hayssada yaagis: “Taani Iisiya gelida koyro gallasappe doomida hinttra de7ida wode ubban waana de7idaakkoo hintte ereeta. <sup>19</sup> Ayhudeti duulatidi ta bolla meto gathikokka taani ashkcketethaninne daro afuthan Godaa oothas. <sup>20</sup> Dabaabankka hintte keethan keethan hinttena tamaarssisse hinttena maaddiyabaappe issibaakka pacisabiilkke. <sup>21</sup> Taani Ayhudetasinne Ayhude gidonnayssatas nagarappe Xoossaako simmana melanne nu Godaa Yesuusa ammanana mela markkattas.

<sup>22</sup> “Yan tana aybi gakkaneekko erikke, shin ha77i taani Geeshsha Ayyaanay kiittetada Yerusalemme bays. <sup>23</sup> Geeshsha Ayyaanay qashoynne waayey tana naageyssa katama ubban taw maarkkattis. <sup>24</sup> Shin ta wothaa polanawunne Godaa Yesuus Kiristtoosappe ekkida oosuwa, Xoossa aadho keehatethaa Wonggelaa markkateyssa polanaw ta shemppiwiw pathonnabaadaa goodays.

<sup>25</sup> “Taani ha77ika Xoossa kawotethaa markkattashe hintte ubbaa giddon yuuyas. Hizappe guye hinttefe oonikkka tana be7onnayssa erays. <sup>26</sup> Hessa gisho, hinttefe issi uray dhayikkoka ta oyshettonayssa hachchi hinttew geeshshada odays. <sup>27</sup> Ays giikko, Xoossay oothanaw qoppidabaa ubbaa hinttew aybibaakka ashshonna odas.

<sup>28</sup> “Ba na7aa suuthan wozida Xoossa woosa keethaa naagite. Geeshsha Ayyaanay hinttena halaqaq oothidi doorida wudiyasinne hintte huu7iyas naagettite. <sup>29</sup> Taani bidaappe guye, wudiyas qadhettonna iita suudhumeti hintte giddo gelanayssa ta erays. <sup>30</sup> Ammaneyssata banitta geedo kalethanaw worddo tamaarssya asati hintte giddofe denddana. <sup>31</sup> Hessa gisho, taani heedzu laythi qammanne gallas afuthan hinttena huu7en huu7en minthethidayssa qoppishe naagettite.

<sup>32</sup> “Ha77ika hinttena minthananawunne geeshsha asaara laatisanaw dandda7iya Xoossaasin iya aadho keehatethaa qaalas hinttena hadara immays.

<sup>33</sup> “Taani ooppekka bira woykko worqqa woykko afila amottabiikk. <sup>34</sup> Taani ta kushen oothada tananne taara de7eyssata koshshidabaa maaddidayssha hinttee, hintte huu7en ereeta. <sup>35</sup> Hintte hayssada daaburudi oothishe daaburanchchota maaddanayssanne Godaa Yesuusi, ‘Ekkeyssafe immeysi anjettidayssa’ gida qaala hintte qoppanaw besseyssa taani hinttena ubbaban bessas” yaagis.

<sup>36</sup> Phawuloosi hessa odi onggidi entta ubbaara gulbbatidi Xoossaa woossis. <sup>37</sup> Entti ubbayka Phawuloosa idimmedi yeekkidi yeeridosona. <sup>38</sup> I Zaaridi, "Tana be7ekketa" yaagida qaalay entta daro azzanthis. Entti markkabiya gakkanaw iya moyzidosona.

## 21

### *Phawuloosi Yerusalaame bis*

<sup>1</sup> Nuuni Efesoona cimatappe shaakettida mela Qoose bida. Wonttetha gallas Rooda gakkidi yaappe Phaxara bida. <sup>2</sup> Siroofinge pinniya markkabe demmidi iyan gelidi baanaw dendddi. <sup>3</sup> Nuuni Qoophiroosa be7anaw dandda7iya soo yidi, Qoophiroosa haddirssa bagga aggidi Sooriya bida. Markkabey ba caanaa yan wothanaw koyida gisho Xiroosa bida. <sup>4</sup> Yan ammaniyyaa asata demmidi enttara laappun gallas uttida. Phawuloosi Yerusalaame boonna mela entti iyaw Ayyaan an odidosona. <sup>5</sup> Nuuni enttara uttiya wodey wurin keyidi bida. Entti ubbay bantta maccasataranne bantta naytara issife katamaappe kare kessidi nuna moyzidosona. Nuuni abbaa doonan gulbbatidi Xoossaa woossida. <sup>6</sup> Hessafe guye, woli sarothidi nu markkabiyan gelida; entti bantta soo simmidosona.

<sup>7</sup> Nuuni abbaa ogiya ongidi, Xiroosappe Phexelemaysa gakkida. Yan ammaniyyaa asata sarothidi, entta matan issi gallas pee7ida. <sup>8</sup> Wonttetha gallas keyidi, Qisaariya bida. Sabaakiya Filphoosa soo gakkidi iya matan uttida. I Yerusalaamen kase doorettida laappunatappe issuwa. <sup>9</sup> Filphoosas nabe gidida oyddu geela7o nayti de7oosona.

<sup>10</sup> Nuuni unddenna gallas yan uttidi de7ishin Agaboosa giya nabey Yihudappe Qisaariya yis. <sup>11</sup> Nuukko yidi Phawuloosa saqqiya ekkidi ba kushiyanne ba tohuwa qachchidi, "Geeshha Ayyaanay ha saqqiya godaa, Yerusalaamen Ayhudeti hayssada qachchidi, Ayhude gidonna asaas aathidi immana yaagees" yaagis.

<sup>12</sup> Nuuni hessa si7ida wode nunne yan de7iya asati Phawuloosi Yerusalaame boonna mela woossida. <sup>13</sup> Shin Phawuloosi zaaridi, "Hintte hayssada yeekkishe ays ta wozanaa shugiseeti? Taani, Godaa Yesuusa sunthaa gisho qashetetha xalaala gidonnashin Yerusalaamen hayqqanawukka giigettas" yaagis.

<sup>14</sup> Nu zoriya I ekkonna ixxin, "Godaa sheney hano" yaagidi si77i gida.

<sup>15</sup> Yan guutha wode gam77idaappe guye gigettidi Yerusalaame baanaw keyida. <sup>16</sup> Qisaariyan de7iya ammaniyyaa asatappe guuthati nuura bidosona. Entti nuuni shempasanuswa Minaasona giya Qoophiroosa addiya soo efidosona. Minaasoni koyro ammanida asaappe issuwa.

### *Phawuloosi Yerusalaame gakkis*

<sup>17</sup> Nuuni Yerusalaame gakkida wode ammaniyyaa asati nuna ufayssan mokkidosona. <sup>18</sup> Wonttetha gallas Phawuloosinne nuuni Yayqoobara gahettanaw bida. Woosa keethaa cimati ubbatikka yan de7oosona. <sup>19</sup> Phawuloosi entta sarothidaappe guye Ayhude gidonna asaa giddon ba baggara Xoossay oothidabaa ubbaa enttaw odis.

<sup>20</sup> Entti hessa si7ida wode Xoossa galatidi Phawuloosakko hayssada yaagidosona: "Nu ishaw, Ayhudeta giddon aappun mukulati Xoossaa ammanidaakkoo ne be7aasa; entti ubbayka higgiya minthi naagoosona. <sup>21</sup> Neeni Ayhude gidonnayssata biittan de7iya Ayhude ubbay bantta nayta qaxxaronna mela, Ayhudeta wogaa kaallonna melanne Muse higgiya ixxana mela neeni tamaarsseyssa Yerusalaamen de7iya Ayhudeti si7idosona. <sup>22</sup> Yaatin aybi lo77o? Neeni yidayssa daroti si7ana.

<sup>23</sup> "Hessa gisho, nuuni new odehyssa si7a; gasoy de7iya oyddu asati nu matan de7oosona. <sup>24</sup> Entta ekkada enttara geeya; qassi entti bantta huu7iya meedettana mela enttaw miishe imma. Entti kase nebaa si7idayssi tuma gidonnayssanne neeni ne huu7enkka higge naagiya asi gideyssa ubbay erana.

<sup>25</sup> "Shin ammanida Ayhude gidonna asata gidikko, entti eeqas yarshshettidabaa moonna mela, suuthu uyonna mela, bawuta moonna melanne laymatonna mela, nuuni oda qachchidi, enttaw dabddaabbe xaafida" yaagidosona.

<sup>26</sup> Hessafe guye, Phawuloosi wonttetha gallas asata ekkidi, enttara geeyis. I bantta geeya gallasay awude polettiyakko erisanawunne bantta yarshshuwa awude yarshshaneekko erisanaw Xoossa Keethi gelis.

### *Phawuloosi oykettis*

<sup>27</sup> Laappun gallasay wurana hanishin, Iisiyappe yida Ayhudeti Xoossa Keethan Phawuloosa be7idi, asa ubbaa denthethidi Phawuloosa oykkidosona. <sup>28</sup> "Isra7eele asaw, nuna maaddite; ha uray, nu deriya, nu higgiyanne ha Xoossa Keetha ixxana mela asa ubbaa tamaarssees. Hessika gidonna ixxin Ayhude gidonnayssata Xoossa Keethi gelssidi, ha geeshha bessaa tunisis" yaagidi waassidosona. <sup>29</sup> Entti hessa giday kase Efesoona

Xirofimoosa Phawuloosara kataman be7ida gisho ha77i Phawuloosi Xoossa keethi iya ekki gelidabaa enttaw daanis.

<sup>30</sup> Katama ubbay bugettis; asa ubbay shiiqidi Phawuloosa oykkidi Xoossa Keethafe kare goochchidosona. Xoossa Keethaa penggeti ellesidi gorddettidosona. <sup>31</sup> Asay Phawuloosa wodhana hanishin, "Yerusalaame katamay kumethi bugettis" giya oday Roome shaalaqaakko gakkis. <sup>32</sup> Shaalaqay wotaaddaretanne mato halaqata ekkidi woxxishe yis. Asay shaalaqaanne wotaaddareti be7ida wode Phawuloosa wadhdheyssa aggaagidosona.

<sup>33</sup> He wode shaalaqay shiiqidi, Phawuloosa oykkidi, nam77u santhalaatan qashettana mela kiiitis. Yaatidi, I ooneekkonne ay oothidaakkko asaa oychchis. <sup>34</sup> Aaappe baggay issibaa gidi waassiya wode harati harabaa gidi waasses. Waasoy darida gisho shaalaqay tumaa shaakkanw dandda7ettonna ixxin, wotaaddareti Phawuloosa bantta de7iyaso efana mela kiiitis. <sup>35</sup> Phawuloosi yedhdhi keyaa dethaa gakkiya wode asaa sugethaa gisho wotaaddareti iya tookkidosona. <sup>36</sup> Daro asay, "I hayqqoi" yaagidi waassishe kaalloosona.

### *Phawuloosi mootuwas zaaro immis*

<sup>37</sup> Wotaaddareti Phawuloosa bantta de7iyasuwa gelssana hanishin, Phawuloosi shaalaqaakko, "Taani new issibaa odo?" yaagis.

I Phawuloosakko, "Neeni Girike doona eray?" <sup>38</sup> Neeni hayssafe sinthe buqethi medhd-hidi shemppo wodhida oyddu mukulu asata ekkidi bazzo gelida Gibxxe uraa gidikkii?" yaagis.

<sup>39</sup> Shin Phawuloosi, "Taani, Kilqiyan de7iya erttida Terseese kataman yelettida Ayhude asi. Hayyana tana odisarkkii?" yaagis.

<sup>40</sup> Shaalaqay iyaakko, "Oda" yaagin Phawuloosi dethaa bolla eqqidi, asay si77i gaana mela ba kushiyan mallis. Asay si77i gin Ibraysxe doonan hayssada yaagis:

## 22

<sup>1</sup> "Ta ishato, ta aawato, taani ha77i hinttew immiya zaaruwa si7ite." <sup>2</sup> Phawuloosi enttaw Ibraysxe doonan odeyssa si7idi kaseyyssafe aathidi si77i gidosona. I kaallidi,

<sup>3</sup> "Taani Kilqiyan de7iya Terseesey leyttada ha kataman diccas. Ta asttamaareykka Gamaaliyale; taani nu awata higgiya mintha tamaarida, hachchi hintte ubbay haneyssada Xoossaas mishettiya Ayhude asi. <sup>4</sup> Taani ha ogiya kaalliya maccatanne addeta oykkada qasho keethan yeggashenn entta wodhisana gakkanaaw waaye bessida asi. <sup>5</sup> Hessadakka, kahine halaqaynne Shanggo ubbay tabaa markkattanaw dandda7ees. Taani Damasqqon de7iya entta ishatas enttafe dabddaaabbe ekkada yan de7iya asati qashettidi seerettana mela Yerusalaame entta ehanaw yaa bas.

<sup>6</sup> "Taani bada Damasqqa matida wode seeta gallas qopponna saloppe gita poo7oy ta yuushwan poo7is. <sup>7</sup> Taani sa7an kundda de7ishin, 'Saa7ola, Saa7ola, tana ays goodday?' giya qaala si7as. <sup>8</sup> Taani zaarada, 'Godaw, neeni oonee?' yaagis.

I zaaridi, 'Taani, neeni gooddiya Naazirete Yesuusa' yaagis. <sup>9</sup> Taara de7eyssati poo7uwa be7idosonapape attin taw odeyssa qaala akeekibookkona.

<sup>10</sup> "Taani, 'Godaw, ta ay oootho?' yaagis.

"Goday taakko, 'Denddada Damasqqa ba. Neeni oothana mela Xoossay qoppidaba ubbay yan new odettana' yaagis. <sup>11</sup> He wolqqaama poo7uwa gaason ta ayfey qoodqin, taara de7iya asati ta kushiya oykkidi, tana goochchin Damasqqa gakkas.

<sup>12</sup> "Damasqqon de7iya Ayhude ubbay daro bonchchiya issi Hananiya giya addey, nu higgiya bonchcheysinne Xoossaas minthi wosseyssi de7ees. <sup>13</sup> Hananey taakko yidi, ta matan eqqidi, 'Ta ishaw Saa7olaa, xeella' yaagis. Ellesada taani iya xeella aggas.

<sup>14</sup> "I taakko, 'Nu aawata Xoossay neeni iya sheniya erana mela, iya xillo Na7aa be7ana melanne iya doonapape qaala si7ana mela kasetidi nena dooris. <sup>15</sup> Neeni be7idabaanne si7idabaa asa ubbaa sinthan iyaw markkattana. <sup>16</sup> Ha77i ays gam77ay? Denddada xammaqetta; iya sunthaa xeegada ne nagaraappe meecetta' yaagis.

<sup>17</sup> "Taani guye Yerusalaame simmada Xoossa Keethan woossishin, taw qonccethi benttis. <sup>18</sup> Qonccethan Goday taakko, 'Ne taw markkattiya markkattethaa asay ekkonna gisho ellesada Yerusalaameppe keya' yaagishin be7as.

<sup>19</sup> "Taani, 'Godaw, Ayhude Woosa Keetha ubban nena ammaneyssata oykkada wadhd-hidayssanne qasho keethan yeggidayssa entti eroosona. <sup>20</sup> Entti ne markka Isxifaanose wodhiya wode taani he odan issifas. Qassi entta matan eqqada iya wodheyssata ma7uwa naagays' yaagis.

<sup>21</sup> "Goday taakko, 'Taani nena Ayhude gidonna asaakko haahoso kiittiya gisho denddada ba' yaagis.

*Phawuloosi Roome asi gideyssa qonccisis*

<sup>22</sup> Phawuloosi he qaala odidi ongana gakkanaaw asay I geyssa si7oosona. Hessafe guye, bantta qaala dhoqqu oothidi, "Hayssa biittafe dhayss! I daanaw bessenna" yaagidosona.

<sup>23</sup> Entti wocamishin, bantta ma7uwa bolla holishininne baana bolla laallishin;

<sup>24</sup> Shaalaqay be7idi wotaaddareti Phawuloosa bantta de7iyasuwa efana mela kiittis. Qassi asay ays hessada wocamidaakkko eranaw koyidi Phawuloosa lisson garaafidi pilggana mela entta kiittis. <sup>25</sup> Shin wotaaddareti Phawuloosa dafon minthi qachchidi garaafana haniya wode Phawuloosi ba matan eqqida mato halaqaakkko, "Roome asi" pirddi baynna garaafeysi hinttew wogee?" yaagis.

<sup>26</sup> Mato halaqay hessa si7ida wode shaalaqaakkko bidi, "Ha addey Roome asi. Neeni ay oothanaw qoppay?" yaagidi oychchis.

<sup>27</sup> Shaalaqay Phawuloosakko shiiqidi, "Neeni Roome ase? Ane taw oda" yaagis.

Phawuloosi, "Ee" yaagis.

<sup>28</sup> Shaalaqay zaaridi, "Taani ha gadetethaa daro miishen shammas" yaagis.

Shin Phawuloosi, "Ta ha gadetethaa yeletethan demma ekkas" yaagis.

<sup>29</sup> Hessa gisho, Phawuloosa pilgganaw qoppidayssati iira iyappe shaakettidosona. Shaalaqay Roome asi santhalaaatan qachchidayssa erida wode yayis.

*Phawuloosi Ayhude Shanggo sinthe shiiqis*

<sup>30</sup> Wonttetha gallas Shaalaqay, Ayhudeti Phawuloosa ays mootidaakkko geeshshi eranaw koyis. Kahine halaqatinne shango ubbay shiiqana mela kiittis; qassi Phawuloosa qashoppe bilisidi entta sinthan essis.

## 23

<sup>1</sup> Phawuloosi shiiquwa caddi xeellidi, "Ta ishato, taani hachchi gakkanaaw Xoossaas sinthan ta de7o ubban lo77o wozanan de7as" yaagis. <sup>2</sup> Kahine halaqay Hananay, Phawuloosa doonan baqqana mela iya matan eqqidayssataa kiittis. <sup>3</sup> He wode Phawuloosi iyaakkko, "La ne boooqintie tiyida goda daaneyesso, Xoossay nena baqqana. Neeni ta bolla higgiyatho pirddanaw uttada de7ashe higge baynna tana baqqana mela kiitay?" yaagis.

<sup>4</sup> Phawuloosa matan eqqidayssati iyaakkko, "Ne Xoossaas kahine halaqaa cayay?" yaagidosona.

<sup>5</sup> Phawuloosi, "Ta ishato, I kahine halaqa gididayssa taani erabiikkke; ays giikko Xoossaas qaalan, 'Ne deriya aseyssa bolla iita qaala haasayoppa' geetetti xaafettis" yaagis.

<sup>6</sup> Shin Phawuloosi he bessan de7iya asaappe baggati Saduqaaweta, baggati Farisaaweta gideyssa be7idi, "Ta ishato, taani Farisaawenne Farisaawe na7a; 'Hayqqidayssati hayqoppe deddana' gada taani ufayssan naagiya gisho entti ta bolla pirddoosona" yaagidi odis.

<sup>7</sup> Phawuloosi hessa gida wode Farisaaweta giddoninne Saduqaaweta giddon ooshshi keyin shaakettidosona. <sup>8</sup> Ays giikko, Saduqaaweti, "Hayqqida asi denddenna; kiitanchchoyka ayyaanikka baawa" yaagosona. Shin Farisaaweti nam77ayka de7eyssa ammanoosona. <sup>9</sup> Gita kachchi keyis; Farisaaweta bagga gidida higge asttamaareti denddi eqqidi, "Ha uraa bolla aybi balakka demmibookko; iyaw ayyaani woykko kiitanchchoy haasayonna aggenna" yaagidi palamidosona.

<sup>10</sup> Ooshshay darin asay Phawuloosa shaquerethonna mela gidi, shaalaqay ba wotaadareti wodhdhidi entta giddofe iya elles iessidi bantta de7iyasuwa efana mela kiittis.

<sup>11</sup> He qamma Goday Phawuloosa matan eqqidi, "Phawloosaa, neeni taw Yerusalaamen markkattidaysada Roomenkka markkattanaw bessees; minna; aykkoy baawa" yaagis.

*Phawuloosa wodhanaw maqettidosona*

<sup>12</sup> Wonttetha gallas Ayhudeti, "Phawuloosa wodhonna de7ishe mookko uyokko" gidi caaqqidoston. <sup>13</sup> Phawuloosa bolla hessa maqettida asati oytamappe daroosona. <sup>14</sup> Entti kahine halaqatakonne deriya cimataakkko bidi, "Nuuni Phawuloosa wodhonna de7ishe kathi giyabaa mookko gidi caaqqida. <sup>15</sup> Hiza, hinttenne shanggoy iyabaa geeshshidi pilggiyabay de7iya daanisidi, Phawuloosa hintteko ehana mela shaalaqaa oychchite. Nuuni I ha shiiquwa gakkanaappe sinthe iya wodhanaw giigidi uttida" yaagidosona.

<sup>16</sup> Shin Phawuloosa michche na7ay he maqqunawa si7ida wode bidi wotaaddareti de7iyasuwa gelidi, Phawuloosas odis. <sup>17</sup> Phawuloosi mato halaqatappe issuwa xeegidi, "Ha na7ay shaalaqas odiyabay de7iya gisho iya shalaqaakkko efa" yaagis.

\* <sup>22:25</sup> Roome asi: 16:37 xeellite. <sup>23:3</sup> Maato 23:27-28 <sup>23:5</sup> Kessa 22:28 <sup>23:6</sup> Ha.O 26:5; Fil 3:5 <sup>23:8</sup> Maato 22:23; Mar 12:18; Luuqa 20:27

<sup>18</sup> Mato halaqay na7aa shaalaqaakko efidi, “Qasho keethan de7iya Phawuloosi tana baakko xeegidi, ha na7ay new odiyabay de7iya gisho iya neekko ehana mela tana woossis” yaagis.

<sup>19</sup> Shaalaqay na7aa kushiya oykkidi, dumma kare kessidi, “Neeni taw odanabay aybe?” yaagidi oychchis.

<sup>20</sup> Na7ay shaalaqaakko, “Ayhudeti Phawuloosabaa kaseppe minthi pilgganaw koyid-abaa daanisidi neeni wontto iya shiiquwa ehana mela nena woossanaw zoreetaa qachchidosona. <sup>21</sup> Shin neeni entti giyabaa si7oppa. Ays giikko, oytamappe dariya asati Phawuloosa wodhonna de7ishe ‘Kathi mookko, haathe uyokko’ gidi caaqqidi, qosettidi iya naagoosona. Ha77i ne giyabaa xalaala si7anaw naagoosona” yaagis.

<sup>22</sup> Shaalaqay zaaridi, “Ha oda ne taw odidayssa hara ooddeskka odoppa” yaagidi na7aa guye yeddus.

#### *Phawuloosi deriya aysiya Filkkisa sinthe shiiqis*

<sup>23</sup> Shaalaqay mato halaqatappé nam77ata xeegidi, “Qammafe heedzu saaten Qisaariya baanaw, nam77u xeetu wotaaddarella, laappun tammu para asataanne nam77u xeetu tooranchchotta giigisite. <sup>24</sup> Deriya aysiya Filkkisakko Phawuloosa saro gathanaw toga mehe giigisite” yaagidi entta kiittis. <sup>25</sup> Shaalaqay Filkkisas hayssada giya dabddaabbe xaafis:

<sup>26</sup> “Qalawudiyoosa Luusiyosappe deriya aysiya bonchcho Filkkisas, saroy new gido.

<sup>27</sup> Ahhudeti ha uraa oykkidi wodhana hanishin, I Roome biitta asi gidoysa erada wotaad-daretara gakkada iya ashshas. <sup>28</sup> Entti iya ays mootiyakko eranaw koyada entta shiiquwan iya shiishas. <sup>29</sup> Entti bantta higgiyas iya mootidayssafe attin iya wodhisiyabaa woykko qashisiyabaa gidonnayssa ta demmas. <sup>30</sup> Entti ha uraa bolla magettida zigirssay tana gakkin, taani ellesada iya neekko yeddas. Iya mooteyssati ne sinthan bidi mootana mela kiittas” yaagis.

<sup>31</sup> Hessa gisho, wotaaddareti kiittidayssada Phawuloosa ekkidi, gamma Antiphaxirisa gathidosona. <sup>32</sup> Wonttetha gallas para asati iyara baana mela oothidi toho asati guye simmidosona. <sup>33</sup> Togay Qisaariya gakkidi dabddaabbiya deriya ayseyssas immidi, Phawuloosa iya sinthe aathidosona. <sup>34</sup> Deriya ayseyssi dabddaabbiya nabbabidaappe guye “Phawuloosa, ne aw awuraajja asee?” gidi iya oychchis. I Kilqiya asi gidoysa erida wode <sup>35</sup> “Taani nebaa nena mooteyssati yaa wode si7ana” yaagis. Wotaaddareti Phawuloosa Heroodisa keethan naagana mela kiittis.

## 24

#### *Phawuloosa Ayhudeti mootidosona*

<sup>1</sup> Ichchashu gallasappe guye kahine halaqay, Hananey, cimataranne Xerxeluusa giya issi xabaqaara Qisaariya bis. Entti deriya ayseyssa bolla Phawuloosa mootidosona.

<sup>2</sup> Phawuloosi xeegettidi gelida wode Xerxeluusi iya hayssada yaagidi mootis:

“Bonchcho Filkkisa, nuuni ne baggara daro sarotethaa demmida, ne lo77o aysuwan nu biittay daro laamettis. <sup>3</sup> Bonchcho Filkkisa, nuuni awunkka awude gidin daro galatan hessa ekkoos. <sup>4</sup> Taani nena gam77isonnashin neeni ne keehatethan nubaa qanthan si7ana mela nena woossays. <sup>5</sup> Ha uray dhube gididi biitta ubban de7iya Ahhudeta giddon buqethi medhdhdidi Naaziraweta bagga asaa kaaletheyssa gidoysa erida. <sup>6</sup> Hari attoshin, Xoossa Keetha tunisana hanishin nuuni iya oykkida; nu higgiada iya bolla pirddanaw qoppida. <sup>7</sup> Shin shaalaqaa Luusiyosi yidi, wolqqan nu kusheppa iya wothi ekkis. <sup>8</sup> Iya mooteyssatikka neekko yaana mela kiittis. Neeni ne huu7en ha uraa pilggada nuuni iya mootiya mootuwa ubbaa eranaw dandda7aasa” yaagis.

<sup>9</sup> Ahhudetikka, “Ha oday tuma” gidi iya qofaa ma77idosona.

#### *Phawuloosi mootuwas zaaro immis*

<sup>10</sup> Deriya ayseyssi Phawuloosa oda gidi mallis. Phawuloosi hayssada gidi zaaris: “Neeni daro wodeppee doomada, ha asaas pirddashe de7eyssa erada ta odas ufayssan zaaro immays. <sup>11</sup> Taani goynnanaaw Yerusalaame keyin tammanne nam77u gallasappe aadhdonnayssa neeni ne huu7en eranaw dandda7aasa. <sup>12</sup> Ahhudeti tana Xoossa Keethan gidi Ahhude Woosa Keethan gidi kataman gidi oodderakka palamishin woykko ase shiishada magqishin issi asikka demmibeenna. <sup>13</sup> Ha77ika entti tana mootiyabaas markka demmanaw dandda7okkona.

<sup>14</sup> “Shin taani issibaa ammanays; taani higgen de7iyabaanne nabeti xaafida ubbabaa ammanada, nu awata Xoossaa, entti worddo giya ogiyan goynnays. <sup>15</sup> Entti bantta huu7en ammaneyssa mela xillotinne nagaranchchoti hayqoppe denddanayssa takka ammanays. <sup>16</sup> Hessa gisho, taani Xoossa sinthaninne asa sinthan ubba wode lo77o kahi taw daana mela minnays.

<sup>17</sup> “Taani Yerusalaameppe keyoosappe daro laythafe guye ta biittaa manqotas maade immanawunne yarshsho yarshshanaw Yerusalaame bas. <sup>18</sup> Taani Xoossa Keethan hessa oothada geeshsha wogaa pola simmin tana demmidosona. He wode taara asi baawa, ooshshikka keyibeenna. <sup>19</sup> Shin Iisiyappe yida issi issi Ayhudeti yan de7oosona; entti ta bolla oda koykko yidi tana ne bolla mootanaw dandda7osona. <sup>20</sup> Woykko taani shangguwa sinthe shiiqida wode oothida bali de7ikko hayssati ne sinthan de7eyssati odona. <sup>21</sup> Taani entta giddon eqqada, ‘Hayqqidayssati denddana gada waassada odida gisho hachchi hintte sinthan ta bolla pirddoosona’ gas; hessafe haraabaa oothabikke” yaagis.

<sup>22</sup> Shin Filkkisi Xoossaa ogiyabaa geeshshi erida gisho “Taani hintte oda shaalaqa Luusiyosi yaa wode pirddana” yaagidi moyzis. <sup>23</sup> Filkkisi qassi Phawuloosa qachchonna naagana melanne iya dabbatappo oonikka iya oychchanaw yishin diggonna mela mato halaqaas odis.

#### *Phawuloosi Filkkisa sinthenne Dirusilla sinthe shiiqis*

<sup>24</sup> Guutha gallasappe guye, Filkkisi Ayhude bagga gidida ba machche Dirusillara yidi Phawulooso kiihti ehisidi Yesuu Kiristtoosan ammanobaaiyappe si7is. <sup>25</sup> Phawuloosi xillotethabaa, ba huu7e haaroobaanne yaanaw de7iya pirdbabaa odishin, Filkkisi yayyidi, “Neeni ha77is ba; taw injjetida wode nena xeegisana” yaagis. <sup>26</sup> He wode Phawuloosappe gubbo ekkanaaw qoppidi iya zaari zaari xeegisadi iyara odettees.

<sup>27</sup> Nam77u laythafe guye, Filkkisa bessaa Phorqiyoos Fisxoosi ekkis. Filkkisi Ayhudeta ufayssanaw koyidi Phawuloosa billonna aggaagis.

## 25

#### *Phawuloosi Roome Kawuwas abeet gis*

<sup>1</sup> Fisxoosi kawotida heedzu gallasappe guye Qisaariyappe Yerusalaame bis. <sup>2</sup> Yan kahine halaqatinne Ayhudeta kaaletheysatti Phawuloosa mootidosona. <sup>3</sup> Phawuloosa Yerusalaame ehisin ogen qosettidi iya wodhanaw enttaw injjetana mela banttana maaddo gidi Fisxoosa woossidosa. <sup>4</sup> Fisxoosi enttako, “Phawuloosi, Qisaariyan qasho keethan de7ees; taani ta huu7enkka ellesada guye simmana hanays. <sup>5</sup> I balidabay de7ikko hintte giddon aawateyssati taara Qisaariya bidi iya mootona” yaagidi zaaris.

<sup>6</sup> Fisxoosi entta matan hosppun woykko tammu gallasa mela gam77idaappe guye Qisaariya bis. Wonttetha gallas pirdda oydiyan uttidi Phawuloosa ehana mela kiipts. <sup>7</sup> I yin Yerusalaameppe yida Ayhudeta iya yuushwan eqqidi entti lathanaw dandda7onna daro deexo mooto iya bolla shiishidosona. <sup>8</sup> Phawuloosi zaaridi, “Taani Ayhude higgiya gidin Xoossa Keethaa woykko Roome Kawuwa Qeesare naaqqabiikke” yaagis.

<sup>9</sup> Shin Fisxoosi Ayhudeta ufayssanaw koyidi Phawuloosakko, “Yerusalaame bada ha mootuwabaa yan ta sinthan pirddettanaw koyay?” yaagidi oychchis.

<sup>10</sup> Shin Phawuloosi, “Taani pirddettanaw bessiya Qeesare pirdda keethan eqqa kichchas. Neeni loytha ereyssada taani Ayhudeta aybinkka naaqqabiikke. <sup>11</sup> Hiza, taani naaqqid-abay woykko hayqos gathiyaba oothidabaa gidikko hayqoppe tana ashsha giikke. Shin entti tana mootiya mootoy coo gidaappe guye oonikka tana enttaw aathi immanaw dandda7enna. Qeesarey tabaa pirddo gada oychchays” yaagis.

<sup>12</sup> He wode Fisxoosi ba zoranchchotara zorettti, “Neeni Qeesarey tabaa pirddo gada oychchadasa; Qeesarekko baasa” yaagidi zaaris.

#### *Phawuloosi Agirpha sinthenne Barnniiqe sinthe shiiqis*

<sup>13</sup> Guutha gallasappe guye Kawoy Agirphinne Barnniiqey Fisxoosa sarothanaw Qisaariya bidosona. <sup>14</sup> Yan entti daro gallas gam77in, Fisxoosi Kawuwas Phawuloosabaa hayssada yaagidi odis; “Filkkiis billonna aggidi bida issi addey hayssan de7ees. <sup>15</sup> Taani Yerusalaame bida wode kahine halaqatinne Ayhudetee cimati iya bolla pirddana mela tana woossidi iyabaa taw odidosona. <sup>16</sup> Taani, ‘Mootettida uray bana mooteysata sinthan eqqidi ba mootidabaaas zaaro immonnashin, oona gidikkoka aadhhdhidi imetteyssi Roome higge gidenna’ yaagada enttaw zaaras.

<sup>17</sup> “Hessa gisho, entti hayssan shiiqida wode taani gam77onna wonttetha gallas pirdda keethaa gelada Phawuloosa ehana mela kiipts. <sup>18</sup> Iya mooteysatti iya matan eqqidi, iitaban iya mootonna aggokona gada taani qoppidayssa mela iya mootibookkona. <sup>19</sup> Shin entti bantaa ammanobaanne Phawuloosi, ‘Paxa de7ees’ giya issi hayqqida Yesusa geetettiya addiyabaa iyara palamoosona. <sup>20</sup> Ha oday tana shaakkanaaw metida gisho Phawuloosi Yerusalaame bidi, yan pirddettanaw koyakko gada iya oychchis. <sup>21</sup> Shin Phawuloosi ba oda Qeesarey be7ana gakkanaw qasho keethan gam77anaw oychchis. Taani iya Qeesarekko yeddana gakkanaw I qashettana mela kiipts” yaagis.

<sup>22</sup> Hessa gisho, Agirphi Fisxoosakko, "Taani ta huu7enkka he uray giyabaa si7anaw koyays" yaagis.

Fisxoosi iyaakkko, "Neeni wontto I giyabaa si7ana" yaagis.

<sup>23</sup> Wonttetha gallas Agirphinne Barnniiqey gita bonchchon shaalaqataranne kataman de7iya gita asatara yidi pirdda keethi gelidosona. Fisxoosi Phawuloosa xeegisidi ehis.

<sup>24</sup> Fisxoosi, "Kawaw Agirpha, hayssan nuura de7iya asaw, Ayhudeti Yerusalaamenkka hayssankka waassidi, 'I hizappe guye paxa daanaw bessenna' yaagidi, tana woossida uraa hayssa be7eeta. <sup>25</sup> Shin iya hayqos gathiyabaa aybibakkka taani demmabiikke. I ba huu7en, 'Qeesarey tabaa pirddo yaagada oychchays' gida gisho Qeesarekko iya yeddanaw qofa qachchas. <sup>26</sup> Taani iyabaa ta godaa Qeesares xaafanaw gidiya gaasoy aybikkbaawa. Hessa gisho, iyabaa hintte be7ikkoo ta xaaifiyabay benttaneekko gada hintte sinthe ubbarakkha Kawaw, Agirpha, ne sinthe iya ehas. <sup>27</sup> Ays giikko, qashettida asi bolla daynnas aathiya wode I ays mootettidaakko Qonccisonna aggeyssi taw eeyatethi daanees" yaagis.

## 26

### *Phawuloosi Agirpha sinthan zaarida zaaruwa*

<sup>1</sup> Agirphi Phawuloosakko, "Neeni nebaa odanaw dandda7aasa" yaagis. He wode Phawuloosi ba kushiya denthidi hayssada yaagis:

<sup>2</sup> "Kawaw, Agirpha, Ayhudeti tana mootidabaas zaaro immanaw hachchi ne sinthan eqqashe ta qaaday lo77o gada qoppays. <sup>3</sup> Neeni Ayhude wogaanne palamaa loythada eriya gisho tana salettonna si7ana mela woossays.

<sup>4</sup> "Taani na7atethafe doomada ta asaa giddoninne Yerusalaamen de7ida ta de7uwa Ayhude ubbay eroosona. <sup>5</sup> Taani koyroppe doomada, nu ammano higgiya minthidi naagiya Farisaaweta yaraappe gideyssa entti markkattanaw koykko eroosona. <sup>6</sup> Ha77ika taani Xoossay nu awatas immana gida ufayssaa naagiya gisho mootettada hayssan eqqas. <sup>7</sup> Qassi tammanne nam77u nu awata sheeshay Xoossa qammanne gallas minthidi goynnische Xoossay immana gidayssaa ekkanaw ufayssan naagoosona. Kawaw Agirphaa, Ayhudeti tana mootey taani ufayssan hessa naagiya gishossa. <sup>8</sup> Ayhudetoo, Xoossay hayqqidayssata dentheyssa ays ammanekketii?

<sup>9</sup> "Kase taani ta huu7enkka Naazirete Yesuusa sunthaa teqqanaw dandda7ettidaba ubbaa oothanaw bessees gada qoppas. <sup>10</sup> Taani Yerusalaamen oothiday hayssa. Kahine halaqatappe maata ekkada Xoossaas asatappe darota qashisas. Entta wodhiya wodekka entta hayquwa dosas. <sup>11</sup> Daro wode Ayhude Woosa Keethaa ubban entti seerettana melanne Yesuusa cayidi kaddana mela un77ethas. Taani wogi baynna entta hangettada hari attoshin, hara biitta katamata gakkanaaw entta goodas.

<sup>12</sup> "Taani ha odas kahine halaqatappe maataanne kiitaa ekkada Damasqqa bays. <sup>13</sup> Kawaw, taani seeta gallas ogiyan de7ishin awa poo7oppe daro aadhdhiya poo7oy ta yuushuwaninne taara beyssata yuushuwan saloppe poo7is. <sup>14</sup> Nuuni ubbayka sa7an kunddida wode Ibraysxe doonan, 'Saa7ola, Saa7ola, tana ays goodday? Neeni nena caddiya xam77aa qakkiko nena qohaasa' yaagidi taw odishin si7as.

<sup>15</sup> "Taani, 'Godaw, neeni oonee?' yaagis.

"Goday, 'Taani, neeni gooddiya Yesuusa; <sup>16</sup> shin dendda eqqa. Hachchi neeni tana be7idayssanine sinthafe ta nena bessanyssa haratas markkattana mela ta oosanchcho oothada nena shuumanaw new benttas. <sup>17</sup> Isra7eele asatappenne taani nena enttako kiittiya Ayhude gidonnayssatappe nena ashshana. <sup>18</sup> Neeni entta ayfiyaa dooyana, dhumaappe poo7okko, Xalahe kusheppe Xoossako entta zaarana. Entti tanan ammanidi nagara atotethaa ekkana. Xoossay doorida asaa giddon bantta laata demmanna' yaagis.

<sup>19</sup> "Kawaw Agirphaa, hessa gisho, taw saloppe benttida qonccethas kiittayanassa ixxbabiikke. <sup>20</sup> Shin taani koyrottada Damasqqon hessasa guye Yerusalaameninne Yihuda biitta ubban de7eyssatinne Ayhude gidonnayssati bantta nagaraappe Xoossaakko simmana melanne nagaraappe simuwa bessiya ooso oothana mela qaala odas. <sup>21</sup> Hessa gisho, Ayhudeti tana Xoossa Keethan oykkidi wodhanaw koyidosona. <sup>22</sup> Hachchi gakkanaaw Xoossaas maadey taappe shaakettibeenna; yaaniya gisho, guuthaasinne gitaas markkatashe hayssan eqqas. Nabetinne Musey hanana gidi odidayssafe haraa issibaakkka taani odidabay baawa. <sup>23</sup> Hessika, 'Kiristtoosi waaye ekkanaw bessees; qassi hayqoppe koyro denddidi Ayhudetasinne Ayhude gidonnayssatas atotetha poo7o odanaw bessees' gi-daysssa" yaagis.

<sup>24</sup> Phawuloosi hessa yaagidi zaarishin, Fisxoosi ba qaala dhoqqu oothidi, "Phawloosaa, ne gooyadasa; ne daro timirttey nena gooshshas gathis" yaagis.

<sup>25</sup> Shin Phawuloosi, "Bonchcho Fisxoosaa, taani tumaabanne bessiyabaa odaysippe attin gooyabiikk. <sup>26</sup> Taani qoncen odiya odaa Kawoy erees. Ha oday geeman oosettibonna gisho issokyka iyappe geemmonayssa taani geeshshada erays.

<sup>27</sup> "Kawaw Agirphaa, neeni nabeta ammanaasa gidikk? Neeni ammaneyssa taani erays" yaagis.

<sup>28</sup> Kawoy Agirphi, Phawuloosakko, "Ha guutha saaten tana ammanthanaw koyay?" yaagis.

<sup>29</sup> Phawuloosi, "Daro wode gidin guutha wode ne xalaala gidonnashin hachchi taana si7iya ubbay ha qashuwappe attin ta mela gidana mela Xoossa woossays" yaagis.

<sup>30</sup> Hessafe guye, Kawoy Fisxoosi, Barnniiqeynne enttara uttida ubbayka denddidosona.

<sup>31</sup> Yaappe keyidi bishe issov issuwara, "Ha uray hayqos woykko qashos gathiyabaa aykkoka oothibeenna" yaagidi odettidosona. <sup>32</sup> Agirphi Fisxoosakko, "Ha uray 'Qeesarey tabaa pirdo' goonnaako bilettaanaw dandda7ees, shin attis" yaagis.

## 27

### *Phawuloosi Roome bis*

<sup>1</sup> Nuuni markkabera Xaale baanaw qachchida wode Awugisxoosa wotaaddarella geetetteyssatappi issi Yuuliyoosa giya mato halaqaas Phawuloosanne hara guutha qasho asata immidosona. <sup>2</sup> Iisiya gaxan de7iya biittata biya Adiramixiyoone markkaben gelidi denddida. Maqedooniya asi gidida Teselonqe Arsxirookoos nuura de7ees.

<sup>3</sup> Wonttetha gallas nuuni Sidoona gakkishin, Yuuliyoosi Phawuloosas keehidi ba laggetakko bidi koshshiyaban maadettana mela enttako yeddus. <sup>4</sup> Yaappe denddidi sinthara nu bolla carkkiya gisho haathan tegettida biittaa, Qoophiroosan zemppidi aadhhdhida.

<sup>5</sup> Kilqiyanne Phinfiliya matan de7iya abbaa pinnidi Liiqiyan de7iya Muura gakkida. <sup>6</sup> Yan mato halaqay Xaale biya Iskkinddiriya markkabe demmadi, iyan nuna gelssis.

<sup>7</sup> Nuuni daro gallas loddara bidi, daro meton Qandoosa katamaa mata gakkida. Yaara baanaw nuna carkkoy diggin Salmonoara aadhhdhidi haathan tegettida biittaa, Qarxeesan zemppidi aadhhdhida. <sup>8</sup> Daro meton gaxa gaxa oykkidi Laasiya katamaa matan de7iya abbaa doonan "Markkabey Woppu Gidi Shemppiyaso" giya bessaa gakkida.

<sup>9</sup> Nuuni yan daro wodiya gam77idaappe guye xoomi bilettein, markkabera buussi metiya gisho Phawuloosi entta zoris. <sup>10</sup> "Asaw, nu buussan git boshinne daro qohoy de7eyssi taw benttees; qohoy caanaa bollanne markkabiya bolla xalaala gidonnashin nu de7uwa bollaka gakkana" yaagis. <sup>11</sup> Shin mato halaqay Phawuloosi gidayssafe aathidi markkabiya laaggeysinne markkabiya goday geyssa ammanis. <sup>12</sup> He abbaa doonan de7iya katamay balggo ageena aathanaw enttaw injettonna gisho dariya asati banntaw dandda7ettiko Finqqe katamaa gakkidi balggo ageena yan aathanaw zoretidosona. Finqqey pudehawulohappenne dugeha-wulohappe giddon abbaa doonan de7iya katama.

### *Abbaa bolla gotey denddis*

<sup>13</sup> Kawushsha dugeha carkkoy loddara carkkida wode bantta qoppidayssada hanidabaa daanin denddidi, markkabey qaaxxonna mela oykkiya biraata pude ekkidi Qarxeesa matara aadhhdidosona. <sup>14</sup> Shin daro gam77onna "Awuraqis" giya wolqqaama gotey haathan tegettida biittaafde duge entta bolla denddis. <sup>15</sup> He gotey markkabiya sugidi efonna diggida gisho carkkoy markkabiya ba dosida soo efis.

<sup>16</sup> Nuuni Qeeda giya haathan tegettida biittaa zemppidi bishe daro metootetti markkabiya wogoluwa ashshanaw dandda7ida. <sup>17</sup> Entti wogoluwa pude kessidaappe guye wodoruan markkabiya bolla xaaxidi, minthi qachchidosona. Surtiisa giya shafiyen bantana dom77ethana gidi hirrgidi, markkabiya sharaa wodhisidi markkabiya coo yeddi aggidosona.

<sup>18</sup> Gotey wolqqaamishe bin wonttetha gallas caanaappe baggaab holoo oykkidosona. <sup>19</sup> Heedzanthro gallas markkabiya miishiya ekkidi bantta kushen holidosona.

<sup>20</sup> Nuuni daro gallas awa ayfenne xoolintto be7onna gishonne wolqqaama uushoy nu bolla uushida gisho sinthafe shemppora attana gidi qoppibookko.

<sup>21</sup> He wode entti daro gallas kathi moonna gam77ida gisho Phawuloosi entta giddon denddi eqqidi, "Asaw, hintte ta zoriya ekkidi Qarxeesappe denddonna aggidaako ha metoyne qohoy nuna gakkenna. <sup>22</sup> Shin taani hinttena yayyofite gada zorays; ays giikko, ha markkabey dhayanaappe attin hinttefe issi asa shemppoykka dhayenna. <sup>23</sup> Zine gamma ta iyabaa gididayssinne ta goynniya Xoossay kiittida kiitanchchoy ta matan eqqidi, <sup>24</sup> 'Phawuloosa, yayyofa; neeni Roome Kauwu Qeesare sinthan eqqanaw bessees. Hekko Xoossay ne gisho neera biya asa ubbaa shemppuwa ashshis' yaagis. <sup>25</sup> Hessa gisho, asaw, yayyofite. He kiitanchchoy taw odidayssi hananayssa taani ammanays. <sup>26</sup> Shin carkkoy nuna efidi issi haathan tegettida biittaa gaxan holana" yaagis.

<sup>27</sup> Tammanne oyddantho qamman Meditiraane Abban nuna carkkoy gedenne haa sugishin, gidi bilahe gidiya wode markkabiyan ootheysstas biittako matidabaa daanis. <sup>28</sup> Entti ciimmotethaa eranaw koyidi wodoro xeeran deexiyabaa qachchidi abban yeggin, abbay hosppun tammu wadha gidis. Guuthi gam77idi, zaari yeggin usuppin tammu wadha gidis. <sup>29</sup> Entti abbaa gaxan de7iya shuchchan dom77etttona mela yayyidi, markkabey boonna mela oykkiya oyddu biraatata markkabiyyappe guyera abban yeggidi, sa7ay wonttana mela Xoossa woososona. <sup>30</sup> Markkabiyan ootheysstati markkabiyyappe baqatanaw koyidi, markkabey boonna mela oykkiya biraatata markkabiyyappe sintha baggara abban yeggiya daanin wogoluwa abban yeggidosona. <sup>31</sup> Phawuloosi mato halqaakkonne wotaaddaretakko, "Hayssati markkabiyan shemppi uttonna ixxiko hintte attanaw dandda7ekketa" yaagis. <sup>32</sup> Hessa gisho, wotaaddareti wogoloy qashettida wodoruwa qanxidi yeddi aggidosona.

<sup>33</sup> Sa7i wonttana hanishin ubbay kathi maana mela Phawuloosi asaakkko, "Hintte kathi moonna naagishe hachchira tammanne oyddu gallas gam77ideta. <sup>34</sup> Hessa gisho, guutha kathi hintte maana mela taani hinttena woossays. Hintte gashttana mela guutha kathi maanaw koshshees; hari attoshin hintte huu7e binaanaappe issokyka dhayenna" yaagis. <sup>35</sup> Phawuloosi hessa gidi uythi ekkidi ubbaa sinthan Xoossa galatis; uythaa menthidi muusu doomis. <sup>36</sup> Ubbay minettidi banttaw kathi ekkidi midosona. <sup>37</sup> Nuuni markkabiyan de7eyssati nam77u xeetanne laappun tammanne usuppuna. <sup>38</sup> Entti midi kallida wode caana gistiya abban yeggiyi markkabiya deexuwa kawushshidosona.

### *Markkabey me77is*

<sup>39</sup> Sa7i wonttida wode markkabiya oosanchchoti aw biitta gakkidaakko eronashin, abbaa gaxan de7iya shafenue silimo be7idosona. Banttaw dandda7ettiko markkabiya he shafiyakko shiishanaw qoppidosona. <sup>40</sup> Yaatidi, markkabey boonna mela oykkiya biraatata birshshidi abban yeggidosona. He wode laaggiya mithaa qachchiya wodoruwa birshshidosona. Hessafe guye, carkkoy markkabiya sinthe sugana mela markkabiya efiya sharaa sintha baggara dhoqqu oothidi buussu doomidosona. <sup>41</sup> Shin markkabey shafe dooren dom77ettidi mitettis. Markkabiya sintha baggay xuggunidi shafiya caddi oykkidi qaaxxonna ixxin, guye baggay zuliya sugethan meqeretethi oykkis.

<sup>42</sup> Wotaaddareti qasho asaappe issokyka haathaa wadhdhidi kessi ekkonna mela entta wodhanaw zorettidosona. <sup>43</sup> Shin mato halqaay Phawuloosa ashshanaw koyidi wotaaddareta zoreetaa ixxis. Haathe wadho eriya ubbay markkabiyyappe haathan guppi guppi wodhdhidi kasetidi gaxa keyana mela kiittis. <sup>44</sup> Attidayssati sanqqa bollanne, markkabiya me7uwa bolla keyana mela kiittis. Hessada hanidi ubbay gaxa sarora keyidosona.

## 28

### *Phawuloosi Maltta giya haathan tegettida biuttaa bis*

<sup>1</sup> Nuuni gaxa saro keyida wode gakkida haathan tegettida biittay Maltta geetetteyssa erida. <sup>2</sup> Maltta asay nuus daro keeha keehidosona. Iri bukkiya gishonne meeggiya gisho tama eethidi nuna ubbaa mokkidosona. <sup>3</sup> Phawuloosi daro afira shiishidi taman wothishin, shooshi seelaa gisho keyidi iya kushiya bolla xaaxettidi iya dukkis. <sup>4</sup> Maltta asay shooshi Phawuloosa kushen xaaxettidayssa be7ida wode issoy issuwako, "Tuma ha uray shemppo wodhida asi; hari attoshin abbaafe I attinkka xoossa pirddafe\* attidi paxa daanaw dandda7ibeenna" yaagidosona. <sup>5</sup> Shin Phawuloosi ba kushiyappe shooshaa wuxarkkidi, taman yeggis; iya aykkoka qohibeenna. <sup>6</sup> Entti, "Iya asatethay kixxes, woykko akeekonna kunddidi hayqqees" gidi naagoosona. Shin daro wode naagidi iya asatethan aybikka dummattidabay dhayin, "Hayssi xosse" yaagidi bantta qofaa laammosona. <sup>7</sup> He heeran haathan tegettida biuttaa halqaqa, Puplyoosa geyssas gadey de7ees; heedzu gallas gakkanaw i nuna siiqon mokkis. <sup>8</sup> Puplyoosa aaway qoxo, mishanne ulo uttison harggettidi zin77idi de7ees. Phawuloosi iya soo gelidi iyaw Xoossa woossis; ba kushiya iya bolla wothidi pathis. <sup>9</sup> Hessafe guye, Malttan de7iya harggiya hara asatikka yidi paxidosona. <sup>10</sup> Entti nuna daro bonchchidosona; nuuni markkabera baanaw denddida wode oges koshshiyabaa nuus immidosona.

### *Phawuloosi Malttafe Roome bis*

<sup>11</sup> Heedzu ageenappe guye, Malttan balggo aathidi Iskkinddiriya markkabera baanaw denddida. He markkabiya bolla Diyosqoroosa giya mente eeqata misiley de7ees. <sup>12</sup> Sirakuuse katamaa gelidi yan heedzu gallas uttida. <sup>13</sup> Yaappe denddidi Regiyume

\* **28:4** xoossa pirddafe: He wode he biittan dumma dumma macca xoossati de7oosona. Enttafe issiniya iita oothiya asaa pirddiyaro. Iya pirdda xoossi geetetta xeegettasu.

katamaa gakkida. Issi gallasappe guye, dugeha bagga carkkoy carkkin, wonttetha gallas Putiyoole katamaa gakkida.<sup>14</sup> Yan nuuni issi issi ammaniyaa asata demmin, banttara saamintta gam77ana mela nuna woossidosona. Hessafe guye, Roome bida.

<sup>15</sup> Roomen de7iya ammaniyaa asati nubaa si7idi, Afifyosa Giyaan, Heedzu Aqiyaso giya bessaa gakkanaw nuna mokkanaw yidosona. Phawuloosi entta be7ida wode Xoossa galatidi minettis.

### *Phawuloosi Roomen*

<sup>16</sup> Nuuni Roome gelida wode Phawuloosi bana naagiya wotaaddariyara barkka de7o geetetti.

<sup>17</sup> Heedzu gallasappe guye, Phawuloosi Ayhudeta halaqata baakko xeegisis. Entti shi iqida wode enttako, “Ta iishato, taani nu asaa woykko nu aawata wogaa bolla aybi qohokka oothabiikke, shin tana Yerusalamaen qachchidi Roome asaas aathidi immidosona.<sup>18</sup> Entti ta mootuwa be7idi hayqos gathiyabaa ta bolla aybibaakka demmiboonna gisho tana billanaaw qoppidosona.<sup>19</sup> Shin Ayhudeti hessa ixxida wode ‘Tabaa Qeesarey pirddo’ yaagasippe attin taani ta deriya mootiyabay de7in gidenna.<sup>20</sup> Taani hinttena xeegisiday hinttena be7anawunne hinttew hayssa odanaassa. Taani ha santhalaatan qashettiday Isra7eеле asay naagiya ufayssaa gishossa” yaagis.

<sup>21</sup> Ayhude halaqati Phawuloosakkoo, “Nuus Yihudappe nebaa xaafettida dabddaabbey gakkibeenna. Yaappe yida asatappe issoykka nebaa iita odiday baawa.<sup>22</sup> Shin ha ne kaalliya ammanuwa dumma dumma bessan asay ixxyessa nuuni eriya gisho ne qofaa si7anaw koyos” yaagidosona.

<sup>23</sup> Entti bantta yaana gallas Phawuloosas qaxaridi, he gallas daridi i de7iyasuwa yidosona. I wonttafe omarssi gakkanaw Xoossa kawotethaabaa enttaw markkattis. Qassi entti Yesuusabaa ammanana mela Muse higgiafenne nabeta maxaafappe qonccisidi entta tamaarssis.<sup>24</sup> Issoti issoti Phawuloosi gidayssa ammanidosona, shin harati ammanibookkona.<sup>25</sup> Entti bantta giddon oda ma77onna ixxida wode Phawuloosi issibaa gidaappe guye bidosona. I hayssada yaagis: “Geeshsha Ayyaanay nu aawatas nabiya Isayaasa doonan odidayssi tuma.

<sup>26</sup> ‘Neeni he asaakko bada,  
hintte sissaa si7eeta, shin hinttew gelenna;  
hintte be7o be7eeta, shin demmeketa.

<sup>27</sup> Ha asaa wozanay muumis;  
entta haythay tullis;  
entta ayfeykkä goozettis.

Hessi baynneekoa,  
entti bantta aayfiyan be7idi, bantta haythan si7idi, bantta wozanan akeekidi,  
entti taakko simmana;

takka entta pathanashin’ yaaga” yaagis.

<sup>28</sup> “Hiza, hayssi Xoossaatotethaa kiitay Ayhude gidonnayssatas gideyssa ereeta. Enttika si7ana” yaagis.

<sup>29</sup> Phawuloosi hessa gidaappe guye Ayhudeti bantta giddon daro palamishe keyidi bidosona.

<sup>30</sup> Phawuloosi kera keethan nam77u laythi kumethi de7is; yan de7ishe baakko yaa ubbaa mokkees. <sup>31</sup> Yashshi baynnanee oonikka diggonnashin Xoossa kawotethaabaa sabbakis; Godaa Yesuus Kiristtoosabaa qonccisidi tamaarssees.

## Phawuloosi Roome Asaas Xaafida Kiitaa Gaatha Qofaa

Hawaariya Phawuloosa kiitay Roome asaas xaafetiday, Phawuloosi Roomen de7iya woosa keethaa be7anaw qoppida gisho I biya wode entti giigidi naagana mela oothanaassa. Phawuloosa qofay Roomen de7iya ammaneyssatara guitha wode oothidaappe guye entti iya maaddin Isppeene baanassa. Ammanobaa i eridayssanne ammaniyaa asay he timirrtiyo ooson peeshshana mela qonccisidi xaafis. Ha maxaafan Phawuloosa kumetha kiitay ha qofaa oykkees.

Phawuloosi Roomen de7iya ammaniyaa asata koyro sarothi simmidi, kaallidi enttaw wooseyssa odidaappe guye ba kiitas gul77a qofaa, "Wonggelan Xoossaa xillotethay qonccis; he xillotethay koyroppe wurssethi gakkanaw ammanon qonccis" gidi odee (1:17).

Hessafe guye, he qofaa dalggisidi xaafees. Ayhudeta gidin Ayhude gidonna asaa gidin ubbay nagaras haarettidayssata gidihi gisho entti Xoossaara sigettanaw koshshees. Asay Xoossaara sigettanaw dandda7ey Yesuus Kiristtoosaa ammanona. Entti Xoossaara med-hdhiya ha ororatha gahetethaa ayfey, ororatha de7o gideyssa Phawuloosi dalggisidi odee. Ammaniya asi Xoossaara saro de7ees; qassi Xoossaa Ayyaana baggara nagaraappenne hayqo wolqqafe kessi ekkees. Shemppo 5-8 gakkanaw Phawuloosi Xoossaa higgeynne ammaniyaa asaa de7on oothiya Xoossaa Ayyaana wolqqaa qofay aybeekko odee. Hessafe kaallidi, Phawuloosi, "Xoossay asaa naytas qoppida qofaa giddon Ayhudetinne Ayhude gidonna asay waanidi issife waaxettanaw dandda7ii?" yaagiya oyshaas zaaro immanaw baaxetis.

Qassi Ayhudeti Yesuusa ekkonna ixxiday Xoossaa qofaa gideyssa odee. Hessi haniday Yesuus Kiristtoosa baggara qonccisida aadho keehatethaa giddon asa zare ubbaa haphphana melassa. Gidoshin, Ayhudeti Yesuusa ekkana wodey yaanayssa Phawuloosi ammanees. Wurssethan Phawuloosi ammano de7o waanidi daanaw bessiyako odee. Xoossaas oothanabaa, ammaniyaa asati bantta biittaasinne bantta giddon issoy issuwas awatethan oothanabaanne kaha gaason medhettiya oyshetabaa qonccisidi odee.

### **Roome kiitaa ayfe qofata**

Gelo qofaa 1:1-15

Roome kiitaa huu7e qofaa 1:16-17

Asa na7as atotethi koshsheyssa 1:18-3:20

Xoossay ase ashshiya ogiya 3:21-4:25

Kiristtoosan benttiya ooratha de7uwa 5:1-8:39

Isra7eeles Xoossaa qofaa 9:1-11:36

Ammaniya asaa duussaa 12:1-15:13

Kuushsha qofanne sarothro 15:14-16:27

<sup>1</sup> Yesuus Kiristtoosa aylle gidida, hawaare gidana mela xeegettidayssafenner Xoossaa Wonggelaa sabbakana mela dooretida Phawuloosi kiittida kiitaa.

<sup>2</sup> Xoossay duro wodeppee sinthe ba nabeta baggara immana yaagida Xoossaa Wonggelay Geeshsha Maxaafatan xaafettis. <sup>3</sup> He Wonggelay ashon Dawate sheeshaappe yelettida, Xoossaa Na7aa, nu Godaa Yesuus Kiristtoosabaa. <sup>4</sup> Qassi Iba geeshsha Ayyaanahayqoppe denddiidi, Xoossaa Na7aa gideyssa gita wolqqan bessis. <sup>5</sup> Iya baggara Ayhude gidonna asa ubbay, ammanidi kiittetana mela Kiristtoosa sunthaa gisho Xoossay aadho keehatethinne hawaaretetha maata nuus immis. <sup>6</sup> Yesuus Kiristtoosas gidana mela xeegettida asatappe baggati hinttena.

<sup>7</sup> Roomen de7iya, Xoossay siiqeyssatasinne iya geeshsha dere gidana mela dooridayssatas.

Xoossaa nu Aawappenne Godaa Yesuus Kiristtoosappe aadho keehatethaynne sarotethay hinttew gido.

### *Galata woosaa*

<sup>8</sup> Ubbaafe koyrottada, hintte ammanoy biitta ubban si7ettida gisho Yesuus Kiristtoosa baggara hintte gisho ta Xoossaa galatays. <sup>9</sup> Taani iya Na7aa wonggelabaa kumetha wozanan odiya Xoossay, taani ta woossan ubba wode hinttena qoppeyssas I markka.

<sup>10</sup> Wurssethan, Xoossaa shene gidikko, taani hintteko baanaw ogey taw injjetana mela ubba wode woossays. <sup>11</sup> Taani hinttew Ayyaana imuwa shaakkawunne hinttena be7anaw laamotays. <sup>12</sup> Hessika, taani hintte ammanuwan, qassi hintte ta ammanuwan minettana melassa.

<sup>13</sup> Ta ishato, taani Ayhude gidonna asaappe ayfe demmidayssada, hinttefekka ayfe demmanaw hintteko baanaw qoppas, shin digettas. <sup>14</sup> Tamaarida asaasinne tamaariboonna asaas qassi cincatasinne eeyatas taw acoy de7ees.

<sup>15</sup> Hessa gisho, Roomen de7iya hinttewuka Wonggelaan odanaw amottays.

### *Wonggelay Xoossaa wolqqaa*

<sup>16</sup> Iya ammaniyaa ubbaa, koyrottidi Ayhudeta, kaallidi Ayhude gidonnayssata ashshanaw Wonggelay Xoossaa wolqqaa gidiya gisho ta Wonggelan yeellatikke. <sup>17</sup> Xilloy ammanon de7on daana geetettidi Geeshsha Maxaafan xaafetis. Wonggelaan Xoossaa xillotethay qoncis; koyroppe wurssethi gakkanaw asay xilley ammanona.

### *Asa iitatethi*

<sup>18</sup> Tumay erettonna mela bantta iita ooson kammiya asaa bollanne nagara ubbaa bolla, Xoossaa hanqoy saloppe wodhdhees. <sup>19</sup> Xoossay enttaw qonccanaw bessiyabaa qonccisida gisho entti Xoossabaa eroosona. <sup>20</sup> Alamey medhettosappe doomidi, asaas benttonna Xoossaa kanddoy, hessika iya merinaa wolqqaynne Xoossatethay iya medhetethan qonccidi de7iya gisho asay bantta iitatethaa gaasoyaabay baawa.

<sup>21</sup> Entti Xoossaa erishe, iya bonchhibookanne galatibokkona. Entta qofay maad-donnabaa gidis; entta akekonna wozanay dhumis. <sup>22</sup> Entti banttana cincata goosona, shin eeyata. <sup>23</sup> Entti hayqqonna Xoossaa goynnayanssa aggidi, hayqqiya asa medhon, kafota medhon, do7ata medhoninne ulora gooshettiyabata daanisidi oothida misileta goynnidosona.

<sup>24</sup> Hessa gisho, entti issoy issuwara borssobaa oothidi, bantta asatethaa kawushshana mela Xoossay entta wozanay amottiya tuna oosos entta yeggi aggis. <sup>25</sup> Hessi haniday entti Xoossaa tumaa worddon laammidha gishonne medhdhida Xoossaa aggidi, medhetethi goynnida gishossa. Xoossay merinaw galatettidaysssa. Amin77i.

<sup>26</sup> Hessa gisho, Xoossay enttana entta borssso amuwaas yeggi aggis. Entta maccasay banttaw bessiya addera gahetethi aggidi, bessonabaa hanidi maccasi maccasara gaheettidosona. <sup>27</sup> Hessadakka, addeti banttaw bessiya maccasara gaytethi aggidi, addey addera gaheettidosona. Addeti issoy issuwara amon xuugtetti, borssobaa oothidosona. Bantta oothida balaas bessiya pirdaa ekkidosona.

<sup>28</sup> Entti Xoossaa erishe, hari attoshin iyabaa qoppanaw koyonna ixxida gisho bessonabaa oothana mela Xoossay enttana pathonna qofas aathi immis. <sup>29</sup> Enttan geelatethi, iitatethi, yiqey, geney, qanaatey, shemppo wodhoy, palami, cimoyne iita amoy kumis. Entti zigireyssata, <sup>30</sup> asa sunthi iisseyssata, Xoossaa ixxeyssata, cayeysata, otoreyssata, ceegetteyssata, iitabaa oothanaw koyeyssatanne bantta aayesinne aawas kiitettonayssata, <sup>31</sup> akekonnayssata, caaqo mentheyssata, siiqoy baynnayssata, qadhey baynnayssata. <sup>32</sup> Hayssata mela ootheyssatas hayqoy bessees giya Xoossaa higgiya erishe, hayssata ooothosona. Entti banttaw ooso xalaala gidonnashin oothiya haratakka nashshoosona.

## 2

### *Xoossaa xillo pirddaa*

<sup>1</sup> Hessa gisho, neno harata bolla pirddeyss, neeni gaasoyaabay baawa. Neeni harata bolla pirddashe, he neeni pirddiya uraa mela oothiko, nee, ne bolla pirddaasa. <sup>2</sup> Hessa mela ooso ootheyssata bolla Xoossay xillo pirddaa pirddeyss nu eroos. <sup>3</sup> Neno, hessa mela ooso ootheyssata bolla pirddeyss, entti ootheyssata mela ootheyss, neeni Xoossaa pirddaafe attanabaa daanii? <sup>4</sup> Woykko Xoossaa keehatethaa, genccaanne danda7a darotethaa kadhayye? Xoossay new keehiday nena nagaraappe zaaranaw gideyss erikkiyeye?

<sup>5</sup> Shin hinttew shuchcha wozaninne si7onna haythi de7ees. Hessa gisho, Xoossaa hanqoyne xillo pirdday qoncciya gallas, ne bolla pirdday darana mela oothaasa. <sup>6</sup> Xoossay issuwashiuwas iya oosuwa mela immana. <sup>7</sup> Lo77o ooson minnidi, galataa, bonchchonne dhayonna de7uwa koyeyssatas Xoossay merinaa de7uwa immana. <sup>8</sup> Shin banttana siiqeyssata, tumaa ixxeyssatanne iitabaa oothanaw koyeyssata bolla Xoossaa hanqoyne pirdday yaana. <sup>9</sup> Iitabaa oothiya asa ubbaa, koyrottidi Ayhudeta, kaallidi Ayhude gidonna asaa metoynne waayey gakkana. <sup>10</sup> Shin Xoossay lo77o ooso oothiya ubbaas, koyrottidi Ayhudetas, kaallidi Ayhude gidonnayssatas galataa, bonchchonne sarotethaa immana. <sup>11</sup> Xoossay som77o be7idi ase shaakkenna.

<sup>12</sup> Higgey baynna nagara oothida ubbay higgey baynna dhayana. Higgey de7ishin, nagara oothida ubbay higgen pirddettana. <sup>13</sup> Xoossaa sinthan xilleyssati higge naageyssatappe attin higge sissa xalaala si7eyssata gidokkona. <sup>14</sup> Higgey baynna Ayhude gidonna asay medhon higgey kiiveyssa ooothosona. Enttaw xaafettida higge baynna ixxikokka entti bantta wozanan higgiya eroosona. <sup>15</sup> Entta hanotay, higge kiiyat entta wozanan xaafetidayssa bessees. Qassi entta kahay entta bolla markkatees. Entta qofay issi issi toho enttana bala gees; issi issi toho enttana likke gees. <sup>16</sup> Ta tamaarssida Wonggelaa mela Xoossay Yesuus Kiristtoosa baggara asa wozanan geemmidha qofaa pirddiya wode hessi erettana.

### Ayhudetanne entta higgiya

<sup>17</sup> Shin ne nena Ayhude gaasa; higgen zemppaasa; Xoossan ceeqaasa. <sup>18</sup> Ne oothana mela Xoossay koyabay aybeekko eraasa. Higgiya tamaarida gisho tuma gidiyabaa dooranaw eraasa. <sup>19</sup> Neeni qooqeta kaaletheysa, qassi dhuman de7eyssatas poo7o gideyssa shaakka eraasa. <sup>20</sup> Neeni higgiyafe demmida eratethaaninne tumatethan eeyata eriseyssanne yoogata tamaarsseyssa gideyssa eraasa. <sup>21</sup> Yaatin, ne harata tamaarsseyssi ne nena ays tamaarssikii? Neeni, "Kaysotoppa" gashe, neeni ne huu7en kaysotayye? <sup>22</sup> Neeni, "Laammofa" gashe, neeni ne huu7en laammayye? Neeni eeqa ixxashe, eeqay de7iya keethaa bongayye? <sup>23</sup> Neeni Xoossaa higgiyan ceegettasa, shin higgiyas kiitettonna ixxada Xoossaa yeellayay? <sup>24</sup> Geeshsha Maxaafan, "Hintte gaason Xoossaa sunthay Ayhude gidonna asatan cayettees" geetettidi xaafettsi.

<sup>25</sup> Ne higgs kiitettsiko, ne qaxxaretethaa maadey de7ees, shin neeni higgiyas kiitettonna ixxiko ne qaxxaretethay qaxxaretibonna mela gidees. <sup>26</sup> Ayhude gidonna asi qaxxarettonna de7ishe, higgiyas kiitettsiko, Xoossay iya qaxxaretida mela taybenne? <sup>27</sup> Hintte, Ayhude asati, hinttew xaafettida higgeynne qaxxaroy de7ishin, hintte higgs kiitettonna ixxiko, Ayhude gidonna asay qaxxarettonna ixxikokka higgs kiitettsido, hintte bolla pirddana.\*

<sup>28</sup> Hiza, sunthan Ayhude gidida ubbay tuma Ayhude gidenna. Qassi kare asatethaa qaxxaroy tuma qaxxaro gidenna. <sup>29</sup> Shin tuma Ayhudetethi gaatha baggan Ayhude gideyssa. Tuma qaxxaretethi Xoossaa Ayyaanen oosettiya wozana qaxxaretethafe attin xaafettida higgiyan oosettiya asatetha qaxxaro gidenna. He uray galataa Xoossafe ekkeesippe attin asappe gidenna.

## 3

### Ayhudeta ammanonna ixo

<sup>1</sup> Yaatin, Ayhude gidon ay dummatethi de7ii? Woykko qaxxaretethan ay maadey de7ii?  
<sup>2</sup> Tumakka Ayhude gidoy daro ogera maaddees. Ubbaafe sinthe Xoossay ba qaala hadara Ayhudetas immis.

<sup>3</sup> Yaatin, enttafe issoti issoti qaala ammanonna ixxiko, entta ixoy Xoossaa ammanetethaa diggiyye? <sup>4</sup> Diggenna! Asa ubbay worddanchcho gidikkoka Xoossay tuma gido. Geeshsha Maxaafan,  
 "Ne qaalan ne xillasa;  
 nena mooteyssa pirddan lathaasa"

geetettidi xaafettsi.

<sup>5</sup> Yaatin, nu nagaray Xoossay xillo gideyssa bessiyabaa gidikko, nu woyganee? Xoossay nu nagaraa gisho nu bolla pirddiko, likke gidenneyye? Hayssa taani asa qofatho gays.  
<sup>6</sup> Hessi ubbarakkha hanenna. Hessada hanikko, Xoossay ha alamiya bolla waati pirddanee?

<sup>7</sup> Shin ta worddotethay Xoossaa tumaa qonccisidi, iya bonchhuwa darssi bessiyabaa gidikko, yaatin, ays ta bolla nagaranchchoda pirddeetii? <sup>8</sup> Issi issi asay, "Lo77oy yaana mela iita ooothos" yaagidi tamaarssiyada oothidi tana mootosona. Hessa mela asaa bolla yaa Xoossaa pirdday likke.

### Asi ubbay nagaranchcho

<sup>9</sup> Yaatin, nuuni woyganee? Nu Ayhudeti, Ayhude gidonnayssatappe aadhdhonaayye? Gidenna! Ayhude gidin, Ayhude gidonna ixxin ubbay nagaranchcho gideyssa taani kasetada hinttew odas.

<sup>10</sup> Geeshsha Maxaafan,  
 "Xillo asi issokyka baawa."

<sup>11</sup> Akeekiya asi baawa,  
 Xoossaa koyaa oonikka baawa.

\* <sup>2:27</sup> Hintte bolla pirddana: entta hanotay woykko entta kiitetethay hintte bolla pirddana. <sup>2:29</sup> Zaare 30:6 <sup>3:4</sup>

- <sup>12</sup> Asa ubbay Xoossaas zokko zaaridosona;  
      ubbay issife pathonnabaa gididosona.  
Lo77o oothiya oonikka baawa;  
      issi asikka baawa.  
<sup>13</sup> Entta doonappe keyaa qaalay,  
      dooyettida duufoppe keyaa xinqqo mela;  
      bantta inxarssan cimmoosona.  
Entta doonappe ase wodhiya,  
      shoosha marzey keyees.  
<sup>14</sup> Entta doonan camo odaynne baadethi kumis.  
<sup>15</sup> Entti suuthi gussanaw ellesoosona.  
<sup>16</sup> Entta ogiyan dhayognne qohoy de7ees.  
<sup>17</sup> Entti sarotetha ogiya erokkona.  
<sup>18</sup> Bannta de7uhan Xoossaas yayyokona”  
geetettidi xaafettis.

<sup>19</sup> Ase ubbaa doona oythanawunne kumetha alamiya Xoossaas pirddaafe garssan shiishanaw, higgey imettiday higgefe garssan aqeyssatas gideyssa nu eroos. <sup>20</sup> Hessa gisho, oonikka higgs kiitettidi Xoossaas sinthan xillanaw dandda7enna. Higgey asi ubbay nagaranchcho gideyssa bessees.

#### *Xillotethi ammanona*

<sup>21</sup> Shin ha77i Xoossay asi higgey baynnashin xilliya oge qonccisis. He ogiya Muse higgeynne nabeti markkattidosona. <sup>22</sup> Ha xillotethaa, Xoossay Yesuus Kiristtoosa baggara asa ubbaas shaakoy baynna immees.

<sup>23</sup> Asa ubbay nagara oothidosona; Xoossay enttaw immida bonchchuwafe haakkidi attidosona. <sup>24</sup> Shin entti Xoossaas aadho keehatethan, woziya Kiristtoos Yesuusa baggara coo xillidosona. <sup>25</sup> Xoossay Yesuus Kiristtoosa yarshsho oothidi immiday, iya ammaniyya ubbay iya suuthan nagara maarotethi demmana melassa. Xoossay hessa oothiday ba dandda7an kase nagaraa taybonna aggidi, ba xillotethaa bessanaassa. <sup>26</sup> Ha77i wodiyen Yesuusa ammaniyya ubbaa xillisi, Xoossay ba huu7en xillo gideyssa bessees.

<sup>27</sup> Yaatin, nu ceeqettiabay aybi de7ii? Aybikka baawa. Nuuni ceeqettey higgs kiitettiya gishoyye? Akkay! Ammano gishossa. <sup>28</sup> Xoossay ase xillisey ammanonnappe attin higgs kiitetethan gidonnayssa nu aakekos.

<sup>29</sup> Woykko Xoossay Ayhudeeta xalaala Xoosseyye? Ayhude gidonnayssatas Xoosse gidenneyye? Tuma, Ayhude gidonnayssataskka I Xoosse. <sup>30</sup> Xoossay isso; Ayhude etanne Ayhude gidonnayssata ammanon xillisey iya. <sup>31</sup> Yaatin, nuuni higgiya ammano gisho shaaros guusseyye? Gidenna! Higgiya minthosippe attin.

## 4

#### *Abrahamey ammanon xillis*

<sup>1</sup> Yaatin, nu mayzay Abrahamey ay demmidee? <sup>2</sup> Abrahamey ooson xillidabaa gidiyakko, I ceeqettiabay de7ees, gidoshin, Xoossaas sinthan ceeqettanaw dandda7enna. <sup>3</sup> Geeshsha Maxaafay, “Abrahamey Xoossaas ammanis; Xoossay hessa iyaw xillotethi oothidi ekkis” yaagees.

<sup>4</sup> Oothiya uray ekkiya daamozeiy, iya ooso wolqqaas cigettiya gateppe attin iyaw imota gidenna. <sup>5</sup> Shin ooso oothonna oonikka nagaranchchuwa xillisiya Xoossaas ammanikko, iya ammanoy iyaw xillotethi gididi taybettees. <sup>6</sup> Geeshsha Maxaafan Dawitey, oosoy baynna Xoossay xillisiya asati ay mela anjjettidaakkko hayssada yaagidi qonccisees:

<sup>7</sup> “Entta balay atto geetettidayssatinne  
      entta nagaray kamettidayssati anjettidayssata.

<sup>8</sup> Goday iya nagaraa taybonna asi anjettidayssa” yaagees.

<sup>9</sup> Yaatin, Dawitey odida anjjoy qaxxarettida asaa xalaalaseyye? Woykko qaxxaretti-boona asaase? Nuuni, “Geeshsha Maxaafay, ‘Abrahamey Xoossaas ammanis; Xoossay hessa iyaw xillotethi oothidi ekkis’ yaagees” gida. <sup>10</sup> Yaatin, hessi awude hanidee? Abrahamey qaxxaretineyye? Woykko qaxxarettonna de7ishinee? Qaxxarettnaappe sinthe hanisippe attin guye gidenna.

<sup>11</sup> Abrahamey qaxxarettanaappe sinthe iya ammanoy iyaw xillotethi gididi taybetti-dayssa erisanaw, iya qaxxaroy malaata gidis. Hessa gisho, Abrahamey qaxxarettonna ammaneyssatasinme ammanon xilleyssata ubbaas aawa gidis. <sup>12</sup> I qaxxarettdidayssataskka

aawa. Abrahamey enttaw aawa gididay entti qaxxarettida gisho xalaalas gidonnashin I qaxxaretanaappe sinthe ammanida ammanuwa entti kaallida gishossa.

### *Xoossaa ufayssay ammanon ekettees*

<sup>13</sup> Abrahamesinne iya sheeshas, "Alamiya ta hinttew immana" yaagida ufayssay, Abrahamey ammanon xillida gishossafe attin higge naagidi polida gisho gidenna. <sup>14</sup> Higgis kiittidayssati Xoossay immana gida ufayssaa laataeyssata gidikko, asaa ammanoy maad-denna; Xoossaa ufayssayka hada gidis. <sup>15</sup> Higge menthoy Xoossaa hanqo ehees, shin higge baynnason higge menthoy baawa.

<sup>16</sup> Hessa gisho, Xoossay immida ufayssay ammanon ekettees. Ha ufayssay Abrahame sheeshaa ubbaas Xoossaa aadho keehatethaa baggara imettidayssa qonccisees. Hessika higge naageyssata xalaalas gidonnashin Abrahameda ammanida ubbaassa. Abrahamey nu ubbaas aawa. <sup>17</sup> Geeshsha Maxaafan, "Ta nena daro kawotethatas aawa oothas" geetetti Abrahame gisho xaafettis. Ha ufayssay Abrahames imettiday hayqqidayssatas de7o immeysinne oorathabaa oothiya Xoossay iya gideyssa I ammanida gishossa.

<sup>18</sup> Xoossay Abrahames daro zerehti immanayssaa caaqqis. Ufayssi oothanaw aykkoka dandda7ettona wode Abrahamey Xoossan ammanida gishonne ufayssi oothida gisho daro kawotethatas aawa gidis. <sup>19</sup> Abrahames xeetu laythi kumana hanikkoka, ba daaburida asatethaanne Saara na7a yelanaw dandda7onnaysssa erishe ba ammanuwan daaburibeenna.

<sup>20</sup> Gidoshin, I ba ammanuwan minnidi Xoossaas bonchcho immisppe attin Xoossay immida ufayssaa ammanonna ixxidi, sidhibeenna. <sup>21</sup> Abrahamey, Xoossay caaqqida caaqwa polanaysssa ba kumetha wozanan ammanis. <sup>22</sup> Hessa gisho, Xoossay iya ammanuwa xillotethan taybis.

<sup>23</sup> Shin, "Iyaw xillotethan taybis" giya qaalay Abrahame xalaalas xaafettibeenna. <sup>24</sup> He qaalay nu Godaa Yesuusa hayqoppe denthida Xoossaam ammaniyya nuuskka nu ammanoy xillotethan taybettana mela xaafttis. <sup>25</sup> Xoossay iya nu nagara gisho hayqos aathidi immis; I nuna xillisanaw hayqoppe denddis.

## 5

### *Xoossan de7iya sarotethaa*

<sup>1</sup> Hiza, nu ammanon xillida gisho nu Godaa Yesuus Kiristtoosa baggara Xoossaara nuus sarotethi de7ees. <sup>2</sup> Nuuni iya baggara ha77i nu eqqida aadho keehatethaa giddo ammanon gelida. Hessa gisho, nu Xoossa bonchchuwa shaaketenaw de7iya ufayssan ceeqettoos.

<sup>3</sup> Hessa xalaala gidonnashin metoy dandda7a eheyssa nu eriya gisho nu metuwankka ceeqettoos. <sup>4</sup> Qassi dandda7ay genccaa, genccay ufayssi immeyssa nu eroos. <sup>5</sup> Nuus immida Geeshsha Ayyaana baggara Xoossay ba siiquwa nu wozanan gussida gisho he ufayssay nuna yeellayenna.

<sup>6</sup> Nuuni buroo daaburanchchota gididi de7ishin, Xoossaa wodey gakkin, Kiristtoosi nagaranchchota gisho hayqqis. <sup>7</sup> Xillo asa gisho hayqqana asi demmanayssi daro meto, shin keeha asa gisho hayqqana asi ooni eri benttonna aggenna. <sup>8</sup> Shin nuuni buroo nagaranchcho gididi de7ishin, Kiristtoosi nu gisho hayqqis. Hessi Xoossay nuna ay mela siiqiyakko iya siiquwa bessees. <sup>9</sup> Hiza, nuuni Kiristtoosa suuthan xillidabaa gidikko, ubbaafe aathidi iya baggara Xoossaa hanquwafe attana. <sup>10</sup> Nuuni Xoossaara kase morkke, shin iya Na7aa hayquwan iyara sigettida. Hessafe aathidi, ha77i nuuni Xoossaara sigetti-dapape guye iya na7aa de7uwa gaason nuuni attana. <sup>11</sup> Hessa xalaala gidonnashin ha77i nuna Xoossaara sigethida nu Godaa Yesuus Kiristtoosa baggara nu Xoossan ceeqettoos.

### *Addaamenne Kiristtoosa*

<sup>12</sup> Addaame baggara nagari ha alamiya gelis. He nagaraa baggara hayqoy yis. Asi ubbay nagara oothida gisho hayqoy asa zare ubbaa gakkis. <sup>13</sup> Higgey imettanaappe sinthe alamen nagari de7ees, shin higge baynna wode nagari nagara gididi taybettenna. <sup>14</sup> Shin Addaameppe Muse gakkaw hayqoy asa ubbaa haaris. Hari attoshin, Addaameda higgis kiitettonna ixxidi, nagara oothiboonayssata bollaka hayqoy kawotis.

Addaamey yaana Yesuus leemiso. <sup>15</sup> Shin Xoossaa aadho keehatethay Addaame nagaraa mela gidenna. Issi asa nagara baggara daro asay hayqqis. Shin Yesuus Kiristtoosa baggara Xoossaa aadho keehatethay asa ubbaas daridi imettis. <sup>16</sup> Addaame nagaraa giddoninne Xoossaas imotaa giddon daro dummatethi de7ees. Issi asa nagara gaason Xoossay iya bolla pirddis. Shin asay daro nagara oothinkha Xoossaa aadho keehatethay xillotethaa ehis. <sup>17</sup> Issi asa nagara gaason hayqoy asa ubbaa bolla kawotis. Shin Yesuus

Kiristtoosa baggara Xoossaas aadho keehatethaanne xillotetha imota ekkiya ubbay, xoono de7on de7oosona.

<sup>18</sup> Hiza, issi asi nagara oothida gaason asa ubbaa bolla pirddi yidayssada issi asi xillo oothida gaason, Xoossay ase ubbaa xillisi enttaw de7o immees. <sup>19</sup> Issi asi kiitettonna ixxida gaason, doro asay nagaranchcho gididayssada issi asa kiitetethan daro asay xillana.

<sup>20</sup> Asay nagara wolqqaa erana mela higgey yis, shin nagara wolqqay darida wode Xoossaas aadho keehatethay aadhhdidi daris. <sup>21</sup> Nagari hayqo wolqqan kawotidayssa mela Xoossaas aadho keehatethay xillotethaa wolqqan kawotidi, nu Godaa Yesuus Kiristtoosa baggara nuna merinaa de7uwakko kaalethees.

## 6

### *Nagaras hayqqidi Kiristtoosan de7o*

<sup>1</sup> Yaatin, nuuni woyganee? Xoossaas aadho keehatethay darana mela nagaran minnidi de7ino? <sup>2</sup> Akkay, nuuni nagaras hayqqidabaa gidikko, yaatin, nuuni hizappe waanidi nagaran daane? <sup>3</sup> Nu ubbay Kiristtoos Yesuusara issifanaw xammaqettida wode iya hayquwan iyara issifanaw xammaqettidayssa erekketiye? <sup>4</sup> Nu xammaqettida wode Kiristtoosara hayqqidanne moogettida. Kiristtoosi Xoossaas Aawa bonchcho wolqqan hayqoppe denddidayssa mela nukka ooratha de7on daana.

<sup>5</sup> Nu iya hayquwan iyara issino gidikko, hessadakka, iya dendduwan iyara issino gidana. <sup>6</sup> Nu hizappe nagaras aylle gidonna melanne nu nagaranchcho asatethaa wolqqay dhayana mela nu cima asatethay Kiristtoosara kagettidayssa eroos. <sup>7</sup> Issi asi Kiristtoosan hayqqidabaa gidikko, I nagara wolqqafe la77a keyis. <sup>8</sup> Nuuni Kiristtoosara hayqqiko, iyara de7on daanayssa ammanoos. <sup>9</sup> Kiristtoosi hayqoppe denddidi gisho zaari I hayqqon-nayssanne hayqoy sinthafe iya haaronnayssa nu eroos. <sup>10</sup> I hayqqida wode nagaras issi toho wurssethi gakkanaw hayqqis, shin ha77i de7on Xoossaas de7ees. <sup>11</sup> Hessadakka, hintte nagaras hayqqidi, Godaa Kiristtoos Yesuusa baggara Xoossaas de7on de7eyssa oppite.

<sup>12</sup> Hessa gisho, hinttee, hintte asatethaa amuwaas kiitettonna mela hayqqiya hintte asatethaa nagari haaroppo. <sup>13</sup> Qassi hintte asatethaa nagara oothanaw geellatetha mishe oothidi immofite. Shin hintte hayqoppe denddidi, de7on de7iya asada hintte asatethaa Xoossaas immite. Qassi hintte kumetha asatethaa xillo ooso oothanaw Xoossaas aathi immite. <sup>14</sup> Hintte Xoossaas aadho keehatethaa garssan de7eetappe attin higgefie garssan de7onna gisho nagari hinttena haaranaw bessenna.

### *Xillotetha aylle*

<sup>15</sup> Yaatin, nu woyganee? Higgefie garssan gidonnashin Xoossaas aadho keehatethaa garssan de7iya gisho nagara oothaneeyye? Akkay! <sup>16</sup> Hintte issi asas kiittanaw hinttena aylle oothidi immiya wode he hintte kiitteteyssas aylle gideyssa ereeta. Hessadakka, hintte nagaras kiittitiko, hinttew hayqo ehiya nagaraas aylle gideeta. Woykko hintte Xoossaas kiittitiko xillotetha ehiya Xoossaas aylle gideeta. <sup>17</sup> Kase hintte nagaras aylle, shin ha77i hintte ekkida tuma timirttias kumetha wozanappe kiittida gisho Xoossaas galati gido. <sup>18</sup> Hintte nagara aylletethaa qashoppe bilettildi xillotetha aylle gidideta.

<sup>19</sup> Hinttee hintte qofan daaburanchcho gidiya gisho taani ooddeskka geliya ogen odays. Kase hinttee, hintte asatethaa tunanne iitabaa oothanaw aylle oothidi immidayssa mela ha77i hintte asatethaa geeshshi gidana mela xillotetha aylle oothidi immite.

<sup>20</sup> Hintte nagaras ayllettildi de7iya wode xillotethaa haaretteketa. <sup>21</sup> Hinttena ha77i yeellaya beni hintte iita oosuwappe ay maade demmidetii? He oosota wurssethay hayqo. <sup>22</sup> Shin hintte nagara aylletethaa qashoppe bilettildi, Xoossaas aylle gidideta. Hessi hinttena geeshshi oothidi merinaa de7uwakko kaalethees. <sup>23</sup> Nagara gatey hayqo. Shin Xoossay, nu Godaa Kiristtoos Yesuusa baggara immiya imotay merinaa de7o.

## 7

### *Eko gelo leemiso*

<sup>1</sup> Ta ishato, taani odehy higge eriya asatassa. Higgey issi asi paxa de7iya wode ubban iya haarees. <sup>2</sup> Leemisos, azina gelida maccasiya I azinay paxa de7iya wode higgen iyara qashettasu. Shin I azinay hayqqiko iyara iya caaqqida caaqoy iyo haarenna. <sup>3</sup> Hessa gisho, iya ba azinay paxa de7ishin, hara adde gelikko, iya laammidaaro geettawusu. Shin I azinay hayqqiko, caaqoy iyo haaronna gisho iya hara azina gelikko, iya laammidaaro geettawusu.

<sup>4</sup> Hessa gisho, ta ishato, hintte Kiristtoosa asatethaa baggara higge wolqqas hayqqidi, Xoossaas ayfe ayfanaw hayqoppe denddida Kiristtoosas gidideta. <sup>5</sup> Nu asho amoy nuna

haarin, nu de7iya wode higgey gujji nagara oothana mela nuna denthethes. Nu asatethaa giddon iita amotethi de7iya gisho nuuni hayqo ayfe ayfana mela oothis. <sup>6</sup>Shin ha77i nuuni nuna qachchida higgiyas hayqqida gisho nuuni higge qashoppe bilettida. Hessa gisho, Geeshsha Ayyaana ogen Xoossaas kiitettosippe attin xaafettida cima higgiyas kiitettoko.

### *Higgenne nagara*

<sup>7</sup> Yaatin, nuuni woyganee? Higgey ba huu7en nagaree? Gidenna! Shin higgey nagari aybeekko tana erisis. Higgey, "Amottofa" goonnako, amotethi aybeekko taani erikke. <sup>8</sup>Shin ta ubbabaa amottana mela nagari higge baggara tanan oge demmis. Higgey bayneekko nagari hayqqidayssa.

<sup>9</sup> Kase higgey baynna wode ta paxa, shin higgey imettida wode nagari pixin ta qassi hayqqas. <sup>10</sup>Taani de7on daana mela Xoossay immida higgey taw hayqo ehis. <sup>11</sup>Nagari higge baggara tana cimmiya oge demmidi, wodhdhis.

<sup>12</sup>Hessa gisho, higgey geeshshi; iyan xaafettida kiitayka geeshshi, xillonne lo77o.

<sup>13</sup> Yaatin, lo77o gididabay ta bolla hayqo ehideyye? Gidenna! Shin nagari nagara gideyssi qonccana mela lo77oban maaddettidi taw hayqo ehis. Hessa gisho, nagara nagaratethay higge baggara aadhdhidi eretts.

<sup>14</sup> Nuuni higgey ayyaabaa gideyssa eroos. Shin taani nagaras bayzettida ashо asi.

<sup>15</sup> Taani oothiyabaa akeekkike; taani dosiyabaa oothanayssa aggada ta ixxiyabaa oothays.

<sup>16</sup> Taani ixxiyabaa oothiyabaa gidikko, higgey lo77o gideyssa ma77ays. <sup>17</sup>Hessa gidikko, he oosuwa tanan de7iya nagaray oothaysippe attin ta oothike.

<sup>18</sup> Tanan, hessika ta ashuwan lo77obay baynnayssa erays. Lo77obaa oothiya amotethi tanan de7ees, shin lo77obaa oothanaw dandda7ikke. <sup>19</sup>Taani ixxiya iatabaa oothaysippe attin ta dosiya lo77obaa oothike. <sup>20</sup>Taani ixxiyabaa oothiyabaa gidikko, hessa tanan de7iya nagaray ooteesippe attin oothey tana gidikko.

<sup>21</sup>Hiza, ta lo77obaa oothanaw dosishin, iatabaa oosoy woga gideyssa demmas. <sup>22</sup>Taani ta wozanan Xoossaas higgyan ufayttays. <sup>23</sup>Shin ta asatethaa giddon de7iya ta qofaa higgiyara olettiya dumma higge be7ays. He higgey ta asatethaa giddon oothiya nagara higgiyas tana aylle oothidi immis. <sup>24</sup>Taani waanida yibbata asee? Hayqos efiya ha asatethaafe tana ashshanay oonee? <sup>25</sup>Nu Godaa Yesuus Kiristtoosa baggara tana ashshiya Xoossaas galati gido.

Hiza, taani ta qofan Xoossaas higgiyas haarettays; shin ta asatethan tana nagara oosisiya higgiyas haarettays.

## 8

### *Geeshsha Ayyaanen de7o*

<sup>1</sup>Hessa gisho, Kiristtoos Yesusan de7eyssati ha77i pirdettokona. <sup>2</sup>Kiristtoos Yesuusa baggara nuus de7o immi Geeshsha Ayyaana higgey, tana nagaranne hayqo higge aylletethaafe kessis. <sup>3</sup>Nu nagara asatethaa gaason, higgey daaburanchcho gidiya gisho nuna ashshanaw dandda7ibeenna. Xoossay ba na7aa nagaranchcho asa leemison nagaras yarshsho gidana mela kiittidi hessa oothis. Yaatidi, Xoossay Kiristtoosa ashuwa baggara nagara, nagaranchcho asa giddon pirddis. <sup>4</sup>Xoossay hessa oothiday, nu ashо amoy koyeyssada gidonnashin Geeshsha Ayyaanay koyeyssada de7iya nu bolla higgiya xillo kiitay polettana melassa.

<sup>5</sup>Bantta ashо amuwaa kaallidi de7eyssati banttana ufayssiyabaa qoppoosona. Shin Geeshsha Ayyaana shenen de7eyssati Geeshsha Ayyaana ufayssiyabaa qoppoosona. <sup>6</sup>Nu qofay ashо amos haarettiyo hayqo ehees, shin ayyaana amos haarettiyo de7onne sarotethi ehees. <sup>7</sup>Ashо amos haarettiya asi Xoossaas higgiyas kiittantanaw koyonna gishonne kiittantanaw dandda7onna gisho Xoossaara morkke. <sup>8</sup>Bantta ashо amuwaaas haaretteyssati Xoossaas ufayssanaw dandda7okkona.

<sup>9</sup>Shin Xoossaas Ayyaanay hinttenan de7ikkonne hinttena haarikko, hintte Ayyaana shenen de7eetappe attin hintte ashо amuwaaas haaretteketa. Kiristtoosa Ayyaanay baynna oonikka Kiristtoosabaa gidenna. <sup>10</sup>Shin Kiristtoosi hinttenan de7ikko, hintte asatethay nagara gaason hayqqidayssa. Shin hintte ayyaanay xillotethaa gaason de7on de7ees. <sup>11</sup>Shin Yesuusa hayqoppe denthida Xoossaas Ayyaanay hinttenan de7ikko, Kiristtoosa hayqoppe denthida Xoossay, hinttenan de7iya ba Geeshsha Ayyaanay hayqqiya hintte asatethaa de7o immana.

<sup>12</sup>Hiza, ta ishato, nuuni nu ashо amuwaa kaallidi daanaw bessenna. <sup>13</sup>Hinttee, hintte ashо amuwaaas de7ikko hayqqana, shin Geeshsha Ayyaana wolqqan nagara oosuwa wodhikko hintte de7on daana. <sup>14</sup>Xoossaas Ayyaanay kaalethiya ubbay Xoossaas nayta.

<sup>15</sup> Nuuni, "Abbaa, ta Aawaw" yaagidi xeegiya, Xoossaan nayta oothiya Geeshsha Ayyaanekkidaappe attin zaaridi yashshan daanaw aylle oothiya ayyaanekkibookko. <sup>16</sup> Xoossaan Ayyaanay nu ayyaanara gididi nuuni Xoossaan nayta gideyssa markkattees. <sup>17</sup> Nuuni iya nayta gidikko Xoossaan anjuwaa laattana; Kiristtoosara wolla he anjuwaa laattana. Qassi nuuni Kiristtoosara metuwa ekiko iyara wolla iya bonchchuwan shaakettana.

### *Yaana bonchchuwa*

<sup>18</sup> Nuuni ha77i waayettiya waaya, sinthafe nuus qonccana bonchchuwaraga gathi be7ikkoginisanaw dandda7ettenna gada qoppays. <sup>19</sup> Medhetetha ubbay Xoossaan nayta qonccethaa daro laamotidi naagoosona. <sup>20</sup> Medhetetha ubbay hada gidis; hessika, medhetethaa dooron gidonnashin ufayssan naagana mela oothida Xoossaan shenen hanis. <sup>21</sup> Medhetethay ba huu7en dhayo aylletethaafewozettidi, Xoossaan naytara wolla bonchcho la77aa shaakettana. <sup>22</sup> Medhetethay issife hanno gakkanaw miixoy oyklida maccasada ooleninne un77an de7eyssa nu eroos. <sup>23</sup> Qassi hessa medhetethaa xalaala gidonnashin Geeshsha Ayyaanaa bayra imotada ekkida nuuni, nu huu7en nu asatethaa wozo gidida Xoossaan nayta gidana ufayssaa naagishe nu asatethaa ollos. <sup>24</sup> Ha ufayssan nuuni attida. Shin nuuni ufayssi oothiyabey benttiya gidikko hessa ooni ufayssi oothi? <sup>25</sup> Shin nu be7onnabaa demmanna gidi ufayssan naagikko hessa dandda7an naagoos.

<sup>26</sup> Hessada Geeshsha Ayyaanay nu daaburan maaddees. Nuuni Xoossaan waati woosanaw bessiyako erokko, shin Geeshsha Ayyaanay ba huu7en, asi odanaw dandda7ettona qaalan nuus gaannatees. <sup>27</sup> Qassi asa wozana eriya Xoossay Geeshsha Ayyana qofay aybeekko erees. Geeshsha Ayyaanay Xoossaan sheniyyada geeshshatas gaannatees.

<sup>28</sup> Xoossaan siiqeyssatasin iya sheniyyada xeegettidayssata Xoossay ubbaa lo77oso ootheyssa eroos. <sup>29</sup> Xoossay koyrottidi eridayssati ba Na7aa daanana melanne na7aykka ammaneyssata giddon bayra gidana mela entta dummayidi wothis. <sup>30</sup> Xoossay koyrottidi dummayidayssata xeegis; he xeegidayssata xillisis; he xillisisdayssata qassi bonchchis.

### *Xoossaan siiquwa*

<sup>31</sup> Yaatin, nu ha ubbaas woyganee? Xoossay nu bagga gidikko nuura oone eqettanay? <sup>32</sup> I hari attoshin, ba na7aas qadhettonashin, nu gisho aathi immis. Yaatin, ba na7aa nuus aathi immidayssi waanidi ubbabaa coo immenne?

<sup>33</sup> Xoossay enttana xillisia gisho I dooridayssata oone mootanay? <sup>34</sup> Yaatin, entta bolla pirddanaw dandda7ey oonee? Oonikka baawa. Hayqoppe denddidi Xoossaan ushachchan uttida, Kiristtoos Yesuusi, I nuus gaannatees.

<sup>35</sup> Hiza, nuna Kiristtoosa siiquwappe shaakkanay oonee? Waayeyye woykko metoyye woykko goodeyye woykko kosheyye woykko kallotetheyye woykko yashsheyye woykko oleyye? <sup>36</sup> Geeshsha Maxaafan,

"Nuuni ne gisho gallasa kumethaa hayqqoos;  
shukkas efifya dorssada taybettida"

geetetidi xaaftidayssa mela gidis.

<sup>37</sup> Shin nuuni, nuna siiqida Kiristtoosan ha ubbaa polo xoonos.

<sup>38</sup> Hessa gisho, haygo gidin de7o gidiin kiitanchchota gidin haareyssata gidin ha77ide7eyssa gidin sinthafe yaanayssa gidin wolqqaamata gidin, <sup>39</sup> salo wolqqaan gidin sa7awolqqaan gidin ay medhetethi gidin nu Godaa, Kiristtoos Yesuusan de7iya Xoossaan siiquwappe nuna shaakkanaw dandda7onnayssa taani eras.

### 9

#### *Isra7eeleta dooretethaa*

<sup>1</sup> Taani Kiristtoosan tuma odays, worddotikke. Geeshsha Ayyaanay kaaletiha ta kahay taani worddotonayssataw markkattees. <sup>2</sup> Ta wozanan Isra7eeletas daro qadhettaysin gamma gallas qoppays. <sup>3</sup> Taani, ta ishata gisho Kiristtoosappe shaakettada Xoossaan qanggetehafe garssan de7idaakkodosayishin. <sup>4</sup> Entti Isra7eeleta, Xoossay entta ba nayta oothis, ba bonchchuwa enttaw qonccisis. Enttara caaqqis; higgiya enttaw immis. Entti Xoossaan goynnana tuma ogiya bessis; Xoossay ufayssaa qaala enttaw immis. <sup>5</sup> Entti yeletethan mayzata zare; qassi Kiristtoosi ashon entta zare gididi yis. Ubbaafe bolla gidida Xoossay merinaw galatetto. Amin77i!

<sup>6</sup> Gidoshin, Xoossay gelida qaalay polettonna attis guussu gidenna. Isra7eele asa ubbay Xoossaan asi gidokkona. <sup>7</sup> Qassi Abrahame zare ubbay Abrahame nayta gidokkona. Xoossay Abrahames, "Ne zerethay Yisaqa baggara xeegettana" yaagis. <sup>8</sup> Hessa guussay ashon yelettida nayti ubbay Xoossaan nayta gidokkona. Shin tuma Isra7eele nayti Xoossay

Abrahames gelida qaalada yelettida nayta. <sup>9</sup> Xoossay immana gidi gelida qaalay, "Taani wontto laythi hanoode yaana; Saarakka adde na7a yelana" yaageyssa.

<sup>10</sup> Hessa xalaala gidonnashin Irbbiqinne Yisaaci yelida mentte adde naytabaa akekite. <sup>11</sup> Entti yelettanaappe woykko iita woykko lo77o oothanaappe sinthe Xoossaa dooroy ooson gidonnashin xeessan gideyssa qonccisanaw, <sup>12</sup> "Bayray kaaluwas kiiettana" yaagidi Goday Irbbigas odis. <sup>13</sup> Hessika Geeshsha Maxaafan, "Yayqooba dosas, Eesawe ixxas" geetettidi xaafettis.

<sup>14</sup> Yaatin, nuuni woyganee? Xoossay ase asappe shaakkiyye? Gidenna. <sup>15</sup> Goday Musekko,

"Ta maaranaw koyidayssata maarana;

ta qadhettanaw koyidayssatas qadhettana" yaagis. <sup>16</sup> Hiza, Xoossaa dooroy asa shenen woykko ooson gidonnashin iya maarotethaana.

<sup>17</sup> Geeshsha Maxaafan, Gibxxe kawuwakko, "Taani, ta wolqaa nenan bessanawunne ta sunthay alame ubban erettana mela hessas nena kawothas" geetettidi xaafettis.

<sup>18</sup> Hiza, Xoossay maaranaw koyeyssa maarees; wozanaa muumisanaw koyeyssa wozanaa muumisees.

### Xoossaa hanquwanne maarotethaa

<sup>19</sup> Hinttefe issoy, "Yaatin, Xoossay ase iita ooso gisho ays borii? Xoossaa sheniya ixxas gaanay oonee?" yaagidi oychchanaw dandda7ees.

<sup>20</sup> Shin ta ishaw, Xoossaara palamanaw neeni oonee? Urqqafe medhettida miishey bana medhdhidayssa, "Tana hayssada oothada ays medhdhadii?" gidi oychchanaw dandda7ii?

<sup>21</sup> Woykko urqqafe medhdheyssi issi urqqafe issuuwa bonchcho miishe, hankkuwa qassi tooshe miishe oothidi medhdhanaw maati baawe?

<sup>22</sup> Xoossay ba hanquwa bessanawunne ba wolqaa erisanaw koyidi, pirddas giigida hanqo nayta daro gencan dandda7idaakkko ne ay eray? <sup>23</sup> Hessa I oothiday koyrottidi bonchchoos giigisida, ba doorida naytas ba bonchchuwa qonccisanassa. <sup>24</sup> Ayhude gidin, woykko Ayhude gidonna asa ubbay Xoossan doorettida.

<sup>25</sup> Nabiya Hose7e maxaafan,

"Ta ase gidonnyassata, 'Ta ase' gada xeegana.

Ta siiqaboonna deriya, 'Siiqetidayssata' gada xeegana.

<sup>26</sup> Entti, 'Ta ase gidekketa' geetetti xeegettida bessan,

'De7o Xoossaa nayta' geetettidi xeegettana" yaagees.

<sup>27</sup> Nabiya Isayaasi Isra7eele asaabaa,

"Isra7eele asay abbaa gaxan de7iya shafiyada darikkoka,  
enttafe guutha asa xalaali attana.

<sup>28</sup> Goday alamiya ubbaa bolla ellesidi polo pirdaa pirddana." <sup>29</sup> Qassika Isayaasi,

"Ubbaafe Wolqamaa Goday nius guutha zerethi ashshonnabaa gidiyakko,  
nuuni Soodomenne Gamoora katamaada dhayanashin"

yaagidi koyrottidi odis.

<sup>30</sup> Yaatin, nu woyganee? Xillotethaa koyiboonna Ayhude gidonna asay ammanon xillotethi demmidosona. <sup>31</sup> Shin xillotethako gathiya higgey de7iya Isra7eele asay xillotethi demmibookkona. <sup>32</sup> Ays demmibookkonaa? Entti xillotethaa ammanon gidonnashin ooson ekkanaw koyida gishossa. Yaaniya gisho, entti, "Dhubbiya shuchchan" dhubettidosona. <sup>33</sup> Geeshsha Maxaafan,

"Taani Xiyoonen dhubbi kunddisiya shuchchaa wothana.

Iyan ammanniyyaa oonikka yeellatenna"

geetettidi xaafettis.

## 10

<sup>1</sup> Ta ishato, ta kumetha wozanan ta amotteynne Xoossaa woossey Isra7eeley attana melassa. <sup>2</sup> Entti Xoossaas mishettosonashin, tuma eratethan mishetttonnayssa ta markkattays. <sup>3</sup> Entti Xoossaa xillotethaa ogiya eronna ixxidi, bantta huu7e xillotethaa kaallidosonappe attin Xoossaa xillotethaa koyibookkona. <sup>4</sup> Asi ubbay ammanon xillana mela Kiristtoosi higgiya polis.

### Atotethay ubbaassa

<sup>5</sup> Asi higge naagidi ekkiya xillotethabaa Musey xaafishe, "Higge naagiya oonikka he higgiya naagida mela de7ees" yaagis. <sup>6</sup> Shin ammanon ekkiya xillotethabaa geetettiday

hayssa: "Ne wozanan, 'Ooni salo keyanee?' yaagoppa; hessi Kiristtoosa wodhisanaassa. <sup>7</sup> Woykko, 'Duge sa7a garssi wodhdhanay oonee?' gooppa; hessi Kiristtoosa duufoppe kessanaassa. <sup>8</sup> Shin yaagidi xaafettis: 'Xoossa qaalay ne matana; ne doonaninne ne wozanan de7ees' Nuuni hinttew odiya ammano qaalay hayssa.

<sup>9</sup> "Yeuusi Goda" gada ne doonan markkatikonne Xoossay iya hayqoppe denthidayssa ne wozanan ammanikko, ne attana. <sup>10</sup> Asi ba wozanan ammanidi xillees; ba doonan markkattidi attees. <sup>11</sup> Geeshsha Maxaafay, "Iyan ammanniya oonikka yeellatenna" yaagees. <sup>12</sup> Issi Xoossay ubbaa Goda gidiya gisho Ayhudea giddoninne Ayhude gidonna asaa giddon dummatethi baawa. I bana xeegiya ubbaas daro keeha. <sup>13</sup> Geeshsha Maxaafay, "Godaa sunthaa xeegiya oonikka attana" yaagees.

<sup>14</sup> Yaatin, entti ammanonna de7ishe waanidi iya xeeganaw dandda7onna? Entti iyabaa si7onna de7ishe waattidi iya ammananaw dandda7ona? Qassi enttaw qaala odiya asi baynna de7ishin, waanidi si7anaw dandda7ona? <sup>15</sup> Kiiettida asi baynna de7ishin, qaalay waanidi odettanaw dandda7ii? Geeshsha Maxaafan, "Ufayssa Wonggelaa odiya asaa tohoti waanidi lo77ona!" yaagidi xaafettis.

<sup>16</sup> Shin Isayaasi, "Godaw, nu markkateethaa ooni ammanidee?" yaagidayssada, ubbay Wonggelaa ammanibookkona. <sup>17</sup> Hessa gisho, ammanoy sissafe yees; sissi Kiristtoosa qaalappe yees.

<sup>18</sup> Gidoshin, Isra7eele asay qaala si7ibookkona guusseyye? Akkay si7idosona. Geeshsha Maxaafan,

"Entta qaalay biitta ubban si7ettis,

entta oday sa7aa gaxa gakkis" yaagettis. <sup>19</sup> Shin Isra7eele asay eribookkona guusseyye? Musey kase,

"Taani hinttena legettida asan qiroysana;

qassi eeya asan hinttena yiloyana" yaagis.

<sup>20</sup> Qassi Isayaasi,

"Tana koyiboonna asaas benttas;

tana oychhiboonna asaas qonccas"

yaagidi yayyonna odis.

<sup>21</sup> Shin Isayaasi Isra7eeletabaa odishe,

"Ubba wode kiiettonna asaasinne

tana ixxiya asaas ta kushiya miccas" yaagees.

## 11

### Xoossay Isra7eeleta aggibeenna

<sup>1</sup> Ane ta oychchays: yaatin, Xoossay ba asaa aggideyye? Aggibeenna! Taani ta huu7en Isra7eele; Abrahame sheeshi; Biniyame zare. <sup>2</sup> Xoossay koyro doorida ba asata yeggenna. Geeshsha Maxaafan, Eliyaasi Isra7eeleta Xoossa sinthan waati mootdaakko, hintte erekketii? <sup>3</sup> Eliyaasi, "Godaw, entti ne nabeta wodhidosona, ne yarshho bessaaka laallidosona. Ta tarkka attas; entti tanakka wodhanaw koyoosona" yaagis.

<sup>4</sup> Xoossay iyaw woygi zaaridee? "Ba7aale eeqas goynniboonna laappun mukulu asaa taw ashshas" yaagis.

<sup>5</sup> Hessadakka, ha wodiyen Xoossay ba aadho keehatethan doorida guutha Isra7eeleti de7osona. <sup>6</sup> I entta dooriday ba aadho keehatethaanappe attin entta ooson gidenna. Dooroy ooson gidikko, iya aadho keehatethay tuma aadho keehatethi gidenna.

<sup>7</sup> Yaatin, waanidee? Isra7eeleti bantta koyabaa demmibookkona, shin Xoossay doorida guuthati demmidosona. Attidayssati bantta wozanaa muumisidosona. <sup>8</sup> Hessika, Geeshsha Maxaafan,

"Entti bantta ayfiyaan be7onnaada

bantta haythan si7onnaada,

hanno gakanaw enttaw

Xoossay azalla ayyaana immis"

geetettidi xaafettidayssada hanis. <sup>9</sup> Qassi Dawitey,

"Entti miya gaytay entta xiheda oykko;

entta gufanhiya aafio gido;

entta iitatethay entta bolla gakkoo.

<sup>10</sup> Entti xeellonnaada entta ayfey goozer;

ubba wode meton entti kuunidi de7o" yaagis.

<sup>11</sup> Yaatin, Ayhudeti zaari dendonna mela kunddidonayye? Gidenna! Entta kunddethay Ayhude gidonna asay attana mela gaaso gidis. Hessika Ayhudeti entta bolla qanaatanaada oothis. <sup>12</sup> Ayhudeta nagaray alamiyas daro anjjo ehis; qassi entta kunddethay Ayhude gidonna asaas daro anjjo gidis. Yaatin, doorettida Ayhudeti kumethi attiyaa wode anjoyay mela daranddeshsha!

<sup>13</sup> Taani, ha<sup>77</sup>i hinttew Ayhude gidonna asaas odays. Ayhude gidonna asaas hawaaregidada ootheysyan taani daro ceeqettays. <sup>14</sup> Ta hessa oothiday taw ashon zare gidida Isra<sup>7</sup>eleta qiroyada enttafe guuthata ashshanaassa. <sup>15</sup> Xoossay entta yeggida wode ha alamey Xoossaara sigetis. Xoossay entta shishi ekkiya wode hayqqida asi hayqqoppe denddia mela gidees.

<sup>16</sup> Koyro menthida baso uythay Xoossaas yarshshettidi geeshshi gidikko, muumeuythayka geeshshi. Mithaas xaphoy geeshshi gidikko, tasheykka geeshshi. <sup>17</sup> Gaden tokkida shamaho tashe gidida Ayhudeti karettin, hintte bazzon dolida shamaho tashe gidida Ayhude gidonnayssati entta bessan dhanthettidi entta anjuwaanne duretethaa shaakettideta. <sup>18</sup> Hiza, hintte tasheda karetti wodhdhida Ayhudeta bolla otorttofite. Hintte otorttiyabaa gidikko, xaphoy hinttena tookkesippe attin hintte xaphuwa tookkonayssa akeekite.

<sup>19</sup> Neeni, “He tasheti karettiday, ta entta bessan dhanthettana melassa” gaanaw dandda<sup>7</sup>aasa. <sup>20</sup> Hessi tuma. Entti ammaniboonna gisho karettidosona. Neeni amanida gisho he bessan eqqadasa. Neeni yayyanaw besseeseppe attin otoranaw bessenna.

<sup>21</sup> Xoossay medhon tashe gidida Ayhudetas qadhettonna ixxiko hinttewuka qadhettena.

<sup>22</sup> Hiza, Xoossay ay mela keehekonne ay mela yashshiyako be<sup>7</sup>a. I yashshey kiiitet-tonayssata, qassi I keehey iya ammanidi minnidi eqqidayssatassa. Minnidi eqqonnan ixxiko hintteka karettana. <sup>23</sup> Ayhudeti ammanikko, kase entti de<sup>7</sup>iya bessaa simmana. Xoossay entta zaaridi, wothanaw dandda<sup>7</sup>ees. <sup>24</sup> Hinttena bazzon de<sup>7</sup>iya shamaho gidida Ayhude gidonnayssata qanxidi, gaden tookettida shamahuwa bolla hinttena tokkiko, medhon gade shamaho gidida Ayhudeta bannta koyro bessan zaari tokkanaw waanidi dandda<sup>7</sup>ettennee?

### *Xoossaa maaratethay ubbaassa*

<sup>25</sup> Ta ishato, hintte hinttena eranchcho gidi ceeqettofite. Ta hinttew odiya issi xuuri de<sup>7</sup>ees. Hessika Isra<sup>7</sup>eletappe baggay si<sup>7</sup>onna ixxiday wursethi gakkaw gidon-nashin attanaw de<sup>7</sup>iya Ayhude gidonna asay kumethi Xoossako yaana gakkanaassa. <sup>26</sup> Hessadakka, Isra<sup>7</sup>eela asa ubbay attana. Geeshsha Maxaafan,

“Nuna ashshayssi Xiyooneppa yaana;

Yayqooba zerethaafe iita ubbaa diggana.

<sup>27</sup> Taani entta nagara atto giya wode  
enttra caaqqana caaqoy hayssa”

geetettidi xaafetti.

<sup>28</sup> Ayhudeti Wonggelaa ekkonna ixxidi, hintte gisho Xoossaara morkke gididosona. Gidoshin, ha<sup>77</sup>ika entti doorettidayssata, Xoossay entta aawata gisho entta dosees.

<sup>29</sup> Xoossay ba imuwaninne ba xeessan qirottena. <sup>30</sup> Hintte Ayhude gidonnayssati kase Xoossaas kiiettibeekketa. Shin ha<sup>77</sup>i Ayhudeti kiietttonna ixxin, hintte Xoossaa maaratethaa ekkideta. <sup>31</sup> Hessadakka, hintte ekkida maaratethaa Ayhudeti ekkana mela ha<sup>77</sup>i Xoossaas kiietttonna ixxidosona. <sup>32</sup> Xoossay asa ubbaa ba maaratethaa bessanaw koyidi, asi ubbay kiietttonna ixxana mela oothis.

<sup>33</sup> Xoossaas duretethaa, cincatethaanne eratethaa akeekidi odanay oonee? Iya pirdday pilgettene, iya ogey erettenna. <sup>34</sup> Geeshsha Maxaafan,

“Godaa qofaa erey oonee?

Iya zoranaw dandda<sup>7</sup>ey oonee?

<sup>35</sup> Xoossaas tal<sup>77</sup>eynne

tal<sup>77</sup>iya zaaridi ekkey oonee?”

yaagees.

<sup>36</sup> Ubbaa I medhdhis; ubbay iyan de<sup>7</sup>ees; ubbay iya bonchchossa. Xoossaas merinaw bonchchoy gido. Amin<sup>77</sup>i.

## 12

### *Kiristtooosan ooratha de<sup>7</sup>o*

<sup>1</sup>Hiza, ta ishato, hinttee, hintte asatethaa Xoossaas ufayssiya, de<sup>7</sup>onne geeshsha yarshshooothidi, immana mela taani hinttena Xoossaas maaratethan woossays. Xoossaas hintte

goynnanaw bessiya tuma ogey hessa.<sup>2</sup> Lo77o, ufaysseyssanne polo gidida Xoossaa sheniya hintte shaakki eranaw hintte qofan laamettiteppe attin ha alamiya daanopite.

<sup>3</sup> Xoossay hintte issuwashissuwashimmida ammanuwa mela wozanaama asada qoppite. Qoppanaw besseyssafe aathidi hinttena dummayidi, otoron qoppofite gada taw imettida aadho keehatethan hinttew odays.<sup>4</sup> Nu issi asatethaa giddon dumma dumma kifileti de7oosona; he dumma dumma kifiletas dumma dumma oosoy de7ees.<sup>5</sup> Hessada, nuuni daro asi gidikkoka Kiristtoosan issi asatethi gidida. Nuuni issi asatethi gididi dumma dumma kifileti issoy issuwara oykettida.<sup>6</sup> Nuus imettida aadho keehatethan dumma dumma imotati de7oosona. Nu imoy tinbbit odo gidikko, nuus de7iya ammanuwa mela odanaw bessees.<sup>7</sup> Nu imoy harata maade gidikko, he ooswan minnanaw bessees; tamaarssso gidikko, he tamaarsswan minnanaw bessees.<sup>8</sup> Nu imoy harata minthetho gidikko, minnidi minthethanaw bessees. Nu imoy nuus de7iyabaappe haratas imo gidikko, wozanappe immanaw bessees. Nu imoy aysyo gidikko, minnidi aysanaw bessees. Nu imoy haratas keeho gidikko, ufayssan keehanaw bessees.

<sup>9</sup> Hintte siiqoy goodheppen common gidanaw bessenna. Iitabaa ixxite; lo77obaa minthidi oykkite.<sup>10</sup> Issoy issuwara ishada siiqetite; issoy issuwa bonchchite.<sup>11</sup> Azallofite; hintte ayyaanan minnidi Godaas oothite.<sup>12</sup> Xoossay immida ufayssan ufayttite; metuwa dandda7ite; ubba wode Xoossaa woossite.<sup>13</sup> Ammaniya geeshshata koshshiyaban maad-dite; imathata mokkite.

<sup>14</sup> Hinttena goodeyssata anjjite; anjjiteppe attin baaddofite.<sup>15</sup> Ufaytessatara ufayttite; yeekkeyssatara yeekkite.<sup>16</sup> Issoy issuwara issi qofan de7ite. Otoro qofaa aggidi, hinttena kawushshidi, kawushsha ooso oothite. Hintte hinttena cincca gidi qoppofite.

<sup>17</sup> Onikka hinttew iitabaa oothiko, he uraas iita zaaroppite. Asa ubbaa sinthan nashisiya lo77o ooso oothite.<sup>18</sup> Asa ubbaara saron daanaw hinttew dandda7ettiya ubbaa oothite.<sup>19</sup> Ta ishato, hinttee, hintte huu7en asas halo keyoppite. Xoossay halo keyana mela iyaw aggaagite. Geeshsha Maxaafan,

“Taani halo keyana;

taani kushe zaarana”

yaagees Goday, geetettidi xaafettis.

<sup>20</sup> Shin Geeshsha Maxaafan,

“Ne morkkey koshattiko muza;

I saamotiko ushsha.

Neeni hessa oothiko iya huu7en

yeella tama bonqqa qolaasa”

geetettidi xaafettis.

<sup>21</sup> Iitaa lo77on xoonappe attin iitaan xoonettofa.

## 13

### *Deriya ayseyssatas kiitetethi*

<sup>1</sup> Xoossaa shene gidonnashin maati imettonna gishonne ha77i de7iya shuumatikka Xoossaa shenen shuumettida gisho asi ubbay deriya ayseyssatas kiitetanaw bessees.

<sup>2</sup> Hessa gisho, maatara de7eyssatas kiitettonna ixxiya oonikka Xoossaa kiitaa ixxees. Kiitettonna ixxiya oonikka ba bolla pirddaa ehees.<sup>3</sup> Ayseyssati iita ootheysatappet attin lo77o ootheysata yashshokona. Ayseyssatas yayyonna agganaw koyay? Yaakklo77o ootha; entti nena galatana.<sup>4</sup> Entti new lo77obaa oothanaw shuumettida Xoossaa aylle. Shin neeni iitabaa oothiko, entti iitabaa oothidayssa seeriya gisho iyaw yayya. Entti iita ootheysata seeridi, Xoossaa hanquwa qonccisiya Xoossaa aylle.<sup>5</sup> Hessa gisho, Xoossaa hanquwa xalaalas gidonnashin hintte kahay markkattiya gisho deriya ayseyssatas kiitetanaw bessees.

<sup>6</sup> Hintte giira giireykka hessassa. Deriya ayseyssati he oosuwa oothey, entti Xoossaa aylleta gidida gishossa.<sup>7</sup> Issuwashissuwashimmida besseyssas immit. Giira giiranaw besseyssas giirite; qaraxa qanxanaw besseyssas qaraxa qanxite; yayyanaw besseyssas yayyite; bonchchoy besseyssas bonchchite.

### *Siiqetite*

<sup>8</sup> Issoy issuwara siiqetite. Siiqo acoppe attin hintte bolla hara acoy dooppo. Ase siiqiya oonikka higgey geyssa polis.<sup>9</sup> “Laammofa; wodhoppa; kaysotoppa; amottofa” giya kiitaynne hara kiita ubbay, “Ase ne huu7eda dosa” giya kiitan qashettis.<sup>10</sup> Ase siiqiya oonikka iya bolla iitabaa oothenna. Hessa gisho, ase siiqeyssi higge kiitaa polis.

<sup>11</sup> DhisKKofe hintte barkkiya wodey ha77i gideyssa akeekidi hessa oothite. Nu attana wodey koyro nu ammanida wodiyappe ha77i nuukko matis. <sup>12</sup> Dhuma wodey aadhdhanaw hanees; wonttay matis. Hiza, nuuni dhuma ooso aggidi poo7o ola miishe oykkos. <sup>13</sup> Ane gallas poo7on de7iya asada maaran de7oos. Mathoninne laymatethara gahettiya dumma dumma tuna oosotan,\* palamaninne qanaaten gidoppo. <sup>14</sup> Godaa Yesuu Kiristtoosa kandduwa ma77ite; hintte nagaranchcho asatethay ba amuwaa polana mela iyaw qoppofite.

## 14

### *Asa bolla pirddofite*

<sup>1</sup> Ammanon daaburida oonakka shiishi ekkiteppe attin iya qofaa bolla pirddofite. <sup>2</sup> Leemisos, ammanon minnida issi asi ay kathika maanaw dandda7ees. Shin ammanon daaburiya asi atakiltte xalaala mees. <sup>3</sup> Ubbabaa miya asi moonna uraa kadhoppo. Ubbabaa moonna asi miya uraa bolla pirddofo. Xoossay ubbaa miya uraa shiishi ekkis. <sup>4</sup>Hara asa aylle bolla pirddey neeni oonee? Idaaburin woykko minnin ba Godaassa. Goday iya essanaw dandda7iya gisho I minnidi eqqana.

<sup>5</sup> Qassi “Issi gallasay hara gallasappe aadhdhees” yaagidi qoppiya asi de7ees. Haray qassi, “Gallasati ubbay issi mela” gidi qoppees. Shin issoy issoy ba qofaa akeekidi qachcho. <sup>6</sup> Issi gallasaa hara gallasatappae aathidi bonchchiya oonikka Godaa bonchchos gidi oothees. Ubba kathi miya asi Godaa bonchchos gidi mees. I miya he kathaa gisho Xoossa galatees. Ubba kathi moonna asi Godaa bonchchos moonna aggees; qassi moonna agon Xoossa galatees. <sup>7</sup> Nuuppe oonikka baw deenna; qassi nu giddofe oonikka baw hayqqenna. <sup>8</sup> Nu de7on de7ikko Godaas de7oos; qassi hayqqikokka Godaas hayqqoos. Hiza, nu de7on de7in woykko hayqqin Godaassa.

<sup>9</sup> Kiristtoosi hayqqidi hayqoppe denddiday, de7on de7eyssatasinne hayqqidayssatas Goda gidanaassa. <sup>10</sup> Yaatin, neeni ne ishaa bolla ays pirdday? Woykko neeni ne ishaa ays kadhay? Nuuni ubbay Xoossa pirdda araata sinthan eqqana.

<sup>11</sup> Geeshsha Maxaafan Goday,

“Taani de7on de7ays;

asa ubbay ta sinthan gulbbatana;  
taani Xoosse gideyssa markkattana”

yaagees. <sup>12</sup> Hiza, nu oothidabaas nu huu7en huu7en Xoossa sinthan shiiqidi zaaro immana.

### *Hara asi dhubethofa*

<sup>13</sup> Hessa gisho, nuuni issoy issuwa bolla pirddeyssa aggoos. Shin hintte ishaa dhubsidi woykko qaxxidi nagaran gelssiyaba oothonnda naagetite. <sup>14</sup> Godaa Yesuusa ammaniyaa asada, ba huu7en tuna gidiida kathi baynnayssa taani geeshshada erays. Shin issi asi issibaa tuna gidi qoppiko hessi iyaw tuna gidees. <sup>15</sup> Ne miya katha gisho ne ishaa dhubbibiabaa gidikko, Kiristtoosan de7iya ne ishaa siiqakka. Kiristtoosi iya gisho hayqqida uraa ne miya kathan iya ayyaana de7uwa dhayssofa. <sup>16</sup> Hiza, hinttew de7iya la77atethaa harati borana mela oothofite. <sup>17</sup> Xoossa kawotethay Geeshsha Ayyaan benttiya xillotethi, sarotethinne tuma ufayssife attin muussabaanne ushshabaa gidenna. <sup>18</sup> Hessada Kiristtoosas oothiya asi Xoossa ufaysses; asankka anijettees.

<sup>19</sup> Hessa gisho, aye nuuni sarotethi benttiya ogiyanne issuwa issuwa ammanon minthiya ogiya koyos. <sup>20</sup> Katha gisho gada Xoossa oosuwa dhayssofa. Ubba kathi meetetees, shin hara asi nagaran dhubsiba kathi muussi iita. <sup>21</sup> Ne ishay dhubettonna mela asho moonna woykko ushshu uyonna woykko ne ishaa dhubbibiya harabaa oothonna agoy lo77o.

<sup>22</sup> Hiza, ha ne ammanuwa ne giddoninne ne Xoossa giddon naaga. Likke gidi qoppidabaa oothiya wode iya kahay moottona uray anijettidayssa. <sup>23</sup> Shin sidhishe miya uras iya muussay ammanon gidonna gisho pirddetees. Ammanoy baynna oosettida ooso ubbay nagara.

## 15

### *Harata ufayssanaw bessees*

\* **13:13** laymatethara gahettiya dumma dumma tuna oosotan: woykko yethan, mathon, laymaton, qayxen gidoppo gidi billanaw dandda7ettees. Laymatethara gahettiya dumma dumma tuna oosoti asi Xoossa haarpope kare keyidi do7a kanddo ekkidi poliya ooso guussu. **14:1** Qola 2:16    **14:10** 2Qoro 5:10    **14:11** Isa 45:23

<sup>1</sup> Nuuni ammanon minnidayssati daaburanchchota toohuwa tookkanaw bessees. Nuuni nuna ufayssanaw besenna. <sup>2</sup> Nuuni nu ishaa ammanon minthanaw iya maad-danawunne ufayssanaw bessees. <sup>3</sup> Kiristtoosi bana ufayssibeenna. Shin Geeshsha Maxaafan, "Asay nena cayida cashshay tana gakkis" geetetti xaafettidayssada hanis. <sup>4</sup> Geeshsha Maxaafay immiya genccaaninne minthethuwani nu ufayssaa ekkana mela Geeshsha Maxaafan xaafettida ubbay nuna tamaarssanaw xaafettis.

<sup>5</sup> Genccaanne minutethi immiya Goday hintte Kiristtoos Yesuusa kaalliyaa wode isifetethi hinttew immo. <sup>6</sup> Hessika, nu Godaa Yesuus Kiristtoosa Aawa, Xoossaa, issi wozaananinne issi qaalan hintte bonchchhana melassa.

### *Wonggelay asa ubbaassa*

<sup>7</sup> Kiristtoosi hinttena ekkidayssada Xoossaa bonchchos issoy issuwa ekkite. <sup>8</sup> Xoossay beni aawatas immida ufayssay polettana melanne iya tumatehay erettana mela Kiristtoosi Ayhudeta aylle gididi yidayssa ta hinttew odays. <sup>9</sup> Kiristtoosi Ayhudeta aylle gidida hara gaasoy qassi Ayhude gidonna asati Xoossaa iya maarotethaa gisho galatana melassa. Geeshsha Maxaafan,

"Ta nena Ayhude gidonna asaa giddon galatana;  
ne sunthaa sabbana"

geetettidi xaafettidayssada hanis.

<sup>10</sup> Qassi,

"Ayhude gidonna asaw,  
Xoossaa deriyara ufaytti"

yaagettis.

<sup>11</sup> Qassi zaaridi,

"Ayhude gidonna asaw,  
Godaa galatite;  
kawotetha ubbay iya sabbite"

yaagettis.

<sup>12</sup> Hessada Isayaasi,

"Isseyye zareppe yelettiya issoy yaana;  
I kawotetha ubbaa haaran.  
Entti bantha ufayssaa iya bolla wothana"

yaagees.

<sup>13</sup> Geeshsha Ayyaana wolqqan hintte diccana mela ufayssi immiya Xoossay, hintte ammanuwa gaason hinttew ufayssinne sarotethi kumethi immo.

### *Phawuloosi xaafida gaasuwa*

<sup>14</sup> Ta ishato, hinttenan lo77otethinne eratethi kumidayssa qassi issoy issuwa zoranaw dandda7eyssa ta geeshshada erays. <sup>15</sup> Taani hinttena issi issiba gujja akeekisanaw koyada yayyonna ha dabddaabbiya hinttew xaafas. <sup>16</sup> Taani Kiristtoos Yesuusa aylle gidida, Ayhude gidonna asaaas kahined oothada, Wonggelaa odana mela Xoossay taw aadho keehatethaa immis. Ayhude gidonna asay Geeshsha Ayyaanee geeyidi, Xoossaa ufayssiya yarshsho gidana mela Xoossay hessa oothis.

<sup>17</sup> Taani Kiristtoos Yesuusan gidada Xoossaas oothiya oosuwan ceeqettays. <sup>18</sup> Ayhude gidonna asay Xoossaas kiiettanaada, Kiristtoosi ta qaalanne ta oosuwa baggara oothida oosuwappe attin hari ta ceeqettiyabay baawa. <sup>19</sup> Xoossay hessa malaataninnee Geeshsha Ayyaana wolqqan waati oothidaakko ta hinttew odana. Taani Yerusalameppa doomada, Iliwarqone gakkanaan Kiristtoosa Wonggelaa sabbakas. <sup>20</sup> Taani hara asi baasida bessan keexanaw koyikke. Kiristtoosa sunthay xeegettiboonna bessan Wonggelaa odanaw amottays. <sup>21</sup> Geeshsha Maxaafan,

"Iyabay odettiboonna asati iya be7ana;  
iyabaa si7iboonna asati akeekana"

geetettidi xaafettis.

### *Phawuloosi Roome baanaw qoppis*

<sup>22</sup> Hessa gaason, taani hintteko yaanaw dandda7abiikk. <sup>23</sup> Shin taani ha77i ha heeraan ta oosuwa onggida gishonne daro laythafe doomada hinttena be7anaw laamotida gisho <sup>24</sup> taani Ispeenee bashe hinttena be7anaw qoppas. Qassi guutha wode hintteri ufayttida guye Ispeenee biya wode hintte ta ogiyas tana maaddana mela koyays.

<sup>25</sup> Shin ha77i taani Xoossaas asata maaddanaw Yerusalame bays. <sup>26</sup> Maqedoonianne Akkayan de7iya Xoossaas asati, Yerusalamaan de7iya manqota miishen maaddanaw

koyida gishossa. <sup>27</sup> Entti manqota maaddanayssi enttaw attonnabaa gidida gisho bantta huu7en hessa oothanaw qofa qachchidosona. Ayhudeti Ayhude gidonnayssatara ayyaana anjuwa shaakettiko, entti qassi banttaw de7iyaban Ayhudeta maaddanaw bessees. <sup>28</sup> Hessa gisho, taani he shiiqida miishiya enttaw immidaappe guye Ispeeene bashe hintte matara aadhdhana. <sup>29</sup> Taani hintteko biya wode Kiristtoosa anjuwaan kumada baanayssa erays.

<sup>30</sup> Ta ishato, taw Xoossaa woossishe ta baaxiyan taara eqqana mela Godaa Yesuus Kiristtoosanine Geeshsha Ayyaana siiquwan hinttena woossays. <sup>31</sup> Xoossay tana Yihudan de7iya ammanonna asatappe ashshanaadanne Yerusalaamen ta oothana oosoy Xoossaa asata matan ekettana mela taw woossite. <sup>32</sup> Qassi Xoossi giikko, taani hintteko bada ufyassan hintteria shemppana mela taw woossite. <sup>33</sup> Sarotethaa Xoossay hintte ubbaara gido. Amin77i.

## 16

### Sarotho

<sup>1</sup> Kinkkiriya kataman de7iya woosa keethan oothiya nu michchiya Feeba lo77o macas gideyssa hintte erana mela koyays. <sup>2</sup> Hintte iyo ammaniyyaa asati Godaa sunthan mokkanaw bessiya ammaniyyaa asatappe issuwada mokkite. Iya hinttefey koyabaa ubbaa iyo maaddite. Iya ba huu7en daro asaa maaddasu; qassi tana ta huu7enkka daro maaddasu.

<sup>3</sup> Kiristtoos Yesuusa oosuwa taara issife oothiya Phirisqilanne Aqila saro giite. <sup>4</sup> Entti ta gisho bantta shemppuwa aathi immidosona. Ta xalaala gidonnashin Ayhude gidonna asaa woosa keetha ubbay entta galatees. <sup>5</sup> Entta son shiiqiya ammaniyyaa asaa saro giite.

Iisiya biittan Kiristtoosa koyro ammanida, ta dosiya Ephanexoosas ta sarothuwa odite.

<sup>6</sup> Hintte gisho ooson daro daaburida Mayraamo saro giite. <sup>7</sup> Taara qasho keethan aathida ta Ayhude laggeta Anddirioniqoosanne Yuuniyasa saro giite. Entti Yesuusa hawaareta giddon erettidayssata. Qassi entti Kiristtoosa taappe sinthe ammanidosona.

<sup>8</sup> Godan ammaniyya ta siiqo laggija, Amphiliyaxoosa saro giite. <sup>9</sup> Kiristtoosa oosuwa nuura issife oothiya Urbbanosenne ta dosiya Isttakuusa saro giite. <sup>10</sup> Kiristtoosan ammaniyaha aylliisat ta sarothuwa odite. Arxbobuloosa soo asaas ta sarothuwa odite. <sup>11</sup> Ta Ayhude laggija Heroodiyona saro giite.

Narssisanne iya soo asaappe Kiristtoosa ammanidayssata saro giite.

<sup>12</sup> Godaa oosuwan daaburiya Tirufaynanne Tirufoosa saro giite. Qassi Godaa daro daaburada oothiya, ta dosiya Phersiiso saro giite. <sup>13</sup> Godaa oosuwan daro erettida Rufoosasinne tana ba na7ada be7iya iya aayes ta sarothuwa odite. <sup>14</sup> Asinikirttoosas, Filegoonas, Hermmeesas, Patirobaasasinne enttara de7iya ammaniyyaa ishata ubbaas ta sarothuwa odite. <sup>15</sup> Filoloogusa, Yuuliya, Neeriya, iya michchiw, Olumpooosanne enttara de7iya ammaniyyaa asa ubbaa saro giite.

<sup>16</sup> Geeshsha yeeretethi yeerettishe, issoy issuwa sarothite. Kiristtoosa woosa keetha ubbay hinttena saro yaagosona.

### Wurssetha zore

<sup>17</sup> Ta ishato, hintte tamaarida timirriya ixxidi, hintte giddon shaakethinne meto medhdhiya asatappe naagettite. Enttafe haakkite. <sup>18</sup> Hessa mela asati banttaw oothosonappe attin nu Godaa Kiristtoosas oothokona. Bantta mal77iya doonaninne saphothiya qaalan aykko eronna asaa wozanaa balettoosona. <sup>19</sup> Wonggelaas hintte kijettidayssa asa ubbay si7idayssi tana ufayssees. Shin hintte lo77obaa erana melanne ittabaappe haakkana mela ta koyays. <sup>20</sup> Sarotethaa Xoossay Xalaliya hintte tohuwappe garssan gaaci yeggana.

Nu Godaa Yesuus Kiristtoosa aadho keehatethay hintteria gido.

<sup>21</sup> Taara oothiya Ximotiyoshi hinttena saro yaagees. Hessadakka, ta dabboti Luuqiyosi, Yaasoninne Sosphaxiroosi hinttena saro yaagosona.

<sup>22</sup> Ha dabddaabbiya Phawuloosas xaafida taani, Xarxiyoosi, hinttena Godaa sunthan saro yaagays.

<sup>23</sup> Tana mokkidaynne woosa keetha ubbay iya son shiiqiya Gaayoosi, hinttena saro yaagees. Katamaa miishiya oykkiya Erasxoosinne nu ishaa Qarxoosi hinttena saro yaagosona. [ <sup>24</sup> Nu Godaa Yesuus Kiristtoosa aadho keehatethay hintte ubbaara gido. Amin77i.]\*

<sup>25</sup> Xoossas galati gido. Taani, Yesuus Kiristtoosabaa odiya Wonggelaa qaalaninne daro wodeppe qosettidi gam77ida tumatethan, Xoossay hinttena ammanon minthidi essanaw

dandda7ees. <sup>26</sup>Shin ha77i he tumay qonccis. Kawotetha ubbay ammanidi kiitttana mela merinaa Xoossaas kijtan nabeti he tumabaa xaafidosona.

<sup>27</sup> Yesuus Kiristtoosa baggara cinccatethi iya xalaalas de7iya, issi Xoossaas merinaw bonchchoy gido. Amin77i.

## Phawuloosi Qorontoosa Asaas

### Xaaftida Koyro Kiitaa

### Gaatha Qofaa

Phawuloosi Qorontoosa asaas xaaftida koyro kiitay xaaftetiday, Phawuloosi Qorontoosaan essida woosa keethan ammaniyya asaa de7oninne ammano bolla denddida metuwas zaaro immanaassa. He wode Qorontoosa katamay biittan de7iya dumma dumma asay de7iya Girike katamanne Akkaya giya Roome awurajaas waanna katama. He katamay zal77en erettida, wogan minnida, dumma dumma iita de7on dalggidayssanne haymaanote darotethan erettidayssa.

Hawaarey minthidi odanaw koyiday, he woosa keethaa giddon medhettida shaahotethabaa, dumma dumma iita de7obaa, laymatethabaa, eko gelobaa, woosa keetha wogabaaa, Geeshsha Ayyaana imotatabaanne hayqoppe denddoba. Wonggelay ha oyshata waati zaariyakkoo hawaarey naagidi odee.

Siiqoy Xoossay ba asaas immida aadho imota gideyssa shemppo tammanne heedzay qonccisees; qassi shemppo tammanne heedzay ha maxaafan daro erettida kifile geetettidi erettes.

#### **1 Qorontoosa kiitaa ayfe qofata**

Gelo qofaa 1:1-9

Ammaniyya asaa giddon medhettida shaahetethaa 1:9-4:21

Laymatethinne soo asaa de7o wogaa 5:1-7:40

Ammaniyya asaanne ammanonna asaa 8:1-11:1

Woosa keethinne goynno wogaa 11:2-14:40

Kiristtoosa dendduwanne ammaniyya asaa dendduwa 15:1-58

Yihudan de7iya metootettida ammaniyya asaas maado 16:1-4

Kuushsha qofaa 16:5-24

<sup>1</sup> Xoossaas sheniyan Yesuus Kiristtoosa hawaare gidanaw xeegettida Phawuloosinne, nu ishaa Sostenisi, <sup>2</sup> Qorontoosan de7iya Xoossaas woosa keethas, Yesuus Kiristtoosan geeyidayssatasinnee geeshshi gidana mela xeegettidayssatas; qassi enttasinnee nius Goda gidiya nu Godaa Yesuus Kiristtoosa sunthaa ubba bessan xeeqya ubbaas;

<sup>3</sup> Xoossay, nu Aawaynne Goday Yesuus Kiristtoosi hinttew aadho keehatethaanne sarotethaa immo.

#### *Phawuloosi Xoossaas galatees*

<sup>4</sup> Xoossay Kiristtoos Yesuusa baggara hinttew immida aadho keehatethaa gisho taani ubba wode Xoossaas galatays. <sup>5</sup> Iyan odaninne eratetha ubban hintte durettideta. <sup>6</sup> Taani Kiristtoosabaa markkattidayssi summa gideyssa hessi qonccisees. <sup>7</sup> Hessa gisho, hintte nu Godaa Yesuus Kiristtoosa yuussaa naagishe de7ishin, ay ayyaana imoykka hinttew pacenna. <sup>8</sup> Nu Godaa Yesuus Kiristtoosi simmiya wode hintte boretonnayssata gidana mela I wurssethi gakkanaw hinttena miinthana. <sup>9</sup> Ba Na7aa, nu Godaa Yesuus Kiristtoosara issifetethay daana mela hinttena xeeqida Xoossay ammanettidayssa.

#### *Woosa keethan de7iya shaahuwa*

<sup>10</sup> Ta ishato, hintte gidon shaaketethi doonnaada hintte issi wozananinne issi qofan isso gidiidi, daana mela nu Godaa Yesuus Kiristtoosa sunthan ta hinttena woossays. <sup>11</sup> Ta ishato, Eloro7e soo asay hintte giddon oooshshii de7eyssa taw odidosona. <sup>12</sup> Hinttete issotti issoti, "Taani Phawuloosassa; taani Aphiloosassa; taani Phexiroosassa; taani Kiristtoosassa" yaageeta. <sup>13</sup> Kiristtoosi shaakettideyye? Hintte gisho masqaliya bolla kagettiday Phawulooseyye? Woykko hintte Phawuloosa sunthan xammaqettidetiyye?

<sup>14</sup> Taani Qarispohoosinne Gaayoosi attin hinttete oonakka xammaqaboonna gisho Xoossaas galatays. <sup>15</sup> Hessa gisho, oonikka hinttena ta sunthan xammaqettideta gaanaw dandda7enna. [ <sup>16</sup> Qassi Isxifaanose soo asaakkta ta xammaqidayssa akeekays, shin haraa oona xammaqidaaakkoo hassayikke.] <sup>17</sup> Kiristtoosi tana kiittiday Wonggelaa odana melassafe attin xammaqana mela gidenna. Kiristtoosi masqaliya bolla hayqqidayssi hada gidonna mela taani asa cinccatetha qaalan odikke.

#### *Kiristtoosi Xoossaas wolqqaanne cinccatethaa*

<sup>18</sup> Kiristtoosi masqaliya bolla hayqqidayssa odiya qaalay dhayeysatas eeyatethi, shin nius atteyssatas Xoossaas wolqqa. <sup>19</sup> Geeshsha Maxaafan,

“Taani cincata cincatethaa dhayssaa;  
akeekanchchota akeekaa baletana”  
yaagees.

<sup>20</sup> Yaatin, cinc ci awun de7ii? Higge asttamaarey awun de7ii? Woykko ha sa7aa eranchchoy awun de7ii? Xoossay ha sa7aa cincatethaa eeyatethi oothibeennee?

<sup>21</sup> Ha sa7aa asay bantta cincatethan Xoossa eronna mela ba cincatethan diggidi, eeyatethan taybettiya, nuuni odiya qaalan ammaneyssata ashshanaw Xoossa shene gidis. <sup>22</sup> Ayhudeti malaata be7anaw koyoosona; qassi Giriketi cincatethi koyoosona. <sup>23</sup> Shin nuuni masqaliya bolla kagettida Kiristtoosa sabbakoos. Hessi Ayhudatas dhube; qassi Giriketas eeyatethi. <sup>24</sup> Shin Xoossay xeegidayssatas, Ayhude gidin, Girike gidin Kiristtoosi Xoossa wolqqaanne iya cincatethaa. <sup>25</sup> Xoossa eeyatethay asa cincatethafe aadhdhees; qassi Xoossa daaburay asa minotethafe minnees.

<sup>26</sup> Hiza, ta ishato, Xoossay hinttena xeegiya wode hintte ay mela aseekko qoppite. Asa qofan hintte giddon cinccati, wolqqaamatinnne dhoqqa zareti dookkona. <sup>27</sup> Shin Xoossay cincattha yeellayanaw alamen de7iya eeyata dooris; qassi minota yeellayanaw alamen de7iya daaburanchchota dooris. <sup>28</sup> Xoossay ha alamiyan gitaa geetettidabaa dhayssanaw, ha sa7aa kawushhabaa, kadhettidabaanne pathonnabaa dooris. <sup>29</sup> Oonikka Xoossa sinthan ceeqqettonna mela hessa oothis. <sup>30</sup> Shin Xoossay hinttew Kiristtoos Yesuusara issifetethi daana mela oothis. I nuus Xoossaafe cincatethi, xillotethi, geeshshatethinne atotethi gidis. <sup>31</sup> Hessa gisho, Geeshsha Maxaafan, “Ceeqettiya oonikka Godan ceeqqo” yaagees.

## 2

### *Kiristtoosa kaqetethaa*

<sup>1</sup> Ta ishato, taani koyro Xoossa qaala hinttew odashe yida wode doona bilatethaninne cincatethan yabiikke. <sup>2</sup> Taani hinttera de7iya wode masqaliya bolla kagettida Yesuu Kiristtoosappe attin harabaa eranaw koyikke gada ta qofa qachchas. <sup>3</sup> Ta hinttera de7iya wode daaburan, yashshaninne daro kokkorssan de7as. <sup>4</sup> Ta kiitaynne ta timirttey doona bilatethaninne cincatethan gidonnashin Geeshsha Ayyaana wolqqa qonccisethaana. <sup>5</sup> Hessika, hintte ammanoy Xoossa wolqqaanappe attin asa cincatethan zempponna melassa.

### *Xoossa cincatethaa*

<sup>6</sup> Ayyaana de7on diccidayssatas nuuni cincatethaa qaalan odoos. Shin he cincatethay, ha sa7aa cincatethaa woykko dhananaw de7iya ha sa7aa haareyssata cincatethaa gi-denna. <sup>7</sup> Shin nuuni odiya cincatethay, daro wodeppe sinthe Xoossay nu bonchchuwas gi-igisidayssanne geemmidii de7iya xuura cincatethaa. <sup>8</sup> Ha sa7aa haareyssatapppe oonikka ha cincatethaa eribeenna. Entti eridabaa gidiyakko, bonchcho Godaa masqaliya bolla kaqqokona. <sup>9</sup> Shin Geeshsha Maxaafan,

“Ayfey be7iboonnabaa,  
haythi si7iboonnabaa,  
wozani qoppiboonabaa,

Xoossay bana siiqeyssatas giigisis” yaagees.

<sup>10</sup> Xoossay ba xuuraa ba Ayyaana baggara nuus qonccis. Geeshsha Ayyaanay hari attoshin geemmida Xoossa xuura ubbaa pilggees. <sup>11</sup> Asan de7iya asa ayyaanaappe attin asabaa oonikka erenna. Hessadakka, Xoossabaa Xoossa Ayyaanaappe attin oonikka erenna. <sup>12</sup> Xoossay nuus coo immidabaa nu erana mela Xoossa Ayyaanaa ekkidappe attin ha sa7aa ayyaanaa ekkibookko.

<sup>13</sup> Nuuni ayyaanaabaa, ayyaana asatas asa cincatethan gidonnashin Xoossa Ayyaanay immiyo cincatethan tamaarsos. <sup>14</sup> Shin Geeshsha Ayyaanay baynna asi Xoossa Ayyaana imotata ekkenna. Hessi iyaw eeyatethi; ubbay Geeshsha Ayyaanaan pilggettiya gisho I eranaw dandda7enna. <sup>15</sup> Shin Geeshsha Ayyaani de7iya asi ubbabaa pilggees, shin iya oonikka pilgenna. <sup>16</sup> Geeshsha Maxaafan,

“Godaa wozanaa erey oonee?”

Iya zoranaw dandda7ey oonee?”  
geetettidi xaafetidayssa mela. Shin nuus Kiristtoosa wozani de7ees.

## 3

### *Xoossa oosanchchota*

<sup>1</sup> Ta ishato, hintte Kiristtoosan burroo yooganne ammanonna asaatho de7iya gisho taani ayyaanabaa hinttew odanaw dandda7abiikke. <sup>2</sup> Hintte mino kathi maaanaw dandda7iboonna gisho taani hinttena maathi paahas; ha77ika dandda7ibeekketa. <sup>3</sup> Ha77ika hintte ammanonna asada de7eeta. Hintte giddon de7iya qanaateynne palamay hintte ammanonna asada de7eyssa erisenne? Hintte ammanonna asada haneeta. <sup>4</sup> Hinttefissoy, "Taani Phawuloosassa" haray qassi, "Taani Aphiloosassa" giikko, ammanonna asa mela gidekketii?

<sup>5</sup> Yaatin, Aphiloosi oonee? Phawuloosi oonee? Nuuni hinttena ammanthida Xoossaas oosaanchchota. Xoossay issuwashissuwashimmida oosuwa mela oothiya oosanchchota gidokkonaayye? <sup>6</sup> Ta tokkas; Aphiloosi haathee ushshis, shin dichchey Xoossaas. <sup>7</sup> Hessa gisho, dichchida Xoossaafe attin tokkeyka haathee ushsheyka aykkoka gidenna. <sup>8</sup> Tokkeynne haathee ushshey woli mela, shin issoy issoy ba oosuwa mela Xoossay immiya woytuwa ekkana. <sup>9</sup> Nuuni issife Xoossaas oothiya iya oosanchchota gidiya gisho hintte Xoossaas shooqa; Xoossaas keethi. <sup>10</sup> Xoossay taw immida aadho keehatethaa mela hiillanchcho anaaxeda baasuwa yeggas. Hara uray iya bolla keexees. Shin iya bolla keexiya oonikka waattidi keexiyako, baw naagetto. <sup>11</sup> Issi toho yegettida baasuwapple hara baaso yegganaw oonikka dandda7enna. He baasokyka Yesuu Kiristtoosa. <sup>12</sup> Shin ha baasuwa bolla oonikka worqqan woykko biran gidin, al77o shuchchan woykko mithan gidin, maatan woykko maqan keexiko, <sup>13</sup> issi issi asi he baasuwa bolla aybin keexidaakkopirdda gallas taman paacettdi qonccana. <sup>14</sup> Oonikka he baasuwa bolla keexida keethay taman xuugettonna attiko, ba woytuwa ekkana. <sup>15</sup> Shin oodde oosoykka taman xuugetiko, he uraas woytoy baawa. Gidoshin, Iba huu7en tamappe kessi ekkida asada attana.

<sup>16</sup> Hintte Xoossaas keethi gideyssanne Xoossaas Ayyaanay hinttenan de7eyssa erekketii? <sup>17</sup> Oonikka Xoossaas keethi laallikko, Xoossaykka iya laallana. Xoossaas keethay geeshshi; he keethayka hinttena.

<sup>18</sup> Oonikka bana cimmofo. Ha sa7aa cincatethan bana cincca oothidi ekkida oonikka Xoossaas sinthan cincca gidanaw eeya gido. <sup>19</sup> Ha sa7aa cincatethay Xoossaas sinthan eyeyatethi. Geeshsha Maxxafan, "Xoossay cincattha entta gene qofan oykkrees" yaagees.

<sup>20</sup> Qassi, "Cincattha qofay maaddonnabaa gideyssa Goday erees" yaagees.

<sup>21</sup> Hessa gisho, ubbay hinttessa gidiya gisho oonikka asan ceeqettofo. <sup>22</sup> Phawuloosi, Aphiloosinne Phexiroosi, ha alamey, de7oy, hayqoy, ha77i de7ey, sinthafe yaanayssi, ubbay hinttessa. <sup>23</sup> Hintte Kiristtoosassa; Kiristtoosi Xoossassa.

## 4

### Kiristtoosa hawaareta

<sup>1</sup> Asay nuna Kiristtoosa aylledanne Xoossaas xuuraa qonccisanaw hadari imettida asada oothidi qoppo. <sup>2</sup> He hadaraa ekkida asati bantta Godaas ammanettidayssata gidanaw bessees. <sup>3</sup> Shin hintte woykko haray tana pirddiko, taw aykkoka gidenna. Haray atto, takka ta bolla pirddike. <sup>4</sup> Ta kahay geeshshi, shin Hessi ta polo xillo gideyssa bessenna. Ta bolla pirddanay Godaa xalaala. <sup>5</sup> Hessa gisho, wodey gakkonna, Goday yoonna oodde bollaka pirddofite. I dhumaan geemmidabaa poo7o kessenna; asa wozanan qosettida qofa qonccisana. He wode issoy issoy Xoossaafe galataa ekkana.

<sup>6</sup> Ta ishato, hintte gisho Aphiloosanne tana leemiso oothada hinttew odas. Hessa ta oothiday, "Xaafetidayssafe aadhdrofa" yaagiya zoriya hintte nuuppe tamaaranala melassa. Hessa gisho, oonikka issuwa sabbidi hankkuwa kadhanaw bessenna. <sup>7</sup> Ne haratappe aybin aadhdhay? Neeni ekkaboonnabay aybi de7ii? Yaatin, neeni ekkidabaa hara asappe ekkida gidikko, ekkiboonna asada ays ceegettay?

<sup>8</sup> Ha77i hintte kallideta. Ha77i hintte durettideta. Nuuni baynna hintte xalaala kawotideta. Hintte tuma kawotidabaa gidiyakko, nukka hinttera kawotanashin. <sup>9</sup> Xoossay nuna hawaareta, hayqo pirddettida asada asa ubbaafe nuna guye aathida taw daanees. Nuuni ha alamiyas, kiitanchchotasinne asaas kaassaba gidida.

<sup>10</sup> Nuuni Kiristtoosa gisho eeya gidida, shin hintte Kiristtoosan cincattha gidiideta. Nuuni daaburanchcho, shin hintte mino gidideta. Hintte bonchchettideta, shin nuuni tooshet-tida. <sup>11</sup> Ha77i gakkanaw nu koshattoos, saamottoos, kallottoos, wadhettoos; daana soo dhayidi toyattoos. <sup>12</sup> Nuuni nu kushen oothi aqoos. Nuna asi baaddiya wode anjjoos; nuna gooddiya wode dandda7os. <sup>13</sup> Nu bolla ittabaa odettiya wode lo77o qaala zaaroos. Nu ha77i gakkanaw ha alamiya pitonne wora yegettiya buure gidida.

<sup>14</sup> Taani hessa xaafiday, ta siiqiya naytada, hinttena zoranaw xaafasippe attin yeel-  
layanaw gidenna. <sup>15</sup> Kiristtoosan hinttena dichchiya tayboppe bolla gidida kaaletheyssati  
de7ikkoka, hinttew issi aawu de7ees. Ta hinttena Kiristtoos Yesuusa Wonggelaan yelas.  
<sup>16</sup> Hiza, hintte tana leemiso oothidi kaallana mela hinttena woossays. <sup>17</sup> Hessa gisho,  
ammanettida, ta siiqiya, Godan ta na7aa, Ximotiyooosa hintteko kiittas. I dumma dumma  
bessan de7iya woosa keethan ta tamaarssida, Kiristtoosa Yesuusan de7iya ta ogiya hint-  
tena hassaysana.

<sup>18</sup> Taani hintteko yoonnabaa daanin, otoriya issi issi asati de7oosona. <sup>19</sup> Shin Goday gi-  
ikko, mata wode taani hintteko baana. He wode otoranchchota odaa xalaala gidonnashin  
entta wolqqaaka erana. <sup>20</sup> Xoossa kawotethay oda gidonnashin wolqqa. <sup>21</sup> Taani hintteko  
xam77ara booyye woykko siiqoranne ashkke ayyaanara bo? Awussa dooreti?

## 5

### *Ammaniya asa giddon de7iya yeellaya ooso*

<sup>1</sup> Hintte giddon laymatethi de7eyssi zigiretees. Hessa mela laymatethi hari attoshin,  
ammanonna asaykka oothokona. Hintte giddon ba aawa machcheera tunida asi de7ees.  
<sup>2</sup> Hessian hintte qirottanawunne yeellatanaw bessenne, shin otorttideta. Hessa mela  
borssobaa oothida uraa hintte giddofe kessanaw bessennee?

<sup>3</sup> Taani ashon hinttera doona ixxikokka ayyaanana ta hinttera de7ays. Taani hinttera  
de7iya asada hanada hessa mela oosuwa oothida uraa bolla pirddas. <sup>4</sup> Nu Godaa Yesuus  
Kiristtoosa sunthan hintte shiiqiya wode taani ayyaanana hinttera daana. Hessian Godaa  
Yesuus Kiristtoosa wolqqay hinttera gidana. <sup>5</sup> He uraa nagara ashoy\* dhayidi, iya  
ayyaanay Godaa Yesuusa pirdda gallasan attana mela I Xalahes aadhdhi imetto.

<sup>6</sup> Hintte ceeqoy lo77o gidenna. Guutha irshshoy munuqa ubbaa dentheysa erekketiyye?  
<sup>7</sup> Hintte ha77i irshshoy baynna munuqa gidana mela, nagara irshshuwaah hinttefe kessite.  
Nuus Paasiika dorssaa gidida Kiristtoosi yarshshettis. <sup>8</sup> Hessa gisho, genynne iitatheti  
de7iya irshshuwaara gidonnashin tumatethinne geeshhatethi de7iya uythara nu baaliya  
bonchchoos.

<sup>9</sup> Ta kase xaafida dabddaabbiyan hintte laymatiya asaara gaheettonna mela hinttew odas.  
<sup>10</sup> Hessa guussay ha alamiyaa de7iya laymateyssatara woykko uuzetara woykko kayso-  
tara woykko eeqa goynneyssatara polo gaheettofite guussu gidenna. Hessa gidikko, ha  
alamiyappe hintte keyanaw bessees shin attis. <sup>11</sup> Shin ammanays yaagishe laymateyssatara  
woykko uuzetara woykko eeqa goynneyssatara woykko cayeysatara woykko math-  
otteyssatara woykko kaysotara gaheettofite gada hinttew odays. Hessa mela asara hari  
attoshin, kathika mooppite.

<sup>12</sup> Woosa keethafe karera de7eyssata bolla pirddanaw tana aybe gathey? Woosa keethan  
de7eyssata bolla hintte pirddeketiyye? <sup>13</sup> Shin karera de7eyssata bolla Xoossay pirddana. He  
iitabaa oothiya uraa hintte giddofe kessite.

## 6

### *Ammaniya asaa giddon de7iya mooto*

<sup>1</sup> Hintte giddofe issoy issuwaro mootoy de7ikkoo, hessa ammaniyyaa asaa sinthan pirddet-  
tanayssa aggidi ammanonna asa sinthan pirddetanaw waanidi bii? <sup>2</sup> Geeshshati alamiya  
bolla pirddanayssa hintte erekketii? Yaatin, hintte alamiya bolla pirddiyabaa gidikko,  
hayssa mela guuthabaa pirddanaw waanidi dandda7ekketii? <sup>3</sup> Nuuni kiitanchchota  
bolla pirddanayssa erekketii? Yaatin, ha sa7a duussabaa bolla pirddanayssi hinttena  
waanidi xoonii? <sup>4</sup> Yaatin, hessa mela metoy hintte giddon medhettiko, woosa keetha  
ayfen kadhettida asaa sinthan pirddetanaw waati efeetii? <sup>5</sup> Taani hinttena yeellayanaw  
hessa gays. Hintte giddon kacettida asata sigethanaw dandda7iya akeeka asi baaw?  
<sup>6</sup> Yaatin, issi ammaneyssi hankko ammaneyssa pirdda keethan ammanonna asaa sinthan  
mootanaw bessii?

<sup>7</sup> Hiza, hintte issoy issuwaro mootoy abaa gidikko hessi hintte kunddethaa bessees. Hessafe  
hintte qohettikonne cimettiko keehenne? <sup>8</sup> Shin hintte woli giddon ammaneyssati issoy  
issuwa qoheetanne cimmeeta.

<sup>9</sup> Geellati Xoossa kawotethaa laattonayssa hintte erekketii? Hinttena cimmofite;  
laymateyssati woykko eeqa goynneyssati woykko qayxeysatti woykko addera addera  
gaheetteyssati, <sup>10</sup> woykko kaysot woykko uuzeti woykko mathotteyssati woykko cayeysatti  
woykko bonqeysatti Xoossa kawotethaa laattokona. <sup>11</sup> Hinttefe issi issi asati kase hessa

mela. Shin hintte ha77i Godaa Yesuus Kiristtoosa sunthaaninne Xoossaa Ayyaan an meecettideta; geeyideta; xillideta.

### *Hintte asatethan Xoossaa bonchchite*

<sup>12</sup> Hintte, "Nu koyidabaa oothanaw dandda7os" yaageta. Shin ubbay hinttena maad dennna. Taani koyidabaa ubbaa oothanaw dandda7ays, shin aybikka tana haarennna.

<sup>13</sup> Hintte, "Kathi ulossa; uloykka kathassa" yaageta. Shin Xoossay uluwaka kathaaka dhayssanayssa ta hinttew odays. Nu asatethay Godaassafe attin laymatethassa gidenna. Godaykka nu asatethaassa. <sup>14</sup> Xoossay Godaa hayqoppe denthidayssada, nunakka hayqoppe ba wolqqan denthna.

<sup>15</sup> Hintte asatethay Kiristtoosa asatethaafe baggaa gideyssa erekketii? Yaatin, taani Kiristtoosa asatethaafe baggaa efada laymatetha asatethi gidana mela oootho? Hanenna!

<sup>16</sup> Laymatiya uray i gaheetti aseera issi asatethi gideyssa erekketii? Geeshsha Maxaafan, "Entti nam77ay issi asatethi gidana" geetettidi xaafettis. <sup>17</sup> Shin Godaara issifiya uray iyara ayyaan an isso gidees.

<sup>18</sup> Laymatethafe haakkite. Issi uray oothiya hara nagaray iya asatethaafe karera oosettes, shin laymatiya asi ba asatethaa bolla nagara oothees. <sup>19</sup> Hintte asatethay Xoossay hinttew immida hinttenan de7iya Geeshsha Ayyanaa keethi gideyssa erekketii? Hintte hintteebaa gidekketa. <sup>20</sup> Xoossay hinttena gaten shammis. Hessa gisho, hintte asatethan Xoossaa bonchchite.

## 7

### *Eko geloba*

<sup>1</sup> Hintte taw xaafida dabddaabbiyas zaaroy hayssa. Issi asi machchonna de7ikko lo77o.

<sup>2</sup> Shin laymatethafe attanaw issi issi addey machcho ekko; qassi issi issi maccasas azini de7o.

<sup>3</sup> Azinay ba machchees, qassi machchiya ba azinaas bessiyabaa kuntho. <sup>4</sup> Machchees ba asatethaa bolla iw maati baawa, shin maatay I azinaassa. Hessadakka, azinaas iya asatethaa bolla maati baawa, shin maatay machcheessa. <sup>5</sup> Hintte woosan guutha wode gam77anaw zoretethan gidonna ixxiko, issoy issuwa diggofite. Hessa gaason hinttenthehaa haaranaw xoonettin, Xalahey hinttenu paacconna mela issife de7ite. <sup>6</sup> Shin taani hinttena zoranaw hayssa gaysippe attin kiita gidenna. <sup>7</sup> Asi ubbay taada machcho ekkonna de7iyakko dosays, shin Xoossay issuwas issuwas immida dumma imoti de7ees. Issuwas hayssa mela hankkuwas hessa mela imoti de7ees.

<sup>8</sup> Machcho ekkiboonnayssatasinne azina geliboonnayssatas qassi am77etas taani gey, taada ekkonna woykko gelonna de7ite gada zorays. <sup>9</sup> Shin amon xuugetteyssafe ekkneysinne geleyssi lo77o gidiya gisho entti banttana haaranaw dandda7onna ixxiko, ekkonne gelo.

<sup>10</sup> Taani ekkidayssatanne gelidayssata hayssada gada zorays; tana gidikke Goday kiittrees; machchiya ba azinaappe shaakettofo. <sup>11</sup> Shin shaakettiko hara azina gelonna barkka de7o woykko ba azinaara giigo. Azinay ba machchiw billofo.

<sup>12</sup> Shin haratas Godaa gidonnashin taani hayssada gays. Ammanonna machcha de7iya ammaniyyaa azini de7ikko, iya machchiya iyara issife daanaw koykko iyo billofo. <sup>13</sup> Qassi ammanonna azini de7iya ammaniyyaa machchaa de7ikko, I azinay iira issife daanaw koykko iyappe bilettofo. <sup>14</sup> Ammanonna azinay ba ammaniyyaa machche baggara geeyees; qassi ammanonna machchiya ba ammaniyyaa azinay baggara geeyawusu. Hessi baynneeko, hintte nayti tuna gidoosona, shin ha77i entti geeshshi. <sup>15</sup> Shin ammanonna azinay woykko machchiya billanaw koykko billo. Ammaniya machchiya woykko azinay hessa melaban qashettokona. Xoossay nuna sarotethan daana mela xeegis. <sup>16</sup> Ammaniya machchete, neeni ammanonna ne azinaa ashshaneekko ay eray? Woykko ammaniyyaa azinaw, neeni ammanonna ne machchiw ashshaneekko ay eray?

### *Xoossay hinttena xeegidayssada de7ite*

<sup>17</sup> Issi issi asi Goday iyaw immida imotaadanne Xoossay iya xeegidayssada de7o. Woosa keetha ubban taani tamaarssida wogay hayssa. <sup>18</sup> Oonikka qaxxarettdi ammanidabaa gidlikko, qaxxarettonaada hanoppo. Qaxxarettona ammanida oonikka de7ikko, qaxxarettonaw koyoppo. <sup>19</sup> Xoossa kiitaa polanaw besseesppe attin qaxxarettin qaxxarettona aggin aykkoka maaddenna.

<sup>20</sup> Issi issi asi Xoossay bana xeegiya wode de7eyssada de7o. <sup>21</sup> Xoossay nena xeegiya wode neeni aylle? Aykkoy baawa hessas un77etofa. Shin neeni aylletethafe la77a keyanaw dandda7ikko yeda keya. <sup>22</sup> Aylle gidi de7ishe Godan xeegettida asi Godan

aylletethaafe la77a keyis. Hessadakka, aylle gidonna de7ishe, Godan xeegettida asi Kiristtoosa aylle. <sup>23</sup> Xoossay hinttena gaten shammida gisho asa aylle gidoppite. <sup>24</sup> Ta ishato, hintte issyo issyo xeegettiya wode de7iya de7uwani Xoossaara issife de7ite.

### *Ekkiboonna, gelibonna asaabanne am77etabaa*

<sup>25</sup> Geela7tabaa Goday tana kiittidabay baawa. Shin Goday taw immida maaratethaa mela taani hinttena zorays. <sup>26</sup> Hiza, ha77i metuwa gisho ekkonna woykko gelonna duussi taw lo77o daanees. <sup>27</sup> Ne machcho ekkidabaa gidikko, billanaw koyoppa. Ne machcho ekkaboonaabaa gidikko, ekkanaw koyoppa. <sup>28</sup> Shin ne machcho ekkiko nagari baawa. Hessada geela7iyakka azina gelikko nagari baawa. Shin ekkiya geliya asaas ha sa7an daro metoy de7iya gisho hintte hessafe attana mela ta koyays.

<sup>29</sup> Ta ishato, ta gey hessa; wodey wuris. Hizappe sinthe machcha de7eyssi machcho ekkonayssada de7o. <sup>30</sup> Yeekkeyssati yeekkonaada, ufaytseyssati ufaytonaada, sham-meyssati aykkoyka baynnaada banttana taybo. <sup>31</sup> Ha sa7aa shaluwan maadetteyssati maadettibonaada hano. Ha alamiya malay aadhdhhan.

<sup>32</sup> Hintte hirrgi baynna daana mela ta dosays. Machcho ekkiboonnayssi Godaa ufayssanaw koyaa gisho Godabaa qoppees. <sup>33</sup> Shin machcho ekkidayssi ba machchiw ufayssanaw koyaa gisho ha sa7abaa qoppees. <sup>34</sup> Iya qofay nam77an shaakettees. Azina gelabonna geela7iya ba asatethaaninne ba shemppuwan geeyada Godaa ufayssanaw koyaa gisho Godaaba qoppawusu. Shin azinaa gelidaara ba azinaa ufayssanaw koyaa gisho sa7abaa qoppawusu.

<sup>35</sup> Taani hessa hinttew odehy, hintte maadettana melassafe attin hinttena un77ethanaw gidenna. Shin hintte qofay shaaketonna maaran de7idi Godaa ufayssiyabaa hintte oothana mela taani odays.

<sup>36</sup> Oonikka ba oychchida geela7ees gelo wodey aadhdhis gidi iyo agganaw qoppiko, hessi qassi iw lo77o gidonnayssi iyaw si7ettiko, ba koyidayssa oootho; entti eketto, geletto; hessan nagari baawa. <sup>37</sup> Shin issi asi un77ethiyabay dhayin, ba wozanan minnidii, bana haaridi, ba oychchida geela7iw ekkonna agganaw koykko loythis. <sup>38</sup> Hessa gisho, geela7iw ekkija uray loythis; qassi ekkonna uray daro loythis.

<sup>39</sup> Machchiya ba azinay paxa de7iya wode ubban iyara qashettasu. Shin I azinay hayqqiko, ba dosida azina gelanaw dandda7awusu. Gidoshin, iya geliya addey am-maniyyaa asi gidanaw bessees. <sup>40</sup> Ta qofan gidikko, iya gelonna de7ikkoo ufayssan daana. Qassi taw, ta bolla Xoossa Ayyaani de7iya daanees.

## 8

### *Eeqas yarshshettida kathabaa*

<sup>1</sup> Eeqas yarshshettiya kathabaa gidikko nu ubbay eroos. Eratethi otorssees, shin siiqoy dichchees. <sup>2</sup> Oonikka bana erays gidi qoppiko, I buroo eranaw besseyssa eribeenna. <sup>3</sup> Shin oonikka Xoossaai siiqikko I Xoossaai matan erettidayssa.

<sup>4</sup> Hessa gisho, eeqas yarshshettida kathi muussabaa gidikko ha alamiyan Godi issi Xoossaafe attin hari baynna gisho eeqi pathonnabaa gideyssaa nuuni eroos. <sup>5</sup> Xoosse gi-donnashin saloninne sa7an xoosse geetetti xeegettiya daro xoossatinne godati de7ikkoka, <sup>6</sup> ubbaabaa medhdhida, nu iyabaa gidida, issi Xoossay, Aaway, nuus de7ees. Ubbay iya baggara medhettida, nukka iya baggara de7o demmida issi Goday, Yesuus Kiristtoosi nuus de7ees.

<sup>7</sup> Shin hayssa erey ubbaa gidenna. Issi issi asay eeqa goynnora meezeetida gisho kathi miya wode eeqas yarshshettidabaa oothidi ekkoosona. He wode entta kahay daabura gidiya gisho tunees. <sup>8</sup> Shin kathi nuna Xoossaara dabboyenna. Nu monna aggidi aykkoka qohettoko; qassi midi dumma go7ettoko.

<sup>9</sup> Shin hintte koyidabaa maanaw la77atethi hinttew de7ikkoka hessi ammanon minnonayssata dhubbonna mela naagettite. <sup>10</sup> Neeni nena eranchcho gada eeqas yarshshettida kathi maanaw eeqa keethan uttidashin, ammanon minnonayssi nena be7ikkoo hessi iya eeqas yarshshettida kathi maana mela denthetheneyye? <sup>11</sup> Hiza, ne eratethaa gaason Kiristtoosi iya gisho hayqqida, ammanon minnonna ne ishay, dhays. <sup>12</sup> Hessada oothidi, ammanon minnonna hintte ishata qohishenne entta kaha madunxishe Kiristtoosa qoheeta. <sup>13</sup> Hessa gisho, kathi ta ishaa dhubbiyabaa gidikko, I dhubettonna mela asho ubbarakkka miikke.

## 9

### *Hawaareta maata*

<sup>1</sup> Taani yeda de7iya asi gidikkinaa? Ta hawaare gidikkinaa? Taani nu Godaa Yesuus Kiristtoosa be7abiikkinaa? Hintte Godan ta daabura ayfe gidekketii? <sup>2</sup> Hintte Godaaba

gidiya gisho ta haratas hawaare gidonna ixxikokka, hinttew hawaare gideyssas hintte markka.

<sup>3</sup> Tana hawaare gidenna geyssatas ta immiya zaaroy hayssa. <sup>4</sup> Nu hinttefe maanawunne uyanaw tuma nuus maati baawe? <sup>5</sup> Hankko hawaaretada, Godaa ishatadan Phexiroosada, ammaniyaa nu machcheta ekki hamuttanaw nuus maati baawe? <sup>6</sup> Woykko oothidi maanaw bessey taaranne Barnnabaasa xalaalee? <sup>7</sup> Ba miishen wotaaddaretathi otohey oonee? Woykko woyne tokkidi, iyaappe ayfe moonnay oonee? Woykko wude heemmishe, he wudiyappe maathi uyonnay oonee?

<sup>8</sup> Taani hessa asa qofatho gaynaayye? Higgey hessa geenue? <sup>9</sup> Muse Higgiyan, "Wudumman kathaa yedhdhiya booraa doona qachchofa" geettetti xaafettis. Yaatin Xoossay hessa booras qoppidi gidee? <sup>10</sup> Xoossay hessa giday nuus qoppidi gidennee? Ee nu gishossa. Goyeysika, kathaa geeshsheysika bana gakkeyssa ekkana gidi ufyassan oothanaw bessses geetettidi tuma nu gisho xaafettis. <sup>11</sup> Nuuni hintte giddon ayyaana zerethi zerida gidikko ashos koshshiyabaa nu hinttefe ekkiko, hessi gitabayee? <sup>12</sup> Harati hessa hinttefe ekkanaw enttaw maati de7ikko, nuus enttayssafe aadhdhiya maati de7ees.

Shin nuuni Kiristtoosa Wonggelaas dhube gidonna mela, ubbaa genccoisippe attin he maatan go7ettibookko. <sup>13</sup> Xoossa keethan oothiya asati bantta kathaa Xoossa Keethafe ekkeyssa erekketii? Qassi yarshho bessan otoheyssati yarshshuwafe ekkeyssa erekketii? <sup>14</sup> Hessadakka, Wonggelaas markkatteyssati duussas koshshiyabaa Wonggelaappe ekkana mela Goday kiittis.

<sup>15</sup> Shin taani ha maata ubban aykkoka go7ettabiikke. Taani hayssa xaafiday ta maata bonchhisianaw koyada gidenna. Oonikka ta ceequwa hada oothanaappe hayqoy taw lo77o. <sup>16</sup> Taani Wonggelaas odene ixxiko, tana ayye. <sup>17</sup> Taani Wonggelaas dosada sabbakikko taw woytoy de7ees. Shin taani Wonggelaas dosonna kiitettada sabbakiyabaa gidikko hessa Xoossay taw hadara immis. <sup>18</sup> Yaatin, ta woytoy aybee? Taani Wonggelaas sabbakiya wode ta maatan go7ettonna Wonggelaas coo sabbakeyssi taw woyto.

<sup>19</sup> Taani ooddeskka aylle gidikke, shin darota ashshanaw ubbaas aylle gidas. <sup>20</sup> Taani Ahyudeta ashshanaw enttara entta gidas. Ta huu7en higgefe garssan de7ikke, shin higgefe garssan de7eyssata ashshanaw higgefe garssan de7iya asi gidas. <sup>21</sup> Xoossaa higgiyafe kare keyonna, Kiristtoosa higgiyas kiitettashe, higgey baynnayssata ashshanaw higgey baynna asada gidas. <sup>22</sup> Taani daaburanchchota ashshanaw daaburanchcho gidas. Taani guuthata ashshanaw ubbaara ubbaa hanas. <sup>23</sup> Taani Wonggelaas anjuuwa shaakettanaw, ha ubbaa Wonggelaas gisho hanas.

<sup>24</sup> Wothon gaaddetiya ubbay woxxes, shin issuwa xalaali woyto ekkeyssa erekketii? Hessada hintteka woytuwa ekkanaaw woxxite. <sup>25</sup> Gaaddetiya asa ubbay ubbabana banttana haarees. Entti hessa daaburey dhaya kallachcha woyto ekkanaassa. Shin nuuni daaburey merinaa kallachcha woytuwa ekkanaassa. <sup>26</sup> Hessa gisho, taani qofi baynna asada woxxiike. Carkko yimppiya asada coo kushe yeddiike. <sup>27</sup> Shin taani haratas Wonggelaas sabbakidaappe guye ta huu7en yeggettida asi gidonna mela ta asatethaa wolqqan haarada taw kiittana mela oothays.

## 10

### *Eeqa goynnofite*

<sup>1</sup> Ta ishato, taani hintte hayssa akekana mela koyays. Nu aawati ubbay shaarappe garssara hamuttidosona; ubbay abbaa pinnidosona. <sup>2</sup> Entti Musera issifanaw shaaraninne abban xammaqettidosna. <sup>3</sup> Entti ubbay issi ayyaana kathaa midosona. <sup>4</sup> Qassi ubbay issi ayyaana ushshaa uyidosona. Entti banttana kaalliya ayyaana zaallafe pulida ushshaa uyidosona; he zaallayka Kiristtoosa. <sup>5</sup> Shin Xoossay enttafe darotan ufyattibonna gisho entta ahay bazzo biittan wodhdhidi attis.

<sup>6</sup> Entti iitabaa amottidayssada, nukka iitabaa amottonna mela hessi ubbay nuus leemiso gidis. <sup>7</sup> Geeshsha Maxxaafan, "Asay maanawunne uyanaw uttidosona; qassi yexxanaw dendddidosona" geettidayssada enttafe issoti issoti eeqa goynnidayssada mela hintte eeqa goynnofite. <sup>8</sup> Enttafe issoti issoti laymatidayssada nu laymatanaw bessenna. Hessa gaason enttafe issi gallas laatamanne heedzu mukulu asi hayqqis. <sup>9</sup> Enttafe issoti issoti Godaa paaccidi shooshan dukettidi hayqqidayssada nu Godaa paaccanaw bessenna. <sup>10</sup> Enttafe issoti issoti zuuzummidi hayqo ehiya kiitanchchuwan dhayidayssada hintteka zuuzum-mofite.

**9:9** Zaare 25:4; 1Ximo 5:18    **9:11** Roome 15:27    **9:14** Maato 10:10; Luuqa 10:7    **10:1** Kessa 13:21-22; 14:22-29

**10:3** Kessa 16:35    **10:4** Kessa 17:6; Tay 20:11    **10:5** Tay 14:29-30    **10:6** Tay 11:4    **10:7** Kessa 32:6    **10:8**

Tay 25:1-18    **10:9** Tay 21:5-6    **10:10** Tay 16:41-49

<sup>11</sup> Ha entta bolla gakkida ubbay nu naagettana mela nuus leemiso gidis. Qassi wode wurssethaa bolla de7iya nuus timirtte gidana mela ha ubbay xaafettsi.

<sup>12</sup> Hessa gisho, ta eqqas giya oonikka kunddonna mela bana naago. <sup>13</sup> Ase ubbaa gakkiya paaceppe attin dumma paacey hinttene gakkibeenna. Hintte wolqqay dandda7eyssafe aadhdhiya paacen hintte paacettonna mela aathi immonna Xoossay ammanettidayssa. Hinttene paacey gakkiya wode he paaciya I hinttene dandda7isana. Qassi he paaciyappe hintte keyana ogiya I gigisana.

<sup>14</sup> Hiza, ta al770 ishato, eeqsi goynnofe haakkite. <sup>15</sup> Hintte wozanaama asi gidida gisho ta hayssa odays. Taani geyssi tuma gideyssa hinttee hintte huu7en pirdrite. <sup>16</sup> Nuuni Xoossa galatidi shaakettiya anjjo xuu7ay Kiristtoosa suuthaara issifetethi de7eyssa gidenneyye? Qassi nuuni bathiya uythay Kiristtoosa ashuwara issifetethi de7eyssa gidenneyye? <sup>17</sup> Nuuni daro gidikkoka uythay issino, nu he issi uythaa shaakettiya gisho issi asatethi.

<sup>18</sup> Ane Isra7eele asay oothidayssa akeekite. Yarshshettida yarshshuwa meyssatas yarshsho bessaara issifetethi baaweyye? <sup>19</sup> Taani ay gaanaw koyada gaynna? Eeqas yarshshettida kathay woykko eeqay pathiyabaa gidenna. <sup>20</sup> Entti yarshshay Xoossaas gidonnashin tuna ayyaanatassa. Hessa gisho, hinttew tuna ayyaanatara issifetethi daana mela koyikke. <sup>21</sup> Hintte Godaa xuu7appe uyshe, qassi tuna ayyaanata xuu7appe uyanaw dandda7ekketa. Godaa gaytappe mishe qassi tuna ayyaanata gaytappe maanaw dandda7ekketa. <sup>22</sup> Nu hessa oothidi Godaa yiloynoo? Nu iyappe aadhdhiya minoyye?

<sup>23</sup> Hintte, "Ubbabaa oothonna mela diggiyabay baawa" geeta, shin ubbay maaddenna. Hintte, "Ubbabaa oothonna mela diggiyabay baawa" geeta, shin ubbabay dichchenna.

<sup>24</sup> Issi issi asi, hara asi maaddiyabaa qoppanaw bessesippe attin bana maaddiyabaa xalaan qoppofo.

<sup>25</sup> Hintte kahaa sidhen gelssiya oysha denthonna giyan bayzettiya ashuwa coo miite.

<sup>26</sup> Ays giikko, "Sa7inne sa7an de7iya ubbay Godaassa."

<sup>27</sup> Issi ammanonna asi hinttene imatanaw koyidi xeegikko baanaw koykko biite. Hintte kahan medhettiya oyshan sidhonna hintte sinthe aathiyabaa ubbaa miite. <sup>28</sup> Shin issi asi, "Hayssi eeqas yarshshettidabaa" giikko, he hinttew odida addiya gishonne hintte kaha gisho he kathaah mooppite. <sup>29</sup> Taani, kaha gisho gey he hinttew odida uraa kaha guussufe attin hintte kaha gidenna.

Hara asa kaha gisho gada taani ta la77atethaa bolla ays pirddo? <sup>30</sup> Taani miya kathaah Xoossaas galatada miikko balidaada ays borettiyanä?

<sup>31</sup> Hiza, hintte ay miikko ay uyikko, woykko ay oothikokka ubbabaa Xoossaas bonchchos oothite.

<sup>32</sup> Ayhudeta gidin Giriketa gidin woykko Xoossaas woosa keethi gidin ooddeskka dhube gidoppite. <sup>33</sup> Taani ubba wode darota ashshanaw entti maaddettiya oge koyasisippe attin tana maaddiya oge koyikke.

## 11

<sup>1</sup> Taani Kiristtoosa leemisuwa kaalleyssada, hinttaka tana kaallite.

### Goyynno maara

<sup>2</sup> Hintte ubbabana tana qoppiya gishonne ta tamaarssida timirttiya minthidi naagida gisho ta hinttene galatays. <sup>3</sup> Shin Kiristtoosi adde ubbaas huu7e, addey maccasas huu7e, qassi Xoossay Kiristtoosas huu7e gideyssa hintte erana mela ta koyays. <sup>4</sup> Ba huu7iya guuluntidi Xoossaas woossiya woykko tinbbite odiya adde ubbay huu7e gidida Kiristtoosa toochchees. <sup>5</sup> Ba huu7iya qaconnna Xoossaas woossiya woykko tinbbite odiya maccasiya huu7e gidida ba azinna toochchawusu. Ba huu7iya qaconnna maccasiya ba huu7iya medettida maccasa mela.

<sup>6</sup> Maccasi ba huu7iya qaconnna ixxiko, ba huu7iya qanxxetto. Shin iw huu7iya qanxoy woykko meedoy borsso gidiikko ba huu7iya qaco. <sup>7</sup> Addey Xoossaas leemisonne Xoossaas bonchcho gidiya gisho ba huu7iya qachchanaw bessenna, shin maccasi addes bonchcho. <sup>8</sup> Maccasi addefe medhettasuppe attin addey maccasappe medhettibeenna. <sup>9</sup> Maccasi addes medhettisippe attin addey maccasas medhettibeenna. <sup>10</sup> Hayssa gishonne kiitanch-chota gisho maccasi baw maati de7eyssa bessiya malla ba huu7en qacanaw bessees.

<sup>11</sup> Shin Godaa qofan maccasi addey baynna deenna; addeyka maccasi baynna de7enna.

<sup>12</sup> Maccasi addefe medhettidayssada addeyka maccasappe yelettis. Shin ubbabaykka Xoossafe medhettis.

<sup>13</sup> Ane hintte pirdde. Maccasi ba huu7e qaonna Xoossaa woossanaw bessii? <sup>14</sup> Addey ba huu7iya dichchiko iyaw borssso gideyssa hari attoshin medhetethi hinttena tamaarssenne? <sup>15</sup> Shin maccasi ba huu7iya dichchiko iw bonchcho gidennee? Maccasas huu7ey imettiday iya bana kammana melassa. <sup>16</sup> Shin hayssa bolla palamanaw koyaa asi de7ikko, nuus gidin woykko Xoossa woosa keethatas gidin hayssafe hara wogi baawa.

*Godaa kahuwa ekkya maara*

(Maato 26:26-29; Mar 14:22-25; Luuqa 22:14-20)

<sup>17</sup> Hintte issife shiiqey go77as gidonnashin qohos gidiya gisho ha77i ta immiya kijtan hinttena nashshike. <sup>18</sup> Ta koyro si7iday, hintte woosa keethan shiiqiya wode hintte giddon shaahetethi de7eyssa. He ta si7idayssafe baggay tuma gideyssa ammanays. <sup>19</sup> Hintte giddofe tumi de7eyssati oonanteekko ertextana mela hintte giddon shaakoy daanayssi attenna. <sup>20</sup> Hintte issife shiiqiya wode hintte shiiqey Godaa kahuwa maanassa gidennee. <sup>21</sup> Hintte kathi miya wode issoy issuwa naagonna bayssa bayssa miya gisho issoy koshatees hankkoy qassi mathottees. <sup>22</sup> Tuma hintte maanawunne uyanaw hinttew keethi baawe? Woykko Xoossa woosa keethaa kadhetii? Aykkoy baynna manqota yeellayeetii? Ta hinttena woygo? Hayssas ta hinttena nashshoo? Nashshike.

<sup>23</sup> Taani hinttew immida timirrtti Godaappe ekkas. Godaa Yesuusi aadhdhidi imettiya gamman uythaa ekkidi, <sup>24</sup> Xoossaa galatis. Uythaa bathidi “He7ite; miite. Hayssi hinttew imettiya ta ashuwa. Hayssa mishe tana hassayite” yaagis. <sup>25</sup> Hessadakka, kahuwa midi simmin, xuu7aa ekkidi, “Hayssi xuu7ayta suuthan eqqiya oratha caaqua. Hintte iyappe uyaa wode ubban tana hassayite” yaagis. <sup>26</sup> Hintte ha uythaa miya wodenne ha xuu7aa uyaa wode ubban Goday yaana gakanan iya hayquwa odea.

<sup>27</sup> Hessa gisho, bessonaa ogiyan Godaa uythaa miya woykko Godaa xuu7aa uyaa oonikka iya ashuanne suuthaa toochchida gisho ba nagaran oyshetees. <sup>28</sup> Shin asi bana paacco. Yaatidi uythaa mo; xuu7appeka uyo. <sup>29</sup> Godaa ashuwabaa shaakki eronna, uythaa meynne xuu7appe uyey, ba bolla pirdda meesinne uyees. <sup>30</sup> Hessa gisho, hintte giddofe daroti daaburidosona; harggidosona; qassi unddenna asati hayqqidosona. <sup>31</sup> Shin nu nuna paaci be7idabaa gidiyakko, nu bolla pirddettanashin. <sup>32</sup> Alamey pirddettyi wode nu alamiyara pirddettonna mela ha77i Goday nuna seeres.

<sup>33</sup> Hessa gisho, ta ishato, Godaa kahuwa maanaw hintte shiiqiya wode issoy issuwa gathi ekkite. <sup>34</sup> Hintte shiiqoy pirddas gidonna mela koshattida oonikka de7ikko, ba son mo.

Attidabaa taani yaa bada hinttew odana.

## 12

*Geeshsha Ayyaana imotata*

<sup>1</sup> Ta ishato, Geeshsha Ayyaana imotatabaa hintte erana mela ta koyas. <sup>2</sup> Hintte Xoossaa ammanonna wode dooni baynna eeqatan gooshettidi, hintte eronna soo bi-dayssa ereeta. <sup>3</sup> Xoossaa Ayyaanay kaalethiya asi oonikka, “Yesuusi qanggetto” yaagenna. Qassi Geeshsha Ayyaanay kaalethonna de7ishin, oonikka, “Yesuusi Goda” gaanaw dandda7onayssa hintte erana mela koyays.

<sup>4</sup> Dumma dumma Ayyaana imotati de7oosona, shin imotata immiya Ayyaanay issuwa. <sup>5</sup> Nu Godaas oothiya dumma dumma oosoti de7oosona, shin Goday issuwa. <sup>6</sup> Nu Godaas oothiya dumma dumma ogeti de7oosona, shin he ogetan asa ubban oothiya Xoossay issuwa. <sup>7</sup> Shin issuwias issuwias imettida imotatan harata maaddana mela Geeshsha Ayyaanay qonccees.

<sup>8</sup> Geeshsha Ayyaanay issuwias cincatethi kumida qaala immees; qassi issuwias eratethi kumida qaala immees. <sup>9</sup> He Geeshsha Ayyaanay issuwias ammano, hankkuwas qassi pathiya wolqqaa immees. <sup>10</sup> Geeshsha Ayyaanay issuwias malaata oothiya wolqqaa, issuwias tinbbite odiya wolqqaa immees. Issuwias ayyaanappe ayyaana shaakki eriya wolqqaa, issuwias dumma dumma doonan odiya wolqqaa, qassi issuwias dumma dumma doonan odettidayssa birshhiya wolqqaa immees. <sup>11</sup> Shin ha ubbaa oothey he issi Geeshsha Ayyaanay. I koyaa mela issi issi asaas dumma dumma imota immees.

*Asatethaanne dumma dumma billiteta*

<sup>12</sup> Issi asatethan daro billiteti de7oosona, shin he dumma dumma billiteti issi asatethi gidoosona. Hessadakka, Kiristtoozi dumma dumma billiteti de7iya asatethaa mela.

<sup>13</sup> Nuuni Ayhude gidin Girike gidin aylle gidin womaano gidin, ubbay issi asatethi gidanaw Geeshsha Ayyaanay xammaqettida. Qassi nu ubbay issi Geeshsha Ayyaanay ekkida.

<sup>14</sup> Nu asatethan dumma dumma billiteti de7oosonappe attin issi billite gidennee. <sup>15</sup> Tohoy, “Taani kushe gidonna gisho billite gidikke” giikko, I hessa gida gisho billitetethay attiyye?

<sup>16</sup> Haythi, "Taani ayfe gidonna gisho billite gidikke" giikko, I hessa gida gisho asatethaafe issi billite gideyssi attiyye? <sup>17</sup> Asatetha ubbay ayfe xalaala gididaakko, nu aybin si7anee? Qassi asatethi ubbay haytha xalaala gididaakko nu aybin singganee?

<sup>18</sup> Shin Xoossay ba koyidayssada, asatethaa giddon dumma dumma billiteta wothis. <sup>19</sup> Ubbay issi billite gididaakko asatethi waanidi daanee? <sup>20</sup> Shin billiteta daro gidikkoka, asatethay isso.

<sup>21</sup> Ayfey kushekkko, "Ne taw koshshakka" gaanaw dandda7enna. Woykko huu7ey tohokko, "Ne taw koshshakka" gaanaw dandda7enna. <sup>22</sup> Shin daabura daaniya asatethaa billiteti nuus aadhdhidi koshshosona. <sup>23</sup> Bonchcho koshshenna gidi nu qoppiya nu billitetappe baggata daro bonchchoos. Qassi nu borssettiya nu asatethaa billiteti aathi bonchchidi naagoos. <sup>24</sup> Nu be7in borssonna asatethaa billitetas bonchcho koshshenna. Shin Xoossay nu asatethaa billiteti wolira gasethidi borssiya billitetas aadhdhiya bonchcho immis. <sup>25</sup> Asatethaa billiteti issoy issuwara shaako medhdhonna wolis qoppana mela oothidi medhdhis. <sup>26</sup> Asatethaa billitetappe issoy sakettiko billiteti ubbay iyara sakettoosona. Asatethaa billitetappe issoy bonchchetiko billiteti ubbay iyara ufayttoosona.

<sup>27</sup> Hintte ubbay Kiristtoosa asatethi; qassi hintte issoy issoy iya billiteta. <sup>28</sup> Woosa keethan Xoossay, koyro hawaareta, nam77antho nabeta, heedzanthro asttamaareta, kaallidi malaata ootheysata, patheyssata, harata maaddeyssata, woosa keetha ayseyssatanne, dumma dumma doonan haasayeysata wothis.

<sup>29</sup> Ubbay hawaare? Ubbay nabe? Ubbay asttamaare? Ubbay malaata oothi? <sup>30</sup> Ubbay pathiyye? Ubbay dumma dumma doonan odetti? Ubbay dumma dumma doonan odettoysa birshshi? <sup>31</sup> Shin ubbaafe aadhdhiya imotta minthidi koyite.

Qassi ubbaafe aadhdhiya ogiya ta hinttena bessana.

## 13

### Tuma siiqo

<sup>1</sup> Taani asa qaalanne kiitanchcho qaala odettanaw dandda7ikkoka, taw siiqoy dhayikko, coo giiriya daala mela. <sup>2</sup> Tinbbite odiya imoy taw de7ikkoka, xuura ubbaa erikkoka, eratethi ubbay de7ikkoka, qassi deriya denthidi harasoo efiya ammanoy taw de7ikkoka, siiqoy dhayikko, ta aykkoka gidikke. <sup>3</sup> Taw de7iyava ubbaa manqotas immikkoka, hari attoshin, tana tamas aatha immikkoka, siiqoy dhayikko tana aykkoka maaddenna.

<sup>4</sup> Siiqoy dandda7anchcho. Siiqoy keeha. Siiqoy qanaatenna. Siiqoy ceeqetenna. Siiqoy otoreenna. <sup>5</sup> Siiqoy bessonabaa oothenna. Siiqoy uuzettenna. Siiqoy yilotenna. Siiqoy ba qoho paydenna. <sup>6</sup> Siiqoy tuman ufayttesippe attin worddon ufayttena. <sup>7</sup> Siiqoy ubbaa dandda7ees; ubbaa ammanees; lo77obay hanana gidi, ufayssan naagees; ubbaa gencees.

<sup>8</sup> Siiqoy wursetti gakkana dwahyenna. Shin tinbbite attana; dumma dumma doonan odetteysi attana; eratethika aadhdhana. <sup>9</sup> Nu eratethaafe guuthi eroos; tinbbityappe bagga oodoos. <sup>10</sup> Shin polo gididayssi yaa wode polo gidonnayssi attana.

<sup>11</sup> Taani na7a de7iya wode na7ada haasays; na7ada qoppays; na7ada akeekays. Ta kahaamida wode na7atetha hanuwa aggas. <sup>12</sup> Ha77i poo7oy baynnason masttooten be7eyssada be7oos, shin he wode nu qonccen be7ana. Ha77i nu eratethaafe guutha eroos, shin he wode Xoossay nuna ereyssada polo erana.

<sup>13</sup> Hiza, ammanoy, ufayssinne siiqoy, ha heedzati eqqidi daana. Shin hayssatappe aadhdhey siiqo.

## 14

### Tinbbitenne dumma dumma doona

<sup>1</sup> Siiqo kaallite. Ayyaana imotata minthidi koyite; ubbaafe aathidi, tinbbite imotaa minthidi koyite. <sup>2</sup> Dumma dumma doonan odettiya asi Xoossaas odeeisppe attin asas odenna. Shin asas qoncciboonna xuuraa Ayyaana wolqqan odettiya gisho oonikka I odetteysa akeekenna. <sup>3</sup> Shin tinbbite odyeyssati ase dichchanaw, minthethanawunne minthanaw asas oodes. <sup>4</sup> Dumma dumma doonan odiya asi bana dichchees. Shin tinbbite odiya asi woosa keethaa dichchees.

<sup>5</sup> Hintte ubbay dumma dumma doonan odettiyako ta dosays, shin tinbbite odanayssa aathada dosays. Dumma dumma doonan odetteyssa woosa keethi dichchanaw birshshiya asi dhayikko, dumma dumma doona odetteyassafe tinbbite odyeyssi aadhdhees.

<sup>6</sup> Shin ta ishato, taani hintteko bada qonccethan woykko eratethan woykko tinbbite odon woykko timirtten gidonnashin dumma dumma doonan odettikko hinttena ay maaddanee?

<sup>7</sup> Dumma dumma yetha miishetas issi qommo girssi de7ikko, suusul77e girssinne diitha girssi waattidi shaakki erane? <sup>8</sup> Qassi moyze punoy geeyidi erettonna ixxiko olas giiggetey

oonee? <sup>9</sup> Hessadakka, dumma dumma doonan hintte odetteyssi qoncce gidonna ixxiko hintte odehyssa ooni eranee? Hessi carkkos odiya mela.

<sup>10</sup> Ha alamiyan daro doonati de7oosona; he ubbaas birshshethi de7ees. <sup>11</sup> Shin issi asi odettiya doona taani eronna ixxiko I taw imathe gidees; takka iyaw imathe giday.

<sup>12</sup> Hessadakka, Geeshsha Ayyaana imotaa hintte ekkanaw minthidi koykko, woosa keethi dichchanaw ubbaafe aadhdiya imotaa koyite.

<sup>13</sup> Dumma dumma doonan odettiya asi ba odaa birshshanaw birshshetha imotay imettana mela Xoossa wooso. <sup>14</sup> Taani dumma dumma doonan Xoossa woossiko, ta ayyaanay woosees, shin ta wozanay aykkoka go7ettenna. <sup>15</sup> Yaatin, ta ay oothanaw koshshii? Taani ta ayyaanay woossays; ta wozanankka woossays. Taani ta ayyaanay yexxays; ta wozanankka yexxays. <sup>16</sup> Hessa gidonna ixxiko neeni ne ayyaanay Xoossa galatiya wode he bessan neeni geysa eronna asi ne galateyssa woygidi, “Amin77i” gaanee? <sup>17</sup> Neeni Xoossa galateyssi lo77o, shin hara asi maaddenna.

<sup>18</sup> Ta hintte ubbaafe aathada dumma dumma doonan odettiya gisho Xoossa galatays.

<sup>19</sup> Shin taani woosa keethan harata tamaarssanaw dumma dumma doonan tammu mukulu qaala odettanaappe erettiya doonan ichchashu qaala odettanaw dosays.

<sup>20</sup> Ta ishato, hintte qofan naytada hanoppite. Hintte iitabaas naytada haniteppe attin hintte qofan kahaamataa gidite. <sup>21</sup> Goday, Geeshsha Maxaafan,

“Taani ha asaas,

dumma dumma doonan odettiya asaaninne  
imatha inxarssan odettiya asan odana.

Shin hessi haninika tana si7okkona” yaagees.

<sup>22</sup> Hiza, dumma dumma doonan haasayoy, ammanonna asaas malla gideesippe attin ammariyaa asaassa gidenna. Tinbbite ammariyaa asaas malla gideesippe attin ammanonna asaassa gidenna.

<sup>23</sup> Woosa keethaa asay issife shiiqiya wode ubbay dumma dumma doonan odettiko eronna woykko ammanonna asay hintte shiiquwa yidi, “Hayssati gooyosona” gokkon-ayye? <sup>24</sup> Shin eronna woykko ammanonna asay woosa keethi yaa wode asay tinbbite odishin, si7ikko ba nagaraa akeekana; qassi I si7ida qaalan pirdettana. <sup>25</sup> Entti iya wozanan geemmidha qofaa qonccisana. Hessadakka, “Tuma Xoossay hintte giddon de7ees” yaagidi markkattidi, gufanndi Xoossaas goynnana.

### *Goyynno maara*

<sup>26</sup> Ta ishato, nu woyginoo? Hintte issife shiiqiya wode issuwash mazmurey de7ees; issuwash tamaarssso imoti de7ees; issuwash qonccethi de7ees; issuwash dumma dumma doonan haasayoy de7ees; issuwash birshshetha imoti de7ees. He ubbay woosa keethi dichchiyabaa gidanaw bessees. <sup>27</sup> Dumma dumma doonan odettiya asati de7ikko, nam77a woykko darikko heedza gididi maaran maaran haasayanaw bessees. Entti odetteyssa hara asi birshsho. <sup>28</sup> Shin birshshiya asi dhayikko, dumma dumma doonan odetteyssi woosa keethan si77i go. Bawunne ba Xoossaas odo.

<sup>29</sup> Tinbbite odehyssati nam77a woykko heedza gididi odo. Qassi harati entti giyabaa pirddonna. <sup>30</sup> He shiiquwan de7iya hara asas issibay qoncciko kase odetteyssi si77i go.

<sup>31</sup> Ubbay tamaarana melanne ubbay minnana mela maaran maaran tinbbite odanaw dandda7eeta. <sup>32</sup> Nabeta ayyaanay nabetas kiitetees. <sup>33</sup> Geeshshata woosa keetha ubbay meezeetidayssada Xoossay sarotetha Xoossaafe attin cabbo Xoossi gidenna.

<sup>34</sup> Maccasi woosa keethan si77i go. Muse higgey geyssada entti haarettofe attin woosa keethan odanaw enttaw maati baawa. <sup>35</sup> Maccasi woosa keethan haasayoy borssso gidiya gisho issibaai eranaw koykko son bantta azinata oychchona.

<sup>36</sup> Xoossa qaala koyro hintte ehidetii? Woykko Xoossa qaalaay hintte xalaalakkoyidee? <sup>37</sup> Oonikkka bana nabe woykko bana Xoossa asi gidi qoppiko, taani hinttew xaafeyssi Godaa kiitta gideyssa akeeko. <sup>38</sup> Shin oonikkka akeekonna ixxiko ikka akeekettofo.

<sup>39</sup> Hessa gisho, ta ishato, tinbbite odanaw minthidi amottite; qassi dumma dumma doonan odetteyssaka diggofite. <sup>40</sup> Shin ubbayka woganinna maaran gido.

## 15

### *Kiristtoosa hayqoppe dendduwa*

<sup>1</sup> Ta ishato, ta hinttew markkattida Wonggelaa hintte ekidayssanne hintte ammanoy iyan eqqidayssaa hintte akeekana mela koyays. <sup>2</sup> Ta tamaarssida Wonggelaa minthidi oykkiko hintte iyan attana. Hessi hanonna ixxiko hintte ammanao hada gidana.

<sup>3</sup> Taani ekkida ubbaafe aadhdhiya kiitaa kasetada hinttew immas. Hessika, Geeshsha Maxaafay geysada, Kiristtoosi nu nagaraa gisho hayqqis. <sup>4</sup> Mogettis; Geeshsha Maxaafay geysada, heedzanthro gallasan hayqoppe denddis. <sup>5</sup> Phexiroosas qonccis. Hessafe guye, tammanne nam77u hawaaretas qonccis. <sup>6</sup> Hessafe guye, ichchashu xeetappe dariya asaas issi toho qonccis. Enttafe dariya baggay ha77i gakkanaw paxa de7oosona, shin guuthati hayqqidosona. <sup>7</sup> Hessafe guye, Yayqoobas qonccis; guyeppe ba hawaareta ubbaas qonccis.

<sup>8</sup> Qassi wurssethan awucaya mela gidida taw qonccis. <sup>9</sup> Taani Yesuusa hawaareta ubbaafe laafa. Taani Xoossa woosa keethaa goodida gisho Yesuusa hawaare geetettada xeegettanaw bessonayssa. <sup>10</sup> Shin Xoossa aadho keehatethan ta ha77i gididayssa gidas; I taw immida aadho keehatethay mela attibeenna. Taani hankko hawaaretappe aathada daaburas. Shin taara de7iya Xoossa aadho keehatethay oothisppe attin tana gidikke. <sup>11</sup> Hiza, tana gidin entti, nu ubbay tamaarsey hessa; hintteka he kiitaa ammanideta.

### *Haqoppe dendo*

<sup>12</sup> Kiristtoosi hayqoppe denddidayssa nu sabbakiya wode hinttete issoti issoti yaatin, woygidi, "Hayqoppe denddoy baawa" yaagonaa? <sup>13</sup> Hayqoppe denddoy baynnabaa gidikko Kiristtoosi hayqoppe denddibeeenna guussu. <sup>14</sup> Kiristtoosi hayqoppe denddi-boonnabaa gidikko nu timirtey qassi hintte ammanoykka hada. <sup>15</sup> Hayqoppe denddoy baynnashin, nuuni Xoossay, "Kiristtoosa hayqoppe denthis" yaagidi sabbakishe Xoossa worddanchcho markkatta gidida guussu. <sup>16</sup> Hayqqida asay hayqoppe denddiboonnabaa gidikko hiza, Kiristtoosi hayqoppe denddibeeenna. <sup>17</sup> Kiristtoosi hayqoppe denddonnabaa gidikko, hintte ammanoy hada; qassi hintte ha77i gakkanaw hintte nagaran de7eeta. <sup>18</sup> Hiza, Kiristtoosa ammanidi hayqqidayssatikka dhayidosona guussu. <sup>19</sup> Nuuni ha alamiya de7uwa xalaalas Kiristtoosan ufayssi oothidabaa gidikko, ha sa7an de7iya asa ubbaafe nubay aadhdhida yibbata.

<sup>20</sup> Shin Kiristtoosi hayqqidayssatas hayqoppe denddon bayra gididi tuma denddis. <sup>21</sup> Hayqoy issi asa baggara ha alamiya yidayssada hayqoppe denddoy issi asa baggara yis. <sup>22</sup> Addaame baggara asa ubbay hayqqidayssada Kiristtoosa baggara asa ubbay de7on daana. <sup>23</sup> Shin issyo issyo ba maaran maaran denddana. Kiristtoosi ubbaafe kasetidi denddis; hessafe guye, Kiristtoosayssati I yaa wode denddana.

<sup>24</sup> Hessafe guye, Kiristtoosi haareyssa, maatanne wolqqa ubbaa dhayssidi, kawotethaa Xoossa Aawas immiya wode wodiya wurssethay yaana. <sup>25</sup> Xoossay iya morkketa ubbaa iya tohuwapple garssan wothona gakkanaw Kiristtoosi haaranaw bessees. <sup>26</sup> Wurssethan I dhayssanaw de7iya morkkey haygo. <sup>27</sup> Geeshsha Maxaafan, "Xoossay ubbabaa iya maatappe garssan haaris" geetettidi xaafettis. Shin ubbabaa iya maatappe garssan haaris geyssi, ubbabaa iya maatappe garssan haarisida Xoossa gujenna. <sup>28</sup> Ubbaboy Kiristtoosa maatappe garssan haarettidaappe guye Kiristtoosi qassi ba huu7en ubbabaa baw haarisida Xoossaas haarettana. He wode Xoossay ba xalaala ubbaa haaranana.

<sup>29</sup> Hayqqidayssati denddonabaa gidikko entta gisho asaas aybi wodhey de7ii? Hayqqidayssati denddonabaa gidikko yaatin, ays, asay hayqqidayssata gisho xammaqettoona?

<sup>30</sup> Yaatin, nuuni ays ubba wode nunatethaa metos aathi immoona? <sup>31</sup> Ta ishato, ta gallas gallas hayqos aadhdhada imettays. Hessika, Godaa Kiristtoos Yesusan de7iya de7uwa issifetethan hinttenan ceeqqiya gishossa. <sup>32</sup> Asa qofatho gidikko, taani Efesoonan do7ara butetidayssi tana ay maaddii? Hayqqidayssati hayqoppe denddonabaa gidikko, "Wontto nu hayqqiya gisho hachchi maana uyana" yaagiya asaa mela gidoos.

<sup>33</sup> Cimettofite! Iita laggetethi lo77o amaliya iissees. <sup>34</sup> Hintte akeekaakkko simmrite. Nagara oothofite. Hinttete issi issi asay Xoossa erokkonna. Taani hinttena yeellayanaw hessa gays.

### *Denddo asatethi*

<sup>35</sup> Issi asi, "Hayqqida asay waanidi denddanee? Entti ay mela asatethaara yaane?" yaagonna aggenna. <sup>36</sup> Neno eeyaw, neeni biittan zeriya zerethay hayqqonna dolenna. <sup>37</sup> Neeni zerey gisitte gidin woykko hara katha qommo ayfe xalaala zerasaappe attin dolida dolaa gidenna. <sup>38</sup> Shin Xoossay zerethaa ba dosida mela medhetethi immees. Dumma dumma zerethaa dumma dumma asatethi immees. <sup>39</sup> Medhetetha ubbaa ashoy isso gidenna. Shin asa ashoy issuwa; mehe ashoy dumma; kafota ashoy dumma; qassi molo ashoy dumma.

<sup>40</sup> Salo asatethi de7ees; qassi sa7a asatethi de7ees. Shin salo asatetha bonchchoy dumma; qassi sa7a asatetha bonchchoy dumma. <sup>41</sup> Awa bonchchoy dumma; ageena

bonchchoy dumma; xoolinttota bonchchoy dumma; issi xoolinttoto hankko xoolintuwafe bonchchon dummatees.

<sup>42</sup> Hayqqidayssati hayqoppe denddiya wode hessada hanana. Hayqqiya asatethay zerettes; hayqqonna asatethi gididi denddees. <sup>43</sup> Tooshen zerettidi, bonchchon denddana; daaburan zerettidi, wolqqan denddana. <sup>44</sup> Medhetetha asatethay zerettidi, ayyaana asatethi gididi denddana. Medheta asatethi de7ikko, ayyaana asatethi\* de7ees.

<sup>45</sup> Hessadakka, Geeshsha Maxaafan, "Koyro addey, Addaamey, paxa de7iya ase gididi medhettis" yaagees. Shin wursettha Addaamey, Kiristtoosi, de7o immiya ayyaanaa gidis. <sup>46</sup> Shin medheta asi koyro yin, guyeppe ayyaana asi yisippe attin ayyaana asi koyro yibeenna. <sup>47</sup> Koyro Addaamey biittafe medhettida biitta as; nam77antho Addaamey saloppe yida salo asi. <sup>48</sup> Biittafe medhettidayssati biittafe medhettidayssa daanosona. Saloyssati saloppe yidayssa daanosona. <sup>49</sup> Nuuni biittafe medhettida addiya daaneyssa mela saloppe yida addiya daanana.

<sup>50</sup> Ta ishato, ta geyssi hessa; ha77i nu ma77ida asatethay Xoossaa kawotethaa laattanaw dandda7enna. Wooqiya asatethay wooqonna asatethaa laattenna.

<sup>51</sup> Ta hinttew issi xuura odana. Nu ubbay hayqqoko, shin wursethan ubbay laamettana. <sup>52</sup> Moyzey punettiya wode ayfey qiphi xeellanaw hassayonna laamettana. Hayqqida asay wooqonna asi gididi denddana; nukka laamettana. <sup>53</sup> Hayssi wooqeyssi wooqonnayssa, hayssi hayqqeyssi hayqqonnayssa ma77anaw bessees.

<sup>54</sup> Hayssi wooqeyssi wooqonnayssa, qassi hayssi hayqqeyssi hayqqonnayssa ma77iya wode Geeshsha Maxaafan, "Hayqoy xoonon mittis" giya qaalay polettana.

<sup>55</sup> Hessadakka,

"Hayqo, ne xoonoy awun de7ii?

Hayqo, ne qohiya wolqqay awun de7ii?"

gida qaalay polettana. <sup>56</sup> Hayqoy dukkiya wolqqay nagara; qassi nagara wolqqay higge.

<sup>57</sup> Shin nu Godaa Yesuus Kiristtoosa baggara nuus xoono immiya Xoossaa galati gakko.

<sup>58</sup> Hessa gisho, ta siiqo ishato, qaaxxonna minnidi eqqite. Godaa oosuwan hintte daabureyssi coo gidonnayssa eridi ubba wode Godaa oosuwa azallonna oothite.

## 16

### *Ammaniya Asaas shiūqida maaduwa*

<sup>1</sup> Ammaniya asaas miishe shiishobaa Galaatiya woosa keethatas taani kiittidayssada hintte oothite. <sup>2</sup> Miishiya shiishoy ta hintteko biya wode gidonna mela issoy issoy saaminttafe koyro gallas, woggia wode ba demmeysafe kessidi ba son dagayo. <sup>3</sup> Taani yaa bida wode miishiya Yerusalemme gathana mela hintte dooriya asaas dabddaabbe immada entta Yerusalemme kiittana. <sup>4</sup> Enttara ta buussay koshshiyabaa gidikko entti taara baanaw dandda7osona.

### *Phawuloosa qofaa*

<sup>5</sup> Taani Maqedoonyara aadhdhanaw qoppida gisho yaa bada hintteko yaana. <sup>6</sup> Ta biyaso aw gidikkoka, ta buussan hintte tana maaddana mela hintte matan guutha wode gam77onna aggike. Balggo ageenata hintte matan aathonna waaya aggana. <sup>7</sup> Taani ogera aadhdhashe hinttena be7anaw koyikke. Goday giikko, hintte matan guutha wode takkanaw qoppays.

<sup>8</sup> Shin taani Phenxeqosxe Baaley gakkanaaw Efesoonaan gam77ana. <sup>9</sup> Taw oosoy kumida dalgga penggey dooyettis, shin daro ejettya morkketi de7osona.

<sup>10</sup> I ta mela Godaa ooso oothiya asi gidiya gisho Ximotiyooси hintteko biikko, hintte matan I hirggonna daana mela oothite. <sup>11</sup> Oonikka iya kadhoppo. I taakko saro simmana mela iya maaddidi moyzite. Taani I hankko ammaneyssatara simmanayssa naagays.

<sup>12</sup> Nu ishaa Aphiloosi hankko ammaneyssatara hintteko baana mela ta iya mintha woossas. Ha77i hintteko baanaw koyibeenna, shin iyaw injjetiya wode hintteko baana.

### *Wurssetha zorenne saro tho*

<sup>13</sup> Barkkite; Ammanon eqqite; xaalite; minnite. <sup>14</sup> Ooso ubbaa siiqon oothite.

<sup>15</sup> Ta ishato, Isxifaanoseynne iya soo asay Akkayan entti koyro ammanidayssata gideyssanne ammaneyssata maaddanaw banttana aathi immidayssa hintte ereeta.

<sup>16</sup> Hintteko entta mela asaasinne, enttara ooson daaburiya ubbaas kiitettana mela ta hinttena woossays.

\* **15:44** Ayyaana asatethi: Geeshsha Ayyaanay haarida woykko Geeshsha Ayyaanay de7o immida asatethi guussu.

**15:45** Medhe 2:7    **15:52** 1Tese 4:15-17    **15:54** Isa 25:8    **15:55** Hose 13:14    **16:1** Roome 15:25-26    **16:5**

Ha.O 19:21    **16:9** Leewe 23:15-21; Zaare 16:9-11; Ha.O 19:8-10    **16:10** 1Qoro 4:17    **16:15** 1Qoro 1:16

<sup>17</sup> Isxifaanosey, Forchchunaasinne Akkayqoosi taakko yidayssi tana ufayssis. Hintte baynna bessan entti hinttena gididi ta pacaa kunthidosona. <sup>18</sup> Entti hinttena ufayssi-dayssada tanakka ufayssidosona. Hessa mela asata dogoppite.

<sup>19</sup> Iisiya woosa keetha asay hinttena saro goosona. Aqilinne Phirisqila bantta son shiiqiya woosa keethaaasaara issife hinttena Godaa sunthan wozanappe sarothoosona. <sup>20</sup> Ammaniya ishati ubbay hinttena saro yaagosona.

Geeshsha yeeretethi yeerettishe issoy issuwa sarothite. <sup>21</sup> Taani, Phawuloosi, ha sarothuwa ta kushen xaafas.

<sup>22</sup> Godaa dosonna asi de7ikko, qanggettidayssa gido. Nu Godaw, haaya!

<sup>23</sup> Godaa Yesuus Kiristtoosa aadho keehatethay hinttera gido.

<sup>24</sup> Ta siiqoy Kiristtoos Yesusan de7iya hintte ubbaara gido. Amin77i.

## Phawuloosi Qorontoosa Asaas

### Xaafida Nam77antho Kiitaa Gaatha Qofaa

Phawuloosi Qorontoosa asaas xaafida nam77antho kiitay xaafettiday, iyaw Qorontoosa woosa keethaara de7iya gahetethay daro meto giddo gelidi de7iya wodena. Issi issi woosa keetha asati Phawuloosa iita bore borikkoka Phawuloosi siga medhdhanaw iyaw amoy de7eyssa bessis. Hessi haniya wode gita ufayssaa ufayttanaw dandda7eyssa qonccisees.

Phawuloosi ba kitan koyro kifiliyan, Qorontoosa woosa keethaara iyaw de7iya ga-hetethaa qonccisidi, woosa keethan medhettida boriyasinne ixuwash ays mino zaaro immidaakko odees. Hessara gathidi iya seeray entta nagaraappe zaaridi sigan gathida gisho I ufayttida ufayssaa enttaw qonccisees. Kaallidikka, Yihudan de7iya ammanniyaa asaa maaddanaw bantaw de7iyabaappe coo immana mela hassaysees. Wurssetha shemppotan Phawuloosi ba hawaaretethaa bolla denddida mootuwash zaaro immees. Gaasokyka, Qorontoosa woosa keethan de7iya issi issi asati bantana, "Tuma hawaare" oothidi, "Phawuloosa worddanchcho hawaare" oothidi mootosona.

#### **2 Qorontoosa kiita ayfe qofata**

Gelo qofaa 1:1-11

Phawuloosanne Qorontoosa woosa keetha 1:12-7:16

Yihudan de7iya ammanniyaa asaa maade 8:1-9:15

Phawuloosi ba hawaaretethaa maatas immida zaaro 10:1-13:10

Kuushsha qofaa 13:11-14

<sup>1</sup> Xoossaa shenen Yesuus Kiristtoosa hawaare gidida Phawuloosinne, nu ishaa Ximotiy-ooosi.

Qorontoosan de7iya Xoossaa woosa keethaasinne Akkaya biittan de7iya Xoossaa asa ubbaas xaafida kiitaa.

<sup>2</sup> Xoossaa nu Aawappenne Godaa Yesuus Kiristtoosappe, aadho keehatethaynne sarotethay hinttew gido.

#### *Phawuloosi Xoossaa galatees*

<sup>3</sup> Maaratetha Aawas, ubba wode nuna minthethiya Xoossaas, nu Godaa Yesuus Kiristtoosa Aawas galati gido. <sup>4</sup> Xoossay nuus immida minthethuwan, meton de7eyssata nu minthethana mela Xoossay nuna nu meto ubban minthethes. <sup>5</sup> Nuuni Kiristtoosa daro waaya shaakettidayssata qassi nuuni iya daro minthethuwan minnana. <sup>6</sup> Nuuni waayet-tiko hessi hinttene minthethanaassanne hinttena ashshanaassa. Qassi nuuni minettiko nuuni genccida waaya mela hinttaka genccidi, Xoossay hinttew immiya minthethuwan minnana. <sup>7</sup> Hintte nu ekkida metuwa mela ekkidi, nu minthethuwan shaakettanayssa nu eriya gisho nu ufayssay hinttenan mino.

<sup>8</sup> Nu ishato, Iisiya biittan nuna gakkida metuwa hintte erana mela koyoos. He nuna gakkida metoy nu wolqqaafe darin, hayqqonna attoko gidi ufayssi qanxidashin. <sup>9</sup> Nuuni nu bolla hayqo pirddi pirddetida mela qoppida. Shin nuuni nu huu7en gidonnashin, hayqqidayssata denthiya Xoossan ammanettana mela hessi hanis. <sup>10</sup> Xoossay hessa mela iita hayqoppe nuna ashshis; ha77ika ashshana; sinthafekka I nuna ashshana gidi iyan ufayssi woothos. <sup>11</sup> Woosoan nuna maaddite. Daro woosa gaason Xoossaa maaduwa nu demmiya wode daro asay nu gisho Xoossaa galatoosona.

#### *Phawuloosi baanaw qoppida qofaa laammis*

<sup>12</sup> Nuuni nu geeshsha kahan ceeqettoos. Nuuni ha alamiyan de7ida de7uwan ubbarakka nu de7ida de7uwan tumatethaninne suuretethan hinttrea de7ida. Hessika, ha alamiya cincatethan gidonnashin Xoossaa aadho keehatethanaa. <sup>13</sup> Nu hinttew xaafida dabdaabbey hintte nabbabanawunne akeekanaw dandda7iyabaappe attin haraa giden. Hintte iya akeekanaw dandda7eyssa ta ammanays. <sup>14</sup> Ha77i hintte nuna hanida keena ereeta, shin sinthafe kumethi eranayssa ta ammanettays. Nu Godaa Yesuusi simmiya wode nuuni hinttenan ceeqettidayssada hinttete nuan ceeqettana.

<sup>15</sup> Hessi taani loytha erida gisho hintte nam77antho go7ettana mela kasetada hintteko baanaw qofa qachhas. <sup>16</sup> Taani Maqedooniya bashenne yaappe simmashe hinttene be7ana. Taani yaappe Yihuda biya wode hintte tana ta ogiyan maaddana gada qoppas.

<sup>17</sup>Taani hessa gashe ay oothanaw bessiyako eronna asi daanaynaa? Woykko taani ta qofaa qachchiya wode asa qofada, issi toho "Ee" qassi issi toho "Akkay" giya asa meleyye?

<sup>18</sup>Shin Xoossay ammanetteyssa gidiya gisho nu hinttew odiya qaalay "Ee" woykko "Akkay" geyssa gidenna. <sup>19</sup>Taani, Sillaaseynne Ximotiyooси hinttew markkattida Xoossa Na7ay, Yesuus Kiristtoosi ubba wode "Eeppe" attin "Ee" nne "Akkay" gidenna. <sup>20</sup>Xoossay immaa gida ubbay Kiristtoosa baggara "Ee" gidees. Nuuni Kiristtoosa baggara Xoossa bonchchoos, "Amin77i" gey hessa gishossa. <sup>21</sup>Nunne hintte Kiristtoosan minnidi eqjana mela oothidaynne ba oosuwash dooriday Xoossa. <sup>22</sup>Nuuni iyabaa gideyssaa erisanaw ba maatamiya nu bolla wothis; qassi ba Geeshsha Ayyaana oythi oothidi nu wozanan wothis.

<sup>23</sup>Taani Qorontoosa boonna aggiday hintte azanonna attana melassa; hessi worddo gidikko Xoossay ta shemppuwa taappe ekko. <sup>24</sup>Hinttee, hintte ammanuwan minnidi de7iya gisho nu hinttena ufayssanaw hintteria issife ootheyssatappé attin hinttena wolqqan ammantheyssata gidokko.

## 2

<sup>1</sup>Taani nam77antho hintteko biikkie gada qofa qachchiday hinttena azzanthonna aganaassa. <sup>2</sup>Taani hinttena azzanthikkoka ta azzanthida hinttfe hari tana ufayssanaw de7ey oonee? <sup>3</sup>Taani hinttew he dabddaaabbiya xaafiday, ta hinttena be7anaw biya wode tana ufayssanaw bessiya asan ta azzananaw koyonna gishossa. Ta ufayttiya wode hintte ubbayka ufayttanayssa ta ammanays. <sup>4</sup>Taani daro waayeninne un77an qassi daro afuthan xaafiday, hinttena azzanthanaassa gidonnashin taani hinttena ubbaa ay mela dosiyakko hinttena erisana melassa.

### *Qohidayssa maarobaa*

<sup>5</sup>Ase azzanthida oonikka de7ikko ta iya balaa darssanaw koyikkefe attin tana gi-donnashin hinttfe darota azzanthis. <sup>6</sup>Hinttfe dariya asay he uraa seerida seeray iyaw gidana. <sup>7</sup>Hessa gisho, he uray daro azzanidi, ufayssi qanxonna mela hintte iya maaranawunne minthethanaw bessees. <sup>8</sup>Hintte iya siiqeyssa zaari iyaw qonccisana mela ta hinttena woossays. <sup>9</sup>Ta he dabddaaabbiya hinttew xaafiday, hintte paacettidi, ubbaban taw kiiletteyssa eranaw koyida gishossa. <sup>10</sup>Hintte maariya uraa takka maaranra. Taani maaranabay aybi de7ikkoka, Kiristtoosa sinthan hintte gisho gada maaras. <sup>11</sup>Taani hessa oothiday Xalahiya cimo oosuwa nu eriya gisho xalahan cimettonna attana melassa.

### *Xiro7aadan Phawuloosa un77etethaa*

<sup>12</sup>Taani Kiristtoosa Wongelaa sabbakanaw Xiro7aada bida wode Goday yan taw ooso oge giigisidi wothis. <sup>13</sup>Shin taani ta ishaa Tito yan demmaboonna gisho ta wozanay shemppibeenna. Hessa gisho, yan de7iya asaa sarothada iya koyanaw Maqedooniya bas.

<sup>14</sup>Shin Kiristtoosa baggara ubba wode nuna xoonon kaalethiyanne shitto mela sawiya Kiristtoosabaa nu eriya timirttiya ubba bessi gathana mela oothiya Xoossa galati gakkoo. <sup>15</sup>Nuuni attiyyaa asaa giddoninnee dhayaa asaa giddon Kiristtoosa baggara Xoossaas imetti-ta sawiya shitto mela. <sup>16</sup>Dhayaa asaas hayqqoko efiya hayqo peeno; qassi attiyyaa asaas de7okko efiya de7o sawo; yaatin, hessa mela oosuwash gidanay oonee? <sup>17</sup>Nuuni Xoossaas qaala wodhe demmanaw koyidi walakkidi zal77iya daro asaa mela gidokko. Shin Xoossay kiittida suure asata mela Kiristtoosan de7idi Xoossa sinthan qaala odoos.

## 3

### *Ooratha caaqua oosanchchota*

<sup>1</sup>Nuuni zaaridi nuna sabbinooyye? Woykko hara asada, saba dabddaaabbiya hinttew yeddanaw woykko hinttfe ekkaw nuna koshshiyye? <sup>2</sup>Asi ubbay hinttena erana melanne nabbabana mela hintte nu wozanan xaafettidi de7iya nu dabddaaabbe. <sup>3</sup>Hintte qalamen gidonnashin de7o Xoossa Ayyaan, shuchcha bolla gidonnashin asa wozanan xaafettidayssatanne nunan haggazettida Kiristtoosa dabddaaabbe gideyssaa bessideta.

<sup>4</sup>Nu hessa giday, Kiristtoosa baggara Xoossaam mannoy nuus de7iya gishossa. <sup>5</sup>Nu hessa oothanaw dandda7iday Xoossa wolqqaanappe attin nuuni nu wolqqan aykkoka oothanaw dandda7okko. <sup>6</sup>Nu ooratha caaqua oosanchchota gidana mela Xoossay nuna dandda7isis. He ooratha caaqoy Geeshsha Ayyaan benttidayssafe attin xaafettida higgen gidenna. Higgey wodhees, shin Geeshsha Ayyaan de7o immees.

<sup>7</sup>Shuchcha bolla xaafettida higgey imettiya wode Xoossaan bonchchoy qonccis. Muse som77uwan de7iya bonchchoy dhayishe biyabaa gidikkoka, Isra7eele asay iya som77uwa tishshi oothidi xeellanaw dandda7ibookkona. Hiza, hayqo ehiya higgey hessa mela

bonchchon qoncciko,<sup>8</sup> yaatin, Geeshsha Ayyaanee oosettiya oosuwa bonchchoy waanidi aadhdhenee?<sup>9</sup> Asa bolla pirdda ehiya higgey bonchcho gidikko yaatin, ase xillisiya ooratha ogey waanidi aadhdhidi bonchchettenne?<sup>10</sup> Kase bonchcho gidiayssa ha77i aadhdhiya bonchchoy de7eyssara gathi be7iya wode bonchchoy baynnabaa gidis.<sup>11</sup> Guutha wodes qonccidi guyeppe dhaydayssi hayssada bonchchetiko, merinaw de7eyssi waanidi aadhdhidi bonchchettenne?

<sup>12</sup> Nuus hayssa mela ufayssay de7iya gisho yeellatonna odettoos. <sup>13</sup> Nuuni, Isra7eele asay dhayishe biya bonchchuwa wurssethaa be7onna mela ba som77uwa kammida Muse mela gidokko. <sup>14</sup> Shin entta wozanay doccis. Hachchi gakkanaw entti gal77a caaqua nabbabiya wode entta wozanay he kaman kameti de7ees. He kamay Kiristtoosa xalaalan qaarettees. <sup>15</sup> Shin hachchi gakkanawukka entti Muse maxaafaa nabbabiya wode ubban he kamay entta wozanaa kammees. <sup>16</sup> Shin oonikka Godaakkoo simmiya wode awudekka he kamay qaarettees. <sup>17</sup> Goday Ayyaana; Godaa Ayyaanay de7iya bessan la77atethi de7ees. <sup>18</sup> Nuuni ubbay kametibonna som77on Godaa bonchchuwa be7ana.\* Nuuni Ayyaana gidida Godaa malaa daananaw bonchchofe bonchchon laamettana.

## 4

### Tuma hawaaretetha oosuwa

<sup>1</sup> Hiza, Xoossay ba maaratethan ha oosuwa nuus immida gisho nuuni ufayssi qanxoko. <sup>2</sup> Nuuni yeellaya geema ooso ubbaa aggida; gene ooso oothoko; Xoossa qaala worddora walakkoko. Tumaa qonccen haasayishe, asa ubbaa kahay nuna ekkana mela Xoossa sinthan nuna shiishhoos.

<sup>3</sup> Nu odiya Wonggelay geemmidabaa gidikkoka, geemmiday dhayo ogen de7iya asaassa. <sup>4</sup> Ha alamiya haariya xoossay ammanonna asaa wozanaa goozis. Entti Xoossa malan qonccida Kiristtoosa bonchcho Wonggelaa poo7uwa be7onna mela diggis. <sup>5</sup> Nuuni, Yesuus Kiristtoosi Goda gideyssanne nu iya gisho hintte oosanchcho gideyssa odoosippe attin nubaa odokko. <sup>6</sup> "Dhuman poo7oy poo7o" gida Xoossay, Kiristtoosa som77uwan poo7iya Xoossa bonchchuwa eraa poo7uwa immanaw ba poo7uwa nu wozanan poo7isis.

<sup>7</sup> Shin ubbaafe aadhdhiya wolqqay nubaa gidonnashin Xoossabaa gideyssa bessanaw ha bonchcho shaloy meqqa miishe\* gidida nu asatethan de7ees.

<sup>8</sup> Nu ubba baggarakka waayettida, shin megerettibookko. Nuus haddirssi gidis, shin ufayssi qanxibookko. <sup>9</sup> Nu, morkketan goodettida, shin lagge dhayibookko. Nu morkketan shocettidi kundidda, shin dhayibookko. <sup>10</sup> Yesuusa de7oy nu asatethan qonccana mela iya hayquwa ubba wode nu asatethan tookkidi yuuyooos. <sup>11</sup> Yesuusa de7oy hayqqiya nu asatethan qonccana mela paxa de7iya nuuni iya gisho ubba wode hayqos aadhdhidi imettoos. <sup>12</sup> Hiza, hayqoy nunan oothiya wode de7oy hinttenan oothees.

<sup>13</sup> Geeshsha Maxaafan, "Ta ammanas; hessa gisho haasayas" yaagettis. Hessa mela ammanoy nuus de7iya gisho haasayos. <sup>14</sup> Godaa Yesuusa hayqoppe denthida Xoossay, nunakka Yesuusara hayqoppe denthanayssanne hinttera issife ba sinthe shiishanayssa eroos. <sup>15</sup> Hessi ubbay haniday hintte gishossa. Xoossa aadho keehatethay daro asaa gakkiya wode asay Xoossa bonchchuwas daro galataa immana.

### Ammanon de7o

<sup>16</sup> Hessa gisho, nuuni ufayssi qanxoko. Nu benttiya asatethay daaburishe biyabaa gidikkoka, nu ayyaana asatethay gallas gallas ooraxees. <sup>17</sup> Ha77is nuuni waayettiya ha kawushsha waayey, ubbaafe keehi gitatiya merinaa bonchchuwa nuus immisana. <sup>18</sup> Nuuni benttiyabaa gidonnashin benttonnabaa xellos. Benttiyabay ha77issa, shin benttonnabay merinaassa.

## 5

<sup>1</sup> Ha77i nu de7iya dunkkaane daaniya ha sa7a asatethay laalettikokka, asi keexiboonna, Xoossay keexida merinaa keethay nuus salon de7eyssa eroos. <sup>2</sup> Salo asatethaa ma77anaw amottishe ha77i ha sa7an de7ishe oolos. <sup>3</sup> Nuuni hessa ma77iya wode kallottoko. <sup>4</sup> Dunkkaane daaniya ha sa7a asatethan nu de7ishe deexettidi oolos. Hayqqiya nu asatethay de7on laamettana mela salo asatethaa ma77anaw koyoosippe attin ashuwappe shaakettanaw koyidi gidenna. <sup>5</sup> Nuna hayssas giigisiday Xoossa. Qassi sinthafe yaanabaas oythi oothidi ba Ayyaana nuus immis.

<sup>6</sup> Hessa gisho, nuuni ha sa7a asatethan de7iya wode ubban Godaappe haakkidi de7eyssa erikkoka ubba wode ammanettidi de7oos. <sup>7</sup> Nuuni de7ey ammanonnappe attin be7iyaban gidenna. <sup>8</sup> Nu ha sa7a asatethaafe shaakettidi, nu soo bidi Godaara issife daanaw amottiya gisho ammanettidi de7oos. <sup>9</sup> Hessa gisho, nu ha asatethan de7in woykko ha asatethaafe shaakettin, nu amoy iya ufayssanayssa. <sup>10</sup> Nuuni issoy issoy ha sa7an de7ishe lo77o gidin woykko iita gidin, oothida oosuwash bessiya pirddaa ekkanaw Kiristtoosa pirdda araata sinthan shiiqana.

### Ase Xoossaara sigetho

<sup>11</sup> Hiza, nuuni Godaa bonchcheysi ay guussekko eriya gisho asay nu odehyssa ekkana mela zoroos. Xoossay, nuuni ooneekko nuna erees; qassi hintteka hintte kahan nu ooneekko ereeta yaagada qoppays. <sup>12</sup> Wozanan gidonnashin malan ceeqettiya asaa doona oythanaw hintte nunan ceeqettana mela hinttew gaaso gidanaw koyoosippe attin nu nuna zaaridi nashshanaw koyokko. <sup>13</sup> Nu gooshshi gidikko Xoossaar bonchchossa; wozanaama gidikko hinttessa. <sup>14</sup> Issoy ubbaas hayqqidayssanne ubbay qassi iyara hayqqidayssa nu eriya gisho Kiristtoosa siiqoy nuna haarees. <sup>15</sup> De7on de7eyssati hizappe guye banntaw gidonnashin enttaw hayqqidayssasinne hayqoppe dendddidayssas daana mela Kiristtoosi asa ubbaa gisho hayqqis.

<sup>16</sup> Hizappe guye, nuuni oonakka asa qofan pirddoko. Hayssafe kase nuuni Kiristtoosakka asa qofan pirddidabaa gidikkoka, hizappe hessada pirddoko. <sup>17</sup> Hessa gisho, oonikka Kiristtoosan de7ikko ooratha medhetethi; gal77a medhetethay aadhdhis; ubbayka oorathi gidis. <sup>18</sup> Hessa ubbaa Xoossay oothis. I Kiristtoosa baggara nuna baara sigethis. Qassi harata baara sigethana mela nuus sigetho ooso immis. <sup>19</sup> Xoossay Kiristtoosa baggara asa ubbaa baara sigethees. Entta nagaraa taybibeenna; qassi asaa baara sigethiya qaala nuus immis.

<sup>20</sup> Xoossay asaa nu baggara xeegiya gisho nu Kiristtoosan kiiettidi asaa Xoossaara sigettite gidi Kiristtoosa gisho woosso. <sup>21</sup> Nuuni Xoossa xillotethaa Kiristtoosa baggara ekkana mela, nagara eronna Kiristtoosa nu gisho nagaranchcho asada oothis.\*

## 6

<sup>1</sup> Nuuni Xoossaara issife oothiya asi gideyssada, hintte ekkida aadho keehatethaa hada oothonna mela nu hinttena woosso. <sup>2</sup> Xoossay,

“Ta nena si7ana woden si7as;

atotetha gallasan nena maaddas”

yaagees. Hekko, ta si7iya wodey ha77i; atotetha gallasay hachchi.

<sup>3</sup> Oonikka nu oosuwa borana melanne nunan dhubbettana mela koyokko. <sup>4</sup> Gidoshin, nu tuma Xoossaas oosanchchota gideyssa nu oothiya ubbabaa bessida. Daro gencan, waayen, meton, un77an, <sup>5</sup> garaafetethan, qashon, ixon kumida wocaman, daaburan, dhiskko dhayon, xooman, <sup>6</sup> geeshshatethan, eratethan, dandda7an, keehatethan, Geeshsha Ayyaan, tuma siiqon, <sup>7</sup> tumaa haasayaninne Xoossaar wolqqan nuuni iya oosanchchota gideyssa bessida. Qassi xillotethay nuus tooranne gonddale. <sup>8</sup> Nuuni bonchchettidanne tooshettida; cayettidanne galatettida. Tumaa haasayos, shin asay nuna worddanchcho gidosona. <sup>9</sup> Nu asan erettida asi, shin eretttonna asa mela gidida. Hayqqidosona yaagettida, shin paxa de7oos; shocettida, shin hayqqibookko. <sup>10</sup> Nuuni azzanikkoka ubba wode ufayttoo. Nu manqo daanos, shin daro asaa dureyeos. Qassi aykkoyka baynna asi daanos, shin ubbay nubaa.

<sup>11</sup> Qorontoosa asaw, nu hinttew qoncenn odida; nu uluwaa hinttena bessida. <sup>12</sup> Hintte nuna hintte siiquwa bessonna diggidetappe attin nu nu siiquwa hinttena diggibookko.

<sup>13</sup> Aawu ba naytas odehyssada ta hinttew odays; nu hinttena nu uluwaa bessidayssada, hintteka hintte uluwaa nuna bessite.

### Ammanonna asaara de7iya issifetethaa ago

<sup>14</sup> Ammanonna asaara bessonna ogen waaxettofite. Xillotethasinne nagaras aybi gahetethi de7ii? Poo7osinne dhumas aybi issifetethi de7ii? <sup>15</sup> Kiristtoosanne Xalahe issife gathiyabay aybe? Qassi ammaneysinne ammanonnayssi issife koxiyabay aybe?

<sup>16</sup> Xoossa Keethas eeqtatara aybi issifetethi de7ii? Xoossay,

“Taani entta giddon de7ana,  
entta giddon hamuttana.

Taani entta Xoossaar gidana;  
enttika ta ase gidana”

gidayssada, nuuni de7o Xoossa keethi. <sup>17</sup> Hessadakka, Goday,  
"Entta giddofe shaakettidi keyite;  
tuna gididabaa bochchofite;  
ta hinttena ekkana.

<sup>18</sup> Ta hinttew aawa gidana;  
hintte taw adde naytanne macca nayta gidana;  
yaagees Ubbaafe Wolqqaama Goday" yaagis.

## 7

<sup>1</sup> Hiza, ta siiqoto, ha ufayssay nuus de7iya gisho nu ashuwanne nu shemppuwa tunisiyabaa ubbaafe nuna geeshshoos. Xoossaas yayyidi nu geeshshatethaa polo oothoos.

### *Phawuloosa ufayssaa*

<sup>2</sup> Hintte uluwaa nuna bessite. Nuuni oonakka naaqqibookko; oonakka qohibookko; oonakka cimmibookko. <sup>3</sup> Taani hessa hintte bolla pirddanaw giikke. Hayssafe kase ta hinttew odidaysada, hintte nu wozanan de7eta; nu paxa de7inkka hayqqinkka hintte shaakettoko. <sup>4</sup> Ta odiyabaa hinttete qottike; ta hinttenan ceeqettays; nu waaye ubban minettays; qassi gita ufayssi ufayttays.

<sup>5</sup> Nuuni Maqedooniya bida wode ubba baggara waayettidappe attin shemppibookko. Karera morkketan, nu gaathan yashshan un77ettida. <sup>6</sup> Shin azzanidayssata minthethiya Xoossay, Tito yuussan nuna minthethis. <sup>7</sup> Nuna minthethiday Tito yuussaa xalaala gidonnashin hintteka iya minthethidayssana. Hintte tana laamoteyssa, taw azzaneyssanne taw poppeyssa ta si7ida wode tana daro ufayssis.

<sup>8</sup> Ta dabddaabbey hinttena azzanthikkoka ays xaafadinaashsha gada qiirottike. Ta qiirottiday ta xaafidabddaabbey hinttena guutha wodes azzanthida gishossa. <sup>9</sup> Ha77i taani ufayttiday, ta hinttena azzanthida gisho gidonnashin hintte azzanoy hinttena hintte nagaraappe zaarida gishossa. Xoossay ba sheniyada hinttena azzanthisippe attin nu hinttena aybinkka qohibookko. <sup>10</sup> Xoossay koyaa azzanoy, atotethaakkko gathiya nagaraappe simo ehees; iyan qiiroyabay baawa. Shin ha sa7aa azzanoy hayqo ehees. <sup>11</sup> Hintte azzanoy hinttenan ayfisida ayfiyaa be7ite. He azzanoy hinttena ay mela denthethidaakkko, ay mela zaaro immanaada giigisidaakkko, he uraa bolla ay mela hanqisidaakkko, ay mela taw yayyana mela oothidaakkko, ay mela amoyidaakkko, he uraa seeranaw ay mela giigidaakkko be7ite. Ha ubbababan hintte geeshshi gideyssa markkayideta.

<sup>12</sup> Hessa gisho, taani ha dabddaabiya hinttew xaafiday, naaqqida uraa woykko naaqetida uraa gisho gidenna. Shin hintte nuus ay mela qoppiyako Xoossa sinthan hinttee, hinttena be7ana mela xaafas. <sup>13</sup> Nuuni ufayttiday hessa gishossa. Nu ufayssaafe aadhddidi nuna daro ufayssiday, hintte Tito ufayssidayssanne iya wozanaa shemppisidayssa. <sup>14</sup> Taani hinttena nashshada iyaw odin hintte tana yeellayibeekketa. Shin nuuni ubba wode hinttew tumaa odida; hessadakka nuuni Tito sinthan hinttena nashshidayssi tuma gidis. <sup>15</sup> Hintte iyaw yashshan kokkoridi, iya mokkidayssa qassi iyaw ay mela kiiettiidaakkko I qoppiya wode hinttew de7iya siiqoy minnishe bis. <sup>16</sup> Taani ubbababan hinttenan ammanettiya gisho ufayttays.

## 8

### *Imobaa*

<sup>1</sup> Nu ishato, Xoossay Maqedooniyan de7iya woosa keethatas immida aadho keehatethaa hintte erana mela nu koyoos. <sup>2</sup> Entti gita meton paacettidosona, shin entta ufayssay wolqqaama. Entta manqotethaas zawi baawa, shin banitta imuwan daro keehidosona. <sup>3</sup> Entti bantta wolqqaal melanne bantta wolqqaafe aadhhdheyssa dosidi immidayssas ta markka. <sup>4</sup> Entti Xoossaas asaa maaddiya lo77o ooso nuura oothanaw koyidi nuna daro woossidosona. <sup>5</sup> Entti nuuni qoppidayssafe aathidi oothidosona. Koyrottidi banttana Godaas immidosona; kaallidi, Xoossaas sheniyada banttana nuus immidosona.

<sup>6</sup> Ha lo77o oosuwa doommida Titoy gujji oothanaadanne hinttena maaddidi, he oosuwa polisanaada iya woossida. <sup>7</sup> Shin hintte ubbababan, ammanon, haasayan, eratethan, gita amon, nuna siiqoninne ubbababan durettidayssada ha lo77o oosuwankka hintte keeha gidana mela nu koyoos.

<sup>8</sup> Taani hessa kiiitanaw giikke. Shin harata gita amuwaa hintte siiquwara gatha be7ada hintte ay keena tumeekko eranaw gays. <sup>9</sup> Hintte nu Godaa Yesuus Kiristtoosa aadho

keehatethaa ereeta. Kiristtoosi dure gidi uttidi, hintte iya manqotethan duretanaada hintte gisho manqis.

<sup>10</sup> Taani ha odan hinttena maaddiya zore zoranaw koyays. Hintte zillaythi immanaw xalaala gidonnashin hessa oothanaw amotethankka hintte koyro. <sup>11</sup> Hintte oothanaw doo-mida oosuwa ha77i polite. Hintte hinttew de7eyssa keena immiko, hessi hintte immanaw daro amotteyssaa qonccisees. <sup>12</sup> Issi asi immanaw amottiko, iya imoy Xoossa sinthan ekettey, I baw de7idayssa keena imminappe attin baynnabaappe immanaw un77ettin gidenna.

<sup>13</sup> Taani hessa gey, hintte ubbay issi gina gidana melassafe attin harati waayappe shemppin hintte waayettana melassa gidenna. <sup>14</sup> Wode entta palahay hintte pacaa kunthana mela ha77i hintte palahay entta pacaa kuntho. Hessian hintte gina gidana. <sup>15</sup> Geeshsha Maxaafan, “Daro shiishidayssas palahibeenna; guutha shiishidayssas pac-cibeenna” geetetti xaafetidayssa mela.

### *Titonne iya laggeta*

<sup>16</sup> Nu hinttew qoppeyssada Titoykka hinttew qoppaana mela oothida Xoossay galatetto. <sup>17</sup> Titoy hintteko biday, nu iya denthethida gisho xalaala gidonnashin I ba shenen baanaw amottida gishossa. <sup>18</sup> Wonggela markkatethan woosa keetha ubban daro erettida ishaa, nuuni Titora issife kiittoos. <sup>19</sup> Hessa bolla nuuni ha keeha imotaan efiya wode nuura baana mela ha lo77o oosuwan Godaa bonchchanawunne harata maaddanaw de7iya amuwa bessanaw I woosa keethathan doorettis.

<sup>20</sup> Ha imettida keeha imuwa, nu ooso bolla peeshshiya wode boretonna mela naaget-toos. <sup>21</sup> Nuuni Godaa sinthan xalaala gidonnashin asa sinthankka lo77o gididabaa ooothoos.

<sup>22</sup> Qassi daro wode paacen minnidi aadhdhida nu ishaa, enttara hintteko kiittida. I hinttenan keehi ammanettiya gisho ha77i hinttena maaddanaw daro amottees. <sup>23</sup> Titobaa eranaw koykko, I hinttena maaddanaw taara oothiya ta ooso laggija. Hankko ishatabaa gidikko woosa keethati kiittidayssata; qassi asay entta duussaa be7idi Kiristtoosa bonchchosona. <sup>24</sup> Hessa gisho, woosa keethati hintte siiquwanne nu hinttena nashsheyssi tuma gideyssaa qonccisanaw hintte siiquwa ha asata bessite.

## 9

### *Ammaniya asaas kessida miishiya*

<sup>1</sup> Ammaniya asaas kessiya miishiyabaa ta hinttew xaafanaw koshshenna. <sup>2</sup> Hintte maaddanaw keehi amotteyssaa ta erays. Hintte Akkaya asay, zillaythafe doomidi maaddanaw giigettidayssaa taani Maqedooniya asaas doona kunthada odas. Hintte gita amoykka enttafe darota denthethis. <sup>3</sup> Ha oosuwan hinttenan nu ceeqettiya ceeqoy hada gidonna mela koyro hinttebaa ta odidayssada hintte giigettidi naagana mela ha ishata hintteko kiittas. <sup>4</sup> Maqedooniya asay taara bidi, hintte giigettonna de7ishin, demmiko, nu hinttenan yeellatana; qassi hintte nuuppe aadho yeellatana. <sup>5</sup> Hessa gisho, ha ishata taappe sinthattidi hintteko bidi, hintte immana gida imuwa kasetidi giigisana mela ta enttana kiittas. Taani gakkiya wode he imoy giigi uttees. He wode he keehatetha imoy wolqqan gidonnashin dosan gideyssaa erisees.

<sup>6</sup> Hayssa akeekite; guuthu zeriday guuthu cakkana; daro zeriday daro cakkana. <sup>7</sup> Xoossay ufayssan immiya uraa dosiya gisho wolqqan woykkoo dosi baynna gidonnashin issi issi asi ba wozanan qoppidayssada dosan immanaw bessees. <sup>8</sup> Ubba wode ubbabaa koshshiyaba ubbaa demmido lo77o ooso ubbaa oothanaw dandda7ana mela Xoossay hinttew ba anjuwaa darssana. <sup>9</sup> Geeshsha Maxaafan,

“Iba shaluwa manqotas laallis;

iya xillotethay merinaw de7ana”

yaagees. <sup>10</sup> Zereyssas zerethi, maanaw kathi immiya Goday, hintte zeriya zerethaa darssidi immana. Hintte xillotethaa ayfiyaakka darssana.

<sup>11</sup> Daro asay hintte immiya imuwa nuuppe ekkidi, Xoossa galatanaada, hintte ubba wode darssidi immeysata gidana mela Xoossay hinttena ubba baggara dureyana. <sup>12</sup> Ha hintte immiya imoy ammaniyaa asaa pacaa kuntho xalaala gidonnashin asay Xoossa galatanaw gaaso gidees. <sup>13</sup> Ha hintte oosoy hintte ammanuwa ersidi Kiristtoosa Wonggela hintte ammanidinnee iyaw kiitettidi hinttew de7iyabaa enttaranne haratartha shaaket-tida gisho ubbay Xoossa bonchchanaa. <sup>14</sup> Xoossay hinttew immida aadho keehatethaa gisho entti hinttew Xoossa woossishe hinttena be7anaw laamotosona. <sup>15</sup> Zawi baynna Xoossa imuwas Xoossay galatetto.

**10***Phawuloosi mooteysatas zaarida zaaruwa*

<sup>1</sup> Ta hinttera de7iya wode shugo, qassi hinttefe haakkiya wode nu bolla minnees yaagettida, Phawuloosi, keehanne ashkke gidida Kiristtoosa sunthan hinttena woossays. <sup>2</sup> Taani hintteko biya wode nu asho qofara simerettiya asi oothidi qoppiya asaa bolla mino qaalan odettanaw qofa qachchas. Hintte bolla hessada odettana mela hintte tana oothonnaada hinttena woossays. <sup>3</sup> Nuuni ha sa7an de7ikkoka ha sa7aa asada olettoko. <sup>4</sup> Nu ola miishey ha sa7ayssa gidenna. Shin miixa laallanaw wolqqara de7iya Xoossa toora. Tumaara eqettiya palamaanne, <sup>5</sup> Xoossa eronna mela diggiya otoro qofa ubbaa laalloos. Asa qofa ubbaa di77idi Kiristtoosas kiiettana mela oothoos. <sup>6</sup> Hintte kiiettethay polo gidiya wode nuuni kiiitettha ixo ubbaa seeranaw giigettana.

<sup>7</sup> Hintte ayfey be7ida mela pirddeeta. Oonikka bana Kiristtoosabaa gidi qoppiyabaa gidikko, nukka Kiristtoosabaa gideyssa ero. <sup>8</sup> Goday taw immida maatan ceeqetikokka hessian yeellatikke. He maatay taw imettiday hinttena dichchhanaassafe attin qohanaassa gidenna. <sup>9</sup> Taani ta dabddaabbiyan hinttena yashisanaw koyada xaafidabaa daanoppo. <sup>10</sup> Issi issi asay, “Phawuloosa dabddaabbey deexonne wolqqaama, shin iya som77on be7iya wode I daaburanchcho; iya odaykka pathenna” yaagosona. <sup>11</sup> He asati nu haahon de7ishe xaafiya dabddaabbiyaninne matan hinttera de7ishe oothiya oosuwa giddon dummattethi baynnayssakaakeeo.

<sup>12</sup> Nuuni banttana nashshiya asatara nuna ginayanaw woykko gaaddeyanaw koyokko. Shin entti banttana banttara ginayidi woykko gaaddeyidi be7ishe eeya.

<sup>13</sup> Shin nuuni Xoossay nuus immida dhassan ceeqettoosippe attin zawaal pinnidi ceeqettoko; he zaway hinttekokka gakkees. <sup>14</sup> Nuuni besseyssafe aathidi ceeqettoko, shin Kiristtoosa Wonggelaa hintteko gathidayssan ceeqettoos. <sup>15</sup> Nuuni Xoossay essida zapappe pinnidi, harati oothida ooson ceeqettoko. Gidoshin, hintte ammanoy diccana mela Xoossay immida zawan hintte giddon nu oothiya oosoy dalggana gidi qoppoos. <sup>16</sup> Nuuni hara asi ba zawan oothida ooson gelidi ceeqettoko, shin hintte pinnidi haratas Wonggelaa markkattanaw dandda7os. <sup>17</sup> Shin, Geeshsha Maxaafan, “Ceeqqi yaubbay Godaa lo77otethan ceeqquo” yaagidi xaafettis. <sup>18</sup> Goday nashshiya uraappe attin bana baw nashshiya uray nashettenna.

**11***Phawuloosanne worddanchcho hawaareta*

<sup>1</sup> Ta guutha eeyatethaa hintte ha77ika dandda7ana gada qoppays; hayyana dandda7ite. <sup>2</sup> Xoossay hinttew qoppidayssada, takka hinttew qoppays. Taani hinttena geeshsha geela7ida issi addiya, Kiristtoosas immanaw oychcha wothas.

<sup>3</sup> Shin shooshay ba geniyan Hewaanno balethidayssada ooni eri hintte wozanay iitidi Kiristtoosas de7iya hintte suuretethaanne geeshshatethaa agganddetii gada hirrgays. <sup>4</sup> Issi asi yidi, nuuni hinttew markkattida Yesuusappe hara Yesuusa hinttew markkatiko, woykko hintte ekkida Ayyaanaappenne Wonggelaappe hara ayyaananne Wonggelaape hinttew odikko, si77i gidi ekkeeta.

<sup>5</sup> Shin taani Yesuus kiiftida “Gita hawaaretappe” guuxays gada qoppike. <sup>6</sup> Taani oda eronna asi gidikkoka, eratethi taw de7ees. Hessa ta hinttew daro ogen qonccisas.

<sup>7</sup> Taani miishe oychchonna Xoossaa Wonggelaa hinttew coo otidaysinne hinttena dhoqqu oothada tana toochchidayssi taw nagara gidi? <sup>8</sup> Taani hinttew oothanhar hara woosa keethatappé miishe bonqqa ekkas. <sup>9</sup> Ta hinttera de7iya wode tana metinkka hinttefe issi asikka waaysabiikke. Maqedooniyappe yida ammaneyssati tana koshshiyaba ubban maaddidosona. Hachchi gakkanaw ta hinttew tooho gidabiikke sinthaskka tooho gidikke. <sup>10</sup> Kiristtoosa tumatethay tanan de7ishin, ta ceequwa Akkaya biittan tana oonikka diggenna. <sup>11</sup> Ta hayssa ays gaynaa? Hinttena dosonna gishosseyye? Taani hinttena doseyyassa Xoossay erees.

<sup>12</sup> “Nukka hintte mela ooothoos” yaagidi ceeqqiya hankko hawaareta ceequwa gaasuwa dhayssanaw ha77i ta ootheyssa sinthaskka oothana. <sup>13</sup> Hayssa mela asati Kiristtoosa hawaare daananaw banttana laammiya worddanchcho hawaaretanne cimmiya oosanchchota. <sup>14</sup> Hessi malaalisiyabaa gidenna; ays giikko, Xalahey poo7o kiianchcho daananaw bana laammees. <sup>15</sup> Hessa gisho, Xalahe oosanchchoti xillotethaa oosanchchota daananaw banttana laammiko hessi gitabaa gidenna. Entti wurssethan bantta oosuwada ekkana.

*Phawuloosa gakkida metuwa*

<sup>16</sup> Oonikka tana eeya gidi qopponna mela zaaradakka odays. Ta hinttew eeya daanikkoka ta guuthara ceeqettana mela tana eeya oothidi ekkite. <sup>17</sup> Taani hayssada ceeqettada odettey, Goday koyeyssada gidonnashin eeyatethan odays. <sup>18</sup> Daro asay ha sa7aabaa ceeqettiya gisho takka ceeqettana. <sup>19</sup> Hintte wozanaama gidiya gisho eeya asabaa ufyassan dandda7eeta. <sup>20</sup> Oonikka hinttena aylleykko woykko hinttena bonqiko woykko baw maadettanaw hintteko shiiqikko woykko hintte bolla otortiko woykko hinttena baqqikko hintte dandda7eeta. <sup>21</sup> Nuuni hessa oothanaw daro daaburanchcho gideyssa yeellatashe ta odays.

Shin oonikka minnidi ceeqettiko, takka ceeqgettaw minnays. Taani hessa eeya asada odettays. <sup>22</sup> Entti Ibraawe? Takka Ibraawe. Entti Isra7eeli? Takka Isra7eeli. Entti Abrahame sheeshee? Takka Abrahame sheeshi. <sup>23</sup> Entti Kiristtoosa oosanachcho? Taani gooshsha asada odays, enttafe aadhdiya Kiristtoosa oosanachcho. Taani ooson daro daaburas; daro wode qashtettas; garaafettas; daro wode hayqoppe attas. <sup>24</sup> Ahyudeti tana hasttamanne uddufuna ichchashu toho garaafidosona. <sup>25</sup> Heedzu toho xam77an shocettas; issi toho shuchchan cadettas; markkabey heedzu toho me77is; abbaa giddon issi qamma kumethi aqada pee7as. <sup>26</sup> Taani daro ogiya daaburan hamuttas. Kixa haathafenne panggafe attas. Ahyudetinne Ahyude gidonna asay ta bolla meto gathidosona. Katamay, bazzoy, abbay, tana yashshis; ammaniyya daaniya asati tana waaysidosona. <sup>27</sup> Taani ooson daaburasinne cawattas, daro toho dhiskko dhayas, koshattas, saamottas, daro toho xoomas, meegettas, kallottas.

<sup>28</sup> Haraba ubbaa taybonna ubba wode tana qofisey woosa keethatabaa. <sup>29</sup> Issi asi daaburiy wode iyara ta daaburabiikinna? Issi asi nagaran dhubettiya wode ta awude qirotttonna aggadina?

<sup>30</sup> Ta ceeqettanaw koshshiyabaa gidikko taani daaburanchcho gideyssa erisiyanban ceeqettana. <sup>31</sup> Merinaw bonchchettida Xoossay, nu Godaa Yesuus Kiristtoosa Aaway, ta worddotonnayssa erees. <sup>32</sup> Damasqqa kataman Aretaasa giya kauwapple garssara haareyssi tana oythanaw koyidi Damasqqa katamaa penggiya naagisis. <sup>33</sup> Shin asay tana daachchon yeggidi, katamaa dirssaa maskkootiyara wodhisin taani iya kushiyappe attas.

## 12

### *Phawuloosa qonccethaa*

<sup>1</sup> Ceeqetethas go77i baynnayssa erays. Shin ceeqettanaw koshshiko, Godaappe ekkida qonccethan ceeqqana. <sup>2</sup> Tammanne oyduu laythafe kase, Kiristtoosa ammaniyya issi uray heedzantho saluwa bidayssa ta erays. He uray ashon woykko ashoppe karera bidaakko ta erikke; Xoossay erees. <sup>3</sup> He uray heedzantho saluwa ekettidayssa erays. Shin I ashon woykko ashoppe karera ekettidaakkko ta erikke; Xoossay erees. <sup>4</sup> He uray gannate ekettiya asi qonccisanawunne asi odanaw dandda7onnabaa si7is. <sup>5</sup> Taani he addiyaban ceeqettana, shin taani ta daaburaappe attin tanan ceeqettiyabay baawa. <sup>6</sup> Taani tumaa odettiya gisho ceeqettanaw koykkoka eeya gidikke. Shin asi ta ootheysa be7eyssafenne si7eyssafe aathidi qopponna mela gada ceeqetethi aggays.

<sup>7</sup> Taw qonccida gita qonccethan ta otorttonna mela tana waaysanaw ta ashuwan caddiya Xalahiya kiitanchchoy taw imettis. <sup>8</sup> Ha waaysiyaba taappe diggana mela taani Godaa heedzu toho woossas. <sup>9</sup> Shin Goday, "Ta wolqqay ne daaburan qoncciya gisho ta aadho keehatethay new gidana" yaagis. Kiristtoosa wolqqay tanan qonccana mela ta daaburan ufayttashe ceeqettays. <sup>10</sup> Taani Kiristtoosa gisho daaburiya wode cayettiya wode waayettiya wode goodettiya wode metootiya wode ta daaburan ufayttays. Ays giikko, ta daaburiya wode he wode minnays.

### *Phawuloosi Qoronttoosa asaa qoppees*

<sup>11</sup> Taani eeya asada ceeqettas. Hessada ta ceeqettana mela oothiday hinttena. Ta, ta huu7en erettonna asi gidikkoka, "Gita hawaareta" geetetteyssatapte guuxike. Hessa taw markkattanaw besseye hinttenashin. <sup>12</sup> Ta hintte giddon de7ashe dandda7an oothida malaatatinne mallati ta tuma hawaare gideyssa bessosona. <sup>13</sup> Ta hinttew tooho gidon-nayssafe attin hara woosa keethatapte hintte aybin guuxidetii? Hessi bala gidikko tana maarite.

<sup>14</sup> Taani hintteko baanaw giigettishin hayssi taw heedzantho. Ta hinttenappe attin hinttew de7iyabaa koyonna gisho hinttena waaysanaw koyikke. Yelidayssati bantta naytas shalo minjjoosonappe attin nayti banttana yelidayssatas shalo minjokona. <sup>15</sup> Ta hintte gisho taw de7iyabaanne tana aatha imminkka tana ufayssees. Yaatin, taani hinttena hessada keeha siiqiya wode hintte tana guuthara siiqetii?

<sup>16</sup> Gidikkoka, ta hinttew tooho gidikke; waaysabiikke; shin hinttena cimoninne genen oykkidabaa hinttew daanonna aggenna. <sup>17</sup> Hari attoshin, ta hintteko kiittida asatappe hinttena cimmida asi de7ii? <sup>18</sup> Titoy hintteko baana mela taani woosas; qassi ammaniyaa ishaakka iyara yeddas. Yaatin, Titoy hinttena cimmide? Nuuni nu oosuwa issi ayyaan oo thibookko? Qassi nu hanoykka issino gidennee?

<sup>19</sup> Nu ubba wode hintte sinthan nuna xillisanaw mootettiyabaa hinttew daanii? Nu Kiristtoosan de7idi Xoossa sinthan ha77i gakkaw odoos. Nu siiqo ishato, nu ha ubbaa oothey hinttene dichchanaassa. <sup>20</sup> Ta hintteko biya wode ooni eri hintte ta koyeyssada hanonna, qassi takka hintte koyeyssada hanonna ga hettonna aggoko gada yayyays. Qassi ooni eri hintte giddon palami, qanaatey, hanqoy, yiqey, zigrissi, asa sunthu iisoy, otoroynne kachchi doonna aggenna gada yayyays. <sup>21</sup> Taani nam77antho hintteko biya wode Xoossay hintte sinthan tana kawushshana gada yayyays. Kase nagara oothidi he bantta oothida tunatethaafe, laymatethafenne yeellaya oosuwappe simmiboonna asata be7ada azzanonna aggike gada yayyays.

## 13

### *Wurssetha zorenne saro tho*

<sup>1</sup> Ta hintteko bishin hayssi heedzantho. Ay mootoykka nam77u woykko heedzu markkan minnees. <sup>2</sup> Taani nam77antho hintterga ga hettida wode hintte giddon kase nagara oothida uraanne harata ubbaa seeronna aggike gada oda wothas. Ha77i ta haakkada de7ikkoka simmida hintteko biya wode ooddeskka qadhetlike.

<sup>3</sup> Tanan de7idi odehy Kiristtoosa gideyssa hintte eranaw koyeeta. I hintterga haasaya wode wolqqaamappe attin hintte giddon daaburanchcho gidenne. <sup>4</sup> Kiristtoosi masqaliya bola daaburun kajettis, shin Xoossa wolqan de7on de7ees. I daaburanchcho gidi-dayssada, nukka daaburanchcho. Shin hinttena haggaazanaw Xoossa wolqan iyara de7on daana.

<sup>5</sup> Ammanon minnidi de7iyakko hinttena hinttew paaci be7ite. Paacen hintte kundonna attiko, Kiristtoosi hinttenan de7eyssa hintte ereeta. Shin Kiristtoosi hinttenan doonna ixxiko hintte kunddeeta. <sup>6</sup> Nuuni paacen kunddonayssa hintte ereeta gada ammanays.

<sup>7</sup> Hintte iatabaa oothonna mela nuuni Xoossa woosos. Nuuni mino gideyssa asay be7ana mela gidonnashin nuuni mino gidonna ixxikokka, hintte lo77o oothana mela nuuni woosos. <sup>8</sup> Nuuni tumaas ooothoosippe attin tumaara egettiyabaa aybaakka oothoko. <sup>9</sup> Nu daaburiya wode hintte qassi minniya wode nuna ufayssees. Hintte borey baynayssata gidana mela nu hinttew Xoossa woosos.

<sup>10</sup> Taani hinttefe haakkada de7ashe xaafiday hessa gishossa. Taani hintteko biya wode Goday taw immida maatan zemppada hintte bola godattanaw koyikke. Goday taw maata immiday, hinttena maaddanaassafe attin qohanaassa gidenne.

<sup>11</sup> Wurssethan ta ishato, saro de7ite. Borey baynna de7ite; ta zoriya si7ite. Issi wozanan gidi de7ite; sarotethan de7ite. Siigonne saro immiya Xoossay hintterga gido.

<sup>12</sup> Geeshsha yeeretethi yeerettishe, issoy issuwa saro thite. <sup>13</sup> Xoossa asa ubbay hinttena saro saro yaagosona.

<sup>14</sup> Godaa Yesuus Kiristtoosa aadho keehatethay, Xoossa siiqoy, Geeshsha Ayyaana issifetethay hintte ubbaara gido.

## Phawuloosi Galaatiya Asaas

### Xaafida Kiitaa Gaatha Qofaa

Yesuusi ashsheyssa gideyssa odiya Wonggelaa qaalay dumma dumma bessan sabbaket-tin, Ayhude gidonna asay ammani ammani biya wode "Kiristaane gidanaw Muse higge polanaw koshshiye koshshenee?" yaagiya oyshoy issife denddis. He wode Phawuloosi, "Kiristaane gidanaw Muse higge polanaw koshshenna; Yesuusan oratha de7o demmanaw koshshiya waannay ammano. Asay Xoossaa sinthan xillanaw dandda7ey ammano xalaalan" yaagidi tamaarssis. Shin Guutha Iisiyan, Galaatiya awurajjan de7iya woosa keethan de7iya asaa giddon, "Asi Xoossaa sinthan xillanaw Yesuusa ammano xalaala gidonnashin Muse higgiyaka polanaw koshshees" yaagidi Phawuloosa timirittiya phalqqa asati de7oosona.

Phawuloosi Galaatiya maxaafaa xaafiday, he bala timirittiyan cimetida asaa tuma ammanuwaakkonne ammano de7uwakko zaaranassa. Phawuloosi Yesuusa hawaare gideyssa tillaydi odo oykkis. Iya hawaare oothidi xeegiday ase gidonnashin Xoossaa gideyssanne I kiittiday Ayhude gidonna asasa gideyssa qonccisidi odis. Iyara oysethidi asay xillanaw dandda7ey ammano xalaalana gideyssa odee. Wurssetha shemppotan ammano de7oy Yesuusa ammanon benttiya siiqoppe pultteyssa gideyssa odee.

#### **Galaatiya kiitaa ayfe qofata**

Gelo qofaa 1:1-10

Phawuloosa hawaaretetha maata 1:11-2:21

Xoossaa aadho keehatethaa Wonggelaa 3:1-4:31

La77atethinne ammanon duussu 5:1-6:10

Kuushsha qofaa 6:11-18

<sup>1</sup> Asappe woykko asa baggara gidonnashin Yesuus Kiristtoosappenne iya hayqoppe denthida Xoossaa Aawappe hawaare gidana mela kiiettida ta Phawuloosi, <sup>2</sup> taara de7iya ammaniyaya ishati ubbay, Galaatiyan de7iya woosa keethatas kiittida kiitaa.

<sup>3</sup> Xoossay nu Aawaynne nu Godaa Yesuus Kiristtoosi hinttew aadho keehatethaanne sarotethaa immo.

<sup>4</sup> Ha iita wodiyappe nuna ashshanaw, nu Xoossaa, nu Aawa shenen Kiristtoosi nu nagara gisho bana aathi immis. <sup>5</sup> Xoossaas Merinaappe merinaa gakkanaw bonchchoy gido. Amin77i.

#### *Tuma Wonggelay issino*

<sup>6</sup> Kiristtoosa aadho keehatethan hinttene xeegida Xoossaa aggidi, hara Wonggelaakko, hintte ellesidi, waanidi simmidaakkko tana malaalisees. <sup>7</sup> Hinttene bailethanawunne Kiristtoosa Wonggelaa wobbisanw koyaa guutha asati de7oosonappe attin tuma Wonggelay issino. <sup>8</sup> Shin nuna gidin woykko salo kiiatchchoo gidin nuuni hinttew koyro odida Wonggelaappe dummatiyya hara Wonggelaa hinttew odyabaa gidikko, I qanggettidabaa gido. <sup>9</sup> Hayssafe sinthe nuuni gidayssada ha77ika zaarada gays. Hintte ekkida Wonggelaappe dummatiyya Wonggelaa oonikka hinttew odikko he uray qanggettidabaa gido.

<sup>10</sup> Yaatin, tana asi nashhana mela koyaynayye? Woykko Xoossi nashhana mela koyaynaa? Woykko ta ase ufayssanaw koyaynaa? Ta ase ufayssanaw koyabaa gidikko, Kiristtoosa aylle gidikke.

#### *Phawuloosa xeegetethaa*

<sup>11</sup> Ta ishato, ta hinttew odida Wonggelay asappe gidonnayssa hintte erana mela ta koyays. <sup>12</sup> Taw ha Wonggelaa Yesuusi Kiristtoosi qonccisisippe attin asappe ekkabiikkie woykko asi tana tamaarssibeenna.

<sup>13</sup> Ta kase Ayhude ammanon de7iya wode waana de7idaakkko, hintte si7ideta. Ta woosa keethaa qadhey baynna gooddanawunne dhayssanaw baaxetas. <sup>14</sup> Ayhude ammano naagon, ta woden de7iya Ayhude ishatappe aadhahays. Nu aawata wogaaskka aadhahada mishettays.

<sup>15</sup> Shin ta buroo ta aaye ulon de7ishin Xoossay tana dooris; ba aadho keehatethan tana xeegis. <sup>16</sup> Ayhude gidonna asas Wonggelaa odana mela Xoossay ba Na7aa taw qonccisida wode ta oodderakka zorettabiikkie. <sup>17</sup> Woykko taappe sinthe hawaare gidiidayssatata gaheettanaw Yerusalemme babiikkie. Shin ta kasetada Arabe biitta bas; hessafe simmada Damasqqa katamaa yas. <sup>18</sup> Heedzu laythafe guye, Phexiroosara gaheettanaw Yerusalemme

bada iyara tammanne ichchashu gallas uttas. <sup>19</sup> Shin Godaa ishaa Yayqoobappe attin hankko hawaareta be7abiikke.

<sup>20</sup> Ta hinttew xaafiydayssi worddo gidonnayssa Xoossa sinthan hinttew qonccisays.

<sup>21</sup> Hessafe guye, taani Sooriya biittaanne Kilqiya biittaa bas. <sup>22</sup> Yihudan de7iya woosa keethaa asay tana be7idi eribookkona. <sup>23</sup> Shin entti, "Kase nuna gooddiya uray, ha77i he I dhayssanaw koyaa ammanuwabaa sabbakees" yaageyssa si7idosona. <sup>24</sup> Si7ida ubbay ta gaason Xoossa galatidosona.

## 2

### *Hawaareti Phawuloosa ekkidosona*

<sup>1</sup> Tammanne oyduu laythafe guye, Barnnabaasara zaarada Yerusalaame bas. He wode Tito taara ekkada bas. <sup>2</sup> Xoossay taw qonccisida qonccethan yaa bada Ayhude gidonna asaa giddon ta sabbakiya Wonggelaa enttaw qonccisas. Kase ta woxxida wothaynnne ha77ika ta woxxiya wothay hada gidonna mela gada kaaletheyssata dumma shiishada enttaw odas. <sup>3</sup> Hari attoshin, taara de7iya Titoy Girike asi gidikkoka, qaxxaretto gidi un77ethibookkona. <sup>4</sup> Gidoshin, ammaniyaa ishata daanidi nu giddo gelida issoti issoti I qaxxarettana mela koyidosona. He asati Kiristtoos Yesuusan nuus de7iya la77atethaa wochchidi be7anaw geeman nu giddo gelidi zaaridi nuna aylle oothanaw koyoosona. <sup>5</sup> Shin tuma Wonggelay hinttenan minnidi daana mela nuuni hari attoshin, guutha wodeskka enttaw kushe immibookko.

<sup>6</sup> Shin halqa daaniya asata oonatethay taw aykkoka gidenna. Xoossay asa som770 be7idi pirddenna. Ha asati ta markkattiya Wonggelaa bolla gujjidabay baawa. <sup>7</sup> Shin Phexiroosi, Ayhudetas Wonggelaa odana mela Xoossay iyaw hadara immidayssada tawukka Ayhude gidonna asaas Wonggelaa odiya hadaraa immidayssada entti guyeppe be7idosona. <sup>8</sup> Hiza, Phexiroosi Ayhudeta hawaare gidana mela oothida Xoossay, takka Ayhude gidonna asaas hawaare gidana mela oothis. <sup>9</sup> Qassi tuussu daanidi benttiya Yayqoobi, Phexiroosinno Yohaannisi, taw imettida aadho keehatethaa be7ida wode nuura issifidayssa qonccisanaw ta kushiyanne Barnnabaasa kushiya oykkidosona. Nuuni Ayhude gidonna asaakko, qassi entti Ayhude asaakko baanaw giigidosona. <sup>10</sup> Entti nuna minthidi hadara giday, nuuni manqotas qoppanayssa. Kasekka ta hessa oothanaw amotteys.

### *Phawuloosi Phexiroosa timirittiya phalqqis*

<sup>11</sup> Phexiroosi Anxookiya katamaa yida wode I balida gisho taani iya som770n "Neeni baladasa" gas. <sup>12</sup> Yayqoobi kiittida guutha asay yaanappe sinthe I Ayhude gidonna asaara mees, shin entti yidaappe guye, "Ayhude gidonna asaappe ammanidayssati qaxxaretanaw bessees" giya asaas yayyidi enttafe shaakettis. <sup>13</sup> Qassi hankko ammanida Ayhudeti Phexiroosa hanuwa kaallidosona. Hari attoshin, Barnnabaasikka iya qofan gooshettis.

<sup>14</sup> Shin entti Wonggelaa tumatethan suure hamuttonnayssa be7ada, Phexiroosa asa ubbaa sinthan, "Neeni Ayhude gidashe, Ayhude wogaatho gidonnashin Ayhude gidonna asada de7aasa; yaatin, waanada Ayhude gidonnayssata, 'Ayhude wogan de7ite gada wolqqatay'" yaaggas.

<sup>15</sup> Nuuni yeletan Ayhude, shin nagaranchcho gidida Ayhude gidonna asaa mela gidokko.

<sup>16</sup> Shin asi Yesuus Kiristtoosa ammanidi xilleesippe attin higge naagidi xillonnayssa eroos. Onikka higge naagidi xillonna gisho nukka higge naagidi gidonnashin Kiristtoosan ammanidi xillana mela Kiristtoos Yesuusa ammanida.

<sup>17</sup> Nu Ayhudentikka Kiristtoosa baggara xillanaw koshshees. Hessa gidikko nukka hara asada nagaranchcho gideyssa be70os. Yaatin, nu nagara oothana mela denthethay Kiristtoosa guusseyye? Ubbaka gidenna! <sup>18</sup> Hiza, ta laallidayssa zaarada keexiyabaa gidikko taani ta huu7en higge mentheyssaa gideyssa qonccisays. <sup>19</sup> Taani Xoossaas daana mela higge baggara higgies hayqqas. <sup>20</sup> Taani Kiristtoosara masqaliya bolla kaqettas. Taani hizappe taw de7ikke, shin Kiristtoosi tanan de7ees. Ta ha77i de7iya de7uwa, tana dosidi ta gisho bana aathi immida Xoossa Na7aa ammanada de7ays. <sup>21</sup> Taani Xoossa aadho keehatethaa hada oothike. Xillotethi asas higge baggara benttiyabaa gidiyakko, Kiristtoosi coo hayqqis guussu.

## 3

### *Xillotethi ammanonna*

<sup>1</sup> Hinttenoo, akeeki baynna Galaatiya asaw, hintte ayfiyyaa sinthan Kiristtoosi masqale bolla kagettida misileda qonccidi benttees. Yaatin, tumaas hintte kiitettonna mela hinttena bitiday oonee? <sup>2</sup> Ta issibaa eranaw koyays; hintte Geeshsha Ayyaana ekkiday higge naagidiyye woykko hintte si7ida Wonggelaa ammanidi ekkideti? <sup>3</sup> Hintte hessa mela eeye? Hintte Xoossaay Ayyaanaan doomidi, ha77i wolqqan polanaw koyeetii? <sup>4</sup> Hintte Wonggelaa gaason daro waayettiday melee? He waaye ubbay coo gididee? <sup>5</sup> Xoossay hinttew Geeshsha Ayyaana immeynne hintte giddon malaata oothey, hintte higge naagida gishoyye woykko Wonggelaa si7idi ammanida gisho?

<sup>6</sup> Ane Abrahame be7ite, “I Xoossaay ammanis; Xoossay iyaw hessa xillotethi oothidi ekkis” geetettidi xaafettis. <sup>7</sup> Hiza, ammaneyssati Abrahame nayta gideyssa erite. <sup>8</sup> Xoossay Ayhude gidonna asaa ammanon xillisanayssa Geeshsha Maxaaafay be7idi, “Kawotetha ubbay nenan anjettana” yaagidi, Wonggelaa Abrahames kasetidi odis. <sup>9</sup> Hessa gisho, ammaniyyaa ubbay ammanida Abrahama issife anjettidosona.

<sup>10</sup> Higge naagidi xillana giya oonikka qanggettidayssa. Ays giikko, Geeshsha Maxaaafan, “Higge maxaaafan xaafettida ubbaa naagonna oonikka qanggettidayssa gido” geetettidi xaafettis. <sup>11</sup> “Xilloy ammanon daana” geetettidi xaafettida gisho oonikka Xoossaay sinthan higge naagidi xillonnayssi erettidabaa. <sup>12</sup> Higgey ammanon zemppenna. Shin, “Higgiya naagiya oonikka higgiyan de7on daana” yaagees.

<sup>13</sup> “Mitha bolla kaqettidi hayqqiya oonikka qanggettidayssa” geetetti xaafettida gisho Kiristtoosi nu gisho qanggettidayssa gididi, nuna higge qanggethafe wozis. <sup>14</sup> Xoossay Abrahames immida anjoy, Yesuu Kiristtoosa baggara Ayhude gidonna asaa gakkana melanne Xoossay immana gida Geeshsha Ayyaana nuuni ammanon ekkana mela hessa oothis.

### *Higgenne ufayssa qaalaa*

<sup>15</sup> Ta ishato, ta hinttew asa de7on meeze gididi de7iyabaa leemiso oothada odays. Asi caaqqaqy minnidaappe guye, oonikka he caaqua shaaranaw woykko iya bolla haraa gujianwan dandda7enna. <sup>16</sup> Xoossay he keeke qaalaa Abrahamesinne iya zerethaas immis. Geeshsha Maxaaafay, daro asas odiyada, “Ne zerethatas” geenna. Shin issi asas odiyada, “Ne zerethaas” yaagees; ikka Kiristtoosa.

<sup>17</sup> Taani gey hayssa; oyddu xeetanne hasttam u laythafe guye imettida higgey, koyro Xoossay minthida caaqua shaaridi ufayssa qaala dhayssanaw dandda7enna. <sup>18</sup> Xoossay immiya laatay higgen ekettiabaa gidiyakko Xoossay immida ufayssaa baggara gideyssi attees. Shin Xoossay ba aadho keehatethan laata Abrahames ufayssa qaala baggara immis.

<sup>19</sup> Yaatin, higgey ays imettidee? Higgey imettiday, Abrahames ufayssa qaali imettida zerethay yaana gakkanaw iita oosoy aybekko erisanassa. Higgey kijtanchchota baggara imettidi, giddo gididi sigethiya issi asa baggara ooso bolla pee7is. <sup>20</sup> Giddo gididi sigethiya uray issi asa xalaalas gidenna, shin Xoossay issino.

<sup>21</sup> Yaatin, higgey Xoossaay qaalara eqettiyye? Akkay, gidenna! Higgey imettiday asas de7o immanaw gidiyakko, xillotethi higge baggara benttanashin. <sup>22</sup> Shin Yesuu Kiristtoosa ammanin benttiya ufayssa qaalay ammaneyssatas imettana mela kumetha alamey nagaras haarettidi de7eyssa Geeshsha Maxaaafay oodees.

<sup>23</sup> Shin ammanoy yaanappe kase higgey nuna qachchi wothis. He ammanoy qonccana gakkanaw higgey nu bolla gorddi wothis. <sup>24</sup> Hessa gisho, nuuni ammanon xillana mela Kiristtoosi yaana gakkanaw higgey na7a naagiya asa mela nuna naageyssa gidis. <sup>25</sup> Shin ha77i ammanoy yida gisho higgey hizappe guye na7a naagiya asa mela nuna naageyssi attis.

<sup>26</sup> Hintte ubbay Yesuu Kiristtoosa ammanidi Xoossaay nayta gidideta. <sup>27</sup> Kiristtoosara issino gidanaw xammaqettida ubbay Kiristtoosa ma7oda ma77ideta. <sup>28</sup> Hintte ubbay Kiristtoosan issino gidiya gisho Ayhude asaa giddoninne Girike asaa giddon, aylle giddoninne womaanno giddon, adde giddoninne maccasa giddon dummatethi baawa. <sup>29</sup> Hiza, hintte Kiristtoosabaa gidikko hintte Abrahame zare. Xoossaay ufayssa qaalada hintte latteyssata.

## 4

<sup>1</sup> Ta geyssi hayssa. Laattey na7aa gidi de7ishe, shalo ubbay iyabaa gidikkoka, I ayllefe aykkoka dummatenna. <sup>2</sup> Shin iya aaway gida wodey gakkanaw I hadara ekkidayssata kusheninne naageyssata kushen de7ees. <sup>3</sup> Hessadakka, nuuni na7atethan de7iya wode

alamiya wogaas ayllettidi de7ida. <sup>4</sup> Shin wodey gakkida wode Xoossay higgefie garssan, maccasappe yelettida ba na7aa kiittis. <sup>5</sup> I hessa oothiday, higgis haarettidi de7eyssata wozanawunne nuna ba nayta oothanaassa.

<sup>6</sup> Nu Xoossa nayta gidiya gisho "Abbaa, Aawaw" gidi xeegiya ba Na7aa Ayyana nu wozanaa giddo kiittis. <sup>7</sup> Hessa gisho, hizappe neeni Xoossa na7appe attin aylle gidakka. Neeni iya na7a gidikko, Xoossa laatneyssa gidadasa.

### *Phawuloosi Galaatiya asaas qoppis*

<sup>8</sup> Hintte kase Xoossa eronna wode xosse gidonnayssatas aylle gididi haarettideta. <sup>9</sup> Shin ha77i hintte Xoossa erideta; ubbarakka Xoossan erettideta. Yaatin pathonnanne go77onna alame wogatakka guye waanidi simmetii? Wodhdhi eqqidi, waanidi enttaw aylle gidanaw koyetii? <sup>10</sup> Dumma gidida gallasata, ageenata, wodetanne laythata hintte loythi bonchcheta. <sup>11</sup> Tana hinttebay yashshees; ta hinttew coo daaburadinaashsha?

<sup>12</sup> Ta ishato, ta hintteda hanida gisho hintteka taada hanite gada hinttena woossays. Hintte tana aybinkka qohibeeekketa. <sup>13</sup> Taani koyro harggettashe hinttew Wonggelaa odidayssa hintte ereeta. <sup>14</sup> Ta harggey hinttew paace gidikkoka, tana saletibekketa; ixibeeeketa. Shin tana Xoossa kiitanchcho woykko Kiristtoos Yesuusa mokkeyssada mokkideta.

<sup>15</sup> Yaatin, he hinttew de7iya ufayssay ubbay aw bidee? Hinttew dandda7ettidaakkko, hintte taw, hintte ayfiya kessidi immiyako ixxonnayssa ta markkattays. <sup>16</sup> Yaatin, ta hinttew tuma odida gisho hinttew morkke gidadinaayye?

<sup>17</sup> He asati hinttena banntako zaaranaw koyoosona, shin entta qofay lo77ossa gi-denna. Entta qofay hinttena shaakkanaassanne hintte enttaw qoppana mela oothanaassa. <sup>18</sup> Lo77obaa oothanaw amottiko lo77o, shin hessi ta hinttera de7iya wode xalaala gidon-nashin ubba wode gido.

<sup>19</sup> Ta siiqo nayto, Kiristtoosi hinttenan misilettana gakkanaw yelos maccasi mi-ixotteyssada ta hintte gisho miixottays. <sup>20</sup> Hinttebay taw haddirssi gidin ta un77ettas; ha77i hintte giddon ta benttada shenetada odiyakko ay mela dosaynashin.

### *Aggaaronne Saaro*

<sup>21</sup> Muse higgen haarettidi daanaw koyeyssato, ane taw odite; higgey ay giyakko erekketii? <sup>22</sup> Geeshsha Maxaafay, "Abrahames ayllefenne godattefe yelettida nam77u nayti de7oosona" yaagees. <sup>23</sup> Aylle na7ay asi na7a yeliya maaran yelettis, shin godatte na7ay Xoossa ufayssaa qaalan yelettis.

<sup>24</sup> Ha maccasati nam77u caaqotas leemiso gididi ekettoosona. Enttafe issinniya, Siina Deriyappe yidaara, ba nayta aylletethas yelasu; iyakka Aggaaro. <sup>25</sup> Aggaara Arabe biittan de7iya Siina Deriyan leemissettada ha77i de7iya Yerusalame daanawusu. Ays giikko, iya ba naytara aylletethan de7awusu. <sup>26</sup> Shin salon de7iya Yerusalamey aylletethan de7ukku; iya nu ubbaas aayo. <sup>27</sup> Geeshsha Maxaafay,

"Naatte, yelonna maynthete ufayta;

naatte miixotta eronnaree ilila.

Azinara de7iya maccaseeppe,

azin baynna maccasees nayti daro" yaagees.

<sup>28</sup> Ta ishato, hintte Yisaqaqada Xoossa ufayssaa qaalan yelettida nayta. <sup>29</sup> Shin he wode asa maarada yelettidayssi, Ayyana wolqqan yelettidayssa goodis. Hachchika hessa mela.

<sup>30</sup> Shin Geeshsha Maxaafay woygi? "Aylle na7ay godatte na7aara issife laattonna gisho ayliiw I na7aara wolla kessa yedda" yaagees. <sup>31</sup> Hessa gisho, ta ishato, nuuni godattee naytappe attin ayllee nayta gidokko.

## 5

### *Kiristtoosan de7iya la77atethaa*

<sup>1</sup> Nuuni la77atethan daana mela Kiristtoosi nuna aylletethaafe kessis. Hiza, minnidi eqqite; zaaridi aylletetha qambbaran geloppite.

<sup>2</sup> Ta, Phawuloosi, geyssa si7ite. Hintte qaxxarettanaw koykko, Kiristtoosi hinttena aykkoka maaddenna. <sup>3</sup> Qaxxarettiya oonikka higgey kiittiya ubbaa polanaw besseyssa gujjada ta odays. <sup>4</sup> Higge naagidi xillanaw koyeyssato, Kiristtoosappe shaakettideta; Xoossa aadho keehatethaafe kunddideeta. <sup>5</sup> Shin nuuni Xoossa Ayyana baggara ammanon xillanaw ufayssan naagoos. <sup>6</sup> Hiza, Kiristtoos Yesuusan de7ikk, siiqon qoncciya ammanoppe attin qaxxarettin, qaxxarettonna aggin nuna aykkoka maaddenna.

<sup>7</sup> Kase hintte lo77o woxxeeta, shin ha77i tumaas kiitettonna mela hinttena diggiday oonee? <sup>8</sup> Hayssa mela iita cimoy hinttena xeegida Xoossaafe yibeenna. <sup>9</sup> Hessika, "Guutha

irshshoy munuqa ubbaa denthees.” geettidi xaafetidayssa mela.<sup>10</sup> Hinttew hara qofí baynnayssas ta Godan ammanettays. Shin hinttena buqiyá oonikka Xoossafe ba pirdaa ekkana.

<sup>11</sup> Ta ishato, ta ha77i gakkanaw qaxxaro sabbakkiyabaa gidikko, yaatin tana ays gooddonaa? Hessi tuma gidiyakko Kiristtoosa masqaliyabaa tamaarssoy asaas dhube gidenashin. <sup>12</sup> Hinttena buqeyssati qaxxaretetha xalaala gidonnashin bantna qaariatyakkoka ta dosays.

<sup>13</sup> Ta ishato, hintte la77a daanaw xeegettideta. Gidoshin, hintte la77atethay asho amo polanaw hinttew gaaso gidoppo; hessafe aathidi issoy issuwa siiqon maaddite.<sup>14</sup> Higge ubbay, “Ase needa dosa” yaagiya issi qaalan qashettis. <sup>15</sup> Shin hintte issoy issuwarä saxetiyyabaanne meetettiyyabaa gidikko, hintte woli wurssonna mela naagettite.

#### *Ayyaana de7onne asho de7o*

<sup>16</sup> Hiza, ta hinttew odays; Ayyaanán de7ite; hintte asho amuwaal poloppite. <sup>17</sup> Asho amoy Ayyaana amuwaara morkke; qassi Ayyaana amoykka asho amuwaara morkke. Entti issoy issuwa ixettiya gisho hintte dosiyabaa oothanaw dandda7ekketa. <sup>18</sup> Shin Ayyaanay hinttena kaalethiyabaa gidikko higgey hinttena haarena.

<sup>19</sup> Asho oosoti erttidayssata; enttika, laymatethi, tunatethi, qayxe,<sup>20</sup> eeqa goynno, bita, morkketethi, kachchi, qanaate, hanqo, bana doso, shaakethethi, iita tobbe<sup>21</sup> gene, matho, yethinne hessa hessa melata. Kase ta hinttew odidayssada ha77ika ta hinttew odays. Hayssa melabata ooheyssati Xoossaa kawotethaa laattokona.

<sup>22</sup> Shin Ayyaana ayfey, siiqo, ufayssi, sarotethi, dandda7a, keehatethi, lo77otethi, ammano,<sup>23</sup> ashkketethi, bana haaro. Hayssa melabata ixxiya higgey baawa.

<sup>24</sup> Kiristtoos Yesuusabaa gididayssati bantta ashuwa iya iita qofaranne iya amuwaara issife masqaliya bolla kaqqidosona. <sup>25</sup> Nu Ayyaanán de7iyabaa gidikko, nuna Ayyaanay kaaletho. <sup>26</sup> Ane issoy issuwa yiloyishen qanaatishe coo ceeqetteyssaa aggoos.

## 6

#### *Issoy issuwa maaddite*

<sup>1</sup> Ta ishato, issi asi nagaran kunddiko, Ayyaanán de7iya hintte he uraa ashkketethan suurisite. Shin neeni hessa melaban paacettonna mela nena naaga. <sup>2</sup> Issoy issuwa deexo toohuwa tookkite. Yaatikko Kiristtoosa higgiya poleeta. <sup>3</sup> Issi asi aykkoýka baawashin, bana haratappé lo77o gidi qoppiko, I bana cimmees. <sup>4</sup> Shin issi issi asi ba oosuwa paacco. Hessafe guye, haratara bana gaaddeyeyssa aggidi baw ceeqettiyabaa demmées. <sup>5</sup> Issi issi asi ba toohuwa baw tookkanaw besseyes.

<sup>6</sup> Xoossaa qaala tamaariya oonikka lo77obaa ubbaa ba asttamaariyara shaakettees.

<sup>7</sup> Hinttee, hinttena cimmofite. Asi ba zeridabaa zaaridi cakkiya gisho Xoossaa bolla qelqisoppite. <sup>8</sup> Ba asho amuwaal kunthanaw zeriya oonikka, ba asho amuwaappe hayqo buuccana. Shin Ayyaananaa ufayssanaw zeriya oonikka Ayyaanaappe merinää de7o cakkana. <sup>9</sup> Ane lo77o ooso oothanaw azalleyssa aggoos. Nuuni azallonna ixxiko wodey gakkiya wode nu zeridayssa cakkana. <sup>10</sup> Nu inje wode demmiko, asa ubbaas, aathidikkä ammanniyya asaas lo77obaa oothoos.

#### *Wurssetha zorenne sarota*

<sup>11</sup> Taani ta kushen, ay mela gitá pidaalen hinttew xaafidaakko be7ite. <sup>12</sup> Asa sinthan lo77o gididi benttanaw koyaa asati hintte qaxxaretetha mela koyosona. Shin hessa entti oohey, Kiristtoosa masqaliya gisho enttana goodi gakkonna melassa. <sup>13</sup> Entti hintte qaxxaretethan ceeqettanaw koyidi hinttena qaxxaretto goosonappe attin qaxxaretidisatikka bantta huu7en higgiya naagokkona.

<sup>14</sup> Shin alamey taw kaqettidayssafenne taanikka alamiyas kaqettida, Godaa Yesuus Kiristtoosa masqaliyappe attin hara ceeqetethi taappe haakko. <sup>15</sup> Hiza, qaxxarettin qaxxarettonna aggin aykkoka maaddenna. Maaddey oratha medhetethi gido. <sup>16</sup> Ha wogaa kaalliya ubbaasinne Xoossaa dere gidida Isra7eeles sarotethaynne maarotethay gido.

<sup>17</sup> Taani Yesuusas madunxida beeta ta asatethan tookkida gisho hizappe tana oonikka waaysoppo.

<sup>18</sup> Ta ishato, nu Godaa Yesuus Kiristtoosa aadho keehatethay hinttera gido. Amin77i.

## Phawuloosi Efesoona Asaas Xaafida Kiitaa Gaatha Qofaa

Phawuloosi Efesoonan de7iya asaas xaafida kiitan ubbaafe aathidi xeellidabay, "Wodey gakkiya wode Xoossay polanaw qoppida qofay, saloninne sa7an de7iya medhetetha ubbay Kiristtoosappe garssan gidana melassa" yaagiya qofaa (1:10). Hessa bolla gujjidi Yesuus Kiristtoosara de7iya issifetethan, asa zerethi ubbay issino gidana mela ha gita qofaa ooson peeshshana mela Xoossaas asaa hassayisees.

Efesoona kiitaa koyro kifiliyan xaafey kaara qofa gidida issifetethabaa xaafanaw doomidayssa dalggisidi, Xoossaas Aaway ba asaa waati dooridaakkko, enttika iya na7aa, Yesuus Kiristtoosan banitta nagaraappe maarota demmidi waanidi la77a keyidaakkonne, Xoossaas gita ufayssa qaalay Geeshsha Ayyaana baggara tuma gideyssi erettidaakkko oodees. Nam7antho kifiliyan qassi xaafey ha kiitaa nabbabiya assay bantta issifetethaa de7uwan Kiristtoosan enttaw de7iya issifetethay tuma gidana mela entti waanidi daanaw bessiyako qofisees.

Asay Kiristtoosan de7iya issifetethaa waanidi daanaw bessiyako dumma dumma leemison qonccis. Woosa keethi asatethaa leemiso gidiya wode Kiristtoosi he asatethaa huu7e. Woosa keethi gimbbe keethan leemisettiya wode Kiristtoosi he keethaa godaa xaphuwa minthiya waanna shuchchaa. Woosa keethi machchin leemisettiya wode Kiristtoosi azinan leemisettis. Xaafey Kiristtoosa baggara qonccida Xoossaas aadho keehatethaa daro nashshidi odishe, giddoy ciimmottiya haasaya haasayees. I ubbabaa, Kiristtoosa siiquwa, iya yarshshetethaa, I immida nagara atotethaa, iya aadho keehatethaanne iya geeshshatethaa baggara xeelées.

### **Efesoona kiitaa ayfe qofata**

Sarotho 1:1-2

Kiristtoosanne woosa keethi 1:3-3:21

Kiristtoosan de7iya ooratha de7uwa 4:1-6:20

Kuushsha qofaa 6:21-24

<sup>1</sup> Xoossaas shenen Kiristtoos Yesuusa hawaare gidida Phawuloosappe, Efesoonan de7iya geeshshatasinnee Kiristtoos Yesuusa ammaneyssatas xaafetida kiitaa.

<sup>2</sup> Xoossaas nu Aawappenne Godaa Yesuus Kiristtoosappe aadho keehatethaynne sarotethay hinttew gido.

*Kiristtoosan de7iya ayyaana anjuwaa*

<sup>3</sup> Salon de7iya ayyaana anjo ubban Kiristtoosa baggara nuna anjjida, nu Godaa Yesuus Kiristtoosa Aaway, Xoossay galatetto. <sup>4</sup> Nuuni iya sinthan geeshshatanne borey baynnayssata gidana mela Xoossay alamey medhettanaappe kase Kiristtoosa baggara ba siiquwan nuna dooris. <sup>5</sup> Xoossay ba sheniyaa ba dosidayssada Yesuus Kiristtoosa baggara nuna ba mayta oothanaw kasetidi qoppi wothis. <sup>6</sup> Xoossay ba siiqiya Na7aa baggara nuus coo immida aadho keehatethay bonchchettana mela hessa oothis.

<sup>7</sup> Xoossaas aadho keehatethaa duretethaada Kiristtoosa suuthan wozettidi nagara atotethaa demmida. <sup>8</sup> Ba aadho keehatethaa cincatethaninne eratethan kunthidi nuus immis. <sup>9</sup> Xoossay ba dosidayssada Kiristtoosa baggara iya sheniyaa xuuraa nu erana mela oothis. <sup>10</sup> Wodey gakkiya wode Xoossay polanaw qoppida qofay, saloninne sa7an de7iya medhetetha ubbay Kiristtoosappe garssan gidana melassa.

<sup>11</sup> Ubbabaa ba sheniyada oothiya Xoossay, kasetidi ba qoppi wothidayssada Kiristtoosa baggara nuuni iyabaa gidana mela nuna dooris. <sup>12</sup> Hessa I oothiday, Kiristtoosan ufayssi wothidi naagon koyro gidida nuuni Xoossaas bonchchuwa galatan qonccisana melassa. <sup>13</sup> Hintteka hintte atotethaa Wonggelaa, hessika tuma qaala si7ida wode Kiristtoosa ammanideta. Xoossay hinttew immana gida Geeshsha Ayyaanan hintte attamettideta. <sup>14</sup> Xoossaas bonchchoy galatettana mela Xoossay ba asaa wozana gakkanaw Geeshsha Ayyaana nuus oythu oothidi immis.

*Phawuloosa woosaa*

<sup>15</sup> Hessa gisho, Godaa Yesuusa hintte ammaneyssanne geeshshata ubbaa hintte siiqeyssa ta si7ida wode <sup>16</sup> ta woosan hinttena qoppashe hintte gisho Xoossaas galateyssa aggabikke.

<sup>17</sup> Godaa Yesuus Kiristtoosa Xoossay, bonchcho Aaway, Xoossaas hintte aathi eranaada cincatethaanne qonccetha ayyaana hinttew immanaada taani Xoossaas woossays. <sup>18</sup> Xoossay

hinttena xeegida ufayssayne geeshshati laattiya bonchcho laatay ay mela darookko hintte erana mela Xoossay hintte wozana ayfiyaa dooyana mela taani Xoossa woossays.

<sup>19</sup> Qassi iya ammaniyaa nunan oothiya iya wolqqay ay mela aadhdhida giteekko hintte erana mela woossays. He wolqqay xoonetonanne daaburonna wolqqaa. Ha nunan de7idi oothiya wolqqaynne, <sup>20</sup> Kiristtoosa hayqoppe denthidi, salon Xoossaafe ushachcha baggara utisida gita wolqqay issino. <sup>21</sup> Iya sunthay, ayseyssatappenne maata aawatappe, haareyssatappenne godatappe, bolla gididi ha alamiya xalaalan gidonnashin sinthafe yaana alamiyankka hara sunthata ubbaafe dhoqqa. <sup>22</sup> Xoossay ubbaa Kiristtoosa to-huwappe garssan haaris; qassi woosa keethan ubbabban Goda gidana mela iya shuumis. <sup>23</sup> Woosa keethay Kiristtoosa kumethi oothiya iya asatethaa. Medhetethay de7iya bessa ubban Kiristtoosi ba huu7en ubbabaa kuntheyssa.

## 2

### *Kiristtoosan hayqoppe de7o pinethi*

<sup>1</sup> Hayssafe kase hinttee, hintte nagaraanne hintte qohuwa gaason hayqqidayssata. <sup>2</sup> He wode hintte ha alamiya iita ogiya kaallideta. Carkkuwa bolla de7iya ayyana wolqqata halaqaasinne ha77ika Xoossaas kiettonna asaa haariya ayyanas kiiftetideta. <sup>3</sup> Nu ubbayka kase he asata giddon nu asho amuwaanne nu wozanaa sheniya kaallidi de7ida. Nukka harata mela nu medhetethan Xoossa hanquwa ekkanaw de7eyssata.

<sup>4</sup> Shin Xoossa gita maarotethaafenne nuus de7iya gita siiquwappe denddidayssan, <sup>5</sup> hari attoshin nuuni nu qohuwan hayqqidi de7ishin Kiristtoosa baggara nuus de7o immis. Hintteka attiday Xoossa aadho keehatethaana. <sup>6</sup> Xoossay nuna Kiristtoosara issife hayqoppe denthidi salo sohuwan iyara issife wothis. <sup>7</sup> I hessa oothiday, Kiristtoos Yesuusa baggara nuus qonccisida ba keehatethaanne zawi baynna ba aadho keehatetha duretethaa yaana laythan nuna bessanaassa. <sup>8</sup> Hintte aadho keehatethan ammanon attideta. Hessika, Xoossa imotappe attin hintte ooson benttidabaa gidenna. <sup>9</sup> Oonikka ceeqettonna mela atotethay benttiday ooson gidenna. <sup>10</sup> Nuuni Xoossa medhetethi; I nuus kasetidi giigisi wothida lo77o oosota oothana mela Kiristtoos Yesuusa baggara ororathi medhettida.

### *Kiristtoosara de7iya issifetethaa*

<sup>11</sup> Hessa gisho, hinttenoo yeletan Ayhude gidonnayssato, Ayhudeti bantaw asa kushen qaxxarettidi, hinttena qassi qaxxarettiboonayssata gidi xeegeyssaa akeekite. <sup>12</sup> He wode hintte Kiristtoosappe shaaketti de7idayssa, Isra7eele asaas allaga gididi de7idayssa, Xoossa ufyassa qaalappe haakkidi de7idayssanne ha alamiyan ufyassinne Xoossi baynna de7idayssa akeekite. <sup>13</sup> Shin hintte kase haakkidi de7idayssati, ha77i Kiristtoos Yesuusan de7idi Kiristtoosa suuthan mata shiiqidet.

<sup>14</sup> Kiristtoosi nu sarotethaa; I Ayhudenne Ayhude gidonna asaa timidi, nam77aa shaakki wothida morkketetha godaa laallis. <sup>15</sup> I banan ha nam77u zaretappe issi ooratha ase medhdhidi, higgija iya kiitaranne wogatara issife ba asatethan dhayssidi sarotethi immis. <sup>16</sup> Kiristtoosi masqaliya bolla hayqqidi morkketethaa dhayssis; qassi nam77u zareta issi asatethi oothidi Xoossaara sigethis. <sup>17</sup> Kiristtoosi yidi, Xoossaafe haakkidi de7iya hintte, qassi matidi de7iya enttaw sarotetha Wonggelaa odis. <sup>18</sup> Nu ubbay iya baggara issi Ayyaan Aawa sinthe shiiqanaw dandda7os.

<sup>19</sup> Hizappe hintte allaga woykko imathe gidekketa, shin hintte ha77i geeshshata biittaa asinnee Xoossa soo asi. <sup>20</sup> Hintte hawaaretinne nabeti baasida baasuwa bolla keexettideta. Godaa xaphuwa minthiya shuchchay Kiristtoos Yesuusa. <sup>21</sup> Iyan keetha ubbay issife oykettidi Godan geeshsha Xoossa keethi gidanaw diccees. <sup>22</sup> Hintte qassi Xoossay ba Ayyaan de7iya keethi gidanaw Kiristtoosan issife keexetteta.

## 3

### *Ayhude gidonna asaas hawaare gidida Phawuloosa*

<sup>1</sup> Hessa gisho, taani, Phawuloosi, Ayhude gidonna hintte gisho Kiristtoos Yesuusan qasho asi gidas. <sup>2</sup> Ta hinttena maaddana mela Xoossay ba aadho keehatethan taw immida ha oosuwabaa hintte loythi si7ideta. <sup>3</sup> Ta hinttew kase qanthan xaafidayssada Xoossay ba xuuraa qonccethan taw qonccisis. <sup>4</sup> Ta xaafidayssa hintte nabbabiya wode Kiristtoosa xuuraa ta ay mela eridaakkoo hintte akeekanaw dandda7eeta. <sup>5</sup> Ha xuuray geeshsha hawaaretasinne nabetas ha77i Ayyanaa baggara qonccidayssada beni wode asaas hessada qonccisibeenha. <sup>6</sup> Xuuray hayssa: Ayhude gidonna asay Wonggelaa baggara Isra7eeletara

issife Xoossaa anjuuwaa laattoosona. Isra7eeletara issi keetha asi gidoosona; Kiristtoos Yesuusa baggaara Xoossaa ufayssa qaala ekkoosona.

<sup>7</sup> Xoossay ba oothiya wolqqa baggara taw immida aadho keehatethan ha Wonggelas oosanchcho gidas. <sup>8</sup> Taani geeshshata ubbaafe laafa gidikkoka Ayhude gidonna asaas zawi baynna Kiristtoosa duretethaa Wonggelaa odana mela ha aadho keehatethay taw imettis. <sup>9</sup> Qassi kase wodiyaa ubbaa medhdhida Xoossan qosettidi de7iya xuuras, Xoossaa qofay aybeekko qonccisanaw aadho keehatethay taw imettis. <sup>10</sup> Xoossay hessa oothiday ha77i wodiyaa woosa keetha baggara salo sohuwan de7iya halaqatasinne haareyssatas ba dumma dumma qonccethaa erisanaassa. <sup>11</sup> Xoossay ba merinaa qofaa nu Godaa Kiristtoos Yesuusa baggara polanaw hessa oothis. <sup>12</sup> Nu ammanon yashshi baynna Xoossako shiqana mela Kiristtoosi nuus minutethinne la77atethi immis.

<sup>13</sup> Taani hintte gisho waaye ekkya gisho hintte ta waayan yeellatonnaada hinttena woossays; taani hintte bonchchuwas waayettays.

#### *Efesoona asaas woosettida woosaa*

<sup>14</sup> Taani aawa sinthan gulbbatada woossey hessa gishossa. <sup>15</sup> Saloniinne sa7an de7iya issi issi soo asay iyan sunthettees. <sup>16</sup> Xoossay ba bonchcho duretethaafe hintte garssa asatethaa minthiha wolqqa ba Ayyaana baggara immana mela hinttew woossays. <sup>17</sup> Qassi ammanon Kiristtoosi hintte wozanan daana melannee hintte siiqon xapho yeddidi minnidi daana mela woossays. <sup>18</sup> Hessadakka, Kiristtoosa siiqoy ay mela dalggeko, adusseeko, dhoqqekonne ciimmooko geeshshata ubbaara eriya wolqqa hintte akeekana mela woossays. <sup>19</sup> Erateethaafe aadhdiya Kiristtoosa siiquwa hintte erana mela qassi de7o immiya Xoossaa wolqqan hintte kumana mela ta woossays.

<sup>20</sup> Hiza, nu giddon oothiya ba wolqqa baggara nuuni woosseyssafe woykko poppeyssafe aathidi oothanaw dandda7iya Xoossas, <sup>21</sup> woosa keethaninne Kiristtoos Yesuusan wode ubban merinaappe merinaa gakkanaaw bonchchoy gido. Amin77i.

## 4

#### *Kiristtoosara de7iya issifetethaa*

<sup>1</sup> Hiza, Godaa gisho qashettida taani, hintte xeegettida xeessas bessiya de7o daana mela hinttena woossays. <sup>2</sup> Hintte ubba wode aadanne hayo gidite; issyo issuwa dandda7itenne siiqon de7ite. <sup>3</sup> Sarotethan qashettidi Ayyaanay immiya issifetethaa naaganaw minnite. <sup>4</sup> Xoossay hinttena xeegida wode issi ufayssas xeegidayssada issi asatethinne issi Ayyaani de7ees. <sup>5</sup> Issi Goday, issi ammanoynne issi xinqqatey de7ees. <sup>6</sup> Ubbaafe bolla gidida, ubbaa baggara oothiyanne ubbaa giddon de7iya issi Xoossay, ubbaa Aaway de7ees.

<sup>7</sup> Shin Kiristtoosi immanaw koyidayssada nu issyo issyo dumma dumma imota ekkida.

<sup>8</sup> Hessa gisho, Xoossaa qaalay,

"I pude keyida wode

di7ettida darota baara ekkidi bis;

asaaskka imota immis"

yaagees. <sup>9</sup> Yaatin, "Pude keyis" guussay woy guussee? I koyro duge, sa7aa ziqqa bessaa wodhdhis guussu gidonna ixxiko ay gussee? <sup>10</sup> Ha duge wodhdhidayssi, ubba bessan benttanaw ubbaafe dhoqqa saluwa keyidayssi iya.

<sup>11</sup> I issota issota hawaareta, issota issota nabeta, issota issota Wonggela sabaaketa, issota issota woosa keethi heemmeysata, issota issota asttamaareta oothidi immis. <sup>12</sup> I hessa oothiday Kiristtoosa asatethi gidida woosa keethi dichchanawunne ammaniyyaa asaa Xoossaa oosos giigisanaassa. <sup>13</sup> Hessadakka, nu ubbay Xoossaa Na7aa eridi ammanon benttiya issifetethaakkoo gakkidi, Kiristtoosa ayyana de7uwa kumethaa gakkidi diccana mellassa.

<sup>14</sup> Hizappe guye, asaa gene cimon giigida balethiya worddo timirtte carkkoninne hobben gedenne haa kuullo kaa7iya nayta mela gidanaw bessenna. <sup>15</sup> Shin nuuni tumaa siiqon odishe asatethas huu7e gidiya Kiristtoosara de7iya issifetethaa guji guji dichchoos. <sup>16</sup> Kumetha asatethay Kiristtoosa bolla zemppees qassi dumma dumma asatetha billiteti issyo issuwarra oykettidi uttis. Issi issi asatetha kifiley ba oosuwa oothiya wode kumetha asatethay siiqon diccees.

#### *Kiristtoosan ooratha de7o*

<sup>17</sup> Hessa gisho, taani hayssa hinttew Godaa sunthan odaysinne markkattays. Go77i baynna qofaa qoppia Ayhude gidonna asatada de7oppite. <sup>18</sup> Entta qofay dhumis; bantta wozanaa muumisidosona. Entti eratetha dhayoninne ixxas gidi Xoossay immiya

de7uwappe haakkidosona. <sup>19</sup> Entti yeella giyabaa erokkonna; entti laymatethas banttana aathi immidosona; qassi tunabaa ubbaa guye goonna ooothosona.

<sup>20</sup> Shin hintte Kiristtoosa eriday hessa mela ogen gidenna. <sup>21</sup> Iyabaa tuma si7ideta. Qassi Yesusan de7iya tumaa mela iyappe tamaarideta. <sup>22</sup> Hintte kase de7iya de7o ogiya aggite. Qassi ba cimmiya amon dhaya hintte ceega asatethaa diggite. <sup>23</sup> Hintte wozanaa qofan oraxite. <sup>24</sup> Tuma xillotethaninne geeshhatethan Xoossaa leemison medhettida oratha asatethaa ma77ite.

<sup>25</sup> Hiza, worddo odetofite. Nuuni ubbay Kiristtoosa asatethaa billiteta gidiya gisho asa ubbaara tuma odettite. <sup>26</sup> Hangettite, shin hintte hanquwan nagara oothofite. Hintte hanqeti de7ishin awi wullofo. <sup>27</sup> Xalahes besse imhofite. <sup>28</sup> Kaysiya uray hizappe guye kaysotoppo. Shin manqota maaddiyabay iyaw daana mela ba kushen lo77obaa ootho.

<sup>29</sup> Hintte doonappe iita qaali keyoppo. Shin si7eyssata go77ana melanne harata minthethiya koshshiya lo77o qaali hintte doonappe keyo. <sup>30</sup> Xoossay hinttena woziya gallasaas hinttena attamidi wothida Xoossaa Ayyaana azzanthofite. <sup>31</sup> Cametethi, yilo, hanqo, waaso, cashshenne iita ubbaa hinttefe haassite. <sup>32</sup> Aathidi issov issuwash keehanne qadheteyssata gidite. Xoossay Kiristtoosa baggara hinttew atto gidayssada hintteka wolis atto gitte.

## 5

<sup>1</sup> Hiza, Xoossay dosiya naytada iya daanite. <sup>2</sup> Kiristtoosi nuna dosidi bana nu gisho Xoossaas sawiya imonne yarshsho oothidi immidayssada hintteka siiqon de7ite.

<sup>3</sup> Shin laymatethi, tunatehinne uuzetethi ammniyaa asaas bessonaa gisho hintte giddon ubbaraka si7ettofo. <sup>4</sup> Xoossaas galatitepppe attin yeellayabaynne eeya odi woykko qidhey hinttew bessonaa gisho hintte giddon ubbaka de7oppo. <sup>5</sup> Hayssa erite; oonikka laymatey woykko tunabaa oothey woykko uuzetey Kiristtoosa kawotethaanne Xoossaas kawotethaa laattanaw dandda7enna. Uuzetethi eeqa goynno mela.

<sup>6</sup> Hayssata gaason Xoossaas hanqoy kiitettonna asaa bolla yaana gisho oonikka hinttena pathonna odan cimmofo. <sup>7</sup> Hessa mela asaara issifetethi oothofite. <sup>8</sup> Kase hintte dhu-man de7ideta, shin ha77i Godaa baggara poo7on de7eeta. Hiza, poo7o asada poo7on simerettie. <sup>9</sup> Poo7oy lo77otethi, xillotethinme tumatethi ayfees.

<sup>10</sup> Godaa ufayssiyabaa oothanaw koyite. <sup>11</sup> Go77i baynna dhuma ooso qonccisiteppe attin iyara issifoppe. <sup>12</sup> Entti geeman oothiya oosuwa hari attoshin odanawukka yeellayees. <sup>13</sup> Shin ubbabay poo7on keyaa wode qonccen benttees. <sup>14</sup> Poo7oy ubbabaa qonccen bessees. Hessa gisho,

“Neno dhiskkeyssso barkka;

hayqoppe dendda;

Kiristtoosi ne bolla poo7ana” yaagettis.

<sup>15</sup> Hiza, hintte waanidi de7iyakko akeeki be7ite. Cincata giditepppe attin eeyata gidoppite. <sup>16</sup> Laythay iita gidiya gisho injjetiya wode ubbaa go7ettite. <sup>17</sup> Hessa gisho, Godaa sheney aybekko akeekitepppe attin eeyoppe.

<sup>18</sup> Geeshsha Ayyaan gallas gallas kumitepppe attin dhayokko hinttena kaaletiha gisho woyne ushshan mathottofite. <sup>19</sup> Mazmuren, sabarinne ayyaana yethan, issov issuwara odetite. Qassi hintte wozanan zammarishenue sabbishe Godaa galatite. <sup>20</sup> Nu Godaa Yesuu Kiristtoosa sunthan ubba wode Xoossaa Aawa ubbabaas galatite.

<sup>21</sup> Kiristtoosa bonchchuwas gidi issov issuwash haarettite.

### Azinabaanne machchibaa

<sup>22</sup> Machcheto, Godaa haaretteyssada hintte azinatas haarettite. <sup>23</sup> Kiristtoosi woosa keethaa huu7e gideyssada azinikka ba machchees huu7e. Qassi Kiristtoosi ba asatethi gidida woosa keethaa ashsheyssa. <sup>24</sup> Shin woosa keethay Kiristtoosas haaretteyssada machchethi bantta azinatas ubbaban haarettanaw bessees.

<sup>25</sup> Azinatoo, Kiristtoosi woosa keethaa dosidi bana iw immidayssada hintteka hintte machcheta dosite. <sup>26</sup> I woosa keethaa ba qaala baggara haathan meeccidi geeshshis. <sup>27</sup> Kiristtoosi woosa keethaa qiti woykko som77o tuussi woykko hessa melabay baynna I kumetha bonchchuwarra geeshshinne borettonnaaro oothidi baakko shiishanaw koyidi hessa oothis. <sup>28</sup> Hessadakka, azinati banttana doseyssada bantta machcheta dosanaw bessees. Ba machchiw doseyssi bana dosees. <sup>29</sup> Bana ixxiya asi oonikka baawa, shin

Kiristtoosi woosa keethaas ootheyssada ba asatethaa muzeesinne naagees. <sup>30</sup> Nuuni Kiristtoosa asatethaa billiteta.

<sup>31</sup> Xoossaa qaalay, "Hessa gisho, asi ba aawanne ba aayiw aggidi, ba machcheera issife daana; entti nam77ayka issi asho gidana" yaagees. <sup>32</sup> Hayssi gita xuura, shin taani hessa Kiristtoosabaanne woosa keethabaa leemiso oothada odays. <sup>33</sup> Gidoshin, hintte issov issov hintte machcheta hinttee, hinttena doseyssada dosite. Issi issi machcha ba azinaa bonchchanaw bessees.

## 6

### *Naytabaanne yelidayssatabaa*

<sup>1</sup> Nayto, hintte Godaaba gidiya gisho hinttena yelidayssatas kierttite. Hessi hinttew bessiyabaa. <sup>2</sup> "Ne aayiwunne ne aawa bonchcha." Hessi ufyassa qaalid de7iya koyro kuitaa. <sup>3</sup> "Ne hessa poliyabaa gidikko ubbay new injetana; ne laythay sa7a bolla aduugqana."

<sup>4</sup> Aawato, hintte nayta Godaa qaala tamaarssoninne entta kaaleson dichchiteppe attin enttana caamisopite.

### *Godatabaanne aylletabaa*

<sup>5</sup> Aylletto, Kiristtoosas kiertteyssada hintte sa7a godatas yashshan, bonchchoninne suure wozanana kierttite. <sup>6</sup> Entta sinthan saba demmanaw entti be7iya wode xalaala oothofite. Shin Kiristtoosa aylletada Xoossaa sheniya wozanappe polite. <sup>7</sup> Asas gidonnashin Godaas gidi hintte kumetha wozanappe oothite. <sup>8</sup> Aylle gidin woykko goda gidi issov issov ba oothida lo77o oosuwas Godaappe woyto ekkayanssa ereeta.

<sup>9</sup> Godata, asa som77o be7idi maaddonna Goday, saluwan de7eyssaa ereeta. Hessa gisho, hintte aylleta manddeyssa aggidi entti hinttew bonchchon kiertteyssaa mela hintte enttaw lo77obaa oothite.

### *Xoossaa ola miishta*

<sup>10</sup> Wurssethan, Godaaninne iya gita wolqqan minnite. <sup>11</sup> Xalahe cimuwa eqettanaw dandda7ana mela Xoossay hinttew immida ola miishiya ubbaa ma77ite. <sup>12</sup> Nu olay asara gidonnashin sal de7iya tuna ayyaana olanchchotara, maata awatara, haareyssataranne ha dhuma alamiya wolqqatara.

<sup>13</sup> Hessa gisho, iita gallasaa tegqanawunne ubbaa polidi, minnidi eqqanaw hintte dandda7ana mela Xoossaa ola miishta ubbaa ma77ite. <sup>14-15</sup> Tumaa xeessan danccoda danccidi, xillotethaa xurreda tiran wothidi, sarotethaa Wonggelaa hintte tohuwan caammada aathidi minnidi eqqite. <sup>16</sup> He ubbaafe aathidi, Xalahey yeddiya laxiya tama dongge ubbaa toysanaw dandda7iya ammanuwa ubba wode gonddaldeeda oykkite. <sup>17</sup> Xoossaa atotetha biraata barnneexada hintte huu7en wothite; qassi Geeshsha Ayyaana mashshaa, ikka Xoossaa qaala oykkite. <sup>18</sup> Woossa aggoftie; harataskka gaannatite; ubba wode Ayyaanan woossite. Hessian, geeshshatas salettonna minnidi ubba wode woossite.

<sup>19</sup> Taani Wonggelaa xuuraa yashshi baynna qoncisia odana mela Xoossay taw qaala immaa mela woossite. <sup>20</sup> Taani hessa oothanaw kiertetas ha77ika qashon de7ey he Wonggelaa gishossa. Yaaniya gisho, taani yashshi baynna besseyssada odana mela taw woossite.

### *Wurssetha saro tho*

<sup>21</sup> Taani waana de7iyakkonne ay oothiyako hintte erana mela nu siiqo ishay, Godaa oosuwan ammanettida oosanchchoy, Tikiqoosi, tabaa ubbaa hinttew odana. <sup>22</sup> Nuuni ubbay waanidi de7iyakko hinttew odana melanne hinttena minthethana mela taani iya hintteko kiittas.

<sup>23</sup> Xoossaa Aawappe, Godaa Yesuus Kiristtoosappe sarotethaynne siiqoy ammanora issife ammaniyaa ubbaas gido. <sup>24</sup> Irxxonna siiqon nu Godaa Yesuus Kiristtoosa siiqiya ubbaara Xoossaa aadho keehatethay gido.

## Phawuloosi Filphisiyuusa Asaas

### Xaafida Kiitaa Gaatha Qofaa

Phawuloosi Filphisiyuusa asaas xaafida kiitay xaafetiday, Roome biittan Maqedooniya awurajjan, Filphisiyuusa biittan de7iya woosa keethaassa. He woosa keethay Phawuloosi Awuroppa biittan koyro essida woosa keethi. Ha kiitay xaafetiday, Phawuloosi qasho keethan de7iya wode hara ammaniyaa oosanchhoti iya ixxida wodenne Filphisiyuusa woosa keethan dendida worddo timirttiya gaason iya wozanay daro azzanida wode. Gidoshin, Phawuloosi Yesuuus Kiristtoosa minthidi ammaniyaa gisho ha kiitan qonccidi benttey, ufayssinne kumetha ammanetethi. Filphisiyuusan de7iya daro asay Roomeppe di7ettidi yida asi. Entti Roome biittaas mishettoosonanne loythi naagoosona. Enttafe issoti issoti ammanidi bantta biitta asan goodettidosona. He gooday entta bolla metonne manqotethi ehis (Ha.O 16:20-21).

Phawuloosi ha kiitaa xaafida koyro gaasoy iya metuwa wode iya maaddanaw Filphisiyuusa ammaniyaa asay imota iyaw yeddida gisho entta galatanaassa. Iya bollanne entta bolla dumma dumma metoy gakkidabaa gidikkoka entti minettana melanne kumethi ammanettidi daana mela ha demmida injijyan entta minthethees. Ceeqonne otoro aggidi, Yesuuus Kiristtoosa ashkketethan entti kumana mela minthidi entta akeekisees. Yesuuus Kiristtoosara issife gidon entti demmida de7oy Xoossa aadho keehatethaafe pulttidayssanne ammanon entti ekkidayssafe attin Ayhudeta wogaa polon benttidabaa gidonnayssa entta akeekisees. Yesuuus Kiristtoosara issife de7iya ubbaas Xoossay immiya sarwanne ufayssaa enttaw xaafees.

Ha kiitay erettey ufayssi, ammanetethi, issifetethinne ammanon minnidi de7o qoncidi sidi besseyssana. Hessa bolla gujjidi, Phawuloosi Filphisiyuusa woosa keethaa siiqiya gita siiquwa onccisees.

#### **Filphisiyuusa kiitaa ayfe qofata**

Gelo qofaa 1:1-11

Phawuloosi hanidi de7iya duussaa 1:12-26

Ammanon leemiso de7o 1:27-2:18

Ximotiyosasinne Ephphafiraditus de7iya qofaa 2:19-30

Morkketappenne iitatappe naagetethi 3:1-4:9

Phawuloosanne Filphisiyuusa ammaniyaa asaa 4:10-20

Sarothonne anjoo 4:21-23

<sup>1</sup> Kiristtoos Yesuuusara issifida gisho Xoossabaa gidida, Filphisiyuusa kataman de7iya woosa keethaa cimatassinne daaqoneta ubbaas. Yesuuus Kiristtoosa aylle gidida, Phawuloosappene Ximotiyosapape kiitettida kiitaa.

<sup>2</sup> Nu Aawa Xoossaafenne Godaa Yesuuus Kiristtoosapape aadho keehatethaynne sarothethay hinttew gido.

#### *Phawuloosa galata woosaa*

<sup>3</sup> Taani hinttene qoppiya wode ubban, ta Xoossaa galatays. <sup>4</sup> Taani hinttē ubbaas Xoossaa woossiya wode ufayssan woossays. <sup>5</sup> Hinttē koyro gallasapape ha77i gakkanaw, Wonggelaa markkatteyssan taara issife gididi, tana maaddida gisho Xoossaa galatays. <sup>6</sup> Hinttē giddon lo77o ooso doomida Xoossay, Kiristtoos Yesuuusi simmiya gallasay gakkanaw, polanayssa erays.

<sup>7</sup> Hinttē ubba wode ta wozanan de7eeta. Taani ubba wodekka hessada qoppanaw bessees. Ha77i taani qashon de7ashenner qashettanaappe sinthe Wonggelaa naagoninne Wonggelaa mintha eson Xoossay taw qaadida qaadida hinttēka taara shaakettideta. <sup>8</sup> Taani hinttē ubbaa Kiristtoos Yesuuusi siiquwan ay mela laamotiyakko Xoossay taw markka.

<sup>9</sup> Hinttē siiqoy tuma eratetharanne akeekara issife gujji gujji diccana mela Xoossaa woossays. <sup>10</sup> Hessan hinttē lo77obaa shaakkidi, dooreyssata, Kiristtoosi simmiya gallasan geeshshatanne borettonnayssata gidana. <sup>11</sup> Hinttē de7oy Xoossaa bonchchuwasinna galatas Yesuuus Kiristtoosa baggara benttiya xillotethaa ayfiyaan kumidi ayfana.

#### *Phawuloosa qashetethay Wonggelay dalggana mela maaddis*

<sup>12</sup> Ta ishato, tana gakkida ubbay Wonggelay dalggana mela tuma maaddidayssaa hinttē erana mela koyays. <sup>13</sup> Taani Kiristtoosa gisho qashettidayssa, kawo keethaa

naageyssatinne hayssan de7iya harati ubbay eroosona. <sup>14</sup> Ta qashuwa gaason nu ishatappe daroti Godan keehi ammanettidosona. Hessa gisho, Xoossa qaala yashshi baynna kaseyssafe aadhdhi minnidi odana mela minutethi demmidosona.

<sup>15</sup> Gidoshin, issoti issoti qanaateninne palaman Kiristtoosabaa odoosona, shin harati suure wozanappe odoosona. <sup>16</sup> Suure wozanappe odeyssati, Xoossay taw Wonggelaa naago ooso immidaysa eriya gisho siiqon odoosona. <sup>17</sup> Shin tana qanaateyssati ta qashuwa bolla hara meto ehanabaa enttaw daanin banttana dosidi Kiristtoosabaa odoosonappe attin tuma wozanappe odokkona.

<sup>18</sup> Hessi aykkoka metenna. Tuma ogen gidin woykko worddo ogen gidin he ubban Kiristtoosi sabbakettees. Tana hessi ufayssees. Qassi harabay tana ufayssiyabay, <sup>19</sup> taani hintte woosanine Yesuus Kiristtoosa Ayyaana maaduwan attanayssa eriya gisho tana ufayssees. <sup>20</sup> Ta gita amoynne ufayssan naagiya naagoy ta yeellatonna attanayssa. Shin ubba wode ootheyssada, ha77ika taani paxa de7in woykko hayqqin yayyonna ta kumetha asatethan Kiristtoosi bonchchettana gada minutethan odays. <sup>21</sup> Ta de7ikkoka Kiristtoosa xalaalas de7ays; qassi ta hayqqikokka taw aadhdhida wodhe. <sup>22</sup> Shin ta paxa de7ikkoka ayfey de7iya ooso oothana. Shin paxa de7eyssafenne hayqoppe awussa dooranekko taw erettenna. <sup>23</sup> Taani ha nam77atappe awussa dooranekko un77ettas. Ha de7uwappe shaakettada Kiristtoosara issife daanaw amottays; Kiristtoosara issife de7eyssi ubbaafe aadhdhida lo77o. <sup>24</sup> Shin taani hintte gisho paxa de7eyssi hinttew daro koshshiyabaa.

<sup>25</sup> Hessi taani geeshshada erays; taani, hintte ammanon diccanaadanne ufayttanaada hinttrea paxa daana. <sup>26</sup> Hessi gisho, taani hinttekko simmada yaa wode Kiristtoos Yesuusuna hintte de7iya de7uwan tanan de7iya ceeqetethay hinttew darana.

<sup>27</sup> Ubbaafe aathidi, hintte Kiristtoosa Wonggelaa bonchcho ehiya de7o de7ite. Ta hinttena be7in woykko be7onna ixxin hintte issi qofan minnidi eqqidi, harati Wonggelan ammanana mela issi wozanan gididi issife baaxeteysa ta si7ana. <sup>28</sup> Hintte morkketas yayyofite. Entti hinttera eqetiyaba gidikko hessi hinttew atotethaas, enttaw dhayos Xoossaafe gidida malla. <sup>29</sup> Kiristtoosas oothiya qaaday hinttew imettiday, hintte iya ammanana mela xalaala gidonnashin hintte iya gisho meto ekkana melassa. <sup>30</sup> Hessi gisho, hintte ta waaya kase be7ideta; ha77ika ta waayetteysa si7eeta. Hintteka ta waaya mela waayetteta.

## 2

### Tuma ashkketethi

<sup>1</sup> Kiristtoosan hintte de7iya de7oy hinttena minthees; qassi iya siiqoykka hinttena minthethees. Geeshsha Ayyaanaara hinttew issifetethi de7ees; hintte haratas keehetanne qadhetteeta. <sup>2</sup> Hiza, hintte issi qofan, siiqon, issi wozananine ayyaan issino gididi tana polo ufayssite. <sup>3</sup> Hinttena doson woykko ceeqettiya hada amon issibaakka oothofite. Shin hintte issyo issuufafe gitatays yaagidi qopponna hinttena kawushshite. <sup>4</sup> Hintte issyo issyo, hara asi maaddiyabaa koyiteppie attin hinttena maaddiyabaa xalaala koyoppite.

<sup>5</sup> Kiristtoos Yesuusan de7iya qofay hinttenan daanaw bessees.

<sup>6</sup> Iyaw ubba wode Xoossa hanotethi de7ees.

Yaaniya gisho, iya Xoossaara issino oothiya hanotaa,  
wolqqan ekkanaw koyibeenna.

<sup>7</sup> Gidoshin, I baw de7iya bonchchuwa ubbaa aggidi,  
aylle medheta ekkis;  
ase daanidi qonccis.

<sup>8</sup> I bana kawushshis;  
hayqqana gakkaw,  
hari attoshin masqaliya bolla  
hayqqanaw kiittis.

<sup>9</sup> Hessi gisho, Xoossay iya daro dhoqqu dhoqqu oothis;  
qassi suntha ubbaafekka aadhdhiya dhoqqa sunthaa immis.

<sup>10</sup> Saloininne sa7an,  
sa7appe garssan de7iya ubbay,  
Yesuusa sunthaa bonchchuwas gulbbatana.

<sup>11</sup> Asa ubbay bantta inxarssan,  
Yesuus Kiristtoosa Goda yaagidi,  
Xoossa Aawa bonchchuwas markkattana.

### Ha alamiyas poo7o gido

<sup>12</sup> Ta ishato, taani hinttera de7iya wode ubban hintte kiittidayssada, ha77i taani hintte matappe haakkinkka, kaseyssafe aathidi, kiittantanaw bessees. Xoossaas yashshanimine kokkorssan hintte atotethaa polanaw oothite. <sup>13</sup> Xoossay, hintte iyaw ero gidi kiittana mela ubba wode hintte giddon oothees.

<sup>14</sup> Ay ooso oothishekka zuuzummonna woykko palamonna oothite. <sup>15</sup> Geellanne nagaaranchcho asaa giddon borettaynayssata, geeshshatanne pokkoy baynna Xoossaas naya gidite. Hintte entta giddon salo xoolinttoda poo7ishe, <sup>16</sup> de7o immiya kiitaa enttaw odite. He wode ta daaburissaygne ta oosoy mela attiboonna gisho Kiristtoosi yaa gallas ta hinttenan ceeqettana.

<sup>17</sup> Hintte Xoossaas immiya ammano imotaa bolla ta suuthay ushsha yarshshoda\* guukkokka tana ufayssees. Hintteka taara ufayttana. <sup>18</sup> Hessada hintteka ufayttidi tanakka ufayssanaw bessees.

#### *Ximotyoosanne Ephphafiraditura*

<sup>19</sup> Taani hintte de7uwabaa si7ada ufayttanaw Ximotyoosa hintteko ellesada yeddana mela Godaa Yesuusi tana maaddanayssa ammanettays. <sup>20</sup> Hintte de7uwas wozaanappe qoppia iya mela asi hari oonikka baawa. <sup>21</sup> Harati banttana go77iyabaa koyoosonappe attin Yesuus Kiristtoosi koyabaa oothokona. <sup>22</sup> I taara issife gididi na7i ba aawas ootheysada Wonggelaa ooso oothidayssanne ammanettiya asi gideyssa hintte ereeta. <sup>23</sup> Hessa gisho, tabay haniyabaa be7ada ellesada iya hintteko yeddana gada qoppays. <sup>24</sup> Taani, ta huu7en mata woden hintteko baanayssada Godan ammanettays.

<sup>25</sup> Hessadakka, taani, ta ishoo Ephafiroditusa, taara issife ta bagga gididi oothidayssa, olettidayssanne, tana maaddanaw hinttew kiittidayssa, hintteko kiittanaw qoppas. <sup>26</sup> I hinttena ubbaa be7anaw daro laamotees. Qassi I harggettidayssa hintte si7ida gisho ba wozaan daro un77ettis. <sup>27</sup> I tuma harggettidi hayqqi kichchidi attis. Shin Xoossay iyaw qadhattis. Iya xalaalas gidonnashin azzano azzano bolla guzhettonnaada, tawukka gadhettis.

<sup>28</sup> Hiza, hintte iya zaari be7idi ufayttanaada tawukka ta wozanaa seelay irxxanaada taani iya ellesada hintteko yeddanaw amottays. <sup>29</sup> Godaas haggaziya asada iya kumetha ufayssan mokkite. Qassi iya mela asa ubbaaka bonchchite. <sup>30</sup> Hintte ta matan gididi oothanaw dandda7onna maadiya maaddidi Kiristtoosa oosuwa gisho ba shemppuwas mishettonna ixxidi hayqqi kichchidi attis.

## 3

#### *Tuma xillotethaa*

<sup>1</sup> Wurssethan, ta ishato, hintte Godaaba gidiya gisho ufayttite. Taani kase xaafidayssa zaarada xaafanayssi tana waaysenna, shin hinttena balappe naagana.

<sup>2</sup> Iitabaa oothiya kanatappe, qassi qaxxarettanaw koshshees giya iita asatappe naagetite. <sup>3</sup> Nuuni Xoossaas Geeshsha Ayyaanen goynniya gishonne nu de7uhan Kiristtoos Yesuusan ceeqettiya gisho tuma qaxxaro qaxxarettidayssata. Nuuni kare asatethaa bolla oosettiyaban ceeqettoko.

<sup>4</sup> Ta kare asatethan ceeqettanaw koshshiko ta daroban ceeqettanaw dandda7ays. Ay asikka ba kare asatethan ceeqettiyabay baw de7ees gidi qoppiko, taani iyappe daro aadhhdhaa ceeqettiyabay de7ees. <sup>5</sup> Taani yelettida saaminttara qaxxarettas. Taani yeletan Isra7eele; taani Biniyame zare; taani walaki baynna Ayhude ase. Ayhude higge naagon gidikko taani Farisaawe. <sup>6</sup> Ayhude ammanuwas mishetethan gidikko taani woosa keethaa yedethas. Issi asi higge naagidi xilliyaba gidikko, tanan borey benttibeenna.

<sup>7</sup> Shin kase tana maaddees gada qoppidabaa ubbaa, Kiristtoosa gisho gada maad-donnabaa oothada taybas. <sup>8</sup> Hessa xalaala gidonnashin taani ta Godaa Kiristtoos Yesuusa ereyssi haraba ubbaafe daro aadhdiya gisho he ubbaa wodhey baynhabaada taybas. Taani iya gisho ubbabaa dhayas. Kiristtoosa demmanaw ubbabaa wora helettida buureda taybays. Taani Yesuusara issino gidas. <sup>9</sup> Taani higgis kiittattada demmiya ta huu7e xillotethi taw baawa. Kiristtoosa ammanin benttiya xillotethay, Xoossaas matappe yaa xillotethay ha77i taw de7ees. <sup>10</sup> Taani Kiristtoosanne iya denddo wolqqa eranaw koyays. Taani iya metuwa iyara shaakettanawunne iya hayquwan iya daananaw amottays. <sup>11</sup> Hessadakka, hayqoppe denddada merinaw de7on daanayssaa ufayssi oothays.

#### *Gaxa gakkanaw woxxite*

---

<sup>2:15</sup> Zaare 32:5      \* <sup>2:17</sup> Ta suuthay ushsha yarshshoda: Issi issi wode yarshsho bessan yarshshettiya mehe yarshshuwa bolla haathe woykko woyne ushshay gukkees.      <sup>3:5</sup> Ha.O 23:6; 26:5; Roome 11:1      <sup>3:6</sup> Ha.O 8:3; 22:4; 26:9-11

<sup>12</sup> Taani ha77i gaxa gakkas woykko tanan bali baawa giikke. Shin Kiristtoos Yesuusi tana oykkida gisho taani ta sinthan de7iya woytuwa oykkanaaw woxxaysinne butetays. <sup>13</sup> Ta ishato, taani hessa demmas gada qoppike, shin taani issiba oothays. Taappe guyera de7eyssa dogada sinthan de7eyssa oykkanaaw zaaturays. <sup>14</sup> Hessa gisho, taani gaxa gakkanaw woxxays. Xoossay Kiristtoos Yesuusa baggara salo de7uwas xeegida woytuwa ekkanaw daaburays.

<sup>15</sup> Hiza, nuuni Ayyaanan gashttida ubbay hessa qoppanaw bessees. Hinttefe baggatas dummatiyya qofii de7ikkoo, hessaka Xoossay hinttew qonccisana. <sup>16</sup> Gidikkoka, nuuni hanno gakkanaw de7ida de7uwan, ane sinthe boos.

<sup>17</sup> Ta ishato, tana daanite; hessadakka, nu leemisuwa kaalliyaa asata akeekidi be7ite.

<sup>18</sup> Taani hessa hinttew kase doro toho odas, shin ha77ika zaarada afuthan odays. Kiristtoosi masqaliya bolla hayqqidayssaa banttana morkke oothida doro asati de7oosona.

<sup>19</sup> Entta wurssethay dhayo; entta uloy enttaw xosse. Yeellatanaw bessiyaban entti ceeqettoosona; qassi ha sa7abaa xalaala qoppoosona. <sup>20</sup> Nu biittay saluwana. Saloppe yidi nuna ashshanaw de7iya Godaa Yesuus Kiristtoosa naagoos. <sup>21</sup> Kiristtoosi ubbabaa ba maatappe garssan oothanaw dandda7iya ba wolqan nu daaburanchcho asatethaa laammidi ba bonchcho asatethaa daanisana.

## 4

### *Wurssetha zore*

<sup>1</sup> Ta ishato, ta doseyssato, ta laamoteyssato, tana ufaysseyssato, tana gitayeyssato hiza Godan minnidi eqqite.

<sup>2</sup> Ewoodinne Sinxiika, hintte nam77ay, issi qofan michchida Godan daanada taani hinttene zorays. <sup>3</sup> Taara oothiya ammantheyssoo, neeni ha maccasata maaddana mela ta nena woossays. Ha maccasati taara, Qelemixnoosaranne entta sunthay Xoossa de7o maxaafan xaafettida haratara issife Wonggelaa ubba bessaa gathanaw daaburidosona.

<sup>4</sup> Godaara hintte de7iya de7uwan ubba wode ufayttite. Taani hessa gujjadakka odays; ufayttite.

<sup>5</sup> Asa ubbay hintte ashkketethaa ero; Goday matan yaana. <sup>6</sup> Xoossa hintte woossiya wode ubban iya galatishe, hinttene koshshiyaba ubbaas woossituppe attin ayhibaaskka hirrgofite. <sup>7</sup> Asa eratetha ubbaafe aadhdiya Xoossa sarotethay, hintte wozanaanne hintte qofaa Godaa Yesuus Kiristtoosa baggara naagana.

<sup>8</sup> Wurssethan, ta ishato, hintte wozanan lo77obaanne galatsiyabaa qoppite. Tuma gidiyabaa ubbaa, bonchchoba ubbaa, qoho gidonnaba ubbaa, geeshshaba ubbaa, siiqobaa ubbaanne ufayssiyaba ubbaa qoppite. <sup>9</sup> Hintte taappe tamaaridabaa, ekkidabaa, si7idabaanne be7idabaa ubbaa oothite. Sarotethaa immiya Xoossay hinttera issife gidana.

### *Phawuloosi imettida imotaas galatis*

<sup>10</sup> Daro wodepppe guye, hintte tabaa zaaridi qoppanaw doomida gisho taani Godan daro ufayttays. Hessa guussay, taw qoppanaw hinttew injetonna ixhidayssafe attin taw qofaa aggibeketa. <sup>11</sup> Taani hessa tana metida gisho giikke; taw de7iyabay gidana guussu tamaaras. <sup>12</sup> Taani metootettidi de7iya duussi erays; qassi durettidi de7iya duussika erays. Awun gidin qassi ay wodekka taani kalonne koshha, pacenne palaha tamaaras. <sup>13</sup> Kiristtoosi taw immiya wolqan ubbabaa oothanaw dandda7ays.

<sup>14</sup> Gidikkoka, hintte ta metuwa taara ekkidayssan lo77o oothideta. <sup>15</sup> Filphisiyuusa asaw, Wonggelaa koyro odanaw taani Maqedooniyappe keyaa wode immiyabankka ekkiyabankka hintte woosa keethaaffe attin hari tana maaddiboonayssa hintte ereeta. <sup>16</sup> Teselonqen metoy gakkida wodekka tana zaari zaaridi maaddideta. <sup>17</sup> Taani, hinttefe imota ekanaw koyada gidonnashin imoppe yaa anjuuwaa hintte ekkana melassa.

<sup>18</sup> Taani, hintte immida ubbaanne gididi palaheyssa ekkas. Hintte yeddida ubbaa Ephafiraditusappe ekkas; koshshiyaba ubbay taw de7ees. Hintte taw yeddida imoy Xoossaas sawa tonggu giya, I dosiya, I ufayttiya yarshsho mela. <sup>19</sup> Ta Xoossay ba bonchcho duretethaafe, Kiristtoos Yesuusa baggara hinttew koshshiyaba ubbaa immana. <sup>20</sup> Nu Aawa Xoossaas merinaappe merinaa gakkanaw bonchchoy gido. Amin77i.

### *Wurssetha sarota*

<sup>21</sup> Kiristtoos Yesuusa baggara Xoossabaa gidida ubbaa saro giite. Taara de7iya ishati hinttene saro goosona. <sup>22</sup> Xoossabaa gidida asa ubbay, ubbaafe aathidi Kawuwa Qeesare keethan de7eyssati hinttene saro goosona.

<sup>23</sup> Godaa Yesuus Kiristtoosa aadho keehatethay hinttera gido.

## Phawuloosi Qolaasiyasa Asaas

### Xaafida Kiitaa Gaatha Qofaa

Phawuloosi Qolaasiyasa asaas xaafida kiitay xaafetiday, Guutha Iisiyan, Efesonappe doloha baggara de7iya Qolaasiyasa kataman de7iya woosa keethaassa. He woosa keetha essiday Phawuloosa gidonna ixxikokka, Roome biittan Iisiya waanna katama gidida Efesonappe Wonggelaa oosanchchota küttey iya gidiya gisho Qolaasiyasaskka aawatethi iyaw de7ees. Qolaasiyasa woosa keethan, "Xoossa eranawunne kumetha atotethaa demmanaw asi ubbay ayyaanra wolqqatasinne maatatas goynnaranaw koshshees" yaagiya worddo asttamaareti de7eyssa Phawuloosi si7is. He asttamaareti tamaarssiyar harabay, qassi, "Asi ubbay qaxxaro daaniya wogatas haarettanawunne katha woga ubbaa naaganaw koshshees" yaagosona.

Phawuloosi ha kiitaa xaafiday, tuma ammano timirttiya tamaarssidi, entta worddo timirttiya laallanaassa. I zaarida zaarotappe waannatey, "Yesuus Kiristtoosi kumetha atotethaa immees; hara haymaanotetinne oosoti iyappe haassosona" yaageyssa. Xoossay Kiristtoosa baggara alamiya medhdhis. Qassi iya baggara zaaridi baakko ehana. Ha alamiyis atotethaa ufayssay de7ey Kiristtoosa ammanonna. Hessa gisho, Phawuloosi ha gita timirttey ammanniyaa asaa de7on waanidi ooson pee7anaw bessiyako odees. Ha kiitaynne Efesoona asaas xaafida kiitay, ba oykkida qofaninne kiitan woli daanosona. Ha nam77u maxaafata giddon de7iya dummatethay, Efesonan Kiristtoosi woosa keethas huu7e, Qolaasiyasan Kiristtoosi medhetethaa huu7e.

Ha kiitaa Phawuloosappe ekkidi Qolaasiyasa gathanaw bida Tikiqosara issife de7ey Anasmoosa gideyssa besoy maaddiyabaa. Waanidi giikko, Phawuloosi Anasmoosa geetetiyha ba oosanchchuwabaa Filmmoonas hara kiitaa xaafis.

#### **Qolaasiyasa kiitaa ayfe qofata**

Gelo qofaa 1:1-8

Kiristtoosa kandduwanne oosuwa 1:9-2:19

Kiristtoosan de7iya ooratha de7o 2:20-4:6

Wursetha sarothonne kuushsha qofaa 4:7-18

<sup>1</sup> Xoossa shenen Kiristtoosi Yesuusa hawaare gidida Phawuloosinne nu ishaa Ximotiy-  
oosi, <sup>2</sup> Qolaasiyasa kataman de7iya Kiristtoosan geeshshatasinne ammanettida asaas  
xaafida kiitaa.

Xoossa nu Aawappe aadho keehatethaynne sarotethay hinttew gido.

#### *Galata woosaa*

<sup>3</sup> Nuuni hinttew woossiya wode Xoossa nu Godaa, Yesuus Kiristtoosa Aawa ubba wode galatoos. <sup>4</sup> Nuuni Kiristtoos Yesuusan de7iya hintte ammanuwanne geeshshata ubbaas de7iya hintte siiquwa si7ida. <sup>5</sup> Hessa hintte oothiday hintte ufayssay salon hinttew naaget-tida gishossa. Hintte tuma kiutta gidida Wonggelaa koyro ammanida wode he ufayssaa si7ideta. <sup>6</sup> Hintte he Wonggelaa si7ida wodenne Xoossa aadho keehatethaa tumaa shaakki erida wodeppre doomidi hintte giddon haanidayssada biipta ubban diccishenue ayfishe de7ees.

<sup>7</sup> Hintte hessa nuura issife Kiristtoosas oothiya ammanettida, dosettida Ephafirappe tamaarideta. <sup>8</sup> I hessa bolla gujjidi Ayyaanay hinttew immida siiquwabaa nuus odis.

<sup>9</sup> Hessa gisho, nuuni hinttебaa si7ida gallasaappe doomidi, Xoossay ba sheniya hinttena bessana melanne, Geeshsha Ayyaanay immiya eratethaaninne cincatetha ubban hinttena kunthana mela ubba wode hinttew Xoossa woosss. <sup>10</sup> Hessadakka, Goday koyeyssada hintte daana mela, ubba wode iya ufayssana mela, lo77o ooso ubban hintte ayfe ayfana melanne Xoossa aathi erishe diccana mela Xoossa woosss.

<sup>11</sup> Xoossa bonchcho wolqqay hintte ubbabaa genccanaadanne dandda7anaada ba minotethaa immidi hinttena ufayssso. <sup>12</sup> Qassi geeshshata poo7o kawotethaa laattana mela hinttena oothida Aawa galatit. <sup>13</sup> I nuna dhuma wolqqaafe ashshidi ba dosiya na7aa kawotethaa ehis. <sup>14</sup> Iyan wozettidi iya suuthan nagara atotethaa demmida.

#### *Kiristtoosa dhoqqatethaa*

<sup>15</sup> Kiristtoosi benttonna Xoossaas tuma leemiso. I medhetetha ubbaafe bayra. <sup>16</sup> Ubbabay iya baggara medhettis. Benttiyabatinne benttonnabati, wolqqatinne godati, haareyssatinne maata aawati, saloninne sa7an de7iya ubbay iyawunne iya baggara

medhettis.<sup>17</sup> I ubbabaappe kase de7ees. Ubbabay iyan ba bessan bessan oykettidi de7ees.<sup>18</sup> I ba asatethi gidida woosa keethas huu7e. I ubbaafe bolla gidanaw hayqoppe denddon sinthenne bayra.

<sup>19</sup> Xoossay ba kumetha Xoossatethaara iyan daanaw koyis. <sup>20</sup> Qassi masqaliya bolla gussida ba na7aa suuthan sarotethi medhdhidi saloninne sa7an de7iya ubbaa iya baggara baara sigethis.

<sup>21</sup> Hayssafe kase hintte qofaa iitatethay hinttena Xoossaafe shaakkisinne iyara morkke oothis; hintte oosoykka iita. <sup>22</sup> Shin ha77i Kiristtoosi ashon hayqqida hayquwa baggara Xoossay hinttena baara sigethidi, geeshshata, borey baynnayssattanne xillota oothis. <sup>23</sup> Hinttee, hintte ammanuwan qaaxxonna minnidinne xaphphidi daanaw bessees. Hintte Wonggelaa qaala si7ida wode ekkida ufayssaa minthi oykkite. He Wonggelay hintte si7idayssanne biitta ubban sabbakettidayssa. Ta, Phawuloosikka ha Wonggelaa osanchcho gidas.

### *Phawuloosa hawaaretetha oosuwa*

<sup>24</sup> Taani hintte gisho ha77i ekkia waaya ufayttays. Kiristtoosi iya asatethi gidida woosa keethaas ekkia waaya taani ta ashwan polays. <sup>25</sup> Xoossaa qaala hinttew polada odana mela taw imettida maatan woosa keethaas oosanchcho gidas. <sup>26</sup> Ha qaalay kase aadhdhida wodiyan yeletethaa ubbaafe geemmidii de7is. Shin ha77i Xoossay ha xuuraa ammaniyya ubbaas qonccisis. <sup>27</sup> Xoossay Ayhude gidonna asaa giddon ha xuuraa bonchcho duretethaa qonccisis. Ikka bonchcho ufayssi gidida hintte giddon de7iya Kiristtoosa.

<sup>28</sup> Hessa gisho, issi issi asi Kiristtoosan kumetha asi oothidi shiishanaw cincatetha ubban asaa tamaarssoninne zoren Kiristtoosabaa sabbakoos. <sup>29</sup> Xoossay ba gita wolqqan tanan oothiya gisho ha77i gakkanaw iya wolqqan baaxetaysinne daaburays.

## 2

<sup>1</sup> Ta hinttewunne Loodoqiya kataman de7iya asaas, hessadakka tana ayfen be7iboonna asa ubbaas ay mela baaxetiyyakko hintte erana mela koyays. <sup>2</sup> Ta baaxetiya gaasoykka entti bantta wozanan minnid, siiqon qashettidi, polo gidida kumetha akeeka duretethaa demmadi Xoossa xuuraa Kiristtoosa erana melassa. <sup>3</sup> Iyan Xoossay minjjida eraynne cincatetha ubbay de7ees.

<sup>4</sup> Ta hessa oonikkka hinttena cimo qaalan bailethonna mela koyada gays. <sup>5</sup> Ta hinttete haakkada de7ikkoka ayyaanen hintteri de7ays. Hintte duussaa maaranne Kiristtoosa hintte minnid ammaneyssa be7ada ufayttays.

### *Kiristtoosan de7iya kumetha de7o*

<sup>6</sup> Hintte Godaa Kiristtoos Yesuusa ekkidayssada iyan de7ite. <sup>7</sup> Iyan xapho yeddite; iyan keexettite. Hintte tamaaridayssada ammanon minnite; Xoossaas kumidi palahida galataa immite.

<sup>8</sup> Kiristtoosappe gidonnashin asa wogarinne ha alamiya coo wogan katida timirtiyaniinne asappe yida eratethan oonikka hinttena cimmi bailethidi di77onna mela naagetite. <sup>9</sup> Xoossa Xoossatethay Kiristtoosa asatethan kumethi de7ees. <sup>10</sup> Hintteka maatasinne wolqqa ubbaas huu7e gidiya Kiristtoosan kumideta.

<sup>11</sup> Hintte Kiristtoosa ammanidi qaxxarettideta. Hessika asa kushen gidonnashin hinttena iita hanotethaafe diggiya Kiristtoosan oosettida qaxxaretethi. <sup>12</sup> Hintte xammaqet-tida wode Kiristtoosara issife moogettidi, Kiristtoosa hayqoppe denthida Xoossa wolqqaa ammanidi, Kiristtoosara issife denddideta.

<sup>13</sup> Hinttee, hintte nagaraa gishonne hintte ceega asatethaa qaxxarettonna gisho hayqqidi de7ishin, Xoossay hintte nagaraa atto gis. Kiristtoosara hinttew de7o immis. <sup>14</sup> I nuna mootiyanne nuura eqettiya, nu bolla xaafettida acuwa daakkidi masqaliya bolla dhishidi ogeppe diggis. <sup>15</sup> Kiristtoosi wolqqatanne maatata masqaliyan xoonidi, entta ola danc-cuwa bilisidi, di7ettida asada oothidi entta qonccen yuushshidi bessim.

<sup>16</sup> Hessa gisho, miyaban woykko uyaaban, baale gallas woykko ageeni xeeriya qammaa bonchchon oonikka hintte bolla pirddofo. <sup>17</sup> Hayssati sinthafe yaanaw de7iyabatas eesho, shin tumay Kiristtoosaa. <sup>18</sup> Qoodheppé qommo ashketethaninne kiiitanchcho goynnon ceeqettiya oonikka hinttena hintte woytuwappe ashshofo. Hessa mela asi ba be7ida qonccethan nashettishe ba asho qofan coo otorttees. <sup>19</sup> Hessa mela asaas huu7e gidida Kiristtoosara gahetethi baawa. I asatetha ubbaa shayaninne kesson keson gathi oythidi muzidi dichchees. Xoossay hessa mela ogen asatetha ubbaas dichchi immees.

### *Ooratha de7o*

<sup>20</sup> Hintte Kiristtoosara hayqqidi ha alamiya haariya ayyaanata wolqqaafe la77a keyideta. Yaatin, ays shaakettonna asada gididi ha wogatas haretetii? <sup>21</sup> Ha wogati, "Oykkofa; laaccofa; bochchofa" geetetteyssata. <sup>22</sup> Ha ubbay asa woganne timirtte gidiya gisho ooso bolla pee7idaappe guye dhayana. <sup>23</sup> Ha kiiitati bonchchonne cincatethi daanidi benttanaw dandda7osona. Ha wogati Xoosse daro dosisiyaba, ashkkenne hintte asatethaa haarisiyabaa daanosona, shin nu iita amotetha bolla wolqqi enttaw baawa.

### 3

#### *Ooratha de7o*

<sup>1</sup> Hiza, hintte Kiristtoosara hayqoppe denddidayssada, Xoossaafe ushachcha baggan uttida Kiristtoosi de7iya bessan, salon de7iyabata koyite. <sup>2</sup> Salon de7eyssata bolla hintte qofaa wothitepppe attin sa7an de7iyabata bolla wothofite. <sup>3</sup> Hintte hayqon shaakettida mela ha alamiyappe shaakettideta. Hintte de7oy Kiristtoosara issife Xoossan geemmis. <sup>4</sup> Hinttew de7o gidida Kiristtoosi qoncciya wode he wode hintteka iyara bonchchon qonccana.

<sup>5</sup> Hessa gisho, hinttenan de7iya alame amota wodhite. Hessatikka laymatethi, tunatethi, laymatanaw amotethi, eeqa goynno mela gidida uuzetethi. <sup>6</sup> Hayssata gaason Xoossaa hanqoy kiiitettonna asaa bolla yaana. <sup>7</sup> Hintteka kase he iita ogiyan biya asaa gidon de7ishe hayssata oothideta.

<sup>8</sup> Ha77i hintte hessata oothofite. Qassi hanqo, ixo, kachchi, zigerssinne borssu oda hinttefie diggit. <sup>9</sup> Ceega asatethaa iya oosuwara hinttefe qaarida gisho issoy issuwa worddotoppite. <sup>10</sup> Xoossaa medho daaniya, eratethan laamettida ooratha asatethaa ma77ite. <sup>11</sup> Ha ooratha medhetethan, Girike asi woykko Ayhude asi, qaxxarettidaywoykko qaxxarettonnay, Barbaare asi\* woykko Iskute asi† aylley woykko womaannoy baawa. Kiristtoosi ubbaa; I ubban de7ees.

<sup>12</sup> Hessa gisho, Xoossan doorettida asada geeshshatanne dosettidayssata gididi, maarotethaa, keehatethaa, ashkketethanne dandda7a ma77ite. <sup>13</sup> Issoy issuwa dandda7ite. Oonikka ba laggiyan qohettidabay de7ikko iyaw atto go. Goday hinttew atto gidayssada hintteka wolis atto giite. <sup>14</sup> He ubbaa bolla ubbabaa issife shiishidi qachchiya siiqo ma77ite. <sup>15</sup> Xoossay hinttena issi asi oothidi xeegiday, sarotethas gidiya gisho Kiristtoosa sarotethay hintte wozanaa haaro.

<sup>16</sup> Kiristtoosa qaalay hintte wozanan kumidi de7o. Cincatetha ubban issoy issuwa tamaarssitennne zorite. Mazmuren, sabaninna ayyana yethan Xoossaa wozanappe galatishe yexxite. <sup>17</sup> Xoossaa Aawa Yesuusa baggara galatishe hintte odettiyabaa woykko oothiyabaa ubbaa Godaa Yesuusa sunthan oothite.

#### *Ammaniya asaa duusaa*

<sup>18</sup> Machcheto, ammanniyyaa asaas bessiyabaa gidiya gisho hintte azinatas haarettite.

<sup>19</sup> Azinatoo, hintte machcheta siiqite; enttaw iitoppite.

<sup>20</sup> Nayto, hinttena yelidayssatas ubbabana kiiettite; hessi Godaa ufayssiabaa.

<sup>21</sup> Awato, hintte nayti ufayssi qanxonna mela entta camethofite.

<sup>22</sup> Aylleto, sa7an hinttew goda gididayssatas ubbabana kiiettite. Godaa bonchchishe suure wozanappe kiiettidi entta ufayssitepppe attin asi be7o gidi oothofite. <sup>23</sup> Hintte oothiya ooso ubbaa asas gidonnashin Godaa oothiya mela wozanappe oothite. <sup>24</sup> Godaappe laata woyto oothidi hintte ekkeyssa erite; hintte Godaa Kiristtoosa haggazeeta. <sup>25</sup> Xoossay asa som77o be7idi pirdonna gisho oonikka iita ooso oothiko ba iita oosuwa gisho zaaro ekkana.

### 4

<sup>1</sup> Godato, hinttewuka qassi salon Goday de7eyssa eridi, hintte aylletas xillotethaninne issuwa issuwa shaakkonna koshshiyabaa oothite.

<sup>2</sup> Xoossaa barkkidi galatishe qanxonna woossite. <sup>3</sup> Xoossay ba qaalas pengge dooyana melanne taani hessa gaason qashon de7iya Kiristtoosa xuuraa awaajjana mela nuuscka woossite. <sup>4</sup> Qassi takka besseyssada qaala qonccisada odana mela taw Xoossaa woossite.

---

**3:1** Maz 110:1    **3:9** Efe 4:22    **3:10** Medhe 1:26; Efe 4:24    \* **3:11** Barbaare asi: Guussay tamaaribonna woykko eronna woykko yelettida mela si77i gidi de7iya asi guussu. † **3:11** Iskute asi: Guusay wozana mino asi woykko wozana iita asi guussu.    **3:12** Efe 4:2    **3:13** Efe 4:32    **3:16** Efe 5:19-20    **3:18** Efe 5:22; 1Phexi 3:1    **3:19** Efe 5:25; 1Phexi 3:7    **3:20** Efe 6:1    **3:21** Efe 6:4    **3:22** Efe 6:5-8    **3:25** Efe 6:5-8    **4:1** Efe 6:9

<sup>5</sup> Inijjetiya wode ubbaa go7ettishe ammanonna asaa matan cincatehan de7ite. <sup>6</sup> Hintte asa ubbaas koshshiya zaaro imo erana mela hintte oday ubba wode aadho keehatethan kumidayssanne maxineda mal77iyabaa gidanaw bessees.

### *Wurssetha saroataa*

<sup>7</sup> Nu siiqo ishay Tikiqoosi, taara issife Godaa oosawan aylle gidida, ammanettiya oosanchchoy, ta de7uwabaa hinttew odana. <sup>8</sup> Taani iya hintteko kiittiday, nu waanidi de7iyakko hinttew odidi hinttena minthethana melassa. <sup>9</sup> Anasmoosi, ammanettiya siiqo ishay, hintte baggay, iyara hintteko bees. Entti hayssan haniyaba ubbaa hinttew odana.

<sup>10</sup> Taara qashettida Arisxirokoosinne Barnnabaasa ishaa na7ay Marqquoosi, hinttena saro yaagosona. Ta hinttew kase odidayssada Marqquoosi hintteko biikko iya mokkite. <sup>11</sup> Yesuusa giy Yasxxoosi hinttena saro saro yaagees. Xoossa kawotethaa gisho taara oothiya asata giddofe Ayhude gididayssati ha heedzata; entti tana daro minthethidosona.

<sup>12</sup> Hintte baggay, Kiristtoos Yesuusa aylley, Ephafiri hinttena saro saro yaagees. I hintte Xoossa sinthan minnidii eqqanaadanne Xoossa sheniya eridi polana mela ubba wode Xoossa hintte gisho woossees. <sup>13</sup> I hintte gishonne Loodoqiyannine Hirapoolisa kataman de7iya asaa gisho daro daaburidayssa ta markkattays.

<sup>14</sup> Nu siiqo ishay dottorey Luuqaasinne Deemasi, hinttena saro saro yaagosona. <sup>15</sup> Loodoqiyann de7iya nu ishatas, Nimfaasinne I keethan shiiqiya asaas nu sarothuwa odite.

<sup>16</sup> Ha dabddabbiya hintte nabbabidaappe guye, Loodoqiya woosa keethan nabbabisite. Hintteka Loodoqiya woosa keethay hinttew yeddiya dabddabbiya nabbabite. <sup>17</sup> Qassi Arkkiphaasa, “Goday new immida oosuwa polanayssa dogoppa” yaagidi qofisite.

<sup>18</sup> Taani, Phawuloosi, ha sarothuwa ta kushen xaafas. Ta qashuwa qoppite.

Xoossa aadho keehatethay hinttera gido.

## Phawuloosi Teselonqe Asaas

### Xaafida Koyro Kiitaa

### Gaatha Qofaa

Teselonqey, Roome biittan de7iya Maqedooniya awurajjaas waanna katama. Phawuloosi Filphisiyuusa yeddidi bidaappe guye Teselonqen woosa keethaa essis. Gi-doshin, Ayhudeta ammanuwa ekkanaw giigettidi uttida Ayhude gidonna asay, Phawuloosi tamaarssiya, kirsttinna ammano timirttiyan xoonettida gisho Ayhudeti qanaat-tidi, Phawuloosa timirttiya phalqquidosona. Hessa gisho, Phawuloosi gam77onnashin Teselonqe yediddi, Beeriya bis (1:9-10). Guyeppe I Teselonqe gakkida wode iya maaddiya Ximotiyooosi Teselonqe woosa keethan de7iya hanotaa iyaw geeshshidi odii.

Phawuloosi koyro kiitaa Teselonqe asaas xaafiday, ammaniyyaa asaa zoranaassanne minthethanaassa. I entta ammanuwanne entta siiquwa lo77o markkatethaa si7ida wode Xoossa galatees. Kase I entta giddon de7ida wode ay mela duussu de7idaakko entta hassaysees. Hessafe Kiristtoosa nam77antho yuussabaa oyshettida oyshaas zaaro immees. He oyshatappae guuthati, "Kiristtoosi nam77antho yaanappe sinthe hayqqida ammaniyyaa asi Kiristtoosa yuussay immiya merinaa de7o ekkanaw dandda7ii? Kiristtoosi nam77antho yaanen awudee?" geeteteysata. Phawuloosi he injje wodiya go7ettidi, "Kiristtoosa nam77antho yuussaa ufayssan naagishe I yaana gakkanaaw woppu gidi hintte ooso oothite" yaagidi zorees.

#### **1 Teselonqe kiitaa ayfe qofata**

Gelo qofaa 1:1

Phawuloosa ufayssanne galata 1:2-3:13

Ammaniyyaa asaa de7o kaalesuwa 4:1-12

Kiristtoosa nam77antho yuussabaa 4:13-5:11

Wurssetha zore 5:12-22

Kuushsha qofaa 5:23-28

<sup>1</sup> Phawuloosi Sillaaseynne Ximotiyooosi Teselonqe woosa keethan de7iya, Xoossa Aawabaanne Godaa Yesuus Kiristtoosabaa gidida asaas xaafida kiita.

Aadho keehatethaynne saroy hinttew gido.

*Teselonqe asaas de7uwanne ammanuwa*

<sup>2</sup> Nuuni Xoossa woossiya wode ubban hinttena oppishe hintte gisho ubba wode Xoossa galatoos. <sup>3</sup> Xoossa nu Aawa sinthan ammanon hintte oothida oosuwa, siiqon hintte daaburida daaburanne Yesuus Kiristtoosan de7iya ufayssaa ekkanaw hintte min-nidi eqqida equwa ubba wode oppoos.

<sup>4</sup> Nu ishato, Xoossay hinttena doseyssanne ba ase oothidi hinttena dooridayssa eroos. <sup>5</sup> Ays giikko, nuuni Wonggelaa doona xalaalan gidonnashin wolqqan, Geeshsha Ayyaananine Wonggelaa tumaa ammanon hinttew ehida. Nuuni hinttera gam77ida wode ubban hintte gisho waanidi de7idaakko hintte ereeta. <sup>6</sup> Hintte daro meto ekkikokka Geeshsha Ayyaanay immiya ufayssan kiitaa ekkideta; nunanne Godaa daanideta. <sup>7</sup> Hessa gisho, Maqedooniyanne Akkaya biittan de7iya ammaniyyaa ubbaas leemiso giddideta. <sup>8</sup> Godaa qaalay hinttef keyidi, Maqedooniyannine Akkaya xalaalan gidonnashin Xoossa hintte ammaneyssi ubbason si7ettis. Hiza, nuuni gaanabay aykkoyka baawa. <sup>9</sup> Nuuni hintteko bida wode hintte nuna mokkida mokuwanne hinttee, hintte eeqa aggidi tu-maanne de7o Xoossa haggazanaw hintte simmidayssa entti bantta huu7en oodoosona. <sup>10</sup> Qassi Xoossa 7a7ay, Yesuusi, Xoossay hayqoppe denthidayssi, sinkafe yaana Xoossa hanquwafe nuna ashshanayssi, saloppe yaanayssa hintte naageyssa entti markkattosona.

## 2

*Phawuloosi Teselonqen oothida oosuwa*

<sup>1</sup> Ta ishato, nuuni hintteko biday mela gidonnayssa hinttee, hintte huu7en ereeta. <sup>2</sup> Shin nuuni hintteko Teselonqe yaanappe sinthe Filphisiyuusa kataman waayettidayssanne cayettidayssa hintte ereeta. Daro ixoy de7ikkoka hinttew iya Wonggelaa odana mela Xoossay nuus minutethi immis. <sup>3</sup> Nuuni hinttena zoriday baleson woykko cimon woykko genen gidenna.

<sup>4</sup> Shin Xoossay nunan ammanettidi ba Wonggelaa odana mela nuus hadara immida gisho oodoos. Nu hessa oothey nu wozanaa be7iya Xoossa ufayssanaassafe attin ase

ufayssanaassa gidenna. <sup>5</sup> Nu muishe yaaridi worddo hinttena sabbishe hintteko yoon-nayssa loythidi ereeta; Xoossay nuus markka. <sup>6</sup> Nuuni hinttefe gidin woykko hara asa ooddefekka bonchcho koyibookko. <sup>7</sup> Nuuni Kiristtoosa hawaare gideyssada nuus koshshiyabaa immite gidi ekkanaw dandda7os, shin aaya ba nayta dichheyssa mela hintte giddon ashkke gidida. <sup>8</sup> Nu hinttena dosida gisho Xoossa Wongelaa hinttew shaako xalaala gidonnashin nu de7uwakka hinttew immanaw giigida. Hintte nuus daro al77o. <sup>9</sup> Nu ishato, nu osuwanne nu daabura ereeta. Hinttew Xoossa Wongelaa odishe, hinttena waaysonna mela qammanne gallas oothida.

<sup>10</sup> Nu de7oy hintte ammaneyssata mataninne Xoossa sinthan geeshshi, xillonne borettannayssa gideyssas hintte markka. <sup>11</sup> Nuuni hinttew huu7en huu7en yelidayssati bantta naytas haneysada hanidayssa ereeta. <sup>12</sup> Nu hinttena zorida, minthethida. Qassi ba kawotethaanne ba bonchchuwa shaakkanaw hinttena xeegiya Xoossa ufyssya de7o hintte daana mela hinttew minthidi odida.

<sup>13</sup> Hinttew nuuni Xoossa qaalaa odida wode asa qaalada gidonnashin Xoossa qaalada si7idi ekkida gisho nuuni ubba wode Xoossa galatoos. I tuma Xoossa qaala; Xoossa qaalay ammaniyya hinttenan ootees.

<sup>14</sup> Ta ishato, hintte Yihuda biittan de7iya woosa keethatanne yan Kiristtoos Yesuusa kaalliyi asatada hanideta. Entta Ayhudeti waaysidayssada hinttenakka hintte biittaa asay waaysidosona. <sup>15</sup> He Ayhudeti Godaa Yesuusanne nabeta wodhdhidasona; qassi nuna goodidosona. Entti Xoossa ufyssonayssatanne ase ubbaa ixxeysata. <sup>16</sup> Entti hari attoshin, Ayhude gidonna asay attana mela nuuni enttaw qaalaa odehyssa diggoosona. Hessada hanidi entta nagaraa xuu7ay kumana gakkaw ubba wode nagara ooothosona. Wurssethan, Xoossa hanqoy entta bolla wodhdhees.

### *Phawuloosi Teselonqe asaa zaari be7anaw amottis*

<sup>17</sup> Shin nu ishato, nuuni nu qofan gidonnashin ashon hinttefe shaakettidi guutha wode gam77idayssan hinttene daro laamotidi be7anaw koyida. <sup>18</sup> Nu simmi hintteko baanaw koyida. Taani ta huu7en hintteko baanaw koyas, shin Xalahey nuna diggis. <sup>19</sup> Hiza, nu Godaa Yesuus Kiristtoosi yaa wode nu ufyssay woykko nu ceeqettiya nu kallachchay oonee? Hinttene gidekkiyeye? <sup>20</sup>Tuma hintte nu bonchchonne nu ufyasssi.

## 3

<sup>1</sup>Hessa gisho, nuus genccanaw dandda7ettonna ixxin, Ateena kataman nurkka attanaw qofa qachchida. <sup>2</sup> Hinttene zoranaadanne ammanon hinttene minthethanaada nuura issife Xoossas ooheyssanne Kiristtoosa Wongelaa odiya nu ishaa Ximotiyoosa hintteko kiittida. <sup>3</sup> Hinttene gakkida goodan hinttefe oonikka guye simmofo. He gooday nuus Xoossa shene gideyssa hinttee, hintte huu7en ereeta. <sup>4</sup> Nu hinttera de7iya wode goodi gakkayssa hinttew koyrottidi odida. Hintte eryssa mela hessada hanis. <sup>5</sup> Hessa gisho, taw genccanaw dandda7ettonna ixxin, “Ooni eri Xalahey entta paaccidi nu daaburaa mela ashshonna aggenna” gada hintte ammanuwabaa eranaw Ximotiyoosa hintteko kiittas.

<sup>6</sup> Ha77i Ximotiyoosi hintte matappe yidi, hintte ammanuwabaa hintte siiquwabaa lo77o wore odis. Qassi hintte ubba wode nuus lo77o qoppeyssanne nuuni hinttene be7anaw laamoteyssada hintteka nuna be7anaw laamoteyssa I nuus odis. <sup>7</sup> Ta ishato, nuna gakkiya waayaninne nu meto ubban hintte ammanuwa gisho hintteten minettida. <sup>8</sup> Hintte Godan minnidi de7ikko nukka de7on de7oos. <sup>9</sup> Hiza, nuuni hintte gaason demmida ufyssas Xoossa waati galatino? <sup>10</sup> Nuuni hinttene be7anawunne hintte ammanuwabaa paccidabaa kunthanaw qammanne gallas nu kumetha wozanan Xoossa woosos.

<sup>11</sup> Xoossay nu aaway ba huu7eninne nu Goday Yesuus Kiristtoosi nu hintteko baana ogyi giigiso. <sup>12</sup> Nu hinttene daro doseyssada Goday hintte issoy issuwa siiqiya siiqonne ase ubbaa siiqiya siiqo hinttew darssonne guijo. <sup>13</sup> Nu Goday Yesuus Kiristtoosi ba geeshshatara yaa wode Xoossa, nu aawa sinthan hintte wozanay geeshshinne borey baynnayssa oothidi I hinttene minthethana.

## 4

### *Xoossa ufyssya de7o*

<sup>1</sup> Wurssethan, ta ishato, Xoossa ufyssanaw hintte waanidi daanaw bessiyako nuuppe tamaarideta. Hessi hintte koyroppe de7ida de7uwa, shin ha77i hintte kaseyssafe aathidi

oothanaada Godaa Yesuusa sunthan hinttene woossosinne zoroos. <sup>2</sup>Nuuni Godaa Yesuusa maatan hinttene kiittida kiitay awusseeko ereeta.

<sup>3</sup> Xoossay, hintte geeshshi gidana melanne laymatonna mela koyees. <sup>4</sup> Hintte issoy issoy, hintte machchetara geeshshatethaninne bonchchon daanaw bessees. <sup>5</sup> Xoossa eronnanne ammanonna asada laymatetha amon xuugettofite. <sup>6</sup> Nu kase hinttew odidayssadane minthi zoridayssada Goday hessa melabaa oothiya ubbaa pirddiya gisho oonikka hayssatan ba ammaniyya ishha naaqqanawunne cimmanaw bessenna. <sup>7</sup>Xoossay nuuni geeshshtetan daana melappe attin tunatethan daana mela xeegibeenna. <sup>8</sup>Hessa gisho, ha timirittiya ixxiya oonikka hinttew Geeshsha Ayyaana immiya Xoossa ixxeespe attin ase gidenna.

<sup>9</sup> Hintte issoy issuwa waati siiqaneekko Xoossay hinttene tamaarssida gisho ha77i siqobaa nu hnttew xaafanaw koshshenna. <sup>10</sup>Qassi Maqdedooniya biittan de7iya ammaniyya ishata ubbaa tuma hintte doseeta. Shin nu ishato, ha77ika hintte entta aathi dosana mela hinttene woossos.

<sup>11</sup> Nuuni kase hinttew odidayssada woppu gida de7uwa de7ite. Hinttee, hintte ooso oothidi hinttew duussas koshshiyaba demmite. <sup>12</sup>Hessada hanikko, ammanonnayssata matan hintte bonchchettana; qassi hinttene koshshiyabas oonakka aadasheketa.

### *Godaa yuussabaa*

<sup>13</sup> Nu ishato, ammanidi hayqqida asati hananabaa hintte erana mela koyeos. Hintte entta gisho ufayssi baynna asada kayottofite. <sup>14</sup> Nuuni, Yesusi hayqqidayssanne qassi hayqoppe denddidayssa ammanoos. Hessadakka, Xoossay Yesuusa ammanidi hayqqidayssata iyara wolla ehanayssa ammanoos.

<sup>15</sup> Goday nuus odidayssada Goday yaa gallas iyara gaheettanaw nuuni paxa de7eyssati, hayqqidayssatappe sinthatokko. <sup>16</sup> Goday wolqaaama kiitara, kiitanchchota halaqaan girssaraa, Xoossa moyze punora, saloppe wodhdhana. Kiristtoosa ammanidi hayqqidayssati koyrottidi hayqoppe denddana. <sup>17</sup>Hessafe guye, he wode nuuni paxa de7eyssati, Godaara shaaran gaheettanaw enttara issife salo ekettana. Hessafe guye, nuuni Godaara issife merinaw daana. <sup>18</sup>Hessa gisho, ha qaalan issoy issuwa minthethite.

## 5

### *Godaa yuussaa giigidi naagite*

<sup>1</sup>Ta ishato, ha hanoti hanana wodiyanne ageena hinttew xaafanaw koshshenna. <sup>2</sup>Godaa Gallasay kaysoy qamma yeysada yaanayssa hintte loythi ereeta. <sup>3</sup> Asay, “Sa7i saro, aykkoyka hanenna” yaagishin, maccas iqethi oykkeyssada dhayoy entti qopponna entta bolla yaana. Entti ay ogenkka kessi ekkokona.

<sup>4</sup>Shin nu ishato, he gallasay hinttew kaysoy yeysada yaanaw hintte dhuman de7ekketa. <sup>5</sup> Hintte ubby po07o asinne gallasan de7iya asi; nuuni qamma asi woykko dhuma asi gidokko. <sup>6</sup> Hessa gisho, nuuni harati dhiskkeyssada dhiskkanaw bessenna; nuuni barkkanwunne giigidi daanaw bessees. <sup>7</sup> Dhiskkeyssati qamma dhiskkoosona; mathotteyssati qamma mathottosona. <sup>8</sup> Shin nuuni gallasa asi gidiya gisho giigidi daanaw bessees. Ammanonne siiqo xurureda tiran ma77idi, atotethaa ufayssaa huu7en wothiya ola biraata barneexada wothidi daanaw bessees. <sup>9</sup>Xoossay nuna nu Godaa Yesuus Kiristtoosa baggara kumetha atotethi ekkana mela doorispppe attin hanqos dooribeenna. <sup>10</sup>Nuuni paxa de7in woykko hayqqin, Kiristtoosi yaa wode iyara issife daana mela Kiristtoosi nu gisho hayqqis. <sup>11</sup>Hessa gisho, hintte kase ootheyssada, issoy issuwa minthethitenne dichchite.

### *Wurssetha zorenne sarotaa*

<sup>12</sup> Nu ishato, hintte giddon ootheyssata, hinttene kaalethana melanne zorana mela Goday dooridayssata bonchchhana mela hinttene woossos. <sup>13</sup> Entti oothiya oosuwa gisho entta daro bonchchitenne siiqite. Issoy issuwara sarotethan de7ite.

<sup>14</sup> Nu ishato, nuuni hinttene zoroos. Boozata hanqite; babbeysata minthethite; daabu-ranchchota maaddite; ase ubbaa dandda7ite. <sup>15</sup> Oonikka iita gisho iita zaaronna mela naagetite. Hintte wolisinne asa ubbaas lo77obaa oothanaw minnite.

<sup>16</sup> Ubba wode ufayttite. <sup>17</sup>Ubba wode Xoossa woossite. <sup>18</sup>Ubbaban galatite. Kiristtoos Yesuusa baggara Xoossay hinttete koyey hessa.

<sup>19</sup> Geeshsha Ayyaana oosuwa toysoppite. <sup>20</sup> Tinbbite qaala kadhoppite. <sup>21</sup> Ubbabaa paaccite; lo77obaa ekkite. <sup>22</sup> Liita ooso ubbaafe haakkite.

<sup>23</sup> Saro immiya Xoossay ba huu7en hinttene polo geeshho. Nu Goday Yesuus Kiristtoosi yaana gallasaas, Xoossay hintte ayyaanaa, hintte shemppuwanne hintte kumetha

asatethaa borey baynna naago. <sup>24</sup> Hinttena xeegeyssi ammanettidayssa gidiya gisho hessa I polana.

<sup>25</sup> Nu ishato, nuus Xoossa woossite.

<sup>26</sup> Ammaniya asa ubbaa geeshsha yeeretethan sarotheite.

<sup>27</sup> Hintte ha kiitaa ammaniyyaa asa ubbaas nabbabanaada Godaa sunthan hinttena woossays.

<sup>28</sup> Nu Godaa Yesuus Kiristtoosa aadho keehatethay hinttera issife gido. Amin<sup>77i</sup>.

## Phawuloosi Teselonqe Asaas

### Xaafida Nam77antho Kiitaa Gaatha Qofaa

Kiristtoosa nam77antho yuussaa bolla denddida oyshoy palama medhdhishe bida gisho Teselonqe woosa keethan metoy dari dari bis. Phawuloosi Teselonqe asaas xaafida nam77antho kiiay, "Godaa yuussaa gallasay matis" yaagiya ammano timirttiya bolla minthidi odee. Phawuloosi odishe, Kiristtoosi yaanappe sinthe, "Geella uraa" geetettiya Kiristtoosa ixxyessa kaaleswan ha alamiya bolla iiatethinne geellatehi darishe baana yaagidi entta ammanuuwa surisees.

Hawaarey, metoyne waayey darikkoka entti bantta ammanuwan minnanaada inne iyara issife de7eyssati ooheyssada, entti bantta duussaa koshshiyabaa demmanaw minnidi oothana mela qassi lo77o ooso oothanaw guye goonna mela entta minthidi zorees.

#### **2 Teselonqe kiitaa ayfe qofata**

Gelo qofaa 1:1-2

Galatanne woosaa 1:3-12

Kiristtoosa nam77antho yuussabaa imettida timirtte 2:1-17

Ammano duussaa wogaa bolla imettida zore 3:1-15

Kuushsha qofanne sarothro 3:16-18

<sup>1</sup> Phawuloosi, Sillaaseynne Ximotiyoosi Teselonqe woosa keethan de7iya, Xoossaas Aawabaanne Godaa Yesuus Kiristtoosabaa gidida asaas xaafida kiiata.

<sup>2</sup> Xoossaas nu Aawappenne Godaa Yesuus Kiristtoosappe aadho keehatethaynne sarotethay hinttew gido.

#### *Kiristtoosi yaa wode hanana pirddaa*

<sup>3</sup> Nu ishato, hintte ammanoyinne hintte issoy issuwanne harata siiqiya siiqoy daro diciya gisho nuuni hessas Xoossaas ubba wode galatanaw bessees. <sup>4</sup> Hinttena gakkida goodaninne waaye ubban genccaninne ammanon minnidi eqqida gisho nuuni nu huu7en Xoossaas woosa keethatan hinttebaa markkattishe hinttenan ceeqettoos.

<sup>5</sup> Hintte iya gisho gidi meto ekkija Xoossaas kawotethaa besseyssata giddidi taybettana mela Xoossaas xillo pirddaas hayssi malla. <sup>6</sup> Xoossay tuma pirddaa pirddana. Xoossay hinttena waayseyssata bolla waaye ehana. <sup>7</sup> Goday Yesuusi ba wolqqaama kiitanch-chotara, tama lacora saloppe yaa wode waayettiya hinttenanne nuna shemppisana. <sup>8</sup> Qassi Xoossay bana eronnayssatanne nu Godaa Yesuus Kiristtoosa Wonggelaas kiitet-tonayssata pirddana. <sup>9</sup> Entti Godaa sinthafenne iya bonchchuwa wolqqaafe shaakettidi merinaa dhaywanu pirdettana. <sup>10</sup> He gallas, I bayssataninne bana ammaneyssata ubban bonchchettanunne sabettanaw yaa wode nu hinttew odida kiitaa hintte ammanida gisho hintte iya bonchcheyssata giddoninne sabbeyssata giddon daana.

<sup>11</sup> Nuuni hinttew ubba wode Xoossaas woossey hessassa. Nu Xoossay hinttena xeegida de7uwas besseyssata giddidi taybettana mela nuuni woosos. Hintte lo77obaa oothanaw amottiya amuwaanne hintte ammano oosuwa I ba wolqgan polo. <sup>12</sup> Hessian nu Xoossaanne nu Godaa Yesuus Kiristtoosa aadho keehatethan, Godaa Yesuusa sunthaa hintte bonchchana; hinttenakka I bonchchana.

## 2

#### *Geella uraa*

<sup>1</sup> Nu ishato, nu Godaa Yesuus Kiristtoosa yuussabaanne nu iyara gahattanaw shiigan-abas nu hinttena woosos. <sup>2</sup> Tinbbiten woykko hara asappe si7ida qaalan woykko nuuppe ekkida kuitada oothidi, "Godaa gallasay gakkis" gidi hintte wozanay dagammonfonne waab-baqoppo. <sup>3</sup> Hinttena oonikka ay ogenka balethofo. Kasetidi wurssetha uraa geellatehay qoncconnanne dhayoy bessiya geella uray yoonna de7ishin, Godaa gallasay gakkenna. <sup>4</sup> Asi goynniyabanne xoossayaba ubbaa I ixxananne bana dhoqqu oothana. Hari attoshin, Xoossa keethi geli uttidi, "Taanii Xoosse" gaana.

<sup>5</sup> Taani hinttera de7ashe hinttew odidayssa akeekketii? <sup>6</sup> I ba gallasan yaanappe attin ha77i yoonnaada aybi iya teqqiyako ereeta.

<sup>7</sup> Asaas qoncciboonna geellatetha xuura wolqquay ha77ika oothees, shin ha77i iya teqqeyssi de7ees. Iya teqqeyssi ogeppe kichchana gakkanaw I qonccenna. <sup>8</sup> Hessafe guye,

geella uray qonccana, shin Godaa Yesuusi ba doonappe keyaa shemppuwan ba bonchcho yuussan iya wodhana. <sup>9</sup> Geella uray Xalahiya wolqqan yidi worddo malaatatanne malaalisiyabata oothana. <sup>10</sup> Hessadakka, dhayos de7iya asata dumma dumma cimmiya iita ooson bailethana. Entti dhayiday ashshiya tumaa dosidi ekkonna ixxida gishossa. <sup>11</sup> Hessa gisho, entti worddo gidiyabaa ammanana mela Xoossay wolqqaama baleso entta bolla yeddana. <sup>12</sup> Hessika, tumaa ammanonna asati, nagara ooson ufaytessati ubbay pirddettana melassa.

### *Atotethas doorettida asata*

<sup>13</sup> Goday dosiya nu ishato, nuuni Xoossaa hintte gisho ubba wode galatanaw bessees. Hintte attana mela Xoossay Geeshsha Ayyaana wolqqan hinttena geeshshidayssanne hintteka tumaa ammanidayssan I hinttena bayrada dooris. <sup>14</sup> Xoossay, nu hinttew odida Wonggelaa baggara hinttena xeegiday, hintte nu Godaa Yesuus Kiristtoosara issife bonchchettanassa. <sup>15</sup> Hiza, nu ishato, minnidi eqqite. Nuuni hinttena nu doonan gidin woikko dabddaabbiyan gidin tamaarssida timirittiya oykkite.

<sup>16-17</sup> Xoossay nu aaway nuna dosees. I nuus keeha; I merinaa minthethonne lo77o ufayssaa nuus immis. Hintte ubba wode lo77obaa oothanawunne odettanaw I minthethana melanne maaddana mela nu Godaa Yesuus Kiristtoosanne Xoossaa nu aawa woosos.

## 3

### *Nuus woossite*

<sup>1</sup> Wurssethan nu ishato, Godaa qaalay hintte giddon ellesidi dalganaadanne bonchchet-tanaada nuus woossite. <sup>2</sup> Hessadakka, asi ubbayaalaa si7idi ammanonna gisho Xoossay geellatappenne iita asatappe nuna ashshana mela nuus woossite.

<sup>3</sup> Shin Goday ammanettidayssa; I hinttena minthethananne Xalaheppe naagana.

<sup>4</sup> Nuuni hinttena kiiatteyssa ha77ika sinthafekka hintte oothanayssas Godan nuuni amanettos.

<sup>5</sup> Goday hintte wozanaa Xoossaa siiquwakkonne Kiristtoosa dandda7aakko kaaletho.

### *Ooso billonna de7ite*

<sup>6</sup> Nu ishato, hintte nuuppe ekkida kiitaa kaallonnayssatappenne ooso billiya azalla ammanniyyaa asatappe hintte shaakettanaada Godaa Yesuus Kiristtoosa sunthan hinttena kiittoos. <sup>7</sup> Nuuda hanidi daanaw besseyssa hintte, hintte huu7en ereeta. Nuuni hintteraa de7iya wode ooso billibookko. <sup>8</sup> Nuuni ooddefekka kathi mela mibookko. Nuus dandda7ettida mela qammanne gallas oothi daaburidi de7idappe attin ooddeskka tooho gidibookko. <sup>9</sup> Nuuni hessa oothiday, hinttew leemiso gidanaassafe attin hinttefe maade oychchanaw nuus maati dhayina gidenna. <sup>10</sup> Nu hintteraa de7iya wodekka, “Oothanaw koyonna asi oonikka mooppo” yaagidi kiittida.

<sup>11</sup> Nuuni hessa giday, hintte giddon issi issi azallati de7eyssa si7ida gishossa. He asati gelssonanban gelidi harata ooso bilisoosonappe attin aykkoka oothokona. <sup>12</sup> Nuuni hessa mela asati maara de7o daanadanane banttana koshshiyabaa oothidi demmmanaada Godaa Yesuus Kiristtoosa sunthan entta kiitosinne zoroos.

<sup>13</sup> Shin nu ishato, lo77o ooso oothanaw azallofite. <sup>14</sup> Ha77i nuuni ha dabddaabbiyan kiittida kiitas kiitettonna asi oonikka de7ikko he uraa erite. I yeellatana mela iyappe shaakettite. <sup>15</sup> Shin iya ishada seeriteppe attin morkkeda xeellofite.

### *Wurssetha sarotaa*

<sup>16</sup> Saro immiya Goday, ba huu7en hinttew ubba wodenne ubba baggara saro immo. Goday hintte ubbaara gido.

<sup>17</sup> Taani Phawuloosi, ha kiitaa ta kushen xaafas. Ta kiita ubbaas mallay hayssa; taani hessada xaafays.

<sup>18</sup> Nu Godaa Yesuus Kiristtoosa aadho keehatethay hintte ubbaara gido.

## Phawuloosi Ximotiyosas

### Xaafida Koyro Kiitaa

### Gaatha Qofaa

Ximotiyosaa geetettiya, ammaniyaa na7atethay, Guutha Iisiyan yelettis (Ha.O 16:1-3). Iya aayyaa Ayhude; iya aaway qassi Girike asi. I Phawuloosara issife ootheysanne Wonggelaa ooson Phawuloosa matan maaddiya asi. Phawuloosi Ximotiyosas xaafida koyro kiitay heedzu ayfe qofata minthi xeelies.

Ubbaafe koyrttidi kiitay, woosa keethan dendlida worddo timirttiyabaa minthidi odee. Ha imatha timirttay Ayhude timirttiyafe baggaa, qassi Ayhude gidonna asaa timirttiyafe baggaa oykkis. Hessika, "Ha benttiya alamey nagaran iitida gisho asi atotethaa demmanaw dumma gidida xuura eranaw, issi issi kathata moonna agganawunne machcho ekkonna woykko azina gelonna agganaw koshshees" yaagiya qofaa baaso oothidi denddis.

Nam7antho qofay, woosa keetha aysobaanne goynno wogabaa tamaarssya timirttiya, hessadakka woosa keetha kaaletheyssatinne entta maaddeyssati ay mela maara duusus daanaw bessiyako odee.

Wurssethan, Ximotiyossi Yesuus Kiristtoosas oothiya lo77o asi waanidi gidanaw bessiyako, qassi dumma dumma ammaniyaa asaa matan iyaw de7iya aawatethay aybeekko, Phawuloosi iya zorida zoriya demmoos.

#### **1 Ximotiyosaa kiitaa ayfe qofata**

Gelo qofaa 1:1-2

Woosa keethi aysiya asaas imettida ayso wogaa 1:3-3:16

Ximotiyosas imettida timirttiya 4:1-6:21

<sup>1</sup> Nuna ashshiya Xoossaaninne nu ufayssan naagiya Yesuus Kiristtoosan kiittida, Yesuus Kiristtoosa hawaare gidida, Phawuloosappe, <sup>2</sup> ammanon taw tuma na7a gidida Ximotiyosas.

Xoossa nu Aawa, nu Godaa Kiristtoosa aadho keehatethay, maarotethaynne sarotethay new gido.

#### *Worddo timirttiyafe naagetethi*

<sup>3</sup> Taani Maqedooniya bashe nena hadaridayssada, issi issi asati worddo timirttiya tamaarsseyssa digganaw ne Efesoonaan gam77ana mela koyays. <sup>4</sup> Entti go77i baynna hayse odanne bantta kochcha taybuwa agganaada oda. Hessa melabay palama kaaletheesippe attin ammanon oosettiya Xoossa oosuwash maaddenna. <sup>5</sup> Ha kiitaa huu7e qofay geeshsha wozanappe, lo77o kahappenne tuma ammanuwappe benttiya siiquwa denthethanaassa. <sup>6</sup> Issi issi asati hayssa aggidi, pathonna odakko simmidosona. <sup>7</sup> Entti Xoossa higgiya asttamaare gidanaw koyoosona. Shin entti ay odiyakko woykko tuma oothidi odeyssi i aybeekko erokkon.

<sup>8</sup> Asi besseyssada higgiyan go7ettiko higgey lo77o gideyssa eroos. <sup>9</sup> Issibaa akeekanaw koshshees. Higgey lo77o asaas medhettibeenna. Shin higgey, higge mentheyssata, worandzota, Xosse yayonnayssata, shemppo wodheyssata, nagaranchchota, geeshshatethi baynnayssata, tunata, hari attoshin bantta aayiw woykko aawa wodheyssata, <sup>10</sup> laammeyssata, addey addera laymateyssata, ase bayzeysata, worddanchchota, worddon caaqqeysata, woykko tuma timirttiyara gahettonna ay ooso ootheysata seeranaw keyis. <sup>11</sup> He timirttay bonchchonne anjettida Xoossay taani awajjana mela taw hadara immida Wonggelaa giddon de7ees.

#### *Xoossa maarotethaa Phawuloosi galatia galata*

<sup>12</sup> Taani oothiya oosuwahn taw wolqqaa immida nu Godaa Kiristtoos Yesuusa galatays. Tana ba oosuwash shuumidi he oosuwash bessaaga gidi taybida gisho iya galatays. <sup>13</sup> Taani hayssafe kase iya cayeyssa, iya yedetheyssanne metootheyssa gidikkoka taani hessa eronnanne ammanonna oothida gisho Xoossay tana maaris. <sup>14</sup> Nu Goday ba aadho keehatethaa ta bolla guussidi, he aadho keehatethaara ammanonne siiqo Kiristtoos Yesuusa baggara taw immis.

<sup>15</sup> "Kiristtoos Yesuusi nagaranchchota ashshanaw ha alamiya yis" giya qaalay ammantheyssanne asa ubbay ekkanaw besseyssa. Ubbaafe aadhhdida nagaranchchoy tana. <sup>16</sup> Shin merinää de7uwa ekkanaw iya ammaniyaa asaas taani leemiso gidana mela Yesuus Kiristtoosi daro dandda7is. Taw ubbaafe aadhhdida nagaranchchuwas Xoossay

ba maarota darssis. <sup>17</sup> Ayfen benttonnayssas, issi Xoossaas, hayqqonnayssas, merinaa Kauwas, merinaappe merinaa gakkanaaw galataynnne bonchchoy gido. Amin<sup>77i</sup>.

<sup>18</sup> Ximotiyooosa, ta na7aw, kase nebaa nabeti odida qaala bolla eqqada ha kiitaa hadara new immays. Ne he qaala kaalliko lo77o olaa olettana. <sup>19</sup> Ammanoyne lo77o kahi new de7o. Issoti issoti kaha dhayidi markkabey hobben dhayeyssada bantta ammanuwa dhayssidosona. <sup>20</sup> Hessa hanidayssata giddon Hemeneyoosinne Iskkinddirey de7oosona. Entti tamaaridi Xoossaas cayeysa aggana mela taani Xalahes enttana aatha immas.

## 2

### *Woosabaanne goynnobaa*

<sup>1</sup> Ubbaafe sinthatada, asa ubbas Xoossaas oyochchanaw, woossanaw, gaannatanawunne galatanaw besseyssa taani nena akeekisays. <sup>2</sup> Nuuni tuma ayyaana de7oninne geeshshatethan Xoossaas goynnishe sarotethaninne woppu gida de7on daana mela kawotasinne shuumata ubbaas woossite. <sup>3</sup> Hessa mela woosay nuna ashshiya Xoossaas sinthan lo77onne ufayssiyabaa. <sup>4</sup> Xoosay asi ubbay attanaadanne tumaa eranaada koyees. <sup>5</sup> Issi Xoossi de7ees. Xoossafenne asappe giddon gididi sigethiya issoy de7ees; ikka ase gidida Kiristtoos Yesuusa. <sup>6</sup> I asa ubbaa wozanaw bana aathi immis. Xoosay ba wodiyen asa ubbaa wozanaw koyeyssa bessiya markkay hayssa. <sup>7</sup> Xoosay tana Wonggelaas asttamaarenne hawaare oothidi dooriday hessassa. Taani tuma odays; worddotikke; ammanonne tumaa Ayhude gidonna asaas markkattana mela Xoosay tana shuumis.

<sup>8</sup> Hessa gisho, ubba bessan de7iya addeti, bantana Xoossaas dummayidi, hanqonne palama diggidi, bantta kushiya pude denthidi Xoossaas woossana mela koyays.

<sup>9</sup> Hessada maccasay banttana haaridayssa qonccisiya, bonchchoynne maari de7iya ma7uwa ma77anaw bessees. Entti maari baynna huu7e dathan, worqqan woykko inqon, woykko al77o afilan banttana alleeqisoppo. <sup>10</sup> Shin Xoossaas goynnays giya maccasay banttaw besseyssada lo77obaa ooothona.

<sup>11</sup> Maccasi kiitetethan si77i gidi tamaaro. <sup>12</sup> Taani maccasay tamaarssana mela woykko adde bolla aawatana mela gidonnashin si77i gidi daana mela koyays. <sup>13</sup> Addaamey koyro medhettis; guyeppe Hewaanna medhettasu. <sup>14</sup> Qassi cimetttada Xoossaas higgiya menthiday maccasippe attin Addaamee gidenna. <sup>15</sup> Shin maccasi ammanon, siiqoninne geeshshatethan banttana haaridi de7ikko\* nayta yelon attana.

## 3

### *Woosa keethaa cimata*

<sup>1</sup> Oonikka, "Woosa keethi kaaletihiya asi gidanaw koykko lo77obaa amottees" giya odai tuma. <sup>2</sup> Woosa keethaa kaaletihiya asi boretonnayssa, issi machchi xalaali de7eyssa, maaran de7eyssa, bana haareyssa, besseyssada ootheyssa, imathe mookkeyssa, tamaarssanaw dandda7eyssa, <sup>3</sup> mathottonayssa, ooyetonayssa, palamonnayssa, miishe siiqonnayssa, <sup>4</sup> iya nayti iyaw kiutteteyssanne bonchcheyssa, ba keethaa aysanaw dandda7eyssa gidanaw bessees. <sup>5</sup> Issi asi ba keethaa aysanaw dandda7onaa ixxiko, Xoossaas woosa keethi waati aysanaw dandda7ii?

<sup>6</sup> Otoron sugettidi, Xalahey Xoossaas pirddan kunddidayssada kunddonna mela, oorathi ammanida asi gidanaw bessenna. <sup>7</sup> Boreninne Xalahe xihen gelonna mela he uray ammanonnia asa matan nashetteyssa gidanaw bessees.

### *Woosa keetha daaqoneta*

<sup>8</sup> Hessada qassi woosa keethaa daaqonetii bonchchettidayssata, nam77u doona odettoneyssata, daro woyne ushshaa uyonnayssata, miishe yaarettonnayssata, <sup>9</sup> ammanuwa xuuraa geeshsha kahan naageyssata gidanaw bessees. <sup>10</sup> Entti koyrottidi paacettanaw koshshes; entta bolla borey baynna ixxiko, woosa keethaa daaqone gididi ootho.

<sup>11</sup> Hessadakka, entta maccasati bonchchettidayssata, zigironnayssata, maaran de7eyssata, ubbabon ammanetteyssata gidanaw bessees.

<sup>12</sup> Woosa keethaa daaqonetii issi machchi xalaali de7eyssa gido. Ba naytanne ba keethaa loythi ayseysa gidanaw bessees. <sup>13</sup> Woosa keethaa daaqone gididi, lo77o ooso ootheyssati, enttaw gita bonchcho qassi Kiristtoos Yesuusan banttaw de7iya ammanuwabaa odanaw daro minutethi demmana.

### *Gita xuuraa*

<sup>2:7</sup> 2Ximo 1:11    <sup>2:9</sup> 1Phexi 3:3    <sup>2:13</sup> Medhe 2:7,21-22    <sup>2:14</sup> Medhe 3:1-6    \* <sup>2:15</sup> banttana haaridi de7ikko: Woykko iya yelida nayti ammanon, siiqoninne geeshshatethan banttana haaridi de7ikko.    <sup>3:2</sup> Tito 1:6-9

<sup>14</sup> Taani ha kiitaa new xaafashe, ellesada neekko baana gada ufayssi wothays. <sup>15</sup> Shin taani boonna gam77iko, Xoossa Keethan asay waanidi daanaw bessiyako erana mela hayssa new xaafays. De7o Xoossa keethay tumatethaa tuussinne baaso. <sup>16</sup> Nu ammanuwa xuuray sidhey baynna gita.

Kiristtoosi asho ma77idi qonccis;

Iya tumatethaa Geeshsha Ayyaanay markkattis.

Kiitanchchotas benttis;

I Kawotethaa ubbaas sabbakettis.

Alamen de7iya asan ammanettis;

bonchchon salo ekettis.

## 4

### *Worddo asttamaareta*

<sup>1</sup> Yaana wodiyän baletiha ayyaanatanne tuna ayyaanata timirttiya kaallidi, issi issi asay ammanuwa kaddanayssaa Geeshsha Ayyaanay qonccisidi odis. <sup>2</sup> Hessa mela timirttey entta kahay doccin, asaa baletiha worddanchcho asttamaaretappe yees.

<sup>3</sup> Hessa mela asati ekonne gelo qassi issi issi kathata moonna mela diggoosona. Shin ammaneyssatinne tumaa ereyssati Xoossa galati woossidi maana mela Xoossay kathi medhdhis. <sup>4</sup> Xoossay medhdhida ubbabay lo77o. Xoossa galatidi miikko wora wodhdhiyabay aybikka baawa. <sup>5</sup> Ubbabay Xoossa qaalaninne woosan geeshshi gidees.

### *Kiristtoosas ammanettida aylle gido*

<sup>6</sup> Hessa gisho, neeni ha timirttiya ammaneyssata tamaarssiko, nu ammanuwaninne lo77o timirttiya kuitettada diccida Kiristtoos Yesusa lo77o aylle gidana. <sup>7</sup> Shin go77i baynna tuma gidonna odappenne cima maccasaa haysiyappe baqata. Tuma ayyana de7on daanaw nena loohisa. <sup>8</sup> Asii ba asatethaa minthanaw oothiya oosoy guuthi maaddees. Shin tuma ayyana de7on bana loohisoy ha77ika merinawukka de7o immiya ufayssi de7iya gisho ubbaas maaddees. <sup>9</sup> Ha qaalay asa ubbay ekkanaaw bessiya tuma oda. <sup>10</sup> Nuuni asa ubbaa, ubbaafe aathidi ammaneyssata ashshiya de7o Xoossaafe ekkana gidi ufayssan naagiya gisho, hessas nuuni oooson daaburosinne baaxetoos.

<sup>11</sup> Hayssa kiittanne tamaarssa. <sup>12</sup> Neeni yalaga gidiya gisho nena oonikka kadhoppo. Shin ammaneyssatas neeni odan, oooson, siiqon, ammanoninne geeshshatethan leemiso gida. <sup>13</sup> Taani yaana gakkanaaw asaas Geeshsha maxaafaa nabbabon, sabbakoninne tamaarsson minna. <sup>14</sup> Tinbitez odettin, cimati bantta kushiya ne bolla wothida wode neeni ekkida, nenan de7iya Geeshsha Ayyanaa imotaa kadhoppa.

<sup>15</sup> Ne dichchay asa ubbaas qonccana mela hessa mintha qoppa; hayssa ubba wode ootha.

<sup>16</sup> Ne huu7iyasinne ne timirttiyas naageeta. Neeni hessa ubba wode oothiko nenanne nena si7eyssata ashshaasa.

## 5

### *Am77etabaa*

<sup>1</sup> Cima addeta ne aawada bonchchafe attin hanqettofa. Yalaga addeta ne ishada oothada xeella. <sup>2</sup> Cima maccasata ne aayida, yalaga maccasata ne michchida, polo geeshshatethan oykka.

<sup>3</sup> Azini hayqqida tuma am77eta bonchcha. <sup>4</sup> Shin am77ees nayti woykko nayta nayti de7ikko, he nayti tuma ayyana de7on de7eyssa bessanaw banttana yelidayssatanne, bantta wogga aayiwunne wogga aawa maaddidi kushe zaaro tamaaro. Hessi Xoossa ufayssiyabaa.

<sup>5</sup> Barkka de7iya tuma am77iya Xoossaafe maade demmanaw ufayssan naagasu. Galasinne qamma Xoossay bana maaddana mela woossawusunne oychchawusu. <sup>6</sup> Shin ha alamiyan lo77o duussaa xalaala koyaa am77iya paxa de7ashe hayqqidaaro. <sup>7</sup> Oonikka entta boronna mela ha kiitaa enttaw imma. <sup>8</sup> Shin ba dabbotas, ubbaafe aathidi ba soo asaas qopponna oonikka ba ammanuwa kaddidayssa; ammanonna asappeka aadhhdhida itta.

<sup>9</sup> Laythi usuppuun tammu kumiboonna am77ee sunthaa mazggaban xaafoppa. Qassi hessa bolla iya ba azinaas ammanettidaaro gidanaw koshshees. <sup>10</sup> Nayta dishon, imathe mokon, geeshshata tohuwa meechnan, metootiya asaa maaden, lo77o ooso ubbaas bana aatha immidaaronne lo77o oooson erettidaaro gidanaw bessees.

<sup>11</sup> Shin yalaga am77eta sunthaa mazggaban xaafoppa. Enttana azina gelo gelo giya asho amoy oykkiya wode Kiristtoosa aggana. <sup>12</sup> Entti koyro gelida qaala menthida gisho pirdettana. <sup>13</sup> Hessa bolla entti ooso dhayidi keethafe keethe yuuyana. Yuushsha xalaala gi-donnashin zigarssaninne banttana gathonnaban gelidi bessonabaa odettoosona. <sup>14</sup> Hessa

gisho, nu morkketi nu bolla odettiya iitabaa demmonna mela yalaga am77eti azina gelidi, na7a yelidi, bantta keethaa aysana mela zorays.<sup>15</sup> Hayssafe kase guutha am77eti Xalahe kaallanaw guye simmidosona.

<sup>16</sup> Issi ammariyaa maccasees soo asaa giddon am77eti de7ikko iya entta maaddanaw bessees. Hessada oothiko, woosa keethas toohoy kawuyees. He wode woosa keethay maade bessiya tuma am77eta maaddanaw dandda7ees.

<sup>17</sup> Woosa keethi loythi heemmiya cimati, ubbaafe aathidi, qaala sabbakoninne tamaarsson daabureyssati dakko bonchcho ekkanaaw bessees.<sup>18</sup> Geeshsha Maxaafay, "Wudumman kathaah yedhdhiya booraa doona qachchofa" hessadakka, "Oosanchchoy ba damooziya ekkanaaw bessees" yaagees.

<sup>19</sup> Nam77u woykko heedzu markki baynna, woosa keetha cima mootiyabaa si7oppa.  
<sup>20</sup> Harati yayyana mela nagara oothiya oonakka asa ubbaa sinthan hangetta.

<sup>21</sup> Neeni asa som77o be7onna, issuwa issuwafe dummayonna ha kiitaa naagana mela Xoossaa, Godaa Yesuus Kiristtoosanne doorettida kiitanchchota sinthan ta nena zorays.

<sup>22</sup> Oodde bollaka ne kushiya wothada shuumanaw ellessoppa. Harata nagaran geloppa; nena geeshshatethan naaga.

<sup>23</sup> Neeni ubba wode harggettii gishonne ne ulo harggiya gisho haatha xalaala uyoppa; guutha woyne uya.

<sup>24</sup> Issi issi asata nagaray qoncce; entta nagaray entta pirddanaw enttafe sinthe aadh-hees, shin harata nagaray guyeppe gam77idi qonccees.<sup>25</sup> Hessada, lo77o oosokyka qoncce; qoncconna ixxikokka geemmanaw dandda7enna.

## 6

### *Aylletas imettida zore*

<sup>1</sup> Xoossaa sunthaynne nu timirttey cayettonna mela aylletethan de7eyssati banttana haariya godata bonchcho.<sup>2</sup> Ammariya godati de7iya aylleti, entta godati enttaw isha gidiya gisho entta kadhoppo. Entta oosowan maaddettiya godati, ammaneyssatanne dosettidayssata gidiya gisho entti kaseyssafe aathidi oothanaw bessees.

### *Worddo timirttiyanne tuma duretethaa*

Neeni hayssaa tamaarrsanawunne entti oothana mela zoranaw bessees.<sup>3</sup> Oonikka dumma timirttiya tamaarssiyaba gidikko, nu Godaa Yesuus Kiristtoosa tuma qaalaranne nu ammanuwa timirttiyara gahettenna.<sup>4</sup> He uray otoron sugeteesippe attin aykkoka erenna. Enttaw issi qofa bolla palamanawunne oyoytanaw iita amoy de7ees. Hessi qanaate, ooshshi, cashshe, iita sidhenne,<sup>5</sup> giigonna palamaa kaalethees. Qassi enttaw iita wozani de7ees; tumaakkka balidosona; entti Xoossaa ammanoy duretethas oge gidi qoppoosona.

<sup>6</sup> Shin taw de7iyabay gidana giya asas tuma ayyaana de7oy gita wodhe.<sup>7</sup> Nuuni ha alamiya aykkoka ehibookko; qassi iyappe aykkoka ekkidi bookko.<sup>8</sup> Nuus kathinna ma7oy de7ikko hessi gidana.<sup>9</sup> Shin duretethi koyeyssati paaceninne xihen geloosona. Qassi enttana duge dafiyanne dhayssya eeyatethinne qohiya amon kunddoosona.<sup>10</sup> Miishe siiqoy iitatetha ubbaas pultto. Issoti issoti miishe amottishe ammanoppe balettidi daro meton banttana yeggidosona.

### *Ximotiyosas imettida zorenne kiita*

<sup>11</sup> Shin neno, Xoossaa asoo, hessafe baqata. Xillotethaa, Xoossaa daano, ammano, siiqo, dandda7anne ashkketethi kaalla.<sup>12</sup> Ammano baaxiya loytha baaxeta. Daro asaa sinthan ne markkattida ne ammanuwabaa, Xoossay nena iyaw xeegida merinää de7uwa oykka.<sup>13</sup> Ubbaas de70 immiya Xoossaa sinthaninnee, Phenxe Philaaxoosa sinthan lo77o markka markkattida Kiristtoos Yesuus sinthan ta nena kiittays.<sup>14</sup> Nu Godaa Yesuus Kiristtoosi qonccana gakkanaaw ha kiitaa balinnee borey baynna naaga.<sup>15</sup> Ba xalaala ubbaa haariya bonchcho Xoossay, kawota kawoy, godata Goday, ba qoppida qamman Yesuus Kiristtoosa zaari kiittana.<sup>16</sup> Issi iya xalaali hayqqenna. Oonikka shiiqanaw dandda7onna poo7on de7ees. Oonikka iya be7ibeenna; qassi be7anawukka dandda7enna. Bonchchoynne merinää wolqqay iyaw gido. Amin77i.

<sup>17</sup> Ha alamiya dureti coo dhayaa shalon otorttonna melanne ceeqgonna mela oda. Nuus koshshiyabaa palahisidi immiya nuna anjiyya, dure Xoossan ammanettana mela entta kiitta.<sup>18</sup> Entti lo77o ooso oothanada lo77o ooson duretanaada, keehatanne haratas shaakkeyssata gidana mela kiitta.<sup>19</sup> Hessi enttaw sinthas mino baaso gidiya gisho he wode entti tuma de7oy ay daaniyakko erana.

<sup>20</sup> Ximotiyosa, issi issi asay, “Eratethi” giya eeya palamappenne hada odappe baqata; new imettida hadaraa naaga. <sup>21</sup> Issoti issoti nius eratethi de7ees yaagishe ammanuwa aggidosona.

Xoossa aadho keehatethay hintte ubbaara gido.

## Phawuloosi Ximotiyooosas Xaafida Nam77antho Kiitaa Gaatha Qofaa

Phawuloosi Ximotiyooosas xaafida nam77antho kiitay, Phawuloosara issife otoheyssanne Phawuloosa matan maaddiya na7atethaa Ximotiyooosa zorida zoriya oykkis. He zoriya ayfe qofay, "Genccan minnanaw bessees" geyssa. Ximotiyosi zorenne minthetho qaalaa ekkiday, Yesuus Kiristtoosabaa tumaa markkattana mela Wonggelaa qaalanne Gal77a Caaqo timirittiya minthidi oykkana melanne metoygne ixxoy darikkoka tamarssoninne Wonggelaa sabbakon minnana melassa.

Ximotiyooosi hada eeyatetha palamaappe haakkana mela dumma mino zorey iyaw imettis. Hessa mela oday asaa dhayssesippe attin aylkoka maaddenna.

He ubban Ximotiyooosi akeekanaw bessiyabay, Phawuloosa hanotaanne iya duussa qofaa hessika, iya ammanuwa, iya genccaa, iya siiquwa, iya dandda7aanne iya gakkida metuwa leemiso oothidi kaallanayssa. Phawuloosi ha kiitaa xaafiday, I ba wothaa onggidi hayqos giigettida wodena.

### **2 Ximotiyooosa kiitaa ayfe qofata**

Gelo qofaa 1:1-2

Ximotiyooosas imettida zoriya 1:3-2:13

Wurssetha wodiyaba 2:14-4:5

Phawuloosi hanidi de7iya duussaa 4:6-18

Kuushsha qofaa 4:19-22

<sup>1</sup> Xoossaa shenen, Yesuus Kiristtoosan benttida de7o ufayssaa markkattanaw Yesuus Kiristtoosa hawaare gidida Phawuloosappe,<sup>2</sup>ta dosiya na7aa Ximotiyooosas kiittida kiita.

Xoossaa Aawappenne nu Godaa Kiristtoos Yesuusappe aadho keehatethay, maarotethaynne sarotethay new gido.

*Ximotiyooosas imettida zoriya*

<sup>3</sup> Taani, ta woosan qammanne gallas nena qoppays. Taani woossiya wode ta mayzata Xoossaanne taani lo77o kahan haggaziya Xoossaa ne gisho galatays. <sup>4</sup> Taani ne afuthaa qoppays; nema be7ada ufaytanaw daro laamotays.

<sup>5</sup> Qassi new de7iya tuma ammanuwa erays. He ammanoy beni ne woggaa aaye Loydininne ne aaye Ewuniqin de7iya ammanuwa mela. <sup>6</sup> Hessa gisho, taani ta kushiya ne bolla wothida wode Xoossay new immida imotaa neeni zaara eethana mela akeekisays. <sup>7</sup> Ays giikko, Xoossay nuus wolqqa, siiqonne nu huu7e haariya Ayyaana immispppe attin yashsha ayyaana immibeenna.

<sup>8</sup> Hiza, nu Godaa markkattanaw yeellatoppa; qassi iya gisho qashettida tanankka yeellatoppa. Shin Xoossay new immiya wolqan Wonggelaa gisho taara meto ekka. <sup>9</sup> Xoossay ba sheneninne ba aadho keehatethan nuna ashshidi, ba geeshsha dere oothanaw nuna doorispppe attin nuuni oothida oosuwa gisho gidenna. Ha aadho keehatethaa Kiristtoos Yesuusa baggara alamey medhettanaappe sinthee nuus immis. <sup>10</sup> Ha77i ha aadho keehatethay nuna ashshiya Kiristtoos Yesuusa yuussan qonccis. I hayqo wolqqaah dhayssidi, Wonggelaa baggara dhayonna de7o nuus qonccisis.

<sup>11</sup> Taani Wonggelaa sabaake, hawaarenne asttamaare gidana mela Xoossay tana dooris.

<sup>12</sup> Taani hessa gisho ha metuwa ekkays; shin ta ammaney ooneekko eriya gisho yeellatikke. Taw imettida hadaraa he gallasay gakkanaaw I naaganaw dandda7eyssa erays.

<sup>13</sup> Taani nema tamaarssida tuma qaala leemiso ootha oykkada Kiristtoos Yesuusa baggara nubaa gidida ammanuaninnee siiquwan de7a. <sup>14</sup> Nu giddon de7iya Geeshsha Ayyaana wolqan new imettida lo77o hadaraa naaga.

<sup>15</sup> Iisiya biittan de7iya ubbay taappe haakkidayssa eraasa; entta giddon Figeluusinne Hermogeneesi de7oosona.

<sup>16</sup> Anesfoori tana daro wode minthethida gisho Goday iya soo asaas qadhetto. Taani qasho keethan de7iya wode I tanan yeellatibenna. <sup>17</sup> Hessa bolla I Roome katamaa yida wode tana minthi koyidi demmis. <sup>18</sup> Wurssetha gallasan Goday iyaw qadhetana mela taani Godaa woossays. Efesoona kataman I tana ay mela maaddidaakkoo ne loythaa eraasa.

<sup>1</sup> Hiza, ta na7aw, Kiristtoos Yesuusan de7iya maarotethan minna. <sup>2</sup> Daro markkatta sinthan taani nema tamaarssida timirttiya, harata tamaarssanaw dandda7iya ammanet-tida asaas hadara imma.

<sup>3</sup> Yesuus Kiristtoosas ammanthiya wotaaddare gidada taara meto ekka. <sup>4</sup> Ola wotaaddarey ba halaqaa ufayssanaw gigetteesippe attin hara ooson bana peeshshenna. <sup>5</sup> Hessadakka, gaadde woxxiya oonikka bessiya ogera gaaddettonna ixxiko woyto ekkenna. <sup>6</sup> Goshshan daaburiya goshshanchchoy ba daabura ayfiyaappe miya koyro asi gidanaw bessees. <sup>7</sup> Ne akeekana mela Goday nema maaddana gisho ta new odidabaa ne wozanan naaga.

<sup>8</sup> Taani markkattiya Wonggelaa mela hayqoppe denddida, Dawite zerethi gidida Yesuus Kiristtoosa qoppa. <sup>9</sup> Taani Wonggelaa odiya gisho iitabaa oothida asada, qashettada meto ekkas. Shin Xoossa qaalay qashettenna. <sup>10</sup> Hessa gisho, Xoossay doorida asati Kiristtoos Yesuusan de7iya atotethaa merinaa bonchchuwara ekkana mela entta gisho ubbaban waayettays.

<sup>11</sup> Hayssada yaagiya tuma qaali de7ees;  
“Nuuni iyara hayqqidabaa gidikko,  
Iyara issife de7ana.

<sup>12</sup> Nuuni gencciko,  
iyara issife kawotana.

Nuuni iya kaddiko,  
i nuna kaddana.

<sup>13</sup> Nuuni ammanettonna ixxiko,  
I ammanettidayssa gididi daana.

Ays giikko, I bana  
kaddanaw dandda7enna” yaagees.

#### *Mino oosanchcho*

<sup>14</sup> Neeni entta hayssa akeekisa; entti qaalata gaason palamonna mela, Godaa sinthan entta zora. Hessi si7eyssata dhayssesippe attin aykkoka maaddenna. <sup>15</sup> Neeni tuma qaala suuretethan tamaarsseyssanne yeeellayonna oosanchcho gidada, Xoossay nashshiya asada, nenatethaa iyaw immanaw minna. <sup>16</sup> Shin ha alamiyas injjetiya go77onna odappe baqata. Hessa mela oday ase Xoossaafe haassee. <sup>17</sup> Hessa mela oday asatethi midigiya paxonna woyzazire maduntha mela. Hessa mela oodaa odetteyssata giddofe Hemeny-oosinne Filixoosi de7oosona. <sup>18</sup> Ha asati tuma ogiya aggidi, “Hayqqida asay hayqoppe beni denddidosona” yaagidi guutha asata ammanuwa dhayssidosona.

<sup>19</sup> Gidoshin, Xoossay mino zaalla hiiilda gisho qaaxxanaw dandda7enna. Iya bolla, “Goday bayssata erees. Godaa sunthaa xeegiya oonikka iita oosoppe haakk” yaagiya qaalay xaafettis.

<sup>20</sup> Issi gitä keethan worqqafe woykko birappe oosettida miisheta xalaala gidonnashin mithafe woykko urqqafe oosettida miishetikka de7oosona. Hessatappé baggati bonchcho oosos, qassi baggati tooshettiya oosos pee7osona. <sup>21</sup> Hessa gisho, oonikka iita ubbaa agikonne bana geeshshiko, bonchcho ooso oothiya muishe gidana. Entta de7oy geeshshinne Godaa ufayssiyabaa, qassi entti lo77o ooso ubbaa oothanaw dandda7eyssata gidana.

<sup>22</sup> Na7atetha iita amuwaappe baqata. Geeshsha wozanan Godaa xeegiya asatara issife, xillotethaa, ammanuwa, siiqonne sarotethaa kaalla.

<sup>23</sup> Shin ooshshi medhdheyssa erada eeyatethinne hada gidida palamappe haakka.

<sup>24</sup> Godaa oosanchchoy asa ubbaas keeha, lo77o tamaarsseyssanne dandda7anchcho gi-danaw besseesippe attin oyoyettanaw bessenna. <sup>25</sup> I baara eqetteyssata ashkketethan seereyssa gidanaw bessees. Entti bantta nagaraappe simmidi tumaa eranaada Xoossay oothaneekko ooni eri. <sup>26</sup> Entti bantta wozanaakkoo simmidi ba sheniya oothana mela entta oykkida Xalahe xihiyappe kessi ekkana.

## 3

#### *Wurssetha gallasaa malaatata*

<sup>1</sup> Wurssetha gallasan un77ethiya wodey yaanayssa era. <sup>2</sup> Asay banttana doseyssata, muishe siiqeyssata, ceeqetteyssata, otoreyssata, cayeyssata, bantana yelidayssatas kiiitet-tonayssata, galatonnayssata, geeshshatethi baynnayssata, <sup>3</sup> siiqoy baynnayssata, maarotethi eronnayssata, zigreyssata, bantana haaronnayssata, qadhey baynnayssata, lo77o doson-nayssata, <sup>4</sup> morkkees aathi immeiyssata, qofi baynnayssata, otoron sugetteyssata, Xoossaafe aathidi asho ufayssanaw doseyssata gidana. <sup>5</sup> Entti ammaniyaa daanosonappe attin ammano wolqqaa kaddosona; neeni hessa mela asatappe baqata.

<sup>6</sup> Enttafe issoti issoti asa keethi gelidi nagaran oykettidayssatanne dumma dumma amon sugettiya daaburanchcho maccasata bolla godatosoona. <sup>7</sup> He maccasati ubba wode tamaarosona, shin tumaa eranaw dandda7okkona. <sup>8</sup> Yaanesinne Yambbareesi Musera eqettidayssada ha asati guuggey oothonayssatanne ammanon kunddida asata gidiya gisho tumaara eqettoosona. <sup>9</sup> Shin Yaanesanne Yambbareesa eeyatethay qonccidayssada entta eyeyatethayka asa ubbaa sinthan qonccana gisho enttaw hanenna.

#### *Wurssetha zore*

<sup>10</sup> Shin neeni ta timirttiya, ta duussaa, ta qofaa, ta ammanuwa, ta dandda7aa, ta siiquwa, ta genccaa, <sup>11</sup> ta yedetethaanne ta metuwa eraasa. Anxookiyan, Iqooniyonen, Lisxira katamatthan tana gakkidabaane taani dandda7ida metuwa eraasa; Goday tana he ubbaafe ashshis. <sup>12</sup> Kристтоос Yesuusan Xoossaa ufayssiya de7o daanaw koyaa ubbay goodettana. <sup>13</sup> Iita asatinne baletheyssati bantta balettishenne harata baletishe kaseppa iiti iiti baana.

<sup>14</sup> Shin ne tamaarida tumaaninne ne ammanida ammanuwan eqqa. Ne ooddefe tamaaridaakko eraasa. <sup>15</sup> Neeni ne na7atethafe doomada Kристтоос Yesuusa ammanada atotethi demmiya cincatethi immanaw dandda7iya Geeshsha Maxaafata eradasa. <sup>16</sup> Geeshsha Maxaafaa ubbay Xoossaafe imettida qaala. He maxaafay tumaa tamaarissanaw, balidayssata seeranaw, suurisanawunne xillotetha duussaas koshshiya zore immanaw maaddees. <sup>17</sup> Xoossaasi polonne lo77o ooso ubbaa oothanaw giigidayssa gidana mela maaddees.

## 4

<sup>1</sup> Taani nena Xoossaai sinthaninne, kawo gidiha haaranaw qoncciya wode paxatanne hayqqidayssata pirddanaw de7iya Kристтоос Yesuusa sinthan zorays. <sup>2</sup> Qaala oda; wodey injjetin injjetonna ixxin minnada oda. Daro dandda7aninne tamaarsson asaa zora, seeranne denthetha. <sup>3</sup> Asay tuma timirttiya si7onna ixxiya wodey yaana. Entti bantta amuwaa kaallidi, bantta si7anaw ufayssiabaa odiya astamaareta shiishoosona. <sup>4</sup> Entti tuma timirttiya aggidi, tuma gidonna odaa si7anaw bantta haytha zaarosona. <sup>5</sup> Shin neeni ubbabana nena haara. Metuwa dandda7a. Wonggelaa markkatethaa oosuwa ootha. New imettida Xoossaasi ooso ubbaa pola.

<sup>6</sup> Taani yarshshettiya wodey gakkis; ha alamiya aggada biya wodey matis. <sup>7</sup> Taani lo77o ola olettas; ta gaaddiya woxxada wurssas; ammanuwa naagas. <sup>8</sup> Sinthafe xillotetha kallachchay\* tana naagees. Hessa xillo pirdaa pirddiya Goday he gallas taw immana. Hessa ta xalaalas gidonnashin iya qonccethaa amottiya ubbaas immana.

#### *Phawuloosa buzo qofata*

<sup>9</sup> Ellesa yada tana be7a. <sup>10</sup> Deemasi ha alamiyan de7iyabata dosidi, tana aggidi, Teselonqe katamaa bis. Qerqisi Galaatiya biittaa, qassi Titoy Dilmaxiya biittaa bis. <sup>11</sup> Luuqaasa xalaali taara de7ees. Marqqaosi Xoossaai oooson tana maaddanaw dandda7iya gisho neera ekkada ya. <sup>12</sup> Taani Tikiqoosa Efesoona katamaa kiittas. <sup>13</sup> Neeni yashe, Xiro7aada kataman Karpoosa matan aggada yida ta kootiyanne maxaafata taw ekkada ya. Ubbaka galbbaan xaafettida maxaafata ekkonna yooppa.

<sup>14</sup> Biraata qoxxiya Iskkinddirey tana daro qohis; Goday iya oosuwada iyaw zaarana. <sup>15</sup> I nu timirttiya daro ixxiya gisho iyappe nena naaga.

<sup>16</sup> Koyro ta mootettiya wode ubbay aggidi bidosonappe attin oonikka tana maad-dibeenna. Xoossay he balaa enttaw tayboppo. <sup>17</sup> Shin taani kumetha kiitaa Ayhude gidonna asa ubbaas markkatin, entti si7ana mela Goday ta matan eqqidi taw wolqqa immis. Qassi koshattida gaammoda doona dooyida hayquwapple tana ashshis. <sup>18</sup> Goday tana iita ubbaafe ashshidi ba salo kawotetha saron efana. Iyaw merinaappe merinaa gakanaw bonchchoy gido. Amin77i.

#### *Wurssetha Sarotho*

<sup>19</sup> Phirisqilas, Aqilasinne Anesfoora soo asaas ta sarothuwa oda. <sup>20</sup> Erasxoosi Qorontoosa kataman attis. Xirofimoosi harggettida gisho Miliixe kataman aggas. <sup>21</sup> Balggoy gelanaappe sinthe ellesada ya.

**3:8** Kessa 7:11    **3:11** Ha.O 13:14-52; 14:1-20    \* **4:8** Xillotetha kallachchay: Xillotetha de7o gisho ta ekkana kallachchaa. Xillotethaa taw kallachcha oothidi immees guussu.    **4:10** Qola 4:14; Filmo 24; 2Qoro 8:23; Gala 2:3; Tito 1:4    **4:11** Qola 4:14; Filmo 24; Ha.O 12:12,25; 13:13; 15:37-39; Qola 4:10    **4:12** Ha.O 20:4; Efe 6:21-22; Qola 4:7-8    **4:14** 1Ximo 1:20; Maz 62:12; Roome 2:6    **4:19** Ha.O 18:2; 2Ximo 1:16-17    **4:20** Ha.O 19:22; Roome 16:23; Ha.O 20:4; 21:29

Ewubulusi, Phudeesi, Linuusi, Qilaadeynne hara ammanniyyaa asati ubbay nena saro saro goosona.

<sup>22</sup> Goday Yesuus Kiristtoosi ne ayyaanaara gido.  
Xoossaa maarotethay hintte ubbaara gido.

## Phawuloosi Titos Xaafida Kiitaa Gaatha Qofaa

Titoy Ayhude gidonna asi, shin guyeppe ammanidi, Phawuloosi Wonggelaa kiitaa oosuwa oothiya wode matan iya maaddida asi. He wode Titoy, woosa keethaa xeel-lanawunne naaganaw Qarxeesa biittan attis. Ha kiitay heedzu ayfe qofata oykkees.

1) Woosa keethaa aysiya asay, iita duussu de7iya Qarxeesa asaa matan ay mela lo77o duussu daanaw koshshiyako Tito akeekisees.

2) Woosa keethaa giddon de7iya dumma dumma cugeta, hessika, cima asata, yalaga addetanne aylleta waati tamaarssanaw bessiyako Tito zorees.

3) Ammaniyyaa asaa ammano duussabaa, hessika, sarotethaninne siiqon daanabaa, woosa keethaa giddofe ooshshi, palamaanne shaahotethi digganabaa Titos zore immees.

### **Tito kiitaa ayfe qofata**

Gelo qofaa 1:1-4

Woosa keethi kaalethiya asaa 1:5-16

Woosa keethan de7iya dumma dumma cugata ooso 2:1-15

Zorenne naagiso 3:1-11

Kushsha qofaa 3:12-15

<sup>1</sup> Yesuus Kiristtoosa hawaareynne Xoossaa aylley, Phawuloosi, xaafida dabddaabbiya. Xoossay doorida asaa ammanuwa dichchanaadanne tuma ayyaana de7uwa waanidi daanekko bessiya tumaa eraakko entta kaalethanaw taani kiitettas. <sup>2</sup> He ammanoynne eratethay merinaa de7uwa ufayssaa bolla zempis. Hessa daro wodeppe sinthe worddottonna Xoossay nuus immana gidi qaala gelis. <sup>3</sup> Nuna ashshiya Xoossay ba woden ha kiitaa odana mela taw hadara immis.

<sup>4</sup> Nu kothe ammanuwan ta tuma na7aa gidida Tito,

Xoossaa Aawappenne nuna ashshiya Yesuus Kiristtoosappe aadho keehatethay, maarotethaynne sarotethay new gido.

*Titoy Qarxeesan oothiya oosuwa*

<sup>5</sup> Taani nena Qarxeesan aggada yiday, neeni attidabaa giigisanaadanne taani kiitti-dayssada katamaa ubban woosa keetha cimata doorana melassa. <sup>6</sup> Cimi borettoneyssa, issi machche azinaa, maara dhayon woykko kiitetetha ixon asi boronna ammaniyyaa nayti de7iya asi gidanaw bessees. <sup>7</sup> Woosa keetha cimi Xoossaa oosuwa hadara ekkida gisho borettoneyssa, otortonayssa, elle yilottoneyssa, mathottoneyssa, oda medhd-honyayssanne bessonaa go77as defettonayssa gidanaw bessees. <sup>8</sup> Shin imathe mokkeyssa, lo77obaa ubbaa doseyssa, akeekanchcho, xillo, geeshshinne bana haareyssa gidanaw bessees. <sup>9</sup> Harata suure timirrtiyan minthethanawunne he timirrtiya ixxeystata zaaranaw ba tamaarida tuma qaalan minnidi eqqanaw bessees.

<sup>10</sup> Kiiitettonayssati, pathonna oda odetteyssati, cimmeysati ubbaka qaxxaretetha wogaa naagiya daro asati de7oosona. <sup>11</sup> Entti bessonaa ogen miishe demmanaw koyidi, tamaarssanaw bessonabaa tamaarssishe keetha asaa ubbaa iissiya gisho entta timirrtiya teqqanaw bessees. <sup>12</sup> Entta nabetaappe issoy, "Qarxeesa asay ubba wode worddo odettoosona; iita do7atanne azalla yarambbata" \* yaagis. <sup>13</sup> Ha markkatethay tuma markkatethi. Hessa gisho, enttaw tuma ammanoy daana mela entta hanqetta. <sup>14</sup> Tumaa ixxi asaa timirrtiyanne Ayhudeta pathonna tossiya si7onna mela entta seera. <sup>15</sup> Bantaw geeshshi gididayssatas ubbay geeshshi, shin tunatasinne ammanonnaysstas entta qofaynne kahay tunida gisho enttaw aybikka geeshshi gidenne. <sup>16</sup> Entti nu Xoossaa eroos goosona, shin bantta oosuwan iya kaddosona. Entti Xoossan ixettidayssata, kiitetton-ayssatanne lo77o ooso ubbaas gidonnayssata.

## 2

<sup>1</sup> Shin neeni suure timirrtiya phalqqonna timirrtte tamaarssanaw bessees. <sup>2</sup> Cima addeti banttanha haareyssata, woppu gidayssata, bonchchettidayssata, ammanon, siiqoninne dandda7an, mino gidanaw mela zora. <sup>3</sup> Hessadakka, cima maccasay bantta duussan geeshshata, zigironnayssata, woyne ushshan haarettonnayssatanne lo77obaa tamaarsseyssata gidanaw mela tamaarssa. <sup>4</sup> Entti hessada hanikko yalaga maccasay bantta

**1:4** 2Qoro 8:23; Gala 2:3; 2Ximo 4:10

**1:6** 1Ximo 3:2-7

\* **1:12** Qarxeesa asay ubba wode worddo odettoosona;

iita do7atanne azalla yarambbata: Hessa yaagidi odida nabey Ephimenddesa geetettes.

azinatanne bantta nayta siqana mela tamaarssanaw dandda7osona. <sup>5</sup> Xoossaas qaalay borettonna mela banttana haareyssata, geeshshata, bantta son ootheyssata, keehatanne bantta azinatas kiiitteyssata gidana mela yalaga maccasaa tamaarssona.

<sup>6</sup> Hessadakka, yalaga addati banttana haarana mela zora. <sup>7</sup> Neeni ne huu7en lo77o ooso ubban enttaw leemiso gida. Neeni ne timirrtiyen eqqidayssanne ammanettidayssa gida. <sup>8</sup> Nu morkketi nuna zigiranaw gaasoyaabay enttaw dhayin entti yeellatana mela neeni borettonna lo77o oda odetta.

<sup>9</sup> Aylleti ubbabana bantta godatas kiiettana mela, entta ufayssana melanne enttara palmonna mela zora. <sup>10</sup> Entti bantta godatappae kaysotoppo. Hessika, nuna ashshiya Xoossaas timirttey, ubba ogen dosettidayssa gidana mela bantta oothiya oosuhan ammanetteyssata gideyssa bessana mela entta zora.

<sup>11</sup> Ase ashshiya Xoossaas aadho keehatethay asa ubbaas qonccis. <sup>12</sup> He aadho keehatethay, nu nagaranne ha alamiya amuwaa aggidi, ha wodiyen nuna haaridi, tuma ayyaana de7uwaninne xillotethan daana mela nuna tamaarssees. <sup>13</sup> Nuuni anjettida ufayssaa gidida gita Xoossaanne nuna ashshiya Yesuus Kiristtoosa bonchcho qonccethaa naagoos. <sup>14</sup> Iita ooso ubbaafe nuna wozanawunne lo77obaa oothanaw amottiya ba geeshsha asi kessanaw nu gisho bana aathi immis.

<sup>15</sup> Neeni hayssa tamaarssa; kumetha maatan zora, seera; oonikka nena kadhoppo.

### 3

#### *Ammaniya asa ooso*

<sup>1</sup> Asay deriya haareyssatas, aawatethay de7eyssatas haarettanaw, kiiettanawunne lo77o ooso ubbaa oothanaw giigettidayssata gidana mela akekisa. <sup>2</sup> Qassi entti oodde bollaka iita odettonna mela, saro asi gidana mela, ashkketanne asa ubbaas kadhetteyssata gidana mela zora. <sup>3</sup> Nuuni kase eeyata, kiiettonayssata, balettidayssata, dumma dumma asho ufayssasinne amos ayllettidayssata. Nuuni iitatethaninne qanaaten kumidayssata; nu ase ixxyeyssata, asikka nuna ixxyeyssata. <sup>4</sup> Shin ashshiya Xoossaas keehatethaynne siqoy qonccida wode <sup>5</sup> nu oothida xillo oosuwa gisho gidonnashin ba maarotethaa gisho nuna ashshis. Nuna I ashshiday, nam77antho yeletethaa meechnanine Geeshshaa Ayyaana baggara immida ooratha de7uwana. <sup>6</sup> He Ayyaana, Xoossay nuna ashshiya Yesuus Kiristtoosa baggara nu bolla darssidi gussis. <sup>7</sup> Ba aadho keehatethaa baggara nuna xillisi merinnaa de7uwa laata ufayssaa oykkana mela hessa oothis. <sup>8</sup> Ha qaalay ammanettida qaala. Xoossaas ammaneyssati lo77o ooso oothanaw giigidayssata gidana mela ne ha qaala miinthada odana mela ta koyays. Hayssati ase ubbaas lo77onne go77eyssata. <sup>9</sup> Shin eeyatetha palamappe, kochcha tayboppe, kachchafennee higge gaason denddiya ooshshaafe naagetta. Hessi go77inne wodhey baynnabaa. <sup>10</sup> Shaahotethi medhdhiya uraa koyro zora; nam77antho hanquette hessafe guye iyappe haakka. <sup>11</sup> Hessa mela asi geellanee nagaranchcho; I ba bolla pirddeyssa era.

#### *Wurssetha zore*

<sup>12</sup> Taani balggo yan shaaccanaw qoppida gisho Arxemaasa woykko Tikiqoosa neekko kiiitya wode ne taakko Niqophiliyoona yaanaw minna. <sup>13</sup> Higge eriya Zeenasinne Aphiloosi oge biya wode enttaw koshshiyabay pacconna mela entta maadda. <sup>14</sup> Nu asaykka pathonnia asi gididi attonna mela banttaw koshshiyabaa demmana mela lo77o ooso oothanaw minnidhi tamaaro.

<sup>15</sup> Taara de7iya ubbay nena saro goosona; ammanon nuna siiqiya asaa saro ga.

Xoossaas aadho keehatethay hintte ubbara gido. Amin77i.

## Phawuloosi Filmmoonaas Xaafida Dabddaabiya Gaatha Qofaa

Filmmooni erettida ammaniyaa asi. I Qolaasiyasa woosa keethaa asi gidonna attenna. Filmmoonaas Anascoosa giya aylley de7ees. He aylley ba godaappe betidi bida wode qasho keethan de7iya Phawuloosara gahettis. Anascoosi Yesuusa ammanana mela oothiday Phawuloosa. Phawuloosi Filmmoonaas xaafida dabdaabbe, Filmmooni guye simmidi iyaakko biya ba aylliara sigettana mela akeekisees. Gujjidikka ha77i Anascoosi ammaniyaa asi gidiida gisho hizappe guye ammaniyaa ishada iya mokki ekkana melappe attin aylleda iya taybonnaada iyaw odee.

### **Filmmoona kiitaa ayfe qofata**

Sarotho 1-3

Galatanne woosa 4-7

Phawuloosi Anascoosa gisho Filmmoona woossis 8-21

Kuushsha qofaa 22-25

<sup>1</sup> Taani Phawuloosi, Yesuus Kiristtoosa gisho qashon de7eysinne nu ishaa Ximotyoosi, nuura oothiya nuuni dosiya Filmmoonaas,<sup>2</sup> ne son shiiqiya woosa keethaas, nu michche Afibiyasinne nuura issife de7iya wotaaddare Arkkipaasas xaafida kiita.

<sup>3</sup> Xoossa nu Aawappenne nu Godaa Yesuus Kiristtoosappe aadho keehatethaynne sarotethay hinttew gido.

### *Filmmoona siiquwanne ammanuwa*

<sup>4-5</sup> Neeni geeshshata doseyssanne Godaa Yesuusa ammaneyssa taani si7iya gisho Xoossa woossashe nena qoppiya wode ubban ta Xoossa galatays. <sup>6</sup> Neeni ne ammanuwa haratas shaakkeyssi nuus Kiristtoos Yesuusa baggara yaa lo77obaa ubbaa erisana mela taani Xoossa woossays. <sup>7</sup> Geeshshata wozanay ne oosuwan minnida gisho ta ishaw, taani ne siiquwan daro ufyassinne minthetho demmas.

### *Phawuloosi Anascoosasabaa Filmmoonaas odis*

<sup>8</sup> Hessa gisho, neeni oothanaw bessiyabaa oothana mela nena kiittanaw Kiristtoosa baggara taw minotethi de7ees. <sup>9</sup> Taani, cimay Phawuloosi, Kiristtoos Yesuusas ha77ika qashon de7eyssi, siiqon nena woossays. <sup>10</sup> Taani qashon de7ashe iyaw zoriya aawa gidada ta na7aa Anascoosa gisho nena woossays. <sup>11</sup> I kase nena maaddenna, shin ha77i nenakka tanakka tuma maaddiya asi.

<sup>12-13</sup> Taani wozanappe dosiya Anascoosa neekko yeddays. Taani Wonggelaa gisho qashettidashin, ne gisho taw oothidi tana maaddana mela ta matan iya ashshanaw koyas. <sup>14</sup> Shin ne sheneda oothanaw koyasippe attin neera zorettonna wolqqan aykkoka oothanaw koyikke.

<sup>15</sup> Anascoosi guutha wode neeppe shaakettidayssi, ooni eri simmidi ubba wode neera de7onna aggenna. <sup>16</sup> Hiza, hayssafe guye Anascoosi aylle gidonnashin ayllefe I daro aadhdees. I taw ay mela siiqo ishee! Qassi I new asa baggarakka Godaa baggarakka aadhhdida isha.

<sup>17</sup> Hiza, neeni tana ne lagge giyabaa gidikko tana mokkeyssada iya mokka. <sup>18</sup> I nena qohidabay woykko I accottidabay de7ikkoo taappe ekka. <sup>19</sup> He acuwa taani qanxana gada taani, Phawuloosi, ta kushen xaafays. Neeni taw ne shemppuwa acota uttidayssa taani nena akeekisanan koshshenna.

<sup>20</sup> Ta ishaw, Godaa baggara neeppe maade demmanaw koyays. Kiristtoosa baggara tana minthetha. <sup>21</sup> Taani gidayssafe daro neeni oothanayssa erada qassi ne taw kiitetanayssa ammanada hayssa xaafays.

<sup>22</sup> Xoossay hintte woosa si7idi tana hintteko guye zaarana gada qoppiya gisho taw imathi shemppiye keethi gigisa.

### *Wurssetha sarotaa*

<sup>23</sup> Kiristtoos Yesuusa gisho taara qashon de7iya Ephafiri nena saro saro gees. <sup>24</sup> Qassi taara issife oothiya Marqqaosi, Arsxiokoosi, Deemasinne Luuqaasi nena saro saro goosona.

<sup>25</sup> Godaa Yesuus Kiristtoosa aadho keehatethay hintte ayyaanaara gido.

## Ibraawe Asaas Xaafettida Kiitaa Gaatha Qofaa

Ha kiitay xaafetiday, wolqqaama metoy gakkin, bantta ammanuwa agganaw matida ammaniyyaa asaassa. Ha maxaafaa xaafeey, Yesuus Kiristtoosi wurssethaanne tuma Xoossa qonccethaa gideyssa Ibraawe asaas bessees. He ammaniyyaa asay bantta ammanuwan minnana mela entta minthethees. I hessian heedzu ayfe qofata waannayidi bessees.

1. Yesuusi ba ekkida metuwan Aawas tuma kuitettida merinaa Xoossaa Na7aa. I Xoossaa Na7a gidida gisho Gal77a Caaquwa wode de7iya nabetappe, kiitanchchotappenne Museppe bolla.

2. Yesuusi Gal77a Caaquwa kahintappe daro aadhdhiya merinaa kahine gideyssa Xoossay ba huu7en markkattis.

3. Yesuusa baggara ammaniyyaa asi nagarappe, yashshafenner hayqoppe attees. Yesuusi kahine halaqa gideyssada, kase Ibraaweta ammano woginaninne mehe yarshshon kuyada benttiya atotethaa ha77i tuma oothis.

Xaafey Isra7eeli asaa taariken daro erettida asaa ammano leemiso oothi ekkidi (Shem 11) ha maxaafaa nabbabiya asati bantta ammanuwan minnana mela akeekisees. Hes-sadakka, shemppo 12 nabbabeyssati bantta ayfiyya Yesuusa bolla wothidi, bantta ammanuwan minnana melanne ay metoyinne waayey gakkikokka, entti genccana mela zorees. Wurssethan zoreninne akeekiso qaalan ba kiitaa kuuyees.

### Ibraawe kiitaa ayfe qofata

Gelo qofaa: Xoossay Kiristtoosan qonccidayssa 1:1-3

Kiristtoosi kiitanchchotappe bolla 1:4-2:18

Kiristtoosi Museppenne Iyyaasuppe bolla 3:1-4:13

Kiristtoosa kahinetethay bolla 4:14-7:28

Kiristtoosa caaqoy bolla 8:1-9:22

Kiristtoosa yarshshoy bolla 9:23-10:39

Ammano bayratethaa 11:1-12:29

Xoossaa ufayssso 13:1-19

Anjjonne kuushsha qofaa 13:20-25

### Na7ay kiitanchchotappe bolla

1 Kase Xoossay, nu aawatas nabeta baggara dumma dumma ogen daro wode odis.

2 Shin ha wurssetha wodiyen ubbaa iya laatisida qassi alamiya iya baggara medhdhida ba Na7aa baggara nuus odis. <sup>3</sup> Na7ay Xoossaa bonchchuwa phooletthaanne kumetha Xoossaa Xoossatethaa ekkidi, ba wolqqaama qaalan ha alamiya katisidi oykkis. Asaa entta nagaraapape geeshshidaappe guye Übbaafe Bolla Xoossaa ushachcha baggan saluwan uttis.

<sup>4</sup>Iyaw imettida sunthay kiitanchchota sunthaafe bolla gideyssada I enttafe bolla. <sup>5</sup>Hiza, Xoossay kiitanchchotappe ooddeko,

“Neeni ta Na7a;

ta hachchi new aawa gidas” gidee?

Woykko qassi ooddeko,

“Taani iyaw aawa gidana;

ikka taw na7a gidana” gidee?

<sup>6</sup>Qassi Xoossay ba bayra Na7aa ha alamiya kiittishe,

“Xoossaa kiitanchchoti ubbay iyaw goynno”

yaagis. <sup>7</sup>Xoossay kiitanchchotabaa odishe,

“Xoossay ba Kiitanchchota carkko,

ba aylleta tama laco oothees”

yaagees. <sup>8</sup>Shin ba Na7abaa odishe,

“Xoossaw, ne kawotethay merinaw de7ees.

Ne kawotethaa ne xillotethan ayssasa.

<sup>9</sup>Neeni xillotethi dosadasa; iita ixxadasa.

Xoossay, ne Goday, nena ne laggetappe aathidi dooris,

ufayssa zayte \* nena tiyis”

yaagees.<sup>10</sup> Xoossay Zaaridi,  
“Godaw, koyro neeni sa7aa medhdhadasa;  
saloti ne kushe ooso.

11 Hessati ubbay dhayana;  
shin neeni daana.  
Entti ubbay afilada wurana.

12 Neeni entta salenaada xaaxana;  
qassi entti afilada laamettana.  
Shin neeni ubba wode nena;

ne laythayka wureenna”

yaagees.<sup>13</sup> Shin Xoossay kiitanchchotappe ooddeko,  
“Taani ne morkketa ne tohoy  
yedhdhiyaso oothana gakkanaw,

hayssan taappe ushachcha baggan utta” gidee?

14 Kiitanchchoti ubbay atotethi demmanaw de7iya asata maaddanaw Xoossay kiittida  
ayyaanata gidokkonaayye?

## 2

### *Gita anjuwaa*

1 Hessa gisho, nuuni si7ida tumaappe harasoo ekettonna mela he si7idayssa minthidi naaganaw bessees. <sup>2</sup> Hiza, kiitanchchota baggara odettida qaalay tuma gidikko, iya naaqoynne kiitettonna ixxoy pirdda ehiyabaa gidikko, <sup>3</sup> yaatin, nuuni hayssa mela gita atotethaa ixxas giikko, waanidi attanee? Koyro Goday ba huu7en he atotethaa odis; qassi iyappe si7idayssati nuus geeshshidi markkattidosona. <sup>4</sup> Qassi Xoossay malaataatan, oorahabatan, dumma dumma mallataninne ba sheniyada immida Geeshsha Ayyaana imotatan markkatethaa minthis.

### *Yesuusi ase gidis*

5 Xoossay ha nuuni odiya sinthafe yaana alamiya, kiitanchchotas haarisibeenna.

6 Geeshsha Maxaafay issi bessan hayssada yaagees:

“Neeni asas qoppanaw asi aybe?

Woykko neeni iya naaganaw I aybe?

7 Ne iya kiitanchchotappe guutha wodes guuthadasa;  
Iya huu7en bonchoninne saba kallachcha wothadasa.

8 Qassi ubbabaa iya tohuwappe garssan wothadasa”

yaagees. Xoossay ubbabaa iyaw haarisinya wode iyaw haarettiboonnabay aybikka baawa. Shin ha77i ubbabay iyaw haarettishin nuuni be7ibookko. <sup>9</sup> Shin nuuni kiitanchchotappe guuthara guuxida Yesuusa be7oos. Xoossaa aadho keehatethaa gaason Yesuusi asa ubbaas hayqqis. I waaye hayqo hayqqida gisho bonchoninne saba kallachcha iya huu7en wothis. <sup>10</sup> Ubbabay iyawunne iya gaason medhettida Xoossay, daro nayta baara bonchhisanaw entta atotethaa huu7iya, Yesuusa waayen polo oothanaw iyaw bessees.

11 Yesuusinne he I geeshshida asa ubbay issi awaa nayta. Yesuusi entta, “Ta ishata” gidi xeeganaw yeellatonny hessassa. <sup>12</sup> Yesuusi,

“Taani ne sunthaa ta ishatas awaajjana;  
deriya shiiquwan nena galatana”

yaagees. <sup>13</sup> Qassi I, “Taani ta ammanuwa iya bolla wothana” Qassika, “Xoossay taw immida naytara ta hayssan de7ays” yaagees.

14 Nayti ashoynnne suuthi de7eyssata gidiya gisho Yesuusikka enttada ase gidis. I hessa oothiday, hayqo bolla wolqqi de7iya Xalahiya ba hayquwan dhayssanaassa. <sup>15</sup> Qassi bantta de7o laytha ubban hayqo yashshan ayllettidi de7eyssata aylletethaafe wozanaassa.

16 Tuma Yesuusi yiday Abrahame zerethi maaddanaassafe attin kiitanchchota maad-danaassa gidenna. <sup>17</sup> Asaa nagaray atto geetettana mela Xoossaas sinthan maariyanne ammanettida kahine halaqa gidis. Hessa gisho, I ubbaban ba ishata daananaw bessees.

18 I ba huu7en paacen waayettida gisho paaceteyssata maaddanaw dandda7ees.

## 3

### *Yesuusi Museppe bolla*

1 Hessa gisho, Xoossay xeegida geeshsha ishato, nu ammanon Godaa gidi xeegiya hawaariyanne kahine halaqaa Yesuusa be7ite. <sup>2</sup> Musey Xoossaas Keetha ubban ammanettidayssada Yesuusikka bana doorida Xoossaas ammanettidayssa. <sup>3</sup> Keethe keexeyssi

keethafe aadhdhidi bonchchetteyssada Yesuusi Museppe aadhdhiya bonchcho ekkanaaw bessees. <sup>4</sup> Issi issi keethaa keexida asi de7ees, shin ubbaa giigisiday Xoossa. <sup>5</sup> Musey Xoossa Keetha ubban ammanettida aylle gididi, Xoossay sinthafe gaanabaas markka gidis. <sup>6</sup> Shin Kiristtoosi Xoossa Keethan na7ada ammanettidayssa. Nuuni ekkana gidi naagiya ufayssaa minthidi naagikko Xoossa keethi gidoos.

*Xoossa asaas de7iya shemppuwa*

<sup>7</sup> Hessa gisho, Geeshsha Ayyaanay geyssada,  
“Hachchi hintte Xoossay geyssa si7iya wode  
<sup>8</sup> bazzo biittan paaciya gallas,  
hintte aawati makkalidayssada,  
hintte wozanaa minthofite.  
<sup>9</sup> Hintte aawati tana paaccidosona;  
oytam uaythi ta oosuwa be7idosona.  
<sup>10</sup> Hessa gisho, ta he yeletethaa hanqettada,  
‘Entti ubba wode bannta wozanan baloosona;  
ta ogiya eribookkona’ yaagas.  
<sup>11</sup> Hessa gisho, taani ta hanquwan caaqqada,  
‘Ta shemppo bessaa ubbaka gelokkona’ yaagas”  
yaagees.

<sup>12</sup> Ta ishato, hinttfe ooddenkka, de7o Xoossaafe hinttena shaakkiya iitanne ammanonna wozani doonna mela naagettite. <sup>13</sup> Hinttfe oonakka nagari bailethin, ba wozanaa minthonna mela “Hachchi” yaagettidi xeegettishin gallas gallas issoy issuwara zorettite. <sup>14</sup> Nu koyro ammanuwa nuuni wurssethi gakkanaw minthidi naagikko, Kiristtoosara issife laattana. <sup>15</sup> Geeshsha Maxaafan,  
“Hachchi Xoossay geyssa hintte si7iya wode

he wode entti makkalatethan hanidayssada,  
hintte wozanaa minthofite”  
yaagis.

<sup>16</sup> Xoossay giyabaa si7idi makkaliday oonee? Musey Gibxxefe kaalethi kessida ubbaa gidokkonaayye? <sup>17</sup> Xoossay oytm uaythi oona hanqettidee? Nagar oothidayssatanne entta ahay bazzo biittan wodhdhi attida asata gidokkonaayye? <sup>18</sup> Qassi Xoossay, “Ta shemppo bessaa geleketa” yaagidi caaqqiday, iyaw kiitettonna ixxida asaappe attin ooddesse? <sup>19</sup> Hiza, entti he shemppo bessaa gelonna attiday ammaniboonna gisho gideyssa nu be7oos.

## 4

<sup>1</sup> Hiza, Xoossay nuna ba shemppo bessaa gelssana gida qaalay burroo sinthafe de7iya gisho hinttfe oonikka he shemppo bessaa gelonna attonna mela naagettoos. <sup>2</sup> Enttaw Wonggelay sabbakettidayssada, nuuskha sabbakettis. Shin entti si7idabaa ammanidi ekkiboonna gisho entta go77ibeenna. <sup>3</sup> Gidoshin, alamey medhettosape doomidi Xoossa oosoy polettidayssa gidikkoka, Xoossay,  
“Taani ta hanquwan caaqqada,

ta shemppo bessaa ubbaka gelokkona”  
gidayssada, nuuni ammanidayssati iya shemppo bessaa gelana. <sup>4</sup> Laappuntha gallasaaba issi bessan, “Xoossay laappuntha gallasan ba ooso ubbaafe shemppis” yaagis. <sup>5</sup> Qassika he bessan, “Entti ta shemppo bessaa ubbarakka gelokkona” yaagis. <sup>6</sup> Koyro Wonggelaa si7idayssati kiitettonna ixxidi shemppo bessaa gelibookkona. Yaaniya gisho, ha77ika he shemppo bessaa gelana issi issi asati de7oosona. <sup>7</sup> Hessa gisho, Xoossay, “Hachchi” gidi xeegishe issi gallas nuus qanxis. Daro wodeppee guye Xoossay Dawite baggara,  
“Xoossay giyabaa hachchi hintte si7iya wode

hintte wozanaa minthofite”  
yaagidi odis. <sup>8</sup> Iyyasuy enttaw shemppuwa immidabaa gidiyakko, Xoossay hara galasabaa guyeppe odennashin. <sup>9</sup> Hiza, Xoossa asaas Sambbaata shemppoy naagettidi de7ees. <sup>10</sup> Xoossa shemppo bessaa geliya oonikka, Xoossay ba oosuwappe shemppidayssada ikka ba oosuwappe shemppana. <sup>11</sup> Hessa gisho, oonikka he asaa kiitetetha ixxuwa kaallidi, kunddonaada Xoossa shemppo bessaa gelanwan minnoos.

<sup>12</sup> Xoossa qaalay de7onne ootheyssa. Nam77u baggara qarattida mashshafe aadhdhidi oco. I shemppo, ayyaana, xaphonne kolize gakkanaw kanthidi caddees. Qassi asa

wozanan de7iya geemmidha qofaanne amuwaa shaakkidi pirddees. <sup>13</sup> Xoossaa sinthafe qosettiabay ayba medhetethika baawa. Iya ayfe sinthan ubbabay qonccenne kallo de7ees. Nuuni zaaro immanaw bessey iya sinthana.

### *Gita kahine halaqaa Yesuusa*

<sup>14</sup> Hiza, salo keyida gita kahine halaqay, Xoossaa na7ay Yesuusi, nuus de7iya gisho nu ammanuwa minthidi naagoos. <sup>15</sup> Nu kahine halaqay nu daaburiya wode nuus qadhettanaw dandda7eyssa. I nagara oothibeenna, shin nuuda ubbaban paacettis. <sup>16</sup> Hiza, maarotethaa ekkanawunne maade koshshiya wode aadho keehatethaa demmanaw aadho keehatethay de7iyasuwa Xoossaa araatakko yayyonna shiiqoos.

## 5

<sup>1</sup> Issi issi kahine halaqi asaa giddofe doorettidi, Xoossaara gathiyaban asaa gisho imotanne nagara yarshsho yarshshanaw shuumettees. <sup>2</sup> I ba huu7en daaburanchcho gidiya gisho eronnayssatasinne baleyssatas qadhettanaw dandda7ees. <sup>3</sup> I ba nagara gishonne asa ubbaa nagara gisho yarshsho yarshshanaw bessey hessassa.

<sup>4</sup> Oonikka ha bonchchuwa baw ekkanaw dandda7enna, shin Aaroni kahine halaqa gidanaw xeegettidayssada Xoossan xeegettanaw bessees. <sup>5</sup> Hessadakka, Kiristtoosi kahine halaqa gidiya bonchchuwa baw ekkibeeenna. Shin Xoossay iya,

“Neeni ta Na7aa.

hachchi ta new Aawa gidas”

yaagees. <sup>6</sup> Qassi harason,

“Malkkexxaadiqey kahine gididayssada,  
neeni merinaw kahine gidana”

yaagees.

<sup>7</sup> Yesuusi ase gididi ha alamiyan de7iya wode bana hayqoppe ashshanaw dandda7iya Xoossaa daro yeehoninne afuthan woossis. I, iya bonchchidi kiittida gisho Xoossay iya woosaa si7is. <sup>8</sup> Yesuusi Xoossaa Na7a gidikkoka ba waayettida waayan kiitetethi tamaaris. <sup>9</sup> Hessankka, Yesuusi ba oosuwa polidaappe guye baw kiitettiya ubbay merinaa atotethaa demmania mela gaaso gidis. <sup>10</sup> Xoossay Malkkexxaadiqe shuumidayssada kahine halaqa oothidi iya shuumis.

### *Ammanuwan daaburonna mela imettida naagiso*

<sup>11</sup> Ha nu oda bolla gujji haasayanabay darobay de7ees, shin hintte akeekay guutha gidiya gisho hinttew odi gelssanaw waayes. <sup>12</sup> Hintte hannoode asttamaare gidanaw bessees, shin Xoossaa qaalaa koyro timirttiya hinttena zaari tamaarssiya hara asi koshshees. Hintte mino kathi maanaw dandda7onna gisho maathi koshshees. <sup>13</sup> Maathi paahettiya oonikka yooga na7a gidiya gisho lo77onne iita shaakki erenna. <sup>14</sup> Shin mino kathi lo77onne iita shaakkidi eriya kahaama asaassa.

## 6

<sup>1</sup> Hiza, Kiristtoosabaa tamaarssiya koyro timirttiya aggidi Kiristtoosan kahaamatethako boos. Hayqo oosoppe simobaanne Xoossaa ammanobaa koyro timirttiyako guye simmoko. <sup>2</sup> Hessadakka, xinqqatetabaa,\* kushe wosobaa, hayqoppe denddobaanne merinaa pirddabaa zaari tamaarokko. <sup>3</sup> Xoossay giilku nu hessa oothana.

<sup>4</sup> Issi toho poo7oy poo7idayssata, salo imota ekkidayssata, Geeshsha Ayyaanan shaaketidayssata, <sup>5</sup> lo77o Xoossaa qaalanne sinthafe yaana alamiya wolqqaa be7idayssata, <sup>6</sup> guyeppe kaddidayssata nagaraappe nam77antho zaaranaw dandda7ettenna. Ays giilku, entti bantta dhayuwas Xoossaa Na7aa zaari kaqqiya mela masqaliya bolla iya kaqqosonnanne asa sinthan kawushshosona.

<sup>7</sup> Ubba wode I bolla bukkiya iraa uyada, goyida uraa maaddiya kathi immiya biittiya Xoossan anjjettidaaro. <sup>8</sup> Shin agunthunne kinchchote doliya biittiya aybibaakkha maaduku; iw qanggethay matattis; wursethan xuugettana.

<sup>9</sup> Nu siiqo ishato, nuuni hayssada odiyabaa gidikkoka, hinttena atotethaako kaaletihiya lo77obay hinttew de7eyssa eroos. <sup>10</sup> Xoossay suure pirddeyssa. Xoossay, hintte oothida oosuwunne kase gidin ha77ika ammaneyssata maaddidi, iyaw de7iya siiquwa bessidayssa

dogenna.<sup>11</sup> Hintte ubbay ufayssan naageyssa demmana gakkanaw ha minotethaa wurssethi gakkanaw bessana mela nu amottoos.<sup>12</sup> Hintte ammanoninne dandda7an naagiya ufayssaa laattiya asaa daanana melappe attin azalla gidana mela koyokko.

### *Xoossay immida ufayssay sidhisenna*

<sup>13</sup> Xoossay Abrahames immana gidi caaqqida wode baappe aadhdhiya hari giti baynna gisho ba huu7en caaqqis.<sup>14</sup> Iyaakkoo, "Taani nena anjjana; ne zerethaaka darssana" yaagis.

<sup>15</sup> Abrahamey dandda7an naagidi Xoossay immana gida ufayssaa ekkis.

<sup>16</sup> Asi caaqqishe baappe gitatiya uran caaqees; he caaqqoy geetettidabaa minthidi, palama ubbaa teeqees.<sup>17</sup> Hessa gisho, Xoossay ba laamettonna qofaa ufayssaa qaala laatteyssat qonccisanaw koyida gisho caaqqon minthis.<sup>18</sup> Xoossay worddotenna. Iya ufayssaa qaalaynne caaqqoy, nam77ayka laamettokkona. Ha nam77ubatan nu sinthan de7iya ufayssaa oykkanaanadda7ana mela geshe demmanaw iyaakkko baqatida nuuni, wolqqaama minthetho demmana.

<sup>19</sup> Ha ufayssay nu shemppuwash, markkabey qaaxxonnaada minthidi oykkiya biraata mela. He ufayssay magaraajjuwafe guye baggan de7iya geeshsha bessaa gelis.<sup>20</sup> Yesuusi Malkkexxaadiqe shuumatethaada merinaw kahine halaqa gididi, nu gisho nuuppe sinthattidi he bessaa gelis.

## 7

### *Kahiniya Malkkexxaadiqe*

<sup>1</sup> Malkkexxaadiqe, Saaleme Kawoy, Ubbaafe Bolla Xoossaah kahine. He Malkkexxaadiqe Abrahamey kawota oli xoonidi simmishin iyara gagettidi iya anjjis.<sup>2</sup> Abrahamey ba di77idabaa ubbaafe iyaw asraata kessidi immis. Malkkexxaadiqe sunthay koyro "Xil-lotethaa kawo", nam77antho, "Saaleme kawo" birshshethay, "Sarotethaa kawuwa" guussu.<sup>3</sup> Malkkexxaadiques aaya woykko aawu woykko zare paydoy baawa. Iya yeletethas doomethi woykko iya de7uwash wurssethi baawa, shin Xoossaah Na7a daanidi merinaw kahine gidis.

<sup>4</sup> Malkkexxaadiqe ay mela giteekko be7ite. Nu aawata mayzay, Abrahamey, ba de77idabaa ippe iyaw asraata immis.<sup>5</sup> Kahine gidiya Leewe zarey Isra7eele asappe, hessika Abrahame zerethi gidida bannta ishatappe asraata ekkana mela higgey kiittees.<sup>6</sup> Malkkexxaadiqe Leewe zare gidonna ixxikokka Abrahamepppe asraata ekkis; ufayssaa qali de7iya Abrahame anjjis.<sup>7</sup> Guuthay gitaa anjjetteyssi palanthenna.

<sup>8</sup> Issi baggara, asraata ekkeyssati hayqqiya asata, shin hara baggara asraata ekkeyssi de7on de7ees yaagidi odettidayssa.<sup>9</sup> Hiza, asraata ekkiya Leewey, Abrahame baggara asraata immis gaanaw dandda7ettees.<sup>10</sup> Ays giikko, Malkkexxaadiqe Abrahamera gagettida wode Leewey yelettiboonnabaa gidikkoka, ba mayzaa Abrahame gulbbatan de7ees.

<sup>11</sup> Isra7eele asaas higgey Leewe kahinetethaa baggara imettis. Ha Leewe kahinetethay polo gididabaa gidiyakko Aaronayssa mela gidonnashin, Malkkexxaadiqe mela hara kahine shumanaw ays koshshidee?<sup>12</sup> Hiza, kahineti laamettiya wode higgeykka qassi laamettanaw bessees.<sup>13</sup> Ha nu iyabaa odiya uray hara zare; iya sheeshhaappe oonikka yarshsho bessan kahinetethaa oothibeenna.<sup>14</sup> Nu Goday Yihuda sheeshhaappe yidayssi erettidayssa. Gidoshin, Musey kahintebaa odishe Yihuda zariyaba aybaakkha odibeenna.

<sup>15</sup> Malkkexxaadiqe mela hara kahiney yidabaa gidiyakko ha nu odiyabay aadhdhi qonccana.<sup>16</sup> I kahine gididay dhayonna de7uwa wolqqaanappe attin iya mayzaa higgeninne wogan gidenna.<sup>17</sup> Geeshsha Maxaafay,

"Malkkexxaadiqe kahinetethaa mela,

neeni merinaw kahine"

yaagidi markkattees.<sup>18</sup> Koyro higgey daaburanchchonne maaddonabaa gidiya gisho shaarttis.<sup>19</sup> Muse higgey aybinkka polo oothanaw dandda7ibeenna. Shin nuuni iya baggara Xoossaakkoo shiiqya ubbaafe aadhdhiya ufayssaa qaalay nuus imettis.

<sup>20</sup> Kiristtoosi kahine gidiya wode Xoossay caaqqis, shin harati kahine gidida wode hessa mela caaqqoy baawa.<sup>21</sup> Shin Yesuusi caaqqon kahine gidis. Xoossay yaagidi caaqqis; "Goday caaqqis; I ba qofaa laammenna;

'Neeni merinaa kahine"

yaagis.<sup>22</sup> Ha caaqua wa gaason Yesuusi nuus ubbaafe aadhdhiya qaala caaqua wasse gidis.

<sup>23</sup> Kahinetethaa oothonna mela hayqoy entta diggida gisho koyro kahineteta tayboy doro.

<sup>24</sup> Shin Yesuusi merinaw de7iya gisho iya kahinetethaa hari laattenna.<sup>25</sup> Hessa gisho,

I ubba wode entta gisho gaannatanaw merinaw de7iya gisho Xoossaakkko iya baggara yeysata polo ashshanaw dandda7ees.

<sup>26</sup> Hiza, nuus koshshiyabaa immiya, geeshshay, boreynne tuni baynnayssi, na-garanchchotappe shaakettadaysinne saluwappe aadhdhidi dhoqqida kahine halaqay nuus koshshees. <sup>27</sup> I hankko kahine halaqata mela koyro ba nagara gisho kaallidi asaa nagaaraa gisho gallas gallas yarshsho yarshshanaw koshshenna. I bana yarshshida wode zaarethonna ogen issi toho bana yarshshis. <sup>28</sup> Muse higgey daaburanchcho asaa kahine halaqa oothidi shuumees. Shin higgiyafe guye yida caaqo qaalay merinaw polo gidida Xoossa Na7aa shuumis.

## 8

### *Yesuusi nu kahine halaqaa*

<sup>1</sup> Nuuni haasaya gitabay hessa. Saluwan Ubbaafe Bolla Xoossaara atappet ushachcha baggan uttida hayssa mela kahine halaqay nuus de7ees. <sup>2</sup> I asan gidonnashin Godan eqqida tuma dunkkaaniyan Xoossa Keethan oothees.

<sup>3</sup> Kahine halaqa ubbay imonne yarshsho yarshshanaw shuumettes. Hessa gisho, ha kahine yarshshanaw issibay daanaw koshshees. <sup>4</sup> Higgey kiiteyssada yarshshiya kahineti de7iya gisho Kiristtoosi sa7an de7iyabaa gidiyakko kahine gidenna. <sup>5</sup> Entti kahinetethan oothiya dunkkaaney salon de7eyssas leemisonne kuya. Musey dunkkaaniya essiya wode Xoossay iyaakkoo, “Taani nena deriya bolla besida leemisuwa kaallada ootha” yaagis. <sup>6</sup> Shin Yesuusi giddo gididi sigethiya caaqoy, koyro caaqua-wappe aadhdheyssada I eqqida oosoy enttayssafe aadhdhees. Hessi eqqiday aadhdhiya caaqo qaalana.

<sup>7</sup> Koyro caaqua-wabi baynaba gidiyakko nam77antho caaqo koshshenna. <sup>8</sup> Shin Goday iya boridi, hayssada yaagis:

“Taani Isra7eele asaaranne Yihuda asaara  
ooratha caaqo caaqqiya wodey yaana.

<sup>9</sup> He caaqoy ta entta aawata Gibxxe biittaafe kushiya oykkada,  
goochcha kessida wode enttara caaqqida caaqua-wa mela gidenna.

Entti ta caaqua-wan ammanettiboonna gisho  
taani entta yegga aggas yaagees Goday.

<sup>10</sup> Shin hizappe guye Isra7eele asaara  
ta caaqqana caaqoy hayssa yaagees Goday.

Taani ta higgiya entta guugiyen wothana;  
entta wozaanay xaafana.

Taani entta Xoossa gida;  
entti ta ase gida.

<sup>11</sup> Enttafe oonikka ba shooruwa woykko ba ishaa,  
‘Godaa era’ yaagidi tamaars-senna.

Entti guuthafe gita gakkana-w  
ubbay tana erana.

<sup>12</sup> Taani entta naaqua-wa atto gaana;  
entta nagaraa ‘zaara qoppike’ yaagees.

<sup>13</sup> Xoossay ha caaqua-wa “Oorathi” gidi xeegishe koyroyssa gal77isis. Hiza, gal77aynne ceegay dhayaa wodey gakkis.

## 9

### *Salo goynnonne sa7a goynno*

<sup>1</sup> Koyro caaqua-was Xoossa goynniya wogaynne sa7a Xoossa Keethay de7ees.

<sup>2</sup> Dunkkaaney eqqis. Iyan xomppe wothiya kocay, xarpheezaynne Godaa sinthan wothiya uythay de7ees; he bessay Geeshsha Bessaa geetettees. <sup>3</sup> Nam77antho magaraajjuwafe guye baggara de7iya bessay Ubbaafe Geeshsha Bessaa geetettees. <sup>4</sup> Iya giddon ixaane cuyisiya worqqa saaxineynne worqqa meeshettida caaqo Taabotey de7ees. He caaqo Taabotiyen mannay de7iya worqqa xaaroy, aacida Aarona xam77aynne Muse higgey xaafettida nam77u lochche shuchchat de7oosona. <sup>5</sup> He Taabotiyappe bolla baggara atotetha kamaa bantta qefiyen genthiya bonchcho kiuubeti de7oosona. Shin ha77i he ubbaa qonccisidi odanaw dandda7okko.

<sup>6</sup> Ha ubbay hayssada giigidaappe guye, kahineti ubba wode bantta oosuwa oothanaw dunkkaaniyas koyro kifiliya geloosona. <sup>7</sup> Shin kahine halaqaa xalaali dunkkaaniyas

nam77antho kifiliya laythafe issi toho gelees. I yaa gelishe ba nagaraa gishonne asay eronna oothida nagaraa gisho suutha yarshsho ekkonna gelenna.<sup>8</sup> Koyro dunkkaaney eqqidi de7ishin, Ubbaafe Geeshsha Bessaa efiya ogey burroo dooyettiboonnayssa Geeshsha Ayyaanay hessian erisees.

<sup>9</sup> Hessi ha wodiyas leemiso; Xoossas immetiya imoynne yarshshoy goynniya uraa kaha geeshshanaw dandda7onayssa hayssi bessees. <sup>10</sup> Hessati muussabaa, ushshabaanne dumma dumma meechcha wogata odehyssata. Entti ooratha wogay yaana gakkanaaw oosettiya kare bagga wogata.

<sup>11</sup> Shin Kiristtoosi ha77i nu demmida lo77obaatas kahine halaqa gididi yis. I gelida dunkkaaney gitanne polo gididayssa. He dunkkaaney asa kushen oosettibeenna qassi ha alamiyabaa gidenna. <sup>12</sup> Kiristtoosi Ubbaafe Geeshsha Bessaa geliya wode deesha suuthinne mara suuthi ekkidi gelibeenna. Shin merinaa atotethaa immanaw ba suuthaa ekkidi zaarethonna ogen issi toho gelis. <sup>13</sup> Deesha suuthaynne kormma suuthay, xuugettida ussa bidoy, tunida asaa bolla dharcctetti enttana geeshshiyabaa gidikko, <sup>14</sup> merinaa Geeshsha Ayyana baggara borey baynna yarshsho oothidi, Xoossaas bana immida Kiristtoosa suuthay, de7o Xoossaas goynnana mela hayqo kaaletihiya oosuwappe nu kaha waati aathi geeshshennetee?

<sup>15</sup> Hessa gisho, xeegettidayssati Xoossay immida merinaa laata ekkana mela Kiristtoosi ooratha caaquwas giddo gididi sigetheyssa gidis. Hessi haniday asay koyro caaquwappe garssan de7iya wode oothida nagaraappe enttana wozanaw I hayqqidayssana.

<sup>16</sup> Hiza, keekey de7ikko, he keekida uraa hayqoy erettanaw koshshees. <sup>17</sup> Keekida uray hayqqiko iya keekey minnees. Keekida uray hayqqona attiko iya keekey oothenna.

<sup>18</sup> Hari attoshin, koyro caaqoykka suuthi baynna minnibeenna. <sup>19</sup> Musey higge kiita ubbaa asaas odidaappe guye Mara suuthinne deesha suuthi haathara walakkidi, zo7o dorssa ikisenne hisophe boncco ekkidi, maxaafaa bollanne asaa bolla wurxxis. <sup>20</sup> Musey asaakko, "Hintte naagana mela Xoossay kiittida suutha caaqoy hayssa" yaagis. <sup>21</sup> Hessadakka, dunkkaaniya bollanne oothiya miishe ubbaa bolla suuthaa wurxxis. <sup>22</sup> Tumakka higgey geyssada guuthabatappe attin ubbabay suuthan geeyees. Suuthi gukkonnashin atotethi baawa.

### *Yesuusa polo yarshshetethaa*

<sup>23</sup> Saluwabaas leemiso gididayssati ubbay mehe yarshshon geeyanaw koshshees. Shin salobati bannta huu7en hessafe aadhdiya yarshshawan geeyanaw koshshees.

<sup>24</sup> Kiristtoosi tuma Xoossa Keethas leemiso gidida, asa kushen oosettida Ubbaafe Geeshsha Bessaa gelibeenna. Shin I ha77i nu gisho Xoossaas sinthan benttanaw saluwa gelis. <sup>25</sup> Kahine halaqay laythan laythan ba suuthi gidonnayssa ekkidi, Ubbaafe Geeshsha Bessa gelees. Shin Kiristtoosi daro toho bana yarshshanaw salo gelibeenna. <sup>26</sup> Hessada hanidabaa gidiyakkoo, Kiristtoosi alamey medhettosappe doomidi daro toho waayettanaw koshshees. Shin ha77i wodiyas wurssethan nagara digganaw bana yarshshidi zaarethonna ogen issi toho benttis.

<sup>27</sup> Asi ubbay issi toho hayqqanaw hessafe guye pirdettanaw bessees. <sup>28</sup> Hessadakka, Kiristtoosi daro asaa nagara digganaw issi toho yarshshettis. Shin I nagara tookkanaw gidonnashin bana naageyssata ashshanaw nam77antho qonccana.

## 10

<sup>1</sup> Muse higgey yaanaw de7iya lo77obatas kuyappe attin ba huu7en waanna gidenna. Hessa gisho, laythan laythan pacey baynna yarshshettiya yarshshoy goynnanaaw shiqiya asaa polo oothanaw dandda7enna. <sup>2</sup> Higgey entta polo oothanaw dandda7idabaa gidiyakkoo entti yarshsho yarshshettsa agganashin. Qassi goynnanaaw shiqiya asay bannta nagaraappe geeyana; entta kahaykka enttana bala gidi mootenna. <sup>3</sup> Shin he yarshshoti laythan laythan nagara qofisoosona. <sup>4</sup> Ays giikko, kormma suuthinne deesha suuthi nagara digganaw dandda7enna.

<sup>5</sup> Hessa gisho, Kiristtoosi ha alamiya yida wode hayssada yaagis:  
"Neeni yarshshonne imo koyabaakk;

shin taw asho gigisadasa.

<sup>6</sup> Neeni xuugettiya yarshshoninne

nagara yarshshawan ufaytabaakk.

<sup>7</sup> He wode 'Ta gisho maxaafan xaafetidayssada,  
Godaw, taani ne sheniya oothanaw yas' yaagas"

yaagis.<sup>8</sup> Yarshshoy yarshshettana mela higgey kiittiyabaa gidikkoka, Kiristtoosi koyro, "Neeni yarshshonne imo, xuugettiya yarshshonne nagara yarshsho koyabaakkka; enttan ufayttabaakkka" yaagis.<sup>9</sup> Kaallidikka I, "Godaw, hekko taani ne sheniya oothanaw yas" yaagis. Hessa gisho, Kiristtoosi nam77anthuwa essanaw koyroyssa shaaris.<sup>10</sup> Yesuus Kiristtoosi Xoossa sheniya oothidi, zaarethonna ogen issi toho ba ashuwa yarshshida gisho nuuni geeyida.

<sup>11</sup> Kahine ubbay, nagara digganaw dandda7onna he yarshshota gallas gallas yarshshishe eqqidi ba oosuwa oothees.<sup>12</sup> Shin Kiristtoosi ubba wodes gidiya issi nagara yarshshuwa yarshshidi, Xoossaafe ushachchha baggan uttis.<sup>13</sup> He wodiyappe doomidi iya morkketi iya tohoy yedhdhiyabaa oothana gakkanaw naagees.<sup>14</sup> I zaarethonna ogen issi toho bana yarshshida yarshshuwan geeshshata merinaw polo oothis.

<sup>15</sup> Qassi Geeshsha Ayyaanay nuus hayssa markkattees. Koyro hayssada yaagis:

<sup>16</sup> "He gallasatappé guye,  
taani enttara caaqqiya caaqoy hayssa:

Taani ta higgija entta qofan wothana;  
entta wozaan xaafan"

yaagees.<sup>17</sup> Kaallidikka,

"Taani entta nagaraanne

entta iita oosuwa zaara qoppike"

yaagees.<sup>18</sup> Hiza, nagari atto geetettidaappe guye nagaras yarshshettiya yarshsho koshshenna.

### *Ane Xoossaakko shiiqoos*

<sup>19</sup> Hiza, ta ishato, nuuni Yesuusa suuthaa baggara Ubbaafe Geeshsha Bessaa gelanaw nuus minutethi de7ees.<sup>20</sup> Nu gelanay Kiristtoosi ba magaraajuwa, hessika ba ashuwa baggara nuus dooyida oorathinnee de7o gidiya ogiyana.<sup>21</sup> Nuus Xoossa Keetha bolla shuumettida gita kahine halaqay de7ees.<sup>22</sup> Nuuni iita kahappe geeyanaw nu wozanaa wurxettidi, nu asatethaa xillo haathan meecettidi, suure wozananinne polo ammanon Xoossaako shiiqoos.

<sup>23</sup> Nuus ufayssa qaala immida Xoossay ammantidayssa gidiya gisho nu markkattiya ufayssaa ushachchi haddirssi goonna minthidi oykkos.<sup>24</sup> Issoy issuwa siiqosinne lo77o oosos waati denthethaneekko ane qoppoos.<sup>25</sup> Issoti issoti meeze oothidi shiiqeyssa aggidayssada nuuni issife shiiqeyssa aggoko. Shin Godaa gallasay matattidayssa hintte be7iya gisho hessa kaseyssafe aathidi oothite.

<sup>26</sup> Nuuni tumaa eratethaa ekkidaappe guye erishe nagara oothiko, hizappe nu nagaraa gisho yarshshettana yarshshoy baawa.<sup>27</sup> Shin hiza attiday yashshiya pirddaanne Xoossa morkketa xuugganaw giigida wolqqaama tamaa.<sup>28</sup> Muse higgiya kiitettonna ixxida oonikka nam77u woykko heedzu asi iya bolla markkatiko qadhey baynnashin hayqqees.<sup>29</sup> Yaatin, Xoossa Na7aa kadhida uray, bana geeshshida Xoossa caaqa suuthaa tunabaadaa qoppida uray, qassi aadho keehatetha Ayyaanaa cayida uray, ay mela iita pirddaa ekkanaw bessiyako ane qoppite.

<sup>30</sup> Hiza, "Halo kesoy tabaa, ta kushe zaaran" gidayssa nu eroos. Qassika, "Goday ba asaa pirddana" yaagis.<sup>31</sup> De7o Xoossa kushen kunddethi daro yashshees.

<sup>32</sup> Hinttew Xoossa poo7oy poo7idaappe guye hintte daro waayen, gita baaxen genccida beni wodiya qoppite.<sup>33</sup> Issi issi toho hintte asa sinthan cayettideta; goodettideta; issi issi toho hessa mela waayey gakkida asaara issife waayideta.<sup>34</sup> Qashon de7iya asaaskka qadhettideta. Hinttew lo77onne dhayonna shaloy salon de7eyssa hintte erida gisho hintte shaloy bonnettiya wode ufayssan dandda7ideta.

<sup>35</sup> Hessa gisho, gita woytoy de7iya hintte minutethaa yeggofite.<sup>36</sup> Xoossa sheniya polidi, I hinttew immania gida ufayssaa ekkana gakkanaw genccanaw koshshees.<sup>37</sup> Hiza, Geeshsha Maxaafan,

"I, yaana gidayssi yaana; gam77enna.

<sup>38</sup> Shin ta xilloy, tanan ammanettidi daana; oonikka guye simmiko tana ufayssenna"  
yaagees.<sup>39</sup> Nuuni ammanettidi attiyaa asaa baggafe attin guye simmidi dhaya asaa bagga gidokko.

## 11

### *Ammano*

<sup>1</sup> Ammanoy guussay, demmana gidi ufyassan ammanettidi naagiyabaanne nu be7onnabaa be7iyada oothidi ekkiyabaa. <sup>2</sup> Beni aawati ammanon Xoossaafe markkatehi ekkidosona.

<sup>3</sup> Alamey Xoossa qaalan medhettidayssa nu ammanon eroos. Qassi benttiyabay benttonnabaappe medhettis.

<sup>4</sup> Aabeli Qaa7elayssafe aadhdhiya yarshsho Xoossaas yarshshiday ammanona. Xoossay Aabela imuwa ufyattidi ekki wode I xillo gididayssa markkattis. Aabeli hari attoshin, hayqqidikka ba ammanuwan ha77i gakkanaan oodes.

<sup>5</sup> Heenokey hayqqonno salo biday ammanona. Xoossay iya ekkida gisho oonikka iya be7anaw dandda7ibeenna. Heenokey salo ekettanaappe sinthe I Xoossaas ufyassida asi gideyssi odettis. <sup>6</sup> Ammanoy baynna oonikka Xoossaas ufyassanaw dandda7enna. Xoossaakkoo yaa oonikka Xoossay de7eyssanne bana koyeyssatas woyto immeysa ammananaw koshshees.

<sup>7</sup> Nohey burroo benttonnabaas Xoossay iyaw odida wode Xoossaas yayyidi, bananne ba soo asaa ashshanaw ammanon markkabe keexxis. Yaatidi ba ammanuwan alamiya pirdidii, ammanon benttiya xillotethaa Xoossaafe ekkis.

<sup>8</sup> Abrahamey laata oothidi ekkana biittaa baana mela Xoossay iya xeegida wode hari attoshin, I aw biyakko eronna ixxikokka kiitettiday ammanona. <sup>9</sup> Abrahamey Xoossay iyaw immana gida biittan bete asada de7iday ammanona. Xoossay he immana gidayssa iyara issife laattanaw de7iya Yisaqaqaranne Yayqoobara wolla dunkkaanen de7is. <sup>10</sup> I, Xoossay qoppidi keexida xaala baasoy de7iya katamaa naagees.

<sup>11</sup> Saara ba huu7en cimidabaa gidiikkoka ufyassi immida Xoossay ammanettidayssa gideyssa erida gisho qanthatanaw wolqqa demmiday ammanona. <sup>12</sup> Hessa gisho, hayqqida asi daaniya issi addiyafe salo xoolintto melanne abbaa gaxan de7iya tayboy baynna shafe mela zerethay yelettidosona.

<sup>13</sup> He asa ubbay bantlaw geetettida ufyssaa qaala ekkona ammanon hayqqidosona. Shin haahora hessa be7idi, demmidaada oothidi, ufyassan ekkidosona. Qassi entti sa7an imathenne bete asi gideyssa eridosona. <sup>14</sup> Hessada giya asay bantta biittaa naageyssa qonccee bessees. <sup>15</sup> Entti he aggidi keyida biittaa guye qoppidabaa gidiyakkoo guye simmanaw dandda7osona. <sup>16</sup> Shin ha77i aadhdhi lo77iya salo biittaa laamotosona. Hessa gisho, Xoossay enttaw katama gigisida gisho “Entta Xoossa” geetettidi xeegettanaw yeellatenna.

<sup>17</sup> Abrahamey paacettida wode Yisaqaq yarshshiday ammanonna. He ufyassa qaala ekkida Abrahamey ba issi na7aa yarshshanaw giigis. <sup>18</sup> Xoossay Abrahamekko, “Ne zerethay Yisaqaq baggara xeegettana” yaagidi odis. <sup>19</sup> Xoossay hayqoppe denthanaw dandda7eyssa Abrahamey ammanida gisho Yisaqaq hayqoppe paxi denddidaada oothidi zaari ekkis.

<sup>20</sup> Yisaqaqi wodepppe hananabaa eridi Yayqoobanne Eesawe anjjiday ammanona.

<sup>21</sup> Yayqoobi hayqqana hanishe, issi issi Yoosefa nayta anjjidaynne guufe bolla katidi goynniday ammanonna.

<sup>22</sup> Yoosefi hayqqanaw matida wode Isra7eele asay Gibxxefe keyanayssa odidaynne ba meqethaa oothanabaa entta kiittiday ammanona.

<sup>23</sup> Musey yelettidaappe guye iya aayanne iya aaway mala lo77o na7a gididayssa be7idi heedzu ageena qottiday ammanona; entti kawuwa awaajjuwa yayyibookkona.

<sup>24</sup> Musey dicciidaappe guye Gibxxe kawuwa na7ee na7a geetettanayssa ixxiday ammanona. <sup>25</sup> Musey nagaran guutha wodes ufyattanaappe, Xoossaas asaara waaye ekkanayssa dooris. <sup>26</sup> I wodepppe demmana woytuwa tishshi oothidi xeellida gisho Gibxxe shaluwappe aathidi Kiristtoosa gisho borettanayssi daro aadhdhiya duretethi gididayssa eris.

<sup>27</sup> Musey Kawuwa hanquwa yayyonna, Gibxxefe keyiday ammanona. Benttonna Xoossaas be7ida asada hanidi ba qofan genccis. <sup>28</sup> Hayqo ehiya kiitanchchoy Isra7eele asaa bayra nayta wodhonna mela Musey Faasikanne suutha wurxetha wogaa oothiday ammanona.

<sup>29</sup> Isra7eele asay mela biittara hamuttiyada hamuttidi, Zo7o Abbaa pinniday ammanona. Shin Gibxxe asay gelanaw paaci be7ishin haathay entta mittis.

<b>11:3</b> Medhe 1:1; Maz 33:6,9; Yoha 1:3	<b>11:4</b> Medhe 4:3-10	<b>11:5</b> Medhe 5:21-24	<b>11:7</b> Medhe 6:13-22	<b>11:8</b>
Medhe 12:1-5	<b>11:9</b> Medhe 35:27	<b>11:11</b> Medhe 18:11-14; 21:2	<b>11:12</b> Medhe 15:5; 22:17; 32:12	<b>11:13</b>
Medhe 23:4; 1Taari 29:15; Maz 39:12	<b>11:17</b> Medhe 22:1-14	<b>11:18</b> Medhe 21:12	<b>11:20</b> Medhe 27:27-29,39-40	
<b>11:21</b> Medhe 47:3; 48:1-20	<b>11:22</b> Medhe 50:24-25; Kessa 13:19	<b>11:23</b> Kessa 1:22; 2:2	<b>11:24</b> Kessa 2:10-12	
<b>11:28</b> Kessa 12:21-30	<b>11:29</b> Kessa 14:21-31			

<sup>30</sup> Isra7eеле asay Iyaarkko katamaa shuchcha dirssaa laappun gallas yuuyidi, kunddisiday ammanona. <sup>31</sup> Laymiya Ra7aabaa biittaa wochcheysata mokkida gisho kiitettonna asara hayqonna attiday ammanona.

<sup>32</sup> Hiza, haraa ta ay go? Gediyoonabaa, Baaraqabaa, Samsoonabaa, Yofttaahebaa, Dawiteebaa, Saamu7eelabaa, qassi nabetabaa odanaw taw wodey gidenna. <sup>33</sup> Entti ammanon kawotethata xoonidosona; xillotethan aysidosona; Xoossay immana gida ufayssaa ekkidosona; gaammota doona gorddidosona; <sup>34</sup> tama wolqqaa toysidosona; morkkata mashshaafe attidosona; bantta daaburam minnidosona; olan wolqqama gididosona; al-laga toora goodidosona. <sup>35</sup> Maccasati bantta hayqqidayssati hayqoppe paxin ekkidosona.

Qassi harati aadhdiya hayqoppe dendduwa ekkanaw koyidi qashuwappe biletanayssa ixxidosona. <sup>36</sup> Harati asan borettidi lisson garaafettidosona; harati santhalaatan qashettidi qasho keethan yegettidosona. <sup>37</sup> Entti suchchan cadettidosona; magaazen nam77a keyidi phalqgettidosona; paacettidosona; mashshan hayqqidosona; enttaw ubbabay dhayin metootidosona. Dorssa itenue deesha ite ma77idi yuuyidosona. <sup>38</sup> Enttaw ha alamey giigonna ixxin bazzo biittan, dere bolla, gonggoloniinne olla giddon yuuyidosona.

<sup>39</sup> Xoossay entta ammanuwabaa markkattikokka, he ubbay geettida ufayssaa qaala ekkibookkona. <sup>40</sup> Xoossay nuus lo77obaa qoppi wothida gisho entti nuuni bayyna polo gidokkona.

## 12

### *Xoossay nuus aawa*

<sup>1</sup> Hiza, shaarada nu yuushuwan darida hayssa mela markkatti nu matan de7iya gisho nuna dhubbiya ubbaanne oykkidi haariya nagaraa diggidi, nu sinthan de7iya gaadde wothaa genccan woxxoos. <sup>2</sup> Nu ammanuwas oge dooyidayssanne nu wurssetha poluwakko nuna gathiya Yesuusa bolla nu ayfiyya woothoos. Yesuusi wodeeppe de7iya ufayssaa gisho masqaliya waaya dandda7idi, yeella hayquwa kadhidi, Xoossaafe ushachcha baggan uttis.

<sup>3</sup> Hiza, hintte doccidi ufayssi qanxonna mela nagaranchchota ixuwa dandda7ida Yesuusa qoppite. <sup>4</sup> Nagarara de7iya baaxiyan burroo suuthu guussana gakkanaaw eqettibeekketa. <sup>5</sup> Xoossay ba qaalan, ba naytada hinttena zoridayssa dogideta.

“Ta na7aw, Xoossa seera leqqofa;

i nena seeriya wode ufayssi qanxofa.

<sup>6</sup> Goday ba dosiya uraa seeres;

qassi ba na7ada ekkija ubbaa garaafees”

yaagees. <sup>7</sup> Xoossay hinttena ba naytada seeriya wode genccite; Aaway seeronna na7i oonee? <sup>8</sup> Xoossay ba nayta ubbaa seeres; hintte seerettonna ixxiko tuma iya nayta gidonnashin balakko nayta. <sup>9</sup> Qassi nuna yelida nu awatii nuna seerosona; nukka enttana bonchchoos. Yaatin, nuuni nu aayaana Aawas waanidi aathi haarettoko? <sup>10</sup> Hiza, nu awatii banttaw lo77o daanida mela guutha wodes nuna seeridosona. Shin Xoossay nu go77aas, nu iya geeshshatethan shaakettana mela seeres. <sup>11</sup> Nuuni seerettiya wode yiloyeesippe attin ufayssenna. Shin guyeppe seeretethaa meezeetida asaas seeray, saroy kumida xillotethaa ayfe ayfisees.

### *Zorenne naagiso*

<sup>12</sup> Hiza, hintte arggaacida qesiyanne hintte daaburida gulbbata minthite. <sup>13</sup> Wobbey paxana melappe attin aathi meqqonna mela hintte tohuwas suure oge giigisite.

<sup>14</sup> Asa ubbaara saro daanawunne geeshshatethan daanaw minnite; geeshshatethi baynna oonikka Godaa be7anaw dandda7enna. <sup>15</sup> Hinttefe ooddeskka Xoossa aadho keehatethay pacconnaada, qassi camo ayfe ayfidi daro asaa tunisiyanne dhayssya zerethada gidonna mela naagettite. <sup>16</sup> Hintte giddon laymatiye asi woykko issi toho miya kathas ba bayratethaa toochchidi bayzida Eesawe mela asi doonna mela naagettite. <sup>17</sup> Guyeppe Eesawey he anjuuwaa ekkanaaw koyida wode digettidayssa ereeta. I he anjuuwaa afuthan minnidii koykkoka, demmanaw dandda7ibeenna; I nagaraappe simmanaw qaada demmibeenna.

<sup>18</sup> Hintte kushen boshettiya Siina deriyakko, eexiya tamaakkoo, dhumaakkoo, caaganaakkoo, gotiyakko, <sup>19</sup> moyziya waasuwako woykko qaalay si7ettiya bessaako

yibekketa. He qaala si7ida asay hara guzha qaala si7onna mela woossidosona. <sup>20</sup> Ays giikko, "Hari attoshin, do7i he deriya bochchiko, shuchchan cadettidi haygo" yaagida kiitaa entti tookkanaw dandda7ibookkona. <sup>21</sup> He haniyabay daro daganthiyaba gidida gisho Musey, "Taani yashshan kokkoras" yaagis.

<sup>22</sup> Shin hintte Xiyoone Deriyakko, de7o Xoossay de7iya Yerusalaame katamaakkko, issife shiiqidi ufayttiya daro mukulu kiitanchchotakko saluwa yideta. <sup>23</sup> Entta sunthay salon xaafettida woosa keethaa bayra naytakko, asa ubbaa pirddiya Xoossaakkko, polo gidida xillo asaa ayyaanatakko yideta. <sup>24</sup> Ooratha caaquwaa giddo gididi sigethiya Yesuusakkko, Aabela suuthaafe aadhdiyahabaa odiya wurxettida suuthaakkko yideta.

<sup>25</sup> Hintte odiya uraa qaala ixxas goonna mela naagettite. Kaseyssati sa7an gididi odida kiitaa si7onna ixxidi attiboonnabaa gidikko yaatin, salon gididi odiya qaala nuuni ixxas giikko waanidi attanee? <sup>26</sup> He wode iya qaalay sa7a qaathis. Shin ha77i taani, "Sa7a xalaala gidonnashin issi toho zaarada saluwakka qaathana" yaagis. <sup>27</sup> "Issi toho zaarada" giya qaalay qaaxxonnobay minnidi daana mela qaaxxiya medhettidabati dhayanayssa bessees.

<sup>28</sup> Nuuni qaaxxanaw dandda7onna kawotethaa ekkiya gisho Xoossa galatoos; Xoossa ufyssiya ogen bonchchoninne yashshatethan iya goynnos. <sup>29</sup> Hiza, nu Xoossay tuma xuuggiya tama.

## 13

### *Wurssetha zore*

<sup>1</sup> Ammaniya asada issyo issuwara polo siiqetite. <sup>2</sup> Imathe mokkeyssa dogoppite. Issi issi asati hessada oothishe eronna kiitanchchota mokkidosona. <sup>3</sup> Qashon de7eyssata hintteka enttara issife qashon de7iyada oothidi enttana qoppite. Waaye ekkiya asaara issife hintteka waaye ekkiyada oothidi enttana qoppite.

<sup>4</sup> Ekoynne geloy asa ubbaa matan bonchchettidabaa gido. Qassi Xoossay laymateyssataanne laammeyssata pirddanaw de7iya gisho azinaynne machchiya issyo issuwas amanettanaw bessees.

<sup>5</sup> Mishe siiqoppe hinttena naagite; hinttew de7iyaban alite. Xoossay, "Taani nena ubbarakka yeggiye woykko aggike" yaagis. <sup>6</sup> Hessa gisho, nuuni ammanettidi, "Goday tana maaddeyssa;

ta yayyike; asi tana ay oothanee?"

yaagos.

<sup>7</sup> Xoossa qaala koyro hinttew odida hinttena kaaletheyssata qoppite. Entti waanidi de7idaakkko entta duussaa be7idi entta ammanuwa kaallite.

<sup>8</sup> Yesuu Kiristtoozi zinekka hachchika merinawukka laamettenna. <sup>9</sup> Dumma dumma ororatha timirten harasoo bidi dhayoppite; booppite. Nu wozanay Xoossa aadho keetethan minnananaw besseespppe attin min go77onna kathan wogaa polon gidoppo.

<sup>10</sup> Shin dunkkaaniya giddon oothi kahineti he yarshho kathaafe maanaw enttaw maati baynna yarshsho bessay nuus de7ees. <sup>11</sup> Kahine halaqay nagara yarshshos mehe suuthi ekkidi yarshshanaw Ubbaafe Geeshsha Bessaa gelees. Shin he mehiya ashuwa dirssaafe karen xuuggees. <sup>12</sup> Hessadakka, Yesuusi deriya nagaraappe ba suuthan geeshshanaw katamaa penggiyafe karen waayettis. <sup>13</sup> Hiza, nuuni boriya tookkidi dirssaafe kare iyakko keyoos. <sup>14</sup> Hiza, nuus hayssan merinaw de7iya katami baawa, shin nuuni yaana katamaa naagoos.

<sup>15</sup> Hiza, Yesuusa baggara ubba wode iya sunthaas markkattiya mettershsha galata yarshsho Xoossaas immoos. <sup>16</sup> Lo77obaa oosonene hinttew de7iyabaappe metootida asaas imo dogoppite. Hiza, hessa mela yarshshoy Xoossa ufaaysessee.

<sup>17</sup> Hinttena kaaletheyssatas kiiettite; entti giyabaa oothite. Entti bantta oothiyabas Xoossa sinthan oyshettanaw de7iya gisho hinttena heemmoosona. Hintte enttaw kiiettiko, bantta oosuwa ufayttidi oothana; hessi hanonna ixxiko, entti azzanishe oothana; hessi hinttena aybibaakkka maaddenna.

<sup>18</sup> Nuus Xoossa woossite. Nu kahay geeshshi; nu ubba wode lo77obaa oothanaw koyoos. <sup>19</sup> Taani hintteko ellesada yaana mela hintte taw minthidi Xoossa woossana mela ta hinttena hadara gays.

<sup>20</sup> Sarotethaa Xoossay, dorssa heemmiya nu Godaa Yesuusa, ba merinaa caaqa suuathan hayqoppe denthidayssi, <sup>21</sup> iya sheniya oothana mela lo77obaa ubban I hinttena danciso.

Iya ufayssiyabaa Yesuus Kiristtoosa baggara nunan Xoossay ootho. Yesuus Kiristtoosa baggara Xoossaas merinaappe merinaa gakkanaw bonchchoy gido. Amin77i.

<sup>22</sup> Ta ishato, ta ha dabddaabbiya hinttew qanthan xaafida gisho hintte ta zoriya salettonna ekkana mela ta hinttena woossays.

<sup>23</sup> Nu ishay, Ximotiyooси qashoppe biletidayssa erite. I ellesidi taakko yiikko ta iyara hinttena bada be7ana.

<sup>24</sup> Hinttena kaaletheyssatanne ammanniyaa ubbaa saro giite. Xaaleppe yida ammanniyaa asay hinttena saro yaagoosona.

<sup>25</sup> Xoossaa aadho keehatethay hintte ubbaara gido. Amin77i.

## Yayqoobi Xaafida Kiitaa Gaatha Qofaa

Yayqooba kiitay, ammaniyyaa asi gallas gallas ba de7uwa kaaletihiya qofata oykkis. Ha kiitay xaafetiday, biitta ubban laalettida tammanne nam77u Ayhude zerethaassa. Ha max-aafaa xaafey, cincatethi nuuni ooson peeshshiya hiillaa, ammaniyyaa asaa mokobaanne lo77o kanddos oge bessiya odata misileda qonccisees.

Yayqooba kiitay, Manqotethabaa, duretethabaa, paacebaa, lo77o kanddoba, qanaatebaa, ammanobaa, lo77o oosobaa, inxarssa haaroobaa, cincatethabaa, issoy issuwara ooshshabaa, otorobaa, ashkhetethabaa, hara asa bolla pirddabaa, ceeqetethabaa, gencabaa, woosabaanne ammaniyyaa asi oothanaw bessiyabaa ubbaa qoridi xaafis.

Yayqooba kiitay, ammano de7on ammanoy ooson pee7iya hanotata qonccisidi bessees.

### **Yayqooba kiitaa ayfe qofata**

Sarotho 1:1

Ammanonne cincatethi 1:2-8

Manqotethinne duretethi 1:9-11

Paace 1:12-18

Xoossa qaala sissinne ooson peesho 1:19-27

Ase asappe dummayo koshshonayssa 2:1-13

Ammanonne ooso 2:14-26

Inxarssi haaroobaa 3:1-18

Ammaniya asinne ha alamiya 4:1-5:6

Dumma dumma zoreta 5:7-20

<sup>1</sup> Xoossaanne Godaa Yesuu Kiristtoosa aylley, Yayqoobi, biitta ubban laalettida tammanne nam77u sheeshatas kiittida kiita.

Saro, ay mela de7eetii?

*Ammanonne cincatethi*

<sup>2</sup> Ta ishato, hintenna dumma dumma paacey gakkiya wode hintte lo77obaa demmidaada kumetha ufayssan ekkite. <sup>3</sup> Hintte ammanuwa paacetethay dandda7a hinttew immeysa ereeta. <sup>4</sup> Hintte wurssethi gakkanaw dandda7ikko aybi pacey baynna polonne kumethi gideta. <sup>5</sup> Hinttfe ooddeskka cincatethi dhayikko Xoossa woosso. Iyaw imettana. Xoossay oonakka boronna ubbas keehatethan immiya Xoosse. <sup>6</sup> Shin I woossiya wode sidhonna ammanon Xoossa woosso. Sidhiya oonikka carkkoy sugin qaaxxiya abbaa zule mela. <sup>7-8</sup> Nam77u qofi de7eynne ba ogiyan eqqonna oonikka Godaappe aykkoka demmanna gidi qoppofo.

*Mangoasaanne dure asaa*

<sup>9</sup> Ammaniya manqo asati, Xoossay enttana dhoqqu oothiya wode ufaytto. <sup>10</sup> Qassi ammaniyyaa dure asati Xoossay enttana ziqqi oothiya wode ufaytto. Dure asati ciishshada dhayana. <sup>11</sup> Away ba mishaara keyidi maataa melisin, ciishshay qolettes; iya lo77otethayka dhayees. Hessadakka, dure asati bantta oosuwan daaburishe dhayana.

*Ase gakkiya paaciya*

<sup>12</sup> Metuwa xoonidi aadhhdidaappe guye, Xoossay bana siiqeyssatas immana gidi qaala gelida de7o kallachchaa ekkana gisho meton gencciyi asi anjjettidayssa. <sup>13</sup> Oonikka paacettiya wode “Tana Xoossay paaces” gooppo. Xoossay iitan paacettena; qassi I oonakka paaccenna. <sup>14</sup> Shin issi issi asi ba iita amuwaan goshettiya wodenne cimettiya wode paacetees. <sup>15</sup> Hessafe guye, amotethi qanthattidi nagara yelees; qassi nagari diccidii haypo yelees.

<sup>16</sup> Ta siiqo ishato, cimettofite. <sup>17</sup> Lo77o imoynne kumetha anjoo ubbay saloppenne saluwa poo7uwa medhdhida Xoossa aawappe yees. Xoossay kuyada ubba wode laamettenna. <sup>18</sup> Nuuni, iya medhetethaas koyro gidana mela nuna tuma qaalan ba shenen yelis.

*Sissinne ooso*

<sup>19</sup> Ta siiqo ishato, hayssa akeekite. Asi ubbay si7anaw elleso, shin odettanawunne hangettaw ellesoppo. <sup>20</sup> Asa hanqoy Xoossay koyaa xillotethaa ehenna. <sup>21</sup> Hessa gisho, tuna hanotanne iitatetha ubbaa diggidi, Xoossay hintte wozanan tokkida hintte shemppuwa ashshanaw dandda7iya qaala aadatethan ekkite.

<sup>22</sup> Shin Xoossa qaala ooson peeshshiteppe attin sissa xalaalan hinttena cimmoosite. <sup>23</sup> Qaalaa si7idi oothonna asi, I ba som77uwa masttoten be7iya asa mela. <sup>24</sup> I ba som77uwa be7idi bees, shin I ay daaniyakko elles dogees. <sup>25</sup> Shin oonikka aylletethafe kessiya polo higgiya akeekan be7idi, kaallidi naagey, si7idayssa dogonna ooson peeshshiya uray, ba ooso ubban anjettana.

<sup>26</sup> Ba inxarssaa naagonna ammanays giya uray bana cimmees; iya ammanoy hada. <sup>27</sup> Xoossa Aawa sinthan borey baynna geeshsha ammanoy hayssa: aaya aawu baynna naytanne am77eta maadonne alamiya tunaappe bana naago.

## 2

### *Ase shaakkofa*

<sup>1</sup> Ta ishato, hintte nu bonchcho Godaa Yesuus Kiristtoosa ammanniyabaa gidikko, asa som77o xeellidi ase bonchchofite. <sup>2</sup> Leemisos, worqqa migiddo aathidi, lo77o ma70 ma77ida dure asi hintte shiiquwa yis. Qassi curqqa ma70 ma77ida manqo asikka yis. <sup>3</sup> Lo77o ma70 ma77ida addiya hintte aathi bonchchidi, “Ne hayssan lo77iya oydiyan utta” gidi, qassi manqo addiya, “Ne yan eqqa woykko hayssan ta tohuwa matan sa7an utta” gidi. <sup>4</sup> Yaatin, hinttee, hintte giddon shaakethi medhdheyssatanne ita qofara de7iya daynnata mela gidekketiyye?

<sup>5</sup> Ta siiqo ishato, si7ite. Ammanon dure gidana melanne bana siiqeysatas immana gida salo kawotethaa laattana mela ha sa7an de7iya manqota Xoossay dooribeenneyye? <sup>6</sup> Shin hintte manqota toochcheeta. Hinttena un77etheyssati dureta gidokkonaayye? Hinttena daynna sinthi goochcheysati entta gidokkonaayye? <sup>7</sup> Hintte xeegettida lo77o Godaa sunthaa cayeysati entta gidokkonaayye?

<sup>8</sup> Shin Geeshsha Maxaafan, “Ase ubbaa nena ne doseysada dosa” geetettidi xaafettida Xoossa kawotethaa higgiya hintte polikko lo77o ootheeta. <sup>9</sup> Shin hintte asa som77o xeellidi bonchchiko, nagara ootheeta qassi higgey hinttena higge menthida asada pirddana. <sup>10</sup> Oonikka higge ubbaafe issuwa menthidi, attida ubbaa naagikko ubbaa menthidaada taybettees. <sup>11</sup> “Laammofa” gida Goday, qassi “Wodhoppa” gis. Shin neeni laammonna aggada wodhidabaa gidikko, higgiya menthadasa. <sup>12</sup> Aylletethafe kessiya higgiya sinthan pirdda ekkanaw de7iya asada odetitenne oothite. <sup>13</sup> Ase maaronna oonakka Xoossay maaronna pirddana. Shin maarotethay pirddaa xoonees.

### *Ammanonne ooso*

<sup>14</sup> Ta ishato, hinttfe issi asi taw ammanoy de7ees gidi, ba ammanuwa ooson bessonra ixxiko iya ay maaddanee? Iya ammanoy iya ashshanaw dandda7ii? <sup>15</sup> Leemisos issi ishay woykko issi michchiya kallotikonne enttaw miyabay dhaylikko, <sup>16</sup> hinttfe issi asi enttako, “Saro biite! Tama kayite! Kallidi miitel!” gidi, koshshiyabaa enttaw immonna ixxiko entta ay maaddii? <sup>17</sup> Hessa gisho, oosoy baynna ammanoy barkka hayqqidayssa.

<sup>18</sup> Shin issi asi, “New ammanoy de7ees; qassi taw oosoy de7ees. Neeni ne ammanuwa ne oosuwappe shaakkada tana bessa; takka ta ammanuwa ta oosulan nena bessana” gaana. <sup>19</sup> Neeni, issi Xoossay de7eyssa ammanaasa; hessi lo77o. Tuna ayyanatikka ammanoonosa; yashshan kokkorosona. <sup>20</sup> Neno eeyaw! Ammanoy oosoppe shaakettidi maaddonnaysssa eranaw koyay? <sup>21</sup> Nu aawa Abrahamey, ba na7aa Yisaqa yarshsho bessaa bolla wothida wode ba oosulan xillibeenne? <sup>22</sup> Iya ammanoynne iya oosoy issife oothidayssa be7ikki? Iya ammanoy iya oosulan polettis. <sup>23</sup> Geeshsha Maxaafay, “Abrahamey Xoossa ammanis. Xoossay hessa iyaw xillotethi oothidi taybis” gidayssi polettis. Qassi I Xoossa dabbo geetettidi xeegettis. <sup>24</sup> Asi ammano xalaalan gidonnashin ooson xilleysa be7aasa.

<sup>25</sup> Hessadakka, laymiya Ra7aaba Isra7eeleppa kiitettidayssata mokkada hara ogera entta moyzida wode ba oosulan xillabeekke?

<sup>26</sup> Shemppoy shaakettida asatethay hayqo gideyssada, oosoy shaakettida ammanoykka hayqqidayssa.

## 3

### *Inxarssi naago*

<sup>1</sup> Ta ishato, hinttfe daroti asttamaare gidoppo. Nu, asttamaareti haratappae aadhdiya pirddaa ekkanaysssa hintte ereeta. <sup>2</sup> Nu ubbay daroban balettoos. Ba odan balettonna oonikka banatethaa naaganaw dandda7iya polo asi. <sup>3</sup> Parati nuus kiitettana mela bixaala barssidi nuuni koyaa bessi ubbaa efoos. <sup>4</sup> Markkabey hessa mela gitaa gidishe wolqqaama

carkkuwan sugettikokka, iya laaggeyssi ba koyaa bessi zaaridi laaggiya guutha mithan laagettidi bees. <sup>5</sup> Hessada inxarssi asatethaa giddon guutha gidikkoka daro gitaban ceeqettees.

Guutha tami daro gita woraa xuuggrees. <sup>6</sup> Inxarssi tama mela. Inxarssi nu asatethaa giddon iitan kumida alame; asatethaa ubbaa tunisees. Gaannameppe keyaa tamada nu de7uwa wotha ubbaa xuuggrees. <sup>7</sup> Do7atanne kafota, ulora gooshetteyssatanne abban de7iya medhetethaa ubbaa asi haarees; enttika haarettidosona. <sup>8</sup> Shin oonikka inxarssi haaranaw dandda7ibeenna. Inxarssi wodhiya marzey kumida haarettonna iita medhetethi. <sup>9</sup> Nu inxarssan, nu, Godaanne Xoossa galatoos. Qassi iyara Xoossa leemison Medhettida asaa qanggoos. <sup>10</sup> Issi doonappe galatinne qanggethi keyees. Ta ishato, hessada hananaw bessenna. <sup>11</sup> Pulttoy issi ollafe mal77iya haathinne cammiya haathi pulutanaw dandda7ii? <sup>12</sup> Ta ishato, balase mithi shamaho ayfanaw dandda7ii? Woykko woyne mithi balase mitha ayfe ayfanaw dandda7ii? Camo haathafe mal77o haathi keyanaw dandda7enna.

#### *Salo cinccatethaanne sa7a cinccatethaa*

<sup>13</sup> Hintte giddon cinccinne akeekanchchoy oonee? Ba lo77o de7uwa, ashkketethaninne cinccatethan oo settida ooson besso. <sup>14</sup> Shin hintte wozanan cammiya qanaateynne bana dosoy de7ikko ceeqettofite; tumaa bolla worddotoppite. <sup>15</sup> Hessa mela cinccatethay saloppe yidabaa gidonnashin hessi asabaa, alamebaa, xalahebaa. <sup>16</sup> Qanaateynne bana dosoy de7iya son ooshshinne iita ooso ubbay de7oosona. <sup>17</sup> Shin bollafe yaa cinccatethay ubbaafe sinthe geeshshi. Qassi sarotethi, aadatethi, si7idi ekkeyssa, qadheteyssa, lo77o ayfey kumidayssa, ase shaakkonnayssanne cubbotethi baynnayssa. <sup>18</sup> Sarotethaa doseysatti sarotethi zeridi xillotethi buuccosona.

## 4

#### *Ha alamiyara dabbottoppite*

<sup>1</sup> Ooshshinne oli hintte giddo awuppe yii? Entti yej hintte asatethaa haaranaw olettiya hintte asho amuwaaappe gidenneyye? <sup>2</sup> Hintte amotteeta, shin demmeketa; hessa gisho, wodheeta. Minthi koyeeta, shin demmanaw dandda7ekketa; hessa gisho, oyetteetannte oletteeta. Hintte Xoossa woosonna gisho koyabaa demmeketa. <sup>3</sup> Hintte woosseta, shin demmeketa. Hintte asho amuwaa polanaw wobbe ogen woossiya gisho demmeketa. <sup>4</sup> Hinttenoo, laymateyssato! Ha alamiyara dosey Xoossa morkke gideyssa erekketii? Ha alamiyara dabbotanaw koyey oonikka Xoossaara morkke. <sup>5</sup> Geeshsha Maxaafay, "Xoossay nunan daana mela oothida Ayyaanay, nuuni iyaw buzo gidana mela amottees" gidayssa coo gidabaa daanii? <sup>6</sup> Shin Geeshsha Maxaafay, "Xoossay otoranchchota ixxes, shin bantana kawushsheyssatas maarotethaa immees" yaagiya gisho Xoossay maarotethaa darssidi immees.

<sup>7</sup> Hessa gisho, Xoossaas haarettite; Xalahiyara eqettite; I hinttefe haakkana. <sup>8</sup> Xoossaakko shiipiite; I hintteko shiigana. Hinttenoo, nagaranchchoto, hintte kushiya meecettite; nam77u qof de7eyssato, hintte wozanaa geeshshite. <sup>9</sup> Kayottite, yekkitenne afuxite. Hintte miichchay yeehon, hintte ufayssay azzanon laameto. <sup>10</sup> Godaa sinthan hinttenatethaa kawushshite; I hinttena dhoqqu dhoqqu oothana.

#### *Asa bolla pirddofite*

<sup>11</sup> Ta ishato, issoy issuwa zigiroppte. Ba ishaa zigireynne iya bolla pirddey higge zigireesinne higge bolla pirddees. Neeni higge bolla pirddiko higge bolla pirddeyssa gidaasappe attin higge poleyssa gidakka. <sup>12</sup> Higge immeynne pirddey Xoossa xalaala. Ashshanawunne dhayssanaw dandda7ey iya. Yaatin, asa bolla pirddiya neeni oonee?

#### *Ceeqettofite*

<sup>13</sup> Hintte, "Nuuni hachchi woykko wontto ya katamaa woykko ha katamaa baana; yan laythi uttana; zal77idi wodhisana" yaageyssato, si7ite. <sup>14</sup> Wontto aybi hananeekko hintte erekketa. Hintte de7oy waananekko erey oonee? Hintte guutha wode benttidi dhayaa akka mela. <sup>15</sup> Hessa aggidi, "Goday giikko nuuni daana; hayssa woykko hessa oothana" yaaganaw bessees. <sup>16</sup> Shin hintte ha77i otortteetannte ceeqetteeta. Hessa mela ceeqo ubbay ita.

<sup>17</sup> Hessa gisho, lo77obaa oothanaw erishe oothonna uraas hessi nagara.

## 5

#### *Duretas imettida zore*

<sup>1</sup> Hinttenoo, dureto, hintte bolla iita metoy yaa gisho yeekkitenne zeleelite. <sup>2</sup> Hintte shaloy buuqqis; hintte afilaykka bilan meetettis. <sup>3</sup> Hintte worqqaynne hintte biray shi7is. He shi7ay hintte bolla markka gidana. I hintte asatethaa tamada maana. Hintte ha wurida qammatan hinttew shalo dagayeeta. <sup>4</sup> Hintte gaden oothi pee7ida asaa kera miishiya qanxiibekketa. Hessi hintte bolla waasses. He asata waasoy wolqqaama Godaa haythan si7ettis. <sup>5</sup> Ha sa7an hintte ulo xalaalas qoppidi, injjen de7ideta. Shukas giigettida meheda hinttena dhiikkideta. <sup>6</sup> Hinttera eqettanaw dandda7onna xillo asa bolla pirdideta; iya wodhideta.

*Gencanne woosaa*

<sup>7</sup> Ta ishato, Goday yaana gakkanaw genccite. Goshshanchchoy torchche iraynne sila iray yaana gakkanaw genccdi al77o kathaa naagidi waati gathi ekkiyako qoppite. <sup>8</sup> He goshshanchchuwada hintteka genccite. Godaa yuussay matattida gisho ufayssan naagite.

<sup>9</sup> Ta ishato, Xoossay hintte bolla pirdonna mela issoy issuwa bolla zuuzummoofite. Pirddeyssi penggen eqqis. <sup>10</sup> Ta ishato, waayan genccida, Godaa sunthan odida nabeta leemiso oothidi ekkite. <sup>11</sup> Dandda7an genccidayssata nuuni anjettidayssata goos. Iyy-oobey waanidi genccidaako hintte si7ideta. Goday wurssethan iya waati maaddidaakkko be7ideta. I maarotinne qadhey kumida Godaa gidiya gisho hessa oothis.

<sup>12</sup> Shin ubbaafe sinthe, ta ishato, saluwan gidin woykko sa7an gidin woykko hara aybinkka caaqqofite. Xoossaas pirddan hintte gelonnaada hintte oday ee gidikko, "Ee" giite; akkay gidikko, "Akkay" giite.

<sup>13</sup> Hintte giddon meto ekkija oonikka de7ikko Xoossaas woosso. Ufayttiya oonikka de7ikko galatan yexxo. <sup>14</sup> Hinttefe hargettiya oonikka de7ikko woosa keetha cimata xeego. Entti Godaa sunthan shamaho zayte tiyidi iyaw Xoossaas woosso. <sup>15</sup> Ammanon woossida woosay hargganchchuwa pathana. Goday iya, harggiyafe denthana; I nagara oothidabaa gidikkoka Goday iya maarana. <sup>16</sup> Hessa gisho, hintte paxana mela hintte nagara issoy issuwas paaxitenne issoy issuwas woossite. Xillo asa woosay wolqqaama ooso oothees. <sup>17</sup> Eliyasi nu mela ase. Iri sa7an bukkonna mela minthidi Xoossaas woossin heedzu laythinne usuppuun ageena sa7an iri bukkibeenna. <sup>18</sup> Zaaridi I Xoossaas woossin saloppe iri bukkis; sa7aykka kathi mokkis.

<sup>19</sup> Ta ishato, hinttefe oonikka tuma ogiyappe buutikko, haray iya tumaakkko zaarikko, <sup>20</sup> nagaranchchuwa iya bala ogiyappe zaariya oonikka, iya shemppuwa hayqoppe ashsheyssanne iya daro nagaraas maarota immeyeessa ero.

## Phexiroosi Xaafida Koyro Kiitaa Gaatha qofaa

Hawaariya Phexiroosi xaafida koyro kiitay xaafetiday, "Doorettida Xoossaas Asata" geetetti xeegettidayssatasinne Guutha Iisiyan pudeha baggan laalettida ammaniyya asaassa. Ha kitaa ayfe qofay, ammano gaason metoyne waayey gakkida asaa minthethanaassa. Ha maxaafaa xafay, iya hayquwa, iya dendduwa, iya nam77antho yuussaa odiya Yesuus Kiristtoosa Wonggelaa qaala entta hassaysees. Yesuus Kiristtoosa de7uwa leemiso oothi xeellidi, metuwa dandda7an kanthanaada entta qofisees. Hessara gathidi, metoy entta ammanuwa geeshshatethaa paacceyssanne, "Yesuus Kiristtoosi qoncciya gallas" bessiya woyto entti ekkanaw de7eyssa hassaysees.

Xafay, entti meto dandda7ana mela minthetheyssa bolla Kiristtoosa kaalliyi asati de7eyssada daana mela qofisees.

### **1 Phexiroosa kiitaa ayfe qofata**

Sarotho 1:1-2

Xoossay nuus immida atotethaa 1:3-12

Geeshshatetha duussu 1:13-2:10

Meto wode ammaniyya asay hananaw bessiyabaa 2:11-4:19

Cimatasinne na7atethatas imettida zore 5:1-11

Kuushsha qofaa 5:12-14

<sup>1</sup> Taani, Yesuus Kiristtoosa hawaarey Phexiroosi; Phanxoosan, Galaatiyan, Qaphadooqiyani, Iisiyaninne Bitiiniyan betanchchoda laalettidi de7iya Xoossay doorida, asaas ha dabddaabiya xaafas. <sup>2</sup> Yesuus Kiristtoosas hintte kiittana melanne iya suuthan geeyana mela, Xoossaas Aaway ba kase eran dooridayssatasinne Geeshsha Ayyaan geeyida, hinttew aadho keehatethaynne sarotethay gido.

*Dhayonna ufayssaa*

<sup>3</sup> Yesuus Kiristtoosa hayqoppe denthidi ba gita maaroletethan nam77antho yeletethaanne dhayonna ufayssaa immida nu Godaa Yesuus Kiristtoosa Aaway, Xoossay galatetto. <sup>4</sup> Qassi Xoossay hinttew dhayonna, iitonnanne buuqqonna laata salon giigisis. <sup>5</sup> He laatay wode wurssethan qonccanaw de7iya atotethaas Xoossaas wolqjan ammanon hinttew naagettidi de7ees.

<sup>6</sup> Ha77i guutha wodes hintte dumma dumma paacen un77ettikokka hessian ufayttite. <sup>7</sup> He paaceytta gakkiday, taman yeggin dhayaa worqqafe hintte ammanoy aadhonne tuma gideyssa bessanaassa. He paacetida ammanuwan Yesuus Kiristtoosi qoncciya wode galataa, bonchchonne saba hintte ekkana. <sup>8</sup> Hintte Yesuusa be7ibekketa, shin iya siiqeta. Hintte ha77i iya be7iboonnabaa gidikkoka, iya ammaneeta. Qassi odan qonccisanaw dandda7ettona ufayssaninne bonchchon kumideta. <sup>9</sup> Hintte ammanon naagiya hintte shemppuwa atotethaa ekkana.

<sup>10</sup> Aadho keehatethaa baggara hinttew giigida ha atotethaabaa nabeti eranaw gita koshshaninne naagon koyidosona. <sup>11</sup> Enttan de7iya Kiristtoosa Ayyaanay iya waayabanne hessaaf guye yaana bonchchuwabaa kasetidi markattishe, awude woykko waanidi hananeekko akeekan pilggidosona. <sup>12</sup> Nabeti odida tinbbitey bantaw gidonnashin hinttew gideyssa Xoossay hinttew qonccisis. Ha77i asay hinttew odida Wonggelaa saloppe kiitettida Geeshsha Ayyaana wolqjan hinttew odidosona. Kiitanchhotika hessa be7anaw amottidosona.

*Geeshshatethan de7ite*

<sup>13</sup> Hessa gisho, oosos hinttena giigisite; hinttena haarite. Yesuus Kiristtoosi qoncciya wode hintte ekkana aadho keehatethaa ufayssan naagite. <sup>14</sup> Xoossaas naytada iyaw kiittite; hintte kase eronna oothida iita amuwaa kaallofite. <sup>15</sup> Shin hinttena xeegida Xoossay geeshshi gididayssada hintteka hintte duussa ubban geeshshi gidite. <sup>16</sup> Geeshsha Maxaafan, "Taani geeshshi gidida gisho hintteka geeshshi gidite" geetetti xaafettis.

<sup>17</sup> Asa som77o be7onna iya oosuwada pirddiya Xoossaas, "Nu Aaway" gidi xeegiyabaa gidikko, ha sa7aa immathetha duussaa yashshan de7ite. <sup>18</sup> Hinttee, hintte aawatappe laattida pathonna de7uwappé wozettidayssi, dhaya biran woykko worqqan gidonnayssaa ereeta. <sup>19</sup> Borey woykko borssoy baynna dorssa suuthada al77o gidida Kiristtoosa suuthan wozettideta. <sup>20</sup> Xoossay alamey medhettanaappe kase Kiristtoosa dooris, shin ha wurssetha wodiyen Kiristtoosi hintte gisho qonccis. <sup>21</sup> Hintte ammanoyenne hintte ufayssay

Xoossan gidana mela iya hayqoppe denthidi, bonchchida Kiristtoosa baggara Xoossan ammaneeta.

<sup>22</sup> Hintte tumatethaa kiitettidi hinttenateethaa geeshshideta. Hintte issov issuwa wozanappe siiqeta, shin ha77ika tuma wozanappe minthidi siiqite.

<sup>23</sup> Hintte nam77antho yelettiday dhayaa zerethaafe gidonnashin merinaw de7iya Xoossa qaalan dhayonna zerethaafe yelettideta. <sup>24</sup> Xoossaa qaalay, "Asi ubbay maata mela;

iya bonchcho ubbay ciishsha mela.

Maatay melees, ciishshaykka golettees.

<sup>25</sup> Shin Godaa qaalay merinaw de7ees" yaagees. Hinttew odettida Wonggelaa qaalay hayssa.

## 2

### *De7o shuchchinne geeshsha dere*

<sup>1</sup> Hiza, iitatethi ubbaa, cimo ubbaa, cubbotethi qanaatenne zigirssi ubbaa hinttefe diggite. <sup>2-3</sup> Goday keeha gideyssa hintte eridi meezetidayssada ha77i yelettida guutha naytada hintte atotethan dicishe baanaw Xoossaa geeshsha qaala maathaa ubba wode amottite.

<sup>4</sup> Asan borettidi Xoossan doorettida al77o gidida de7o shuchchaa, Godaa Yesuusakkko shiiqite. <sup>5</sup> Hintte Ayyaana keethi keexettiya de7o shuchchata. Hintte Yesuus Kiristtoosa baggara Xoossaa ufayssiya ayyaana yarshsho yarshshiyaa geeshsha kahineta. <sup>6</sup> Geeshsha Maxaafan,

"Hekko, taani Xiyoone kataman godaa xaphuwa minthiya, doorettida, al77o shuchchaa wothas; iyan ammaniyaa oonikkka yeellatenna"

yaagees. <sup>7</sup> Ha shuchchay hinttew ammaneyssatas al77o, shin ammanonnayssatas, Gimbbeyssati kadhidi ixxida shuchchay

godaa xaphuwa minthiya, ubbaafe aadhdhiya shuchchu gidis."

<sup>8</sup> Qassika,

"Ha shuchchay ase dhubbija shuchchunne ase kunddisiya zaalla" yaagees. Entti hessas qaadettida gisho Xoossaa qaala kaitettonna ixxidi dhubettidosona.

<sup>9</sup> Shin Xoossay dhumappe malaaliyi ba poo7uwakko hinttena xeegiday, hintte iya lo77otethaa haratas odanaw doorettida zare, kawo kahine, geeshsha derenne Xoossaa dumma dere. <sup>10</sup> Hintte kase Xoossaa dere gidekketa, shin ha77i hintte iya dere. Hintte kase maarotethi demmibekketa, shin ha77i maarotethi demmideta.

### *Xoossaa ayllede de7o*

<sup>11</sup> Ta ishato, hintte ha sa7an imathenne betanchcho gididayssada hintte shemppuwa oliya ashoo amoppe haakkana mela taani hinttena woossays. <sup>12</sup> Ammanonna asay hinttena iita oothiha asada zigiryaa wode Xoossay nuna be7anaw yaa gallas, entti hintte lo77o oosuwa be7idi Xoossaa galatana mela hinttew lo77o de7oy de7o.

<sup>13</sup> Godaa gisho gidi maatara de7iya asatas haarettite; ubbaafe bolla gidiya gisho kawuwaskka haarettite. <sup>14</sup> Entti iita ootheysata seeranawunne lo77o ootheysata sabbanaw kawuwappe kiittetida gisho deriya ayseyssatas haarettite. <sup>15</sup> Hinttee, hintte lo77o oosuwan eronna eeyaa asaa doona oythanayssi Xoossaa shene. <sup>16</sup> Xoossaa ayille giddi la77atethan de7iteppe attin hintte la77atethaa iita oosos kama oothofite. <sup>17</sup> Asa ubbaa bonchchite; ammanniyaa asaa siiqite; Xoossaa yayyite; kawo bonchchite.

### *Kiristtoosa waaya leemisuwa*

<sup>18</sup> Aylletto, lo77o godatasinnee keeha godata xalaalas gidonnashin iitaataskka bonchchon haarettite. <sup>19</sup> Asi Xoossaa gisho gidi bessonaa waaye waayettiko Xoossay iya anjjana.

<sup>20</sup> Shin hintte nagara oothin hinttena dechchiya wode hintte dandda7ikko hinttew ay galati de7ii? Shin lo77obaa oothidi waaye dandda7ikko Xoossay hinttena hessas anjjana.

<sup>21</sup> Xoossay hinttena xeegiday hessa gishossa; Kiristtoosi hinttew waayettis; hintte iya kaallana mela, hinttew leemiso gidis. <sup>22</sup> I nagara oothibeenna; iya doonankka worddoy benttibeenna. <sup>23</sup> Entti iya cayaa wode zaaridi cayibeenna. Shin waaye ekkishe xillo pirddiya Xoossaas ba pirdaa aggaagisppe attin manddibeenna. <sup>24</sup> Nuuni nagaras masqaliya bolla tookkis; hintte iya madunthan paxideta. <sup>25</sup> Kase hintte oge balidi dhayida dorssa mela, shin ha77i hintte

shemppuwa heemmeyssakkonne naageyssakko simmideta.

### 3

#### *Azinabaanne machchibaa*

<sup>1-2</sup> Hessadakka, machcheto, hintte azinatappae Xoossaas qaalas kiitettonayssati de7ikkoka aykkoka odettonashin, hintte yashshatethaanne hintte geeshsha de7uwa be7idi ammanana mela enttaw haarettite. <sup>3</sup> Hinttee, hintte huu7e pixoninne worqqa aason woykko lo77o ma7on hintte bolla asatethaa loyson gidoppo. <sup>4</sup> Shin hintte wozanaa giddon de7iya yegelsatethay Xoossaas sinthet hinttew daro al77o gididi dhayonna, ashkkenne woppu gida ayyaana gido. <sup>5</sup> Xoossay immanna gidayssa ammanida geeshsha maccasati bini wode bantta azinatas haarettidi, banttana hessada daro loythidosona. <sup>6</sup> Hessada Saara Abrahame, "Ta godaw" yaagada xeegashe, iyaw kiiettasu; hintteka aykkoka yayyonna lo77obaa oothiko I mayta.

<sup>7</sup> Azinatoo, hintte machcheti hinttfe daaburanchcho medheta gideyssa eridi, enttana bonchchite; hintte woosa dhubbonna mela Xoossay immida de7uwa entti hintteria issife laattiya gisho entta bonchchite.

#### *Lo77o oothidi meto eko*

<sup>8</sup> Wurssethan, ubbay issi qofan de7ite. Issoy issuwash qadhettishe, ishada siiqetite; qassi issyo issuwash keehatanne ashkketa gidiite. <sup>9</sup> Iita gishos iita woykko cashshaa gisho cayidi zaaroppite; hessa aggidi, Xoossay hinttew anjuwaa immanaw hinttena xeegida gisho anjjite. <sup>10</sup> Ays giikko, Geeshsha Maxaafay,

"De7o doseynne lo77o wode be7anaw koyey oona gidikkoka ba inxarssan iitabaanne worddo odetteyssa aggo.

<sup>11</sup> Iitabaa ootheyssa aggidi lo77obaa ootho; sarotethaakka keehi koyonne kaallo.

<sup>12</sup> Godaa ayfey xillotakkoo xeellees;

qassi I ubba wode entta woosaa haayzees.

Shin Goday iitabaa ootheyssata ba hanqo som77uwan xeellees"

yaagees.

<sup>13</sup> Hintte lo77obaa oothanaw amottikko hinttena qohanay oonee? <sup>14</sup> Hari at-toshin, xillotetha gisho hintte waayettiko anjjettidayssata. Asas yayyoifitenne hirrgofite. <sup>15</sup> Kiristtoosa hintte wozanan bonchchitenne godayite. Xoossay hinttew immida ufayssaaas gaaso oychchiya ooddeskka zaaro immanaw ubba wode giigi uttite, shin hessa ashkketethaninne yashshan oothite. <sup>16</sup> Qassi Kiristtoosan hintte de7iya lo77o de7uwa iitabaa oothidabaada, hinttena cayaa asay zigiryaabon yeellatana mela hintte kahay geeshshi gido. <sup>17</sup> Xoossay gidabaa gidikkoo iitabaa oothida gisho waaye ekkeyssafe lo77obaa oothida gisho waaye ekkeyssi lo77o. <sup>18</sup> Kiristtoosi nuna Xoossaakkoo shiishanaw baw xillo gididi de7ishe, nagaranchchota gisho issi toho nagara ubbaas hayqqis; I ba asatethan hayqqis, shin ayyaanan paxis. <sup>19</sup> Qassi he ayyaanan I bidi qashon de7iya shemppotas qala odis. <sup>20</sup> Nohey markkabiya keexiya wode he shemppoti Xoossaas ki-ittettonna ixxidosona, shin Xoossay enttana dandda7is. Hosppun asa xalaali markkabiyan gelidi, dhayo haathaafe attidosona. <sup>21</sup> He dhayo haathay ha77i hinttena ashshiya xinqqate leemiso gidis. Ha xinqqatey bolla qita meecco gidonnashin lo77o kaha Xoossaafe ekkanaaw iya woossiya oge gididi, Kiristtoosa dendduwa baggara hinttena ashshees. <sup>22</sup> I salo bidi Xoossaas ushachchan uttidi, kiitanchchota, maata aawatanne wolqqaamata haarees.

### 4

#### *Xoossas de7o*

<sup>1</sup> Hessa gisho, Kiristtoosi ba ashuwan nuus waayettida gisho hintteka he qofan hinttena dancisisi minnidi eqqite. Kiristtoosa gisho gidi ba ashuwan waaye ekkida uray nagara oothike gidi qanxida asi. <sup>2</sup> He uray ba attida laythan Xoossaas shene oothanaw koyeesippe attin iita asho amon deenna. <sup>3</sup> Kase hintte ammanonna asay de7idayssada de7ideta. Hintte iita amon, laymatethan, mathon, tunatethi denthethiya yethan, pokkiya eeqa goynnon kase de7ida duussay gidana. <sup>4</sup> Ammanonna asaara hintte shori baynna oosuwa oothonna gisho malaalettidi hinttene cayoosona. <sup>5</sup> Shin entti paxata bollanne hayqqida asaa bolla pirddanaw de7iya Xoossaas zaaro immana. <sup>6</sup> Hayqqida asaas Wonggelay sabbakettiday hayssa gishossa. Entti asatho bantta ashuwan pirddettana qassi bantta ayyaanan Xoossaatho de7on daana.

<sup>7</sup> Hiza, ubbabaas wurssethay matattis. Hessa gisho, woossanaw dandda7ettana mela woppu gida wozani de7o; maarara de7ite. <sup>8</sup> Siiqoy daro nagara kammiya gisho ubbaafe aathidi issov issuwara wozanappe siiqetite. <sup>9</sup> Zuuzummonna issov issuwa imathatethan mokkite. <sup>10</sup> Hintte Xoossaafe dumma dumma aadho keehatethaa imota ekkidayssada hintte issov issov he imuwa bessiyada oykkidi issov issuwa haggazite. <sup>11</sup> Yesuus Kiristtoosa baggara ubbaban Xoossay galatettana mela oonikka odiyabaa gidikko Xoossaafe qaala ekkidaada odo. Qassi oonikka maaddiyabaa gidikko Xoossay iyaw immiya wolqqaada maaddo. Bonchchoynne wolqqay merinaappe merinaa gakkanaw iyaw gido. Amin77i.

### *Ammano gaason gakkiya waaya*

<sup>12</sup> Ta baggatoo, hintte tamada xuuggiya waaye paaciya giddora aadhdhiya wode oorathabay hanidaada malaattefite. <sup>13</sup> Shin iya bonchchoy qoncciya wode hintte ufayssay gita gidana mela Kiristtoosa waaya hintte ekkeyssan ufayttite. <sup>14</sup> Kiristtoosa suntha gisho asi hinttena cayaa wode Xoossa bonchcho Ayyaanay hintte bolla shemppiya gisho hintte anjettidayssata. <sup>15</sup> Hinttefe waaye ekkya oonikka shemppo wodhidaada woykko kaysotidaada woykko iita oothidaada woykko gelssonhaban gelidaada hanidi waayettofo. <sup>16</sup> Gidoshin, ammano gisho waayettiko Kiristtoosa suntha gisho Xoossa galatoppe attin yeellatoppo.

<sup>17</sup> Pirddi Xoossaas asaa bolla doomiya wodey gakkis. Hiza, he pirdday koyro nu bolla doomiyabaa gidikko, Xoossa Wongelaas Kiitettonna asaa wurssethay ay gidanee? <sup>18</sup> Xilloy un77an attiyaabaa gidikko, makkalanchchoynne nagaranchchoy yaatin waanane? <sup>19</sup> Hessa gisho, Xoossa sheneda waaye ekkeyssati bantta shemppuwa hadaraa banntana medhdhida, ammanthiya Xoossaas immishe lo77obaa ootho.

## 5

### *Cimatasinne yalagatas imettida zore*

<sup>1</sup> Hiza, woosa keethaa cimataraa cima gididayssi, Kiristtoosa waaya markatteysinne qonccanaw de7iya bonchchuwa shaakettanaw de7iya taani, hintte giddon de7iya cimata zorays. <sup>2</sup> Hintte aawatethaafe garssan de7iya Xoossa wudiya heemmite. Xoossay koyeyssada dosanaappe attin un77etidi heemmoftie. Qassi muishe koshshan gidonnashin haggazanaw de7iya lo77o qofan heemmite. <sup>3</sup> Hintte aawatethaafe garssan de7iya wudiya leemiso giditeppe attin godatoppite. <sup>4</sup> Heemmeysata halaqay qoncciya wode qoletonna bonchcho kallachcha hintte ekkana.

<sup>5</sup> Hessadakka, yalagato, cimatas haarette. Hintte issov issuwash ashkke gidite. Geeshsha Maxaafan, “Xoossay otoranchchota ixxes, shin ashkketas aadho keehatethaa immees” yaagees. <sup>6</sup> Xoossay ba wode hinttena bonchchana mela wolqqaama Xoossa kushiyappe garssan hinttena kawushshite. <sup>7</sup> I hinttew qoppiya gisho hinttena hirggiysi ubbaa iya bolla yeggite.

<sup>8</sup> Hintte morkkey Xalahey, mittiyabaa koyidi, gaammoda gudishe hintte matara yuuya gisho hinttena haaritenne barkkite. <sup>9</sup> Alamen de7iya hintte ishati hessada waaye ekkeyssa eridi, ammanon minnid, Xalahiyara eqettite. <sup>10</sup> Ba merinaa bonchchuwas Kiristtoos Yesuusa baggara hinttena xeegida aadho keehatetha ubbaa Xoossay, guutha wodes hintte waayettidappe guye, I ba huu7en hinttena shiishana, katisana, minthidi essana, xaalisana. <sup>11</sup> Merinaappe merinaa gakkanaw Xoossay kawoto. Amin77i.

### *Wurssetha saro tho*

<sup>12</sup> Ammanettida ishaa gada ta ekkya Sillaase baggara ha dabddaabbiya hinttew qanthan xaafas. Ta hessa hinttew xaafiday, hinttena zoranawunne Xoossa aadho keehatethay tuma gideyssa markkattanaassa. He aadho keehatethan minnid eqqite.

<sup>13</sup> Hinttera issife dooretida Baabiloonen<sup>\*</sup> de7iya woosa keetha asaynne ta na7aa Marqqaosi hinttena, “Saro saro” yaagees. <sup>14</sup> Siiqo yeeretetha yeerettishe, issov issuwa sarothite.

Kristtoosan de7iya hintte ubbaas saroy gido. Amin77i.

## Phexiroosi Xaafida Nam77antho Kiitaa Gaatha Qofaa

Hawaariya Phexiroosi xaafida nam77antho kiitay xaafettiday, dumma dumma bessan de7iya bini ammaniyya asaassa. Ha kiitaa ayfe qofay, worddo asttamaareta iita osuwanne enta timirrtiya gaason medhettida yeellayaad de7uwa ixxana melassa. He medhettida metota digganaw oge gidanay, Yesuusa bantta ayfiyaan be7ida asatinne I tamaarssiyaa wode bantta haythan si7ida asati tamaarssida timirrtiya baggara Xoossa-anne Godaa Yesuus Kiristtoosabaa ammanhiya eraa oykhanayssa. Xaafey minthidi odiday, "Kiristtoosi nam77antho yeenna" yaagiya worddo timirrtiyabaa. He qofaa minthidi odise, "Kiristtoosi simmidi yoonna gam77iday, asa ubbay ba nagaraappe sim-mana melappe attin oonikka dhayana mela koyonna gishossa" yaagees.

### **2 Phexiroosa kiitaa ayfe qofata**

Sarotho 1:1-2

Ammaniya asaa xeessaa 1:3-21

Worddo asttamaareta 2:1-22

Kirsttoosa nam77antho yuussaa 3:1-18

<sup>1</sup> Yesuus Kiristtoosa hawaareynne iya aylley, taani, Simum Phexiroosi, nu Xoossa-anne nuna ashshiya Yesuus Kiristtoosa xillotethaa baggara nuyssa mela al77o ammano ekki-dayssatas daabddaaabbiya xaafas.

<sup>2</sup> Xoossa-anne nu Godaa Yesuusa eron aadho keehatethaynne saroy hinttew kumo.

*Xoossaa xeessanne dooruwa*

<sup>3</sup> Ba bonchchoninne lo77otethan nuna xeegida iya eron de7osinne Xoossa-anne daanidi daanaw koshshiyaba ubbaa Xoossay ba wolqqan nuus immis. <sup>4</sup> Hintte iita amo gaason medhettiya ha alamiyan de7iya bashshaafe kessi ekkanaadanne Xoossa-anne xoossatethan shaakettanaada, ha imotata baggara daro al77onne gita ufayssaa nuus immis. <sup>5</sup> Hessa gisho, minnidi, hintte ammanuwa bolla lo77otethi, lo77otetha bolla eratethi, <sup>6</sup> eratetha bolla bana haaro, bana haaro bolla gencca, gencca bolla Xoossa-anne daano, <sup>7</sup> Xoossa-anne daano bolla ishatetha keehatethi, ishatetha keehatetha bolla siiqo gujjite. <sup>8</sup> Hayssati hinttew daridi de7iyabaa gidikko, Godaa Yesuus Kiristtoosa eron maaddiya asinne ayfera de7iya asi oothana. <sup>9</sup> Shin hessati baynna oonikka matan de7iyabaa xalaala be7iya qooqe. I ba kase nagaraappe geeyidayssa dogis.

<sup>10</sup> Hessa gisho, ta ishato, hintte xeessanne hintte dooruwa minthanaw kaseyssafe aathidi minnite. Hintte hessata oothiyabaa gidikko, dhubetteketa. <sup>11</sup> Hessian nu Godaanne nuna ashshiya Yesuus Kiristtoosa merinaa kawotethaa geliya kumetha maatay hinttew imettana.

<sup>12</sup> Hessa gisho, hintte hayssata eriyabaanne he oykkida tuman minnidi de7iyabaa gidikkoka, taani hayssata ubba wode hinttena hassayiso aggike. <sup>13</sup> Taani shempora de7ida wode ubban hinttena hassayisanayssi koshshiyabaa gada qoppays. <sup>14</sup> Nu Godaa Yesuus Kiristtoosi taw qonccisadayssada taani ha hayqqiya asatethaa gam77onna qaara yeggada baanayssa erays. <sup>15</sup> Taani hinttete shaakettikokka hintte hayssata ubba wode akeekana mela taw dandda7ettiabaa ubbaa oothana.

<sup>16</sup> Nuus Godaa Kiristtoosa wolqqanne iya yuussabaa hinttew odehy, iya gita bonchchuwa be7idippe attin medhdhi kessida hayse gidenna. <sup>17</sup> Daro wolqqama bonchchuwa, "Taani ufayttiya, ta dosiya na7ay hayssa" yaagiya qaalay yida wode Xoossa-anne Aawappe bonchchonne galata ekkis. <sup>18</sup> Nuuni geeshsha deriya bolla iyara de7iya wode he qaalay saloppe yishin si7ida.

<sup>19</sup> Nuus hessafe aadhdiya ammanettida tinbbite qaali de7ees. Sa7i wontana gakkawunne bakkali hintte wozanan dolana gakkaw, dhuman poo7iya poo7o asi naageyssada, hintte he qaalaa naagikko lo77o ootheeta. <sup>20</sup> Ubbaafe kasetidi hayssa erite. Geeshsha Maxaafan xaafettida tinbbite qaala oonikka ba dosidaada birshshanaw dandda7enna. <sup>21</sup> Tinbbite ubbaa, Xoossay kiittida asati Geeshsha Ayyaanay kaalethin, odidosonappe attin asa shenen odibookkona.

<sup>1</sup> Shin worddo nabeti kase asaa giddon de7eyssa mela ha77ika worddo asttamaareti hintte giddon denddana. Entti bantta wozida, Godaa kaddidi, dhayssya worddo timirrtiya ehana. Hessian entti bantta bolla ellesidi dhayo echoosona. <sup>2</sup> Daro asay yeellayaa entta iita ogiya kaallana; entta gaason tuma ogey cayettana. <sup>3</sup> Worddo asttamaareti miishe yaaridi bantaw medhdhi kessida hayssen hinttena bonqana. Benippe doomidi entta pirday giigi uttis; entta dhayoykka enttana naagi uttis.

<sup>4</sup> Nagar oothida kiitanchchotaa Xoossay qadhettonna, pirdda gallas gakkanaw gaannam dhuma ollan entta qachchi yeggi. <sup>5</sup> Hessadakka, Xoossay xillotethabaa odiya Nohenne hara laappun asata ashshidi, Xoossa goynnona asay de7iya beni alamiya qadhettonna dhayo haathan dhayssis. <sup>6</sup> Geellatas leemiso gidana mela Xoossay Soodomenne Gamoora katamata bido oothidi xuuggidi dhayssis. <sup>7</sup> Higes kiitettonna laymatiya asata giddon waayettishe de7ida xillo Looxe Xoossay ashshis. <sup>8</sup> He xillo addey entta giddon de7ishe, entti oothiya iita oosuwa gallas gallas be7ida wodenne si7ida wode iya lo77o wozanay un77ettees. <sup>9</sup> Hessa gidikko, Goday, bana goynniya asata paaceppe waati ashshaneekko, qassi nagaranchchota pirdda gallasaas gakkanaw waattidi seerishe naagisaneeekko erees. <sup>10</sup> Ubbaafe aathidi tuna amon asho qofa kaalleyssatanne maata aawata kadheyssata, pirdda gallas gakkanaw Goday naagisis.

He asati ganje minonne otoranchcho gidiya gisho salo medhetethata cayishe yayyokonna. <sup>11</sup> Shin kiitanchchoti worddo asttamaaretapte wolkqaninne minutethan daro aadhdhoosonashin Godaa sinthan salo medhetethata cayokkonaa. <sup>12</sup> Shin he asati bantta eronnaban gelidi cayoosona. Entti oykettanawnn hayqqanaw yelettida, wozani baynna do7a mela hanosoona; enttika wora do7ada coo dhayana.

<sup>13</sup> Entti gathida metuwada zaari metootana. Seeta gallas yexxishe guppeyssa ufayssiabaa gidi qoppoosona. Entti kawushshatanne tunata gidi de7ishe hintteraa shaakettiya siiqo imatuwan ufaytoosona. <sup>14</sup> Laymatiya maccasi xeellidi aggonna ayfey enttaw de7ees; qassi nagara ootheysa aggokona. Ammanon minniboonna asaa cimmoosona. Enttaw ubba wode amottiya wozani de7ees; entti qanggettidayssata. <sup>15</sup> Entti suure oge aggidi, makkala miishe siiqidi balida, Bi7oora na7aa Balaama ogiya kaallidosona. <sup>16</sup> I ba nagara gaason hanqettis; dooni baynna harey asada haasayidi nabiya gooshshatethaa teqqis.

<sup>17</sup> He asati melida pulltota melanne carkkoy tookkidi efiya shaara mela; entta naagey sakkana dhumaa. <sup>18</sup> Entti hadanne otoro oda odettishe balan de7iya asaa giddofe kessi ekkidi buroo minniboonna asata laymatetha asho amon cimmidi balettoosona. <sup>19</sup> Entti bantaw dhayo aylletethan de7ishe haratakko, “Hintte aylletethafe keyana” yaagosona. Ays giikko, asi ba xoonettidaba ubbaas aylle. <sup>20</sup> Entti ashshiyya nu Godaa Yesuu Kiristtoosa eridi ha alamiya tunatethaafe kessi ekkidaappe guye, zaari qaxettidi xoonettiko kase de7iya de7uwappe guyeyssi enttaw iita gidana. <sup>21</sup> Entti xillotetha ogiya eri simmidi aggeyssafe koyrottidi geeshsha kiitta eronnaaka enttaw lo77oshin. <sup>22</sup> “Kani ba cooshshaako guye simmees” qassi, “Meeccettida gudunthoy guye simmidi urqqan gondorettees” giya leemisoy tuma gideyssi entta bolla oothees.

### 3

#### *Goday yaana*

<sup>1</sup> Ta siiqo ishato, hayssi ta hinttew xaafida dabddaabbey nam77antho. Taani ha nam77u dabddaabbetakka hinttew xaafiday, hintte suure qofaa qoppaanaada hinttena denthethanaassa. <sup>2</sup> Qassi geeshsha nabeti beni odida qaalanne nuna ashshiyaa Goday, hawaareeta baggara kiittida hintte hassayana mela koyays. <sup>3</sup> Ubbaafe kasetidi, wode wurssethan bantta amuwaa kaallidi ase toochchevssati, toochchishe yaanayssa erite. <sup>4</sup> Entti, “Ta yaana gidayssi awun de7ii? Nu awati hayqqidosona, shin ubbabay sa7ay medhettosappe doomidi de7eyssada de7ees” yaagosona. <sup>5</sup> Daro wodeppe kase saloy Xoossa qaalan medhettidayssa; qassi sa7ay haathafenner haathan medhettidayssa erishe kaddoosona. <sup>6</sup> He wode de7iya sa7ay haathan mitettidi dhays. <sup>7</sup> Shin ha77i de7iya saloynne sa7ay, geellati pirddetiya gallasaynne dhaya gallasay gakkanaw he qaalan tamas naagettidi de7oosona.

<sup>8</sup> Shin ta siiqo ishato, ha issibaa dogoppite. Godaa matan issi gallasi mukulu laytha mela gideyssanne mukulu laythi issi gallasa mela gideyssa dogoppite. <sup>9</sup> Issoti issoti gam77is gidi qoppeyssada, Goday ba ufayssa qaala gisho gam77enna. Shin oonikka dhayonna mela koyidi, ubbay bantta nagaraappe simmanna mela hintte gisho gidi genccees.

<sup>10</sup> Shin Godaa gallasay kaysoda yaana. He gallasan saloti wolqqaama guunthan dhayana; salo medhetethati taman xuugettana; sa7aygne iya bolla de7iya ubbay dhayana.  
<sup>11</sup> Hiza, ubbabay hessada hanida dhayaabaa gidikko hintte ay mela asi gidanaw bessii? Hintte geeshshinne Xoossaa daaniya de7o daanaw bessees. <sup>12</sup> Hintte sinthara yaa Xoossaa gallasaa naagishe hinttew dandda7ettiyyaba ubbaa oothidi he gallasaa eesoyite. He gallas salotinne iyan de7iyabay taman xuugettana; wolqqaama suulan til77ana. <sup>13</sup> Shin nuuni xillotethi haariya ooratha salonne ooratha sa7a Xoossaa ufayssa qaalada naagoos.

<sup>14</sup> Hessa gisho, ta siiqo ishato, nu he gallasaa naagiya gisho pokkoyne borey baynayssata gididi, Godaara saron daanaw minnite. <sup>15</sup> Asi ubbay attana mela koyidi Goday dandda7eyssa dogoppite. Qassi nu siiqo ishay, Phawuloosi, Xoossay iyaw immida cincatethan hessada hinttew xaafis. <sup>16</sup> I ba dabddaabbeta ubban hessatabaa xaafis. Iya dabddaabbeta giddon akeekanaw waaysiya qofati de7oosona. Tamaariboonnanne minnibonna asati hara Xoossaa qaala mirqeysada ha kiitatakka dhayanaw machchidi mirqoosona.

<sup>17</sup> Hessa gisho, ta siiqo ishato, hintte hessa eriya gisho makkalata balan cimettidi, dhayonna melanne minnidi de7iya bessaafe kunddonna mela naagettite. <sup>18</sup> Shin hintte nuna ashshiya nu Godaa, Yesuus Kiristoosa aadho keehatethaaninne eratethan diccите. Iyaw ha77ika merinawukka bonchchoy gido. Amin77i.

## Yohaannisi Xaafida Koyro Kiitaa Gaatha Qofaa

Hawaariya Yohaannisi xaafida koyro kiitay, nam77u ayfe qofata oykkees. Hessika nabbabeysatti Xoossaaranne iya na7aa Yesuus Kiristtoosara issifetethi daana mela minthethanaassanne he issifetethaa dhayssya worddo timirttiyafe haakkana mela entta akeekisanaassa. He wode denddida worddo timirttay, "Xoossay benttonna ayyaana alame medhdhis. Ha benttiya alamiyanne nu asatethaa Xoossay medhdhiboonna gisho iita. Qassi ha benttiya alameynne nu asatethay nu ayyaana qohanawunne tunisanaw dandda7enna" yaagidi tamaarssoosona. Hessa guussay, koyro, Yesuusi ase gididi yibeenna. Nam77antho, issi asi ba ayyaana tunisonna de7ishe ba ashon nagara oothanaw dandda7ees yaagusu.

Hessa gisho, Yohaannisi ba kiitan, Yesuusi ase gididi yidayssa kaddiya oonikka Xoossaa na7a gidenna (4:2-3). Qassi Xoossaafe yelettida oonikka ubba wode nagaran de7enna (3:6) yaagidi xaafis.

He worddo asttamaareti, "Atotethi guussay, ha sa7aa duussas un77etethafe keyidi yeda gididi de7o" yaagosona. Hessa bolla gujjidi, "Iitanne lo77o shaakkidi oykethi gidin, qassi hara asi siiqo gidin atotethaara aybi gahetethika baawa" yaagosona.

Xaafey he timirttiya ixxidi, "Yesuus Kiristtoosi polo ase. Yesuusa ammaneyssatinne Xoossaai siiqeyssati ubbay bantta giddon issoy issuwara siiqettanaw bessees" yaagidi odis.

### **1 Yohaannisa kiitaa ayfe qofata**

Gelo qofaa 1:1-4

Poo7onne dhuma 1:5-2:29

Xoossaai naytanne Xalahe nayta 3:1-24

Tumanne worddo 4:1-6

Siiqo ooso 4:7-21

Xooniya ammano 5:1-21

#### *De7o immiya qaala*

<sup>1</sup> Nuuni koyroppe doomidi de7iya, nu haythan si7ida, nu xeellida, ayfiyaan be7ida, nu kushiyen bochchida de7o qaalabaa hinttew xaafoos. <sup>2</sup> He de7oy qonccin, nuuni iya be7idi, iyabaa markkattoos. Aawa matan de7iya nuus qonccida, merinää de7uwabaa hinttew awaajjos. <sup>3</sup> Nuura hinttew issifetethi daana mela nuuni be7idayssanne si7idayssa hinttew oodoos. Hinttew nuura issifetethi de7iya gisho Aawaranne iya Na7aa Yesuus Kiristtoosara issifetethi de7ees. <sup>4</sup> Nuufayssay polo gidana mela hessa hinttew xaafoos.

#### *Xoossay poo7o*

<sup>5</sup> Nuuni de7o gidida iyappe si7idi, hinttew odiya kiitay hayssa: "Xoossay poo7o; iyan dhumi baawa" yaageyssa. <sup>6</sup> Nuus iyara issifetethi de7ees yaagishe dhuman de7ikko, nu odaaninne nu oosuwan worddotoos. <sup>7</sup> Shin poo7on I de7eyssada, nukka poo7on de7ikko, nuus woli giddon issifetethi de7ees. Iya Na7aa, Yesuusa suuthay nagara ubbaafe nuna geeshshees.

<sup>8</sup> Nuuni, nunan nagari baawa giikko nu nuna cimmoos; nunan tumi baawa. <sup>9</sup> Shin Xoossaas nu nagara paaxikko, I nu nagara atto gaanawunne nu qoho ooso ubbaafe nuna geeshshanaw, ammanetidayssanne tumaa. <sup>10</sup> Nuuni nagara oothibookko giikko Xoossaa worddanchcho kessoos; iya qaalaykka nunan deenna.

## 2

#### *Kiristtoosi nuus gaannateyssa*

<sup>1</sup> Ta nayto, nagara hintte oothonna mela taani hayssa hinttew xaafays. Shin oonikka nagara oothiko Aawa matan nuus gaannatiya Xilloy, Yesuus Kiristtoosi, de7ees. <sup>2</sup> Nu nagaray Kiristtoosa baggara atto geetettees. I nu nagaraa xalaalas gidonnashin asa ubbaa nagaraas yarshshettis.

<sup>3</sup> Nuuni Xoossaai kiitaa naagikko, sidhey baynnashin, tuma nu iya eroos. <sup>4</sup> Oonikka, "Taani iya erays" yaagishe, iya kiitaa naagonna ixxiko he uray worddanchcho; tumatethi iyan baawa. <sup>5</sup> Shin iya qaalias nu kiitettyabaa gidikko he uray Xoossaai siiqiya siiqoy polo gidees. Nuuni Xoossan de7eyssas hessi baw tuma markka. <sup>6</sup> Taani, "Xoossan de7ays" giya oonikka Kiristtoosi de7idayssada daanaw bessees.

### *Ooratha kiitaa*

<sup>7</sup> Ta siiqo ishato, taani hinttew koyroppe de7iya gal77a kiitaa xaafaysippe attin ooratha kiita xaafikke. Ikka hintte si7ida he gal77a kiitaa. <sup>8</sup> Gidikkoka, Kiristtoosaninne hinttenan tuma gididi de7iya, ooratha kiitaa xaafays. Dhumay kichchin, ha77i tuma poo7oy poo7ees.

<sup>9</sup> “Poo7on de7ays” gishe ba ishaa ixxiya oonikka, ha77ika dhuman de7ees. <sup>10</sup> Ba ishaa dosiya oonikka poo7on de7ees. He uran hara asi dhubbiyabay baawa. <sup>11</sup> Shin ba ishaa ixxiya oonikka dhuman de7ees; dhuman hamuttees. Dhumay iya ayfiyaa qooqisida gisho aw biyakko erenna.

<sup>12</sup> Ta nayto, Kiristtoosa sunthaa baggara hintte nagaray atto geetettida gisho taani hinttew xaafays. <sup>13</sup> Aawato, koyroppe de7iya, iya hintte erida gisho hinttew xaafays. Yalagato, Xalahiya hintte xoonida gisho hinttew xaafays. <sup>14</sup> Guutha nayto, Xoossaa hintte erida gisho hinttew xaafays. Aawato, koyroppe de7iya iya hintte erida gisho hinttew xaafays. Yalagato, hintte mino gidiya gisho Xoossaa qaalay hinttenan de7iya gishonne Xalahiya hintte xoonida gisho hinttew xaafays.

<sup>15</sup> Alame woykko alamen de7iyabaa dosoppite. Alamiya dosiya oonikka Xoossaa dosenna. <sup>16</sup> Alamen de7iya ubbabay, ashio motethi, ayfen be7idi amottiaybaynne miishen ceeqetethi alamebaappe attin Xoossaafe gidenna. <sup>17</sup> Alameynne alamen asi amottiya ubbay aadhdhana, shin Xoossaa sheniya poliya oonikka merinaw daana.

### *Kiristtoosara eqettiya morkkiya*

<sup>18</sup> Ta nayto, wodiya wurssethay matattis. Kiristtoosa morkkey sinthafe yaanayssa hintte si7idayssada hari attoshin, ha77ika iya morkketi daroti denddidosona. Hessa gisho, wodiya wurssethay matattidayssa nuuni hessian eroos. <sup>19</sup> He morkketi nu bagga gidonna gisho nu giddofe keyidosona. Entti nu bagga gidiyakko nu giddon de7ana, shin enttafe oonikka nu bagga gidonnayssi erettana mela nu giddofe keyidosona.

<sup>20</sup> Shin Kiristtoosi hintte bolla Geeshsha Ayyaana gussis; qassi hintte ubbay tumaa ereeta. <sup>21</sup> Tumaa hintte eriya gishonne tuman aybi worddoy baynnayssa hintte eriya gisho taani hinttew xaafaysippe attin tumaa hintte eronna gisho gidenna.

<sup>22</sup> Yesuusi, Xoossay dooridayssa gidenna gidi kaddiya asappe hari worddanchchoy oonee? Hessa mela asi Kiristtoosa morkke. I na7aa kaddiko Aawakka kaddees. <sup>23</sup> Na7aa kaddiyo ooddeskka Aaway baawa; qassi Na7aas markkattiya ooddeskka Aaway de7ees.

<sup>24</sup> Hessa gisho, koyro hintte si7ida qaala hintte wozanan minthidi naagite. Koyro si7idayssa hintte naagikko hinttew Na7aaranne Aawara issifetethi daana. <sup>25</sup> Na7ay nuus merinaa de7uwa immana gidi qaala gelis.

<sup>26</sup> Hinttena baletihi asaa gisho taani hayssa hinttew xaafas. <sup>27</sup> Shin Kiristtoosi hintte bolla ba Geeshsha Ayyaana gussis. Geeshsha Ayyaanay hinttenan de7iya gisho oonikka hinttena tamaarsso koshshenna. Iya Geeshsha Ayyaanay hinttena tumaa tamaarsseesippe attin worddo gidenna. Geeshsha Ayyaanay hinttena tamaarssidayssada Kiristtoosan de7ite.

<sup>28</sup> Hiza, ta nayto, I qoncciya wode nuuni yashshi baynnanne iya yuussaa gallas iya sinthan nu yeellan qosettuna mela iyan de7ite. <sup>29</sup> Kiristtoosi xillo gideyssa hintte erikko xillo oothiya ubbay Xoossaa na7a gideyssa erite.

## 3

### *Xoossaa nayta*

<sup>1</sup> Nuuni Xoossaa nayta geetettidi xeegettana mela Xoossay nuna ay mela dosidaakkoo be7ite. Nuuni tumakka Xoossaa nayta. Ha alamey Xoossaa eronna gisho nunakka erenna. <sup>2</sup> Ta siiqo ishato, ha77i nuuni Xoossaa nayta; nuuni ay hananeekko burro erettibeenna. Shin Kiristtoosi qoncciya wode nuuni iya daananayssa eroos. I tuma de7eyssa nuuni be7ana. <sup>3</sup> Kiristtoosa be7ana gidi ufayssan naagiya oonikka, Kiristtoosi geeshshi gididayssada bana geeshshees.

<sup>4</sup> Nagari higge mentho gidiya gisho nagara oothiya ubbay Xoossaa higge menthees.

<sup>5</sup> Kiristtoosi asaa nagara dhayssanaw qonccidayssa hintte ereeta; iyan nagari baawa.

<sup>6</sup> Kiristtoosan de7iya oonikka nagaran deenna. Qassi nagaran de7iya oonikka iya be7ibeenna woykko eribeenna.

<sup>7</sup> Ta nayto, hinttena oonikka baletoho. Kiristtoosi xillo gididayssada xillo oothiya oonikka xillo. <sup>8</sup> Xalahey koyroppe nagara oothida gisho nagara ubba wode oothiya oonikka Xalahe dabbo. Hessa gisho, Xoossaa Na7ay Xalahe ooso dhayssanaw qonccis. <sup>9</sup> Xoossaa na7a gidiya oonikka Xoossaa Ayyaanay iyan de7iya gisho I ubba wode nagaran deenna. Xoossay iya Aawa gidiya gisho nagaran deenna. <sup>10</sup> Xoossaa nayta giddoninne

Xalahe nayta giddon de7iya dummatethay hessian erettes; xillo oothonna asi woykko ba ishha dosonna asi Xoossaa Na7a gidenna.

### *Issoy issuwa dosite*

<sup>11</sup> Koyroppe hintte si7ida kiitay, "Issoy issuwa dosanaw bessees" yaagiya kiitaa. <sup>12</sup> Nuuni Qaa7ela mela gidanaw bessenna. Qaa7eli Xalahe dabbo gididi ba ishha wodhis. Iba ishha ays wodhde? Iya oosoy iita gidida gishonne iya ishha oosoy lo77o gidida gisho wodhis.

<sup>13</sup> Ta ishato, ha alamiya asay hinttena ixxiko malaalettotife. <sup>14</sup> Nuuni nu ishata siiqiya gisho hayqoppe de7o pinnidayssa eroos. Ba ishha dosonna oonikka hayqo kuyan de7ees. <sup>15</sup> Ba ishha ixxiya oonikka shemppa wodhees. Qassi shemppa wodhiya ooddeskka merinnaa de7oy baynnaysa hintte ereeta. <sup>16</sup> Kiristtoosi ba shemppuwa nu gisho aathi immidaysan siiqoy aybeekko nuuni erida. Nukka nu ishata gisho nu shemppuwa aathidi immananaw bessees. <sup>17</sup> Shin dure gidida oonikka metootanchchuwa be7ishe, iyaw qadhettonna ixxiko ba wozanan Xoossaa siiqoy de7ees gaanaw waanidi dandda7ii? <sup>18</sup> Ta nayto, nuuni oosoninne tumatethan nu siiquwa qonccisanaw besseesppe attin coo oda xalaalan woykko doona xalaalan siiqetanaw bessenna.

### *Xoossan de7iya ammanetethaa*

<sup>19</sup> Nuuni issoy issuwa siiqikko, nu tumaa bagga gideyssa eroos; hessas Xoossaa sinthan yeellatokko. <sup>20</sup> Nu wozanay nu bolla pirddiyabaa gidikko, Xoossay nu wozanaappe gita gideyssa eroos; I ubbabaaa erees.

<sup>21</sup> Ta siiqo ishato, nu wozanay nu bolla pirddonnabaa gidikko nuuni Xoossaa sinthan yayyoko. <sup>22</sup> Nuuni iya kiitaan naagiyta gishonne iya ufayssiyabaa oothiya gisho woossiya ubbaa iyappe ekkoos. <sup>23</sup> Kiristtoosi nuna kiittidayssada Xoossaa Na7aa Yesuus Kiristtoosa sunthan ammananadaranne issyo issuwa siiqanaada Xoossay nuna kiitts. <sup>24</sup> Xoossaa kiitaan naagiyta oonikka Xoossan de7ees; Xoossaykka iyan de7ees. Xoossay nuus immida Geeshsha Ayyaana baggara I nunan de7eyssa eroos.

## 4

### *Ayyaanata shaakki erite*

<sup>1</sup> Ta siiqo ishato, ayyaanata ubbaa ammanoppite, shin entti Xoossafe yidaakko paaci be7ite. Ays giikko, daro worddo nabeti alamen denddidosona. <sup>2</sup> Xoossaa Ayyaana gideyssa hintte hayssan erana; "Yesuus Kiristtoosi ase gididi yidayssa markkattays" giya ayyaana ubbay Xoossaafe yees. <sup>3</sup> Kiristtoosi ase gididi yidayssa ammanays goonna ayyaana ubbay Xoossaafe gidenna. Hessi Kiristtoosa ixxiya ayyaana. Hintte he ayyaanay yaanayssa kase si7ideta; I hari attoshin ha77ika alamen de7ees.

<sup>4</sup> Ta nayto, hintte Xoossassa. Hintte giddon de7iya Geeshsha Ayyaanay alamen de7iya ayyaanappe daro wolqqaama gidiya gisho worddanchcho nabeta hintte xoonideta. <sup>5</sup> Entti ha alamiya ase gidiya gisho ha alamiyabaa odoosona; ha alamiya asay entta odaa si7oosona. <sup>6</sup> Nuuni Xoossaafe yelettida; Xoossaa eriya oonikka nuna si7ees. Xoossaa eronna oonikka nuna si7enna. Nuuni tuma ayyaananne worddo ayyaanaa hessian shaakkos.

### *Xoossay siiqo*

<sup>7</sup> Ta siiqo ishato, siiqoy Xoossafe yaa gisho ane issyo issuwara siiqettoos. Siiqiya oonikka Xoossaa na7a; I Xoossaa erees. <sup>8</sup> Xoossay siiqo gidiya gisho siiqonna oonikka Xoossaa erenna. <sup>9</sup> Nuuni Kiristtoosa baggara de7uwa demmana mela Xoossay ba issi Na7aa ha alamiya kiitts. Xoossay nuna ba siiquwa hessian bessis. <sup>10</sup> Tuma siiqo guussay hayssa: nuuni Xoossaa siiqida gisho gidonnashin Xoossay nuna siiqida gishonne nu nagaraappe nuna maaranaw ba Na7aa kiittida gishossa.

<sup>11</sup> Ta siiqo ishato, Xoossay nuna hayssada siiqikko, nukka issyo issuwa siiqanaw bessees. <sup>12</sup> Xoossaa be7iday oonikka baawa. Nuuni issoy issuwa siiqikko Xoossay nunan de7ees; iya siiqoykka nunan polo gidees.

<sup>13</sup> Xoossay ba Geeshsha Ayyaana nuus immida gisho nuuni Xoossan de7eyssanne ikka nunan de7eyssa eroos. <sup>14</sup> Aaway ba Na7aa, ha alamiya ashshneyssa gidana mela kiittidayssa nuuni be7idi markkattoos. <sup>15</sup> Yesuusi Xoossaa Na7aa gideyssa markkattiya ooddenkka Xoossay de7ees; ikka Xoossan de7ees. <sup>16</sup> Xoossay nuna siiqeyssa nuuni eroosinne amanoos.

Xoossay siiqo. Siiqon de7iya oonikka Xoossan de7ees; Xoossaykka iyan de7ees. <sup>17</sup> Nu de7oy ha alamiyan Kiristtoosi de7idayssa mela gidiya gisho pirdda gallas yayyonna iya

sinthe shiiqanaw iya siiqoy nunan polo gidees. <sup>18</sup> Siiqon yashshi baawa, tuma siiqoy yashshi kessi holees. Yashshinne pirddi issife biya gisho yayyaa uraa siiqoy polo gidenna.

<sup>19</sup> Xoossay koyro nuna siiqida gisho nu siiqoos. <sup>20</sup> Oonikka, "Xoossa siiqays" gishe ba ishaa ixxiko, I worddanchcho. Ays giikko, be7iya ba ishaa siiqonna oonikka be7iboonna Xoossa siiqanaw waanidi dandda7ii? <sup>21</sup> Kiristtoosi nuus immida kiitay hayssa; "Xoossa siiqiya oonikka ba ishaa siiqanaw bessees" yaageyssa.

## 5

### *Alamiya xoono*

<sup>1</sup> Yesuusa, I Kiristtoosa yaagidi, ammaniyaa oonikka Xoossa na7a. Aawa siiqiya oonikka iya Na7aakka siiqees. <sup>2</sup> Nuuni Xoossa siiqiya gishonne iya kiitaa naagiya gisho Xoossa nayta siiqeyssa eroos. <sup>3</sup> Nuuni Xoossa siiqikko, iya kiitata naagoos. Iya kiitati deexo gidokkona. <sup>4</sup> Ays giikko, Xoossa na7a gidiya oonikka ha alamiya xoonanaw dandda7ees. Nuuni ha alamiya xoonanay nu ammanuwana. <sup>5</sup> Alamiya xoonanaw dandda7ey oonee? Yesuusi Xoossa Na7aa gideyssa ammaniyaa asa xalaali xoonana.

### *Kiristtoosabaa markkatteyssa*

<sup>6</sup> Yesuusi Kiristtoosi haatha xinqqatiyaranne ba hayquawa suuthara yis. I, haatharanne suuthara yisippe attin haatha xalaalara yibeenna. Geeshsha Ayyaanay tuma gidiya gisho hessi tuma gideyssa markkattes. <sup>7</sup> Heedzu markkati de7oosona. <sup>8</sup> Hessati, Geeshsha Ayyaanay, haathaanne suuthaa. Ha heedzata markkatethay issino. <sup>9</sup> Nu asi markkatteyssa ammanoos. Shin Xoossa markkatethay asayssafe daro aadh dhees. Xoossay ba Na7aas markkattida markkatethay hayssa. <sup>10</sup> Xoossa Na7aa ammaniyaa uraa wozanan ha markkatethay de7ees. Xoossa ammanonna oonikka Xoossay ba Na7aas markkattida markkatethaa ammaniboonna gisho Xoossa worddanchcho ootees.

<sup>11</sup> Hiza, markkatethay hayssa; Xoossay nuus merinaa de7o immis; he de7oykka iya Na7an de7ees yaageyssa. <sup>12</sup> Xoossa Na7ay de7iya ooddeskka de7oy de7ees. Xoossa Na7ay baynna ooddeskka de7oy baawa.

### *Merinaa de7o*

<sup>13</sup> Xoossa Na7an ammaniyaa hinttew merinaa de7oy de7eyssa hintte erana mela hayssa hinttew xaafer. <sup>14</sup> Xoossa sheniyada aybibaaakkka iya woossiko, I si7eyssa nuuni eriya gisho iyan ammanettos. <sup>15</sup> Nuuni woossiya ubbaa I si7eyssa erikko, nuuni woossiyabaa I immanayassa eroos.

<sup>16</sup> Oonikka ba ishay hayqo bessonna nagara oothishin be7ikko, Xoossa iyaw woossanaw bessees. Hayqo bessonna nagara oothidayssatas Xoossay de7o immana. Hayqo bessiya nagari de7ees. Taani hinttena hessas Xoossa woossite giikke. <sup>17</sup> Iita ooso ubbay nagara, shin hayqo bessonna nagari de7ees.

<sup>18</sup> Xoossa Na7ay iya naagiya gisho Xoossa na7a gidida oonikka nagaran ubba wode de7onnayssa nuuni eroos. Xalahey iya qohanaw dandda7enna. <sup>19</sup> Nuuni Xoossassa gideyssanne ha kumetha alamey Xalahlen haaretteyssa eroos.

<sup>20</sup> Nuuni tuma Xoossa eranaada Xoossa Na7ay yidayssanne nuus akeeka immidayssa eroos. Nuuni iya na7a, Yesuusi Kiristtoosa baggara tuma Xoossan de7oos. Yesuusi tuma Xoossaanne merinaa de7uwa.

<sup>21</sup> Ta nayto, eeqatappe hintte haakkite.

## Yohaannisi Xaafida Nam77antho Kiitaa Gaatha Qofaa

Yohaannisi xaafida nam77antho kiitaa, Yesuusa hawaare gidida cimay, Yohaannisi xaafis. Xaafetidaykka doorettida godattesanne I naytassa. Ooni eri, hessika issi woosa keethasinne iyan goynniya asaas gidonna aggenna. Ha qantha kiitay xaafetiday, entti issoy issuwara siiqettana mela akeekisanaassanne worddo asttamaaretappenne entta timirittiyaafe naagettana mela qofisanaassa.

### **2 Yohaannisa kiitaa ayfe qofata**

Sarotho 1-3

Siiqoy ubbaafe bolla 4-6

Worddo timirittiyafe naagetethi 7-11

Kuushsha qofaa 12-13

<sup>1</sup> Ta cimay doorettida godattesinne I naytas kiittida kiita. Ta xalaala gidonnashin tumaa eriya ubbay hinttena dosoosona. <sup>2</sup> Ha tumay nunan de7iya gishonne merinaw nuura daana gisho taani hinttena tuma dosays.

<sup>3</sup> Xoossaa nu Aawanne iya Na7aa Yesuus Kiristtoosa aadho keehatethay, maarotethaynne sarotethay tumanine siiqon issife nuura gido.

*Tumabaanne siiqobaan*

<sup>4</sup> Aaway nuna kiittidayssada, ne naytappe baggati, tumaas kiitteteysa be7ada taani daro ufayttas. <sup>5</sup> Godattee, ha77ika nuuni ubbay issoy issuwa siiqana mela taani nena woossays. Ha kiitay koyroppe nuura de7iya kiitaappe attin taani new ooratha kiita xaafikke. <sup>6</sup> Tuma siiqoy nuuni Xoossaa kiitaa naagidi daanayssa. Qassi koyroppe hintte si7idayssada iya kiitay, hintte ubbay siiqon daana melassa.

<sup>7</sup> Yesuus Kiristtoosi ase gididi yidayssa ammanonna, daro balehiya asati, alamen dendidosa. Hessa mela asi oonikka baletheyssanne Kiristtoosa morkke. <sup>8</sup> Hintte oothida kumetha woytuwa ekkanaw minnite. Hintte oothidayssi dhayonna mela naagettite.

<sup>9</sup> Kiristtoosa timirittiyan doonnayssasinne iyappe haakkiya uraas Xoossay baawa. Kiristtoosa timirittiyan de7iya uraas Aawayne Na7ay de7oosona. <sup>10</sup> Oonikka hintteko yishe ha timirittiya ehonna ixxiko, hintte soo gelssofite; sarokka gooppite. <sup>11</sup> Iya saro giya oonikka iya iita oosuwan iyara shaakettees.

*Wurssetha sarotaa*

<sup>12</sup> Taani hinttew xaafanaw koyida darobay de7ees, shin worqqateninne qalamen xaafanaw koyikke. Nu ufyayssay polettana mela hintteraa som77on gahettada odettanaw hintteko baana gada qoppays.

<sup>13</sup> Xoossay doorida ne michche nayti nena saro yaagosona.

## Yohaannisi Xaafida Heedzanthro Kiitaa Gaatha Qofaa

Yohaannisi xaafida heedzanthro kiitaa, Yesuusa hawaare gidida cimay, Yohaannisi xaafis. I xaafidaykka Gaayoosa giya issi woosa keethaa heemmeye ssassa. Xaafey issi baggara Gaayoosi hara ammaneyssata maaddida gisho iya galatees; qassi hara baggara Diyotirafisaa geetettiya woosa keetha halaqa gidanaw koyaa geella uraappe naagettana mela akeekisees.

### **3 Yohaannisa kiitaa ayfe qofata**

Gelo qofaa 1-4

Gayyoosi galatettis 5-8

Diyotirafisi borettis 9-10

Dimexiroosi galatettis 11-12

Kuushsha qofaa 13-15

<sup>1</sup> Taami cimay, tumaa dosiya Gaayoosas kiittida kiita. <sup>2</sup> Ta siiquuwaw, neeni ne shemp-puwan lo77o de7eyssa ta ereyssada new payyatethi daana melanne ne oothiyabay sururana mela new Xoossaar woossays. <sup>3</sup> Guutha ammaniyyaa asati yidi, ubba wode neeni tuman de7eyssanne ne tumatethabaa markkattida wode taani daro ufayttas. <sup>4</sup> Ta nayti tumatethan de7eyssa si7eyssafe aadhdhidi, tana ufyayssiyabay baawa.

#### *Gayyoosi galatettis*

<sup>5</sup> Ta siiquuwaw, entti new imathe gidikkoka, neeni ammaniyyaa asatas ammanhiya ooso oothaasa. <sup>6</sup> Entti ne siiquuwabaa woosa keethan markkattoosona. Ha77ika entti biya ogiyan Xoossay doseyssada oothada entta maaddiko lo77o oothaasa. <sup>7</sup> Entti Kiristtoosa sunthaa gisho keyshe, ammanonna asatappe aykkoka ekkibookkonna. <sup>8</sup> Nuuni tuma oosuwa enttara issife oothanaw hayssa mela asata maaddanaw bessees.

#### *Diyotirafisanne Dimexiroosa*

<sup>9</sup> Taani woosa keethatas dabddaabbe xaafas, shin entta halaqaa gidanaw koyaa Diyotirafisi nuuni geysa ekkenna. <sup>10</sup> Hessa gisho, taani yaa biya wode I nu bolla odettiya iita odanne I oothida oosuwa odana. I hessi guuxis gidi, nu ishati yaa wode mokkenna. Hari attoshin, entta mokkanaw koyeyssatakka diggidi woosa keethafe kessees.

<sup>11</sup> Ta siiquuwaw, lo77obaa daanapape attin iatabaa daanoppa. Lo77obaa oothiya oonikka Xoossaasi, shin iatabaa oothiya oonikka Xoossaasi be7ibeenna.

<sup>12</sup> Dimexiroosi lo77o asi gideyssaa asa ubbay markkattees. Tumay ba huu7en iyabaa markkattees; nukka iyabaa markkattoos; nu markkatethay tuma gideyssaa hintte ereeta.

#### *Wurssetha sarotaa*

<sup>13</sup> Taani new xaafanaw koyida darobay de7ees, shin qalameninne worqqaten xaafanaw koyikke. <sup>14</sup> Shin taani matara neera gahettanaw qoppays; he wode nuuni odettana.

<sup>15</sup> Saroy new gido.

Ne dabbotti nena saro yaagosona. Nu dabbota ubbaa entta sunthaa sunthaa xeegada tana “Saro gis” yaaga.

## Yihudi Xaafida Kiitaa Gaatha Qofaa

Yihuda kiitay xaafetiday, ammanonna de7ishe ammanniyya asi daanidi worddo timirtte laalliya asatappe ammanniyya asay naagettana mela akeekisanaassa. Ha qantha kiitay ba giddon oykkida qofatan nam77antho Phexiroosa kiita daanees. Xaafey, “Ammanniyya asaas issi tohonne wurssethi gakkanaw imettida ammanuwas olettite” yaagidi nabbabeyssata minthidi qofisees.

### **Yihuda kiitaa ayfe qofata**

Sarotho 1-2

Worddo asttamaareta timirttiyanne entta kunddethaa 3-16

Ammano naagana mela imettida zore 17-23

Galata woosa 24-25

<sup>1</sup> Taani Yihudi, Yesuus Kiristtoosa aylley, Yayqooba ishay;

Xoossay xeegidayssatas, Xoossaas Aaway doseyssatasinnee Yesuus Kiristtoosan naagetti-dayssatas ha dabddabbiiya xaafays.

<sup>2</sup> Maarotethi, sarotethinne siiqoy hinttew kumo.

#### *Worddo asttamaareta*

<sup>3</sup> Ta siiqo ishato, nuuni issife shaakettiya atotethaabaa hinttew xaafanaw taani daro amottas. Shin ammanniyya asaas issi tohonne wurssethi gakkanaw imettida ammanuwas olettana mela hinttena zorashe xaafanayssi taw koshshiyabaa gidis. <sup>4</sup> Entta pirdday benippe xaafetidi uttida, issi issi asati oonikka eronna hintte giddo gelidosona. Entti Xoossaas eronnayssata, entti nu Xoossaas aadho keehatethaa laymatanaw go7ettiya oge oothidi eKKoosona. Ba xalaala kawo gidida, nu Godaa Yesuus Kiristtoosa kaddoosona.

<sup>5</sup> Shin hintte ha ubbaa eriyabaa gidikkoka, Goday Isra7elee asaa Gibxxe biittaafe waati kessidaakko, qassi guyeppe ammanonnayssata dhayssidayssa ta hinttena akeekisanaw koyays. <sup>6</sup> Bantta de7iyasuwa aggidi, banttar imettida maata naagibonna kiitanchchota, gita pirdda gallasay gakkanaw Xoossay entta dhumaappe garssan merinaa santhalaatan qachchi wothis. <sup>7</sup> Hessada, Soodomenne Gamoora asaynnne entta matan de7iya katamatian de7iya asay laymatidosona; laymatethara gahettiya tunatethaa oothidosona. Entti merinnaa taman waayettanayssatas leemiso gididosona.

<sup>8</sup> Hessadakka, ha amuhanchchoti bantta asatethaa tunisoosona; maata aawata kadhoosona; salo medhetethata cayoosona. <sup>9</sup> Shin kiitanchchota halaqqay Mika7eeley Muse ahaas Xalahera palamida wode “Goday nena seero” yaagisippe attin iya bolla cashsha qaala odidi mootanaw koyibeenna. <sup>10</sup> Shin ha asati banttar eronnabaa ubbaa cayoosona; qassi entti wozana baynna meheda medhon eriya eray, I enttana dhayssana. <sup>11</sup> Enttana ayye! Entti Qaa7ela ogiyani bidosona. Miishe koyidi Balaama balan kunddidosona. Qorey Xoossaas bolla denddidayssata entti Xoossaas bolla denddidi dhayidosona.

<sup>12</sup> Ha asati, hintte siiqo gibira miya bessan hinttera uttiya wode yeelli baynna kawushshata. Entti banttan xalaala heemmeyssata. Entti carkkoy efifi iri baynna shaara mela. Qassi ayfe woden ayfe ayfonna, xaphora shodettid, nam77u toho melida mitha mela. <sup>13</sup> Entti hangettida abbaa zuliya mela bantta pokkuwa goppontteyssata. Entti merinaw sakkania dhumay naagiya toylattiya xoolinttota.

<sup>14</sup> Addaameppe doomidi, laappuntha yeleta gidida Heenokey, ha asatabaa tinbbite odishe, “Hekko, Goday, ba daro mukulu geeshshatara yaana”. <sup>15</sup> Asa ubbaa pirddana; geellata ubbaa entti oothida iita ooso ubbaa gishonne makkalatethan entti Xoossaas bolla odettida iita ooda ubbaa gisho pirddana” yaagis. <sup>16</sup> He asati ubba wode zuuzummeysstanie oda koyeyssata. Qassi bantta iita amuwaa kaalloosona; banttan ceeqosonanne banttan go7iyabaa demmanaw harata sabboosona.

#### *Wurssetha zore*

<sup>17</sup> Shin ta ishato, nu Godaa Yesuus Kiristtoosa hawaareti kase hinttew odida qaala akeekite. <sup>18</sup> Entti, “Wurssetha wodiyen, bantta amuwaa kaallidi toochcheyssati yaana” yaagidosona. <sup>19</sup> He asati asaa giddon shaahotethi medhdheyssata, bantta ashoo amuwaa haaretteyssatanne Geeshsha Ayyaanay baynnayssata.

<sup>20</sup> Shin ta ishato, geeshshi gidida hintte ammanuwan hinttena dichchanaw minnite; qassi Geeshsha Ayyana wolqan woossite. <sup>21</sup> Hinttena merinaa de7uwakko gathiya nu Godaa Yesuus Kiristoosa maaratethaa naagishe hinttena Xoossaai siiquwan naagite.

<sup>22</sup> Sidhey de7iya asaas qadhattite. <sup>23</sup> Issi issi asata tamappe kessi ekkite. Qassi iita amon tunida entta ma7uwa ixxishe haratas yashshan qadhattite.

*Galata woosaa*

<sup>24</sup> Hintte kundonna mela naaganaw borey baynnayssatanne gita ufayssan kumidayssata oothidi ba bonchchuwa sinthan hinttena shiishanaw dandda7iya, <sup>25</sup> nuna ashshiya issi Xoossaas, nu Godaa Yesuus Kiristoosa baggara bonchchoy, gitatethi, wolqqinne maati, kasekka, ha77ika, merinawukka iyaw gido. Amin77i.

## Yohaannisa Qonccethaa

### Gaatha Qofaa

Yohaannisa qonccethay xaafettiday, ammaniyaa asay Yesuus Kiristtoosa banttaw Goda oothidi, geeshshatethan de7ida gisho entta metoynne waayey gakkida wodena. Xaafey wudidi xeellida ayfe qofay, ammaniyaa asaa ufayssay kumethi gidana mela entta minthethid, entta gakkida goodaanne metuwa giddon bantta ammanuwani minnidi eqqana mela denthethanaassa.

Maxaafan dariya kifiley daronne kaalli kaallidi qonccida qonccethaa oykkees. Ha qonccethati he wode de7iya asaas gelees, shin haratas xuura giddi gam77is. Entti odettidaykka leemiso odana. Ha maxaafan de7iya tayboti, maka miishtinne do7ati deretanne ayyaana medhetethata leemiso. Mazmure azmaachchey simmi simmidi yexxetteyssada, he maxaafan de7iya huu7e qofati dumma dumma qonccethata baggara dumma dumma ogen simmi simmisi shiiqidosa. Ha maxaafaa birshshethaa dumma dumma qofay de7ikkoka, iyaw huu7e qofay qoncce. Hessika, "Xoossay Godaa Kiristtoosa baggara zaarethonna ogen ba morkketa, Xalahera gujjidi, issi tohonne wurssethi gakkanaaw xoonana. He xoonuwappe guye, iyaw ammanettidi de7ida ba baggata ooratha salonne ooratha sa7a anjjo laatisana" yaageysssa.

#### **Yohaannisa qonccethaa ayfe qofata**

Gelo qofaa 1:1-8

Yesuusi laappun woosa keethata giddon 1:9-20

Laappun woosa keethatas xaafettida kiitaa 2:1-3:22

Araata, xaatha maxaafanne Dorssaa 4:1-5:14

Laappun maatameta 6:1-8:1

Laappun moyzeta 8:2-11:19

Dawiyanne nam77u do7ata 12:1-13:18

Dumma dumma qonccethata 14:1-15:8

Laappun hanqo xuu7ata 16:1-21

Baabiloone kunddethaa, do7aanne worddo nabiya 17:1-20:10

Wurssetha pirddaa 20:11-15

Ooratha salo, ooratha sa7aanne ooratha Yerusalaame 21:1-22:5

Kuushsha qofaa 22:6-21

<sup>1</sup> Eeson hananaw de7iyabaa ba aylleta bessana mela Xoossay iyaw immida Yesuus Kiristtoosa qonccethay hayssa. Yesuusi ba kuitanchchuwa kiittidi, ba ayllya Yohaannisas qonccisis. <sup>2</sup> Yohaannisi Xoossaakaa kiitaa, Yesuus Kiristtoosi oothidabaanne odidabaa ubbaa markkattis. <sup>3</sup> Ha ubbay hananaw wodey matida gisho ha tinbbite qaala nabbabiya oonikka anjettidayssa; qassi ha qaala si7eyssatinne xaafettida kiitaa naagiya ubbay anjettidayssata.

*Laappun Iisiya woosa keethatas kiittida saro tho*

<sup>4-5</sup> Ha dabddabbey, Yohaannisappe, Iisiya biittan de7iya laappun woosa keethatas xaafettis. Kasekka, ha77ika de7iya, sinthafekka yaanaw de7iya Xoossaafe, qassi iya araata sinthan de7iya laappun ayyaanatapppe, hessadakka, hayqoppe denddon koyrogididayssafe, sa7aa kawota haariya ammanettiya markka gidida Yesuus Kiristtoosappe, aadho keehatethaynne sarotethay hinttew gido.

Yesuusi nuna siiqees, qassi ba suuthan nagara aylletethaafe nuna la77a kessis. <sup>6</sup> Nuuni Xoossaaiya Aawas oothana mela nuna kawotethaa kahine oothis. Iyaw merinaappe merinaa gakkanaaw bonchchoynne wolqqay gido. Amin77i.

<sup>7</sup>Hekko, Yesuusi shaarara yees. Asa ubbay hari attoshin, iya caddida asaykka iya be7ana. Sa7an de7iya asa ubbay iya gisho yeekkana. Hessi tuma hanana! Amin77i.

<sup>8</sup>"Kasekka, ha77ika de7eyssi, sinthafekka yaana Goday, Ubbaafe Wolqqaama Xoossay, Alfanne Oomegi tana"<sup>\*</sup> yaagees Godaa Xoossay.

*Godaa qonccethaa*

<sup>9</sup>Taani, Yohaannisi, hintte ishay, hintteri issife Yesuusan waaya, iya kawotethaanne iya dandda7aa be7as. Taani Xoossaakaa qaala gishonne Yesuusabaa markkattida gisho Paximo

giy haathan teqettida biittan de7ays. <sup>10</sup> Godaa gallasan ta Geeshsha Ayyaanay haarettada de7ays; taappe guyera moyze puno mela gita girssi si7as. <sup>11</sup> He girssay tana, “Ne be7eyssa maxaafan xaafada, Iisiyan de7iya laappun woosa keethatas, Efesoona, Samirnneesa, Pherggamoona, Tiyatiroona, Sarddeesa, Filaadelfiyanne Loodoqiya yedda” yaagis.

<sup>12</sup> Taani taw odija girssaa be7anaw guye simmada xomppe wothiya laappun worqqa kocata be7as. <sup>13</sup> He kocata giddon asa na7a daaneyssa be7as. I adussa afila ba tohuwa gathi ma77is, worqqa danccon ba tiraat danccis. <sup>14</sup> Iya huu7eygne iya binaanay bootta dorssa ikise mela woykko shachcha mela boothi; iya ayfey tama laco daanees. <sup>15</sup> Iya tohoy taman seeridi zo77ida naase biraata daanees; iya girssaykka gita shaafa kooshinchcha mela. <sup>16</sup> Iba ushachchha kushen laappun xoolinttota oykkis. Iya doonappe nam77ubaggara qarattida mashshi keyees. Iya som77oy seeta gallasa awa ayfe daanees.

<sup>17</sup> Taani iya be7ida wode hayqqida asada hanada iya tohuwa matan kunddas. I ba ushachchha kushiya ta bolla wothidi, “Yayyofa; Koyroy Wurssethay tana. <sup>18</sup> Taani de7on de7ays; taani hayqqas, shin hekko meri merinawukka de7on de7ays. Hayqonne Si7ooke qulppey ta kushena. <sup>19</sup> Hiza, ha77i haniyabanne sinthafe hananabaa ne be7idabaa xaafa. <sup>20</sup> Neeni ta ushachchha kushen be7ida laappun xoolinttotanne laappun worqqa kocata birshethay hayssa: Laappun xoolinttotti laappun woosa keethata kiitanchchota; laappun worqqa kocati laappun woosa keethata.”

## 2

### *Efesoona woosa keethas kiittida kiita*

<sup>1</sup> “Efesoona woosa keetha kiitanchchuwas hayssada yaagada xaafa.

Ba ushachchha kushen laappun xoolinttota oykkidayssinne laappun worqqa kocata giddora hamutteyssi hayssada yaagees: <sup>2</sup> Taani ne oosuwa, ne daaburanne ne genccaa erays. Neeni iita asatabaa genccanaw dandda7aboonnayssa erays. Qassi hawaare gidonnashin banttana, hawaare geyssata pilgga erada entti worddanchcho gideyssa demmidayssa ta erays. <sup>3</sup> Neeni genccadasa; ta sunthaa gisho meto dandda7adasa; xoonettabaakka. <sup>4</sup> Gidoshin, ha77i ta nena boriyabay de7ees; hessika neeni kase ne siiwu aggadasa. <sup>5</sup> Hiza, ne ay mela dhoqqa bessafe kunddidaako akeeka! Ne nagaraappe simma; neeni kase oothiya oosuwa ootha. Neeni ne nagaraappe simmona ixxiko, ne xompe wothiya kocaa iya bessaafe ekkana. <sup>6</sup> Ha77i ta nena nashshiya issibay de7ees; ta ixxiya Niqoolaweta oosuwa nekkka ixxadada.

<sup>7</sup> Geeshsha Ayyaanay woosa keethatas giyabaa si7anaw haythi de7iya oonikka si7o. Xooniya oonikka Xoossa gannatiyan de7iya de7o mithee ayfeppe maana mela maata immana.

### *Samirneesa woosa keethas kiittida kiita*

<sup>8</sup> “Samirneesa woosa keethaa kiitanchchuwas hayssada yaagada xaafa.

Koyroynne wurssethay, hayqqidayssinne hayoppe denddidayssi hayssada yaagees:

<sup>9</sup> Taani ne waayanne ne manqotethaa erays; gidoshin neeni dure. Ayhude gidonnashin banttana Ayhude geyssati cayaa cashshaa ta erays, shin entti Xalahe maabarun de7oosona. <sup>10</sup> Neeni ekkanaw de7iya waaya babbofa. Xalahey hintte issota is-sota paaccanaw qasho keethan yeggana; tammu gallas gakkanaw hintte waayettana. Hayqqana gakkanaw ammanettidayssa gida; ta new de7o kallachcha immana.

<sup>11</sup> Geeshsha Ayyaanay woosa keethatas giyabaa si7anaw haythi de7iya oonikka si7o. Xooniya oonikka nam77antho hayquwan qohettenna.

### *Pherggamoona woosa keethas kiittida kiita*

<sup>12</sup> “Pherggamoona woosa keethaa kiitanchchuwas hayssada yaagada xaafa.

Nam77ubaggara qarattida mashshi de7eyssi hayssada yaagees: <sup>13</sup> Taani ne de7iya bessaa erays; neeni Xalahe araatay de7iya besson de7aasa; ta sunthaa mintha naagadasa. Hari attoshin, Xalahey de7iya hintte kataman hayqqida taw ammanettida markkay, Antiphaasi, de7iya wodekka ammanuwa aggabaakka.

<sup>14</sup> Gidoshin, ta nena boriya guuthabati de7oosona. Hessika Isra7eele asay eeqas yarshshettida kathaa midi tunana melanne laymatetha nagara oothana mela Baalaqa tamaarssida Balaama timirttiya ekkida issi issi asati neera de7oosona. <sup>15</sup> Hessadakka, Niqoolaweta timirttiya tamaariya asati neera de7oosona. <sup>16</sup> Hessa gisho, neeni ne nagaraappe simma. Hessi hanonna ixxiko, ta neekko ellesa yada he asata ta doonappe keyaa mashshan olana.

<sup>17</sup> Geeshsha Ayyaanay woosa keethatas giyabaa si7anaw haythi de7iya oonikka si7o. Xooniya oddeskka qosettidi de7iya mannaafe\* immana. Qassi ekkiya uraappe attin hara asi eronna ooratha sunthay xaafetida bootha shuchchaa ta iyaw immana.

*Tiyatiroona woosa keethaas kiitettida kiita*

<sup>18</sup> “Tiyatiroona woosa keethaa kiiitanchchuwas hayssada yaagada xaafa.

Tama laco daaniya ayfey de7eyssi, qassi taman seerida naase biraata daaniya tohoy de7eyssi, Xoossaa na7ay, hayssada yaagees: <sup>19</sup> Taani ne oosuwa, ne siiquwa, ne amanuwa, ne oosuwanne ne genccaa erays. Neeni koyro ootheyssafe ha77i aathada ootheyssaka erays.

<sup>20</sup> Gidoshin, ta nena boriya issibay de7ees; bana nabe giya maccasiw, Elzaabelo, aykkoka gabaakka. He maccasiya eeqas yarshshettida kathaa midi tunanaadanne laymatanaadaa oothada ta aylleta balethasu. <sup>21</sup> Iya ba nagaraappe simmana mela ta iw wode immas, shin iya simmanaw koyabuuukku. <sup>22</sup> Entti I bala ogiyappe simmona ixxiko, ta iyo iita harggen yeggana; iira laymateyssatikka iita waaye waayettana. <sup>23</sup> Taani I nayta wodhana; qassi woosa keetha ubbay ta asa qofanne asa wozana ereyssa gideyssa erana. Ta issuwashissuwashintte oosuwada oosuwada immana. <sup>24</sup> Shin Tiyatiroonan de7iya harata, he iita timirittiya ekkiboonnayssatanne, “Xalahe gita xuura” geetettiya ha timirittiya tamaariboonna hinttena hara deexo tooho toossike. <sup>25</sup> Gidoshin, ta yaana gakkanaaw hinttew de7iyabaa minthi naagite.

<sup>26</sup> Xooneyssasinne wurssethi gakkanaaw taw kiitettiya ooddeskka kawotethata haaranana mela maata immana.

<sup>27</sup> ‘Entta biraata xam77an haaranana;  
meqqa miishedakka mentherethana.’

He maatay taani ta aawappe ekkida maata mela. <sup>28</sup> Qassi ta iyaw bakkala xoolintto immana. <sup>29</sup> Geeshsha Ayyaanay woosa keethatas giyabaa si7iya haythi de7iya oonikka si7o.

### 3

*Sarddeesa woosa keethaas kiitettida kiita*

<sup>1</sup> “Sarddeesa woosa keetha kiiitanchchuwas hayssada yaagada xaafa.

Laappun Xoossaa ayyaanatanne laappun xoolinttota oykkidayssi hayssada yaagees: Taani ne oosuwa erays; asi nena paxa de7ees giikkoka, ne hayqqadasa. <sup>2</sup> Barkka! Guutha attidabaanne hayqqanaw matidabaa mintha. Ne oosoy Xoossaa sinthan polo gidonnayssha demmas. <sup>3</sup> Hiza, ne ekkidaabanne si7idabaa akeeka; naaga; ne nagaraappe simma. Neeni barkkonna ixxiko ta kaysoda yaana; ta ay wode yaanekko ne erakka.

<sup>4</sup> Shin bantta ma7uwa qitayonna guutha asati Sarddeesan de7oosona. Enttaw bessiyabaa gidiya gisho bootha ma7o ma77idi taara hamuttana. <sup>5</sup> Xooniya oonikka enttayssada bootha ma7o ma77ana. Taani iya sunthaa de7o maxaafappe quchchike. Taani ta Aawa sinthaninne iya kiiitanchchotta sinthan I tabaa gideyssa markkattana. <sup>6</sup> Geeshsha Ayyaanay woosa keethatas giyabaa si7iya haythi de7iya oonikka si7o.

*Filaadelfiya woosa keethaas kiitettida kiita*

<sup>7</sup> “Filaadelfiya woosa keetha kiiitanchchuwas hayssada yaagada xaafa.

Geeshshaygne tumanchchoy, Dawite qulppiya ba kushen oykkidayssi, hayssada yaagees: i gorddin oonikka dooyanaw dandda7enna; qassi I dooyin oonikka gorddanaw dandda7enna. <sup>8</sup> Taani ne oosuwa eras; hekko ta ne sinthan oonikka gorddanaw dandda7onna dooya pengge wothas. Ne wolqqay guutha gidikkoka, ta qaalaan naagadasa; tana kaddabaakka. <sup>9</sup> Ayhude gidonnashin banttana Ayhude giya worddotanne Xalahe baggata neekko elhanne ne sinthan gulbbatisana. Ta nena doseyssa enttana erisana. <sup>10</sup> Neeni, ‘Gencca’ gada ta kiittida kiiata naagida gisho kumetha alamiya paccanaw yaa waaye wodiyappe taani nena naagana.

<sup>11</sup> Taani ellesada yaana; oonikka ne kallachchaa ekkonna mela new de7iyabaa minthada oykka. <sup>12</sup> Xoonidayssa ta Xoossa Keethan tuussu oothana; i yan merinaw daana. Taani ta Xoossaa sunthaanne ta Xoossaa katamaa sunthaa iya bolla xaafana; iyakka ta Xoossaa matappe wodhdhiya ooratha Yerusalem. Qassi ta ta ooratha sunthaaka i bolla xaafana. <sup>13</sup> Geeshsha Ayyaanay woosa keethatas giyabaa si7iya haythi de7iya oonikka si7o.

\* **2:17** Manna: Isra7eele asay bazzo biittan hamuttiya wode saloppe Xoossay enttaw immida dumma kathi woykko kiiitanchcho kathi.   **2:17** Kessa 16:14   **2:20** 1Kawo 16:31; 2Kawo 9:22   **2:23** Maz 7:9; Er 17:10; Maz 62:12

**2:26** Maz 2:8-9   **3:3** Maato 24:43   **3:5** Kessa 32:32   **3:7** Isa 22:22; Iyo 12:14   **3:9** Isa 49:23; 60:14; Isa 43:4

**3:12** Yo.Qo 21:2; Isa 62:2; 65:15

*Loodoqiya woosa keethaas kiitettida kiita*

<sup>14</sup> "Loodoqiya woosa keetha kiitanchchuwas hayssada yaagada xaafa.

'Amin77i' gidida ammanettida tuma markkay, Xoossaa medhetethaa haareyssi hayssada yaagees: <sup>15</sup> Taani ne oosuwa ubbaa erays; neeni irxxa woykko misha gidakka; neeni nam77aafe issuuwa gidikko lo77o! <sup>16</sup> Neeni irxxa woykko misha gidonnashin bol77o gidiya gisho ta nena ta doonappe cuttana hanays. <sup>17</sup> Hiza, neeni, 'Taani dure, shallora de7ays, taw ayibabaykka paccibeenna' yaagasa. Shin neeni metootanchcho, mango, qooqenne kallotida asi gideyssaa erakka. <sup>18</sup> Hessa gisho, ne duretanaw taman geeyida worqqa, ne yeella kalluwa kammanaw bootha ma7onne loytha xeellanaw maaddiya ayfe dhale taappe shammana mela nena zorays.

<sup>19</sup> Ta dooseyssa seeraysinne hanqays; hiza minna; ne nagaraappe simma. <sup>20</sup> Hekko, ta karen eqqada xeeqays. Oonikka ta xeessaa si7idi, wulaa dooyikko, iyaakkko gelana; iyara issife kathi maana; ikka taara issife maana.

<sup>21</sup> Ta xoonada ta Aawara iya araatan uttidayssada xooniday taara ta araatan uttana mela maata immana. <sup>22</sup> Geeshsha Ayyaanay woosa keethatas giyabaa si7iya haythi de7ey oonikka si7o" yaagis.

**4***Salon de7iya goynno wogaa*

<sup>1</sup> Hessafe guye, taani salo xeelliya wode dooyettida pengge be7as. Qassi ta kase si7ida moyze girssaa melay taakko, "Ha keya; hayssafe guye, hananaw de7iyabaa ta nena bessana" yaagis. <sup>2</sup> He wode ta Ayyaanay haarettada de7ays. Hekko, saluwan araata bolla issyo uttidayssa be7as. <sup>3</sup> He uttidayssa malay iyaspheenedne sarddiyoona giya al77o shuchchaa mela. Iya araata yuushuwan laatamanne oyddu Araataati de7oosona; entta bolla bootha ma70 ma77idi, huu7en worqqa kallachchaa wothida laatamanne oyddu cimati uttidosona. <sup>5</sup> Araatappae wol77anthi, guunthinne deshoy keyees. Araata sinthan laappun poot7iya xomppeti de7oosona; entti laappun Xoossaa ayyaanata. <sup>6</sup> Araata sinthan birille daaniya phooliya burccukko abbay de7ees.

Sinharanne guyera ayfey de7iya oyddu de7ora de7iya medhetethati araata yuushuwaninnee araata giddon de7oosona. <sup>7</sup> Koyro medhetethaa medhoy gaammo daanees; nam77anthoy boori daanees; heedzanthoy ase daanees; qassi oyddanthoy piradhdhiya argganthi daanees. <sup>8</sup> Oyddu medhetethata ubbaas usuppus qefey de7ees; entta asatetha ubbay ayfen kumis. Entti qammanne gallas qanxonna,

"Geeshshaw, geeshshaw, geeshshaw,  
Godaw, Ubbaafe Wolqqaama Xoossaw,  
kasekka, ha77ika de7eyssso, sinthafe yaanayssso"

yaagoosona. <sup>9</sup> He medhetethati araatan uttidayssasinne merinaw de7eyssas saba, bonchchonne galata immida wode <sup>10</sup> laatamanne oyddu cimati araatan uttidayssanne merinaw de7eyssaa sinthan gufannidi goynnidosona; bantta kallachchaa araata sinthan wothidi,

<sup>11</sup> "Nu Godaw, nu Xoossaw,

neeni bonchcho, sabanne wolqqa ekkanaw bessaasa.

Neeni ubbaa medhdhadasa;

ubbabay ne sheniyada hanis, medhettis"

yaagidosona.

**5***Dorssay xaatha maxaafaa dooyis*

<sup>1</sup> Hessafe guye, araata bolla uttidayssa ushachcha kushen giddoranne karera xaaftida laappun maatamen gorddettida xaatha maxaafaa be7as. <sup>2</sup> Issi mino kiitanchchoy ba qaala dhoqgu oothidi, "Maatamiya billanawunne maxaafaa dooyanaw bessey oonee?" yaagidi awaajjishin be7as. <sup>3</sup> Shin salon gidin sa7an woykko sa7appe garssan gidin he xaatha maxaafaa billanawunne gidduwa be7anaw dandda7ey oonikka benttibeenna. <sup>4</sup> Xaatha maxaafaa billanawunne iya gidduwa be7anaw bessiya asi dhayida gisho ta daro yekkas. <sup>5</sup> Yaatin, cimatappe issov taakko, "Yeekkofa! Hekko, Yihuda zerethi gidiya gaammoy, Dawite sheeshay, laappun maatameta billanawunne maxaafaa dooyanaw dandda7is" yaagis.

<sup>6</sup> Hessafe guye, shukettida Dorssay araatas, oyddu de7on de7iya medhetethatasinne cimatas giddon, eqqidayssa be7as. Iyaw laappun kacetinne laappun ayfeti de7oosona. Hessati sa7a ubbaa kiittida Xoossaa laappun ayyaanata. <sup>7</sup> He Dorssay bidi, araata bolla uttidayssa ushachcha kusheppe xaatha maxaafaa ekkis. <sup>8</sup> I he xaatha maxaafaa ekkida wode de7on de7iya oyddu medhetethatinne laatamanne oyddu cimati Dorssa sinthan kunddidosona. Entti issyo issyo diithinne geeshshata woosaa gidida ixaaney kumida worqqa shaate oykkidosona. <sup>9</sup> Entti,

“Xaatha maxaafaa ekkanaw,

maatamiya billanaw new bessees.

Ays giikko, neeni shukettadasa;

zerethi ubbaafe, dumma dumma doonappe,  
yaratappenne kawotethata ubbaafe  
ne suuthan Xoossaas wozadasa.

<sup>10</sup> Entti iya Xoossaas Aawas oothana mela  
enttana kahine kawotethi oothadasa.

Enttika biitta ubbaa haarana”

yaagidi ooratha mazmure yexxidosona.

<sup>11</sup> Ta be7iya wode mukulu toho mukulunne tammu mukulu toho tammu mukulu gidiya kiitanchchota girssaa si7as. Enttika araataa, oyddu de7on de7iya medhetethatanne, cimata yuushwan eqqidosona. <sup>12</sup> He kiitanchchoti dhoqqu gida qaalan, “Shukettida Dorssay wolqqaa, duretethi,

cinccatethinne minutethi,  
bonchcho, sabanne galataa ekkanaw bessees”

yaagidosona.

<sup>13</sup> Hessafe guye, sa7an, salon, sa7appe garssaninne abbaa giddon de7iya medhetethi ubbay,

“Araata bolla uttidayssassinne Dorssas,  
galatay, bonchchoy, sabaynne wolqqay

meri merinaw gido”

yaagidi yexxishin si7as.

<sup>14</sup> Oyddu de7on de7iya medhetethati, “Amin77i” yaagidosona; qassi cimati gufannidi goynnidosona.

## 6

### *Maatamiya dooyetethaa*

<sup>1</sup> Dorssay laappun maatamiyappe issuwa dooyishin be7as. Qassi oyddu de7on de7iya medhetethatapppe issyo, dada desho girssan, “Haaya!” yaagishin si7as. <sup>2</sup> Hekko bootha paraa be7as. He paraa toggidasi dongge oykkis; iya huu7en kallachchi de7ees. Ikka xoonishe xoonanaw keyis.

<sup>3</sup> Qassi dorssay nam77antho maatamiya dooyida wode de7on de7iya nam77antho medhetethay, “Haaya!” yaagishin si7as. <sup>4</sup> Qassi hara siha zo7o pari keyis. He paraa toggidayssas sa7appe saro dhayssana melanne asay woli wurssana mela maatinne gita mashshi imettis.

<sup>5</sup> Dorssay heedzanthro maatamiya dooyida wode de7on de7iya heedzanthro medhetethay, “Haaya!” yaagishin si7as. Hekko kareetha para be7as; ikka ba kushen mizaane oykkis. <sup>6</sup> Oyddu de7on de7iya medhetethata giddofe, “Issi gallasa oosos damooze, bagga kilo giste; qassi issi gallasa oosos damooze, issi kilonne bagga bangga gido. Shin zaytiyanne woyniya qohoppa” yaagishin si7as.

<sup>7</sup> Dorssay oyddantho maatamiya dooyida wode oyddantho de7on de7iya medhetethay, “Haaya!” yaagishin si7as. <sup>8</sup> Hekko wancco para be7as. He paraa toggidayssa sunthay hayqo; iya geedo Si7ooleya kaallees. Enttaw alamepppe oyddantho kushiya olan, koshan, gadoninne do7an wodhisana mela maati imettis.

<sup>9</sup> Dorssay ichchashantho maatamiya dooyida wode entti Xoossaas qaala odida gishonne bannta markkatethan ammanettida gisho shukettida asaa shemppota yarshsho bessaafe garssan be7as. <sup>10</sup> Entti bannta qaala dhoqqu oothidi, “Ubbaa haariya Godaw, geeshshaw, tumanchchuwaw, sa7an de7iya asaa bolla ne pirddanaynne nu suuthaa gisho halo keyanay awude?” yaagidosona. <sup>11</sup> Entta issuwashas issuwashas bootha ma7oy imettis. Enttayssada hanidi hayqqanaw bessiya entta laggeta tayboy kumana gakkanaw guutha wode shemppana mela enttaw odettis.

<sup>12</sup> Dorssay usupuntha maatamiya dooyida wode ta be7as; wolqqaama biitta qaaxoy hanis. Awaa ayfey kaarexidi kalle daanis. Ageenaykka zo77idi suuthu daanis. <sup>13</sup> Wolqqaama carkkoy carkkidi balase mitha qawu7e ayfiyaa qoqqofeyssada saluwa xoolinttoti sa7an qoqqofettidosona. <sup>14</sup> Saloy xaatha maxaafada xaaxettidi aadhdhis; zumaynne abban tegettida biittati bantta bessaafe dhayidosona. <sup>15</sup> Biitta kawoti, deriya haareyssati, olla kaaletheyssati, dureti, wolqqaamatii, aylleтинne, womaannoti gonggoloninne deriya bolla de7iya zaalla hom77on qosettidosona. <sup>16</sup> Enttika zumaakkonne zaallako, “Nu bolla wodhdhite; nuna qosite; araatan uttidayssa ayfiyaappenne Dorssa hanquwafe nuna genthite. <sup>17</sup> Hiza, gita hanqo gallasay gakkis; oone dandda7idi eqyanay?” yaagidosona.

## 7

*144,000 asata bolla maatamey wosettis*

<sup>1</sup> Hessafe guye, oyddu kiitanchchoti oyddu sa7aa gaxan eqqidayssata be7as. He kiitanchchoti sa7a bolla woykko abbaa bolla woykko ay mitha bolla carkkoy oyddu sa7aa gaxappe carkkonna mela teqqidosona. <sup>2</sup> Qassi de7o Xoossaa maatamiya oykkida hara kiitanchchoy doloha baggafe keyeyssa be7as. He kiitanchchoy ba qaala dhoqqu oothidi, sa7aanne abbaa qohanaw wolqqi imettida oyddu kiitanchchota, <sup>3</sup> xeegidi, “Nuuni Xoossaa aylleta som77on maatamiya wothana gakkanaaw biittaa woykko abbaa woykko mithaa qohoppite” yaagis.

<sup>4</sup> Yaatin, taani Xoossaa maatamey som77on wosettidayssata payduwa si7as. Isra7eele mayzata ubbaafe xeetanne oytamanne oyddu mukulu asaas som77on maatame wothis.

<sup>5</sup> Yihuda zerethaafe tammanne nam77u mukulu,  
Roobela zerethaafe tammanne nam77u mukulu,  
Gaade zerethaafe tammanne nam77u mukulu,  
<sup>6</sup> Aseere zerethaafe tammanne nam77u mukulu,  
Niftaleeme zerethaafe tammanne nam77u mukulu,  
Minaase zerethaafe tammanne nam77u mukulu,  
<sup>7</sup> Simoona zerethaafe tammanne nam77u mukulu;  
Leewe zerethaafe tammanne nam77u mukulu,  
Yisaakore zerethaafe tammanne nam77u mukulu,  
<sup>8</sup> Zaabiloone zerethaafe tammanne nam77u mukulu,  
Yoosefa zerethaafe tammanne nam77u mukulu,  
Biniyame zerethaafe tammanne nam77u mukulu,  
asaaa som77on maatame wothis.

*Bootha ma7o ma77ida daro asata*

<sup>9</sup> Hessafe guye, zerethi ubbaafe, kawotetha ubbaafe, yara ubbaafenne dumma dumma doonappe zawi baynna daro asaa be7as. He asay bootha ma7o ma77idi, zambba haythi bantta kushen oykkidi, araata sinthaninne Dorssa sinthan eqqidosona. <sup>10</sup> Entti bantta qaala dhoqqu oothidi, “Atotethay araatan uttida nu Xoossaafenne Dorssafe yees” yaagidosona.

<sup>11</sup> Kiitanchchoti ubbay, araataa, cimatanne oyddu medhetethata yuushuwan eqqidosona. Entti araata sinthan gufannidi Xoossaa goynnidosona.

<sup>12</sup> “Amin77i!

Anjjoy, bonchchoy, cincatethay, galatay, sabay  
wolqqay, minotethay meri merinaw  
nu Xoossaas gido.  
Amin77i!”  
yaagidosona.

<sup>13</sup> Cimatappe issyo taakko, “Ha bootha ma7uwa ma77ida asati oonantee? Entti awuppe yidona?” yaagidi oychchis.

<sup>14</sup> Taani zaarada, “Godaw, ne eraasa” yaagis.

Ikka taakko, “Hayssati daro waaye waayidi aadhdhidayssata. Entti bantta ma7uwa Dorssaa suuthan meeccidi geeshshidosona. <sup>15</sup> Hessa gisho,  
entti Xoossaa araata sinthan gididi

qammanne gallas iya keethan ooothoosona.

Qassi araata bolla uttidayssi enttaw kuya gidana.

<sup>16</sup> Hizappe guye, entti koshattokona, saamottokona.

Awi woykko mishi entta meenna.

17 Araata giddon uttida Dorssay entta heemmana.  
De7o pultto haathako entta kaalethana.  
Xoossay entta ayfiyaappe afutha ubbaa quchchana”  
yaagis.

## 8

### *Laappuntha maatamey dooyettis*

<sup>1</sup> Dorssay laappuntha maatamiya dooyida wode bagga saate gideyssa mela saloy si77i gis.

<sup>2</sup> Hessafe guye, taani laappun moyzeti imettida laappun kiitanchchota Xoossa sinthan eqqidayssata be7as.

<sup>3</sup> Ixaane cuyisiya worqqa shaate oykkida hara kiitanchchoy yidi, yarshsho bessaa matan eqqis. I araata sinthan de7iya worqqa yarshsho bessaa bolla geeshshata ubbaa woosaara gujjidi yarshshana mela iyaw daro ixaaney imettis. <sup>4</sup> Ixaaniya cuyay geeshshata woosaara issife kiitanchchuwa kusheppe pude Xoossaakko keyis. <sup>5</sup> Hessafe guye, kiitanchchoy ixaane cuyisiya shaatiya ekkidi, iyan yarshsho bessaafe bonqqa tama kunthidi sa7a duge holis. Yaatin deshoy, wol77anthi, girssinne biitta qaaxoy hanis.

### *Laappun moyzeta*

<sup>6</sup> Hessafe guye, laappun kiitanchchoti bantta moyziya punnanaw giigettidosona.

<sup>7</sup> Koyro kiitanchchoy ba moyziya punniya wode shachchinne suuthara walakettida tami saloppe bukkis. Sa7aappe sikkoy xuugettis; mithaafe sikkoy xuugettis; cil77o maata ubbay xuugettis.

<sup>8</sup> Nam77antho kiitanchchoy ba moyziya punnida wode wolqqaama dere daaniyabay taman eexishe abban yegettis. Yaatin, abbaafe sikkoy suuthu gidis. <sup>9</sup> Abban de7on de7iya medhetethaafe sikkoy hayqqis; markkabetappe sikkoy dhays.

<sup>10</sup> Heedzanthro kiitanchchoy ba moyziya punnida wode xomppeda eexiya wolqqaama xoolinttoy shaafappe sikkwu bollanne pulttota bolla saloppe wodhdhis. <sup>11</sup> He xoolinttuwa sunthay Camo geetettes. Haathaafe sikkwu camisis; haathay cammida gisho daro asay he haathaa uyidi hayqqidosona.

<sup>12</sup> Oyddantho kiitanchchoy ba moyziya punnis. Awaappe, ageenaappenne xoolinttowappe sikkwu dechchis; entta poo7uwappe sikkoy dhumi. Gallasaappe sikkoy, qammaafekka sikkoy dhumi.

<sup>13</sup> Issi arganthi salo dhoqqu gidi, piradhishin be7as. He arganthay ba qaala dhoqqu oothidi, “Attida heedzu kiitanchchoti bantta moyziya punnanaw de7iya gisho sa7an de7iya asaa ayye! Ayye! Ayye!” yaagishin si7as.

## 9

<sup>1</sup> Hessafe guye, ichhashantho kiitanchchoy ba moyziya punnin saloppe duge sa7a kundidida xoolintto be7as. He xoolinttuwas wolqqaama ollaq qulppay imettis. <sup>2</sup> Xoolinttoy ollaa dooyida wode dalgga coocepppe keyaa cuya mela cuyay he ollaafe keyis. He ollaafe keyida cuyan awaynnne saloy dhumidosona.

<sup>3</sup> He cuyappe booley keyidi sa7an wodhdhis. Sa7an de7iya kornnetas de7iya wolqqaa mela wolqqi booletas imettis. <sup>4</sup> Xoossa maatamey som77on baynna asaa xalaalappe attin sa7an de7iya maata woykko mithi woykko ay cil77obaa gidin qohonna mela booletas odettis. <sup>5</sup> Booleti asaa ichhashu ageena gakkaw paxa kaa7ana mela maati imettispe attin asaa wodhana mela gidenna. Kornney ase dukkin zaameyssa mela booley dukkidi zaamisees. <sup>6</sup> He gallasatan asay hayqo koyana, shin demmenna. Entti hayqqanaw amottana, shin hayqoy enttafe haakkana.

<sup>7</sup> Booley olas giigi uttida para daanees. Booliya huu7en worqqa kallachchi de7ees; entta som77oykka asa som77o daanees. <sup>8</sup> Iya binaanay maccasa binaana mela adusse. Entta achchaykka gaammo achchi daanees. <sup>9</sup> Enttaw tira bolla wothiya biraata xururey de7ees; entta qefiya girssay olettanaw gaallabiya paranne para gaare girssaa mela. <sup>10</sup> Enttaw kornne goyna daaniya goyninne dukkiya yiishshi de7ees. He goynan ichhashu ageena asaa qohana mela maati imettis. <sup>11</sup> Enttana haariya kawoy de7ees; he kawoy olla kiitanchchuwa. Iya sunthay Ibraysxe doonan Abddoona; qassi Girike doonan Apholiyoona geetettes. Iya sunthaa birshshethay “Dhaysseyssa” guussu.

<sup>12</sup> Koyer ayyey aadhdhis; hekko, buroo hara nam77u ayyeti eeson hanana.

<sup>13</sup> Usuppuntha kiitanchchoy ba moyziya punnis. Xoossa sinthan eqqida, worqqa yarshho bessan de7iya oyddu kacetappe issi girssi si7as. <sup>14</sup> He girssay moyze oykkida usuppuntha kiitanchchuwako, “Efiraxiise giya gita shaafan qashettida oyddu kiitanchchota birshsha” yaagis. <sup>15</sup> Biitta bolla de7iya asaappe sikkwu wodhana mela he saatiyas, he gallasaas, he ageenasinne he laythas giigidi uttida oyddu kiitanchchoti birshshettidosona. <sup>16</sup> Ola paraa toggiya olanchchota paydoy daro xeetu miloone gideysa si7as.

<sup>17</sup> Qassi ta qonccethan paratanne he parata toggida asaa be7as. He asay tiran wothiya biraata xururey tama bonqqa mela zo7o, yaakintte mela, kaaretha kalose melanne diinne mela ciliilo. Parata huu7ey gaammo huu7e mela; entta doonappe tami, cuyinne diinney keyis. <sup>18</sup> Parata doonappe keyida taman, cuyaninne dinniyan he heedzu gadotan sa7an de7iya asaappe sikkoy hayqqis. <sup>19</sup> He parata wolqqay entta doona giddoninne goynan de7ees. Entta goynaykka shoosha huu7e mela; entti iyara asaa qohoosona.

<sup>20</sup> Ha gadotappe attidayssati bantta kushe oosuwappe simmibookkonna. Entti tuna ayaanan worqqafe, birappe, naase biraatappenne shuchchafe oosettida eeqas goynnosona. Xeellanaw, si7anaw, hamuttanaw dandda7onna eeqatas goynneyssa aggibookona. <sup>21</sup> Asay wodheyssa, biteyssa, laymateyssanne kayseyssa aggidi maarota oychchibookkona.

## 10

### *Kiitanchchuwanne guutha maxaafaa*

<sup>1</sup> Hessafe guye, ta hara wolqqaama kiitanchchoy saloppe sa7a wodhdhishin be7as. I shaara ma77is; iya huu7iya bolla zuullay de7ees. Iya som77oy awa mela; iya tohoy tama tuussa mela. <sup>2</sup> He kiitanchchoy dooya de7iya issi guutha xaatha maxaafaa ba kushen oykkidi, ba ushachcha tohuwa abbaa bolla, ba haddirissa tohuwa biitta bolla essis. <sup>3</sup> Gudiya gaammoda ba qaala dhoqqu oothidi waassis. I waassida wode laappun dadati bantta guunthassa sissidosona.

<sup>4</sup> Laappun dadati odettida wode ta xaafanaw giigettas. Shin saloppe, “Laappun dadati odidayssa maatamen gorddave attin xaafooppa” yaagiya girssaa si7as.

<sup>5</sup> Yaatidi, abbaa bollanne biittaa bolla eqqida, ta be7ida kiitanchchoy, ba ushachcha kushiya salo pude miccis. <sup>6</sup> I miccidii saloninne iya giddon de7iya ubbaa, sa7aninne iya giddon de7iya ubbaa, abbaanne iya giddon de7iya ubbaa medhdhida, merinaw de7iya Xoossa sunthan caaqqidi, “Hizappe guye, Xoossay gam77enna. <sup>7</sup> Shin laappuntha kiitanchchoy ba moyziya punniya wode Xoossay ba aylle gidida nabeta baggara qonccisida xuura qofay polettana” yaagis.

<sup>8</sup> Hessafe guye, abbaa bollanne biittaa bolla eqqidi, “Iya kushen dooyettidi de7iya xaatha maxaafaa kiitanchchuwa kusheppa ekka” yaagidi nam77antho taw odishin si7as.

<sup>9</sup> Taani he kiitanchchuwako bada, guutha xaatha maxaafaa imma gada oychchas. I taakko, “Ekkada ma; I ne ulon cammana, shin ne doonan eessada mal77ana” yaagis.

<sup>10</sup> Taani kiitanchchuwa kusheppa he guutha xaatha maxaafaa ekkada mas; ta doonan eessada mal77is, shin ta ulon cammis. <sup>11</sup> Hessafe guye, taakko, “Neeni yara ubbaas, dere ubbaas, dumma dumma doonan odetteyssatasinne kawotas tinbbite zaara odanaw bessees” yaagis.

## 11

### *Nam77u markkatta*

<sup>1</sup> Hessafe guye, taw wadha xam77a immidi, “Bada Xoossa Keethanne yarshho bessaa wadhdha; yan goynniya asatakka payda. <sup>2</sup> Shin Xoossa Keetha kare dabaabay Ayhude gidonna asaas imettida gisho wadhdhonna aggaaga. Ayhude gidonna asay geeshsha kammaa oytamanne nam77u ageena haaranra. <sup>3</sup> Taani kalle ma77ida ta nam77u markkatta kiittana; entti 1260 gallas tinbbite odana” yaagis.

<sup>4</sup> He nam77u markkati alamiya Godaa sinthan eqqiya nam77u shamaho mithatanne nam77u xomppe wothiya kocata. <sup>5</sup> Oonikka entta qohanaw koykko entta doonappe tami keyidi, entta morkketa dhayssees. Entta qohanaw koyaa oonikka hessada hayqqana.

<sup>6</sup> Entti tinbbite odiya wode iri bukkonna mela saluwa gorddanaw enttaw maati de7ees. Enttaw haathe suuthi kessianaw, qassi entti koyida mela biittaa dumma dumma gadon dhayssanaw enttaw maati de7ees.

<sup>7</sup> Entti bantta markkatethaa onggidaappe guye, ollaafe keyaa do7ay enttana olana. He do7ay entta xoonana; wodhana. <sup>8</sup> Entta Goday masqaliya bolla kagettida gita katamaa ogiya bolla entta ahay yegettana. He katamay leemison Soodome woykko Gibxxe geetetti xeegettees. <sup>9</sup> Qassi zerehti ubbaafe, yara ubbaafe, dumma dumma doonappenne kawotethi ubbaafe yida asay entta ahaa heedzu gallasinne bagga gakkaw be7ana. Entta ahay moogetttona mela asay diggana. <sup>10</sup> Ha nam77u nabeti sa7an de7iya asaa waaysida gisho asay entta hayquwan ufayttana. Bantta ufayssaa bessanaw issoy issuwas imota immana.

<sup>11</sup> Heedzu gallasinne baggafe guye, de7o ayyaanay Xoossaas matappe yidi enttan gelin, entti denddi eqqidosona. Entta be7ida ubbay gita yashshi yayyidosona. <sup>12</sup> Hessafe guye, he nam77u nabeti, "Haa pude keyite" giya qaala saloppe si7idosona. Entta morkketi enttana be7ishin, entti shaaran gelidi pude salo bidosona.

<sup>13</sup> He saatyan biittay wolqqaama qaaxo qaaxxin, katamaappe tammantho kushey dhays. Qassi biitta qaaxon laappun mukulu asay hayqqis. Attida asay daro kokkoridi babbidi; salo Xoossaas bonchcho immidosona.

<sup>14</sup> Nam77antho ayyey aadhahis, shin hekko heedzanthe ayyey eeson yaana.

### *Laappuntha moyziya*

<sup>15</sup> Laappuntha kiitanchchoy ba moyziya punnis. Saloppe, "Sa7aa kawotethay nu Godaasinne Kiristtoosas gidis; I merinaappe merinaa gakkaw haarana" yaagiya wolqqaama qaalay si7ettis. <sup>16</sup> Yaatin, Xoossaas sinthan, bantta araatan uttida laatamanne oyddu cimati gufannidi, Xoossaas goynnidi,

<sup>17</sup> "Ha77ika kasekka de7eyso,

Godaw, Ubbaafe Wolqqaama Xoossaw,  
neeni gita wolqqaao oykkadasa.

Neeni haaranaw doomida gisho  
nuuni nena galatoos.

<sup>18</sup> Ayhude gidonna asay hanqettidosona,  
shin ne hanqoy yis.

Hayqqidayssata bolla ne pirddiwaye wodey yis.

Neeni ne aylleta, nabetas

geeshshatasinne ne sunthaas yayyeysatas,  
guuthatasinne gitatas, entta oosuwada immiya wodey gakkis.

Alamiya dhayseyssata dhayssia wodey yis"  
yaagidosona.

<sup>19</sup> Salon de7iya Xoossa Keethay dooyettis; iya giddon Xoossaas caaqtu taabotey benttis. Qassi wol77anthi wol77ammis, deshoy dechchis; dadi dhuuqqis; biitti qaaxxis; shachchi bukkis.

## 12

### *Maccasiwunne dawiya*

<sup>1</sup> Hessafe guye, salon wolqqaama malaati benttis. Awaa ma77ada, ageena bolla eqqada, tamanne nam77u xoolintto kallachcha ba huu7en wothida de7iya, issi maccasiya benttasu. <sup>2</sup> He maccasiya qantheshin, iyo iqethi oykkin un77ettada waassasu.

<sup>3</sup> Qassi hara malaati salon benttis. Laappun huu7etinne tammu kaceti de7iya gita zo7o dawey benttis. I ba huu7eta bolla laappun kallachcha wothis. <sup>4</sup> He dawey ba goynan xoolinttotappe sikkwa saloppe dafidi sa7an yeggis. He dawey na7ay yeleti wodhdhida mela mittanaw koyidi, yelanaw eqettiya maccase sinthan eqqis.

<sup>5</sup> He maccasiya kawotethaa ubbaa biraata xam77an haaranaw de7iya adde na7a yelasu. Na7ay Xoossaakonne iya araatakkoo pude ekettis. <sup>6</sup> Maccasiya 1260 gallas gakkaw iyo naagana mela Xoossay iw giigisi wothida bessaa bazzo biitta baqatasu.

<sup>7</sup> Salon oli medhettis. Mika7eeley ba kiitanchchotara dawiyara olettis; dawey ba kiitanchchotara gididi zaari olettis. <sup>8</sup> Shin dawey xoonettidi salon enttaw de7iya bessi dhayidosona. <sup>9</sup> Gita dawey, beni shooshay, sa7an yegettis. Ikka Daabulosa woykko Xalahe geetettiya alamiya baletaysssa. I ba kiitanchchotara issife duge alamiya yegettis.

<sup>10</sup> Hessafe guye, salon hayssada yaagiya qaala si7as.

"Ha77i atotethay, wolqqaynne kawotethay, nu Xoossassa;  
maatay Kiristtoosas gidis.

Hiza, qammanne gallas Xoossaa sinthan,  
nu ishata mooteyssi saloppe duge holettis.

<sup>11</sup> Entti dorssa suuthaaninne bantta markkatethaa qaalan,  
iya olidi xoonidosona.

Entti bantta shemppuwash misherottonna  
banttana haygos aathi immidosona.

<sup>12</sup> Hessa gisho, saloninne iya giddon de7eyssato ufayttite.  
Shin biittaanne abbaa ayte!

Hiza, Xalahey baw guutha wodey attidayssa erida gisho  
wolqqaama hanqon hintteko wodhdhis”

yaagis.

<sup>13</sup> Qassi dawey bana sa7a yeggidayssa be7ida wode adde na7a yelida maccasiw goodis.

<sup>14</sup> Maccasiw shooshay qohonna mela heedzu laythinne bagga mashenne uyashe iya naagettiya bessi bazzo biitta piradhdhada baana mela nam77u wolqqaama argantha qefey iw imettis.

<sup>15</sup> Yaatidi, maccasiw di7oy di77idi efana mela dawey shaafa haatha mela ba doonappe maccase guyera cooyis. <sup>16</sup> Shin biittay maccasiw maaddis; biittay ba doona dooyidi dawiya doonappe keyida haathaa mittis. <sup>17</sup> He dawey maccase bolla daro hangettidi, I zerethata, Xoossaa kiitaa naageyssatanne Yesuusi qonccisida tumaas ammanettidayssata olanaw bidi. <sup>18</sup> abbaa gaxan de7iya shafiyen eqqis.

## 13

### Nam77u do7ata

<sup>1</sup> Hessafe guye, issi do7ay abbaafe keyishin be7as. Iyaw tammu kaceynne laappun huu7ey de7ees. He tammu kaceta bolla tammu kallachchati de7oosona. He huu7eta bolla Xoossaa cashsha sunthati xaafettidi uttis. <sup>2</sup> Ta be7ida do7ay maahe daanees; iya tohoy babbanta toho mela; iya doonaykka gaammo doona daanees. Dawey ba wolqqa, ba araatanne ba gita maataas he do7aas immis.

<sup>3</sup> He do7aa huu7iyappe issuwa bolla hayqos gathiya madunthi be7as, shin he madunthay paxis. Alamiya asa ubbay malaalettidi he do7aa kaallis. <sup>4</sup> Dawey ba maataas do7aas immida gisho asa ubbay dawiya goynnidosona. Qassi asay, “Do7aa meli oonee? Iyara olettanaw dandda7ey oonee?” yaagidi do7aas goynnidosona.

<sup>5</sup> He do7aas otorttana melanne cayana mela dooni imettis; oytamanne nam77u ageena haarana mela maati iyaw imettis. <sup>6</sup> He do7ay Xoossaa, iya sunthaa, I de7iya bessaanne salon de7iya ubbaa qanggethi oykkis. <sup>7</sup> He do7ay geeshshatara olettidi, enttana xoonan mela wolqqi iyaw imettis. Yara ubbaa, dere ubbaa, dumma dumma doona ubbaa bollanne zerethi ubbaa bolla maati iyaw imettis. <sup>8</sup> Alamey medhettosappe doomidi, shukettida Dorssaa de7o maxaafan entta sunthay xaafetttona ha sa7an de7iya asa ubbay he do7aas goynnana.

<sup>9</sup> Si7iya haythi de7iya asi si7o. <sup>10</sup> Oonikka di7ettanaw de7ey di7ettees. Mashshan hayqqanaw de7ey mashshan shukettana. Hessankka geeshshata dandda7aynne ammanoy erettana.

<sup>11</sup> Qassika, hara do7i sa7appe keyishin be7as. Iyaw dorssa kace daaniya nam77u kacey de7ees; iya haasayay daweyssa mela. <sup>12</sup> He do7ay koyro do7aa bessan, iya maatan oothees. Ikka hayqos gathiya madunthaafe paxida koyro do7aas; biittan de7iya asa ubbay goyinnana mela oothees. <sup>13</sup> He nam77antho do7ay hari attoshin, tama saloppe asa ubbaa sinthan wodhisana gakkanaw gita malaataatan oothis. <sup>14</sup> Koyro do7aa bessan oothana mela, iyaw imettida malaataatan sa7an de7iya asa ubbaa I balethis. Mashshan madunxidi paxida do7aa bonchchos misile giigisana mela enttana kiittis. <sup>15</sup> Nam77antho do7ay koyro do7aa misiliyas shemppo immidi odettana melanne iyaw goynnonayssati hayqqana mela oothiya maati imettis.

<sup>16</sup> He nam77antho do7ay gitinne guuthi, manqoynne durey, womaanoyynne aylley ba ushachcha kushen woykko ba som77on malla wothana mela oothis. <sup>17</sup> He do7aa sunthay woykko iya sunthaa payduwa mallay baynna asi oonikka bayzanawunne shammanaw dandda7enna.

<sup>18</sup> Cinccatethi koshshey hessana. Eratethi de7iya oonikka he do7aa payduwa birshethaa ero; he paydoy asa sunthi. He paydoy usuppus xeetanne usuppus tammanne usuppusa.

## 14

### *Dorssaanne 144,000 asaa*

<sup>1</sup> Hessafe guye, Dorssay Xiyonee Deriya bolla eqqidayssa be7as. Iyara iya sunthaynne iya Aawa sunthay entta som77on xaafettida, 144,000 asay de7ees. <sup>2</sup> Saloppe gita haatha guunthunne dada guunthu daaniya wolqqaama girssi si7as. Qassi ta si7ida girssay diithi diixishin si7ettiya girssaa mela. <sup>3</sup> 144,000 asay araata sinthan, oyddu de7on de7iya medhetethata sinthaninne cimata sinthan eqqidi enttafe hara oonikka tamaaranaw dandda7onna ooratha mazmure yexxidosona. <sup>4</sup> Hayssati maccasara banttana tunisonna naagida geeshshata. Entti dorssay biyaso ubbaa kaaloosona. Entti Xoossaasinne Dorssaas bayra gididi, shiiqanaw sa7a asaa giddofe wozettidosona. <sup>5</sup> Entti worddoynne borey baynna asata.

### *Heedzu kiitanchchota*

<sup>6</sup> Hessafe guye, merinaa Wonggelaa sa7a bolla de7iya kawotethaa ubbaas, zerethi ubbaas, yara ubbaasinne dumma dumma doona ubbaas markkattanaw salora piradhdhiya hara kiitanchcho be7as. <sup>7</sup> He kiitanchchoy ba qaala dhoqqu oothidi, “Xoossay alamiya pirddiyi saatey gakkida gisho Xoossaas yayyite; iya bonchchite. Salo, sa7aa, abbaanne pultto haathaa medhdhida Xoossaas goynnite” yaagis.

<sup>8</sup> Koyroyssa kaallidi hara nam77antho kiitanchchoy, “Dere ubbaa tunanne mathoya woyne ushshida, gita Baabilooney kunddasu! Kunddasu!” yaagidi waassis.

<sup>9</sup> Heedzanthro kiitanchchoy entta kaallidi, ba qaala dhoqqu oothidi, “Do7aanne iya misiliya goynniyi qassi iya mallia ba som77on woykko ba kushen wothiya oonikka de7ikkoo, <sup>10</sup> I hanqo xuu7an kumida Xoossa hanqo woyniya uyana. Entti geeshsha kiitanchchota sinthaninne Dorssa sinthan eexiya diinne taman waayettana. <sup>11</sup> Entta waaya cuyay meri merinaw cuyishe daana. Do7aanne iya misiliya goynney qassi he do7aa sunthaa mallyay de7iya oonikka qammanne gallas shemppoy baynna kaa7ettana” yaagis.

<sup>12</sup> Xoossaas kiitaa naageyssatinne Yesuusa ammanetteyssati gencciya minutethay qoncicya wodey hessa.

<sup>13</sup> Hessafe guye, “Hizappe Godan hayqqeyssati anjjettidayssata” yaagiya qaala saloppe si7as.

Ayyaanay, “Ee tuma, entta oosoy entta kaalliya gisho entti bantta daaburappe shemp-pana” yaagees.

### *Kathaa shiisho wode*

<sup>14</sup> Hessafe guye, bootha shaara bolla uttida Asa Na7a daaneyssa be7as. I ba huu7en worqqa kallachcha wothis; qassi ba kushen baaca oykkis. <sup>15</sup> Hara kiitanchchoy Xoossa keethafe keyidi, shaara bolla uttidayssako ba qaala dhoqqu oothidi, “Kathaa shiisho wodey gakkida gisho ne baaca yeddada kathaa cakkha; sa7an de7iya kathay gakkis” yaagis. <sup>16</sup> Yaatin shaara bolla uttidayssi ba baaca sa7a yeddidi, sa7an de7iya kathaa cakkis.

<sup>17</sup> Qassika salon de7iya Xoossa keethafe hara kiitanchchoy keyis; iyawukka oco baaci de7ees.

<sup>18</sup> Tama bolla maati de7iya hara kiitanchchoy yarshsho bessaafe keyis. I ba qaala dhoqqu oothidi oco baaca oykkida kiitanchchuwako, “Woyne ayfey teerida gisho ne oco baaca yeddada, sa7an de7iya woyniyappe qanxa” yaagis. <sup>19</sup> He kiitanchchoy ba baaca yeddidi, sa7an de7iya woyniyappe qanxidi, Xoossa gita hanquwa gum77iya bessan yeggis. <sup>20</sup> Entti Katamaappe gaxan de7iya woyne ayfe gum77iya bessan yedhettidosona. Suuthi woyniya gum77iya bessaafe keyidi issi mukulunne usppun xeetu kilo mitire mela haakkidi, para puulo gakkiya mela eellidi dhoqqu gis.

## 15

### *Wurssetha boshata*

<sup>1</sup> Taani salon hara gitanne malaalisiya malaata be7as. Xoossaas wurssetha hanquwa qonccisiya laappun boshata oykkida laappun kiitanchchoti de7oosona.

<sup>2</sup> Qassi tamara walakettida burccuko abbaa daaneyssa be7as. He abbaa gaxan do7aa, iya misiliyanne iya sunthaay taybuwa xoonidayssata be7as. Xoossay enttaw immida diithaa oykkidi eqqidosona. <sup>3</sup> Entti Xoossaas aylliya Muse mazmuriyanne Dorssa mazmuriya hayssada yaagid yexxoosona.

“Godaw, Ubbaafe Wolqqaama Xoossaw,  
ne oosoy gitanne malaalisiyabaa.

Dere ubbaa kawaw,

ne ogey xillonne tuma.

<sup>4</sup> Geeshshi ne xalaala gidiya gisho

Godaw, new yayyonnayne

ne sunthaa bonchchonney oonee?

Ne xillo oosoy asa ubbaas qoncce gidiya gisho

kawotethi ubbay ne sinthe yidi goynnana”

yaagidi yexxoosona.

<sup>5</sup> Hessafe guye, salon dooyettidi de7iya Xoossa Keethaa, ikka Markkatetha Dunkkaaniya be7as. <sup>6</sup> Laappun boshata oykkida laappun kiitanchchoti Xoossa keethafe keyidosona. Entti geeshshinne phooliya liino ma7o ma77idosona; bantta tiran worqqa dancco dancidosona. <sup>7</sup> Oyduu medhetethatappe issoy, merinaw de7iya Xoossaa hanqoy kumida laappun worqqa xuu7ata laappun kiitanchchotas immis. <sup>8</sup> Xoossaa bonchchuwafenne iya wolqqaafe denddoysan Xoossa Keethay cuyan kumis. Laappun kiitanchchoti oykkida laappun boshati polettana gakkanaaw Xoossa Keetha oonikka gelanaw dandda7ibeenna.

## 16

*Xoossaa hanqoy kumida xuu7ata*

<sup>1</sup> Hessafe guye, Xoossa keethafe laappun kiitanchchotakko, “Bidi Xoossaa hanquwa laappun xuu7atappe sa7an gussite” yaagidi, odiya wolqqaama qaala si7as.

<sup>2</sup> Koyro kiitanchchoy bidi, ba xuu7an de7eyssa sa7an gussin, do7aa mallay de7eyssata bollanne iya misiliya goynnidayssata bolla iitanne zaamiya madunthi keyis.

<sup>3</sup> Nam7antho kiitanchchoy ba xuu7an de7eyssa abban gussin, abbay hayqqida asa suuthi daanis. Qassi abban de7iya medhetetha ubbay hayqqis.

<sup>4</sup> Heedzanthro kiitanchchoy ba xuu7an de7eyssa shaafataninne pultto haathathan gussin, haathati suuthi gididosona. <sup>5</sup> Hessafe guye, haatha bolla maati de7iya kiitanchchoy hayssada yaagishin si7as.

“Ha77ika benikka de7iya geeshshaw,  
hayssada ne pirdida gisho neeni xillo.

<sup>6</sup> Entti geeshshata suuthaanne nabeta suuthaa gussida gisho  
entti suuthu uyana mela oothadasa.

Entti banttau bessiyabaa ekkidosona”  
yaagis. <sup>7</sup> Yarshsho bessaafe,

“Godaw, Ubbaafe Wolqqaama Xoossaw,  
ne pirdday tumanne xillo”

yaagiya qaala si7as.

<sup>8</sup> Oyddantho kiitanchchoy ba xuu7an de7eyssa awa bolla gussin, away ba seelan asaa xuuggana mela awaas wolqqi imettis. <sup>9</sup> Asay wolqqaama seelan xuugettidi, he boshata bolla maati de7iya Xoossaa sunthaa baaddidosona; bantta nagaraappe simmidi Xoossaa bonchchibookona.

<sup>10</sup> Ichhashantho kiitanchchoy ba xuu7an de7eyssa do7aa araata bolla gussin, he do7aa kawotethay dhumi. Asay un77aa gisho bantta inxarsaa saxxoosona. <sup>11</sup> Qassi asay un77aa gishonne maduntha gisho salo Xoossaa baaddidosona; bantta oothida nagaraappe simmibookonna.

<sup>12</sup> Usupuntha kiitanchchoy ba xuu7an de7eyssa gita Efiraxiise shaafan gussin, doloha baggafe yaana kawotas ogey giigana mela haathay melis. <sup>13</sup> Hessafe guye, shodhdhe daaniya heedzu tuna ayyaanati dawiya doonappe, do7aa doonappenne worddo nabiya doonappe keyishin be7as. <sup>14</sup> Entti malaatata oothiya tuna ayyaanata. He heedzu tuna ayyaanati Ubbaafe Wolqqaama Xoossaa gita gallasan hananaw de7iya olaas shiishanaw alame kawota ubbaako baana.

<sup>15</sup> “Hekko, ta kay soda yaana! Asa sinthan kallottonaadanne yeellatonnaada barkkidi, ba ma7uwa naagiya uray anjettidayss!” yaagis.

<sup>16</sup> He tuna ayyaanati kawota Ibraysxe doonan Armmagedoone giya bessan shiishidosona.

<sup>17</sup> Laappuntha kiitanchchoy ba xuu7an de7eyssa carkko bolla gussin, Xoossa Keethan de7iya araataappe, “Polettis” yaagiya wolqqaama qaalay yis. <sup>18</sup> Hessafe wol77anthi wol77ammis; daday dhuuqqis, biittay qaaxxis. Asa sa7an medhettosappe biitti hessa mela qaaxo qaaxxibeenna. Hessi ubbaafe aadhhdida qaaxo. <sup>19</sup> Gita katamay heedzu keyidi

shaakettis; Biitta ubban de7iya katamati dhayidosona. Xoossay gita katamaa Baabiloone qoppidi, ba iita hanqo woyne ushshay kumida xuu7aa iw immis. <sup>20</sup> Haathan tegettida biittati dhayidosona; deretikka benttibookkona. <sup>21</sup> Asaa bolla oytamanne ichchashu kilo giraame mela deexiya wolqqaama shachchi saloppe bukkis. Boshay daro iita gidiya gisho asay shachcha boshaa gisho Xoossa baaddidosona.

## 17

### *Gita laymatiya maccasiw*

<sup>1</sup> Laappun xuu7ata oykkida laappun kiitanchchotappe issoy taakko yidi, "Haaya; daro haathatha bolla uttida gita laymatiya maccase bolla yaanaw de7iya pirdaa ta nena bessana. <sup>2</sup> Alamiya kawoti iira laymatidosona; alamen de7iya asaykka I laymatetha woyni uyidi mathottidosona" yaagis.

<sup>3</sup> He kiitanchchoy tana Geeshsha Ayyaan bazzo biitta efis. Yan issi maccasiya cashsha sunthay i bolla ubban xaafettidi uttida, zo7o do7aa toggidaaro be7as; he do7aas laappun huu7eynne tammu kacey de7ees. <sup>4</sup> He maccasiya kaalose ma7onne zo7o ma7o ma77asu; iya worqqan, bonchcho shuchchaninne inqo giya al77o shuchchan alleeqettasu. Iya ba kushen borssiyaabanne laymatetha tunatethan kumida worqqa xuu7a oykkas. <sup>5</sup> I som77on xuura ooso birshshethay de7iya sunthay, "Gita Baabilooney, laymatethasinne sa7an de7iya tunabaa ubbaas aayo" yaagiya xuufey xaafettidi uttis. <sup>6</sup> Qassi he maccasiya geeshshata suuthaanne Yesuusas markkattishe hayqqidayssata suuthaa uyada mathottidhaarao ta be7ada malaaleetas.

<sup>7</sup> Kiitanchchoy taakko, "Neeni ays malaalettay? Taani new maccasse xuuraanne iya tookkida laappun huu7eynne tammu kacey de7iya do7aa xuuraa odana. <sup>8</sup> Neeni be7ida do7ay koyro de7ees, shin ha77i baawa. He do7ay ciimmo ollaafe keyidi dhayos baana. Sa7ay medhettosappe doomidi, de7o maxaafan entta sunthay xaafettiboonna sa7an de7iya asay do7aa be7idi malaalettana. Hiza, I kase de7ees; ha77i baawa, shin sinthafe yaana.

<sup>9</sup> "Hayssi cincatethinne akeeka koyees. Laappun huu7eti maccasiya uttiya laappun dereta; hessati qassi laappun kawota. <sup>10</sup> Enttafe ichchashu kawoti kunddidosona. Issoy ha77i gakkanaw haarees; hankko Kawoy yiibeenna. I yidi guutha wode takkanaw bessees. <sup>11</sup> Sinthe de7ida do7ay, ha77i baynnayssi, I ba huu7en hospuntha do7aa. I laappun do7atappe isswu; I dhayyanaw bees.

<sup>12</sup> Neeni be7ida tammu kaceti haaro doomiboonna tammu kawota. Shin entti do7aara is-sife issi saate kawotidi haaranaw enttaw maati imettana. <sup>13</sup> Entta ubbaas issi qofay de7ees; entti bantta wolqqaanne bantta maataa do7aas immana. <sup>14</sup> Entti Dorssaara olettana, shin dorssay godata Godaanne kawota Kowo gidiya gisho I xeegidayssati, dooridayssatinne ammanettidayssati he kawota xoonana" yaagis.

<sup>15</sup> Kiitanchchoy qassika taakko, "Laymatiyara uttida he neeni be7ida haathathi yarata, kawotethata, zerethatanne dumma dumma doonan odetteyssata. <sup>16</sup> Qassi neeni be7ida tammu kaceynne do7ay laymatiyaro ixxana. Entti iw de7iya ubbabaa ekkana. Qassi iyo kallo ashshananne I ashwu midigana; yaatidi entti iyo taman xuuggana. <sup>17</sup> Hiza, Xoossa qaalay polettana gakkanaw entta qofay issino gidana mela entti bantta aysiya wolqqaa do7aas immanaadanne Xoossay qoppidayssha entti oothanaada entta wozanan Xoossay amo wothis. <sup>18</sup> He neeni be7ida maccasiya sa7a kawota haariya gita katamiw" yaagis.

## 18

### *Baabiloone kunddethaa*

<sup>1</sup> Yaatidi, gita maati de7iya hara kiitanchchoy saloppe wodhdhishin ta be7as. He kiitanchchuwa bonchchoy sa7aa poo7isis. <sup>2</sup> He kiitanchchoy ba qaala dhoqqu oothidi, "Iya kunddasu! Gita Baabilooney kunddasu!

Baabilooney tuna ayyaanati aqiyaa bessi gidasu.

Dumma dumma iitabatas keethe gidasu;

tuna kafotinne do7ati shemppiya bessi gidasu.

<sup>3</sup> Asa zerehti ubbaa ba laymatetha woyni ushshas.

Sa7aa kawoti iira laymatidosona.

I miikkotethaafe denddooyssan

biittan de7iya zal77anchchoti durettidosona"

yaagis.

<sup>4</sup> Hessafe guye, ta saloppe hayssada yaagiya hara qaala si7as.  
 “I nagaraa iira koxonna melanne,  
     iya ekkanaw de7iya seera hintte ekkonna mela,  
     ta deriyaw iippe keyite.

<sup>5</sup> Hiza, I nagaray salo gakkanaw doorettis.  
 Xoossay I naaqua akeekis.

<sup>6</sup> Iya immidayssa mela zaaridi iw immite.  
 Iya oothida oosuwasa nam77u kushe iw zaarite.  
 Iya giigisida ushshaa bolla hintte nam77u kushe mathoya ushshaa I xuu7an kunthite.

<sup>7</sup> Iya bonchchettidayssadanee iw injjetidayssa mela,  
     iyo metoothitenne kayoyite.

Iya ba wozanan,  
     ‘Taani kaweeda uttas; ta azini baynna maccas gidikke;  
     taani ubbaka kayottike’ yaagasu.

<sup>8</sup> Hessa gisho, bosha ubbay,  
     harggey, kayoynne koshi iyo issi gallas oykkana.

Qassi iya taman xuugettana;  
     ays giikko, I bolla pirddiya Xoossay wolqqaama”  
 yaagis.

<sup>9</sup> “Iira laymatidayssatinne I miikkotethan de7ida, alamiya kawoti he katamiya xuugettin  
 keyaa cuya be7ida wode iw waassidi yeekkana. <sup>10</sup> Entti he katamee waaya be7idi yayyida  
 gisho haakki eqqidi,  
 ‘Ha gita katamee! Wolqqaama katamee!

Baabiloonee, nena ayye!

Neeni issi saate giddon ne pirdaa ekkadasa’ yaagana.

<sup>11</sup> “Entta markkabiya caanaa hizappe shammiya asi baynna gisho sa7an de7iya  
 zal77anchchoti he katamees waassananne kayottana. <sup>12</sup> Entta worrqaa, biraa, bonchcho  
 shuchchaa, inqo giya al77o shuchchaa, kaalose ma7o, liino ma7o, haare ma7o, zo7o  
 ma7o, dumma dumma sawo mithaa, zaale, al77o mithaa, naase biraata, goole shuchchu,  
<sup>13</sup> qarafa, qimame,ixaane, karbbe, shitto, woyne, zayte, liiqo dhiille, gistte, mehe, dorsse,  
 para, para gaare, aylletanne hara asata shammiya oonikkka baawa.

<sup>14</sup> “Zal77anchchoti maccaseekko, ‘Neeni amottida lo77obaa ubbay neeppe dhays. Ne  
 aqoyne alleeqettidabaa ubbay neeppe haakkis. Neeni zaarada entta ubbaa demmaka’  
 yaagidosona. <sup>15</sup> He kataman zal77idi durettida zal77anchchoti I metuwa babbidi iippe  
 haakki eqqana. Entti yeekkananne kayottana. <sup>16</sup> Qassi,  
 ‘Liino ma7o, kaalose ma7onne zo7o ma77ada,  
 worqqan, bonchcho shuchchaninne inqo giya al77o shuchchan alleeqettida,  
 he gita katamees ayye! <sup>17</sup> Hayssa mela gita shalo ubbay issi saate giddon dhays’  
 yaagidosona.

“Markkabiya laaggiya ubbay, markkabiyan biya ubbay, markkabiya bolla oothiya  
 ubbaynne abban zal77iya ubbay haakki eqqidosona. <sup>18</sup> He katamiya xuugettin keyaa cuya  
 be7ida wode ‘Ha gita katamiu daaniya hara katami de7ishshaa?’ yaagidosona. <sup>19</sup> Entti  
 bantta huu7en baana qolidi, waassisodonanne kayottidosona.

‘Abbaa bolla markkabeti de7iya ubbay,  
 I shaluwan durettida ubbay,  
 he katamiya issi saaten dhayida gisho  
 ayye! Ayye!

<sup>20</sup> Saluwaw, I dhayuwan ufaytta!  
 Geeshshato, hawaareto, nabeto,  
 Xoossay hintte gisho I bolla pirdida gisho ufayttite.’ yaagidosona.”

<sup>21</sup> Yaatin, mino kiiitanchchoy woxa daaniya gita shuchchu denthidi abban holishe,  
 “Gita katamiya Baabilooney wolqqan holettada hayssada kunddana; iya hachchife guye  
 ubbaka benttuku. <sup>22</sup> Diithi diikeyssatinne yexeyssati, suusul77enne moyze punneyssati,  
 hizappe guye ne giddon ubbaka si7ettokona. Ay kochcha zal77e zal77iya asikka ne giddon  
 benttenna. Woxa girssi hizappe guye ne giddon si7ettenna. <sup>23</sup> xomppe poo7oy zaaridi  
 ne giddon poo7enna. Machcho ekkeysanne azina geliyari qали hizappe guye ne giddon  
 si7ettenna. Ne zal77anchchoti biitta ubban erettida wolqqaamata. Ne bitan kawotethata  
 ubbaa cimmadasa” yaagis.

<sup>24</sup> Nabeta suuthay, geeshshata suuthaynne biitta bolla hayqqida asa ubbaa suuthay I giddon benttida gisho Baabilooney pirddettasu.

## 19

<sup>1</sup> Yaatin, salon daro asay,  
“Xoossay galatetto!  
Atotethay, bonchchoynne wolqqay nu Xoossaas gido.  
<sup>2</sup> Iya pirdday tumanne xillo.  
Sa7aa tunisida iita laymiw Xoossay pirddis.  
Xoossay ba aylleta suuthaa iippe achchis”  
yaagishin si7as.  
<sup>3</sup> He asay zaaridi bantta qaala dhoqqu oothidi,  
“Xoossaas galati gakko.  
He katamiya merinaw cuyashe daana”  
yaagidosona.  
<sup>4</sup> Laatamanne oyddu cimatinne de7on de7iya oyddu medhetethati araatan uttida Xoossaas gufannidi,  
“Amin77! Xoossaas galati gakko”  
yaagidi goynnidosona.  
<sup>5</sup> Yaatin,  
“Xoossa aylleti,  
Xoosse yayyaa guuthinne gitit ubbay,  
nu Xoossaas galatite”  
yaagiya qaalay araataappe keyis.  
<sup>6</sup> Yaatin, daro asada wocamiya, wolqqaama shaafada guummiya, dadada dechchiya girssay,  
“Xoossaas galati gakko;  
nu Goday, Ubbaafe Wolqqaama Xoossay kawotis.  
<sup>7</sup> Dorssaa yaaganoy gakkida gishonne iya geliyara giigida gisho  
nu ufaytoos, galatoosinne Dorssaa bonchchos.  
<sup>8</sup> Gelos giigidaara phooliyanne geeshshi gidida  
liino ma70 ma77ana mela iw imettis”  
yaagishin ta si7as. (Liino ma7oy geeshshata xillo ooso leemiso.)  
<sup>9</sup> Hessafe guye, kiitanchchoy taakko, “Dorssa yaaganuwa xeegettidayssati anjjetti-dayssata” gada xaafa. He kiitanchchoy gujjidi, “Hayssi Xoossaas tuma qaalaa” yaagis.  
<sup>10</sup> He wode ta iya goynnanaaw iya tohuwa bolla kunddas. Shin I, “Hessa oothofa! Taani Yesuusabaa markkattiya ne melanne ne ishata mela. Ne Xoossaas goynnna” yaagis. Hiza, Yesuusabaa markkattidayssatas nabetetha ayyaani de7ees.

### *Bootha para toggidayssa*

<sup>11</sup> Yaatin, saloy dooyettin, yan bootha pari de7eyssa be7as. He paraa toggidayssi Ammanetidayssanne Tumanchcho geetettees. I xillotethan pirddesinne olettes. <sup>12</sup> Iya ayfey tama laco daanees; iya huu7en daro kallachchi de7ees. Iya bolla I attin hari oonnikka eronna xaaftetida sunthi de7ees. <sup>13</sup> I suuthan muukettida ma70 ma77is; iya sunthaykka Xoossaas Qaala. <sup>14</sup> Phooliyanne geeshshi gidida liino ma70 ma77ida salo olanchchoti bootha parata toggidi iya geedo kaalloosona. <sup>15</sup> Kawotethata qanxiya mashshi iya doonappe keyees. I biraata xam77an asaa haarana. Ubbaafe Wolqqaama Xoossaas hanqo woyne ushshaa gum77iya bessaa I yedhdhana. <sup>16</sup> Iya ma7uwa bollanne iya wodiriya bolla, “Kawota Kawuwanne godata Godaa” yaagiya sunthay xaaftetis.

<sup>17</sup> Hessafe guye, issi kiitanchchoy awa bolla eqqidayssa be7as. He kiitanchchoy salora piradhdhiya kafo ubbaas ba qaala dhoqqu oothidi, “Haa yiite! Xoossaas gibiraa maanaw issi bessi shiiqite. <sup>18</sup> Yidi kawota ashuwa, shalaqata ashuwa, wotaaddareta ashuwa, parata ashuwa, parata toggeyssata ashuwa, asa ubbaa ashuwa, aylleta ashuwa, womaannota ashuwa, gitatanne guuthata ashuwa miite” yaagis.

<sup>19</sup> Do7ay, paraa toggidayssaranne iya olanchchotara olettanaw sa7a kawotinne entta olanchchoti issi bessi shiiqidashin be7as. <sup>20</sup> Shin he do7aynne iya sunthan malaatata oothida worddo nabey iyara issife oykettis. He malaatatan do7aa mallay de7eyssatanne iya misiliya goynneyssata I bailethis. Do7aynne worddo nabey nam77ayka diinnen

eexiya tama abban paxa yegettidosona. <sup>21</sup> Attidayssati paraa togidayssa doonappe keyaa mashshan hayqqidosona. Kafoti ubbay entta ashuwa midi kallidosona.

## 20

### *Mukulu laythi*

<sup>1</sup> Zawi baynna ollaa qulppiyanne gita santhalaata ba kushen oykkida issi kiitanchchoy saloppe wodhdhishin be7as. <sup>2</sup> I dawiya oykkida mukulu laythas gachchis. He dawey koyro shooshaa, Daabuloosa woykko Xalahe. <sup>3</sup> Kiitanchchoy zawi baynna ollan iya yeggidi, mukulu laythi wurana gakkanaaw kawotethata zaari balethonna mela qulppen gorddidi attamis. Hessafe guye, dawey guutha wodes bilettanaw bessees.

<sup>4</sup> Hessafe guye, aaraatatanne araata bolla uttidi pirddana mela maati imettidayssata be7as. Yesuusas markkattida gishonne Xoossa qaala odida gisho bantta goodhiya goyrettida asaa shemppuwa be7as. Entti do7aa woykko do7aa misiliya goynnibookkona. Entti do7aa malla bantta som77on woykko bantta kushen wothibookkona. Entti hayqoppe denddidi Kiristtooras issife mukulu laythi haaridosona. <sup>5</sup> Hayssi koyro dendduwa; attida hankko hayqqidayssati mukulu laythay wurana gakkanaaw hayqoppe denddibookkona. <sup>6</sup> Koyro dendduwas qaadi de7eyssati anjettidayssatanne geeshshata. Entta bolla nam77antho hayquwas wolqqi baawa. Entti Xoossaasinne Kiristtoosas kahine gidana; iyara issife mukulu laythi haarana.

### *Xalahey xoonetethaa*

<sup>7</sup> Mukulu laythay wuridaappe guye Xalahey qashoppe bilettana. <sup>8</sup> I sa7aa gaxappe gaxa gakkanaaw de7iya kawotethata, enttika, Googenne Maagoge geetetteyssata balethidi olas shiishanaw keyana. Entta paydoy abbaa gaxan de7iya shafe mela. <sup>9</sup> Entti biitta ubban laalettidi, geeshshata heeranne Xoossay dosiya katamaa teqqidosona. Shin tami saloppe wodhdhidi enttana mis.

<sup>10</sup> Entta balethida Xalahey, do7aynne worddo nabey yegettida eexiya diinne tama abban yegettis. Entti qammanne gallas merinaw paxa kaa7ettana.

### *Wurssetha pirddaa*

<sup>11</sup> Hessafe guye, gita bootha araata bolla uttidayssa be7as. Sa7inne saloy iya sinthafe baqatidosona; entti zaari benttibookkona. <sup>12</sup> Hayqqidayssati, gitatinne guuthati araata sinthan eqqidayssata be7as; maxaafati dooyettidosona; qassi de7o maxaafa gidida hara maxaafi dooyettis. Hayqqidayssati maxaafan xaafettida bantta oosuwada pirdda ekki-dosona. <sup>13</sup> Abbay ba giddon de7iya hayqqidayssata immis; hayqoygne Si7ooley bantta giddon de7iya hayqqidayssata immidosona. Issi issi asi ba oosuwada pirdda ekkis.

<sup>14</sup> Yaatin, hayqoygne Si7ooley tama abban yegettidosona. He tama abbay nam77antho hayqo. <sup>15</sup> De7o maxaafan iya sunthay xaafettibonna oonikka tama abban yegettis.

## 21

### *Ooratha salonne ooratha sa7a*

<sup>1</sup> Taani ooratha salonne ooratha sa7a be7as. Koyro saloyne koyro sa7ay dhays; abbayka dhays. <sup>2</sup> Geeshsha katamiya, ooratha Yerusalaamey, azina gelanaw alleeqettada giigada de7iya maccasada saloppe Xoossa matappe duge wodhdhishin be7as.

<sup>3</sup> Araatappe hayssada yaagidi, odiya gita qaala si7as; "Xoossa Keethay asaara de7ees; Xoossay ba bonchuwara asaara issife daana. Entti iya dere gidana; Xoossay ba huu7en enttara daana; I entta Xoossaas gidana. <sup>4</sup> Xoossay entta ayfeppe afutha ubbaa quchchan. Hizappe hayqoy woykko kayoy woykko waasoy woykko waayey deenna. Gal77a ubbay aadhhdhis" yaagis.

<sup>5</sup> Araata bolla uttidayssi, "Taani ubbaa oorathi oothana" yaagis. Qassi zaaridi taakko, "Taani odehyssi ammantheyssanne tuma gidiya gisho xaafa" yaagis. <sup>6</sup> Qassi taakko, "Poletts! Taani Alfanee Oomega; Doomethinn Polo. Saamottida oonakka de7o haathaa pultuwafe cigi baynna coo ushshana. <sup>7</sup> Xooniya oonikka hessa ubbaa laattana; taani iyaw Xoossaas gidana; ikka ta na7a gidana. <sup>8</sup> Shin yashshanchchota, ammanettonnayssata, tunata, shemppo wodheyssata, laymatelyssata, biteyssata, eega goynneyssatanne word-danchchota qaaday diinney eexiya tama abban gidana. Hessi nam77antho hayqo" yaagis.

<sup>9</sup> Laappun wurssetha boshati kumida laappun xuu7ata oykkida laappun kiitanch-chotappe issoy taakko yidi, "Haaya, taani nena gelos giigida Dorssaa machchiw bessana" yaagis. <sup>10</sup> Kiitanchchoy tana daro dhoqqa deriya huu7e Geeshsha Ayyaanah kessidi,

geeshsha katamay, Yerusalaamey, saloppe Xoossaas matapape duge wodhdhishin bessis. <sup>11</sup> He katamay Xoossaas bonchchon poo7ees. He katamaa poo7oy yaspaphhiide giya al77o shuchchaa mela; geeshsha birilleda phoolees. <sup>12</sup> He katamaa dirssay wolqqaamanne adusse. Iyaw tammanne nam77u penggetinne he penggeta naagiya tammanne nam77u kiitanchchot de7oosona. Penggeta bolla tammanne nam77u Isra7eele zerethata sunthay xaafettis. <sup>13</sup> Doloha baggara heedzu penggeti, pudeha baggara heedzu penggeti, dugeha baggara heedzu penggetinne wuloha baggara heedzu penggeti de7oosona. <sup>14</sup> Katamaa gimbbe dirssay tammanne nam77u shuchcha baasota bolla eqqis. Entta bolla tammanne nam77u Dorssaa hawaareta sunthay xaafettis.

<sup>15</sup> Taw odiya kiitanchchuwas, katamaa, iya penggetanne iya dirssaa wadhdhiya worqqa xam77ay de7ees. <sup>16</sup> Katamaas oyddu maazaneti de7oosona; katamaa geesaynne gompay issi gina. Kiitanchchoy katamaa ba xam77an wadhdhin, katamay tammanne nam77u mukulu kilo mitire gidis; katamaa geesay, gomppaynne dhoqqatethay issi gina. <sup>17</sup> Kiitanchchoy qassi dirssaa wadhdhin, kiitanchchoy go7ettiya asa kushen issi xeetanne oyttamanne oyddu wadha gidis.

<sup>18</sup> Katamaa dirssay yaspaphhiide giya shuchchan direttis. Katamay masttoteda phooliya geeshsha worqqan oosettis. <sup>19</sup> Katamaa dirssaa baasoy ubba qommo bonchchet-tida shuchchan alleegettis. Koyro hiixettida shuchchay yaspaphhiide, nam77anthoy samppeere, heedzanthy kelqquedoone, oyddanthy baalure, <sup>20</sup> ichchashanthoy sard-donkise, usuppunthoy sarddiyoone, laappunthay kiristiloobe, hospunthoy birille, ud-dufunthoy tophaaaziyone, tammanthy kirispfricaasise, tammanne issinthoy yaakintte, tammanne nam77anthoy ametesxinoose.

<sup>21</sup> Tammanne nam77u penggetas tammanne nam77u inqo giya al77o shuchchi de7ees. Issi issi penggey issi inqon oosettis. Katamaa wogga ogey masttoteda phooliya geeshsha worqqafe oosettis.

<sup>22</sup> Goday, Ubbaafe Wolqqaama Xoossaynne Dorssay katamaas keethe gidiya gisho ta he kataman Xoossa keethi be7abiikke. <sup>23</sup> Xoossaas bonchchoy he katamaas poo7iya gishonne Dorssay iyaw xomppe gidiya gisho katamaas awa woykko ageena poo7o koshshenna. <sup>24</sup> Kawotethati he katamaa poo7on hamuttana; kawotikka bantha bonchchuwa yaa ehana. <sup>25</sup> Qammi yan baynna gisho katamaa penggeti ubba wode dooya gidana; gorddettokona. <sup>26</sup> Kawotethata gitatethaynne bonchchoy he katamaa yaana. <sup>27</sup> Dorssaa de7o maxaafan sunthay xaafetidayssata xalaali attin tunabaa woykko yeellayabaa oothey woykko word-doteypoonikka he katamaa gelenna.

## 22

<sup>1</sup> Yaatidi, kiitanchchoy tana Xoossaas kawotetha araatappenne Dorssaa kawotethaa araataappe goggiya masttoteda phooliya de7o haathaa shaafaa bessis. <sup>2</sup> He shaafay katama ogiya giddora duge goggees. Shaafappe hefinttha baggaranne hafinttha baggara ageenan issi toho; laythan tammanne nam77u toho ayfiyya de7o mithi de7ees. He mitha bonccoy kawotethata ubbaa harggefatee.

<sup>3</sup> He kataman aybi qanggethika deenna. Xoossaas kawotetha araataynne Dorssaa kawotetha araataay he kataman daana. Xoossaas aylleti Xoossaas oothana. <sup>4</sup> Entti iya som77uwa be7ana; iya sunthay entta som77on xaafettana. <sup>5</sup> Hizappe qammi deenna; Godaa Xoossay enttaw xomppe gidiya enttaw xomppe woykko awa poo7o koshshenna. Entti meri merinaw kawotana.

### Yesuusa yuussaa

<sup>6</sup> Kiitanchchoy taakko, "Ha ta odiya qaalay tumanne ammantheyssa. Goday, nabeta ba Geeshsha Ayyaanen kiittiya Xoossay, matan hananabaa ba aylleta bessanaw ba kiitanchchuwa kiittis" yaagis. <sup>7</sup> Yesuusi, "Hekko ta ellesada yaana; ha maxaafan de7iya tinbbite qaala naagiya oonikka anjettidayssa" yaagis.

<sup>8</sup> Taani, Yohaannisi, he ubbabaa si7as; be7as. Taani hessa si7ida wodenne be7ida wode hessa tana bessida kiitanchchuwa goynnanaaw iya tohuwa bolla kunddas. <sup>9</sup> Shin kiitanchchoy taakko, "Hessa ooothofa! Taani needa, nabeta ne ishatadanne ha maxaafan de7iya ubbaa kiitettiya aylleta mela; Xoossaas goynna" yaagis.

<sup>10</sup> Kiitanchchoy zaaridi, "Ha ubbay polettiya wodey matattida gisho ha maxaafan xaafettida tinbbite qaala maatamen gorddofa. <sup>11</sup> Iita oothey gujjidi iita ootho; tuney gujjidi tuno. Lo77o oothey gujjidi lo77o ootho; geeyey gujjidi geeyo" yaagis.

<sup>12</sup> Yesuusi, "Hekko, taani ellesada yaana. Issuwas issuwas iya oosuwada immanaw ta woytoy taara de7ees. <sup>13</sup> Taani Alfanne Oomega; Koyronne Wursethi; Doomethinne Polo.

<sup>14</sup> "Bantta ma7uwa meeccidi geeshsheyssati anjjettidayssata. De7o mithee ayfiyaa maanawunne katamaa penggiyara gelanaw enttaw maati imettis. <sup>15</sup> Shin kanati, bityessati, laymateyssati, shemppo wodheyssati, eeqa goynneyssati, worddo doseyssatinne ootheyssati karen de7oosona.

<sup>16</sup> "Taani, Yesuusi, ha markkatethaa hinttew, woosa keethatas odana mela ta kitananchchuwa kiittas. Taani Dawite sheeshinne zerehti. Taani poo7iya guura bakkala" yaagis.

<sup>17</sup> Geeshsha Ayyaanaynne gelanaw giigida maccasiya, "Haaya" yaagosona. Qassi hayssa si7iya oonikka, "Haaya" yaago. Saamottida oonikka haayo; de7o haathaa koyaa oonikka coo ekko.

<sup>18</sup> Taani ha maxaafan xaafettida tinbbite qaala si7iya oonakka zorays. Oonikka ha qaalaa bolla issibaa gujjiko, Xoossay ha maxaafan xaafettida boshaa iya bolla gujana. <sup>19</sup> Oonikka maxaafan de7iya tinbbite qaalappe issibaa pacisikko, Xoossay ha maxaafan xaafettida de7o mithaa ayfiyaappenne geeshsha katamaappe iya qaadaa pacisana.

<sup>20</sup> Ha ubbaa markkateyssi, "Tuma, taani ellesada yaana" yaagees.

Amin77i; Godaa Yesuusa, haaya.

<sup>21</sup> Godaa Yesuus Kiristtoosa aadho keehatethay hintte ubbaara gido. Amin77i.